

शेठ देवचंद लालभाई जैन पुस्तकोधार फंड

तथा

श्री आगमोदय समिति.



जह्नेरी बजार-मुंबई.

१००००-१-७-१९२९.

गोपीपुरा-सुरत.

वायंडर:-श्रीकृष्ण रुलींग प्रेस.

मुस्तफा मारकेट मुंबई नं. ३.

श्रेष्ठि-देवचंद लालभाई जैनपुस्तकोद्धारे ग्रन्थाङ्कः ७५

चान्द्रकुलीनश्रीमदभयदेवसूरिशिष्यश्रीप्रसन्नचन्द्राचार्योक्त्या श्रीसुमतिवाचकशिष्यैः श्रीगुणचन्द्रगणिभिर्विहितम्

## श्रीमहावीरचरित्रम् ( प्राकृतं )

प्रकाशिका—श्रेष्ठि-देवचन्द लालभाई—जैनपुस्तकोद्धारसंस्था ।  
राजनगरीयविद्याशालाकार्यवाहकैरागमाराधनोत्सवागततदन्यद्रव्येण वितीर्णेन ।

[ अस्य पुनर्मुद्रणाद्याः सर्वेऽधिकारा एतद्भाण्डागारकार्यवाहकाणामायत्ताः स्थापिताः ]  
इदं ग्रन्थरत्नं मुम्नापुर्या जीवनचंद साकरचन्द जवहेरी इत्यनेन निर्णयसागरमुद्रणालये कोलभाट-  
वीथ्यां २६-२८ तमे मन्दिरे रामचन्द्र येसू शेडगेद्वारा मुद्रयित्वा प्रकाशितम् ।


प्रतिसंख्या १२५० ]

वीरसंवत् २४५५, विक्रमसंवत् १९८५, सन १९२९.

[ मूल्यं रु. ४-०-०

Rs. 4-0-0









## श्रेष्ठी देवचन्द लालभाई जव्हेरी.

जन्म १९०९ वैक्रमाब्दे  
कार्तिकशुक्लैकादश्यां (देवदीपावली सोमवासरे) |  
सूर्यपुरे.

निर्याणम् १९६२ वैक्रमाब्दे  
पौषकृष्णतृतीयायाम् (मकरसंक्रान्तमंदवासरे)  
मुम्बय्याम्.

**The Late Sheth Devchand Lalbhai Javeri.**

Born 22nd Nov. 1852 A. D. Surat,

Died 13th January 1906 A. D. Bombay

7-27 :-Copies 5000.

N. S. P.

Shreshthi Devachand Lalbhai Jain Pustakoddhara Series, No. 75.

# Śrī MAHĀVĪRA CHARITAM

(PRĀKRITAM)

BY

Śrī GUṆACHANDRA SŪRĪ

Copies 1250 ]

Price Rs. 4-0-0.

[ A. D. 1929,

[ All rights reserved by the Trustees of the Fund. ]

---

Printed by Ramchandra Yesu Shedge, at the Nirnaya-sagar Press, 26-28, Kolbhat Lane, Bombay.

---

Published by Jivanchand Sakarchand Zaveri, on behalf of Seth Devachand Lalbhai Jain Pustakoddhara  
Fund. No. 121-123, Javeri Bazar, Bombay.

---

# श्रीआगमोदय-समिति संस्थायाः क्रेयग्रंथाः

द्वय-

॥१०॥

क्रं.	नाम.	किंमत.
३४	विशेषा० गाथा निष्यक्रमः	०-५-०
३५	विनारसाप्रकरणं	०-८-०
३६	गजानास्यप्रणो	०-६-०
३७	पार्श्विन्दुप्रकरणं	०-१२-०
३८	विशेषा० भाषांतर भाग १ लो	२-०-०
३९	जैनफिलोसोफी (अंग्रेजी)	१-०-०
४०	योग " "	०-१४-०
४१	कर्म " "	०-१२-०
४२	अनुयोगद्वारसूत्रं	२-८-०
४३	नंदीसूत्रं	२-४-०
४४	मत्तामरकाव्यसंग्रह भाग १ लो	३-०-०
४५	वराहपञ्चा उपाययुक्त	२-०-०
४६	पंचसंग्रहः (स्वोपदेशयुक्तः)	२-८-०

अंक.	नाम.	किंमत.
४८	विशेषा० भाषांतर भाग २ जो	३-०-०
५०	जीवसमासः	१-८-०
५१	शोभनस्तुतिः (संस्कृत) प्रेसमां	८-०-०
५२	स्तुतिचतुर्विंशतिका सचित्रा शोभनमुनिरुता	६-०-०
५३	चतुर्विंशतिका सचित्रा वण्णमट्टिसुरिकृत	६-०-०
५४	मत्तामरकाव्यसंग्रह भाग २ जो	३-८-०
५५	नंदादिसप्तसूत्रीगाथाऽपकारादियुतो विषयानुक्रमः	२-०-०
५६	आवश्यकमलयगिरिकृतटीका भाग १ लो	४-०-०
५७	श्रीचतुर्विंशतिजिनानन्दस्तुतयः सविवरणाः सचित्राः	६ ० ०
५८	लीवडीमंडारना हस्तलिखितपुस्तकौनुं सूचीपत्र	१-४-०
५९	जैनधर्मवरस्तोत्र	प्रेसमां
	लोफप्रकाश गुजरातीभाषांतर भाग १ लो	प्रेसमां
	आवश्यकमलयगिरिकृतटीका भाग २ जो	प्रेसमां
	प्राप्तिस्थान सुरत गोपीपुरा	

### ७ प्रस्तावः

वैशाख्यां शंखसत्कारः गंडकिकायां नावि- कोपसर्गः ऋतुषट्कस्याविकारिता	२१९
वाणिज्यग्रामे आनन्दगाथापतिः अव- धिमान्	२१९
श्रावस्यां वर्षारत्रः (१०) सातुषष्टिके प्रतिमाः	२२६
दृढभूमौ पेढाले संगमोपसर्गाः, संगम- कस्य सौधर्मात्रिर्वासनं	२३१
आलंभिकायां विद्युत्कुमारेन्द्रस्तुतिः श्वेतां- विकायां हरिस्सहस्तुतिः श्रावस्यां स्क- न्दप्रतिमासत्कारः कौशांब्यां चन्द्र- सूर्यावतारः वाराणस्यामिन्द्रपूजा रा-	

जगृहे ईशानार्चा मिथिलायां जनक- स्तुतिः धरणेन्द्रवन्दना	२३३
राजगृहे वर्षारत्रः (११) भूतानन्दस्तुतिः जीर्णश्रेष्ठिभावना केवलिदेशना	२३४
चमरेन्द्रोत्पातः सुसुमारे भोगपुरे माहेन्द्रोपसर्गः सनत्कुमारेन्द्र- नतिः नन्दीग्रामे नन्दिस्तुतिः	२४०
चम्पापातः धारणीमरणं चन्दना कुल्मा- पाभिग्रहः	२४७
वाण्मासिकः कीलकोपसर्गः मध्यमापापायां कीलकनिर्गमः	२५०
तपःसंकलना केवलज्ञानं च	३५१
८ प्रस्तावः समवसरणरचनं धर्मदेशना	२५३

गणधराणां प्रतिबोधः दीक्षा चन्दनाया दीक्षा संवस्थापना	२५९
नृपभदत्तस्य देवानन्दायाश्च दीक्षा	२६०
क्षत्रियकुण्डे समवसरणं पर्पदश्च नन्दि- वर्धनकृता स्तुतिः जमालिदीक्षा (मा- त्रादिवचनप्रतिवचनानि) महः	२६५
जमालेर्निहवत्वं प्रियदर्शनाया बोधः ज- मालेर्गतिः	२६९
कौशाम्ब्यां सुरप्रियलब्धवरे नृपस्य क्रोधः चण्डप्रद्योतकृता मृगावत्याः प्रार्थना शी- लरक्षार्थं छलं मृगावत्या दीक्षा या सा सा सोदाहरणं आनन्दादीनां वाणि- ज्यग्रामादिषु बोधः कौशाम्ब्यां चन्द्र- सूर्यावतरणं कैवल्यं	२७४

उत्तरापथे सिलिन्ध्रे केशवशिवापुरो मं-  
खः पूर्वप्रियोपलब्धये पट्टिकाकृतिः मं-  
खलीसुभद्रयोर्मखत्वं गोशालजन्म,  
श्रीवीरेण मीलनं कोलाके शिष्यत्वं प्रा-  
गृहीताया नियतेः स्थालीस्फोटे दाढ्य  
ब्राह्मणग्रामे उपनन्दगृहदाहः चंपायां  
वर्षावासः (३) कालाके पात्रालके च ताडनं  
कुमारे मुनिचन्द्राः चौराके सोमाजय-  
न्तीभ्यां मोचनं पृष्ठचम्पायां वर्षावासः (४)  
कुतांगले हरिद्राः श्रावस्त्यां मनुष्यमांसं  
हरिद्रद्रुमेऽग्निः संगलाग्रामे वासुदेवगृहे  
आवर्ते बलदेवगृहे च स्थानं चौराके  
मंडपदाहः कलंबुकायां कालमेघह-  
स्तिनौ स्लेच्छदेशे गमनं पूर्णकलशे स्ते-

नवधः भदिलायां वर्षावासः (५) कद-  
लीसमागमे जंबूखंडे चास्तारिकाभक्तं  
तंवाके नन्दिपेणाः कूपिके विजयाप्र-  
गल्भाभ्यां मोचनं वैशालीप्रस्थानं (६)  
गोशालो दाधितः अयस्कारघातः १९८  
विभेलकयक्षस्योत्थानपर्याणिका २१२  
शालिशीर्षे कटपूतनोपसर्गः लोकावधिः २१३  
आलम्बिकायां वर्षारान्नः (७)  
गोशालमीलनं २१३  
कुण्डागे मधुमथनगृहे गोशालचेष्टा मर्दन-  
ग्रामे बलदेवगृहे च २१३  
सालग्रामे सालज्जोपसर्गपूजे २१४  
लोहार्गले जितशत्रुकृतः सत्कारः २१४

पुरिमताले वग्गुरश्रेष्ठिकृता पूजा, धर्मघोष-  
सूर्युक्तं पूजाफलं दानं च २१७  
तुन्नागपथे श्रीभूमौ च गोशालस्य ताडनं  
राजगृहेऽष्टमो वर्षावासः (८) २१८  
लाढावज्रभूमिशुद्धभूमिपूषसर्गाः वृक्षमूले  
वर्षावासः (९) २१८  
सिद्धार्थकूर्मारग्रामयोरन्तराले तिलप्रभादि २१८  
वैश्यायनस्योत्थानपर्याणिका तेजोलेश्या  
तन्निवारणं तदुपायप्रभोत्तरे २२३  
कूर्मारसिद्धार्थपुरोरन्तराले तिलनिश्चयात्  
प्रवृत्तिपरिहारो नियतिवाददाढ्यं च  
श्रावस्त्यां तेजोलेश्या पार्श्वन्तेवासि-  
संगमः २२४



प्रेक्षणकं अश्वग्रीवदूतापमानं सिंहवधः ५०  
 युद्धं प्रतिवासुदेववधः अंतःपुरविलापः  
 अंगादिदेशसाधनं कोटीशिलोत्पाटनं ६०  
 पोतनपुरे श्रेयांसजिनागमः धर्मकथा  
 सम्यक्त्वं ६२  
 गायकमृतिः देव्यपमानं सप्तमनरकगमनं ६३  
 धर्मघोषसूरिदेशना अचलदीक्षामोक्षौ ६३  
 प्रियमित्रचक्री अनार्यदेशसाधनं चक्रिकरद्विः  
 वैराग्यं प्रोष्ठिलाचार्यदेशना दीक्षा शुक्रदेवः ७१

#### ४ प्रस्तावः

नन्दनजन्म प्रोष्ठिलाचार्याः देशना ७२  
 नृपो नरसिंहः चम्पकमालादेवी मन्त्रिवर्गः  
 सुतचिन्ता घोरशिवागमः मन्त्रसाधनं  
 घोरशिवमूर्च्छा श्रीभवनपुरं अवन्ति-

सेनो राजा वीरसेनविजयसेनौ राज्यं  
 खेचरयुद्धं गगनवल्लभे विजयराजसुतो  
 जयशेखरः वैर्यमिततेजाः वीरसेनरा-  
 जस्यापहारः विजयसेनकृतो राज्याक्रमः  
 सोमदत्तगृहे स्थानं प्रस्थानं योग्याचार्यो  
 महाकालनामा प्रव्रज्या, अष्टशतेन होमः  
 क्षत्रियैः, वैताढ्यगमनं चंपकमालाया  
 ध्वजस्वप्रः घोरशिवस्य राज्यं नर-  
 विक्रमाभिधानं हर्षपुराधिपदेवसेनदु-  
 हितुर्वरणं कालमेघमल्लजयः शीलवत्यै  
 पितृशिक्षा पुरप्रवेशः युवतिविभ्रमा  
 जयकुञ्जरवशीकरणं कुमारस्य प्रवासः  
 पाटलगृहे वासः शीलवत्या अपहारः  
 जयवर्धने राज्यं नद्या नरविक्रमापहारः

सामन्तभद्रः देशना सुतौ गोकु-  
 लिकगृहे सुतसंयोगः शीलदाढ्यं शी-  
 लवत्या योगः मालाकाराय चौडराज्य-  
 दानं जयन्त्यां गुरोर्गमनं देशना पित्रा  
 योगः राज्याभिषेकः शिक्षा साधु-  
 नृपयोः १०९

नन्दननृपस्य दीक्षा विंशतिस्थानकारा-  
 धनं प्राणते देवः १११  
 देवानन्दाकुक्षाववतारः स्वप्नानामुपलंभश्च १११  
 इन्द्रस्तुतिः गर्भापहारः देवानन्दाक्रन्दः ११२  
 त्रिशलाकुक्षौ संक्रमः स्वप्ना वृद्धिर्मनोरथाः ११४  
 निष्पन्दत्वं शोकः अभिग्रहः ११५  
 श्रीवीरस्य जन्मनि दिङ्कुमारीमहः ११७  
 अभिषेकसामग्री मेरुचालनं अभिषेकः १२३

नृपकृतो महः १२५  
 वर्धमाननामकरणं सुरपिशाचसर्परूपा-  
 भ्यामभीतिः लेखशालानयनं १२७  
 यशोदाभिधानकारणं १३०  
 यशोदया श्रीवीरस्य विवाहः, प्रियदर्शना-  
 जन्म १३२  
 मातापित्रोः स्वर्गमनं, नन्दिवर्धनस्य रा-  
 ज्याभिषेकः १३४  
 संवत्सरदानं नन्दिवर्धनकृता महानसशा-  
 लां लोकान्तिकागमनं च १३६  
 दीक्षाभिषेकः चन्द्रप्रभा शिविका दीक्षा-  
 महोत्सवः १४१  
 ५ प्रस्तावः  
 सोमवाक्षणाय वसार्धदानम् १४४

कूर्मोरग्रामे गोपोपसर्गः शक्रकृता निर्भ-  
 र्त्सना दूइज्जंताश्रमे गमनं वर्षायाः  
 पक्षे गते निर्गमः अभिग्रहपंचकं १४८  
 वर्धमानग्रामस्यास्थिग्रामत्वे हेतुः वृषस्या-  
 प्रतिजागरणाद् द्वेषः मारिः चैत्यम् १५२  
 शूलपाणिकृता उपसर्गः तत्प्रतिबोधः  
 स्वप्नदशकं इन्द्रशर्मोक्तं तत्फलं (१) १५६  
 अच्छंदकस्य कुटिलता शक्रशिक्षादि १५८  
 सुवर्णवालुकायां वसार्धस्य पातः, नन्दि-  
 वर्धनाय लक्ष्णेन दानं तस्य १५९  
 कनकसलाश्रमः ( गोभट्टो विप्रः वना-  
 रसीप्रस्थानं विद्यासिद्धाकृष्टा रसवती  
 युवतिश्च शीलदाढ्यं जालन्धरे चन्द्र-  
 लेखाचन्द्रकान्ते ईशानचंद्रः रक्षाव-

लयं गंगायां प्रवेशः नास्तिकवाक्  
 जालन्धरे गमनं ईशानचन्द्ररक्षा यो-  
 गिनीशान्तिः परस्त्रीनियमः गृहे आ-  
 गमनं भार्यामरणश्रवणं धर्मघोषस्य  
 देशना दीक्षा मंझुकीविराधना क्रोधः  
 ज्योतिष्कः तापसः चंडकौशिकः  
 बोधः १७६  
 उत्तरवाचाला श्वेतांविकायां प्रवेशि-  
 नृपकृता स्तुतिः १७७  
 सुरमिपुरं सुदंष्ट्रसुरोपसर्गः कंबलशंबलौ  
 मथुरा जिनदासः साधुदासी गंगोत्तारः  
 स्थूणाके गमनं पुण्यबोधः १८२  
 ६ प्रस्तावः  
 राजगृहनालन्दायां तन्तुवायार्जुनशालायां  
 वर्षावासः (२) १८३

उत्तरापथे सिलिन्ध्रे केशवशिवापुत्रो मं-  
खः पूर्वप्रियोपलब्धये पट्टिकाकृतिः मं-  
खलीसुभद्रयोर्मखत्वं गोशालजन्म,  
श्रीवीरेण मीलनं कोलाके शिष्यत्वं प्रा-  
गृहीताया नियतेः स्थालीस्फोटे दार्ढ्यं  
ब्राह्मणग्रामे उपनन्दगृहदाहः चंपायां  
वर्षावासः (३) कालाके पात्रालके च ताडनं  
कुमारे मुनिचन्द्राः चौराके सोमाजय-  
न्तीभ्यां मोचनं पृष्ठवम्पायां वर्षावासः (४)  
कुतांगले दरिद्राः श्रावस्यां मनुष्यमांसं  
हरिद्रुमेऽग्निः मंगलाग्रामे वासुदेवगृहे  
आवर्ते बलदेवगृहे च स्थानं चौराके  
मंडपदाहः कलंबुकायां कालमेघह-  
स्तिनौ म्लेच्छदेशे गमनं पूर्णकलशे स्ते-

नवधः भद्रीलायां वर्षावासः (५) कद-  
लीसमागमे जंबूखंडे चास्तारिकाभक्तं  
तंवाके नन्दिषेणाः कूपिके विजयाप्र-  
गल्भाभ्यां मोचनं वैशालीप्रस्थानं (६)  
गोशालो बाधितः अयस्कारवातः १९८  
विभेलकयक्षस्योत्थानपर्याणिका २१२  
शालिशीर्षे कटपूतनोपसर्गः लोकावधिः २१३  
आलम्बिकायां वर्षारान्नः (७)  
गोशालमीलनं २१३  
कुण्डागे मधुमथनगृहे गोशालचेष्टा मर्दन-  
ग्रामे बलदेवगृहे च २१३  
सालग्रामे सालज्जोपसर्गपूजे २१४  
लोहार्गले जितशत्रुकृतः सत्कारः २१४

पुरिमताले वग्गुरश्रेष्ठिकृता पूजा, धर्मवोष-  
सूर्युक्तं पूजाफलं दानं च २१७  
तुन्नागपथे श्रीभूमौ च गोशालस्य ताडनं  
राजगृहेऽष्टमो वर्षावासः (८) २१८  
लाढावज्रभूमिशुद्धभूमिपूषसर्गाः वृक्षमूले  
वर्षावासः (९) २१८  
सिद्धार्थकूर्मारग्रामयोरन्तराले तिलप्रश्नादि २१८  
वैश्यायनस्योत्थानपर्याणिका तेजोलेश्या  
तन्निवारणं तदुपायप्रश्नोत्तरे २२३  
कूर्मारसिद्धार्थपुरोरन्तराले तिलनिश्चयात्  
प्रवृत्तिपरिहारो नियतिवाददार्ढ्यं च  
श्रावस्यां तेजोलेश्या पार्श्वन्तेवासि-  
संगमः २२४

८ गुरुसाराओ धवलाउ सुविहिया साहुसंतई जाया ३४०, इत्येवं श्रीजिनेश्वरसूरेः सुविहितानामुद्भवो वर्णितः, तथाच तेभ्यः  
खरतरोत्पत्तिं वावदुका दूरं निरस्ताः, यद्यपि कैश्चिदपास्य भवभियं न्यस्तमत्र 'खरयरया' इति पदं न च तत् प्रलेष्वादर्थेषु, न च यथार्थं,  
तदनुयायिभिर्व्याकरणसंवेगरंगशालादिवृत्तिसुरसुन्दरीचरित्रादिषु तदुल्लेखस्याकृतेः, न च मात्रागणोऽपि उकारादारब्धो यथायथं समाप्नोति  
इत्यलमतिविस्तरेण / चरित्रस्यास्य मुद्रणमारब्धपूर्वं श्रेष्ठि देवचंद लालभाइ जैनपुस्तकोद्धारसंस्थया, परं समाप्तेरवसरे श्रीराजनगरे  
श्रेष्ठिसुबाभाइ रवचंद इत्यनेन स्थापिताया विद्याशालासंस्थायाः कार्यवाहकैः श्रेष्ठिशिवाभाइ मोहनभाइ (२) जीवनभाइ  
इत्येभिः आगमाराधनोत्सवागतेनान्येन च द्रव्येण साहाय्यं चिकीर्षुभिः पंचविंशतिशतिका दत्ता द्रम्माणां संस्थायै एतस्यै, तेनानया  
संस्थया यथायथं समाप्य प्राकाश्यं नीतं चरित्रमेतत् । शोधने विहितेऽपि श्रमे स्वलितं यत् शोधयन्तु धीमन्तः सज्जनास्तदित्यर्थयते  
आनन्दसागरः १९८५ कार्तिकशुक्ला ३ गुरुवासरे राजनगरात्

---

उत्तरापथे सिलिन्ध्रे केशवशिवापुत्रो मं-  
खः पूर्वप्रियोपलब्धये पट्टिकाकृतिः मं-  
खलीसुभद्रयोर्मखत्वं गोशालजन्म,  
श्रीवीरेण मीलनं कोलाके शिष्यत्वं प्रा-  
ग्गृहीताया नियतेः स्थालीस्फोटे दाढ्यं  
ब्राह्मणग्रामे उपनन्दगृहदाहः चंपायां  
वर्षावासः (३) कालाके पात्रालके च ताडनं  
कुमारे मुनिचन्द्राः चौराके सोमाजय-  
न्तीभ्यां मोचनं पृष्ठचम्पायां वर्षावासः (४)  
कुतांगले दरिद्राः श्रावस्यां मनुष्यमांसं  
हरिद्रुमेऽग्निः मंगलाग्रामे वासुदेवगृहे  
आवर्ते बलदेवगृहे च स्थानं चौराके  
मंडपदाहः कलंबुकायां कालमेघह-  
स्तिनौ म्लेच्छदेशे गमनं पूर्णकलशे स्ते-

नवधः भदिलायां वर्षावासः (५) कद-  
लीसमागमे जंबूखंडे चास्तारिकाभक्तं  
तंवाके नन्दिषेणाः कूपिके विजयाप्र-  
गरभाभ्यां मोचनं वैशालीप्रस्थानं (६)  
गोशालो बाधितः अयस्कारघातः १९८  
विभेलकयक्षस्योत्थानपर्याणिका २१२  
शालिशीर्षे कटपूतनोपसर्गः लोकावधिः २१३  
आलम्बिकायां वर्षारत्रः (७)  
गोशालमीलनं २१३  
कुण्डागे मधुमथनगृहे गोशालचेष्टा मर्दन-  
ग्रामे बलदेवगृहे च २१३  
सालग्रामे सालज्जोपसर्गपूजे २१४  
लोहार्गले जितशत्रुकृतः सत्कारः २१४

पुरिमताले वग्गुरश्रेष्ठिकृता पूजा, धर्मवोष-  
सूर्युक्तं पूजाफलं दानं च २१७  
तुन्नागपथे श्रीभूमौ च गोशालस्य ताडनं  
राजगृहेऽष्टमो वर्षावासः (८) २१८  
लाढावज्रभूमिशुद्धभूमिषूपसर्गाः वृक्षमूले  
वर्षावासः (९) २१८  
सिद्धार्थकूर्मारग्रामयोरन्तराले तिलप्रश्नादि २१८  
वैश्यायनस्योत्थानपर्याणिका तेजोलेश्या  
तन्निवारणं तदुपायप्रश्नोत्तरे २२३  
कूर्मारसिद्धार्थपुरोरन्तराले तिलनिश्चयात्  
प्रवृत्तिपरिहारो नियतिवाददाढ्यं च  
श्रावस्यां तेजोलेश्या पार्श्वन्तेवासि-  
संगमः २२४

## श्रीमहावीरचरित्रस्योपोद्घातः ।

श्रमणस्य भगवतो महावीरस्य चरित्रमिदमुपदाक्रियमाणं सज्जनेभ्योऽस्ति, यद्यपि भगवतश्चरित्राणि नैकानि श्रीहेमचन्द्राचार्य-नेमि-चन्द्राचार्यादिभिर्विहितानि सुन्दरतराणि मुद्रितपूर्वाणि च परं न किमप्येतावन्मानं प्रत्नं चातः किमपि, यत एतच्चरित्रं वैक्रमीयायां द्वादशशताब्द्यामेकोनचत्वारिंशदधिकेषु समानां व्यतीतेषु विदुष्वं द्वादशसहस्रमानं च, रचयितारश्चास्य चान्द्रकुलीनाः श्रीमन्तो गुणचन्द्राः सुमतिवाचकविनेयाः, एतच्च प्रस्तुतचरित्रप्रान्तभागावलोकनात् स्पष्टमवसीयते, यत आहुस्तत्र ते—

सिरिसुमङ्गायगाणं विण्णयलेसेण । गणिणा गुणचंदेणं रइयं सिरिवीरचरियमिणं ॥ ५७ ॥

— गणिनश्चेमे चान्द्रकुलीनश्रीवर्धमान-जिनेश्वरबुद्धिसागर-जिनचन्द्र-अभयदेवसूरिशिष्यश्रीप्रसन्नचन्द्राचार्यवचनेन व्यधुरेनत्, यत उक्तं ग्रन्थकृद्भिरत्रैव प्रान्त्यभागे—

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिब्ब ॥ ४८ ॥

बहलकलिकालतमपसरपूरियासेसविसमसमभागो । दीवेणंव मुणीणं पयासिओ जेण मुत्तिपहो ॥ ४९ ॥

मुणिवइणो तस्स हरअट्टहाससियजसपसाहियासस्स । आसि दुवे वरसीसा जयपयडा सूरससिणोब्ब ॥ ५० ॥

भवजलहिवीइसंभंतभवियसंताणतारणसमत्थो । बोहित्थोब्ब महत्थो सिरिसूरिजिणेसरो पढमो ॥ ५१ ॥

गुरुसाराओ धवलाउ सुविहिया (निम्मला पु.) साहुसंतई जाया । हिमवंताओ गंगव्व निग्गया सयलजणपुजा ॥ ५२ ॥

अन्नो य पुत्रिमायंदसुंदरो बुद्धिसागरो सूरि । निम्नवियपवरवागरणछंदसत्थो पसत्थमई ॥ ५३ ॥

एगंतवायविलसिरपरवाइकुरंगभंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥

संवेगरंगसाला न केवलं कव्वविरयणा जेण । भव्वजणविम्हयकरी विहिया संजमपवितीविं ॥ ५५ ॥

ससमयपरसमयन्नू विसुद्धसिद्धंतदेसणाकुसलो । सयलमहिवलयवित्तो अन्नोऽभयदेवसूरिति ॥ ५६ ॥

जेणालंकारधरा सलक्खणा वरपया पसन्ना य । नव्वंग (सिद्धंत पु.) वित्तिरयणेण भारई कामिणिच्च कया ॥ ५७ ॥

तेसिं अत्थि विणेओ समत्थसत्थत्थबोहकुसलमई । सूरि पसन्नचंदो चंदो इव जणमणाणंदो ॥ ५८ ॥

तव्वयणेणं सिरिसुमइवायगाणं विणेयलेसेण । गणिणा गुणचंदेणं रइयं सिरिवीरचरियमिमं ॥ ५९ ॥

अत्र नहि खरतरगच्छप्रादुर्भावस्य गन्धोऽपि, एवमेव च न श्रीजिनेश्वरसूरिशिष्यश्रीजिनचन्द्रकृतायां संवेगरंगशालायां न च श्रीअभय-  
देवसूरिकृतायां शास्त्रततौ न च श्रीअल्लदेवोपाध्यायकृते सुरसुन्दरीचरिते यावत् अशीत्यधिके समासहस्ते जावालिपुरि चतुर्मासीस्थिताभ्यां  
श्रीमज्जिनेश्वरबुद्धिसागरसूरिभ्यां विहितयोरष्टकवृत्तिबुद्धिसागरव्याकरणयोरपि न खरतरगच्छप्रादुर्भावगन्धोऽपि, एवं यदि श्रीजिनेश्वरसूरिभिस्त-  
त्पट्टोद्भवैश्चान्यैः सूरिभिर्न स्वीकृता तदा खरतरोत्पत्तिस्तर्हि तत्परम्पराया बहिर्वर्तिभिः प्रलपितेन किम् ? खरतरगच्छप्ररूपणामूलभूतो जिनवल्लभ  
एव प्रश्नोत्तरैकषष्टिशतके स्वस्य कूर्चपुरीयजिनेश्वरशिष्यतामाह, किंच-पुण्यपत्तनस्था या कोट्याचार्याया विशेषावश्यकवृत्तिपुस्तिका सापि  
स्पष्टमेव निगदति यदुत न श्रीजिनेश्वरसूरेः खरतरविरुदं न च जिनवल्लभस्तत्परंपरागत इति, यतः सा एकादशशतकीयसप्तत्रिंशद्वर्षेषु लि-  
खिता, लेखकश्चास्या जिनवल्लभस्यान्तेवासी नेमिकुमारः, स स्पष्टमाख्याति यदुत कूर्चपुरीयजिनेश्वरशिष्यजिनवल्लभार्थं पुस्तकमिदमलेखीति,

अन्यत्र विशेषावश्यकमाप्यप्रतेः प्रान्तेऽपि नेमिकुमार इत्यमेवाह, तयो च न तत्र जिनेश्वरसूरेः खरतरविरुदं जिनवल्लभस्य तत्परंपरानि-  
र्गतता च, पाश्चात्यैः खरतरैर्महतामभिधानेन प्रतिष्ठामभिलाषुकैः कल्पित एवैषः वृत्तान्तः, अत एवोपदेशसप्ततिकारैः 'येभ्यः प्रतिष्ठामापन्नो,  
गच्छः खरतराभिधः' इति वाक्येन खाद्यानां प्रलापो ध्वनितः सत्य एव लक्ष्यते ।


किंच—या खरतरगच्छमूलभूतेन जिनवल्लभेन श्रीवीरस्य भगवतो गर्भापहारः षष्ठकल्याणकतया मंतः सोऽपि नैभिर्गणिभिर्मंतः,  
अत एव च श्रीमद्भिरत्र चतुर्थप्रस्तावस्योपसंहारे पत्रे १४१ 'गम्भावयारजम्मणदिक्खाकल्लाणकहणपडिवद्धो—चउत्थओ एस पत्था-  
यो' इत्युक्त्वा गर्भापहारस्य कल्याणकता निराकृता, यद्यपि श्रीमद्भिर्हरिभद्रसूरिभिर्यात्रापद्माशके श्रीमद्भिरभयदेवसूरिभिः रवाद्यैरात्मपूर्वज-  
तया स्वीकृतैश्च तद्वृत्तौ 'इत्थुत्तरजोएणं चउरो' इत्येतत्सूत्रेण तद्विवरणेन च स्पष्टतया षट्कल्याणकवादिनां जिनवल्लभादीनां यदृच्छावादिता  
दर्शितैव तथापि केचन स्वगच्छाग्रहवन्त आहुः यदुत सर्वजिनकल्याणकानां समतां दर्शयितुं तैस्तथोक्तं, यद्यपि क्वचनापि षष्ठकल्याण-  
कस्यानुक्ततया न तत् श्रद्धातुं शक्यमागमरसिकैः, परमत्र तैरपि तथा वक्तुं न शक्यं, यतो वीरचरित्रे अत्र अन्यत्र च कुत्रापि विहाय  
जिनवल्लभं तदनुसारिणं च न कोऽप्यागमश्रद्धालुराह कल्याणकपट्टं, तथा च यथा श्रीमलयगिरिभिः जिनवल्लभस्य संहननानां शक्तिवा-  
चकतां सिद्धान्तानभिहितामपि सिद्धान्ताभिहितां मन्वानस्योत्सूत्रवादिता श्रीजीवाभिगमप्रज्ञापनादिवृत्तौ स्पष्टमभिहिता तथैवात्रापि तस्य  
तथात्वं ध्वन्यमानं न व्याहन्यते इत्यलं चसूर्या गच्छकदाग्रहरसिकैः ।

चरित्रे चात्र स्त्रीवालसुबोधा प्राकृतैवाद्या मापा, तथाच प्राकृतवाणीविलासिनामप्राकृतानामतीवादरास्पदमिदं, विशेषतस्तत्र तत्रा-  
नेकविषयगतान् प्रवन्धान् दिदृक्षूणां । प्रस्तावाश्चात्र श्रीमद्भिः कृता अष्ट, प्रतिप्रस्तावं चान्नाधिकारा इमे



प्रस्तावः	विषयः	पत्रं	प्रस्तावः	विषयः	पत्रं
१	श्रीवीरस्य सम्यक्त्वलाभः	२	५	चण्डकौशिकप्रतिबोधनावसानं वृत्तं	१८२
२	मरीचिः षट्परित्राजकभवाश्च	२८	६	गोशालकाय तेजोलेश्योपायकथनान्तं वृत्तं	२२३
३	प्रियमित्रान्ता भवाः	७०	७	केवलज्ञानोत्पत्त्यवसानं वृत्तं	२५०
४	श्रीवीरस्य च्यवनगर्भजन्मदीक्षाः	१४१	८	निर्वाणान्तं वृत्तं ग्रन्थकृतप्रशस्तिश्च	३६०

चरित्रं चैतत् श्रीमतां प्रसन्नचन्द्रसूरीणां वचनेन श्रीमद्विंहितं, परं विधापनायाभ्यर्थिताः श्रीमन्तः श्रीमद्भ्यां छत्रावली(छत्राल)-  
वास्तव्याभ्यां श्रेष्ठिभ्यां शिष्टवीरनामभ्यां, तयोः पिता जज्जनागः कर्पटवाणिज्यात् छत्रावल्यामागतः, तत्र च कर्पटवाणिज्ये जज्जनागपित्रा  
श्रीमद्वायडगच्छीयजीवदेवसूरितच्छिष्यश्रीजिनदत्ताभ्यामधिगतसम्यक्त्वेन नन्दीश्वरचैल्यं विहितं श्रीमता गोवर्धनश्रेष्ठिना, तत्कुटुम्बवृक्षश्चायं



स्पाष्टं चेदं ग्रन्थप्रशस्तौ, तथाहि—

एयस्स विरयणंमी निव्वंधो जेसि गाढमुप्पन्नो । ते पुण मूलाओ चियं साहिजंते निसामेह ॥ ६० ॥  
सियजसजोण्हाधवलियनायकुलनहयले मयंकुव्व । पुव्वमहेसि महेसीपणओ सिरिजीवदेवपहू ॥ ६१ ॥  
तस्स सुसिस्सो सिद्धंतसिद्धसुविसिद्धसंजमाभिरओ । गुणरयणरोहणगिरी पयडो जिणदत्तसूरीत्ति ॥ ६२ ॥  
गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुल्लो जए जाओ ॥ ६३ ॥  
तेहिंतो पडिबुद्धो 'वायड'कुलभवणजयपडायनिभो । कप्पडवाणिज्जपुरे सेट्ठी गोवद्धणो आसि ॥ ६४ ॥  
नंदीसरावलोयणमणाण भव्वाण दंसणत्थं च । कारावियं सुतुंगं चावन्नजिणालयं जेण ॥ ६५ ॥  
धम्मधरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उप्पन्ना ॥ ६६ ॥  
पढमो अम्मयनामो वीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥  
नयविणयसच्चधम्मत्थसीलकलिएहिं जेहिं दिट्ठेहिं । नूणं जुहिट्ठिलाईवि सदहिजंति सप्पुरिसा ॥ ६८ ॥  
अह संथारयदिकखं पवज्जितं भावसारमंतंमि । गोवद्धणंमि सगं गयंमि तह पढमपुत्तदुगे ॥ ६९ ॥  
सो सेट्ठी जज्जणागो छत्तावल्लीए वासमकरिंसु । सब्बकणिट्ठो नन्नयसेट्ठी पुण मूलठाणेवि ॥ ७० ॥  
तेसिं च भइणिपुत्तो नियपुत्ताओवि गाढपडिवंधो । आसि जसणागनामो सेट्ठी सुविसिद्धगुणनिलओ ॥ ७१ ॥  
अह नन्नयस्स पुत्ता पयडा सावित्तिकुच्छिसंभूया । दोन्नि चिय उप्पन्ना गोवाइच्चो कवड्डी य ॥ ७२ ॥

सतुंजयपमुहसमत्यतित्थजत्ता पयट्ठिया जेण । पढमं चिय तस्स कवड्ढिसेट्ठिणो को समो होज्ज ? ॥ ७३ ॥  
 पुरिसत्थकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥  
 जाओ तीसे सुंदरविचित्तलक्खणविराइयसरीरो । जेट्ठो सिट्ठो पुत्तो बीओ पुण वीरनामोत्ति ॥ ७५ ॥  
 को तेसि दाणविन्नाणबुद्धिसुविसुद्धधम्मगेहाण । निउणोऽवि गुणलवंपि हु होज्ज समत्थो पवित्थरिउं ? ॥ ७६ ॥  
 नागो इव पिंडिज्जइ बंभंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥  
 जिणविंसुपसत्थतित्थजत्ताइधम्मकरणेण । धम्मियजणाण मज्जे जेहि य पत्ता पढमेरहा ॥ ७८ ॥  
 अन्नाणतण्हसमणी सुयनाणपवा पयट्ठिया जेहि । सयलागमपोत्थयलेहणेण निच्चंपि भव्वाण ॥ ७९ ॥  
 तेहिं तित्थाहिवपरमभत्तिसव्वस्समुव्वहंतेहिं । वीरजिणचरियमेयं कारवियं मुद्धबोहकरं ॥ ८० ॥  
 जमजुत्तमेत्थ भणियं नियमइदुब्बलओ मए किंपि । तं साहंतु गुणद्धा ओच्छाइयमच्छरा विउसा ॥ ८१ ॥  
 छत्तावल्लिपुरीए मुणिअंबेसरगिहंमि रइयमिमं । लिहियं च लेहणं माहवनामेण गुणनिहिणा ॥ ८२ ॥  
 नंदसिहिरुदसंखे(११३९)वोक्कंते विक्कमाओ कालंमि । जेट्ठस्स सुद्धतइयातिहिंमि सोभे समत्तमिमं ॥ ८३ ॥  
 विट्ठब्धं चैतच्चरित्रं छत्रावल्यां श्रीमद्भिः स्थितिं दधद्भिः, मानं चास्य द्वादश सहस्राणि श्लोकानां ॥ चरित्रे चात्र विचक्षणानां विलोक-  
 नार्हाणि बहूनि स्थानानि, विशेषेण चेमानि—  
 १ पत्तो मगहाविसए, तहिं दिट्ठा कोडिपुरिसवोज्झा महासिला—मोतूणं कोडिसिलं, पत्रे ५९, अत्र कोटीशिलेति शिला कास्तीति  
 प्रश्ने निश्चितं तस्या मगधविषये स्थानमिति

२ जिणवरो नाउं । चालइ भेरुं चलणंगुलीइ १२० । इह चावधेयं सिद्धान्तश्रद्धारहितैः, यतो न श्रीमद्भिर्हेमचन्द्रैः केवलमेतत् मेरुचालनं प्रत्यपादि, किन्तु तत्प्राक्कालीनैरपि श्रीगुणचन्द्रगणिभिः, श्रीमहानिशीथतृतीयाध्ययने श्रीपद्मचरित्रेऽपि च एवमेवाख्यातं स्पष्टतया

३ सिरिवद्धमाणचरियंमि—गम्भावयारजम्मणदिक्खाकल्लाणकहणपडिबद्धो—चउत्थओ एस पत्थावो १४१, अनेन वचसा खाद्यानां जिनवल्लभादीनां पदकल्याणकवादिनां श्रीमज्जिनेश्वरामयदेवसूर्योः परंपराया बहिर्वर्तिता स्पष्टीभवति

४ ताहे तिलोयनाहो युव्वंतो देवनरनरिंदेहिं—कप्पोत्ति तहवि साहइ २५१, अनेन वचसा भगवतः प्रथमदेशनाक्षणे नैव देवनराणां सद्भाव इति न संमतं गणिभिः, 'पुर्व्वि देवाणं धम्मं आइक्खइ' इत्यादिवाक्यं तु देवपर्पत्प्राधान्येनेति ख्यापितं श्रीमद्भिः

५ तामलित्तिदसन्नपुरवीभयचंपाउज्जेणीगयपुरकंपिल्लनंदिपुरमहुरापुरेसु महानगरेसु भव्वसत्तज्जणं पडिवोहिता २६१, अनेन वचसा निरस्तास्ते मूलतो ये निजगदुरवन्त्यादीनां देशानां श्रीसंप्रतिनृपात् प्रागनार्यतां, यतः स्पष्टतयाऽत्र श्रीवीरस्य केवलित्वे उज्जयिनीदशार्णमद्रादिषु विहारो दर्शितः, तेषां भ्रममूलं कौशाम्ब्या अटव्याः स्थाने कौशाम्ब्या नगर्या ग्रहः, अस्ति च गोदावर्या उपकंठं कौशांब्यटवी यत्र श्रीकृष्णस्य प्रेतता पाण्डुमधुरां गच्छतः, एवं च सौराष्ट्रकलिंगादीनां न व्याहन्येत श्रीवीरकालेऽप्यार्यता

६ अन्नया सेट्ठिणी नरिंदपत्ती य पंचवण्णसुरहिकुसुमदहियक्खयसुगंधिगंधधूववासपडिपुण्णपडलकरप्ररियरियाओ गयाओ जिणालयं, विरइया अणेगविच्छित्तिमणहरा सव्वण्णुर्विधाण पूया ३२७, अनेन स्त्रीणां जिनविम्भानां पूजाया निषेधकस्य जिनदत्तस्य शासनतत्त्वापलापिता ध्वनिता

७ कप्पसमत्तीए विहरिया मुणिणो ३२९, इत्युक्त्या मासकल्पविहारस्योत्सूत्रतात्वादितो जिनदत्तस्य सूत्रोत्तीर्णवादिता व्यक्तीकृता

८ गुरुसाराओ धवलाउ सुविहिया साहुसंतई जाया ३४०, इत्येवं श्रीजिनेश्वरसूरेः सुविहितानामुद्भवो वर्णितः, तथाच तेभ्यः खरतरोत्पत्तिं वावदुका दूरं निरस्ताः, यद्यपि कैश्चिदपास्य भवभियं न्यस्तमत्र 'खरयरया' इति पदं न च तत् प्रलेष्वादशेषु, न च यथार्थं, तदनुयायिभिर्व्याकरणसंवेगरंगशालादिवृत्तिसुरसुन्दरीचरित्रादिषु तदुल्लेखस्याकृतेः, न च मात्रागणोऽपि उकारादारब्धो यथायथं समाप्नोति इत्यलमतिविस्तरेण चरित्रस्यास्य मुद्रणमारब्धपूर्वं श्रेष्ठि देवचंद लालभाइ जैनपुस्तकोद्धारसंस्थया, परं समाप्तेरवसरे श्रीराजनगरे श्रेष्ठिसुबाभाइ रवचंद इत्यनेन स्थापिताया विद्याशालासंस्थायाः कार्यवाहकैः श्रेष्ठिशिवाभाइ मोहनभाइ (२) जीवनभाइ इत्येभिः आगमाराधनोत्सवागतेनान्येन च द्रव्येण साहाय्यं चिकीर्षुभिः पंचविंशतिशतिका दत्ता द्रम्माणां संस्थायै एतस्यै, तेनानया संस्थया यथायथं समाप्य प्राकाश्यं नीतं चरित्रमेतत् । शोधने विहितेऽपि श्रमे स्वलितं यत् शोधयन्तु धीमन्तः सज्जनास्तदित्यर्थयते आनन्दसागरः १९८५ कार्तिकशुक्ला ३ गुरुवासरे राजनगरात्

॥ नमो वीतरागाय ॥

# ॥ श्रीमहावीरचरित्रम् ॥

॥ श्रीमद्रुणचन्द्रसूरिवर्यनिर्मितं ॥

पयडियसमत्थपरमत्यवित्थरं भघचक्ककयसौक्खं । विप्फुरइ जस्स रविमंडलं व नाणं निहयदोसं ॥ १ ॥  
जस्स य सोहइ पणमंतसक्कसंकंतनयणकमलवणं । कमविमलसरं तललीणमीणमयरं नहंसुजलं ॥ २ ॥  
संगमयपणइणीहिं कडक्खविक्खेवखोभदक्खाहिं । जस्स मणागंपि मणो न चालियं नियपइण्णाओ ॥ ३ ॥  
नरतिरियदेवविहिओवसग्गरिउवग्गविजयजायजसो । ओहामियऽण्णवीरो सो जयइ जिणो महावीरो ॥ ४ ॥  
पणमइ सिरिरिसहजिणिंदचंदमुद्दामकामवलदलणं । गिहिसाहुधम्मपासायमूलपीढाइयं जेण ॥ ५ ॥  
अजियाइणो जिणिंदा सुरिंदसंदोहनभियकमकमला । धम्ममहिधरणधीरा सेसन्व जयंति सेसावि ॥ ६ ॥  
सो जयइ जिणो पासो जस्स सिरे सहइ फणिफणकडप्पो । पायडियसत्तजीवाइतत्तसंखं व दावित्तो ॥ ७ ॥  
कविसेवियपयकमला सुत्तीहि पसाहिया महाभोगा । गोवग्गजणियसोक्खा सरस्सई जयइ सरियन्व ॥ ८ ॥

श्रीमहा०  
चरित्रे  
१ प्रस्तावः  
॥ १ ॥

दंसियसमग्गसग्गापवग्गमग्गाण गोयभाईणं । गुणवंताण गुरूणं शुणामि पयपंकयं निच्चं ॥ ९ ॥  
इय संधवणिज्जप्पयपणाममाहप्पनिहलियविग्घो । भवाण सोक्खमूलं धम्ममुवएसं पयंपेमि ॥ १० ॥  
जलहिजलगलियरयणं व दुल्लहं पाविऊण मणुयत्तं । पुरिसत्थज्जणकज्जे उज्जमियवं बुहजणेणं ॥ ११ ॥  
तत्थ पुरिसत्थमत्थयचूडामणिविब्भमो परं धम्मो । सो पुण पइदिणसच्चरियसवणओ हवइ भवाणं ॥ १२ ॥  
तस्स य धम्मस्स जिणो पणायगो संपयं महावीरो । चरियंपि उ तस्सेव य सुणिज्जमाणं तओ जुत्तं ॥ १३ ॥  
तं पुण निस्सेसागमसमुद्दसवणासमत्थसत्ताणं । निउणेणावि न गुरूणा समग्गमवि तीरण वोत्तुं ॥ १४ ॥  
ता जह भुवणेकगुरू निप्पडिमपभावधरियधम्मधुरो । मिच्छत्ततिभिरसुसुमूरणेकमिहिरो महावीरो ॥ १५ ॥  
अच्चंतमणंतमणोरपारभवचारिरासिमणवरयं । पुवं परियट्ठिय तिरियतियसपुरिसाइभावेणं ॥ १६ ॥  
ओसप्पिणी इमीए पढमं चिय गामाचिंतगभवमि । नीसेससोक्खमूलं सम्मत्तमणुत्तमं पत्तो ॥ १७ ॥  
तत्तो पाविय देवत्तमुत्तमं भरहचक्कवट्ठिस्स । मिरिइत्ति सुओ होउं काउं जिणदेसियं दिक्खं ॥ १८ ॥  
दुस्सहपरिसहनिम्महियमाणसो पयडिउं तिदंडिवयं । मिच्छत्तविलुत्तमई कविलस्स कुदेसणं काउं ॥ १९ ॥  
तदोसेणं अयराण वट्ठिउं कोडकोडिसंसारं । उब्भवगहणे पुणरवि पारिवज्जं पवजित्ता ॥ २० ॥  
दीहं संसारं हिंडिऊण रायग्गिहंमि रायसुओ । होऊण विस्सभूई घोरं संजममणुचरित्ता ॥ २१ ॥

मंगलं सं-  
क्षिप्तवृत्तं.

॥ १ ॥

मरणे नियाणवंधं निवत्तिय सुरसुहं च भोत्तूणं । पोयणपुरे तिविद्ध परिपालिय वासुदेवत्तं ॥ २२ ॥  
मूयाए पियमित्तो चक्कित्तं संजमं च अणुचरित्तं । छत्तग्गाए नंदण नरनाहत्तं च पवज्जं ॥ २३ ॥  
परिपालिय वीसइकारणेहिं तित्थाहिचत्तमज्जिणिउं । पाणयकप्पा चविउं कुंडग्गामंमि नयरंमि ॥ २४ ॥  
सिद्धत्थरायपुत्तो होउं जंतूणमुद्धरणहेउं । सबविरइं पवज्जिय दुविसहपरीसहे सहिउं ॥ २५ ॥  
केवललच्छिं लहिउं संपत्तो मोक्खसोक्खमक्खंडं । अट्ठाहिं पत्थावेहिं सिद्धंताओ तह कहेमि ॥ २६ ॥

द्वादशभिः कुलकम् ॥ अहवा-

कत्थ भुवणेक्कपहुणो चरियं अम्हारिसो कहिं कुकई ? । साहसमिममसममुयहिपवाहतरणाभिलासोव ॥ २७ ॥  
तहवि इ गुरुजणवयणोवरोहओ मुद्धलोयसुहवोहं । विरएमि चरियमेयं खमियव्वं एत्थ सूरीहिं ॥ २८ ॥  
एत्थ य पत्थुयचरिए नाणाविहसंविहाणगाइन्ने । अमयजलकुल्लतुल्ले महल्लकल्लाणवल्लीणं ॥ २९ ॥

कत्थवि जइवि इ किंपिप्पसंगओ किंपि बुद्धवयणाओ । सत्थंतराणुसरणाओ किंपि किर भण्णइ अउव्वं ॥ ३० ॥  
चरिएयरंति तहवि इ न संकियव्वं कहिंपि कुसलेहिं । उवकहपमुहं एत्तो पज्जत्तं बहुपसंगेणं ॥ ३१ ॥ विशेषकम्

अत्थि समत्थावरविदेहालंकारकप्पकप्पपहुमणिमउडविडंकविविहरयणकंतिविच्छुरियचरणजिणनाहविहरणप-  
संतडिंउडमरं अमरागारसमुत्तुंगसिंगसमुवहसियहिमगिरिवरं वरवेरुलियकणयकलहोयपमुहमहागरसोहियवसुंधराभोगं



श्रीमहा०  
चरित्रे  
१ प्रस्तावः  
॥ २ ॥

महावप्र-  
जयन्ती  
शत्रुमर्दनव.

भोगोवभोगलालसजणजणियपरितोसं सुरभूमिसोहग्गमडप्परफंसयं महावप्पं नाम विजयखेत्तं, तत्थ य विसालसा-  
लवलयखाइयापरिक्खित्ता नाणाविहविहारवापीकूवमहासरसरियपरिसराभिरामा सुविभत्तत्तियचउक्कचच्चरचउप्पह-  
पसोहिया पासायसयमालालंकिया सुइनेवत्थमहिच्छच्छेयजणसंकुला पागसासणपुरिव दीसंतनाणाविहरयणा कम-  
लासणमुत्तिव सबओमुही विंझगिरिमेहलव पुन्नागनागसोहिया जहत्थाभिहाणा जयंती नाम नयरी

कुलसेलुत्तुंगथणत्थलीए नहनइजलोहहाराए । धरणीरमणीए मुहे जा सोहइ चित्तलेहव ॥ ३२ ॥

सत्तमुणिमेत्तगव्वियमणेगमुणिसंकुला सुरपुरिंपि । एगवुहं भूरिविवुहा हसइ व जा तूररसिएहिं ॥ ३३ ॥

जीए य कमलसंडाण मित्तविरहसंकोथपीडणाणि मुणिवराण करवालुप्पाडणं वालकुंजरेसुं कलहसद्दो रहंगमि-  
हुणाण पियविरहवेयणा तंतुवायसालासु वसणुब्भवो, न कयाइ लोएसु, तहिं च-सायरपणमंतमहंतसामंतमडलिमा-  
लामणिमसिणियपायवीढो पयंडभुयदंडमंडलियकोडंडनियत्तत्तिक्खखुरुप्पखंडियसयसत्तुमुंडमंडियसमरंगणो, दग्गुब्भ-  
डसुहडपरिवुडदंडनाहसहस्साणुसरिजमाणमग्गो मग्गणगणवंचाइरित्तपूरियमणोरहो, रहोव सुसिलिट्टलट्टसुचक्कक-  
यसंचरणो रणरसियपुरिसोव कयवहुकवयपरिग्गहो गहगणोव कविमुहगुरुवयणाणुगओ गओव अणवरयदाणवरिसो  
रिसिव निग्गहियछवग्गपयारो पायारोव पुवपुहइपालपवत्तियनयनयरीए हिमगिरिव डिंडीरपिंडपंडुरकित्तिसुरस-  
रियाए जलहिव अणेगगुणगणरयणरासीए

॥ २ ॥

विपक्खदप्पखंडणो नरिंदवंसमंडणो, अजायभंगसासणो कुनीइलोयनासणो ।

असेससोक्खकारणं करेइ लोयपालणं, नरिंदसत्तुमहणो म(ज)णंमि चित्तनंदणो ॥ ३४ ॥

जंमि य नराहिवे पवलवलसालिभुयपरिहारोवियधरणिभारे रायनीइमेत्तं मंतिणो सोहां हरिकरिरहजोहंसामंगी  
आडंवरं असिचक्कावसरकुंतप्पमुहपहरणपरिग्गहो सेवगा पणयावेक्खासजीयनिरवेक्खंगरक्खपरिक्खेवपरिक्कप्पणा ।  
तस्स य रण्णो विसिद्धायारपरिपालणपरायणो धम्मसत्थसवणवियाणियहेज्जोवादेयवत्थुसरूवो गंभीरिमाइगुणग-  
णावासो पयइसरलो पयइविणीओ पयइपियंवओ पयइपरोवयारपरो पुहइप्पइट्ठाणनामंमि गामे नयसारो नामं गामं-  
चित्तगो अहेसि । जो य तहाविहसाहुसेवाविरहेऽवि अलसो अकज्जववित्तीए परम्मुहो परपीडाए सयण्हो गुणंगणो-  
वज्जणाए अचक्खू परछिइपलोयणाए । एवंविहगुणो य सो सविसेसगुणुकरिससाहणनिमित्तं भणिओ गुरुअणेणं,  
जहा-धणरिद्धी दूरं वड्डियावि दुव्विणयपवणपडिहणिया । एकपएच्चिय पुत्तय ! पणस्सए दीवयसिहव ॥ ३५ ॥

णीहारहारधवलोवि वच्छ ! सेसो गुणाण संघाओ । विणएण विणा वयणं व नयणरहियं न सोहेइ ॥ ३६ ॥

अज्जंतपिओऽवि परोवयारकारीवि भुयणपयडोऽवि । वज्जिज्जइ पुरिसो विणयवज्जिओ गुरुभुयंगोव ॥ ३७ ॥

इय दुव्विणयत्तणदोसनिवहमवलोकण बुद्धीए । पुत्त ! रमेज्जसु विणए समत्थकल्लाणकुलभवणे ॥ ३८ ॥

तहाहि—विणएणं हुंति गुणा गुणेहिं लोगोऽणुरागमुवहइ । अणुरत्तसयललोयस्स हुंति सच्चाओ रिद्धीओ ॥ ३९ ॥

श्रीमहा०  
चरित्रे  
१ प्रस्तावः  
॥ ३ ॥

रिद्धीहिं संगओ गयवरोव अणवरयदाणवरिसेण । मग्गणगणपणईणं उवयारं कुणइ लीलाए ॥ ४० ॥  
उवयरणेणं तेसिं लब्भइ आचंदकालिया किच्ची । तीएऽविहु लद्धाए किं नो लद्धं तिहुयणेऽवि ? ॥ ४१ ॥  
एसच्चिय जेण थिरा जुगविगमेऽविहु न वच्चइ विणासं । उप्पत्तिपलयकलियं सेसं पुण थेवदियहथिरं ॥ ४२ ॥  
इय गुरुजणसिक्खं गिण्हऊण तह कहवि संपयट्ठो(सो) । वीसासट्ठाणं नरवइस्स परमं जहा जाओ ॥ ४३ ॥

अन्नया य सत्तुमहणनराहिवेण भवणसंदणाइनिमित्तं पवरदारूहिं पओयणंमि संपत्ते आणत्तो एसो-भइ !  
गच्छसु तुमं पभूयं सगडसमूहं किंकरनरनियरं च गहाय दारुनिमित्तं महाडवीएत्ति, तओ सिरसा सासणं से पडि-  
च्छिय विसिट्ठसंबलगसमेओ समग्गसामग्गीसणाहो पट्ठिओ गामचिंतगो, पत्तो य अणवरयगमणेण महाडवीए,  
जा य केरिसी?—गयणयलाणुलिहंतमहंतचित्ततरुवराभोगावरद्धदिसावगासा अणवरयझरंतगिरिनिज्झरझंकारमणहरा  
जहिच्छविसरंतरुवरुयरिंछहरिहरिणसदूलभीसणा महापुरिसवच्छत्थलिव सिरिवच्छालंकिया मिगरायकंधरव  
केसरविसरविराइया उवसनगरभूमिव मायंगकुलसंकुला सुहडावलिव धरियवाणासणा । तहिं च निउत्तपुरिसेहिं  
सरला य दीहरा य विसाला सुंदरा य सुजायवट्ठखंधवद्धा य तरुणो समारद्धा छिंदिउं, एवं च छिंदंताण जाओ मज्झणह-  
समओ, संपत्ता भोयणवेला, पगुणीभूओ भोयणकरणाय गामचिंतगो, उवणीया किंकरगणेण विचित्तखंडखज्जप्पहाणा  
रसवई, जइ पुण सत्थपरिब्भट्ठो वा मग्गं अयाणमाणो वा एत्थ तडियकप्पडियसमणप्पमुहो अतिही छुहाभिभूओ एज्ज

नयसारः  
विनयः  
काष्ठेभ्यो  
गमनं,

॥ ३ ॥

ता तस्स दाऊण सयं भुंजामित्ति संपधारिऊण गामचिंतणेण थेवं भूमिभागं गंतूण तंक्खणमवलोइयं दिसावलयं,  
एत्थंतरे सत्थपरिब्भट्ठा संता परिसंता खुहापिवासाभिभूया मज्झंदिणदिणयरतावविगलंतसेयसलिलधरा तरुवरनि-  
वडणकडयडारावनिसामणसंभावियसत्थावासा समागया तं पएसं तवस्सिणो, दिट्ठा य तेण ससंभमं, गओ तदभिमुहं,  
गाढकरुणारसाउरिजमाणमाणसेण पणमिऊण पुंच्छिया अणेण—भयवं ! किमेवं विजणविहारमायरह ? , साहूहिं भणि-  
यं—भइ ! सत्थेण(समं)पढमं अम्हे पत्थिया, भोयणकाले जाव असणपाणट्ठा गामं पविट्ठा ताव गओ सत्थो, अम्हेऽवि  
तुरंता सत्थाणुमग्गलग्गा इंता निग्गया एत्थ महाडवीए, गामचिंतणेण भणियं—अहो निकरुणया अहो दुट्ठसीलया अहो  
नरकनिवासलालसत्तणं अहो वीसत्थघाइत्तणं अहो पावाभीरुत्तणं अहो आजम्मा नियकुलकलंककरणं तेसिं सत्थियाणं,  
अविय—सत्तपयमेत्तसंथववसेऽवि सुयणाण वड्डए नेहो । आजम्मदंसणेऽविहु निहयचित्ताण न खलाणं ॥ ४४ ॥

सत्थाणुसरणकालेऽवि वारिया किं न पावबुद्धीहिं । एए महाणुभावा पढमं चिय साहुणो तेहिं ? ॥ ४५ ॥

जइ एएसिं सीहाइएहिं कीरेज्ज एत्थ विद्वणं । ता नूणमेव तेसिं नरगेऽविहु होज्ज संवासो ॥ ४६ ॥

अहवा पावाण कहाए होउ नियधम्मदूसणकरीए । आगच्छह आवासं कुणह पसायं ममेयाणिं ॥ ४७ ॥

इय भणिए ते मुणिणो जुगमेत्तनिहित्तचक्खुणो धीरा । तस्सावासंमि गया पच्चक्खा धम्मनिहिणो व्व ॥ ४८ ॥

पुण्णवससाहुदंसणसिणेहसंजायतिव्वसद्धेणं । विउलेहिं असणपाणेहिं तेणऽवि पडिलाहिया विहिणा ॥ ४९ ॥

गहियभत्तपाणेहि य पडिनियत्तिऊण जीवोवरोहरहिए थंडिलंमि पडिक्कंता ईरियावहिया आलोइयं भत्तपाणं  
कयं चित्तिवंदणं विहिओ तक्कालोचिओ सज्झाओ, सुहज्झाणेण खणंतरं गमिऊण समुज्झिय रागदोसं मुणिणो परि-  
जिमियत्ति, गामचिंतगोऽवि कयत्थमप्पाणं मन्नंतो भोत्तूण समागओ तेसिं सगासे भणिउं पवत्तो—भयवं ! आग-  
च्छह तुम्हे जेण नगरगामिणिं वत्तिणिं उवदंसेमि, तओ पत्थिया साहुणो तेण सद्धिं, तेसिं च मज्झे एगो मुणी  
धम्मकहालद्धिसंपन्नो, तेण य णायं—जहा एस धम्मजोगोत्ति, ता अवस्सं सद्धम्मे निजुंजियव्वो होइत्तिचित्तिऊण  
भणिओ सो गामचिंतगो—भो महायस ! कुमग्गपरिब्भमणपीडियाणं तण्हाल्लुहाभिभूयाणं अम्हाणं तहाविहपडि-  
वत्तीए असणपाणदाणेण य परमोवयारी तंऽसि ता किंपि अणुसासिउं समीहामो, गामचिंतएण भणियं—भयवं !  
किमेवमासंकह ? नियसिस्सनिव्विसेसं सिक्खवेहिति, तओ साहुणा पारद्धा धम्मदेसणा, जहा—

धणुसिक्खाविरहियपुरिसखित्तसरजणियराहवेहं व । तुडिजोगा मणुयत्तं लद्धूणं कुसलबुद्धिमया ॥ ५० ॥

सग्गापवग्गफलसाहगस्स धम्मस्स पायवस्सेव । मूलं सम्मत्तमहो जाणेयव्वं पयत्तेणं ॥ ५१ ॥

मिच्छत्तपंकपडलावलुत्तसन्नाणनयणपसराणं । सिरसूलमूलमेसा जणाण सम्मत्तवत्तावि ॥ ५२ ॥

जुत्ताजुत्तं केणवि करुणापरबुद्धिणोवइट्ठं पि । दुस्सुमिणंपिव सोउं नेव वंछंति तुच्छमई ॥ ५३ ॥

दढमूढगुरुपरुवणवसेण कम्मं च तं पकुव्वंति । जेण निमज्जंति अहो कूक्खणणुज्जयनरो व्व ॥ ५४ ॥

जं मिच्छतोदयओ अगुरुं पि गुरुं अदेवमवि देवं । घत्तुरिओब्बं गेण्हइ लेट्ठं व सुवण्णवुद्धीए ॥ ५५ ॥  
 तेणं चिय पाणिगणो गणणाइकंतवेलमणुभवइ । तं किंपि दुक्खनिवहं जं जाणइ केवली सम्मं ॥ ५६ ॥  
 इय भो देवाणुप्पिय ! मिच्छत्तं सयलदोसकुलभवनं । नीसेसदुग्गदुग्गइसंसग्गकरं लहं चयसु ॥ ५७ ॥  
 सम्मत्तं पुण नीसेसदोसविरहियंमसेससुहफलं । जीवाण तिव्वजरमरणदुक्खं वुच्छेयणसमत्थं ॥ ५८ ॥  
 जं मोहंणिज्जपवलत्तविगमओ गुरुवसा सयं वावि । उल्लसई कल्लायवल्लीजलकुल्लतुल्लं व ॥ ५९ ॥  
 तत्तो अट्टारसदोसवज्जिए जिणवरंमि पडिवत्ती । देवोत्ति समुप्पज्जइ निरवज्जा वज्जघंडियव्व ॥ ६० ॥  
 सयमवि धम्मंपरेसुं सिद्धंतवियारणेक्ककुसलेसुं । धम्मोवएसनिरएसु होज्ज साहसु गुरुवुद्धी ॥ ६१ ॥  
 ता जिणवयणायण्णणविण्णायसमत्थतत्तरयणस्स । विरमइ य मई लोइयधम्माउ कुवस्सयाउव्व ॥ ६२ ॥  
 अवगणइ गोपयं पिव दुग्गइदुहमयरभीसणावत्तं । कम्मजलुप्पीलाउलमरइरंउहं भवसमुहं ॥ ६३ ॥

तथा—सम्मत्तुत्तमंसन्नाहविहियरक्खो खणेण विक्खिवइ । सुहडोव्व तित्थियभडुब्भडंपि मिच्छत्तसंगमं ॥ ६४ ॥  
 पासायस्स व पीढं पुरस्स दारं व मूलमिव तरुणो । वारसविहधम्मस्सवि आई कित्तिंति सम्मत्तं ॥ ६५ ॥  
 इय भो एवं लक्खिय निरवेक्खो लोइएसु मग्गेषु । सहहणनाणसारं सरहसमणुसरसु सम्मत्तं ॥ ६६ ॥  
 ताहे भत्तिभरोणयभालयलमिलंतमउलकरकमलो । सोचा सो गुरुवयणं भत्तीए भंणिउमाढत्तो ॥ ६७ ॥

श्रीमहा०  
चरित्रे  
१ प्रस्तावः  
॥ ५ ॥

भयवं ! किमेवमुवइसह पावनिरयाण बुद्धिरहियाणं । पच्चक्खपसूणं पिव अम्हाणं दढमजोग्गाणं ॥ ६८ ॥  
गुरुणा भणियं मा वयसु एरिसं जेण जोग्गया तुज्झ । जाणिज्जइ संपन्ना संपइ पच्चक्खलिंगोहिं ॥ ६९ ॥  
कहमण्णहमेवंविहमहाडवीनिवडिया तए अम्हे । दिट्ठा पहपब्भट्ठा गाढस्समसुढिय(सिढिल)सव्वंगा ? ॥ ७० ॥  
कह तत्थवि दंसणमेत्तओऽवि चिरदिट्ठवल्लहजणे व्व । पुलयपडलाणुमेओ उप्पण्णो तुह पमोयभरो ? ॥ ७१ ॥  
कह वा भोयणसमओवणीयनियभोयणेण दाणमई । जाया अम्हाणुवरिं खुहापिवासाभिभूयाणं ? ॥ ७२ ॥  
एवंविहपरिणामो उप्पज्जइ नेव पुण्णरहियाणं । एवंविहा य अतिही न य चक्खुपहं पवज्जंति ॥ ७३ ॥  
रयणनिहाणं किं रोरमंदिरे किं मरुमि कप्पतरू । कत्थवि थलंमि जलकमलसंभवो हवइ कइयावि ? ॥ ७४ ॥  
ता एवंविहविघडंतवत्थुसंघडणलिंगसद्धेया । कहमिव तुज्झ न सद्धम्मजोग्गया भद्दमुह ! होज्जा ? ॥ ७५ ॥  
जेणेरिस सामग्गी निरवग्गहपुण्णपगरिसवसेण । सिवलच्छिपेच्छियाणं निच्छयओ घडइ मणुयाणं ॥ ७६ ॥  
किंच—आरियखेत्तुप्पत्ती कुलमकलंकं नरत्तसंपत्ती । निरुवहयरूवलाहो रोगोरगदूरविगमो य ॥ ७७ ॥  
आउयमवि पडिपुण्णं कलाकलावंमि कोसलं विमलं । साहूहिं समं जोगो एत्तियमेत्तं तए पत्तं ॥ ७८ ॥  
एत्तो एगयरंपिहु पण्णं व सकम्मपवणपडिहणिया । संसारंमि भमंता अणंतसत्ता ण संपत्ता ॥ ७९ ॥  
तुमए पुण सव्वमिमं उवलद्धं पुण्णपगरिसवसेणं । ता एत्तो निरुवममोक्खसोक्खफलदाण लियं ॥ ८० ॥

सम्यक्त्वं  
योग्यता.

॥ ५ ॥

सिहिणो सिहं व सारं फणिवइफणरयणचक्रवालं व । एकं अपत्तपुवं गिण्हसु जिणदेसियं धम्मं ॥ ८१ ॥ युग्मम्  
 इय भणिए सो चित्तेउमारद्धो तिक्कजायसंवेगो । कह नियकज्जपसाहणंपरम्महाणं गुणनिहीणं ॥ ८२ ॥  
 केवलकरुणारससायराण समगणियरायरोराणं । जाओ मइ पडिवंधो गुरुण खणदंसणे वावि ? ॥ ८३ ॥ युग्मम्  
 निप्पुण्णेषु जणेषुं चक्खुंपि खिवंति नेरिसा समणा । ता सव्वहेसि वयणं जुत्तं मह संपयं काउं ॥ ८४ ॥  
 विस्संभरतलविलुलंतमउलिमह पणमिऊण गुरुचलणे । आणंदसंदिरंसूनयणो सो भणिउमाढत्तो ॥ ८५ ॥  
 निक्कारणेक्कवच्छल ! भयवं नीसेससत्तताणपरा । आरोहेसु ममिणिंह सम्मत्तं भवविरत्तस्स ॥ ८६ ॥  
 ताहे गुरुणा जिणभणियनीईओ नायजोग्गयगुणेण । चित्तुच्छाहप्पमुहपहाणसउणोवलंभंमि ॥ ८७ ॥  
 अरिहं देवो गुरुणो य साहुणो जिणमयं मयं तुज्झ । इय एवं आरोवियमाजम्मं तस्स सम्मत्तं ॥ ८८ ॥  
 भणिओ य वच्छ ! निव्वाणलच्छिवीयं मए इमं दिण्णं । संकाइदोसविरहेण सव्वहा ता जएज्ज इहं ॥ ८९ ॥  
 घन्नोऽसि तुमं भइय ! दुहसयरुहंमि भवसमुहंमि । जेण तए जिणधम्मो तरणतरंडोवमो पत्तो ॥ ९० ॥  
 एयस्स पभावेणं पालिज्जंतस्स सव्वकालंपि । जीवेहिं अणंतोहिं दुक्खाण जलंजली दिण्णो ॥ ९१ ॥  
 पयईए खणविणस्सरसंसारुभवसुहस्स कज्जेणं । एयंमि मा पमायं काहिसि तं भइ ! कइयावि ॥ ९२ ॥  
 अह सो नमिउं चरणे गुरुण भवभीयपाणिगणसरणे । हरिसभरवंधुरगिरं उदाहरित्था वयणमेयं ॥ ९३ ॥



श्रीमहा०  
चरीत्रे  
१ प्रस्तावः  
॥ ६ ॥

थेवोवयारिणोऽविहु लोया पूयं करिंति सविसेसं । एवंविहोवयारीण तुम्ह किं संपयं करिमो ? ॥ ९४ ॥  
तहवि नियत्तह भयवं ! गिण्हह धणरयणभवणसंसारं । अहवा किमेत्तिएणं ? जीयंपिहु तुम्ह आयत्तं ॥ ९५ ॥  
गुरुणोवबूहिओ सो ससरीरेऽवि हु ममत्तरहिण । सम्मं कयं महायस ! तयत्ति एवं जओ भणियं ॥ ९६ ॥  
सम्मत्तदायगाणं दुप्पडियारं भवेसु बहुएसुं । सब्वगुणमेलियाहिंवि उवयारसहस्सकोडीहिं ॥ ९७ ॥  
परमत्थेण महायस ! दिण्णं तुमए समत्थमम्हानं । एयंमि धम्मकम्मंमि निच्चमब्भुज्जमंतेण ॥ ९८ ॥  
इय गुरुणा सिक्खविउं जिणिंदधम्मस्स सब्वपरमत्थं । भणिओ सो अणुजाणसु एत्तो अम्हे गमणकज्जे ॥ ९९ ॥  
दूसहगुरुदंसणविरहवेयणावाउलीकयसरीरो । दूरपहं अणुगच्छिय दंसिय मग्गं नियत्तो सो ॥ १०० ॥  
भावेतो गुरुवयणं चिंतंतो भवभयं महाघोरं । सम्मत्तभावियमई निययावासंमि संपत्तो ॥ १०१ ॥

तओ काऊणमणंतरकरणीयं भरिऊणं सगडाणि विसिट्ठकट्ठाणं नीसेसभिच्चजणसमेओ नियत्तो नियगामाभिमुहं,  
पत्तो य कालक्कमेण, पेसियाणि दारूणि नरिंदस्स । तओ पइदिणं अब्भस्संतो जिणधम्मं पज्जुवासंतो मुणिजणं  
परिचिंतितो जीवाजीवाइणो नव पयत्थे रक्खंतो पाणिगणं बहु माणंतो साहम्मियजणं सवायरेण पभावेतो जिण-  
सासणं कालं गमेइ । अण्णया य मरणपज्जवसाणयाए जीवलोयस्स खणभंगुरत्तणओ सब्भवावाणं तहाविहमुवक्कम-  
णकारणं पाविऊण सोसम्मं परिपालियाविरयसम्मदंसणभावो कयपज्जंताराहणाविहाणो सुमरंतो पंचनमोक्कारं

सम्यक्त्वा-  
रोष  
आराधना.

॥ ६ ॥

पंचत्तमुवगओत्ति ।

उववण्णो सोहम्मे पलियाउसुरो तओ सुदिट्ठीओ । अंतोमुहुत्तमेत्तेण पत्तपज्जत्तभावो य ॥ १०२ ॥

जय जय नंदा ! भदत्ति वाहरंतेण किंकरजणेणं । हरिसभरनिम्भरेणं कारियतक्कालकायवो ॥ १०३ ॥

उत्तुंगयोरथणवट्टलट्टरेहंतमोत्तियसरीहिं । छणमयलंछणसच्छहवयणाहिं कुवलयच्छीहिं ॥ १०४ ॥

निम्मलकवोलतललिहियचित्तविच्छित्तिपत्तवल्लीहिं । करकिसलयपरिघोलिरचामीयरचारुवलयहिं ॥ १०५ ॥

सुरसुंदरीहिं सद्धिं कीलंतो तेसु तेसु ठाणेंसुं । रइसागरावगाढो कालं वोलेइ लीलाए ॥ १०६ ॥ तीहिंविसे०

कल्लाणगेषु पंचसु चवणप्पमुहेसु जिणवरिंदाणं । नंदीसरदीवाइसु परिचत्तासेसवावारो ॥ १०७ ॥

भवजलहितरंडमिमं तिदुक्खतत्ताणममयमेयंति । मणवंछियत्थपूरणचिंतामणिपच्चलमिमंति ॥ १०८ ॥

अम्हारिसाणमविरइपराण इय विहियगाढवहुमाणो । हरिसभरनिम्भरंगो कुणइ य अट्टाहियामहिमं ॥ १०९ ॥ तीहिंविसे.

हिमवंतमहाहिमवंतपमुहकुलपव्वएसु अणवरयं । दिव्वविमाणारूढो सिद्धाययाणि पेच्छइ य ॥ ११० ॥

सुणइ य पच्चक्खं चिय विहरंतऽरिहंतवयणकमलाओ । संसारुव्वेयकरं भत्तीए धम्मसव्वस्सं ॥ १११ ॥

दुकरतवचरणकिसंग(सारए)संगवज्जिए मुणिणो । मणवयणकायगुत्ते भत्तीए पज्जुवासइ य ॥ ११२ ॥

इय पवरसिद्धिमंदिरसोआणपरंपरासरिच्छंमि । सिरिवीरनाहजिणवरचरियंमि गुणोलिनिलयंमि ॥ ११३ ॥

अचंतुत्तमसम्मत्तलाभनामो समत्थिओ एसो । भव्वजणचित्तसंतोसकारओ पढमपत्थावो ॥ ११४ ॥ इइ  
सम्मत्तलाभनिरुवणो पढमो पत्थावो ।

अह विइओ पत्थावो

एवं लाभो बोहीएँ परमसिवसाहिबीयभूयाए । भणिओ एत्तो सम्मं मिरीइवत्तव्वयं सुणह ॥ १ ॥

एत्थेव समत्थसमुद्दीववलओवगूढपज्जंते । मेरुविराइयमज्झे जंबूदीवमि दीवम्मि ॥ २ ॥

आरोविधणुगुणसच्छहंमि तह दाहिणद्धभरहंमि । गंगासिंधूण महानईण बहुमज्झयारंमि ॥ ३ ॥

अत्थि पसत्थिविविहतरुसंडमंडियपरिसरा पेरंतपरूढपंडुच्छुताडनीवारविराइया नाणामणिरयणरइयधर-  
णिवीढा अमरावइव नासच्चाहिट्टिया अहिणवपुरिव्व नवकुलालंकिया जणयतणयव्व कुसलवलालसा विलासिणिव्व  
दीहरच्छोवसोहिया रामएवसेणव्व अदिट्ठविहीसणदोसा पायालपुरिव्व अहीणजणाणुगया सुरिंदवयणोवरोहहरिसि-  
यवेसमणजक्खविणिम्मिया बारसजोयणदीहा नवजोयणविच्छिण्णा समुत्तुंगकणयपायारपरिक्खित्ता पवरभवणमा-  
लासहस्साभिरामा धणकणयरयणपरिपूरिया विणीया नाम नयरी ॥

जत्थ वम्महो इव अखंडरुवलावणणजोव्वणगुणविब्भमो रेहइ पउरजणो, अकित्तिममंडणाओ सुरसुंदरीओ-  
वि परिहवन्ति निरुव्वेण तरुणीओ, जहिं च सूरुसु चेव सुव्वइ मग्गणसहो दोसियाणं दोसाभिलासो तरुवराणं गया-

परावत्तो रयणेसु वइरसदो ॥ तं च रक्खेइ खंचियचलियासणागयाखंडलकरकलियकणयकलसविहियरज्जाभिसेओ  
तफालसंगहियउग्गभोगरायन्नखत्तियचउव्विहपहाणपरियरो सुरवइविइण्णकणयकडयतुडियमणिमउडपमुहदिव्वालं-  
कारालंकियसरीरो सिरिउसभनराहिवो ॥

कसिणासाढचउत्थीएँ चत्तसव्वत्थसिद्धिवासो जो । उत्तरसाढानक्खत्तजोगमिंदुंमि संकंते ॥ ४ ॥

कुलगरनाभिस्स गिहे चोइसगयपमुहसुमिणकयसूओ । मरुदेवीए गब्भे पाउव्वभूओ महाभूई ॥ ५ ॥

पुव्वज्जियपुण्णसमूहचलियसिंहासणेण सक्केण । भत्तीए जस्स पणया जणणी गब्भावयारंमि ॥ ६ ॥

चेत्तवहुलट्टमीए उत्तरसाढासु अद्धरत्तंमि । भुवणजणजणियतोसो जाओ जो पुण्णचंदोव्व ॥ ७ ॥

जस्स य जम्मणकम्मं तक्खणचलियासणा उ अकरिंसु । निययहिगारणुरूवं छप्पण्णदिसाकुमारीओ ॥ ८ ॥

वत्तीससुरिंदेहिं नीसेसामरसमूहसहिएहिं । मेरुंमि जम्ममज्जणमहूसवो निम्मिओ जस्स ॥ ९ ॥

जस्सोरुवसभलंछणदंसणसंजायहरिसपुलएण । सिरिनाभिनरिंदेणं उसभोत्ति पइट्ठियं नामं ॥ १० ॥

सुररायपाणितलसंठिओच्छुलट्ठिं करे धरंतेण । जेण जहत्थभिहाणं निम्मियमिक्खागुवंसस्स ॥ ११ ॥

लेहप्पमुहा वायत्तरी कला जेण देसिया पढमं । बहुमेयं कासवलोहचित्तघडवत्थसिण्णं च ॥ १२ ॥

कम्मं च खेत्तवाणिज्जपमुहमाई निदंसियं जेण । अविपक्ककणविभक्खणदुक्खियजणजलणपयणं च ॥ १३ ॥

श्रीमहा०  
चरित्रे  
२ प्रस्तावः  
॥ ८ ॥

दुन्नयपसत्थजणसिक्खणत्थमुवदंसिया जए जेणं । सिट्ठजणरक्खणद्धा सामाइ चउविहा नीई ॥ १४ ॥  
दारपरिग्गहसमए जस्स सुरिंदेण परमरिद्धीए । पुंखणगविहिसणाहो विवाहमहूसवो विहिओ ॥ १५ ॥  
वागरणछंदकहकव्वमग्गजोइसपमोक्खवहुविज्जा । लद्धा जेणुवइद्धा पढमं चिय सुद्धबुद्धीए ॥ १६ ॥  
नियनियकम्मनिसेवण नियमेणं गुरुजणस्स नमणं च । जायकुलाण ववत्था जेण समत्था कया भुयणे ॥ १७ ॥  
किं बहुणा-जुत्ताजुत्तवत्थुविण्णाणसुण्णहियएसु । नीई अज्जवि विफुरइ जस्स कित्तिव्व सव्वगया ॥ १८ ॥  
तस्स य गयतुरयपमुहरज्जंगपरिवुडस्स संसएसु य ववत्थासु य कुलायारेसु य परोप्परविसंवाएसु य सयल-  
जणपुच्छणिज्जस्स नंदाए देवीए सुमंगलाए य समं विसयसुहमणुहवंतस्स वचंति वासरा, अण्णया य सुमंगलाए  
देवीए भरहो बंभी य मिहुणगं जायं, तहा सुनंदाएऽवि देवीए बाहुवली सुंदरी य जुवलयं जायं, एवं वचंतंमि काले  
पुणोऽवि सुमंगला देवी अण्णाणि एग्गणपन्नासं पुत्तजुयलगाणि पसूया, ते य भरहप्पमुहा कुमारा वट्ठंति सरीरेण  
नीसेसकलाकलावकोसलेण य, एवं च निदंसिय सयलकला कुलव्ववत्थाए सुहलोयवावारो उसभनरिसरो तेयासी-  
पुव्वलक्खाइं जाव परिपालिऊण गिहत्थपज्जायं अवलोइऊण परलोयमग्गाणुरूवधम्मवावारविरहियं भवपंकनिमज्जमाणं  
(जणं)मणे अचंतकरुणारसालिद्धबुद्धी तक्कालचलियासणागयसारस्सयपमुहलोगंतियतियससमहियमुच्छाहियचित्तवित्ती  
विणिवित्तभोगपिवासो भरहपमुहपुत्तसयसंविभत्तपरिचत्तवसुंधराभारो आसंवच्छरक्कणयवारिधारावरिसाभिणंदियदी-

ऋषभवाक्यं  
भरतादि-  
जन्म.

॥ ८ ॥

णमग्गणजणो चेत्तस्स बहुलट्ठमीए उत्तरासाढनक्खत्ते पच्छिमपहरावसेसे दिवसे कच्छमहाकच्छपमुहाणं नियनियपुण्ण-  
 (त्त)निहित्तरज्जवावडाणं चउहिं सहस्सेहिं मंडलेसराणं परिवुडो देवदाणवुक्खित्तविचित्तचित्तोवसोहिंयसुदंसणाभि-  
 हाणसिविकाधिरूढो परमविभूर्हए समग्गकाणणलच्छिलीलावणंमि उज्जाणे कयकट्टुकिट्टवकम्मो परिचत्तसवंगसं-  
 गिरयणाभरणो सयमेव चाउमुट्ठियं लोयं काऊण कयसिद्धनमोकारो पडिवण्णसव्वसावज्जजोगविरती वत्तीससुरेसरेहिं  
 चउव्विहदेवनिकायसहिएहिं सम्भावसाराहिं महत्थाहिं पसत्थाहिं गिराहिं शुव्वमाणो पंचिंदियदित्ततुरयंदमणो  
 समणो जाओत्ति ॥

सुररायनिसिद्धविसिद्धसमंसावलंवि वहमाणो । कच्छमहाकच्छपमोक्खभिक्षुलोएण परियरिओ ॥ १९ ॥  
 परिचत्तसव्वसावज्जजोगसंगो तिगुत्तिगुत्तो य । अप्पडिवद्धो गामाणुगाममह विहरिओ भयवं ॥ २० ॥ जुम्मं ।  
 धणकणयसमिद्धसमुडुरा य मणुया मुणंति नो तइया । का भिक्षा के तग्गाहिणोत्ति भिक्षं भमंतंमि ॥ २१ ॥  
 परमेसरंमि ताहे नियपडुपणएण कणगकरितुरए । इत्थी महत्थवत्थे पणया मणुया पणामेंति ॥ २२ ॥ जुम्मं ।  
 भिक्षं अपावमाणा कच्छमहाकच्छपभिइणो मुणिणो । पइदियहमणसणेणं संजायसरीरसंतावा ॥ २३ ॥  
 तेलोक्कनायगे मोणमस्सिए ते उवायमलभंता । परिसडियपंडुपत्ताइभोइणो काणणंमि ठिया ॥ २४ ॥ जुम्मं  
 भयवंपि निप्पकंपो सुरसेलो इव विसिद्धसंघयणो । पइदिणंमदीणचित्तो एगागी विहरइ महिंमि ॥ २५ ॥

श्रीमहा०  
चरित्रे  
२ प्रस्तावः  
॥ ९ ॥

कच्छमहाकच्छसुया नमिविनमी रायलच्छिमिच्छंता । चिंतामणिव्व सव्वायरेण सेवंति भयवंतं ॥ २६ ॥  
तव्वभत्तिरंजियमणेण नागराएण दिन्नवरविज्जा । विज्जाहररायत्तं पाविय विगया जहाभिमयं ॥ २७ ॥  
भयवंपि गामनगरागरेसु भिक्खं अपावमाणोऽवि । विहरंतो किसियतणू कुरुदेसे गयपुरंमि गओ ॥ २८ ॥  
जिणदंसणसुमरियपुव्वजम्मसंजायतिवसद्धेण । सेज्जंसकुमारेणं सिरिवाहुवल्लिस्स पउत्तेणं ॥ २९ ॥  
तक्कालागयपुरिसोवणीयपंडुच्छुगंडयरसेणं । संवच्छरपज्जंते भयवं पाराविओ तत्थ ॥ ३० ॥ जुम्मं ।  
पडिया य कणयधारा तियसेहिं समाहयाइं तूराइं । मिलिओ य पउरलोओ तेणवि कहिओ सवुत्तंतो ॥ ३१ ॥  
भयवंपि पारणयं काऊण बहलीयडंवइल्लसुवण्णभूमिपग्गहेसु देसेसु विहरमाणो तव्वासिमणुयाणं मोणमल्लिणोऽवि  
समाहप्पेण भद्गभावं जणंतो विविहतवचरणपरायणो असंकिलिट्ठयाए तक्कालियलोयस्स अतहाविहवेयणीयकम्मओ  
य निरुवसग्गं संजमसणुपालितो समइकंते एगंमि वाससहस्से विणीयनयरीपचासण्णंमि पुरिमत्तालंमि नयरंमि  
संपत्तो, तस्स उत्तरपुरत्थिमे दिसीभाए सगडमुहं नाम उज्जाणं, तंमि नग्गोहपायवस्स हेट्ठा संठियस्स अट्ठमेणं भत्तेणं  
पुव्वण्हदेसकाले फग्गुणवहुलेकारसीए उत्तरासाढानक्खत्ते भगवओ तिहुयणेक्कवंधवस्स ज्ञाणंतरियाए वट्ठमाणस्स  
दिव्वं अणंतं लोयालोयगयभावाभावसहाववत्थुसत्थपरमत्थनिव्भासणसजत्थं केवलनाणं समुप्पण्णं ॥ अह जिणना-  
हनाणुप्पायमाहप्पपरिकंपियसीहासणप्पलोयणपउत्तावहिमुणियनाणवइयरा पहयपडहप्पमुहगंभीरतूरवा संखोभि-

दीक्षा  
पारणं  
केवलं,

॥ ९ ॥

यसुरलोया सरभसपणचिरसुरसुंदरीभुयलयालोलंतरयणवलयरणज्झणारवनिम्भरभरियभुवणंतरा आगंतूणं वत्तीसं  
ससुरा सुरिंदा समवसरणं विरइंति । केरिसं चिय ?—

अइसुरभिसिसिरमारुयपडिहयतणुरेणुतक्कणुकेरं । घुसिणघणसारगंधाभिरामसलिलोवसंतरयं ॥ ३२ ॥

आजाणुमेत्तविक्खित्तकुसुमेहंतरयणमहिवीढं । डज्झंतधूवधूमंधयारघणसंक्रियसिंहंढिं ॥ ३३ ॥

मणिचामीयरनिद्धंतरुप्पपायारवलयतियकलियं । सव्वत्तोमुहमणिरयणरइयसिंहासणसणाहं ॥ ३४ ॥

डिंढीरपिंडपंडुरच्छत्तयरुद्धरविकराभोयं । पवणुंवेल्लियकंकेल्लिपल्लुल्लिहियनहविवरं ॥ ३५ ॥

गयणद्वियसुरकरपहयगहिरवज्जंतदुंदुहिसमूहं । दिसिमुहपसरियनिम्मलभामंडलखंडियतमोहं ॥ ३६ ॥

सरयनिसायरकरनियरागारधुव्वंतचामरुप्पीलं । इय एवंविहमुद्दामदोसहरणं समोसरणं ॥ ३७ ॥ छहिं कुलयं ।

तंमि य भुवणेक्कपह्म पवरे सीहासणे तियसपणओ । पुव्वामुहो निसीयइ तित्थस्स नमोत्ति भणिऊणं ॥ ३८ ॥

हरिसभरनिम्भरुम्भिण्णपुलयपडलोवसोहियसरीरा । सट्ठाणेषु निलीयंति तक्खणं चउविहा देवा ॥ ३९ ॥

पूरिज्जइ अंवरमित्तजंततियसाण पंचवण्णेहिं । उद्धयचिंधेहिं विमाणलक्खमालासहस्सेहिं ॥ ४० ॥

एत्थंतरे जिणपउत्तिपरिन्नाणनिमित्तं पुव्वनिउत्ता केवलनाणुप्पत्तिनिवेयणत्थं तहा पहरणसालापाउव्वभूयप-  
भूयजक्खसमहिद्वियनिस्सामन्नफुरंतफारपहाभरनिकत्तियपयंडतमकंडुडामरचक्करयणवइयरसंसणत्थं च भरहनरिंदस्स



श्रीमहा०  
चरित्रे  
२ प्रस्तावः

॥१०॥

पुरओ जुगवं चिय समांगया वद्धवेगा पुरिसा । तओ भरहो इहलोयतुच्छसुहमेत्तसंपायणपच्चलत्तं निच्छिऊण चकरय-  
णस्स उभयलोगसुहजणगत्तं पुण परमेसरस्स पवरकरेणुगाखंधाधिरोहियसुयविरहविहुरमरुदेवासमेओ नीसेसकुमारनि-  
यरपरियरिओ समग्गवलवाहणो हरिसभरनिम्भरंगो भगवओ केवलमहिमं काउं संपत्थिओ । अंतरेण मरुदेवीए  
भगवओ लुत्ताइलुत्तपसुहं विभूइसमुदयं पेच्छंतीए तहाविहभवियव्वयावसेण सुहज्झाणपरायणाए अंतगडकेवलित्तं  
जायं । भरहखेत्ते पढमसिद्धोत्ति परिचिंतिऊण देवदाणवेहिं कया तीसे महिमा, खित्तं खीरोयसायरे से सरीरं, भरहो  
य परमपमोयसुव्वहंतो तित्थयरं तिपयाहिणीकाऊण बहुप्पयारं थोऊण सदेवमणुयासुराए सभाए आसीणो । सामि-  
णावि सजलजलहरारावगंभीराए आजोयणप्पमाणखेत्तपडिप्फलणपच्चलाए पइजणमेक्ककालं संसयसयवुच्छेयजण-  
णीए वाणीए पारद्धा धम्मदेसणा ॥ कहं ?

भो भो महाणुभावा ! दुलहं लहिऊण माणुसं जम्मं । उप्पत्तिपलयकलियं वियाणिउं भवसरूवं च ॥ ४१ ॥

कीसायासनिबंधणसयणसरीरेसु मोहवामूढा । धम्मोवज्जणरहिया निरत्थयं गमह नियजीयं ? ॥ ४२ ॥

सुमरह किं न निरंतरमणंतसो तिकखदुक्खसंतत्ता । विवसाएसु ववसिया जं भे चउसुं पि विगईसुं ॥ ४३ ॥

तथाहि—नरए परमाहम्मियपहरणछिज्जंतअंगपच्चंगा । तिरियत्ते वहवंधणदहणंकणवाहणाभिहया ॥ ४४ ॥

देवत्तेऽवि य ईसाविसायपेसत्ततावसंतत्ता । मणुयत्ते पुण दोगच्चवाहिविहुरा चिरं वुत्था ॥ ४५ ॥

समवसरणं  
मरुदेवी-  
मोक्षः  
देशना,

॥१०॥

इय चउगइदुहनिवहं अणुसुमरिय मोक्खसोक्खकंखिला । निरवज्जं पव्वज्जं पवज्जिउं उज्जमह धम्मे ॥ ४६ ॥  
एयमाइ भगवओ धम्मदेसणं का(सो)ऊण भरहो सावगो जाओ, वंभी य पव्वइया, भरहपुत्तो पुव्वभववद्ध-  
गणहरनामगोत्तो उस्तभसेणो नाम, सो य जायसंवेगो पव्वइओ, सुंदरी पुण साविगा जाया; एस चउव्विहो समण-  
संपो पढमसमोसरणे भगवओ पाउब्भूओत्ति । ते य कच्छमहाकच्छवज्जा तावसा सुणिऊण जिणनाहकेवलनाणमहिमं  
भयणवइवाणमंतरवेमाणियजोइसियदेवगणपरिवुडं भगवंतं दट्ठूण पव्वइया । एत्थंतरे जायभववेरग्गा पडलगतणं  
य रायमुहं उज्झिऊण भरहस्स पंच पुत्ताणं सत्त नत्तुयाणं सयाइं समकालमेव तंमि चेव समोसरणे पव्वज्जं पवण्णाइं ।

अह गामचिंतगजिओ सोहम्मे पालिऊण देवत्तं । पलिओवमपज्जंते भरहनरिंदस्स भज्जाए ॥ ४७ ॥

वम्माए गब्भंमि पाउब्भूओ सुसुमिणकयसूओ । पुव्वभवसाहुदंसणपावियधम्माणुभावेण ॥ ४८ ॥

अद्धट्ठमदिवसाहिय नव मासे वसिय गब्भवासंमि । उववन्नो कयपुन्नो पवित्तनक्खत्तसुमुहुत्ते ॥ ४९ ॥

दसदिसिमुहेसु पसरंतमुत्तमं निहयतिमिरसंभारं । जाओ सूरौव्व तओ मिरीयजालं विमुचंतो? ॥ ५० ॥

परमब्भुयभूयं जम्मवइयरं चक्किणा निसुणिऊण । तस्स जहत्यं ताहे मिरिइत्ति पइट्ठियं नामं ॥ ५१ ॥

करकिसलयसोहिलो कंकिलितरुव्व जणमणाणंदो । देहोवचएण तओ कुमारभावं समणुपत्तो ॥ ५२ ॥

अत्तया य सो मिरिई कुमारो भगवओ आइतित्थगरस्स असोगपुण्णवुट्ठिपमुहं च पाडिहेरविभूइं चउव्विहदेवनि-

काएण कीरमाणं दहूण तीयाणागयपडुप्पणवत्थुसत्थवित्थरगयसंदेहसंदोहदहणपसमणेक्कपीऊसधाराणुगारिणिं  
धम्मदेसणं निसामिऊण य करिकलहकन्नतालतरलमवलोइऊण जीवियं उव्वेलिरमहल्लविसवेल्लरीसरित्थं निच्छि-  
ऊण कुवलयच्छिसंजोगसमुभवमुहं अयंडतडिदंडभंगुरं जाणिऊण पणइजणपेम्मप्पवंधं परूढगाढसद्धम्मपरिणामो  
महाविभूर्इए पियामहस्स पासे पव्वइओत्ति ।

तओ सम्ममहिगयसमणधम्मो पंचप्पयारायारसमायरणपरायणो पंचसमिइसमिओ तिगुत्तिगुत्तो पंचमहव्वयर-  
क्खणवद्धलक्खो ससरीरेऽवि निरवेक्खो रयणवणिओ इव परिचत्तलोहायरो सायरो इव मयरहिओ दिणयरो इव दो-  
सुम्मूलणकरो नागराओव्व दूरूवूढखमावलओ मंदरो इव निम्महियजलही सुहडो इव निहयविसमकरणो गामा-  
गरनगरेसु अप्पडिवद्धो थेराण पासे सामाइयाइं एक्कारसंगाइं ससुत्ताइं सअत्थाइं थिरपरिचियाइं करेमाणो सामिणा  
सद्धिं विहरइत्ति ।

इओ य-भरहराया समुप्पन्नचक्रयणो चाउरंगवलकलिओ पुव्वदिसाए मागहतित्थं दाहिणेण वरदामं पच्छि-  
मेण पहासं उत्तरेण य चुल्लहिमवंतपरिसरं जाव साहिऊण लक्खंडभरहं सट्ठीए वाससहस्सेहिं वत्तीसनरवइसहस्सपरि-  
यरिओ अइगओ विणीयरायहाणिं, कओ से वारस वासाइं महारायाहिसेओ, विसजिया य रण्णा नियनियट्ठाणेसु  
दूरदेसागया नरवइणो ।

अन्नया य भरहो अट्टाणउइए चुल्लभाउयाणं दूयं पेसेइ, भणावेइ य जहां-मम सेवं पडिवज्जह अहवा रज्जाइं  
 परिहरह जुज्झसज्जा वा हवह उवायंतरं वा परिकप्पहत्ति, एवं च राइवयणं सम्ममवधारिऊण गओ दूओ, निवे-  
 इओ तेसिं भरहनरिंदाएसो, तं च समायन्निऊण कोवावरत्तनेत्तेहिं लीलाजट्टिताडियधरणिवट्टेहिं भणियं तेहिं-रे दूया-  
 हम! को भरहो? को वा एरिसवत्तव्वे तस्साहिगारो? जेण तस्स अम्हाणं च ताएणं दिण्णं रज्जं तम्हा ताओ चेव  
 जं जाणवेही तं करिस्सामोत्ति, रोसेण कंठे धेत्तूण निद्धाडिओ दूओ अवहारेणं । एत्थंतरे गामाणुगामेण विहरमाणो  
 भयवं जाइतित्थयरो अट्टावयंमि नगवरे समोसरिओ, आगओ चउव्विहदेवनिकाओ, तेऽपि अट्टाणउइंपि कुंमारा  
 तुरियं समोसरणमागया, सहरिसं च सामी वंदिऊण निसन्ना सट्टाणे, पत्थावे य भरहाएसं कहिऊण पुट्टं तेहिं-  
 ताय! कहेसु किं जुज्झामो उयाहु रज्जाइं चयामोत्ति, ताहे सामी तेसिं जोग्गयसुवलब्भ भोगनिवित्तिनिमित्तं  
 असम्भावपट्टावणाए इंगालदाहगदिट्ठंतं कहिउमाढत्तो-

जह एगो किर पुरिसो भायणमेगं तु भरिउ सलिलस्स । इंगालाण निमित्तं काले गिम्हे वणंमि गओ ॥ ५३ ॥  
 तत्थेगत्य बह्वं खायरपमुहाइं सारकट्टाइं । सो मेलिऊण जलणं पज्जलइं तस्समीवगओ ॥ ५४ ॥  
 उज्झंतकट्टसिहिताविउत्ति संछिन्नदारुसमिओत्ति । मज्झंदिणदिणयरपीडिओत्ति तण्हाउरो सुत्तो ॥ ५५ ॥  
 तं पुच्चाणीयं जलमसेसमापियइ तत्थ सुमिणंमि । गिंभुम्भवदिणयरकिरणविडुरमरुथेरवसहोव्व ॥ ५६ ॥

श्रीमहा०  
चरित्रे  
२ प्रस्तावः

॥१२॥

तहवि हु असमियतण्हो गेहे गंतूण सयलकलसजलं । निट्टविऊण निलीयइ पोक्खरिणीवाविकूवेसु ॥ ५७ ॥  
पीए तस्सलिलंमिवि गंगाइमहानईसु ओगाढो । ताओऽविहु सोसेई पलएव्व पयंडमत्तंडो ॥ ५८ ॥  
तत्तो जलहिजलं पिय अंजलिसलिलं व पियइ नो तहवि । तस्स उवसमइ तण्हा अवि अहिययरं पवहेइ ॥ ५९ ॥  
ताहे अपावमाणो कहिंपि सलिलं समत्थभुवणेऽवि । अवलोइउं पवत्तो सो संतत्तो पयत्तेण ॥ ६० ॥  
अह एगत्थ पएसे अइउंडो पूइयवो य (पूइथोव)सलिलोव(य) । तेणं दिट्ठो कूवो चिरेण परितुट्ठचित्तेण ॥ ६१ ॥  
पविसिउमसमत्थो दीहरज्जुणा वंधिऊण तणपूलं । सो खिवइ तत्थ तण्हासमत्थदुक्खस्स पसमट्ठा ॥ ६२ ॥  
तो तक्कहियपूलयपेरंतगलंतविंदुसंदोहं । उहं वियारियमुहो आसायंतो गमइ कालं ॥ ६३ ॥  
जह तस्स वाविदीहियसायरसलिलेहिं अहयतण्हस्स । नो किंपि होज्ज तेसिं तणग्गलग्गेहिं विंदूहिं ॥ ६४ ॥  
एवं देवाणुपिया ! तुम्हाणं पुव्वकालियभवेसु । उवभुत्तपवरपंचप्पयारसद्दाइविसयाणं ॥ ६५ ॥  
पुणरवि संव्वाणुत्तरसव्वत्थविमाणपत्तसोक्खाण । तेत्तीसं अयराइं निव्विग्घमणंतरभवंमि ॥ ६६ ॥  
जइ भो महाणुभावा ! तित्ती भोगे पडुच्च नो जाया । ता किं इमिणा होही भुत्तेणं तुच्छरज्जेण ? ॥ ६७ ॥  
तो असुइसंभवेसुं तुच्छेसुं माणुसेसु भोएसु । अइथोव्वकालिएसुं पज्जंते दुहविवागेसुं ॥ ६८ ॥  
मुहमहुरेसुं आवइसहस्सहेऊसु निंदणिज्जेसु । साहुजणवज्जिएसुं मुहुत्तमवि मा कुणह संगं ॥ ६९ ॥

९८ पुत्राणां  
प्रभोरूप-  
देशः ।

॥१२॥

तक्खणकयवेयालियपवरज्झयणेण बोहिऊणेवं । ते जिणवरेण सम्मं मुणिदिक्खं गाहिया सव्वे ॥ ७० ॥  
तो सुचरियसामन्ना विणिहयनीसेसधाइकम्मंसा । भुवणजणपणयचरणा जाया सव्वेऽवि केवलियो ॥ ७१ ॥  
विहरंति जिणेण समं गामागरनगरमंडियं वसुहं । अहं दूयं भरहवई पुण पेसइ वाहुवलियोऽवि ॥ ७२ ॥  
तेणवि दूयं निब्भञ्छिऊण भरहेण सह समारद्धो । दिट्ठीवायाइओ संगामो जाव पव्वइओ ॥ ७३ ॥  
तत्थेवुस्सग्गठिओ कह लहुभाईण वंदणं काहं । वंभीसुंदरिपेसण ओयरणं कुणसु हत्थीओ ॥ ७४ ॥  
बुत्ते चिंतानाणं जिणस्स पासंमि गमणमह तस्स । भरहोऽवि हयविपक्खं भुंजइ रज्जं सनगरीए ॥ ७५ ॥

इओ य-तस्स मिरियस्स दसविहचक्कवालसामायारीनिरयस्स सिद्धन्तपसिद्धसंजमकरणपरायणस्स संसारा-  
सारयं परिभाविंतस्स अट्टारसविहं वंभचेरमणुपालंतस्स वोलीणाइं बहूइं वरिसाइं, एगया य गिम्हमासे विप्फुरं-  
तेसु जलणजालाकरालेसु रविकरेसु धम्ममाणलोहागरनिज्जा(ज्झा)मयसरिसेसु वायंतसेसु खरसमीरणेसु विरहिणीजणहिय-  
यव्व तत्तंमि महियलंमि अण्हाणवसविसप्पमाणवहलमलाविलसरीरत्तणेण पव्वहंतसेयसलिलुप्पिलाउलत्तणेण य  
वाढं किलंतस्स दढचारित्तावरणीयकम्मदोसेण मइलहिययस्स परिचत्तकुमित्तस्सवि गुरुकुलवासे ठियस्सावि छट्ठमा-  
इनिट्ठुरतवकिसियसरीरगस्सवि सयावि सुत्तत्थे विपरिभाविरस्स एकारसंगाइं तण्हाभिहयस्स पयंडगिंभसंतत्त-  
सव्वगतस्स पल्हत्थं संजमओ झडत्ति चित्तं मिरियस्स ।

श्रीमहा०  
चरित्रे  
२ प्रस्तावः  
॥ १३ ॥

अइगाढो मोहभडो जमेरिसाणवि मणो विकंपेइ । अघडंतघडणपडुयाण किं व सज्जं न कम्माणं ? ॥ ७६ ॥  
अन्नं च—तावच्चिय धम्ममई तावच्चिय निंदियत्थपरिहारो । जावडज्जवि मोहमहापिसायपासंमि नो पडइ ॥ ७७ ॥  
एत्तो चिय मोक्खमहानिहाणमुक्खणियमुज्जयं समणं । धाडिंति विसहरा इव बावीस परीसहा सहसा ॥ ७८ ॥  
अह मिरिइणा चित्तियं—न सव्वहा समत्थोऽम्हि सम्ममियाणिं समणत्तणमणुट्ठिउं, ता किं करेमि ? कमुवाय-  
मणुसरामि ? किं देसंतरं वचामि ? कस्स वा साहेमि ?, होउ वा विकप्पिएणं, पवज्जापरिचाएणं नियमवणगमणं  
संपयं मे पत्तकालंति, अहवा—चउजलहिमेहलामंडलाए महिमहिलाए अहिचइस्स पयंडभुयदंडदलियदुहंतवइरिव  
ग्गस्स सयलपणमंतमहिवालमउलिकिरणावलिकब्बुरियवलय(चलण)स्स छन्नवइगामकोडिनाहस्स अप्पडिहयसा-  
सणस्स भरहचक्कवइणो पुत्तो होऊण सयमेव परिचत्तं मंदिरमणुसरंतो कहं न लज्जामि ?, कहं वा तत्थगयं निह-  
यपइणं मं जाणिऊण न लज्जाए हेट्टामुहा ठाइस्संति जणणिजणया ? कहं वा तुसारहारगोखीरकुंदेंदुधवलस्स  
इक्खागुकुलस्स पढमकलंको न भविस्सामि ? के वा परिचत्तुत्तमंगीकयधम्मस्स न करिस्संति हीलं सहसंवड्डियावि  
बंधुणो ? कस्स कस्स वा महापावकारिणो निदंसणं न भविस्सामि ?, ता सव्वहा न जुत्तं गिहगमणं, किं तु सव्व-  
प्पयारेहिवि परिसुद्धं नियमणस्सेव नियमणं मे काउं जुज्जइ, तं पुण सेलसिरयलोदुट्ठोलगंडसेलंपिव जुगंतसमय-  
समीरणुद्धयसिंधुसमुच्छलियमहल्लकल्लोलपडलं पिव पयंडमत्तंडमंडलपगलंतपहाजालं पिव दढसुक्ककाणणगयमहाडुया-

परिणाम-  
परावृत्तिः.

॥ १३ ॥

तणं पिव न मणागंपि सकेमि संठविउं, अयं च जइधम्मो अच्चंतमप्पमत्तचित्तमहासत्तनिव्वहणिज्जो, अहं पुण दुहंतग-  
हमो इव समुदुरखंधसिंधुरमहलयणोवसरणं कायरो इव दुग्गसंगामभीमसवडं मुहुब्भडभिडंतसुहडभिउडिफडाडोवं  
दुस्सहपरीसहचमूपराजियमाणसो न सकेमि अट्टारससीलंगसहस्साभिरामं सव्वहा जहुत्तं समणधम्ममणुचरिउं ।  
अविय—

सुरसेलतुल्लभारो एसो अहि(अहयं तु)भग्गपरिणामो । आजम्मं वोढव्वो कह तं एवंविहेण मए ? ॥ ७९ ॥  
एसोऽवि भवविरक्ख(फ)णपडयपभावो पियामहो जइवि । करकलियामलयं पिव जाणइ मम विहडियं चित्तं ८०  
तहविहु संसारुव्वेयविरत्तओ कहमहं महाघोरं । काउं मुणीण धम्मं तरामि एयाणुवित्तीए ? ॥ ८१ ॥  
कीरइ अणुवित्तीविहु सद्धम्मगुरूण थोवदिणसज्जे । कजे आजम्मं पुण कायव्वो संजमो कह णु ? ॥ ८२ ॥  
इओ य-(असुहं)गिहत्यभावं संजममकलंकमवि न सकेमि । काउं किलिद्धचित्तो कसुवायं संपवज्जामि ? ॥ ८३ ॥  
एवं च तस्स किंकायव्वयाअ मूढस्स अचित्तणीयमहिमयाए कम्मयाणं अपारसंसारसागरपरिब्भमाणुकूलसी-  
लपाए जीवस्स अवस्सं भवियव्वयाए तहाविहभावस्स इओ तओ उभयमग्गाणुसारिणमुवायं मग्गमाणस्स सह-  
सघिय सयमेव एयारिसी बुद्धी पाउन्भूया, जहा—किर भगवंतो मुणिणो मणवयणकायदंडत्तरहिया असुभवावारप-  
रियाएणं सया संलीणसरीरा अहं पुण न एवंविहगुणजुत्तो, जओ पराजिओ इंदिएहिं अहिभूओ य उस्सिखलेहिं



श्रीमहा०  
चरित्रे  
२ प्रस्तावः  
॥ १४ ॥

मणवयणकायदंडेहिं, तम्हा एरिसस्स मम हवउ सच्चरियपयडणपरं तिदंडं चिंधं, जइ पुण एयं अणवरयं पेच्छमाणस्स  
सदुच्चरियपच्छायावेण विसिद्धपरिवालणुज्जमो होज्जा १, तहा मुणिणो सिरकेसावणयणेण सविंदियनिग्गहेण य  
मुंडिया भवंति, मम पुण इंदियनिग्गहरहियस्स किं निरत्थयं सत्थयलुंचणेण २, अओ खुरमुंडणं मुणिवेसविसरिसत्त-  
परुवणपरं सिहाधरणं च संपज्जउत्ति २, तहा समणा भयवंतो तिविहं तिविहेण पंचक्खायसुहुमवायरपमुहभे-  
यपाणाइवाया संजममणुपालेंति, मज्झं पुण अतहाविहजोग्गयाजुत्तस्स थूलपाणाइवायवेरमणं जुत्तंति ३, परिचत्तस-  
मग्गकिंचणा मुणिणो, अहं पुण न एयंविहो ता नियमग्गाविसरणनिमित्तं सुवण्णपवित्तगाइमेत्तं मम किंचणमवि  
हवउ ४, तहा जिणवरुद्धिद्वसमग्गसीलजलपक्खालियकम्ममलसेयत्तणेण निचं सुंदरगन्धाभिरामा (मुणिवरा) अहं  
पुण निम्मलत्तणेण दुगुंछियगंधो ता वार्हिपि तस्सावणयणनिमित्तं गंधचंदणाइपरिग्गहो मम समुचिओत्ति ५,  
तहा ववगयमोहा निक्कारणविमुक्कोवाहणपरिभोगा य तवस्सिणो, अहं पुण महामोहाभिभूतो सरीरक्खापरो अओ  
छत्तयधरणं उवाहणापरिभोगो य मम संपज्जउत्ति ६, तहा परिजुन्नसुद्धकुत्थियथोवसुक्किलवत्थपरिग्गहा महाणुभावा  
मुणिणो, अहं पुण गाढकसायकलुसियबुद्धिपसरो तम्हा धाउरसरत्ताणि वत्थाणि मए परिहियव्वाणि ७, तहा  
सावज्जजोगभीरुणो जइणो मणसावि न पत्थंति बहुजीवाउलं जलारंभं, अहं तु संसाराणुसारिबुद्धी तम्हा  
परिमिणं सलिलेणं पाणणहाणाइं वावारमणुवरिस्सामित्ति ८ ॥

परिव्राज-  
कता.

॥ १४ ॥

एवं सवुद्धिपरिकप्पिएण जइविसरिसेण वेसेण । मुणिधम्ममग्गचत्तो पारिवज्जं पयत्तेइ ॥ ८४ ॥  
 गामांगरनगराइसु सिरिरिसहजिणेण सह परिच्चमइ । सुस्सवणपक्खवायं निचं हियएण वहमाणो ॥ ८५ ॥  
 अह तं करयलग्हियच्छत्तयं दीहलंवरिसिहंडं । पासंविमुक्कतिदंडं पवित्तमाईहिं परियरियं ॥ ८६ ॥  
 गेरुयरसरत्तंसुयविराइयं संझसूरविवं व । चंदणचच्चियदेहं उवाहणारोवियकमं च ॥ ८७ ॥  
 असरिसरूवं नीसेससगणसंघस्स मज्झयारंमि । दहुं कोऊहलिओ बहुजणो पुच्छए धम्मं ॥ ८८ ॥  
 मिरिईवि सम्ममहिगयसुत्तथो तत्तदेसणसमत्थो । साहेइ वित्थरेणं मुणिधम्मविहिं जणस्स पुणो ॥ ८९ ॥  
 जह एत्थं आजम्मं वायरसुहुमेसु सच्चजीवेसु । संघट्टणविद्वणाइ वज्जणिज्जं पयत्तेणं ॥ ९० ॥  
 कोहेण व लोभेण व हासेण भएण वावि माऽ(ना)सच्चं । जीवोवचायजणगं भासेयच्चं विणासेऽवि ॥ ९१ ॥  
 गामे वा नयरे वा थोवं वा भूरि वा न घेत्तच्चं । सच्चित्तमचित्तं वा सच्चमदत्तंपि तिविहेण ॥ ९२ ॥  
 देवनरतिरियरमणीसु पवरलायणसुंदरंगीसु । पच्चक्खभुयंगीसु व खणंपि नो अभिरमेयच्चं ॥ ९३ ॥  
 धम्मोवयारि मोत्तुं वत्थपडिग्गहपमोक्खमुवगरणं । सेसमहिगरणरूवं परिहरियच्चं पयत्तेण ॥ ९४ ॥  
 संधारगमेकं वज्जिऊण नेवोवहाणतूलीओ । फासस्साणुगुणाओ कइयावि य पत्थणिज्जाओ ॥ ९५ ॥  
 अरसविरसन्नपाणेहिं पीडिण्णावि मडुरदित्तरसे । नो भोयणंमि चित्तं निवेसियच्चं मणागंपि ॥ ९६ ॥

श्रीमहा०  
चरित्रे  
२ प्रस्तावः  
॥ १५ ॥

रम्मेसु वउलमालइकुवलयगंधेसु तदियरेसुंषि । घाणिंदियगोयरमइगएसु तुल्लेण होयवं ॥ ९७ ॥  
रूवेसु सुंदरेसुं नयणमणाणंदणेसु दिट्ठेसु । तवइरित्तेसुं वा तोसपओसा न कायवा ॥ ९८ ॥  
सहेसु वेणुवीणाकिन्नरकंडुम्भवेसु विविहेसु । खरमज्जारभवेसुवि सुणिएसु समेण होयवं ॥ ९९ ॥  
तज्जणतालणहीलणकरणपसत्तेऽवि वालिसजणंभि । चिररूढगाढपणएव रूसियवं न थेवंपि ॥ १०० ॥  
जयपयडेहिवि नीसेसलोयविम्हयकरेहिवि गुणेहिं । जुत्तेण मणागंपिवि माणो न मणंभि ठवियवो ॥ १०१ ॥  
विस्सासविणासणकारिणित्ति सुहगइदुवारपरिहोत्ति । दुहनंदियत्ति माया परिहरियवा कुभज्जव ॥ १०२ ॥  
थेवंपि कज्जछिहं पाविय पावस्स छलणसीलस्स । लोहस्स पिसायस्स व अवगासो नेव दायवो ॥ १०३ ॥  
सञ्छायं तिव्वफलं मइसउणं पवरसीलतरुसंडं । भंजंतो दुट्ठमणो बंधेयवो वणकरिव ॥ १०४ ॥  
निस्संबंधं सावज्जजोग्गये जंतुदुक्खजणगे तु । सच्चेऽवि भासियवे जीहावि पडिक्खलेयवा ॥ १०५ ॥  
तत्तायगोलओ इव पमत्तचित्तंगविविहवावारो । किं नेव विद्देज्जा ? ता देहो संठवेयवो ॥ १०६ ॥  
सत्तरसभेयभिन्नो जइधम्मो नूणमप्पमत्तेणं । जं कायव्वो निच्चं तेणेसो दुक्करो होइ ॥ १०७ ॥  
गिम्हुण्हपीडिएणवि न छत्तयं न उवाहणाओऽवि । परिभुत्तव्वा हेओ सव्वोऽवि सरीरसक्कारो ॥ १०८ ॥  
नो सिरलोयप्पमुहं कट्ठाणुट्ठाणमवि विमोत्तवं । रत्ताइवणवत्थंपि पत्थणिज्जं कयाइ नवि ॥ १०९ ॥

साधुधर्म-  
बोधनं,

॥ १५ ॥

इय जइधम्मे सबो कायव्वविही निवेइओ तुम्ह । अक्खंडं सिवसोक्खं जइ वंछह ता तयं कुणह ॥ ११० ॥

एवमायन्निऊण जणो पहिट्ठमणो भणिउमाढत्तो—भयवं ! जइ एवंविहो चरणधम्मो ता कीस तुम्हे छत्तप्प-  
मुहसुवगरणं गिण्हह ? सिरलोयाइयं च न सम्ममायरहत्ति, मिरिइणा भणियं—भो भो महाणुभावा ! मा एवमासं-  
कह, जहा एसो अण्णहा भासइ अण्णहा करेइत्ति, अहं हि संसाराणुसारिवुद्धी पराजिओ मोहमहामलेणं पडिक्ख-  
लिओ उस्सिखलकसायखलेहिं मुसियपसमधणो दुइंतिंदियचोरेहिं सायरमवल्लोइओ दुग्गइदुक्खरक्खसीए, ता मम  
दोसगुणविभावणं उज्झिऊणं नीओवणीयं पिव महामणिं खचरसमप्पियं पिव परमविज्जं मायंगदेसियं पिव समी-  
हियपुरपंधाणं रोगविहुरवेज्जोवइट्ठं व परमोसहं अंगीकरेह सबहा तुम्हे मुणिधम्मंति ।

एवमाइन्निऊण संजायभववेरग्गा निउणबुद्धिपरिभावियपरमत्था तणं व परिचत्तपुत्तकलंतमित्तवित्ता जिण-  
धम्मनिवेसियथिरचित्ता समणदिक्खागहणत्थं पाउव्ववंति अणेगउग्गभोगराइण्णपमुहा जणा, मिरिईऽवि ते  
सिस्सभावेणोवट्ठिए णाऊण भगवओ भुवणपईवस्स संसारतरुगहणदहणदावानलस्स अट्ठप्पयारपवरपाडिहेरपयडप्प-  
भावस्स उसभसामिणो समप्पेइ । एवं च पइदिणं सद्धम्मदेसणाए पडिवोहेमाणो नियदुच्चरिअं निरंतरं निंदमाणो  
सुस्समणपक्खवायं वहमाणो सुत्तत्थाइं मणे परिभावेमाणो सुहसीलयाए सबुद्धिपरिकप्पियपरिव्वायगवेसं धरेमाणो  
गामागराईसु सामिणा सद्धिं विहरमाणो कालं गमेइत्ति ।

श्रीमहा०  
चरित्रे  
२ प्रस्तावः

॥ १६ ॥

अह अत्रया कयाई भयवं गामागरेसु विहरिऊण अट्टावयंमि समोसरिओ, भरहचक्कवट्ठीवि भाउणो पवइए निसामिऊण संजायतिव्वसोगो जइ पुण भोगे दिज्जमाणे अज्जवि गेण्हंतित्ति संचित्तिऊण भगवंतं उसभसामिं सवि-  
णयं वंदिऊण भाउगे भोगेहिं निमंतेइ, इहलोइयसुहनिरवेक्खेहिं भणिओ तेहिं—

भो महायस !—सयमेव परिचत्ते दुहनिवहुप्पत्तिकारणुच्चूए । उरनिहयसल्लतुल्ले कहमिव भोगे अणुसरामो ? १११

अच्छंतु पेम्मनिब्भरतरुणीसंवंधवंधुरा भोगा । तेसिं न संकहंपिवि सोउं संपइ समीहामो ॥ ११२ ॥

एवं भोगेसु पडिसिद्धेसु भरहो परिचत्तसंगाण एएसिं आहारदाणेणावि ताव धम्ममायरामित्ति विकप्पिऊण पवरलक्खणभोयणभरिएहिं पंचहिं सगडसएहिं असणदाणत्थमुवट्ठिओ, पुणरवि निवारिओ तेहिं—अहो महायस ! न कप्पइ आहाकम्मं आहडं च असणपाणं परिभोत्तुं मुणीणं, तओ गिहनिमित्तसंसिद्धभोयणेण निमंतेइ, सोऽवि रायपिंडो न कप्पइत्तिकाऊण निसिद्धो साहूहिं, हा सव्वपगारेहिं परिचत्तो अहमियाणिं एएहिंति दढं चित्तसंताव-  
सुवगओ भरहचक्कवट्ठी, तं च सोगविहुरं नाऊण वियाणमाणेणावि सक्केण तस्स परितोसनिमित्तं दुच्छिओ भयवं सप्पभेयमोग्गहं, पुट्ठेण य भगवया भणियं—युरिंद ! पंचविहो उग्गहो, तंजहा—देविंदोग्गहो रायावग्गहो गिहिवइअ-  
वग्गहो सागारियावग्गहो साहम्मियावग्गहो, तत्थ देविंदावग्गहो जहा किर जंबुदीवदाहिणखेत्ताहिवई तुमं, अहो सक ! तुहाणुजाणावणेण कप्पइ समणाण तहिं विहरित्तए, राया पुण लक्खंडभरहाहिवई जहा संपयं भरहो, तस्साणुण्णाए

इन्द्रकृता  
अवग्रह-  
पृच्छा.

॥ १६ ॥

मुणीहिं तद्देसे वसियेवं, गिहवई य मंडलेसरो, सोऽवि समंडलनांघगत्तणेण अणुणवणजोग्गो, तदणुमए चेव ठाइयवं,  
सागारिओ पुण सेज्जायरो, सेज्जा य सनिमित्तकयतहाविहगेहसालापमुहो भवणविसेसो, तद्दाणेण तरइ संसारसायरंति  
सेज्जातरो गुणनिप्फन्ननामो । कहं पुण सेज्जाए तरइत्ति ? भन्नइ—

तत्थ ठियां मुणिवसहा सज्झायज्झाणझोसियसरीरा । जं धम्मदेसणाईहिं भवलोयं उंवयरंति ॥ ११३ ॥

जं वा अपुवसत्थं पढंति तह संजमे पयट्ठंति । छट्ठमाइयतवो दुक्करमवि जं पवज्जंति ॥ ११४ ॥

अन्नत्तोऽविहु जं वत्थपत्तभत्ताइणा न सीयंति । परमत्थेणं सद्यत्थ तत्थ सेज्जा भवे हेऊ ॥ ११५ ॥

इय-सेज्जादाणेण महल्लदुक्खकल्लोलसंकुलमगाहं । संसारसायरं गोपयं व दाया लहुं तरइ ॥ ११६ ॥

इहरा सेज्जाऽभावे न जीवरक्खावि निवहइ सम्मं । किं पुण समग्गसद्धम्मपालणं होज्ज निधिग्घं ? ॥ ११७ ॥

साहम्मियावग्गहो पुण सिद्धंतपसिद्धनाएण परोप्परं समणाण एगखेत्ते निवसिउकामाणमवगंतवो । एवं च  
पंचविहावग्गहपरुवणमायन्निऊण पंचंगणियायपुरस्सरं सक्को भणिउमाढत्तो-भयवं ! जे इमे अज्जप्पभिइं दाहि-  
णखेत्ते समणा निग्गंथा विहरंति एएसि णं अहं ओग्गहमणुजाणामि, भगवया भणियं-जुत्तमेयं, एवं च आयन्निऊण  
भरहोऽवि जायपरितोसो भणइ-भयवं ! अहंपि भारहे वासे साहुणो विहरमाणे अणुमण्णेत्ति । तंपि तद्दाऽऽनीयमसणं

श्रीमहा०  
चरित्रे  
२ प्रस्तावः

॥ १७ ॥

अणुवयगुणवयसिक्खावयगुणसंगयाणं सावगाणं सक्कवयणाओ भरहेण दावियं, तथा एवंपि निज्जरा होउत्ति मण्णमा-  
णेण सावगाणं पइदिणं भोयणदाणं कयं, भयवंपि अन्नत्थ विहरिओ ।

तेऽवि सावगा परिचत्तासेसघरवावारा भरहपणीयजिणथुइगम्भे वेदे परावत्तयंता छट्ठे मासे परिण्णाननिमित्तं का-  
गिणीरयणेण उत्तरासंगनाएण आलिहियतिरेहा निरवज्जवित्तीए कालं गमेति । अन्नया य भयवं पडिवोहिऊण तेसु तेसु  
ठाणेसु भव्वजणं पुणरवि अट्ठावयमागओ, देवेहिं कयं विसालसालत्तयविहारं छत्ताइच्छत्तरमणिज्जं आजानुमेत्तभूमि-  
निहित्तरुंतंभमरं पंचप्पयारपुप्फपुंजोवयारं गयणंगणोयरंततियसविमाणमालासहस्साभिरामं मंदमंदमुद्धयवेजयंती-  
सयसोहियं पवरमणिमयमहप्पमाणासोगतरुविराइयं पंचवन्नरयणविणिम्मियसिंघासणं समवसरणं, तत्थ य निसन्नो  
तइलोकपियामहो भयवं पढमजिणो, निविट्ठा कमेण गणहरपमुहा साहुवग्गा, आसीणा अणेगसुरकोडिपरिवुडा  
बत्तीसंपि सुरिंदा, विण्णायजिणागमवुत्तंतो समागओ सव्वविभूईए भरहो, परमभत्तीए पणमिय भयवं आसीणो  
उचियभूमिभाए ।

अह सो तथाविहं भवणच्छरियं नीसेसतिहुयणसिरिविरइयंपिव सव्वब्भुदयगेहंपि व समवसरणसोहं भगवओ  
परमिस्सरियं च पासिऊण हरिसुप्फुल्लोयणो पुच्छिउमेवं पवत्तो-ताय ! जारिसा तुम्हे भवणगुरुणो एवंविहपूयाप-  
यरिसपत्ता किमेत्थ भरहेअण्णेऽवि एरिसा भविस्संतंति न वा ?, भगवया भणियं-भविस्संतंति, भरहेण भणियं-केरिसा ?,

अवप्रहा-  
नुवा  
शलाका-  
प्रश्नः ।

॥ १७ ॥

ताहे तेवीस जिणे अजियाई वीरनाहपज्जंते । समबुद्धिबलायारे तिहुयणजणपणयपयपउमे ॥ ११८ ॥  
 तह तेसिं च अण्णोऽण्णमंतरं सयलकालकलणेणं । वण्णं पमाणमाउं गोत्तं तह जणणि जणगा य ॥ ११९ ॥  
 जम्मणनपरे य तहा कुमाररज्जाइ सव्वपरियागं । सिद्धिगईपज्जंतं भयवं भरहस्स साहेइ ॥ १२० ॥  
 पुणरवि पुच्छइ भरहो मम सारिच्छा कईह होहिंति ? । सगराई एकारस चक्कहरे कहइ सव्वन्नू ॥ १२१ ॥  
 अप्पुट्ठोऽविणु भयवं पुणोऽवि वागरइ भरहनाहस्स । नव वासुदेववलदेवजुवलए भाविणो भरहे ॥ १२२ ॥  
 पुणरवि भणिओ भरहाहिवेण तइलोकमंदिरपईवो । अवलोइऊण परिसं खयरामरनियरपरियरियं ॥ १२३ ॥  
 छट्ठमाइतवकिसियसाहुसुधम्मकारिगिहिकलियं । भयवं ! किमेत्थ कोऽवि हुपाविस्सइ तित्थयरलामं ? ॥ १२४ ॥  
 तह चक्कवट्टिलच्छिं चोइसवररणगुणमहग्घवियं । अहवावि वासुदेवत्तणंपि पावेज्ज भरहंमि ? ॥ १२५ ॥  
 ताहे कलियकुलिं गं मिरिइं एगंतसंठियं भयवं । दावइ जह एस जिणो चरिमो होही तुह सुओत्ति ॥ १२६ ॥  
 एसोचिय गामागरनगरसमिद्धस्स भारहद्धस्स । सामी तिविहुनामो पढमो तह वासुदेवाणं ॥ १२७ ॥  
 एसो महाविदेहे पियमित्तो नाम चक्कवट्ठीवि । मूयाए नयरीए भविस्सई परमरिद्धिजुओ ॥ १२८ ॥

एवं च आयन्निऊण भरहनरिंदो पडिट्ठमणो पणमिऊण भयवंतस्स चरणसरोरुहं तक्खणमेव अणेगसुहंसेणाव-  
 श्निपहपरिखुडो पयट्ठो नियसुयस्स मिरियस्स वंदणणिमित्तं, तदंतरे चारणलद्धिसंपन्ने ओहिनाणधरे मणपज्जवनाणिणो



श्रीमहा०  
चरित्रे  
२ प्रस्तावः

॥ १८ ॥

विगिहृतवकरणनिरण सूरभिमुहायावणापरायणे वीरासणाइदुकरकायकिलेसकारण भंगियसुयपढणेकमाणसे यमहासु-  
णिणो परमभत्तीए ठाणे ठाणे विणयपणमंतमउलिमंडलं वंदंतो अणिमिसदिट्ठीए पेच्छमाणो यपत्तो जत्थ सो एकदे-  
सविमुक्केणुतिदंडो पंडुरपुंडरियनिवारियरविकरपसरो नियमइपरिकप्पियपवित्तिगाइउवगरणविसरिसरूवदंसणको-  
उहलाउलियागयलोयधम्मकहणवक्खित्तचित्तो मिरिई निवसइत्ति, तं च दूराओ चिय निस्सामण्णभत्तिभरनिस्सरं-  
तुव रोमंचच्छलेण अंतरे अस्सायंतं व सिणेहसवस्समुगिरंतो पढमदंसणुत्तामियमत्थयनिवडंतकुसुमनिभेण अग्रं व  
वियरंतो विमलकरयलंगुलिमुहारयणकिरणजालेण दिसामुहपसरिएण मंगलदीवनिवहं व वोर्हितो पयाहिणादाणेण  
तिगरणभत्तिपगरिसं व साहेतो भूमितलविलुलंतुत्तमंगं पणमिऊण पमोयभरनिभरगिरं भणिउमाढत्तो, कहं?—

वच्छ ! तुमं चिय नीसेसपवरलक्खणनिहाणभूओऽसि । सुकयत्थाणं मज्झे तुज्झ परं पढमिया रेहा ॥१२९॥  
तिहुयणभुवणस्सुवरिं इक्खागूणं न होइ कह वंसो ? । जत्थ विमला विरायइ विजयपडाइव तुह कित्ती ॥१३०॥  
तुह भाविरिद्धिमायन्निऊण रंजिज्जए न कस्स मणं ? । कह वा नो वंदिज्जइ तुह पयपउमंकिया पुहइ ॥१३१॥  
कीरंतु नाम दुकरतवोविहाणाइं भव्वलोएणं । जं तेसि फलं तं पुण तुमएच्चिय पावियं सवं ॥ १३२ ॥  
जओ-सिट्ठोऽसि तुमं ताएण भारहे कुंडगामनयरंमि । सिद्धत्थपत्थिवसुओ किर चरिमो एत्थ तित्थयरो १३३  
पुणरवि दसारवग्गे आइमो तं तिविडुनामेण । पोयणपुरंमि नयरे तिखंडभरहस्स सामित्ति ॥ १३४ ॥

मरीचि-  
वन्दनं.

॥ १८ ॥

मूयाए नयरीए महाविदेहंमि तह य चकवई । वत्तीससहस्समहानरिंदसंदोहनयचरणो ॥ १३५ ॥  
 पारिषजं जम्मं च तुज्झ नो पणिवयामि किंपि अहं । जं होहिसि तित्थयरो चरिमो तं तेण वंदामि ॥ १३६ ॥  
 एवं थोऊण वहुं गिराहिं अब्भहियभावगब्भाहिं । जयकुंजरमारूढो विणीयनगरिं गओ भरहो ॥ १३७ ॥  
 मिरिईवि इमं सोउं हरिसुग्गयपुलयजालपीणंगो । गरुयकुलजम्मसहजायभूरि गंभीरिमं मोत्तुं ॥ १३८ ॥  
 जिणवयणंत्यविभावणसंपन्नविवेयमवि परिचइउं । देहुग्गयनिरवंग्गह लज्जापसरंपि पडिखलिउं ॥ १३९ ॥  
 दुधारवेगपफुरियफारसुम्मायमेकमासज्ज । दप्पुब्भडमप्फोडिय तिवइं मल्लो व रंगंमि ॥ १४० ॥

पद्मासन्नमहासुणिंसमक्खमह लोयमज्झयारंमि । आणंदसंदिरब्भो फुडक्खरं भणिउमादत्तो ॥ १४१ ॥ चउहिं कलावयं ।  
 जइ पढम वासुदेवो महाविदेहंमि चकवट्टीवि । चरमो तित्थयरोऽविहु अहं भविस्सामि भरहंमि ॥ १४२ ॥  
 ता तिहुयणेऽवि नूणं अण्णो नो पुण्णवं ममाहिंतो । कस्सऽण्णस्स व एरिस फलदायी होज्ज सुकयतरु ११४३  
 तथा—अज्जो तित्थयराणं पढमो जणगो य चक्किवंसस्स । अहयं च दसाराणं अहो कुलं उत्तिमं मज्झ ॥ १४४ ॥  
 एयं नियकुलचंगिमउक्कित्तणपच्चएण संजणियं । नीयागोयं कम्मं मिरिइपरिवायगेण दढं ॥ १४५ ॥  
 भयवं च जयपियामहो विहरिऊण तेसु तेसु गामागरपुरमडंवदोणमुहपमुहेसु ठाणेसु किंचूणं पुव्वसयसहस्सं  
 केवलपेरियागं पाउणित्ता आउयकम्मस्स सावसेसयं नाऊण अट्ठावयपव्वयमारूढो, तओ महामासवहुलतेरसीए अभि-

श्रीमहा०  
चरित्रे  
२ प्रस्तावः

॥ १९ ॥

ईनक्खत्तमुवागए चंदे पुवण्हसमयंमि सुसमदूसमाए एगूणनउइपक्खेसु सेसेसु कयचउहसमतवोकम्मो दसहिं मुणि-  
सहस्सेहिं सद्धिं परिचत्तचउव्हिहारो कयपाओवगमणो पज्जंकासणसंठिओ वेयणियाउयनामगोयकम्माणं अंतं  
करित्ता सिवमयलमणुत्तरं पत्तोत्ति ।

अहं वत्तीसंपि सुरिंदा दुस्सहदुक्खविदुरेण भरहनरिंदेण समेया वाहण्णवाहाउल्लोयणजुयला पणमिऊण भग-  
वंतं नंदणवणाओ सरसगोसीसकसणागरुपमुहसोक्खकट्ठाइं आणाविंति ।

तओ—पुव्वेण जिणस्स कए वट्ठायारं चियं रयाविंति । दक्खिणदिसाए तंसं इक्खागुकुलुब्भवनिमित्तं ॥ १४६ ॥

अवरेण उ चउरंसं वित्थरवंतं विसिट्ठकट्ठेहिं । अवसेसाण मुणीणं सरीरसकारकज्जेणं ॥ १४७ ॥

ताहे खीरोदय(जल)ण्हवणसुइसुरहिचंदणविलित्तं । आरोवेति सरीरं चियाए सक्का जिणिंदस्स ॥ १४८ ॥

भवणवइपमुहदेवा ण्हवियविलित्ताइं सेससाहूणं । आरोवेति दुहत्ता देहाइं नियनियचियासु ॥ १४९ ॥

तत्तो अग्गिकुमारा जहकमं तासु सक्कवयणेणं । वयणेहिं निराणंदा मुयंति जालाउलं जलणं ॥ १५० ॥

एवं सरीरसकारमायरेणं सुरेसरा काउं । नियनियठाणेसु गया विच्छायमुहा विगयसोहा ॥ १५१ ॥

भरहनरिंदो पुण महासोगाभिभूओ सगिहमागओ, तत्थ य दढवज्जपडणाइरित्तसोगसंभारजज्जरियसरीरो मन्नु-  
पूरियगलसरणी संकंदणपोकमुकारा(वा)णुसारोयणारावविहियसोगपमोक्खो अट्ठावयसेलसिहरंमि सव्वरयणमयं महंतं

आदि०  
निवाण.

॥ १९ ॥

धूमं रयावेइ, बाहुबलिपमुहाण य नवणउईए भाउगाणं अण्णाणि नवनउइ धूमाणि निवत्तावेइ, तहा भगवओ नि-  
 व्याणलामप्पएसे तिगाउयउस्सेहं जोयणायांमं सिंहनिसा(सेज्जा)इयं सच्चरयणविणिम्मियनियनियवणणप्पमाणोववेय-  
 चउवीसजिणपडिमाहिट्टियं सुविभत्तसालिभंजियाभिरामतोरणावद्धवंधुरामिलाणवंदणमालं दुवारदेसोभयपासपइट्टिय-  
 लट्टपुंदरीयपिहाणपुण्णकणयकलसं सरसपंचप्पयारपुण्फपुंजोवयारकलियं कालागुरुकुंदुरुक्ककप्पूरपमुहवत्थुसिद्धधूयधूमं-  
 पयारियदिसाहोयं अणेगतियसंगणाजणुत्तालकरतालपुरस्सरदिज्जमाणरासयं भत्तिभरनिब्भरगायंतकिंनरनियरं दूरदेसा  
 गयविज्जाहरचारणमुणिजणविचित्तयुइयोत्तखचट्ठंतहलचोलं पइट्टियलोहमयजंतदुवारपालं जिणभवणं कारावेइ ।

जं च—संसारोपहिनिवंडतसत्तसंताणजाणवत्तं व । रेहइ पवणुदुयधवलधयवडाडोवरमणिजं ॥ १५२ ॥

इयसागुकुलुम्भवभूवकित्तिक्कूडं व संठियं पयडं । सोहइ महीए केलाससेलसमसीसियाएव्व ॥ १५३ ॥

पवणपणोल्लिरजलहरपडलाउलसिहरपरिसराभोगं । परिभमिरभमरनियरं चिरायए कुमुयमउलं व ॥ १५४ ॥

मत्ते पवणपणोल्लिरएयमहद्वयपलोयणेण जणे । पवयसिरनिवडिरगयणसरियकित्तीफुडं जाया ॥ १५५ ॥

भरहनरिंदनिवेसियंजिणमंदिरदंसणाणुसारेणं । सेसजणोऽवि पयट्ठो जिणविंवाईण कारवणे ॥ १५६ ॥

जुत्तं च एयं, जेण—

एयं सु दुग्गइदुवार(पिहाण)फलिहोवमं जिणा विंति । नीसेससत्तसंताणतागदाणेकहेउं च ॥ १५७ ॥

श्रीमहा०  
चरित्रे  
२ प्रस्तावः  
॥ २० ॥

एको(त्तो)च्चिय तक्कालियमुणिगणहरकेवलीहिं न निसिद्धं । चेइहराभावे जं तित्थुच्छेओ भवे पच्छा ॥ १५८ ॥  
तथा—जिणसंतविंदंसणविन्नायजहत्थवत्थुपरमत्थो । पडिवज्जइ जइ किरियं कोई संसारभयभीओ ॥ १५९ ॥  
मुणिणोऽवि वंदणत्थं इओ तओ इंति नियविहारेणं । तेऽवि य करंति सद्धम्मदेसणं समयनीईए ॥ १६० ॥  
पडिबुज्झंति य भव्वा गिण्हंति जिणिंदधम्ममकलंकं । एवं च तित्थबुद्धी होइ कया सव्वकालंपि ॥ १६१ ॥  
किं बहुणा?—जिणभवणाइनिवेसणसमुवज्जियपुण्णपगरिसवसेणं । सग्गापवग्गलच्छी निवसइ भव्वाण करकमले ॥ १६२ ॥  
इय सो भरहनरिंदो निवेसिऊणं जिणिंदवरभवणं । उवभुंजइ नियरज्जं विसयसमिद्धं बहुं कालं ॥ १६३ ॥  
अह अन्नया पविट्ठो आयंसघरंमि विमलफलिहमए । नियरूवपेच्छणकए सव्वालंकारियसरीरो ॥ १६४ ॥  
विविहपयारं पेच्छंतयस्स अह अंगुलीयगं गलियं । करकिसलयाउ ताहे वीभच्छा अंगुली जाया ॥ १६५ ॥  
ववगयसोहं तं पासिऊण सव्वंगसंगि याभरणं । मुक्कं साहावियरूवदंसणत्थं महीवइणा ॥ १६६ ॥  
अत्थमियसयलतारं व नहयलं लुणियसस्समिव छेत्तं । ववगयकमलं व सरं तरुं व संछिन्नसाहग्गं ॥ १६७ ॥  
दट्ठुं च कट्ठघडियं व निप्पहं विगयरूवलायन्नं । चम्मावणद्धनिविडट्ठिपंजरागारमह देहं ॥ १६८ ॥  
तो चिंतिउं पवत्तो सुनिउणबुद्धीए जायसंवेगो । वेरग्गावडियमई सरीरासारयं भरहो ॥ १६९ ॥  
एवंविहनिंदियदेहकारणा कह मए महापावं । कयमचंतरउहं अहो विमूढेण चिरकालं ? ॥ १७० ॥

चैत्यकृतिः  
केवलं च,

॥ २० ॥

कह वा विसयामिसमोहिण जिननाहदेसिओ धम्मो । निप्पुण्णएण न मए सिवफलओ सम्ममायरिओ ॥ १७१ ॥  
 किं चिंतामणिमह कप्पतरुवरं कामधेणुमह यावि । कोऽवि सयन्नो कहमवि लद्धूण परम्मुहो होज्जा ॥ १७२ ॥  
 ते बाहुवलिपमोक्खा घण्णा मह भाउणो महाभागा । जेहिं असारसरीरेण साहिओ सुंदरो मोक्खो ॥ १७३ ॥  
 एमाइसुहज्जवसाणजलण(जाले)जलाविउं झत्ति । निहट्ठो तणरासिव मोहपसरो भरहवइणा ॥ १७४ ॥  
 उप्पाडियं च केवलनाणं निप्पच्चवायसुहहेउं । देविसमप्पियलिं गो गेहाओ निग्गओ ताहे ॥ १७५ ॥  
 दसहि सहस्सेहिं नरेसराण तक्कालगहियदिक्खाणं । परियरिओ भयवं भरहकेवली विहरिओ वसुहं ॥ १७६ ॥  
 अह पुव्वसयसहस्सं केवलपजायपालणं काउं । एकसमयेण निव्वाणमुवगओ भरहमुणिवसहो ॥ १७७ ॥

इओ य सो मिरिई परिब्बायगो सार्मिभि निव्वाणमुवगएऽवि साहूहिं समं गामागरनगराइसु अप्पडिबद्धो  
 विहरइ, अपुव्वठाणेषु य धम्मदेसणं कुणइ, जो य कोवि पडिबुज्जइ पव्वजागहणं च समीहेइ तं साहूणं समप्पेइत्ति ।  
 एयं च तस्स विहरमाणस्स अन्नया कयाइ सरीरगेलण्णया महती पाउब्भूया, तवसेण य सो न तरइ अप्पणो निमित्तम-  
 सणपाणंपि आहरिउं, न खमइ सरीरचेट्ठंपि अणुट्ठिउं, न पहवइ वइमेत्तमवि भासिउंति, ते य सगासट्ठिया पेच्छंति  
 सादुणो तं तहट्ठियं तहावि असंजउत्ति कलिऊण न पुच्छंति सरीरवत्तं, न समप्पेंति भत्तपाणं, न दंसेंति वेज्जस्स, न  
 उवयरंति ओसहाणं, किं बहुणा ?, न संकहंपि करिंति तस्स, मिरिईवि जातसंकिलेसो चित्तेइ-अहो निहया

श्रीमहा०  
चरित्रे  
२ प्रस्तावः

॥ २१ ॥

अहो निरप्पणचित्ता अहो सकज्जपसाहणपरायणा अहो लोयववहारपरम्मुहा अहो नियउदरभरणरसिया इमे सा-  
हुणो जं उवयारिणंपि चिरपरिचियंपि एगगुरुदिविखयंपि पासपरिवत्तिणंपि समाणधम्मपडिवद्धंपि अणवरयगुणग-  
हणपरायणंपि ममं सिणिद्धचक्खुक्खेवमेत्तेणवि णाणुगिण्हंति, अहवा न सम्ममणुचिंतियमेयं मए, जओ एए  
महाणुभावा सरीरस्सवि पडियारमकुणंता कहं मम अस्संजयस्स उवयारे वटंतु?, केवलं जइ अहंपि इमाओ रोग-  
महण्णवाओ पारं पावेमि ता निच्छियं पव्वजागहणुज्जुयं कमवि सयमेव पवावयामि, न एगागीहिं तीरिज्जंति  
सोढुमावयाओ, अह कहंपि भवियव्वयाए वसेण खओवसमओ वेयणीयस्सं चिरकालभवियव्वत्तणओ पारिवज्ज-  
पासंडवंसस्स तहाविहोसहसामग्गीउवहारओ ववगयरोगो सो समत्थसरीरो संपन्नो, विहरिओ य अण्णत्थ ।

अण्णया य धम्मदेसणं कुणमाणस्स तस्स कविलो नाम रायपुत्तो सगासमल्लीणो, तेणावि पंचमहव्वयरक्ख-  
णपहाणो पसमाइगुणाहिट्ठिओ पंचिंदियनिग्गहविसुद्धो निस्सेयसफलदायी परूविओ से सुस्समणधम्मो, कविलेण  
य वुत्तं-भयवं ! अण्णहा तुम्हे वज्झनेवत्थमुव्वहह, इमं च अण्णहा पण्णवेह, किमेत्थ तत्तं?, मिरिइणा भणियं-  
भइ ! एसो सुसाहुधम्मो तुह निवेइओ, इमं पुण जहुत्तसाहुधम्मासमत्थयाए पवलपावकम्मयाए दुग्गइगमणसी-  
लयाए य सबुद्धिसिप्पपरिकप्पियं कुलिंगं मए अब्भुवगयं, तात ! एयं पारगच्छियं, अओ पडिवज्जसु निस्सं-

१ यद्यपि चतुर्णां घातिनामेव क्षयोपशमस्तथापि अत्र प्रागुदितस्य वेदनीयस्य क्षयः नवस्य चोदयनिरोध इति क्षयोपशमता ज्ञेया, न तु मिश्रीभावताऽन ।

भरतनि-  
र्वाणं कपि-  
लदीक्षा.

॥ २१ ॥

सयं समणधम्मं, कविलेण वुत्तं-भयवं ! तुम्ह संतिए एत्थं तंहाविं अत्थिं किंपि णिज्जराठाणं नवा ?, मिरिइणा भणियं-भइ ! समणधम्मं ताव अत्थि, इहावि मणागंति, एवं च तेणं अजहट्ठियवत्थुदेसणओ निविट्ठो सागरोव-मकोडाकोडिमेत्तो संसारोत्ति । नणु किं एत्तियमेत्तविवरीयकहणेऽवि एवं संभवइ ?, किमिह चोज्जं?, जेण-

विवरीयजिणागमपयमेत्त(स्स)परूवणेऽवि मिच्छत्तं । अप्पत्थभोयणेण च दुहजणगं रोगमज्जिणइ ॥ १७८ ॥

एत्तोच्चिय मूलुत्तरगुणगणविरहेऽवि लिंगधारीवि । सुवइ सव्वज्जुमयं जहट्ठियं पन्नवेमाणो ॥ १७९ ॥

किं एत्तोऽवि हुं ए(पा)वं जं सरणगए णु भंवभएण जणे । उम्मग्गदेसणातिक्खल्लग्गघाएण विदवइ ॥ १८० ॥

गरुयंपि कयं पावं न तहा जीवस्स दुक्खमावहइ । जह जिणवरवयणपसूयसमयविवरीयपरिकहणं ॥ १८१ ॥

जलं वित्तरेण । पत्थुयं भण्णइ-

सो कविलो सन्निवायाभिभूओ इव परमोसहं महागहपरिग्गहिओ इव तंहाविहं मंतकिरियं पुव्वजुग्गाहिओ इव सम्मपरिकहणं महापवलमिच्छत्तणओ न पडिवण्णो मणागंपि समणधम्मं, तओ मिरिइणा चिंतियं-न तांव परिणिण्हइ एस जइधम्मं, ममावि छत्तगाइपरियरुव्वहणे गामंतरगमणे सरीरगेलण्णे अचंतिगपओयणे एगेण सहाइणा कज्जमत्थि, तम्हा पद्दावेमि एयंति चिंतिऊण कविलो गाहिओ नियदिक्खं, सिक्खविओ किंपि वज्झं कट्ठाणुट्ठाणं, एवं च सो नियंसियकासायवत्थजुयलो पाणिपरिग्गहियतिदंडो पवित्तिगापमुहोवगरणपरियरिओ



श्रीमहा०  
चरित्रे  
२ प्रस्तावः

॥ २२ ॥

गामाणुगामं पियरं व देवयं व सामियं व परमोवगारिणं व खणनिहाणदेसगं व जीवियदायारं व मिरिइं  
पज्जुवासंतो परिभमइत्ति, एवं च काले वोलंतंमि मिरिइं चउरासीइं पुवसयसहस्साइं सवाउयं पालइत्ता अणालो-  
इयपडिक्कंतनियदुचरिओ कालं काऊण वंभलोए कप्पे दससागरोवमाऊ देवो जाओत्ति ।

सोऽवि कविलो अपढियसत्थपरमत्थो वज्झोवगरणधरणमेत्तरसिगो जहादिट्ठकट्ठाणुट्ठाणपत्तपरमकट्ठो एगागी  
परियडइ । सुणिविलक्खणागारदंसणेण पुव्वकमेण समल्लियइ य से समीवे धम्मसवणत्थं बहू जणो, सोऽवि अ-  
वियक्खणत्तणओ समणसत्थेसु तहाविहधम्मदेसणमवियाणमाणो 'युक्तायुक्तपरिज्ञानशून्यचित्तस्य देहिनः । अलब्ध-  
मध्यताहेतुमौनं सर्वार्थसाधनम् ॥ १ ॥' इति परिचितंतो गाढपरिगृह्यमोणव्वओ दिणगमणियं करेइ । अत्रया  
य आसुरिरायपुत्तपमुहं सिस्सगणं पवाविऊण जथादिट्ठं वज्झाणुट्ठाणं दंसिऊण य चिरकालं कयवालतवो मरिऊण  
वंभलोए कप्पे देवो उववज्जइ । तर्हि च—

असुयं अदिट्ठपुव्वं सुरलच्छिं पेच्छिऊण तारिच्छं । अणुचित्तिउं पयत्तो अहविम्बियमाणसो कविलो ॥ १८२ ॥  
किं मन्ने होज्ज मए दारुणरूवं तवं समायरिउं (यं) ? । किं मयलंछणसच्छहमणुचरियमणुत्तमं सीलं ? ॥ १८३ ॥  
किं वा दुक्करतवनियमनिरयचित्तेसु साहुपत्तेसु । होज्ज निहित्तं वित्तं नियभुयजुयलज्जियं पुव्वि ? ॥ १८४ ॥  
किं वा साहसमवलंबिऊण खित्तं हवेज्ज नियदेहं । पज्जलियतिव्वजालासहस्सजडिलंमि जलणंमि ॥ १८५ ॥

सांख्य-  
मतम्.

॥ २२ ॥

एमाइविविहसंसयसंकियचित्तो खणं विगमिऊणं । सम्मं वियाणणट्ठा ओहिण्णाणं पउंजेइ ॥ १८६ ॥  
 पारिवज्जपवन्नं जह देहं नियइ तं विगयजीयं । तेऽवि ससिस्से गंथत्थवाहिरे मुद्धबुद्धीए ॥ १८७ ॥  
 ताहे नियदंसणपक्खयायओ चत्तदेवकायन्वो । ओयरिओ आयासे सिंस्ताणं तत्थ(त्त)कहणट्ठा ॥ १८८ ॥  
 वरपंचवण्णमंडलमज्झगओऽदिस्समाणरूवो य । आसुरिपमुहे सिस्से भासइ संवोहिऊणेवं ॥ १८९ ॥  
 अबत्ताओ यत्तं पमवइ इच्चाइ तत्तसंदोहं । तो सट्ठितंतगंधं तं सोच्चा आंसुरी कुणइ ॥ १९० ॥  
 अन्वोच्छित्ती य तओ जाया सीसप्पसीसवग्गस्स । एवं सति वित्थरियं सबत्थ तिदंडिपासंडं ॥ १९१ ॥  
 कविलोऽवि हरिसियमणो ठाणाओ तओ गओ सुरावासं । तत्थ य अणण्णसरिसे पंचविहे भुंजए भोए ॥ १९२ ॥  
 जह सो मिरिई आउयखयंमि चइऊण बंभलोगाओ । दूरदिसागयनेगमपणियाउलविवणिमग्गंमि ॥ १९३ ॥  
 परिसरदेसट्ठियसाहुवग्गपारद्धधम्मकम्मंमि । नीसेसगामतिलए कोलागे संनिवेसंमि ॥ १९४ ॥ जुम्मं ।  
 छक्कम्मनिरयचित्तो पेयत्थवियारकुसलबुद्धी य । जाओ जयपयडजसो नामेणं कोसिओ विप्पो ॥ १९५ ॥  
 सो पिसयपसत्तमणो दविणज्जणकयविचित्तवावारो । पाणवहपमुहगुरुपावठाणनिरवेक्खचित्तो य ॥ १९६ ॥  
 मिच्छत्तनिहयबुद्धी तिदंडिदिक्खं निसेविउं अंते । असीई उ पुव्वलक्खे सव्वाउं पालिऊण मओ ॥ १९७ ॥

श्रीमहा०  
चरित्रे  
२ प्रस्तावः

॥ २३ ॥

अहं सकयकम्मजणिए सुरतिरिपामोक्खविविहठाणंमि । उववज्जिऊण बहुसो पसुव विवसो दुहाभिहओ ॥ १९८ ॥  
भमिऊण चिरं कालं भवंमि थूणायसंनिवेसंमि । माहणिमाहणपुत्तो जाओ सो पुस्समित्तोत्ति ॥ १९९ ॥ जुम्मं ।  
तत्थवि चिरकालं निवसिऊण निविन्नकामभोगो सो । परिवायगदिक्खं पडिवज्जेउण धम्मबुद्धीए ॥ २०० ॥  
काऊण तवं विविहं पालिय नियसमयसिद्धधम्मविहिं । सव्वाउयं च धरिउं वावत्तरिपुव्वलक्खाइं ॥ २०१ ॥  
मरिऊण पुस्समित्तो तत्तो सोहम्मदेवलोगंमि । दिव्वाभरणविभूसियदेहो देवो समुप्पन्नो ॥ २०२ ॥  
कालकमेण तत्तो चइऊणं चेइयंमि य निवेसे । अग्गिज्जोओनामा(स)वंभणो(अह)समुप्पन्नो ॥ २०३ ॥  
सो य चउसट्ठिं पुव्वलक्खाइं परिपालिऊण आउयं गहिऊण परिवायगदिक्खं मरिऊण ईसाण देवलोगे  
मज्झिमाऊ तियसो होऊण चिरं कालं भोगे भुंजिऊण आउक्खए चुओ संतो मंदिराभिहाणसंनिवेसे सोमिलस्स  
वंभणस्स सिवभहाए भारियाए पुत्तत्तेण उववन्नोत्ति, कयं च से अग्गिभूइत्ति नामं, सो य पत्तो तारुन्नं, अन्नया  
य तत्थ संनिवेसे परिब्भममाणो समागओ सूरसेणो णाम परिव्वायगो, सो कुसलो सट्ठितंतसिद्धंतं वियक्खणो धम्मकहाव-  
क्खाणे छेओ परचित्तपरिण्णाने, तं चागयं सोऊण समागओ बहुजणो, आरद्धो य तेण नियदरिसणतत्तपरूवणापवंचो,  
आणंदियहियओ गओ य सट्ठाणं जणो, जाया पसिद्धी, वीयदिवसे अग्गिभूई अण्णो य लोओ आगओ तस्स सयासं,  
कया उचियपडिवत्ती, उवविट्ठो संनिहियपदेसे, कहिओ य तेण महया पगारेण नियदरिसणाभिप्पाओ, हरिसिया

सूरसेन-  
परि०.

॥ २३ ॥

सत्ते, एत्थंतरे एंगेण मणुसेण पुच्छिओ सो परिवायगो, जहा भयवं ! भयलंछणे इवं जेणनयणांणंदे मुत्ताकंलावेव सह-  
रिसहरिणच्छिसिहिण(हण्डि)संवासोचिए नंदणवणे इव विविहविलासजोग्गे जलहिंमि वं लावण्णपुण्णे रसायलेव भुयं-  
गसंगसमुचिए भग्गवम्महसोहग्गे किमेरिसंमि तारुण्णे अणुट्ठियं तुमए पव्वज्जागहणंति ? , नं खलु मुणालतंतुरज्जू परि-  
खमइ मत्तसिंधुरखंधवंधणपरिक्खेवं न यावि सहइ सहयारमंजरी जरढढेकपरिक्खेवचरणभारं न य पभवइ धाराकराल-  
करवालसिहुल्लेहलीलं कमलदलं, न सब्बहा तुह एरिसी सरीरसिरी काउमरिहइ निट्ठुरजणजोग्गं तवचरणंति, केवलं  
होयवमेत्थ पणइणीविरहेण वा धणभंगेण वा सयणविप्पियदंसणेण वा अण्णेण वा केणइ कारणेणं, वाढं कोऊहलं  
मे, साहेह सब्बहा जइ न दूरमकहणिज्जंति । परिवायगेण भणियं—भइ ! तुम्हारिसाणवि किं किंपि अकहणि-  
ज्जमत्थि ? , सुणसु जइ अत्थि कोऊहलं, अहं किर पुवं कोसंवीए नयरीए असंखदविणभायणं अणेगाणं दीणाण  
दुत्थियाण विदेसियाण भयंताण य सत्ताणं ताणदाणपरायणो आसि, अण्णया य रयणीए मे पसुत्तस्स सहसा  
समुच्छलिओ तुमुलो रवो, तओ संभंतोऽहं समुट्ठिओ सयणीआओ जाव पेच्छामि आइद्धियनिसियखग्गे दढावव-  
द्धपरियरे चावचककुंतपमुहाउहहत्ये हण हणत्ति भणंते धरणियलगयंपि सयं निहित्तमिव अत्थसंचयं गिण्हमाणे  
तहट्ठियाउ चेव तुरंगमंदुराओ अप्पायत्ताओ करेमाणे संमुहट्ठियं परियणं विविहप्पयारेहिं विह्वेमाणे कंसं दोसं  
घरवक्खरं च अवहरेमाणे जमसुहडे इव कलिकालमित्ते इव पावपियामहे इव भीसणे निक्खिे भिल्लपुरिसे, ते य

श्रीमहा०  
चरित्रे  
२ प्रस्तावः

॥ २४ ॥

ददूण मरणभयविहारेण सिग्धं अवकमिऊण मए वाहरिया आरक्खिया, त य जाव मत्ता इव सुच्छिया इव गयचे-  
यणा इव बहु वोलावियावि हुंकारमेत्तमवि न दिति ताव नायं मए नूणमेए ओसोवणिमंतेण वा ओसहपओगेण  
वा एएहिं चोरेहिं निहयचेयणा कया भविस्संति, कहमण्णहा एवं निहा विहवेजा?, होउ वा ताव सजीवियं  
रक्खामित्तिपरिभाविऊण सणियं सणियं निह्लुको एगत्थ वणगहणे, भिलावि भवणसिलाधंभाइयं मोत्तूण सेसं  
वराडमेत्तंपि गहाय गया, कमेण पहाया रयणी, उट्ठिओ जणो, जाया पुरे वत्ता, आगओ लोओ अहं च, अवलोइयं  
गेहं जाव तत्थ एगदिणभोयणमेत्तंपि नत्थि, स्त्रीणविभवत्तणओ कलंतराइपउत्तंपि दविणजायं न पावेमि, जओ  
नत्थि कोऽवि निव्वाहो तओ चित्तियं मए-

नीसेसजणपहाणत्तणेण ठाऊण एत्थ नयरंमि । संपइ कप्पडिओ इव कह निवसंतो न लज्जामि? ॥ २०४ ॥  
दीणाण दुत्थियाण य दाउं भोयणविहिं कुणंतस्स । इण्हिं तु निओदरभरणमेत्तनिरयस्स का सोहा? ॥ २०५ ॥  
कह वा तुरगारूढो पुब्बिं भमिऊण पुरिसपरियरिओ । वच्चिस्सं एगागी इण्हिं तु पयप्पयारेण? ॥ २०६ ॥  
कह वा सहपंसुकीलियबंधवलोयस्स वंछियत्थस्स । अविपूरितो जीयं निरत्थयं उव्वहिस्सामि? ॥ २०७ ॥  
दुव्वहगव्वुदुरवइरिविसरदुव्विसहदुव्वयणजायं । पव्वभट्टलट्टविभवो पच्चक्खं कह सुणिस्सामि? ॥ २०८ ॥  
ता मोत्तूण इमं ठाणं देसंतरं वच्चामित्ति चित्तिऊण चलिओऽहमुत्तरावहाभिमुहं, कालंतरेण पत्तो एगंमि सन्नि-

सूरसेन-  
वृत्तं.

॥ २४ ॥

वेसे, भिक्षापरिभ्रमणेणं कया पाणवित्ती, वुत्थो तत्थेव किंचिकालं, अण्णदिवसे य दिट्ठो मए एगो तिदंडी,  
वंदिऊण सवायेरेण उवविट्ठो से समीवे, पुच्छिओऽहं जहा मए तहा तेणवि नियवइयरं, निवेइओ य मए संखेवेण,  
तिदंडिणा भणियं—पुत्त ! परिचयसु सोयसंतावं, अणुसरसु धीरत्तणं, सवसाहारणो हि एस वइयरो, किं च—

किं ययणिज्जं जं निदिए जणे नो थिरत्तणं कुणइ ? । पुरिसुत्तमंपि लच्छी छइइ महिलच्च दुधीला ॥ २०९ ॥  
नो सुइकुलं न रूवं नो विण्णाणं न विक्रमं न वलं । चालच्च गयविवेया अवेक्खए किंपि सुयमाणा ॥ २१० ॥  
अहवा जलनिहिकल्लोलसंगसंलग्गचंचलत्ताए । कोत्थुहमणिसहजम्मणवद्वियदढनिट्ठुरत्ताए ॥ २११ ॥  
मयलंछणसमसी(सा)सियमइलाणुस्सरणवद्धसीलाए । सुरगइतुरंगसंगइदूरुज्झियवरविवेयाए ॥ २१२ ॥  
दुस्सहं विसमेत्ती(व)सदावियपज्जंतदुहविवेगाए । कंबुसिणेहसमुच्छूढगाढकुडिलत्तवुद्धीए ॥ २१३ ॥  
तह पारियायपणयप्पभावजडजायपक्खवायाए । निचं लवणोयहिवासमुकमधुरत्तभावाए ॥ २१४ ॥  
एयाए सचरियं फहं हवेज्जा महाणुभावाए ? । न हि विसरिससंसग्गी विसिट्ठगुणसांहणं कुणइ ॥ २१५ ॥  
ता चयसु सोगमहुणा पोरुसमुवहसु कुणसु करणिज्जं । न हि विण्णायसरूवे गुप्पंति कहिंपि सप्पुरिसा ॥ २१६ ॥  
किं भइ ! तुमं एगो इमीए मुक्को ? जमेवमइगरूयं । संतावं वहसि न पत्तकालमहुणां समायरंसि ॥ २१७ ॥  
भणियं च मए भयवं ! किं पुण एत्तोऽवि पत्तकालं मे ? । तेणं कहियं ! महायस ! निच्छओ सवहा धम्मो ॥ २१८ ॥

श्रीमहा०  
चरित्रे  
२ प्रस्तावः  
॥ २५ ॥

एयविउत्ताण जओ विहडंति समुद्धरावि रिद्धीओ । एएण संपउत्ताण हुंति दूरं पलीणावि ॥ २१९ ॥  
एयं च मए आयन्निऊण संजायभवविरागेणं । एसा तिदंडिदिक्खा पडिवन्ना दुक्खनिम्महणी ॥ २२० ॥  
ता भद्द ! तए वेरग्गकारणं जं पुरा अहं पुट्ठो । तं एयं तुह सिट्ठं एत्तोच्चिय कुणसु धम्ममइं ॥ २२१ ॥  
एत्थंतरंमि एयं सोचा ओभिन्नवहलोमंचो । पुणरुत्तनिवेसियपारिवज्जदिक्खाभिमुहवुद्धी ॥ २२२ ॥  
सो अग्गिभूइनामो मिरीइजीवो तिदंडिणं नमिउं । भालयलनिमियपाणी पयंपिउं एवमाढत्तो ॥ २२३ ॥  
भयवं ! जाए वेरग्गकारणे तारिसंमि तुम्हेहिं । जं दिक्खापडिवत्ती विहिया तं सम्ममायरियं ॥ २२४ ॥  
एयस्स निसामणओ ममावि घरवासवासणा विगया । छिन्नो मायामोहो विवेयरयणंपि विप्फुरियं ॥ २२५ ॥  
ता नियदिक्खादाणेणऽणुग्गहं कुणसु संपयं मज्झ । इय वुत्ते तेणं सो पवज्जं गाहिओ सहसा ॥ २२६ ॥  
काऊण तवं तो सो धरिउं छप्पणण पुव्वलक्खाइं । सवाउयं तदंते सणंकुमारे सुरो जाओ ॥ २२७ ॥  
कालक्कमेण चविउं सेयवियाए पुरीए पवराए । वंभणकुले पसूओ भारद्वाओत्ति नामेण ॥ २२८ ॥  
तत्थवि सकम्मजणिए सुहदुक्खे भुंजिऊण थेरत्ते । पुव्वक्कमेण पुणरवि पारिवज्जं पवजेइ ॥ २२९ ॥  
काऊण य वालतवं कुदेसणापावधूलिपडलेणं । अवगुंडिऊण वाढं रम्मन्ताणं व वहुकालं ॥ २३० ॥  
सवाउयमणुपालिय चउयालीसं तु पुव्वलक्खाइं । पंचत्तगओ संतो तियसो होऊण माहिंदे ॥ २३१ ॥

स्थावरभवः  
परिव्राज-  
कता.

॥ २५ ॥

निम्मलमणिरयणमउहजालउज्जोविण विमाणंमि । नियपरियणपरियरिओ कीलइ सच्छंदलीलाए ॥ २३२ ॥  
 आउक्खएण तत्तो चविउं सो मणुयतिरियजोणीसु । नरयकुदेवेसुंपिय पुणरुत्तं परिभमेऊण ॥ २३३ ॥  
 रायग्गिहंमि नयरे दियवरकविलस्स कंतिमइयाए । गिहिणीए गन्धम्ममी पुत्तत्तेणं समुप्पन्नो ॥ २३४ ॥  
 जाओ समुचिअसमए नामंपि य थावरोत्ति से विहियं । सत्तेण य गत्तेण य कुमारभावं च वोक्तो ॥ २३५ ॥  
 अणवरयमंरणजरजम्मवाहिदुहनिवहपीडियं लोयं । दट्ठूण काउकामोवि धम्ममइमोहमूढो सो ॥ २३६ ॥  
 नो वच्चइ दुक्करतवविहाणनिरयाण जिणमुणिंदाणं । पासंमि कयावि हु नेव अन्नतित्थियजणस्सावि २३७ जुम्मं ।  
 एवं अच्छंतो सो पेच्छइ एगं तिदंडिणं समणं । चिविडियनासावंसं भग्गोद्वउडं दलियदसणं ॥ २३८ ॥  
 कुमुयं व चंददंसणवसेण कमलं व दिणयरुग्गमओ । सालत्तयतरुणचरणताडणाओ असोगुव ॥ २३९ ॥  
 तं पासिऊण वियसंतनयणनलिणो परं पमोयभरं । अइदुल्लहवल्लहसंगमे व सो पाविओ झत्ति ॥ २४० ॥  
 पइजम्मपरिन्वायगादिकखागहणुब्भवंतुनेहाओ । तत्तपरिपुच्छणट्ठा तस्स सगासं समल्लीणो ॥ २४१ ॥  
 नमिउं चरणे सवायरेण सो पुच्छिओ य धम्मविहिं । जोगोत्ति कलिय तेणवि तिदंडिणा साहिओ तस्स २४२  
 अन्नं च इमं सिट्ठं जहाऽहमिह दुक्खिओ ठिओ पुर्विं । विसयपिवासाणडिओ कुसलेण तहा न ठायवं ॥ २४३ ॥  
 जह थावरेण भणियं भयवं । कह तं ठिओ इह दुहत्तो ? । विसयपिवासानडिओ कहेहि कोऊहलं मज्झ ॥ २४४ ॥



श्रीमहा०  
चरित्रे  
२ प्रस्तावः  
॥ २६ ॥

भणियं च तेण भद्व ! सुणसु पुरा विसयसलिलपडिहत्यं । अन्नाणमीणभीमं विसोत्तियालोलकलोलं ॥ २४५ ॥  
निलज्जिमजलवेलाविलासमवसत्तदुत्तरावत्तं । पावविकप्पणपंकं निस्संखपवंचसंखडलं ॥ २४६ ॥  
अभिमाणघोरघोसं पयंडकंदप्पवाडवग्गिसिंहं । दोसवणपडलकिन्नं तारुणमहन्नवं पत्तो ॥ २४७ ॥ तीहिं विसेसयं ।  
तवसेण य परिचत्तसगिहसंवासो दूरुज्झियसयणवंधवो परमतावसो इव विसट्ठकंदोद्वनयणासु पवरपओहरासु  
महाभोगसालिणीसु ससुलसंतकलोलवाहुविलासासु हंसगाणुसरियपयकमलासु सालसकुलकलरवासु सरसीव सुंदरासु  
विलासिणीसु कयाभिरई समाणो एगया अणंगसेणाभिहाणाए वेसाए समं बुत्थो वहुं कालं, तदणुरागवसेण य  
पवरभूसणदाणेण अणवरयमहामोलदोगुल्लसमप्पणेण तंवोलकुलविलेवणोवणयणेण य निट्ठवियं पियापियामहपमुहपुरि-  
सज्जियं दविणजायं, जाओऽहं निट्ठणचंगो, सुणिओ दाइगाए, तओ निप्पीलियालत्तयं व पयत्तपीयवारुणीचसगं व  
भुत्तावसेस भोयणं व तेहिं तेहिं अवमाणकारणेहिं परिचत्तो म्हि तीए, तयणंतरं निग्गओऽहं वेसाघराओ, गओ  
नियगेहे, दिट्ठं च तमणेगच्छिइसयसंकुलं पञ्चमट्ठपुवसोहं मसाणं व भयजणगंति, तओ महाविसायाभिभूओ पयट्ठो  
देसियालिए, गच्छंतेण य पइदिणं एगत्थ सुन्नसत्तिवेसे दिट्ठं भूमिनिवडियं रक्खावलयं, गहिउं मए विहाडियाओ  
निविडजउ जडियाओ रक्खागंठिओ, दिट्ठं च एगस्स मज्झनिहित्तं लिहियपवरक्खरं भुज्जसंडं, वाइयं च कोऊहलेण,  
परिभाविओ य तल्लिहियगामनामदिसाभागलंछणसमेओ रयणकोडिप्पमाणनिहाणवइयरो, हरिसियमणेण संगो-

स्यावरभवः  
परिव्राज-  
कता.

॥ २६ ॥

वियं च तं सवपथारेण, पट्टिओ तयणुसारेणं, पत्तो अकालखेवेण भुज्जलिहियंमि गामे, निरुविओ निहाणप्पएसो,  
अवलोइयाइं लिंगाइं, जाव सवाणिवि लिहियाणुसारेण मिलंति, तओ मे पाउब्भूओ परमप्पमोओ, पसत्थनिसाए य  
दिसावलिपवखेवपुरस्सरं खणिउमाढत्तो णिहाणपएसं जाव य हत्थप्पमाणमेत्तं तं न खणामि ताव समुट्ठिया उब्भ-  
डफडाडोवभीसणा तडिसिहातरलललंतजीहजुयला मुहमारुयसंवलियजलणफुलिंगुग्गारदारुणा पुच्छच्छटाताडिय-  
धरणिवट्ठा दीवयसीहा फुरंतरत्तदित्तनेत्ता महाभुयंगा, तेहि य संदंसेहि व तडतडत्ति तोडियं मह सरीरं, निचिट्ठो  
महाविसावेगेण निवडिओऽहं भूमीए, विइक्कंता रयणी, भमाणुकंपाएव समुग्गओ भयवं दिणयरो, अवलोइओऽहं  
गामजणेण, विण्णायविसविगारेण य दयाए पडियारिओ, तहाविहोसहमंतकिरियाए जायं च पगुणं सरीरं, पुट्ठोऽहं  
गामजणेण रयणिवइयरं, कहिओ य मए तस्स जहट्ठियनिहाणवुत्तंतो, तओ तत्थेव वीसमिऊण कइवय वासराइं  
पुणरवि पत्थिओ एगदिसाए, अण्णया य गच्छंतस्स मिलिओ एगो पुरिसो, समाणसीलयाए य जाया मज्झ तेण  
समं मेत्ती, पत्थावेण य तेण एगंते सम्भावेण निवेइओ मम विवरप्पवेसजक्खिणीसाहणकप्पो, अब्भत्थिओ य  
सवायेरेण जहा-जइ तुमं सहाइभवसि ता विवरं पविसामो, भोगगाढलोलुयाए पडिवण्णमेयं मए, तओ अखं-  
डपयाणएहिं गया वलयामुहं नाम विवरं, विरइया से दुवारपूया, तप्पियाओ जोइणीओ, सुमुहुत्तनक्खत्तंसि गहाय  
वाढं पत्थयणं परिकलियहत्थपईवा पविट्ठा तत्थ, उचनीयठाणाणि वोलिंता सणियं सणियं गया दूरदेसं, दिट्ठा य

झडत्ति एगत्थ विज्जुपुंजभासुरा पवरकणगसिंहासणनिविट्ठा एगा जक्खकन्नगा, अविय—  
गंडयललंतुज्जलकुंडलकिरणोलिविच्छुरियवयणा । नाणामणि(मय)भूसणससिरियरेहंतदेहलया ॥ २४८ ॥  
आमलयथूलमोत्तियनवसरहारावरुद्धयणवट्ठा । पप्फुल्लमणहर(हरा)वम्महतुरुतरुणसाहव ॥ २४९ ॥  
पायालसिरिव रइव देवरमणिव जणियमणमोहा । ललियकरकलियलीलासरोरुहा सुंदरावयवा ॥ २५० ॥  
भुवणच्छेरयभूयं रूवं दहुं अदिट्ठपुवं से । मयरद्धपसरविहुरा अम्हे तप्पासमल्लीणा ॥ २५१ ॥  
सावि अम्हे आगच्छंते पेच्छिऊण सन्निहियपज्जलंतपयंडजालाकराले झडत्ति कुंडे पविट्ठा, अम्हे पुण महा-

मोग्गराहया इव विद्याणवयणा चिंतिउं पवत्ता—किं पच्छाहुत्तं नियत्तामो उयाहु तत्थेव तदंगसंगसंलग्गलायन्न-  
पुत्रे जलणकुंडे पयंगो इव अत्ताणं खिवामो?, केवलं दारुणो दहणो खणद्धेणवि दहइ देहं, संसइओ य तीए साद्धिं  
मीलगो, जीवन्ता पुणोऽवि भद्दाइं पेच्छिस्सामो, ताव सहसच्चिय एगनिकुंजाओ कुंजरोव गरुयंगभारो अंगभारधरह-  
रियधरणितलो धरणितलताडणसमुच्छलंतपडिसद्वयसहस्सवहिरियदिसाभोगो दिसाभोगपसरंतकज्जलगवलगुलि-  
यालिवलयकालप्पभाजालो करधरियमहंतनरसिरकवालो कालरत्तिजणगो इव दुप्पेच्छो वयणेण व धूमवत्तिं सुय-  
माणो फारफुंफाररउद्दकसिणभुयंगवद्धकेसभारो समायओ तं पएसं झडत्ति खेतवालो, तओ तेण अचंतरोसारुणच्छेण  
पेच्छिऊण भणिया अम्हे—रे रेपुरिसाहमा ! विणट्ठसीलसमायारा कायरडियमेत्तवित्तसियसरीरा किं नियचित्तावद्धंभं

न मुणह? जं एत्थ आगया, ता एण्हिमणुभवह दुव्विणयफलंति भणिऊण पवणपणुण्णछिण्णपण्णं व भएण कंप्पमाणा  
सहसच्चिय चरणे धरिऊण वालच्छगलगव अम्हे महया वेगेण उल्लालिया तओ पएसाओ, निवडिया य वलयासुह-  
विवरदुवारमूले, तओ समागयमहानिहावेगा इव गमिऊण जामिणिं समुग्गयंमि दिणयरे उम्मीलियनयणकमला  
परिचित्तित्तं पवत्ता—अहो को एसप्पएसो? केणेहाणीया? कहं वा धरणीए पसुत्ता? कत्थ वा तं विवरं? कहिं  
वा सा कण्णगा? ।

सुमिणं माया वेयं विभीसिया व? महविन्भमो वावि? । एवं चिर संसइया होऊणं मुणियपरमत्था ॥ २५२ ॥  
ठाणाउ तओ चलिया पत्ता वेण्णायडंमि नयरंमि । तत्थवि विज्जासिद्धो दिट्ठो सिवसुंदरो नाम ॥ २५३ ॥  
तो बहुविहप्पयारं विणएणाराहियो पयत्तेणं । तुट्ठेण तेण दिण्णो मज्झं कचाइणीमंतो ॥ २५४ ॥  
कहिओ य साहणविही तओ मए चंडिगाएँ गेहंमि । गुरुणा जहोवइट्ठो पारद्धो जाव होमविही ॥ २५५ ॥  
साहसरहियत्तणओ तणग्गकंपेवि भयविसिट्ठस्स । धिट्ठत्तणओचिय मंतसाहणं मम कुणंतस्स ॥ २५६ ॥  
उत्तालुत्तालकरालकालवेयालचंडपरियरिओ । एगो महापिसाओ सहसच्चिय उट्ठिओ भीमो ॥ २५७ ॥ जुम्मं ।  
ताहे तारिसविगरालदंसणुप्पण्णमरणभयविहुरो । विस्सुमरियमंतपओ पहाविओऽहं सगिहहुत्तं ॥ २५८ ॥  
तेणावि धिट्ठदुस्सिक्खिओत्ति भणिऊण विगयसंकेण । अइलंवपाणिणा करिसिऊण नीओ सिवाएँ पुरो ॥ २५९ ॥

श्रीमहा०  
चरित्रे  
२ प्रस्तावः  
॥ २८ ॥

ताहे सुट्टीएँ हओ तहा जहा चिविडिया ममं नासा । अत्रेऽवि अग्गदंता भग्गा निब्भग्गरूवेण ॥ २६० ॥  
ता भो महायस ! तए जं पुट्ठोऽहं सवइयरं पुवं । सो एस जइ न पत्तिज्जसीह ता पेच्छ मज्झ मुहं ॥ २६१ ॥  
अहं थावरेण भणियं भयवं ! पचक्खदिस्समाणेऽवि । भोगपिवासादोसे को मइमं नेव पत्तियइ ? ॥ २६२ ॥  
जुत्तं तुम्हेहिं कयं अहंपि काउं इमं समीहामि । ता अणुगिण्हह संपइ पारिवज्जप्पयाणेणं ॥ २६३ ॥  
दिण्णा य तेण दिक्खा जाओ सो धम्मकरणनिरयमणो । दढतवियदुस्सहतवो मिच्छत्तविलुत्तवोहेणं ॥ २६४ ॥  
चोत्तीसपुव्वलक्खे सघाउं पालिऊण पज्जंते । मरिऊण वंभलोए उववण्णो भासुरो तियसो ॥ २६५ ॥  
नियबुद्धिसिप्पिकप्पियतिदंडिदंसणपरूढनेहेणं । पारिवज्जग्गहणं छब्भवग्गहणाइ संपत्तं ॥ २६६ ॥  
सकुलपसंसावइयरनिवद्धदढनीयगोयकम्मेणं । माहणपमुहे नीए कुलंमि जम्मं च मिरियस्स ॥ २६७ ॥  
दट्ठूण जिणवरागमविवरीयपरूवणं कुलपसंसं । दूरं परिवज्जह भो वियक्खणा ! सव्वकालंपि ॥ २६८ ॥  
इय वद्धमाणचरिए महल्लकल्लाणवल्लिपरियरिए । मिच्छत्तपंसुमइलियजणमणमल्लखालणजलंमि ॥ २६९ ॥  
भरहसुयंपढमपयडियतिदंडिपासंडसंसणागंभो । भवजणविम्हयकरो सम्मत्तो वीयपत्थावो ॥ २७० ॥  
॥ इति गुणचंदसूरिरिए सिरिमहावीरचरिए वीयपत्थावो सम्मत्तो ॥

स्थावरभवः  
परिव्राज-  
कता.

॥ २८ ॥

## ( ततीयपत्थावो )

तिदंडिभवसमेया भणिया वत्तवया य मिरिइस्स । एत्तो य जहावित्तं साहिज्जइ विस्सभूइस्स ॥ १ ॥

इहेव जंबुदीवे दीवे भारहवाससिरसेहरोवमे पइदिणभवंतविविहमहूसवे नीसेसनयरविक्खाए रायगिहे नयरे पढमो सोंडीरचक्कस्स वल्लहो गुणिवग्गस्स सम्मओ पयइलोयस्स पाणप्पिओ पणइजणस्स भुयदंडलीलारोवियभूमि-  
भारो विसुद्धबुद्धिपगरिसवीमंसियधम्मवियारो विस्सनंदी नाम नराहिवो, मयणलेहा नाम से भारिया, विसाहनंदी  
कुमारो, तहा परुंदगाढपेम्माणुबंधो सरीरमेत्तविभिण्णो विसाहभूती जुवराया, तस्स रुवाइगुणरयणरोहणधरिणी  
धारिणी नाम देवी । इओ य सो मिरिइजीवो वंभलोगाओ चुओ संतो चउग्गइयं संसारकंतरमणुपरियट्टिऊण अणं-  
तरभवजणियतहाविहकुसलकम्माणुभावेण समुप्पण्णो तीसे गन्धंमि पुत्तत्ताएत्ति, अण्णया पसूओ विसिट्ठे वासरे,  
कयं विस्सभूइत्ति से नामं, कमेण परिचत्तवालभावो गाहिओ सो पिउणा कलाकलावकोसल्लं, तारुणमणुप्पत्तो परि-  
णाविओ वत्तीसं सुररमणीविब्भमाओ पवररायकुलसमुब्भववालियाओ, ताहि य समं बहुप्पयारं कीलंतो कालं  
गमेइत्ति । अण्णया य सयलतइलोयदरिसियवियारो तरुवराणंपि विहियलावण्णो मुणीणंपि कयचित्तचमक्कारो स-  
मागओ महुमासो, जत्थ य—

पोढपुरंधियोरथणमंडलपडिहयगमणवेगओ । पिययमविरहविडुरतरुणीयणदीहरसासतरलिओ ॥ २ ॥

श्रीगुणचंद  
महावीरच०  
३ प्रस्तावः

॥ ३९ ॥

चंदणनीवकुमुयकमलायरकुवलयगंधवंधुरो । दाहिणपवणुदिसिहिं पवियंभइ नावइ गंधसिंधुरो ॥ ३ ॥  
अण्णं च—चंचलचरणचलणपरिवोलिरमंजुलकणयनेउरं । करयलरणझणंतमणिकंकणकलरवपसरमणहरं ॥ ४ ॥  
कणिरनियंवविंवकंचिगुणकिंकिणिधालयलालयं । सहइ वरंगणाण चाउदिसिं चचरि चारुगीययं ॥ ५ ॥

एवंविहं महुसमयं दट्ठं विस्सभूर्इ कुमारो समग्गविभूर्इए चाडुकरनरभडचेडपरिकिन्नो अंतेउरतरुणीजणपरिय-  
रिओ गओ पुप्फकरंडयं नाम उज्जाणं, जत्थ तरुवराभोगे गायंतिव्व अमंदमयरंदविंदुपाणपरवसभमिरभमरगुंजिएहिं  
पणचंतिव्व खरपवणुवेल्लिरमहल्लपल्लवभुएहिं हसंतिव्व डिंडीरपिंडपंडुरपरिप्फुडकेयइदीहरदलेहिं । जम्मि य—

जंबुजंवीरखजूरसाहिंजणा, सज्जनालियरिफणिसप्पला अज्जुणा ।

खइरसिरिखंडकप्पूरपूगीतला, पीलुनिंववलिवउयवडपिप्पला ॥ ६ ॥

कयलिनोमालियामाहवीसालयासल्लईसग्गनवनीवहिंतालया ।

वउलवंसालिताविच्छयाकच्छिया, सबकालंपि रेहंति जलमुत्थिया ॥ ७ ॥

जं च—कहिंचि सहयारतरुमंजरीमंडियं, कहिंचि वेइल्लफुल्लंतगंधह्वयं ।

कहिंचि कंकेल्लिनवपल्लवालंकियं, नाइतरुणीकमालत्तयालंकियं ॥ ८ ॥

कहिंचि नवपाडलापुप्फनियराउलं, कहिंचि विरुटंतभमरावलीसंकुलं ।

वसन्तर्तुव०

॥ २९ ॥

कहिंचि वरमालईमउलमालधियं, नाइनियविहवदंसणेण रोमंचियं ॥ ९ ॥

अण्णं च—कारंडहंसवगचक्कवायभारुंडकीरकुररेहिं । जीवंचीवकविंजलजलवायसखंडरीडेहिं ॥ १० ॥

हारीयपंचवण्णयपोरेवयपमुहविचिहपक्खीहिं । सुसिणिद्धबंधवेहि व सेविज्जइ जंसयाकालं ॥ ११ ॥

जत्थ य वम्महदुस्सहसराभिघाएहिं जज्जरंगीओ । वालमुणालुप्पलसत्थरेसु सिसिरेसु रमणीओ ॥ १२ ॥

विणयंति विरहिणीओ दिणाइं करपिहियसवणजुयलाओ । परदुयताररवारसियसवणमुच्छागमभएणं ॥ १३ ॥ जुम्मं ।

रेहंति जत्थ चंपयतरुणो नवकुसुमनियरसेहरिया । आरूढमयणजलणव्व पहियनिवहाण दहणत्थं ॥ १४ ॥

खरपवणुदुयमयरंदपिंजरं पेच्छिऊण रविंविंव । मज्झण्हेऽवि डु संझं संकंति रहंगमिहुणाइं ॥ १५ ॥

जत्थऽक्खमयणदमणा तरुणो सुणिणो य सुमणसोवेया । सुहलवलीलालसिया भुयगीओ विलासिणीओ य ॥ १६ ॥

तत्थ एवंविहंमि उज्जाणे सो विस्सभूई कुमारो पवरतरुणीजणसमेओ अणिमिसाए दिट्ठीए पेच्छमाणो वण-  
लळिं कोऊहलाउलियपरियणदेसिज्जमाणमग्गो काणणंतरेसु परिब्भममाणो सायरं पसीयह कुमार ! पेच्छह इओ  
मंजरिज्जइ सहयारावली इओ फुल्लंति मल्लियाओ इओ पल्लविज्जंति वालकंकिल्लिणो इओ कोरइज्जंति कुरुवयनि-  
उरुंवा इओ कुसुमिज्जंति कणियारनियरा इओ मउरिज्जंति पुन्नागाइसाहिणोत्ति, एवं उज्जाणपालेण निदंसिज्जमाण-  
तरुणो वणकीलाए दिणाइं गमेइत्ति । अंतरा य सुणेइ राइनीईसत्थाइं विमरिसेइ गूढत्थपयाइं अभिणयावेइ वि-



श्रीगुणचंद  
महावीरच०  
३ प्रस्तावः

॥ ३० ॥

सिद्धकविजणविरइयाइं नाडयाइं भरहविज्जावियक्खणेहिं हावभावहत्ययाइपत्थावणपडुएहिं नाडइज्जपुरिसेहिं नि-  
सामेइ य वेणुवीणाणुगयं गायणजणाओ बहुघोलणप्पयारमणहरं पंचमगेयं, तथा एगंतदेसट्ठिओ निसुणेइ दूईणं  
सोवालंभवयणाइं । कहं?—

तीसे संकेयं संसिऊण पडिजुवइमणुसरंतेणं । नाह ! तए जाजीवं दिन्नो लहुयत्तणकलंको ॥ १७ ॥  
सुहय ! तुह विरहदुस्सहसिहिपसमत्थं ममाहरंतीए । तीसे सरसीखुं निट्ठियाइं नवनलिणिनालाइं ॥ १८ ॥

परिसरसहयारुग्गयनवमंजरिखंडणेण पइदियहं । तीसे ताण निमित्तं घट्ठा मज्झंगुलीण णहा ॥ १९ ॥  
पचासण्णे कयविविहकलरवे नीलकंठकलयंठे । परिसंता मज्झ भुया पइक्खणं उडुवंतीए ॥ २० ॥

एइ पिउ एइ पिउ एसो सो हवसु तं खणं धीरा । थका मेण्हि जीहा पुणरुत्तं वाहरंतीए ॥ २१ ॥  
इय एरिसा अवत्था वट्ठइ तुह पणयिणीए दुविसहा । जइ जीवंतिं वंलसि कुमार ! ता तं लहुं सरसुं ॥ २२ ॥

तहा कयाइ गोत्तखलियपरिकुवियकामिणीपसायणप्पवणवयणप्पवंचविरयणेण कयाइ सुयसारियासंलाववि-  
णोएण कयाइ परोप्परसवत्तिकामिणीकयकलहकोलाहलनिसामणेण कयाइ णाणाविहदूरदेसोवणीयापुवतरुसंदोह-  
दोहलगदाणेण कयाइ समयवणसिंहंडितंडवावलोयणेण विविहं कीलइ । अण्णया य कुमारस्स कामिणीहिं समं  
दुरोदरेण रमंतस्स समागओ मज्झंदिणसमओ ।

विश्वभूति-  
क्रीडा.

॥ ३० ॥

तओ अंतेउरसमेओ चलिओ जलकीलानिमित्तं, पत्तो काणणसरसीए, तयणंतरं च-

सरसीतडविडविसरावमुक्कझंपुच्छलंतसलिलभरं । झिलइ महलकलोलपेल्लणुवेळिरो कुमरो ॥ २३ ॥

मडाए तरुणीओ रणंतमणिमेहलाकलावाओ । खिप्पंति पराप्परपेल्लरीउ भयतरलियच्छीओ ॥ २४ ॥

करकलियकणयसिंगयसलिलपहारेहिं पोढरमणीओ । विद्वइ कुमारो कोवभरियदरपाडलाट्टीओ ॥ २५ ॥

पियकरकुंसुल्लासिरनियंवतडतुट्टमेहलगुणाहिं । निवडंतकिंकिणीहिं पलाइयं झत्ति वालाहिं ॥ २६ ॥

घोरघणघ(धा)मसमजलयट्टियपूराए झत्ति सरसीए । कमलाइं वयणलायणनिजियाइं व बुडंति ॥ २७ ॥

इय विविहसलिलकीलाहिं कीलिउं जुवइसत्थपरियरिओ । ओयरिओ सरसीओ गओ कुमारो नियावासं ॥ २८ ॥

एत्थंतरे अत्थमिओ गयणचूडामणी दिणनाहो, मडलिया कमलसंडा समं माणिणीमन्नुणा, विप्पउत्ताइं चक्कवायमिहुणाइं सह मिहुणदिणविरहेण, पवट्टियाणंदा इओ तओ परिब्भमिउं पवित्ता कोसिया समं पंसुलिविलयाहिं, निलीणाइं नियट्टाणेसु सउणिकुलाइं समं मुणिजणेण, तहा निसायरसेण्णं व भीसणं पसरियमंधयारं, मयरद्वओघ विप्फुरिओ सबओ पढमप्पओसपईवनिवहा, एवं पयट्टे संज्ञासमए कुमारो काऊण पओसकिचं तेहिं कोऊहलनम्मालायवंकभणियगीयाइविणोएहिं विगमिऊण खणंतरं पसुत्तो सुहसेज्जाए, कमेण य पभाया रयणी, समुग्गओ सहस्संसुमाली, उट्टिओ कुमारो सयणीयाओ, कयपाभाइयकायवो पुव्वविहीए दोगुंदुगुव विलासिणीमज्झगओ विलसइत्ति । एवं च तत्थ सायंदिणमभिरममाणस्स सरंति वासरा ।

श्रीगुणचंद  
महावीरच०  
३ प्रस्तावः

॥ ३१ ॥

अन्नया य विस्सनंदिणो महारायस्स अग्गमहिसीए दासचेडीओ पुप्फफलगहणत्थमागयाओ पुप्फकरंडगुज्जाणं,  
दिट्ठो ताहिं विस्सभूइकुमारो अंतेउरसमेओ बहुप्पयारं तहा विलसंतो, तं च दट्ठूण समुप्पण्णगाढामरिसाहिं ईसी-  
सल्लभिज्जमाणमाणसाहिं सिग्घमेव पडिनियत्तिऊण कहिओ रायग्गमहिसीए कुमारस्स काणणकीलावइयारो, खणं-  
तरे य दीहं नीससिऊण पुणो भणियं ताहिं—देवि! किं तुज्झ जीविणं? किं वा रज्जवित्थरेणं? किं वा विभवेणं?  
जइ तुम्ह पुत्तो विसाहनंदी पुप्फकरंडगुज्जाणे न कीलेज्जा, एवं च आयन्निऊण अवियाररमणीयत्तणओ इत्थीसहा-  
वस्स अदूरदंसित्तणओ मइपसरस्स अभीरुत्तणओ नियकुलकलंकुग्गमस्स पकओ महापरिकोवो देवीए, परिचत्तं  
भोयणं उज्झिओ सरीरसकारो पेसियो नियनियठाणेसु सहीवग्गो, कइवयदासचेडीपरिवुडा य पविट्ठा कोवधरंमि,  
रयणिसमए य समागयेण विस्सनंदिनरिंदेण देविं अपेच्छमाणेण पुट्ठो कंचुगिप्पमुहो परियणो, कहियं च एगेण-  
देव! अमुगंमि गेहे मिलाणवयणकमला केणवि कारणेण देवी गयत्ति, तओ राया तमायन्निऊण ससंभमं तत्थेव  
गओ, दिट्ठा य कोवेण मिसमिसंती उट्ठसासरोगाउरव दीहं नीससंती देवी, दिन्नासणे आसीणो नराहिवो  
भणिउमाढत्तो य-देवि! किमेरिसी अवत्था? किमत्थ कारणं?, साहेसु परमत्थं, न ताव सुमरेमि थोवंपि निय-  
दुच्चरियं, न यावि ममाणुवित्तिपरायणो परियणोऽवि मणागंमि अवरज्झइ तुज्झ, नेव य विविहरयणाभरणसंभारेहिं  
खूणमत्थि, ता किं निरत्थओ एस कोवाडंवरोत्ति?, देवीए भणियं—महाराय! सचं चिय नत्थि केणावि पगारेण

विश्वभूति-  
क्रीडा  
देवीकोषः.

॥ ३१ ॥

रूपं, केवलं किमेण निरत्थेण सयलज्जणसामण्णेण?, रायणा भणियं—किं पुण अनिरत्थयं सयलज्जणासामण्णं न?, देवीए भणियं—महाराय! पुप्फकरंडगुज्जाणे परिभोगो, राइणा जंपियं—किं तेण तुज्झ?, देवीए वुत्तं-तेण ने पओयणं विसाहनंदिकुमारस्स रमणत्थंति, राइणा भणियं—देवि! मा कुप्पसु, मुंचसु असदज्झवसायं परिहरसु इत्थीज्जणमुलभं चावलं समिक्खेसु नियकुलकमं, किं तुमए दिट्ठो कोऽवि अम्हाणं कुले सुओ वा एगंमि पुप्फकरंडगुज्जाणद्विए पुघिंपि पविसमाणो?, ता कइं पुघपुरिसागयं ववत्थं चूरेमि, सघहा अण्णं किंपि पत्थेसु, देवीए भणियं—महाराय! गच्छ निययमंदिरं, उज्जाणलाभाभावे केत्तियमेत्ता अण्णपयत्थपत्थणा? ।

रज्जेणं रद्धेणं धणेण सयणेण वंधवज्जणेणं । ससरीरपालणेणवि न कज्जं किंपि मह एत्तो ॥ २९ ॥

जीवंतीपिडु नरनाह! नाहमेयं तुहप्पसाएणं । जइ पुत्तं कीलंतं पेच्छामि तदाऽफलं जीयं ॥ ३० ॥

नरनाह! तुह समक्खंमि नेस पुज्झइ मणोरहो जइ मे । पच्छा दूरे सेसं भोयणमेत्तेऽवि संदेहो ॥ ३१ ॥

वच्चपडिओऽसि मत्ते जमेगपुत्तंपि परिभवदुहत्तं । दट्ठूण सुहं चिट्ठसि अहह महानिरणुतावोऽसि ॥ ३२ ॥

इय सलिलेहि न वंदुविहवयणेहिं णरिंदमाणसं तीए । तडमिव महानईए दुहाकयं नेहनिविडंपि ॥ ३३ ॥

रत्ता भणियं सुंदरि! मा संतप्पसु करेसु करणिज्जं । अच्छउ सेसं दूरे जीयंपिह तुज्झ आयत्तं ॥ ३४ ॥

एवं वहुं संउविज्जण गओ नरिंदो अत्थाणमंडवमि, आहूया मंतिणो, साहिओ तेसिं रहमि समग्गो देवीको-

श्रीगुणचंद  
महावीरच०  
३ प्रस्तावः  
॥ ३२ ॥

ववइयरो सकुलक्कमववत्था य, मंतीहिं भणियं—देव! वीसत्था होह, अम्हे गंतूण देविं परूवेमो, अणुत्ताया य  
राइणा गया देवीए सगासं, भणिया य अणेगप्पगारेहिं, न य कहंपि संबुज्झइ, तओ विलक्खवयणा समागया  
राइणो सगासे, भणिउं पवत्ता य—देव! निच्छयं देवी गाढजणियकोवा मरणंपि अब्भुवगमेज्जा, ता सब्बहा जहा तहा  
अणुणयणजोग्गा, रत्ता भणियं—भो किमेवं वाहरह?, किं तुब्भे न जाणह अम्ह कुलक्कमं?—जमेगंमि रममाणे  
उज्जाणे अन्नो न पविसइ, वसंतमासपविट्ठो य मासग्गसो चिट्ठइत्ति, मंतीहिं भणियं—देव! जाणेमो, केवलं दुन्नि-  
ग्गहो इत्थीमहागहो, राइणा सविसायं भणियं—

एगंतो मज्जाया पल्हत्थिज्जइ कुलक्कमपरूढा । अन्नत्तो मरइ पिया आवडियं संकडमियाणिं ॥ ३५ ॥  
संपज्जइ धुवमेणिं अपत्तकालेऽविय विहिवसेणं । दढनेहवंधवंधुरवंधवजणचित्तविच्छेओ ॥ ३६ ॥  
महिलायत्तो राया जुत्ताजुत्तं न पेच्छए किंपि । इय अवजसो दिसासुं अखलियपसरो चिरं भमिही ॥ ३७ ॥  
ता संतिणो उवायं तमियाणिं कुणह कं पि परिसुद्धं । जह सा जीवइ देवी सकुलववत्था य निव्वहइ ॥ ३८ ॥  
एवमायन्निऊण जं देवो आणवेइत्ति भणिऊण ठिया एगंते मंतिणो, सुनिउणवुद्धीए य सम्मं निच्छिऊण  
कज्जतत्तं साहियं नरिंदस्स, जहा—देव! एयं पत्तकालं किल पचंतराया देसमुस्सिखलो विह्वेइ य, एतदत्थसंवद्धा  
लेहारिया कीरंति, ते य तुम्हाण लेहे सम्पपेति, तत्थावधारणाणंतरं पयाणयं च दवाविज्जइ, तहा कए खुब्भइ सामं-

अनुनयः-  
प्रपञ्चश्च.

॥ ३२ ॥

तवगो, कुमारोऽवि विनायकइयरो फुफ्फकरंडगुज्जाणं मोत्तूण एइत्ति, एयं च उभयमवि सुपडिविहियं भवइ, एव-  
मायन्निऊण अब्भुवगयं राइणा, उट्टिया मंतिणो, साहिओ देवीए एगंतट्टियाए एस वइयरो, सहरिसाए कयं तीए  
भोयणं, पमुक्को कोवाडंवरो, वीयदिवसे य लिहियकवडलेहहत्था उट्टूलियजंघा गाढपरिस्तमकिलंता उवट्टाविया  
मंतीहिं अपुवपुरिसा, नीया य रायसमीवे, खित्ता तेहिं लेहा, वाइया सयमेव राइणा, विनाओ तदत्थो, कवडको-  
वप्फडाडोयपुव्वं च भणिया नियपुरिसा—रेरे पुरिसा ! ताडेह सन्नाहभेरिं, नयरदूरे पइट्टह गुडरं आयट्टह दिव्वा-  
उहाइं समप्पह जयहत्थिं जेण करेमि पत्थाणंति बुत्ते तहत्ति निवत्तियं पुरिसेहिं, इओ य भेरीसइसवणओ संखुद्धं  
सामंतमंडलं पगुणीकया मयगलंतगंडत्थला कुंजरघडा, संवूढा सुहडसत्था, चउद्दिंसिपि पयट्टाइं तुरयघट्टाइं, मिलिया  
सेणाहिवइणो, किं बहुणा ?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविनायपरमत्थो पत्था-  
णट्टियमुवलब्भ नराहियं निग्गओ पुप्फकरंडगुज्जाणाओ विस्सभूई कुमारो समागओ रायसमीवे निवडिओ चलणेसु  
पुट्टो वइयरं, साहिउमारद्धो य नरिंदेण, जहा—वच्छ ! अत्थि पच्चंतसीमालो पुरिससीहो नाम मंडलाहिवो, सो य  
पुव्वं पणयभावं आणावत्तित्तणं पडिवज्जिऊण य संपइ दरिसियतिव्ववियारो निहयसीमागामजणो अम्ह मंडलमइक्क-  
मइ, ता पुत्त ! महंतो एस मे परिभवो । अविय—

सपियपियामहपमुहज्जियं महिं पेच्छिऊण हीरंति । कह सकलंकं जीयं निरत्थयं संपइ वहामो ? ॥ ३९ ॥

श्रीगुणचंद  
महावीरच०  
३ प्रस्तावः

॥ ३३ ॥

अज्जवि केऽवि सपुरिसा पयंडभुयदंडदलियपडिवक्खा । गिणहंति परस्स महिं अम्हे न नियंपि रक्खामो ॥ ४० ॥

भग्गुच्छाहं रिउवग्गनंदणं मुक्कचित्तवट्ठं । निवडियसहं च सीमंतिणीओ जणयंति किं पुत्तं ? ॥ ४१ ॥

ता पुत्त ! पत्तकालं अवजसंपंकप्पसमणगजलकप्पं । जरविडुरंगरसायणमहुणा सरणं रणे मज्झ ॥ ४२ ॥

एवं च रण्णा सिट्ठे कोवदट्ठोट्ठपुडो उट्ठिऊण निवडिओ चरणेषु कुमारो, विन्नविउमाढत्तो य-ताय ! मुंचह कोवसरंभं, केत्तियमेत्तो सो दुरायारो ?, नहि लीलादलियमत्तमायंगकुंभत्थलो केसरी समोत्थरइ गोमाउयं, निय-कुलसिलोच्चयसमुच्चसिहरदलणदुल्ललियं निवडइ एरंडकंडे सहस्सनयणकुलिसं, नेव य पडिपुण्णमंडलहरिणंकदि-णयरकवलणलालसो गिलइ तारयजालं गहकल्लोलो, ता पसीयह विरमह तुम्हे देह ममाएसं अवणेमि तुम्ह पसाएण तस्स धट्ठसोंडीरिमस्स भुयदंडकंडुं, न य अम्हारिसेसु विज्जमाणेसु जुत्तमेयं तायस्स, तुम्ह पयावोच्चिय साहेइ कज्जाइं । तहाहि—

पुव्वमहासेलुच्छंगसंगिणो उग्गमे व सूरस्स । दूरदिसिपसरियंपि हु तिमिरं किरणच्चिय हणंति ॥ ४३ ॥

गंभीरगहिरघोसा विवरंमुहवाहिउग्गवइनिवहा । आगयगयाइं रयणायरस्स वेलच्चिय करेइ ॥ ४४ ॥

उब्भडदंडुडामरविलसिरवरपत्तकोसगम्भाइं । हिमगिरिणो कमलाइं हणंति पवणुडुयतुसारा ॥ ४५ ॥

प्रयाणं  
कुमार-  
विज्ञप्तिश्च०

॥ ३३ ॥

इय भणिण गाढोवरोहेण दिण्णो आपसो राइणा कुमारस्स, पणामपुब्बयं पडिच्छिऊण दवावियं तेण पयाणयं,  
चलियं चाउरंगं सेनं, कहं चिय ?—

गंदत्थलपगलंतुग्गदाणधारंधयारियदियंता । चलकन्नतालवाडियमयगंधायद्वियदुरेहा ॥ ४६ ॥

अइघोरघोसगलगज्जिविहियखीरोयमहणसंकासा । उज्जलताराभरणा गयणाभोगव भासंता ॥ ४७ ॥

कयलीवणकयसोहा गेरुयरसलित्तवियडकुंभयडा । जंगमया कुलसेलव पत्थिया हत्थिणो सिग्घं ॥ ४८ ॥

चलिया य पवणवेगा खरखुरसिहखणियखोणिणो तुरया । फेणुगिरणमिसेणं जसं व कुमारस्स वियरंता ॥ ४९ ॥

करकलियकुंतकोदंडसेलभल्लयसुतिक्खकरवाला । सन्नद्धवद्धकवया पयंडभुयदंडवलकलिया ॥ ५० ॥

नियसोंडीरिमवसओ रिउसेनं जरत्तणं व विगणिंता । सपहुप्पसायपरवसहियया जीएऽवि निरवेक्खा ॥ ५१ ॥

पइखणविमुक्कहकारपुकारुकरिसतुट्टसन्नाहा । गेहनियत्तियदइया चलिया दप्पुब्भडा सुहडा ॥ ५२ ॥

वहुविहयहरणभरिया रहनिवहा घणघणारवरउहा । सबपहेसु पयट्ठा पवणुदुयधयवडाडोवा ॥ ५३ ॥

इय चातुरंगसेनं नरवइवयणेण वड्डियाणंदं । मुणिदाणजायपुत्तं व कुमारपासं समल्लीणं ॥ ५४ ॥

तओ भंजंतो गिरिसिहराववद्धमहल्लभिल्लपल्लीओ निब्भच्छंतो जणवयविहवणवद्धलक्खं चरडपक्खं अवलोयंतो  
नगनगरगामारामरमणीयं महीमंडलं पडिच्छंतो मग्गे सामंतसमप्पियं विविहालंकारकरितुरयपमुहं पाहुडं पत्तो



श्रीगुणचंद  
महावीरच०  
३ प्रस्तावः

॥ ३४ ॥

विज्झगिरिसमीवं, एगत्थ निवेसिओ खंधावारो, तओ य पहाणवियक्खणपरियणाणुगओ चलिओ कोउहल्लेण विज्झ-  
गिरिमवलोइउं । अंतरे य—

उत्तंगमत्तकुंजरकुलाइं पेच्छइ जहिच्छचाराइं । रेवातडरूढमहल्लसल्लईकवलणपराइं ॥ ५५ ॥

निसुणइ पेम्मभरालसजुवईपरिकिन्नकिन्नरावद्धं । करकलियतालकलरवसंचलियं पंचसुग्गारं ॥ ५६ ॥

निज्झरझंकाररवायणणघणघोससंकियमणाणं । तंडवमस्सिक्खियपंडिवाण पेक्खइ सिंहंडीणं ॥ ५७ ॥

तयणंतं च पुरओ पयट्ठो समाणो गायंतं व पवणगुंजियसरेणं हसंतं व विप्फुरियफारकुलिंगुग्गारेहिं पणचं-  
तं व समीरपसरियमहल्लजालाकलावेहिं विलुलियकेसपासं व गयणंगणलंबमाणधूमपडलेण नियइ दारुणं दावानलं,  
तं च अइलंधिऊण कमेण पहाणपुरिसं व तुंगावारं सुवंसपडिवद्धं च, नरेसरं व वररयणकोसं जणाणुगयपायच्छायं च,  
काऊरिसं व दुट्ठसत्ताहिट्ठियं निट्ठुरसरूवं च, महियाहियं व दुल्लंघणिज्जं पओहरोवसोहियं च, आरूढो विंझगिरिं ।  
तओ चिरं काणणेषु निज्झरेसु विवरेसु दुरारोहसिहरेसु कयलीलीलाहरेसु देवोवभोगुब्भडगंधेषु सिलावट्टएसु विवि-  
हमणोहरप्पएसेषु विहरिऊण परिस्संतो उवविट्ठो एगंमि माहवीलयाहरे । एत्थंतरे पढियमेगेण चारणेण—

विंझो साराणुगओ निच्चं चिय नम्मयाएँ परियरिओ । सारंगजणियसोहो गयकुलकलहो दयावासो ॥ १ ॥  
उच्छूढखमाभारो विवुहपिओ मयणसुंदरसरीरो । एवंविहो तुमं पिव कुमार! किं अब्भहियमेत्थ? ॥ २ ॥ एयमां-

विन्ध्ये-  
गमनं.

॥ ३४ ॥

यन्निऊण परितुट्ठो कुमारो, भणियं च-अहो साहु सिलेससारं पढियमेण, ता देह एयस्स दीणारलक्खंगं, जं देवो आणवेइत्ति भणिकुण पडिवन्नं भंडागारिण, खणंतरेण गओ नियआवासं । कयं पयाणयं, कमेण य पत्तो पंचंत-  
 देसं, तहिं च पेच्छइ पमुइयपकीलियं गोमहिसिपसुकरहरासहपउरं धणंधणसमिद्धं सुद्धगामागरनगरं नियजण-  
 जाणवयं, विम्हियजणेण य आहूया विसयमहत्तरा सिट्ठिणो य, तंवोलदाणाइवहुमाणपुरस्सरं पुच्छिया य लोयसु-  
 त्यासुत्थवत्तं, तेहिं भणियं-देव ! तुम्ह भुयपंजरंतरनिलीणाणं अम्हाणं को सयन्नो मणसावि असुत्थयं काउं समीहेज्जा ?,  
 न हि जीवियसावेक्खो पंचाणणगंधकेसरकुरलिं तोडेज्जा भुयगरायफणफलमंणिं वा गिण्हेज्जत्ति, केवलं एत्ति-  
 यमेव असुत्थं—

जमेत्थ दावियसुद्धायारेहिं पणतरुणीगणेहिं, नयणचावपमुक्कडक्खियमग्गणेहिं । दिसिदिसिनिइयपह-  
 णिवि पइदिणु पंधियहुं, हीरइ हियउं हयासहि पहि पेक्खंतियहिं ॥ १ ॥ विसंयदोसदुहसंचयकहणपरायणहं,  
 धम्ममग्गु देसंतह पइदिणु मुणिजणहं । भोगुवभोगु जहिच्छइ गिहिं निवसंतएहिं, अम्हेहिं करणु न लब्भहिं  
 भवभयसंक्रियहिं ॥ २ ॥

इय निसुणिकुण कुमरेण दरवियसियकबोलं हसिकुण सुचिरं पसंसिकुण य तच्चयणविन्नासं दवावियतंवोला वि-  
 सज्जिया सिट्ठिणो विसयप्पहाणा य, तयणंतरं दूयवयणेण भणाविओ पुरिससिंघो, जहा-कुमारो तुह दंसणुस्सुओ

श्रीगुणचंद  
महावीरच०  
३ प्रस्तावः

३५ ॥

वट्टइत्ति, एयमायन्निऊण य पुरिससिंचनरवइणा कुमारस्स आणयणनिमित्तं पेसिया नियपहाणपुरिसा, तदणुरोहेण समागओ कुमारो, पवेसिओ नगरंभि परमविभूईए पुरिससीहेण, काराविओ भोयणं, समप्पिया करितुरयसंदणा, उवणीयमण्णंपि पभूयं दविणजायं, विन्नत्तो य भालतलघडियकरसंपुडेण तेण-कुमार ! गाढमणुग्गहिओम्हि तुमए जं नियचरणकमलेहिं पवित्तीकयं मह भवणं, ता कइवयदिणाइं पडिवालेह एत्थेव, पुणोऽवि दुलहं तुम्हेहिं सह दंसणंति भणिए वुत्तो कुमारेण-भो नरिंद ! अपुवो तुह पेम्मपवंचसारो पियालावो अणण्णविणयववहारो अच्छेरयभूया पडिवत्ती मणसावि अचिंतणिज्जं सज्जणत्तणं, ता एरिस तुह गुणगणेण गाढमागरिसियं मम खणद्धेणवि चित्तं, जइ पुण कइवय वासराणि तुमए सद्धिं वसामि नूणं न पट्ट परवसस्स नियचित्तस्स हवामि, सच्चं च इमं पढिज्जइ-“अत एव हि नेच्छन्ति, साधवः सत्समागमम् । यद्वियोगासिलूनस्य, मनसो नास्ति भैषजम् ॥ १ ॥” ताऽणुजाणेसि मं गमणाएत्ति वुत्ते दुस्सहतव्विओगसोगदमियमणोऽसुधरं हयगयरहसमग्गसामग्गीए अणुगच्छिऊण कुमारं वलिओ पुरिससीहो, कुमारोऽवि अक्खंडपयाणगोहिं चलिओ रायगिहनगराभिमुहं । इओ य विस्सनंदिणा नरिंदेण सो नियपुत्तो विसाहनंदी भणिओ—

वच्छ ! जहिच्छं वणलच्छिपेच्छणं कुण मयच्छिमज्झगओ । परिसंकं सकस्सवि अवहंतो एत्थ उज्जाणे ॥ १ ॥

एवमायन्निऊण विसाहनंदी कुमारो वड्डियाणंदसंदोहो पमुक्कनीसेसवावारंतरो अंतोउरसमेओ विचित्तकीलाहिं

पुरुषसिंहा-  
भ्यागतिः.

॥ ३५ ॥

उज्जाने मंडिजो कीलइत्ति । सो य विस्सभूर्इ अणवरयमागच्छंतो संपत्तो रायग्गिदे, नियनियठाणे वेसियसामंतसे-  
जाइपुदपरिपरो गाडाणुराणेण य चिरदंसणुकांठिओ पुवप्पवाहेण पुप्फकरंडगुज्जाणे पयिसिउमाढत्तो, भणिओ य  
उत्तरेतद्विपण पडिहारेण—कुमार ! न जुत्तं तुम्ह एत्थ पयिसिउं, जेण विसाहनंदी अंतेउरसहिओ इह पविट्ठो  
कीलइ, विस्सभूर्इकुमारेण भणियं—मह ! कह्या पविट्ठो ? तेण भणियं—तुम्ह गमणाणंतरमेव, एवमायन्निऊण समु-  
पत्तिगहोवभरारुणनयणो णिडालतडघडियभिउडिभासुरिययणो तप्पालुच्छलियसेयधिंदुजलजडिलियसरीरो कु-  
मारो एवं चिंतिउमारदो—

पचंतकुद्धनरवइवइयरववएसओ धुवं पुयिं । उज्जाणाओ इमाओ नियबुद्धीए नीणिओ रत्ता ॥ १ ॥  
जेण सयं चिय दिट्ठो सो देसो सुत्थगामपुरगोट्ठो । परचफचोरअभिमरभयरहिओ धणकणसमिद्धो ॥ २ ॥  
ता नूणं नियपुत्तस्स कीलणट्ठं इमंमि उज्जाणे । अवजसपरिहरणत्थं कवडमिमं विरइयं सयं ॥ ३ ॥  
माढं अजुत्तमेयं आयरियं निच्छियं नरिंदेण । न हि विस्सासपरयसहिययंमि जणे घडइ माया ॥ ४ ॥  
एवं खणं निग्गमिऊण तेण समुप्पन्नसमहिगकोवाहरेणेण तज्जिया विसाहनंदिपुरिसा—रे रे दुरायारा ! मए अप-  
रेचत्तेऽपि उज्जाणे केण तुम्हे पवेसिया ? को वा तुम्ह पुरिसायारो ? कहं वा अविण्णायपरफमा एत्थ सच्छंदमभिरमह ?  
ए निहयाणं कत्तो वा तुम्ह परित्ताणंति भणिऊण दुप्पिसहाभिमाणपरव्वसयाए नियबलदंसणत्थं पइओ निट्ठुरमु-

श्रीगुणचंद  
महावीरच०  
३ अस्तावः

॥ ३६ ॥

ट्टिपहारेण फलभरणयसाहो पकिट्टो कविट्टपायवो, तदभिधाएण य कुलसेलताडियं व थरहरियं मेइणीवट्टं तुट्ट-  
निविडबंधणाइं निवडियाइं सयलफलाइं दंसियाणि य विसाहनंदिपुरिसाणं, सगव्वं भणिया य-रे रे पुरिसाहमा !  
जह एयाणि पाडियाणि तहा पाडेमि तुम्ह मुंडाणि, अवणेमि दुव्विणयसीलयं, विहाडेमि उज्जाणरमणकोऊहलं,  
केवलं लज्जेमि तायस्स बीहेमि नियकुलकलंकस्स विचिकिच्छेमि लोयाववायस्सत्ति भणिऊण उवसंततिव्वकोहावेगो  
संवेगमग्गमुवगओ एवं चिंतिउमाढत्तो-

विसयपरव्वसहियया हीलं किं किं जणा न पेच्छंति । कत्थ व न दुक्करंमिवि ववसाए संपयट्ठंति ? ॥ १ ॥

को वा न आवयावत्तवट्ठिया तिक्खदुक्खरिंछोली । दंभोलिनिविसेसा अत्तक्किया निवडइ सिरंमि ॥ २ ॥

तुच्छोवि विबुहजणनिंदिओऽवि को वा विमुक्कमज्जाओ । न करेज्जा दुव्विणयं विसयपसत्ताण सत्ताणं ॥ ३ ॥

विसयाणं पुण निव्विग्वकारणं निच्छयं मयच्छीओ । विहिणा पावेण विणिम्मियाउ नणु केण कज्जेणं ? ॥ ४ ॥

नूणं न दुग्गदुग्गइपडणदुहाइं कयावि सुमिणेऽवि । पेच्छेज्जा मणुयजणो जइ जुवइपरंसुहो होज्जा ॥ ५ ॥

पासव्व करिवराणं हरिणाण व वागुरा विसमबंधो । पंजरमिव विहगाणं पईवकलियव्व सलभाणं ॥ ६ ॥

मीणाणं जालंपिव जणाण सेच्छापयारसुहियाणं । अहह विसमं महंतं सहिलाजंतं कयं विहिणा ॥ ७ ॥

अविय-नवमालइपरिमलमंसलोवि नवसुरहिकुसुमवरगंधो । किं कुणइ तेसि जेसिं मणंमि नो वसइ हरिणच्छी ॥ ८ ॥

विश्वभूते-  
वैराग्यम्.

॥ ३६ ॥

अदरेगुदीवियवम्महोऽवि निम्महियसयललोओऽवि । जुवईविरत्तचित्तं नो चालइ मलयपवणोऽवि ॥ ९ ॥  
सरयनिसायरकिरणुज्जलावि नो कोमुई मणागंपि । दावेज्ज विचारं पंचवाणवलदलणधीराणं ॥ १० ॥  
जोव्वणतिमिरच्छाइयविवेयनयणो पुरा गिहे वसिओ । अहह कहां दुट्ठमई निरत्थयं एत्तियं कालं ? ॥ ११ ॥  
अहया किमइकंतत्थसोयणेणं निरत्थएणं मे । अज्जवि किंपि न नट्ठं करेमि सद्धम्मकम्ममहं ॥ १२ ॥

एवं च गरुयसंवेगावन्नमाणसो सव्वहा पवहुमाणविसयविरागो निच्छियसंसारासारत्तो गओ संभूइसूरिस्स पासे, जो य केरिसो ?—

अइपसत्थगुणरयणसायरो, तेयरासिना वइ दिवायरो । सोमयाए संपुन्नचंदओ, जो विसुद्धसुहवेल्लिकंदओ ॥ १ ॥  
मेरुसेलसिहरव निचलो, संघकज्जभरवहणपचलो । सुरनरिंदपणिवयसासणो, दुट्ठकामतमपडलणासणो ॥ २ ॥  
तवऽग्गिदड्डपावओ विसुद्धभावभावओ, सया तिगुत्तिगुत्तओ पसत्थलेसजुत्तओ ।  
पयंडदंडवज्जिओ जिणिंदमग्गरंजिओ, पणट्ठमाणकोहओ विणीयमायमोहओ ॥ ३ ॥  
जणाण वोहकारओ कुतित्थिदप्पदारओ, अपुव्वकप्परुक्खओ पणट्ठसत्तुपक्खओ ।  
मुणिंदविंदवंदिओ असेसलोयनंदिओ, अणेगल्लिन्नसंसओ पणट्ठसव्वदोसओ ॥ ४ ॥  
तस्स एवंविहस्स गुरुणो पलोयणेण समत्थतित्थदंसणपुयपावं पिवऽप्पाणं मण्णमाणो सव्वायरेण पणमिज्जण

श्रीगुणचंद  
महावीरच०  
३ प्रस्तावः

॥ ३७ ॥

चरणकमलं उचविष्टो सन्निहियभूमिभागे, गुरुणाऽवि पारद्धा महुमहणापूरियपंचयण्णरवाणुकारिणा सरेण धम्मदे-  
सणा । जहा—

संसाररुंदरंगे सइल्लुसेहिं व चित्तरुवेहिं । सो नत्थि किर पएसो जीवेहिं न नच्चियं जत्थ ॥ १ ॥  
चउगइजलपडलाउलभवण्णवेऽणेगसो करेतेहिं । दुहिणहिं मज्जणुम्मज्जणाइं कुम्मेहि व कहिंपि ॥ २ ॥  
आरियखेत्तुप्पत्ती नो पाविज्जइ पभूयकालेऽवि । तीएवि हु पत्ताए कहिंचि कम्मक्खओवसमा ॥ ३ ॥  
धम्मत्थकामसाहणकारणमेगंतियं न मणुयत्तं । पावंति पावविहया भममाणा विविहजोणीसु ॥ ४ ॥  
लद्धेऽवि तत्थ जरकाससासकंडूपमोक्खदुक्खेहिं । निहयाण धम्मकम्मुज्जमोऽवि दूरेण वच्चेज्जा ॥ ५ ॥  
नीरोगत्ते पत्तेऽवि रुद्धारिद्विहुयसरीरा । उदरभरणत्थवाउलचित्ता वोळिति नियजीवं ॥ ६ ॥  
इस्सरिएऽविहु बहुदविणवद्धणारद्धविविहवावारा । लोभेण भोयणंपिहु काउं न तरंति वेलाए ॥ ७ ॥  
संतोसेणवि मिच्छत्तपंकपसरेण मइलमइविभवा । सव्वण्णुमयं सम्मं सुयंति नेवावजुज्झंति ॥ ८ ॥  
सव्वण्णुधम्मवोहे जाएऽवि हु कम्मपरिणइवसेणं । नीसेसगुणावासो गुरुवि न कहिंपि संपडइ ॥ ९ ॥  
लद्धेऽवि गुरुमि समत्थवत्थुवित्थारपयडणपईवे । सिद्धिपुरपरमपयवी न पयट्टइ तहवि विरइमई ॥ १० ॥  
तीएवि तिक्खवहुदुक्खलक्खनिरवेक्खकारणं पावो । पसरंतो न पमाओ खलिउं तीरेइ वणकरिच्च ॥ ११ ॥

संभूतिखरे-  
रूपदेशः.

॥ ३७ ॥

इय उत्तरोत्तरमद्वयवंधेऽप्यसादृशजिह्वामि । मोक्खसुहे धण्णाणं केसिं पि मणो समुलसइ ॥ १२ ॥  
 जत्तेसिं एवंविहसमग्गसामग्गिसंभवेऽवि मई । उप्पज्जइ संसारिवसुहेसु विरसावसाणेसु ॥ १३ ॥  
 को वाऽविदु सलहेज्जा को वा नामं पि तेसिं गिण्हेज्जा । जे भोगामिसगिद्धा रमंति इह सारमेयव ॥ १४ ॥  
 अपिय-जोव्वणपडलच्छादयविवेचनयणा मुणंति तरुणीण । केसेसुं कुडिलत्तं न उणो तासिं चिय मणंमि ॥ १५ ॥  
 पडुहाराबुद्धमं उब्भडनासं सुदीहरच्छं च । पयियंभियसत्तिलयं नियंति वयणं न उण नरयं ॥ १६ ॥  
 परिणाहसालिवित्तं सि धि(य)णेसुं न धम्मबुद्धिसु नियंति । पेहंति तणुयसुवरं साणंदा न उण नियआउं ॥ १७ ॥  
 सुरमणुयगईपरिहंपि सुंदरं भुयजुयं पसंसंति । जंधोरुजुयं अइअसुइयं पि उवमिंति रंमाए ॥ १८ ॥  
 इय भो देवाणुप्पिय ! विप्पियहेउं पि जुवइजणदेहं । मणमोहणवम्महचुण्णपुण्णचित्ता अभिलसंति ॥ १९ ॥  
 तेचिय पमाणमवलंविऊण भोगेसु को पयहेज्जा ? । कुपहपवण्णो किं होज्ज कोइ कुसलाणुसरणिज्जो ? ॥ २० ॥  
 नयजोव्वणोऽवि निप्पडिसरुवकलिओऽवि लच्छिनिलओऽवि । पवरविलासीवि तुमं भइ ! धुवं धम्मजोग्गोऽसि २१  
 तेणेवंविहपवरोवएसरयणाई तुज्झ दिज्जंति । न कयावि पुण्णरहिया चिंतामणिलाभमरिहंति ॥ २२ ॥  
 इय भणियंमि गुरूहिं समहिगसंजायधम्मपरिणामो । भत्तिभरनिव्वरंगो कुमरो भणिउं समाढत्तो ॥ २३ ॥  
 भयवं ! सव्वमसेसं कहियं तुहेहि सिवसुहकएणं । ता सम्मं पव्वज्जं निरवज्जं देहमह इणिं ॥ २४ ॥



श्रीगुणचंद  
महावीरच०  
३ प्रस्तावः

॥ ३८ ॥

एवं च भणिए सो गुरुणा समुज्झियरयणाभरणो अंगीकयगुरुचरणसरणो सिद्धंतभणियविहाणेण गाहिओ  
जिणिंददिक्खं सिक्खविओ पइदिणं कायव्वकलावं जाणाविओ सिवसुहनिबंधणं संजमधणं पाढिओ सामाइयप-  
मुहं सुत्तंति । इओ य कुमारपव्वज्जासवणवज्जासणिताडणुप्पण्णपरमसोगो अंतेउरसमेओ समं जुवराएण समागओ  
विस्सनंदी, सविणयं सूरिं वंदिऊण पणमिओ अणेण विस्सभूई साहू, भणिओ य सोपालंभं सप्पणयं च एसो-पुत्त !  
किं जुत्तमेयं पवरकुलुप्पन्नाणं तुम्हारिसाणं ? अनिवेइऊण नियवुत्तं जमेवंविहं दुकरं साहुकिरियं पडिवण्णोऽसि, ता  
वच्छ ! साहेसु को तुज्झ चित्तनिव्वेयहेऊ ? किं वा अम्ह दूसणं पडिवण्णो ? केण वा तुम्ह वयणं पडिकूलियं ? कि-  
मेवं एकपएच्चिय अदक्खिणत्तणमब्भुवगओऽसि ? हवउ वा सेसजंपणेण, तुमं विणा कस्सेयाणिं अम्हे सकज्जं सा-  
हिमो ? विसमावयानिवडियाणं को वा आलंवणं ?, ता सव्वहा अज्जवि परिचयसु पव्वज्जं पडिवज्जसु रज्जं कीलेसु  
जहिच्छं पुप्फकरंडगुज्जाणे मा पूरेसु सत्तुमणोरहे मा अणाहीकरेसु वालकमलिणीवणं व सस्सिरीयं बहुजणं मा उवे-  
क्खेसु पुव्वपुरिसरक्खियं नियजणवयं मा पडिवज्जसु गाढगंठिनिट्टुरहिययत्तणंति ।

तो विस्सभूइसुणिणा पसमपहाणं पयंपियं एयं । भो मुंचह संतावं कुणह जहावंलियं कज्जं ॥ १ ॥  
नो किंचिवि वयणिज्जं इहऽत्थि सव्वेऽवि निययकज्जेसु । उज्जमह सेसचागेण जेण लोगेऽवि पयडमिमं ॥ २ ॥  
सयणाइसिणेहविमोहिएहिं कीरंति जाइं पावाइं । दुग्गइगयाण ताइं कडुयविवागं फलं देंति ॥ ३ ॥

विश्वभूति-  
दीक्षा.

॥ ३८ ॥

न य बहुमुवयरिओऽविह विहुरे थेवंपि कुणइ साहारं । सयणजणो मोत्तुणं एकं जिणदेसियं धम्मं ॥ ४ ॥

इय भणिण नियदुच्चरियपेहणुप्पण्णगाढसंतावो । काऊण पायपडणं जहाऽऽगयं पडिगंओ राया ॥ ५ ॥

विस्सभूई सम्ममहिगयसाहुधम्मो गुरुचरणसुस्सूसापरो दूरुज्झियसुहिसयणसंधवो जीवियमरणनिरवेक्खो  
पंचिंदियदित्तसत्तुविजयपरो बहुं कालं गुरुकुलं पज्जुवासेइ । अण्णया य सम्मं समहिगयसुत्तत्थो विसेसेण विहियम-  
णपरिकम्मो जोगोत्ति कलिऊण गुरुणाऽणुण्णाओ समाणो एगल्लविहारित्तणं पडिवज्जिऊण छट्ठमाइ निट्ठुरं तवो-  
कम्मं कुणमाणो सम्मं परीसहचमूं अहियासेज्जमाणो वीयरगोव्व गामनगरागराइसु अममाएंतो पइक्खणं वीरास-  
णुकुडयासणाइं कुणमाणो पइदिणं सूराभिमुहं आयाविंतो नियजीवियब्भहियं पाणिगणं रक्खितो वायालीसदो-  
सविसुद्धविरसाहारगहणेण संजमसरीरमणुपालेंतो गामाणुगामं विहरेंतो समागओ सुरिंदपुरिविब्भमाए मडुराए नय-  
रीए, ठिओ थिपसुपंडगविवज्जिए उक्किट्ठतवनिरयमुणिजणसंगए एगंतदेसे, तहिं च निवसंतो एगया परमसंवेग-  
गयमाणसो नियजीवियनियमणत्थं चिंतिउमारद्धो । जहा—

एसोऽभिकंखइ सुहाइं जिओ दुहाइं, दूरेण मोत्तुमभिवंचइ तुच्छवुद्धी ।

एवं न जाणइ जहा न कहिंपि धम्मसंबंधसिद्धिविरहेण भवंति ताइं ॥ १ ॥

भोगे समीहइ करेइ रइं कहासु, देसित्थिपत्थिवसुभोयणसंगयासु ।

श्रीगुणचंद  
महावीरच०  
३ प्रस्तावः

॥ ३९ ॥

सीउण्हदंसमसगाइ परीसहे य, सम्मं तितिकूखइ न मूढमई पमाया ॥ २ ॥

सत्तू वरं निसियधारकरालकालकंतिच्छडालकरवालकरो सुकुद्धो ।

घायत्थमुज्जुयमई वरमुग्गभोगभोगीसरो डसिउमुद्धमरो रुणच्छो ॥ ३ ॥

उद्धंडमारुयपईवियदीहजालामालाउलो य जलणो वरसंगलग्गो ।

नीसेसदोसनिलओ न खणंपि नूणं, जुत्तो न गंतुमहमो हि इसो पमाओ ॥ ४ ॥

एए हि सत्तुपमुहा मणुयाण दिंति, तिब्बावि एगभवगोयरमेव मच्चुं ।

एसो पईभवसुदुस्सहतिकखदुक्खलक्खक्खणी तदहिगं परिवज्जणिज्जो ॥ ५ ॥

वज्जणमेयस्स पुणो आहारचागओ घडइ सम्मं । ता सबहेव जुत्तं मम काउं उग्गतवचरणं ॥ ६ ॥

इइ संपहारिऊण य समारद्धं तेण मासखमणं, कओ विसेसेसुज्जमो समाढत्तो पइदिणं ज्ञाणप्पवंधो निरुद्धो  
मणप्पसरो, एवं च कमेण पडिपुण्णे मासक्खमणे पडिलेहियभंडोवगरणो अतुरियं अचवलं जुगमेत्तनिहित्तचक्खुपसरो  
सुत्तत्थपोरिसिपज्जंतकाले चलिओ भिक्खानिमित्तं उच्चावयगिहेसु गोयरचरियाए, परिभममाणो उग्गमउप्पायणादोसे  
सम्मं निरूवेमाणो लाभालाभेसुवि अरत्तदुद्धो पगिट्ठतवाणुट्ठाणकरिसियसरीरत्तणेण य तणंपिव पवणेणावि पकंपमाणो  
परिसोसियमंससोणियत्तणेण य पयडसिराजालावणद्धऽट्ठिपंजरो धवलपाडिवयमयलंछणो इव कलावसेसो तं रायम-

विश्वभूति-  
वैराग्य  
तपः कर्म.

॥ ३९ ॥

गमोगाढो जत्य सो विसाहनंदीकुमारो पिउच्छाए रण्णो अग्गमहिंसीए धूयापरिणयणत्थं पुव्वमावासिओ चिट्ठइत्ति ।  
 अहं तं मुणिं दहूण जायपच्चभिण्णाणेहिं पुरिसेहिं भणिओ विसाहनंदी कुमारो, जहा-सामी ! मुणह तुम्हे एवं पवइ-  
 यगं ? सो भणइ-सम्मं न जाणामि, तेहिं भणियं-कुमार ! एसो सो विस्सभूई कुमारो जो पुर्विं पवइओ, तं लक्खिऊण  
 जाओ तस्स पुव्वामरिसेण कोवोत्ति, एत्थंतरे सो तवस्सी तंमि पएसे वचमाणो इरियासमिईवक्खित्तचित्तत्तणेण अत-  
 कियमेव पणोत्तिओ अहिणवपसूयाए गावीए, पडिओ य निसट्ठो धरणीए, ताहे तेसिं विसाहनंदिपमुहपुरिसेहिं दहूण  
 तं तहानियडियं संजायगाढहरिसेहिं कओ सिंहनाओ अण्णोडिया तिवई दिन्नाओ तालाओ पारद्धो कलयलो, भ-  
 णियं च महया सहेण-भो भो कत्य गयं तमियाणिं कविट्ठफलपाडणवलं जेण गोमेत्तेण विनिवाडिओऽसि ? इमं च  
 निसामिऊण वलियकंधरो विस्सभूई जाव विण्फारियलोयणो अमरिसेण पलोएइ ताव दिट्ठा विसाहनंदिमुपहा पच्च-  
 भिण्णाया य, तयणंतरं च पलीणो से उवसमपरिणामो ववगओ विवेओ समुच्छलिओ महाकोवो समुल्लसियं वीरियं,  
 धाविकुण य सा गहिया सिंगेसु गावी पडाइयव्व भमाडिया सीसोवरिं पक्खित्ताय धरणीए, भणिया य ते, जहा-रे रे  
 दुरायारा ! दुरुम्मुक्कपरकमा हीणा सब्बसो य विरहिया मं उवहसह, न मुणह जहा दुव्वलस्सऽवि पंचाणणस्स सिगा-  
 लसहस्सेहिवि न लंघिज्जइ परकमो, सुलुदुयस्सवि विहंगरायस्स न तीरइ सोढुं भुयंगमेहिं चडुलचंचुप्पहारो, तहा-  
 जइविहु निदुरतवकम्मकिसियकाओ वियाणिओऽहमिह । तहवि न रे ! तुम्हाणं लक्खेणवि अत्थि मम गणणा ॥ १ ॥

श्रीगुणचंद  
महावीरच०  
३ प्रस्तावः

॥ ४० ॥

रे पिसियपोसिया विउसदूसिया किं परेण भणिण्ण? । अच्छिपडियावि तुम्हे न कुणह मे किंपि परियावं ॥ २ ॥

निब्भच्छिऊण एवं साहिकखेवं सुतिकखवणेहिं । गंतूण य नियटाणं साहू चिंतेउमाढत्तो ॥ ३ ॥

अज्जवि न मणागंपिवि पुद्वाणुसयं चयंति मइ एए । पवज्जोवगयंमिवि निकारणवइरिणो पावा ॥ ४ ॥

अहवा एयाणं वालिसाणं किं एत्थ दूसनं? जेण । पुद्वायरियाण सुहासुहाण एसो दसावागो ॥ ५ ॥

ता तह करेमि संपइ परभवपत्तो जहा य सुमिणेवि । एवंविहअवमाणट्टाणं नो कहिंपि पेच्छामि ॥ ६ ॥

इय कयसंकप्पो सो अविभावियसमयसत्थपरमत्थो । अविचिंतिउत्तरोत्तरसंसारवडणदुहनिवहो ॥ ७ ॥

भत्तं पच्चक्खाउं नियाणवंधं च काउमुज्जुत्तो । पचासण्णमुणीणवि समक्खमेवं पजंपेइ ॥ ८ ॥

जइ ताव ममं दुक्करतवस्स छट्ठट्टमाइरूवस्स । सज्झायझाणसहियस्सिमस्स सव्वायरकयस्स ॥ ९ ॥

वायालीसेसणदोसरहियसुद्धुंभोयणस्सऽविय । सुत्तत्थतत्तचिंतण[पर]गुरुजणविणयाणुचरणस्स ॥ १० ॥

पंचमहव्वयधरणस्स वावि फलमउलमत्थि नणु किंपि । अतुलियवलकलिओऽहं ता होज्जा अण्णजम्ममि ॥ ११ ॥

एवं च नियमिऊणं ठिओ सुद्धसिलायले, निसामियनियाणवंधा य समागया इयरसमीववत्तिणो तवस्सिणो,  
भणिओ य सबहुमाणं तेहिं—भो महाणुभाव! सयंचिय मुणियजुत्ताजुत्तस्स नत्थि जइवि तुह किंपि कहणिज्जं त-  
हावि एयं निवेइज्जइ-जेण न लोहकीलियानिमित्तेण कोऽवि कुणइ देवउलपलीवणं, न वा कोडिप्पमाणरयणरा-

विश्वनन्दि-  
हासं नि-  
दानं च.

॥ ४० ॥

सिणा किणिज्जइ कागिणी नेव य गोसीसचंदणागरुपमुहसारदारुणि दहिऊण कीरंति इंगाला, न य एवंविहनिकलं-  
कसुचिरचरियविचिहत्तवेहिं किंपागफलं पिव पज्जंतदारुणो काउं जुज्जइ नियाणबंधो, अण्णं च—

किं पवणगुंजिएहिं कंपिज्जइ मंदरो रउदेहिं । दुज्जणवयणेहिं मणो किं वा पक्खुहइ साहूणं ? ॥ १ ॥

चिरकालुव्वूढं किं मज्जायमइकमंति जलनिहिणो । हरिणंकदिणयरा किं तिमिरप्पसरेहिं रुज्जंति ॥ २ ॥

निम्मलगुणरयणमहानिहाण ! तुम्हारिसावि सप्पुरिसा । ववसंति एरिसं जइ धम्मसिरी ता कमल्लियउ ? ॥ ३ ॥

कत्थ व वचउ विणओ ? वोढुं को वां खमो खममियाणिं ? भग्गनिवासो गच्छउ कत्थ वराओ विवेओऽवि ? ॥ ४ ॥

एमाइविचिहवयणेहिं भासिओ जा न देइ पडिवयणं । नियनियठाणेसु गया ताव मुणिंदा निराणंदा ॥ ५ ॥

विस्सभूइवि अविचलियणियाणबंधज्झवसाओ अणालोइयपडिकंतो कालमासे कालं किच्चा उक्कोसट्ठितीओ  
महासुक्के देवलोगे देवो समुप्पण्णो, तत्तो उघट्ठित्ता जहा वासुदेवो होही जहा य से पिया पयावइत्ति भविही तहा  
एत्तो कहिज्जइ ।

इहेव जंबुदीवे दीवे भारहे वासे पोयणपुरंमि नयरे जहत्थाभिहाणो रिउपडिसत्तू नाम राया, तस्स य सयल  
अंतेउरपहाणा भदा नाम अग्गमहिसी, तीसे चउमहासुमिणपिसुणियावयारो अयलो नाम पुत्तो, अचंतमहावलो  
विस्सुओ य, एगया य तीसे देवीए पाउव्वभूओ गव्वो, जाया य कालेण सव्वलक्खणपडिपुण्णसरीरा कण्णगा,

श्रीगुणचंद  
महावीरच०  
३ प्रस्तावः

॥ ४१ ॥

कयं च उचियसमए मिगावइत्ति से नामं, कमेण य निरुवमारूढजोवणगुणा एवं सोहिउं पवत्ता—  
कसिणसुसिणिद्धकुंचिरचिहुरचओ तीए उत्तमंगंमि । वयणेंदुविब्भमागयविडप्पसोहं समुव्वहइ ॥ १ ॥  
भालतलेऽवि लुलंती अतिकुडिला चिहुरवलरी तीसे । रेहइ वम्महरण्णो विजयपसत्थिव्व आलिहिया ॥ २ ॥  
सरलेहिं लोयणेहिं तीए कवोलेहिं चंदकंतेहिं । अहरेण पउमरागेण रयणट्ठाणं व सहइ मुहं ॥ ३ ॥  
संखो इव रेहावल्लयलंछियं कंठकंदलं विमलं । संठियविचित्तमणिलट्ठगंठियं सोहए तीए ॥ ४ ॥  
कंदप्पनरिंदनिवासविब्भमे तीए थोरथणवट्ठे । हारो पडिहारतुलं आलंवइ लंवमाणो सो ॥ ५ ॥  
रंभाभिरामपीवरमूरुजुयं कणयकमलकंतिहं । थंभजुयलं व लज्जइ विसयमहासोकखभवणस्स ॥ ६ ॥  
वहलालत्तयरसपिंजरं व मणिकुट्टिमंमि संकंतं । कमलोवहारसोहं चलणजुयं दावए तीसे ॥ ७ ॥

एवंविहा य वरजोगत्तिकाऊण सा सव्वालंकारविभूसियसरीरा भद्दाए पेसिया पिउणो पायवंदणत्थं, गया  
चेडीचक्कवालपरिवुडा निवडिया नरिंदचलणेसु पेच्छिया संभमभरियच्छिणा सव्वायरं रण्णा पणयालावपुरस्सरं च  
आरोविऊण तमुच्छंगे रूवेण जोव्वणगुणेण य वाढमक्खित्तचित्तो विचिंतिउमाढत्तो—अहो सुरसुंदरीरूवाइसयपराभव-  
करं रूवं अहो सव्वावयवसुंदरं लायण्णं अहो सरयचंदचंदिमानिम्मलं कंतिपडलं, अहो वेणुवीणाविजइणी वाणी,  
सव्वहा भुयणच्छेरयभूयमिमीए किंपि विलसियं, नूणं पुवं एरिसं न निम्मियं खत्तियकुले कन्नगारयणं परमेसरेण

प्रजापति-  
स्वरूपम्.

॥ ४१ ॥

विहिता, तेणं चिय मयरद्वएण परिग्गहिया रई तिसूलपाणिणाऽवि परिणीया. पव्वयसुया महुमहेणवि मंदरुम्महिय-  
नीरजलदित्तमुद्धिया जलमाणुसी पणइणी कया पुरंदरेणावि पुलोममुणिकन्नगा उव्वूढत्ति, अहो अहं नमो मज्झं  
उस्स अंतेउरे रयणायरेव्व एरिसं कण्णगारयणं समुप्पण्णंति ।

अह कोमलुच्छुचावोऽवि वम्महो पंचकुसुम विसिहोऽवि । वज्झधणुलोहनिट्टुरसहस्सवाणो व विप्फुरिओ ॥ १ ॥  
जत्तो जत्तो सा धवलपम्हले लोयणे परिक्खिवइ । तत्तो तत्तो सोऽविडु निसियं सरधोरणिं सुयइ ॥ २ ॥

अत्थाणजणोऽविडु वम्महेण संताविओ डु पासेण । रिउपडिसत्तू राया तदेगचित्तो विसेसेण ॥ ३ ॥  
एवं च मयणसरप्पहारविडुरियमाणसो सो नरिंदो परिभाविउं पवत्तो—अहो एसा इयाणिं वरजोग्गा वट्टइ

ता किं कायव्वं ?, किमेरिसरूवाइसया कण्णगा परस्स दाऊण सगिहाओ निस्सारिज्जइ ?, सव्वहा न जुत्त-  
मेयं, जइविडु जणो अविसेसेण कण्णगाणं अण्णप्पयाणेण पउत्तो तहावि गड्डरिकापवाहो एसो नालंबणट्ठाणं सुवु-  
दीणंति कयनिच्छओ अणवेक्खिउं गरुयमाचंदकालियं लोयाववायं अविमंसिऊण चिरप्परूढं नायमग्गमनिग्गहि-  
ऊण मयणवेयणं अप्पणा चेव तं परिणेउकामो कहकहवि आगारसंवरे काऊण धूयमंतेउरं विसजेइ, वोपदियहे  
वाहराविऊण सेट्टिसत्थवाहपमुहं नयरमहाजणं सामंतसेणावइवग्गं च सुहासणत्थं सव्वहुमाणं भणइ—भो भो  
पहाणलोया ! तुम्हे कुलववत्थाणं जुत्ताजुत्ताणं नयाणं संसयत्थाणं लोयधामववहाराणं परूवगा निच्छयकारगा य,



श्रीगुणचंद  
महावीरच०  
३, प्रस्तावः

॥ ४२ ॥

अम्हाणंपि सव्वत्थेसु पुरावि पुच्छणिज्जा, ता संपयं साहेह जमेत्थ विसए रयणमुप्पज्जइ तस्स को सामी ?, अविण्णा-  
यपरमत्थेहिं तेहिं भणियं—देव ! किमेत्थ पुच्छणिज्जं ?, तुम्हेच्चिय सामिणोत्तिवुत्ते तिक्खुत्ते एयमेव वयणं भणावि-  
ऊण नरवइणा उवट्ठाविया साऽवि य कन्नगा, भणिया य ते—अहो धूया एसा मम अंतेउरे रयणभूया पाउब्भूया  
अओ तुम्हाणुण्णाओ अहमेयं सयं परिणेउं वंछामि, अणइक्कमणिज्जं खु तुम्ह वयणं अम्हाणंति, एवं भणिए लज्जाव-  
सवलंतकंधरा अवरोप्परमुहमवलोयमाणा ओहयमणसंकप्पा अपरिभावियवयणविसट्ठमाणचित्तपीडा गया नियनियठा-  
णेषु पुरजणपमुक्खा, सा कण्णया अवरवासरे वारिज्जमाणेणऽवि भद्दाए देवीए पडिखलिज्जमाणेणऽवि कुलमहत्तरएहिं  
उवहसिज्जमाणेणवि नम्मसच्चिवेहिं सोवालंभं वज्जिज्जमाणेणवि मंतीहिं दुहविवागमणुसासिज्जमाणेणवि धम्मगुरुहिं अ-  
णुसरियविंझेण करेणुवइ(ण)व अणिवारियपसरेण गंधवविवाहेण परिणीया सा नरिंदेण, ठविया अग्गमहिंसीपए, तीसे  
सद्धिं विसयसुहमणुभुंजइत्ति । सा य भद्दा देवी दट्ठूण तारिसं जणनिंदणिज्जं उभयलोयविरुद्धं तियचउक्कचच्चरेसु जणह-  
सणिज्जं रण्णो वइयरं संजायगाढचित्तसंतावा अयलेण पुत्तेण समं महया रिद्धिवित्थरेणं पहाणजणसमेया गया दक्खि-  
णावहं, तत्थ य पसत्थभूमिभागे निवेसिया नयरी निम्मियाइं धवलहराइं ठवियाइं सुरागाराइं कारावियाइं पाया-  
रगोउराइंति, सा य पुरी महंतीए ईसरीए कारियत्ति माहेसरित्ति गुणनिष्फण्णनामेण देसंतरेसु पसिद्धिं गया ।  
तत्थ य अयलो कुमारो भद्दादेविं मोत्तूण पिउपासमागओ, एवं च काले वच्चंतंमि लोणेणं तस्स राइणो सधूया-

पुत्री-  
कामिता.

॥ ४२ ॥

कामित्तणेण पयावइत्ति नामं कयं । अण्णया य सो विस्सभूई महासुकदेवलोयाओ चविऊण उववण्णो मिगावइए  
देवीए गम्भंमि पुत्तत्ताए, तओ सा रयणिंमि सुहपसुत्ता सत्त महासुमिणे पासित्ता णं पडिवुद्धा, पहिठ्ठहियया य गया  
रण्णो सगासे, निचेइओ सुविणवुत्तंतो, रत्ता भणियं-देवि ! निच्छियं भुवणविक्षायजसो सयलसामंतमउलिमंडल-  
मसिणियकमकमलो पयावपडिहयपडिवक्खो कुलकेऊ तुह पुत्तो भविस्सइ । जेण-

एवंविह सुमिणाइं देवि ! पुण्णेहिं कहवि दीसंति । हरिसभरनिम्भरंगी अभिनंदसु ता तुममिमाइं ॥ १ ॥  
इइ जंपिऊण रण्णा वाहरिया सुमिणपाढगा कुसला । ते य नरिंदाएसं तहत्ति पडिवज्जिउं सहसा ॥ २ ॥  
ण्हाया कयवलिकम्मा परिहियसुविसुद्धसुंदरदुगुल्ला । सिरनिहियक्खयकुसुमा निडालकयरोयणातिलया ॥ ३ ॥  
करकलियनिमित्तागमपोत्थयसत्था समत्थनयनिउणा । पज्जायागयविज्जा समागया झत्ति निवभवणं ॥ ४ ॥  
सीहासणेसु सन्वायरेण उववेसिया नरिंदेणं । फलफुल्लदाणपुव्वं सुमिणत्थं पुच्छिया ताहे ॥ ५ ॥  
तेहि य निमित्तसत्थाइं वित्थरेणं सवुद्धिविहवेणं । परिचिंतिऊण तह निच्छियं च काऊण अण्णोऽण्णं ॥ ६ ॥  
भणिओ पयावइनिवो जहेरिसाणं विसिद्धसुमिणाणं । अणुभावेणं नूणं पयडो नीसेसभुवणंमि ॥ ७ ॥  
तिक्खंडभरहसामी अप्पडिहयसासणो य तुह पुत्तो । होही अप्पडिमवलो इह पढमो वासुदेवोत्ति ॥ ८ ॥  
आयन्निऊण एवं पहिठ्ठचित्तेण ते नरिंदेण । दाऊण धणं विविहं विसज्जिया नियनियगिहेसु ॥ ९ ॥

श्रीगुणचंद  
महावीरच०  
३ प्रस्तावः

॥ ४३ ॥

सा य मिगावई देवी पुणोऽवि नरिदेण कहिए सुमिणपाठगसिट्टे सुमिणट्टे पहिट्टहियया सुहंसुहेणं गन्धमुयहइ,  
अण्णया य पडिपुण्णंमि समए पसत्थंमि वासरे सुकुमारपाडलपाणिपल्लवं तमालदलसामलसरीरं सयलपुरिसप्पवरल-  
क्खणविराइयं तिपिट्टकरंडगाडंवरभिरामं दारयं पसूया । विण्णायसुयजम्भो पहिट्टो पयावई, कराविओ सुरमं-  
दिरेसु महुसवो, तथा—

दिज्जंतऽनिवारियकणयदाणनंदिज्जमाणमग्गणयं । पम्मुकपुण्फपुंजोवयाररेहंतरायपहं ॥ १ ॥

मंगलकलयलमुहलुम्मिलंतमहिलाजणाभिरमणिज्जं । पारद्धसंतिकम्मं जायं नयरं च तं सहसा ॥ २ ॥

अवरवासरे य तस्स दारयस्स परमविभूईए तिपिट्टकरंडगदंसणनिच्छियाभिहाणवीएण पडिट्टियं तिविट्टुत्ति  
नामं कुलथेरीजणेणं, अह सो तिविट्टू पंचधाईपरिक्खित्तो महारयणं व हत्थाओ हत्थं संचरंतो अणेगचेडचाडुकर-  
परिगओ कुमारभावमणुप्पत्तो,

ताहे पिउणा जोगोत्ति जाणिउं सोहणे तिहिमुहुत्ते । उवणीओ सो विहिणा लेहायरियस्स पडणत्थं ॥ १ ॥

सयलो कलाकलावो अकालखेवेण गुरुसयासाओ । नियवुद्धिपगरिसेणं सविसेसो तेण गहिओत्ति ॥ २ ॥

अह सुणियसव्वनायव्वचित्थरो गुरुपए पणमिऊण । तदणुण्णाओ कुमरो गओ सगेहंमि परितुट्ठो ॥ ३ ॥

अयलेण भाउणा सह खणमविय विओगमसहमाणो सो । पवरुज्जाणाईसुं निस्संको कीलइ जहिच्छं ॥ ४ ॥

पृगावत्याः  
व्रजाः वि-  
पुष्टजन्म च.

॥ ४३ ॥

कोमलकायस्सवि तस्स भुयवल् पेक्खिज्जण जायमया । पमिलाणवयणकमला सहस्समळावि कपेति ॥ ५ ॥  
 लीलाएविदु पयपंकयाइ सो जत्थ जत्थ मेलेइ । वज्जोहयव्व धरणी तहि तहि थरहरइ वाढं ॥ ६ ॥  
 परिहासेणवि जे तेण पांडिया कंदवि मुट्टिघाएणं ॥ ते नूनं जइ परगेहिणीं पुत्तेहिं जीवन्ति ॥ ७ ॥  
 सिवइ य जत्तो दिट्ठिं तत्तो वियं सांथरं विणयपणयां । अहमहमिगांए धावन्ति किंकरा मुक्कवावारा ॥ ८ ॥  
 जस्सापसं वियरइ थेवंपि अणांयेरेणं वि कुमारो । सो लद्धनिहाणो इव मन्नइ कयकिंचमप्पाणं ॥ ९ ॥  
 सो भणइ जत्थ ठाणे तत्थ समप्पन्ति सेसवावारा ॥ तस्सेव परक्कगवण्णणेण लोयस्स पुणरुत्तं ॥ १० ॥  
 इय पुट्टभयजियंसुकंयकम्मवसवट्टमाणसोक्खस्स । अयलसमेयस्स सरन्ति वासरा अह तिंविट्ठुस्स ॥ ११ ॥  
 इओ यन्नायगिहो नये भारहंद्धवसुंधराहिवमणिमंडकोडिलीढपायवीढो पयलकालमायंडमंडलुडामरपयावकंतदि-  
 तिचको निविंसंकभुयदंडमंडयनिलीणरायलच्छिविलाससुंदरो संमरसीमनिहयमत्तमायंगकुंभत्थलगलियमुत्ताहलविरइ-  
 यचउको महागोपुरपरिहसन्निहवाहुवद्धवीरवलओ निसियधारुक्कडंचकनिकंतियवइरिंगीवो आसंगीवो नाम राया  
 पडिवासुदेवो पवरं पंचप्पयाररमणिज्जं विसयसिरिमणुहवइ । एवं च वोलंतमि काले सो विसाहनंदी कुमारो चिरं  
 रज्जमणुपालिज्जण मजो समाणो नरयतिरिणसु भमिज्जण उववण्णो एगंमि गिरिकंदरे सिंहत्तणेणं पमुक्कवालभावो  
 य इओ तजो हिंउत्तो उवइवेइ तस्सं रण्णो पहाणसालिछेत्तनिवासिकरिसंगजणे ते य तेण उवइविज्जमाणा आ-

गया आसग्गीवनरिंदस्स सगासे, साहिओ सीहवइयरो, इमं च वागरियं जहा-देव ! इमाओ कयंतविब्भमाओ  
सिंहाओ न रक्खह अम्हे ता करिसावेह नियळेत्ताई, अम्हे अन्नत्थ वच्चिस्सामो, राइणा भणियं-भो भो किमेवं का-  
यरा होह?, तहा करेमि जहा न मणागंपि पीडइ एस दुट्ठसत्तो, तओ निरूविया जहक्कमं सोलसवि सहस्सा नरिंदाणं  
सीहपसरपडिक्खलणत्थं, गया य पहिट्ठा करिसगा सट्ठाणंमि । अण्णया य आसग्गीवो सुरसुंदरीविब्भमंमि अंतेउरी-  
जणे वेसमणधणाइरेगे कोसविभवे अणण्णसरिसे करितुरगाइरज्जंगे सुरवइसमंमि आणाइस्सरिए अचंतं मुच्छिओ  
गिद्धिओ चिंतिउमारद्धो-किं मण्णे एरिससमग्गसामग्गीपरिवुडस्स परेण मणेणवि अणभिभवणिज्जस्स निचंपि अप्प-  
मत्तचित्तअंगरक्खपरिक्खेवस्स अणुसुमरणमेत्तकरतलपाउब्भवंतअप्पडिहयगइचक्काउहस्स ममावि संभवेज्ज कोइ वि-  
णासकरणपच्चलोत्ति?, जइ ताव तं जाणेमि कहवि ता करेमि पडिविहाणं, रक्खेमि सवप्पयारेण अप्पाणंति संप-  
हारिऊण आहुओ नेमिच्छिओ, दावियमेगंते आसणं, निसन्नो सो तत्थ, सक्कारपुव्वं पुट्ठो य सव्वायरेण, जहा भद्द !  
नेमिच्छिय ! सम्मं चिंतिऊण साहेसु, कोऽवि अत्थि किं ममावि मच्चुकारी न वत्ति?, तेणवि य निमित्तवलेण अव-  
लोइऊण भणियं-देव ! पडिहयममंगलं, कहमणिट्ठं साहिज्जइ?, रत्ता वुत्तं-भद्द ! मा संखुब्भ, साहेसु जहापुच्छियं,  
नेमिच्छिएणं जंपियं-जइ एवं ता अत्थि तुब्भंपि मच्चुकारी, रत्ता कहियं-कहं सो नेओ?, तेण वुत्तं-देव ! जो सा-  
लिच्छेत्तसीहं वावाइस्सइ तुहसंतियं च नीसेसमंडलाहिवसम्माणट्ठाणं चंडवेगदूयं धरिसेही सो निच्छियं मच्चुकारी

जाणियवो, सवप्पयारेहिं रक्खणिज्जो य, एयमायन्निऊण रत्ता विसज्जिओ नेमिच्चिओ, सयंपि उवविट्ठो अत्थाण-  
मंडवे, पुच्छिया य अमच्चाइणो-अहो को संपयं नरवई दंडाहिवो कुमरो वा अतुलवलपरक्कमो सुणिज्जइत्ति, तेहिं  
भणियं-देव! तुम्हाणंपि सयासाओ कोऽवि अतुलवलो? जेण साहिज्जइ, महीए सूरमंडले पहवंतंमि. विप्फुरइ ता-  
रगगरुई?, राइणा भणियं-बहुरयणा वसुंधरा, किमिह न संभवइ?, मंतीहिं भणियं-देव! निच्छियं न सुणिमो,  
सवणपरंपराए पुण सुणिज्जंति-पयावइनरिंदस्स कुमारा अनन्नसरिसपरक्कमा लीलादलियसेससौंडीरवलांवलेवत्ति,  
एयमायन्निऊण राइणा भणिओ चंडवेगो-जहा भइ! गच्छतु. एयस्स राइणो सगासे साहेसु य तस्स अमुगं मम  
पओयणं, जं देवो भणइत्ति पडिच्छिऊण सासणं निग्गओ, गओ महया पुरिसपरियारेणं परिक्खित्तो पोयणपुरा-  
भिमुहं चंडवेगो । इओ य पयावइराया कयपवरसिंगारो परिहरियमहामुल्लदुगुल्लो कुमारपमुहपरियणाणुगओ अंते-  
उरमज्झे ठिओ चिडइ, वट्टइ य तत्थ पेच्छणयं, केरिसं?—

विविहंगहारविन्भमविचित्तकरणप्पओगरमणिज्जं । रणझणिरमंजुमंजीरमणहरारावसंवलयं ॥ १ ॥

दढदेहायासवसुच्छलंततुटंतहारसरिविसरं । भूभंगविन्भमुब्भडपसरियवहुहावभावभरं ॥ २ ॥

कलयंठकंठगायणपारद्धविसुद्धतारगेयसरं । ताडियपडुपडुम्मिस्समंजुगुंजंतवरसुरवं ॥ ३ ॥

इय एरिसंमि तरुणीजणस्स नट्टंमि संपयट्टंमि । अदिट्ठरुवपुवे संपन्ने परमरंगे य ॥ ४ ॥

श्रीगुणचंद  
महावीरचं  
३ प्रस्तावः

॥ ४५ ॥

सुत्तव चित्तलिहियव लेवघडियव रज्जुनद्धव । मइरामयनिप्फंदियव विमुक्कऽन्नवावारा ॥ ५ ॥  
अणमिसनयणनिवेसा जणपरिसा तक्खणेण सा जाया । अइतुट्ठ तिविट्ठुकुमार रायलोएण सह झत्ति ॥ ६ ॥  
एत्थंतरे खीरोयनिम्महणपजंतुट्ठियविमुग्गारोव कंपियविबुहसत्थो कयंतोव अणिवारियागमणो पविट्ठो सो चंड-  
वेगाहिहाणो दूओ, तं च दट्ठूण ससंभममुट्ठिया, सामिदूओत्ति कलिऊण कया महती पडिवत्ती, पुट्ठो य आसग्गीव-  
नरिंदस्स सरीरारोग्गवत्तं, सिरसा पडिच्छियं सासेणं, संवरियपेच्छणगवावारो नियनियगेहेसु गओ जणो, रंगभंग-  
करणेण य वाढं अमरिसिओ तिविट्ठुकुमारो, पुच्छिओ अणेण एगो पुरिसो-अरे ! को एस ? किं वा एयागमणेण अब्भु-  
ट्ठिओ ताओ ? कहं वा पविसमाणो दुवारेचियं न रुद्धो पडिहारेण ? तेण भणियं-कुमार ! एसो खु रायाहिरायस्स पहा-  
णदूओ, अओ सामिद्वदट्ठवोत्ति राइणा अब्भुट्ठिओ, अओचिय पडिहारेणवि न खलिओ, एयाणुवित्तीए चेव सुहेणेत्थ  
निवसिज्जइ, पभुचित्ताणुवत्तित्तणं हि सेवगधम्मो, कुमारेण भणियं-जाणियवं कोऽवि कस्सवि पभू सेवगो वा, होउ  
ताव किं एएण ? अनिवडियपुरिसायांराणं विफलो अत्तुक्करिसो निरत्थओ तुंडमंडवो अणुचिओ भुयवलावलेवो अजुत्तो  
नेवत्थफडाडोवो, ता एयं एत्थ पत्तकालं-अरे ! साहेज्जसु तुमं मम जया एसो सनयराभिमुहं वचेज्ज, जेण करेमि  
एयस्स पाहुन्नयं, जं कुमारो आणावेइत्तिभणिऊण अब्भुवगयं पुरिसेण, सो य दूओ गुणदोसे राइणा समं भासिऊण  
साहियनरिंदपओयणो परिगहियविविहपाहुडो कयसक्कारसम्माणो चलिओ सनयराभिमुहं, अंतरा य गच्छंतो

दूतागमः  
नृत्यभंगश्च.

॥ ४५ ॥

विनायगमणयइयरेणं पडिरुद्धो ति विदु कुमारेणं अयं लंपरिगणं, भणिओ य—

रे दूयाहमं ! अइदुद्धं धिदु पाविदु कत्थ वैचिहिसि । पेच्छणयरंगभंगं तइया काउं मम समक्खं ? ॥ १ ॥  
निब्भग ! गरुयराउलसेवणं ओऽविदु पभूयकालेणं । पत्थावां पत्थावं न मुणंसि किं सिक्खिओ तंसि ? ॥ २ ॥  
नियजण ! वयणविनासपमुहगुणवित्थरेण उवहससि । सक्केगुरुं पि विदु कुहं अत्रेव वियहिमा तुज्झ ? ॥ ३ ॥  
ता पाव ! पावसु फलं सदुद्धवेद्वियतरुस्सं दुव्विसहं । सुमरेसु य इदुदेवं माऽकयधम्मो धुवं मरसु ॥ ४ ॥  
इयं भणिऊण ति विदु निदुरमुद्विप्पहारमुगिरिउं । जां हणइ नेवं दूयं अयलेणं जंपियं ताव ॥ ५ ॥  
भो भो कुमार ! विरमसु गोहचंपिव पिसुं च एयवहं । दूया रंडा भंडा कयावराहावि अहणणिजा ॥ ६ ॥  
ताहे भणिया पुरिसा ! रे रे सिग्घं इमस्स पावस्स । मोत्तुण जीवियं वं सेसं अवहरहं वत्थाइं ॥ ७ ॥  
पुरिसेहिं तओ कुमरस्स वयणओ लट्ठिसुद्विपभिईहिं । गहिऊण तं समत्थं धणाइयं अवहडं तरस्स ॥ ८ ॥  
भयंभरविदुरत्तणओ नियंसियं वत्थमवियं से गलियं । भूमीए निवेडणेणं धूलीए धूसरियमंगं ॥ ९ ॥  
अहं खमणंगोव मुणिउव्वं पंडरंगोव्व तक्खणं जाओ । सो चंडवेगदओ नियजीवियरक्खणट्ठाए ॥ १० ॥  
सेसो पुण परिवारो जीवियकंखी य पहरणे मोत्तुं । सयलदिसासु पलाणो दंसणमेत्तेऽवि कुमरस्स ॥ ११ ॥  
एवं च लुंचविलुंचियं काउं दूयं वलिया कुमारा, जाणिया य वत्ता पयावइणा, तओ भीउव्विगो चित्तिउमाढत्तो—



श्रीगुणचंद  
महावीरच०  
३ प्रस्तावः

॥ ४६ ॥

अहो असोहणं कयं कुमारेहिं, एयंमि पडिकूलिए परमत्थेण आसग्गीवो पडिकूलिओ, अजहावलमारंभो मूलं विणा-  
सस्स, न य कुमारावरद्धे मम निदोसत्तणं वयणसएणवि कोऽवि पडिवज्जिही, पडिवज्जिएवि पयडो खलु एस वव-  
हारो जं भिच्चवराहे सामिणो दंडो, ता विसममावडियं, अहवा अलं चिंतिएण, उवाओ चेव उवेयस्सं साहगोत्ति-  
निच्छिऊण आणाविओ दूओ, सविसेसं कया पडिवत्ती, समप्पियाइं महामोलाइं पाहुडाइं, कओ य चउग्गुणो  
दाणक्खेवो, भणिओ य एसो—अहो महायस! वालभावसुलभनिव्वियत्तणेण जोवणवसविसंतुलचिद्धियत्तणेण राय-  
कुलजम्मसहयदुल्ललियत्तणेण य जइवि वाढं अवरद्धं कुमारेहिं तुम्ह तहावि सवहा न कायवो चित्तसंतावो, न वो-  
ढवो अमरिसो, मम निव्विसेसोऽसि तुमं, डिंभदुव्विलसियाणि न करिंति चित्तपीडं कहवि जणगत्थाणीयस्स, अहं  
जणगो चेव एएसिं, उत्तरोत्तरगुणपगरिसारोहणं पुण तुमए इमेसिं कायव्वं, ता कुणसु पसायं परिहरसु अवमाणं,  
दूएण भणियं—महाराय! किमेवमाउलो भवसि?, किं कोऽवि नियडिंभेसु दुव्विणयमासंकेइ?, पेमपरवसहियएसु  
वा एगमवि अवराहं न मरिसेति?, राइणा भणियं—एवमेवं, जाणामि तुज्झ चित्तवित्तिं लक्खेमि पडिवन्नभरधवल-  
त्तणं, केवलं तहा कायव्वं जहा देवो कुमारवइयरं न निसामेइ, इइ भणिए पडिवज्जिऊणं चलिओ चंडवेगो, कमेण  
गच्छंतो पत्तो आसग्गीवनरिंदसमीवं,

अह पुवागयनरकहियकुमारवइयरनिसामणा रुसिओ । आवद्धभिउडिभीमो रत्तच्छो पेच्छिओ राया ॥ १ ॥

चण्डवेगा-  
वमानं क्षा-  
मणादि च.

॥ ४६ ॥

नायं च जहा पुवागएहिं सिद्धो स वइयो रत्नो । ताहे कयण्णामो उवविट्ठो सो नियट्ठाणे ॥ २ ॥  
 पुट्ठो य तओ रत्ना कहिओ नीसेसवइयो तेण । जह कुमरोहिं पइओ अयाणमाणेहि निरवेक्खं ॥ ३ ॥  
 जइविट्ठु देवऽवरद्धं वालत्तणओ सुएहिं मम किंपि । तहवि पयावइनिवई अहिगं सोगं समुव्वहइ ॥ ४ ॥  
 चूडामणिघ सीसेण सासणं तुम्ह घरइ विणयनओ । निभिच्च(व्भंत)भिच्चभावं सविसेसं दंसइ सयावि ॥ ५ ॥  
 न मुणिज्जइ जुवईणं मंजीररवो कयावि तस्स गिहे । मागहलोएणं तुह गुणनिवहं संथुणंतेण ॥ ६ ॥  
 किं बहुणा ? महिवइणो मए सुदिट्ठा कया समग्गावि । किं तु नियसामिभत्तीए तुलइ नो कोऽवि तेण समं ॥ ७ ॥

अह आसग्गीवनरिंदेण सुमरियं नेमिच्चिगवयणं परिकंपिओ मणेणं, चित्तियं च-अहो निव्वडियं ताव एगं नेमिच्चि-  
 गवयणं, वीयंपि जइ इत्थमेव हवेज्ज ता निच्छियं अकुसलंति परिभाविऊण आहूओ अवरो दूओ, भणिओ य जहा-  
 गच्छसु रे पयावइस्स सगासे, भणसु य तं मम वयणेण-जेण सालिच्छेत्तेसु करिज्जमाणेसु सबलवाहणो गंतूण केसरिं  
 परिक्षलहत्ति, जं देवो आणवेइत्ति भणिऊण निग्गओ दूओ, कमेण पत्तो पयावइस्स भवणं, सक्कारिओ रण्णा, पुट्ठो  
 य आगमणपयोयणं, साहियं च तेण सीहरक्खणरूपं नरिंदसासणं, अब्भुवगयं च पयावइणा, सट्ठाणे य पेसिऊण  
 दूयं एवं उवालद्धा कुमार—

पुत्ता ! अकाल एव हि तुम्हेहिं पवोहिओ धुवं मच्चू । आसग्गीवनरिंदस्स धरिसिओ जमिहं सो दूओ ॥ १ ॥

श्रीगुणचंद  
महावीरच०  
३ प्रस्तावः

॥ ४७ ॥

तेणेव अयंडे चिय दारुणरूवा इमा ममावडिया । आणा कयंतविभमपंचाणणरक्खणाणुगया ॥ २ ॥  
कुमारेहिं भणियं-ताय ! कहं मच्चू पवोहिओ ? , रत्ता भणियं-पुत्ता ! सुणेह, आसग्गीवनरिंदस्स सालिखेत्तस्स केसरी  
करिसंगजणं विह्वेइ, सो य पइवरिसं वारोवारणण जहकमं सवनरिंदेहिं रक्खिज्जइ, संपयं पुण धरिसियदूयकुविण्ण  
आसग्गीवेण अपत्थावेचिय अहं समाइट्ठोऽमि, ता एयं मच्चुए पडिवोहणंति, तेहिं कहिज्जण समाठत्तं पयाणयं, एत्थं-  
तरे विन्नत्तं कुमारेहिं-ताय ! अम्हे वच्चाओ, रत्ता भणियं-पुत्तया ! वालया तुम्हे, न जाणह अज्जवि कज्जाकज्जं, ता विर-  
मह इमाओ अज्झवसायाओ, अहं सयमेव वच्चिस्सामि, तेहिं भणियं-सवहा मोकलह, गंतवमवस्समम्हेहिं, महंतमेयं  
कोज्जहलं, केरिसो सो केसरित्ति ? , राइणा भणियं-अरे पुत्ता ! हरिणं कमंडलनिकलंके कुलं समुप्पत्ती कुवेरसमइरेगो धण-  
संचओ अविगलं आणाईसरियं कलाकलावंमि विमलंमि विमलं कुसलत्तणं समत्थसुत्थत्थेसु पवीणआ नीसेसेसु पहरणेसु  
परमो परिस्समो य नीरूवमं वीरियं अप्पडिमा रूवलच्छी, एएसिमोगयरंपि उम्मग्गपवत्तणसमत्थं, किं पुण एगत्थ  
समवाओ ? , एयाणि य सच्चाणिवि तुम्ह संति, ता एएहिं हीरमाणाणं तुम्हाणं को पडिक्खलणकारी ? , जम्हा  
वद्धमच्छरा वेरिणो उस्सिंखला खला अविभावणिज्जागमाओ आवयाओ अच्चंतं पमत्तचित्ता य तुम्हे, न जाणिज्जइ  
केरिसो विचागो हवइ ? , अओ सुयह गाढग्गहंति, तेहिं भणियं-ताय ! हवउ किंपि, निच्छयं गंतवमम्हेहिं, तओ  
निवारिज्जमाणावि चलिया कुमारा पहाणराइणा समेया कइवयकरितुरयरहपरियणपरियरिया, पत्ता य तेसु सालिच्छे-

सिंहरक्षणा-  
देशः हठात्  
कुमार-  
गमनं.

॥ ४७ ॥

तेसु जत्थ सो केसरी नियसइ, पुढा य तेहि करिसगा—अरे किह अत्रे राइणो पुर्वि सीहं रक्खियाइया?, तेहि भणियं—  
कुमार! पयंडगुडाडोवभासुरेहि पंवरकुंजरेहि पवणाइरेगवेगसुंदरगेहि जच्चतुरंगेहि उडुंडगंडीवसेल भलिनारायकुतपमु-  
हपहरणहत्येहि सुहडसत्येहि विरइऊण तिउणपायारपरिक्खेवं अचंतमप्पमत्तचित्ता मरणमहाभयवेवंतसवंसरीरा केस-  
रिगुहामुहनिहियानिमेसनयणा रक्खंसु नराहिया, तहा रक्खमाणाणवि पइक्खणं सीहनायवससमुच्छलंतपडिसइयायन्न-  
णेण अवगणियतिक्खंकुसपहारा करडितडणट्टमयजला विहडंति करिघडा गाढखलितखलिज्जमाणाइ विदिसो  
दिसिं फट्टंति तुरयघट्टाइ विमुक्कपोरिसाभिमाणाणि इट्ठदेवयमणुसरमाणाणि सवओ पलायंति पायकाणि, कुमारेण  
भणियं—अहो महापरकमो अहो अनन्नविप्फुरियं वीरियं अहो ओहामियंसयलसुहडदप्पमाहप्पं अहो सुवणच्छ-  
रियं चरियं तस्स केसरिणो जं तिरियमेत्तस्सवि एवं परिसंकिज्जइ, अरे केत्तियं पुणं कालं एवंविहपरिकिलेसेण एस  
पडिक्खलिज्जइ?, तेहि भणियं-कुमार! जाव सयलंपि करिसणं ण सगिहे पविसइ, कुमारेण भणियं—भो करिसगा!  
को यासारत्तदुघिसहसीयवायाभिहओ नियसुहिसयणपमुहपहाणलोयरहिओ चिक्खल्लोलमि मेइणितले मेहमालाउले  
दिसिवलए अणवरयं निवडंतीसु दिसिवह्मुत्तामणिहारविन्भमासु मुणीणंपि कयमयणवियारासु तंडवियसिंहडिमंड-  
लीसु विरहिणीहिययनिहित्तंगारासु वारिधारासु एत्तियं कालं पडिवालेहि?, ता दंसेह तं पएसं जत्थ सो निवसइत्ति,  
जं कुमारो आणावेइत्ति भणिकुण दूरट्टिएहि चेव कहिया सा केसरिगुहा, तओ पुणो पुच्छिया कुमारेण-अरे! केत्तिओ

श्रीगुणचंद  
महावीरच०  
३ प्रस्तावः

॥ ४८ ॥

तस्स परिवारो?, तेहिं भणियं-कुमार! नियसरीरमेत्तो, कुमारेण भणियं—जइ एवं ता  
निरत्थयं धी धी वित्थरंति किं पत्थिवा विगयलज्जा । नियभुयवलावलेवं गिज्जंतं मागहजणेण? ॥ १ ॥  
बहुसुहडकोडिसंबुडहरिकरिसंमददलियमहिवट्ठा । असहायं केसरिणं जमिमे न सरंति भयविहुरा ॥ २ ॥  
एसो जयंमि धन्नो जणणी एयस्स चेव पुत्तमई । जस्स गलगज्जिएणवि गरुयावि मुयंति नियजीयं ॥ ३ ॥  
जस्सऽनिवारियपसरं पोरिसमेवंविहं परिप्फुरइ । एगागिणोऽवि स कहं न लहंइ पंचाणणपसिद्धिं? ॥ ४ ॥

इय सुचिरं तं पसंसिऊण गरुयकोऊहलाऊरिज्जमाणमाणसो नियत्तियसेसपरियरो रहवरारूढो चलिओ गुहा-  
भिमुहं कुमारो, कमेण य स पत्तो गुहादेसं, एत्थंतरे दंसणकोउगेण मिलिओ बहुलोगो, ठिओ उभयपासेसु,  
कओ महंतो कोलाहलो, अहं कलयलायन्नणजायनिदाविगमो जंभाविदारियरउद्वयणो परिभुत्तकुरंगरुहिरपाडलु-  
ग्गारदाढाकडप्पेण संझारुणससिकलं व विडंवमाणो पडिधुणियकडारकेसरो सदुब्भडकंधरो उविल्लिरमहल्ललंगूलवेलि-  
ताडियधरणितडाराववहिरियदियंतरो पढमपाउसमेहोव गज्जंतो उट्ठिओ केसरी, लीलाए मंदं मंदं कुमारहुत्तमव-  
लोइउं पवत्तो य, तिविडूवि निरुवयंतो फलभरेण य सस्सं निसुणंतो केयाररक्खिगाजणरासए करेंतो तस्सालावं  
पेच्छंतो काणणरम्मयं ताव गओ जाव निवडिओ चक्खुगोयरे स सारंगाहिवो, तं व ददूण चिंतियं कुमारेण—अहो  
एस महाणुभावो महीए चरणेहिं परिसक्कइ, अहं पुण पवरतुरयसंपग्गहियं विचित्तपहरणपडिहत्थं रणज्झणिरकिंकिणी-

सिंहेन यु-  
द्धम् शौ-  
र्यस्य काष्ठा,

॥ ४८ ॥

जालसंपरिखितं संदणं अधिरुढो, ता विसरिसं जुज्झं, न जुत्तमेयं उत्तमाणांति भावितो कुवियकयंतजीहाकरालं  
 अयसिकुसुमप्पगासं करवालं गहिऊण दाहिणकरेण वामेण य पडिपुण्णचंदमंडलविन्ममं फुरंतफारतारगाभिरामं फरगं  
 च ओयरिऊण रहाओ ठिओ भूमीए, ताहे पुणोऽवि चित्तेइ-एस वराओ वयणंतरनिगूढदाढाकरपेरंतकुंठकुडिलनह-  
 मेत्ताउहो अहं तु तिव्खग्गखग्गफलगहत्यो, एयमवि न जुत्तिजुत्तंति विभाविऊण खग्गं फलहगं च परिचयइ, एत्थं-  
 तरंमि दद्दूण तारिसं यइससं तिविदुस्स उप्पन्नगाढकोवो सीहो चित्तेउमाढत्तो—

कह मत्तमहामायंगतुरयरहजोहवूहरयणेणं । रक्खिज्जंतोऽहमहो महायरेणं महीवइहिं ॥ १ ॥  
 कह मज्झ दंसणपहे कीणासस्स व न कोइ निवडंतो । सुदुवि पणिद्वलदप्पिओऽवि रणकम्मरसिओऽवि ? ॥ २ ॥  
 कह एण्हि दुद्धमुहो तत्थवि णवणीयकोमलसरीरो । तत्थविय तुरगकरिवरपकलपाइकपम्मुको ? ॥ ३ ॥  
 तत्थवि य अयन्नाए ओयरिऊणं रहाओ पवराओ । अडुवियडं लीलाए भासमाणो महिंमि ठिओ ॥ ४ ॥  
 तत्थेव य सभुयवलावलेवमुक्कप्पहरणाडोवो । मसगं व मं गणंतो एसो पविसइ मम गुहाए ॥ ५ ॥  
 किं वा जीवंतहिं नो दीसइ किं सुणिज्जए नेव । जं एरिसावि दावेंति संपयं मज्झ अचमाणं ? ॥ ६ ॥  
 जइवि हु कुंजरसिरदारणोचिया मज्झ कुडिलनहविसिहा । तहविडु इमस्स दंसेमि गाढदुब्बियणसाहिफलं ॥ ७ ॥  
 इय चित्तिऊण गलगज्जियरवेण फोडितोव वंभंडभंडोयरं, पुच्छच्छडाच्छोडणेण दलितोव मेइणीतलं, विडंविय-

श्रीगुणचंद  
महावीरच०  
३ प्रस्तावः

॥ ४९ ॥

वयणदाढामऊहनिवहेण भरंतोव्व गयणंतरालं रत्तनयणपहासरेण अयंडनिवडंतविज्जुदंडुडामरं व करंतो दिसिचक-  
वालं वेगागमणवसविसंदुललुलंतकेसरभारेण अंतरे अमायंतं व कोवनिवहं उगिरंतो सज्जियदीहरकमुल्लासवसवि-  
सेसखामोयरत्तणेण अंतरा तुट्टिऊणं व अग्गकाएण गसिउकामो एगहेलाए भुवणजणकवलणकए कयंतुव्व भासमाणो  
झडत्ति पत्तो तिविड्डुकुमारस्स मुणालकोमलकरकमलगोयरं, तओ तिविड्डुणा एगेण करेण हेट्टिलोद्वुडं अवरेणुत्तरोट्ठं  
अणायरेण गहिऊण जिण्णपडं व परिसडियपंडुपत्तं व भुज्जतरुत्तयं व दुहा तडयडत्ति फालिऊण परिमुक्कोत्ति, एत्थं-  
तरे उक्किट्टसीहनाओ जयजयरवो य कओ लोएणं, अन्नं च—

गंधव्वजक्खरक्खसविज्जाहरकिन्नरोहिं गयणंमि । विक्रमदंसणसंजायहरिसपप्फुल्लनयणेहिं ॥ १ ॥

पहयाइं पडहकाहलमुयंगदुंदुहिपमोक्खत्तुराइं । कओ य जयजयरवो अहो सुजुज्झंति भणिऊण ॥ २ ॥

तियसंगणाहिं वियसियकुवलयदलदामदीहरच्छीहिं । मुक्का य कुसुमवुट्ठी दसद्धवन्ना भसलमुहला ॥ ३ ॥

मणिमडडकणयकुंडलकडिसुत्तयतुडियहारपमुहाइं । पवराभरणाइं लहुं सुरेहिं दिन्नाइं कुमरस्स ॥ ४ ॥

तथा—गिज्जंतुदामगुण विविहविलासुल्लसंतगोवजणं । नचंततरुणिसत्थं जायं रण्णंपि सुपसत्थं ॥ ५ ॥

सो य सीहो तथा दुहाकओऽवि गरुयाभिमाणेण परव्वससरीरो फुरफुरंतो विचित्तेइ—एवं नाम अहं निराउहेण  
एगागिणा कुमारेमेत्तेण अजुज्झेणं लीलाए विणिहओ, अहो मम काउरिसत्तणं अहो असामत्थं अहो निस्सारसरी-

सिंहमा-  
रणम्.

॥ ४९ ॥

रत्तणं अहो दइवविपरंमुहया, सब्बहा निरत्थयमुबूढो सारंगरायसहो एत्तियं कालं, दुहु दुहु एरिसजीविणंति, एवं  
च तस्स फुरुफुरायमाणस्स मुणियतदभिप्पाएण कुमारसारहिणा भणियं महुरसरेणं—

भो भो लीलानिहलियमत्तमायंगपुंगवसमूह ! । सारंगराय ! निप्पडिमसत्तिवित्तासियविपक्ख ! ॥ १ ॥

अविलंघियसज्जियकमनियवलपरिभूयनरवइसहस्स ! । संपुरिस ! कीस एवं निरत्थयं अमरिसं वहसि ? ॥ २ ॥

मा मुणसु जहा एएण बालरूवेण विणिहओऽहमिह । जं एसो नियकुलनहयलेक्कचंदो जणाणंदो ॥ ३ ॥

वररायलक्खणधरो समग्गवीरग्गणी गुणावासो । निदुरभुयदंडवलो तिविहुनामो वरकुमारो ॥ ४ ॥

भावी भरहद्धवसुंधराए सांमित्तणेण परिकहिओ । पढमं चिय सुमिणंयपाढएहिं किर वासुदेवोत्ति ॥ ५ ॥

तं मिगसीहो भइय ! एसो पुण नरसमूहसीहोत्ति । सीहे सीहेण हए का अपसिद्धी ? किमवमाणं ? ॥ ६ ॥

अह सो केसरी इमाणि सारहिवयणाणि महुमिव अमयंपिव सवणपुडएहिं सम्मं पाऊण उवसंतचित्तो मरिऊण  
नरगे नेरइओ उववन्नो । सो य किर सारही एस काले भगवओ महावीरस्स पत्ततित्थयरत्तस्स पढमो गणहरो  
गोयमनामो भविस्सइ । तिविहुकुमारोऽवि तं सीहचम्मं गहाय पट्टिओ सनयराभिमुहं, गच्छंतेण य भणिया करि-  
सगा, जहा—रे इमं केसरिचम्मं गेणिहऊण समप्पेज्जह घोडयगीवराइणो, भणेज्जह य तं जहां—वीसत्थो निब्भओ  
भुंजेसु सालिभोयणं, जायं संपइ अणावाहंति- । पडिवन्नं च करिसगेहिं, तिविडूवि गओ सनयरंति, पयावई पण-



श्रीगुणचंद  
महावीरच०  
३ प्रस्तावः

॥ ५० ॥

मिऊण कहिओ सयलवुत्तंतो, जाओ पुरे पमोओ । ते य करिसगा गया आसग्गीवसयासे, निवेइओ पयावइसुय-  
विणासियसीहवइयरो, एवमायन्निऊण य खुभिओ मणंमि राया, चिंतिउमाढत्तो-अहो पडिपुत्रं नेमितिगाइडं संपइ  
संविहाणगदुगं, ता निच्छियं पयावइसुआओ मम भयं, किं पुण कायवं?, निवडइ इयाणिं जमरायस्स दंडो, विहडइ  
सुदढगुणरज्जुनिगडियावि रायलच्छी, विलोडंति दाणमाणवसीकयावि सेवगा, विवरंमुहे विहिंमि किं किं न वा  
होइ?, केवलं अज्जवि न मोत्तव्वा बुद्धिपुरिसयारा, जेण एएहिं भाविणोऽवि अणत्था उवहणिज्जंति गलियाओवि  
संपयाओ पुणरवि पाउव्ववंति, तम्हा न जुत्तमुवेक्खणं, जावज्जवि लहुओ वाही ताव चिगिच्छणिज्जो, नहि लहु-  
ओत्ति जलणफुलिंगो न डहइ केलासगिरिगरुयंपि दारुरासिं, न वा परिव्वविज्जमाणोवि दिट्ठिविसभुयंगपोयगो न  
विणासं पयच्छेज्जा, ता इमं पत्तकालं-ते पयावइसुए उवलोभपुव्वयमिह आणावेऊण विस्संभिऊण य दाणसम्माणा-  
ईहिं विणासाविज्जंतित्ति संपहारिऊण य तेसिं आणयणनिमित्तं वाहरिओ दूओ, भणिओ य-अरे पयावइं एवं भणि-  
ज्जासि-तुमं हि असमत्थो सेवाए, ता सिग्घं कुमारे पेसेहि जेण तेसिं इयरा सामंतमुत्ती दिज्जइ, जइ पुण न पेसेसि  
ता जुज्झसज्जो होज्जाहित्ति, जं सामी आणावेइत्ति पडिवज्जिऊण निग्गओ नयराओ दूओ, कमेण य पत्तो पोयण-  
पुरं, दिट्ठो राया, कयसक्कारो उवविट्ठो आसणे, पुच्छिओ य पयावइणा आगमणकारणं, तेण भणियं-राया आस-  
ग्गीवो आणवेइ-तुमं जराजज्जरियसरीरो अचंतं परिणयवओ आएसदाणाणुचिओ य ता पेसेसु नियसुए जेण ते

अश्वग्रीव-  
भयं आन-  
यनादेशः,

॥ ५० ॥

सहत्येण पूणमि, वरकरितुरगनगरागरगामदाणेण य करेमि गरुयदेसाहिवे, एवमायन्निऊण चिंतियं पयावइणा-अतु-  
लबलो आसग्गीवो दुराराहणिज्जो असमिक्खयतिक्खदंडनिवाडणदुविसहो य, अदिट्ठपरभयां य मम कुमारा, विसे-  
सेण तिचिट्ठत्ति विभाविऊण भणिओऽणेण दूओ-भइ ! कुमारा न मुणंति सेवाविहिं न जाणंति वत्तव्वविसेसं न लक्खंति  
उचियाणुचियं न खमंति नरिंदाएसमणुट्ठिउं, ता अहं सयमेव सबलवाहणो सामिसालं ओलगिस्सामि, तेण भणियं-न  
एस आपसो पभुस्स, किं वा तुज्झ इमिणा मुणीणंपि दुक्करेण सेवाधस्मेण ? उवभुंजसु निरंतरमंतेउरमज्झगओ जहि-  
च्छियं विसयसोक्खं, कुमारावि तत्थ गया सपहुपसाएण जइ पाउणंति रायलच्छि ता किमिव अक्कलाणं तुह हवे-  
ज्जा ?, जओ देवो आसग्गीवो सीहवइयरनिसामणेण परमंसंतुट्ठहियओ काराविउं इच्छइ महामंडेलोवभोगं आरोविउं  
समीहेइ समुच्चपीलुखंधे काराविउं वंछइ पाणिग्गहंणंति, राइणा विचिंतियं-अहो एस दूओ इंदवारुणीफलंपिव  
वाहिं रमणीयं अन्भितरदुहविवागं उभयरूवं भासइ, ता सबहा दुहावहमेयं, सम्मं परियालोयणिज्जं, अइरहसकय-  
फज्जाइं पज्जंतदारुणाइं हवंतीति निच्छिऊण पेसिओ दूओ निययआवासे, ठिओ सयमेगंते, वाहराविया विसमत्थनि-  
णयकरणतिक्खवुद्धिणो मंतिणो, सुहासणासीणा य भणिया-अहो आसग्गीवो मम एवमाणवेइ-कुमारे सिग्गं  
पेसेहिति, ता साहेह किमिह करणिज्जं ?, मंतीहिं भणियं-देव ! उद्दामपरक्कमो गूढमंतप्पयारो य आसग्गीवो, तुम्हे

श्रीगुणचंद  
महावीरच०  
३ प्रस्तावः

॥ ५१ ॥

पुण तस्सेव सेवगा अणवरयं आणानिद्देसवत्तिणो अप्पवला य, ता को तेण सह विरोहो?, ससत्तीए अणणुरूवकोव-  
करणं हि निदाणं विणासस्स, राइणा भणियं—जइ एवं ता पेसिज्जंतु कुमारा, मंतीहिं भणियं—देव! असंजायवला  
सेवाविहिअणभिन्ना य कहं पेसिज्जंति?,

अन्नं च—जइविहु अइविसमत्थप्पसाहणे होज्ज कहवि लच्छीवि। तहविहु भुयंगभीमे विलंमि न खिवेज्ज कोऽवि करं ॥ १ ॥

अमुणियगम्मागम्मप्पयारमविगलियकलुसदोसं च। नरवइचित्तं सलिलं व कुणइ निन्नेसु नूण रइं ॥ २ ॥

कप्पासकणिकाणं व सा णो परकज्जसाहिगा सेवा। उभयत्थविणासणकारिणी उ सेवा नरिंदाणं ॥ ३ ॥

जह भणियविहाणपरमुहाण पुरिसाण सिढिलचित्ताणं। दुस्साहियव्व विज्जा विणासमचिरा कुणइ सेवा ॥ ४ ॥

इय देव! नत्थि कुमराण जोग्गया काऽवि सामिसेवाए। ता संठवेह दूयं सिणेहवग्गूहिं वग्गूहिं ॥ ५ ॥

इइ वुत्ते पयावइणा आहूओ नरिंददूओ, भणिओ य सामवयणेहिं, जहा—भइ! गच्छ तुमं साहेसु आसग्गी-  
वस्स, अणुचिया तुम्ह सेवाए कुमारा, पयावई सयमेव ओलग्गिहित्ति, दूएण भणियं—भो पयावइ! किमेवं पित्त-  
पलाविओ इव पुणरुत्तं वाहरसि?, कुमारे पेसेसु, जुज्झसज्जो वा हवसु, एस देवस्स आएसोत्ति भणिऊण निग्गओ  
दूओ, अंतरे य दुवयणायन्नणेण रुट्ठेण तिविहुणा कुमारेण निट्ठुरलट्ठिमुट्ठिप्पहारोहिं हणिऊण कंठे घेत्तूण य अवहारेण  
निद्धाडिओ, पत्तो य कमेण आसग्गीवनरिंदमंदिरं, निवेइओ निस्सेसो पयावइवइयरो, तमायन्निऊण परिकुविओ

कुमारयोर-  
प्रेषणं.

॥ ५१ ॥

राया, सुभिया य सहा, कहं ?—

अणवरयविणितुहामसेयविंदुब्भडं मुहं सुहडो । परिमुसइ कोऽवि कोवुग्गमेण अहियं दुरालोयं ॥ १ ॥  
नयकुवलयमालाचिब्भमंमि निम्मलपहंमि करवाले । निवडइ य भमररिंछोलिसच्छहा कस्सविय दिट्ठी ॥ २ ॥  
परपक्खक्खोभकरिं कोवसिहाडंवेण भयजणणिं । पच्चक्खं नियसत्तिं व कोऽवि सत्तिं करे धरइ ॥ ३ ॥  
कस्सवि निडालवद्धं रेहुक्कडभिउडिभंगदुप्पेच्छं । खयसमयसमुग्गयराहुमंडलं सहइ गयणं व ॥ ४ ॥  
केणावि कुलिसनिट्ठुमुट्ठिपहारेण ताडिया धरणी । अविणीयधारणेणं कयावराहव कंपेइ ॥ ५ ॥  
संभावियरणरसनिस्सरंतरोमंचपीवरकरस्स । चिरपरिहियाइं कस्सवि विहडंति य कणयकडयाइं ॥ ६ ॥  
कोऽविहु मच्छरसंभारतरलियं वयणभासेणसयण्हं । कट्ठेण दसणदट्ठोद्वसंपुडेणं खलइ जीहं ॥ ७ ॥  
इय जाया कोवभरुलसंतदेहाण विविहकिरियाओ । संगामसंगमुकंठियाण सुहडाण तवेलं ॥ ८ ॥

एतथंतरे भणियं आसग्गीवेण—अरे उवेक्खियाणं दुरायाराणं एस चिय गई, को तस्स दोसो?, अन्नहा—  
नियधूयापरिणयणावराहकालेऽवि जइ तमहं निगिण्हंतो ता किं एवं पसरं लंहंतो, तहा—जो नियधूयं कामेइ  
सो नियसामिंपि दुहइ किमजुत्तं? । किं वा एएण?, इयाणिंपि विणिवाएमि एयं महापावकारिणं, ता रे ताडेह  
पत्थाणविजयढकं, पगुणीकरावेह कुंजरसाहणं, संजत्तावेह तुरयघट्टाइं, जोत्तावेह संदणगणं, वाहरावेह समंगं

श्रीगुणचंद  
महावीरच०  
३ प्रस्तावः

॥ ५२ ॥

नरवइवग्गंति, वयणाणंतरमेव कयं पगुणं सयलं किंकरजणेण, एत्थंतरे गओ राया मज्जनधरं, परमविभू-  
ईए कयं मज्जनं, नियंसियाइं कासकुसुमसुंदराइं अंवराइं, वद्धाइं केसेसु सुरहिकुसुमाइं, कओ सवंगिओ चंदणर-  
सेणंगरागो, विहिओ पुरोहिणण असिवोवसमनिमित्तं संतिकम्मविही, खित्ता दोवक्खया सिरे, पइट्ठिओ पुरओ मंगल-  
कलसो, दंसियं वयपुण्णभायणं, लिहिया अट्ठमंगलया, उवणीओ य आधोरणेण सिंगारियसरीरो सिंदूरपूरारुणकुंभ-  
त्थलो गंडयलगलंतमयजलो वइरिदलणदुद्धरो जयकुंजरो, तंमि आरूढो आसग्गीवो, धरियं फारफेणपुंजुज्जलं नियप-  
रिमंडलविजियपडिपुण्णचंदमंडलं लंवंतमुत्ताहलकलावावचूलयं सियायवत्तं, ठिया य उभयपासेसु चामरग्गाहिणीओ,  
वज्जियाइं दिसिकुंजरगलगज्जिगंभीराइं भंभासुगुंदमदलढक्कापमूहतुराइं, ठिओ पत्थाणंमि पत्थिवोत्ति । एत्थंतरे—

चलंतकण्णचामरा पयंडदप्पदुद्धरा, गलंतगंडमंडला तमालनीलसामला ।

अलंघणिज्जविक्रमा महागिरिंदविब्भमा, रणंतवद्धवंटया महागयाणुपट्टिया ॥ १ ॥

पलंवपुच्छसोहिया असेससिक्खगाहिया, सुवेयतुट्ठसामिणो समीरवेगगामिणो ।

विसिट्ठलक्खणंकिया परेण नो निरिक्खिया, दिणिंदवाइविब्भमा पयट्टिया तुरंगमा ॥ २ ॥

विचित्तचित्तबंधुरा महाउहोहनिब्भरा, जओवलंभपचला रणंतकिंकिणीकुला ।

निलीणभूरसत्थया पगिट्ठकेउमत्थया, दुसज्झवेरिमहणा पवाहिया पसंदणा ॥ ३ ॥

अश्वग्रीव-  
प्रयाणं,

॥ ५२ ॥

सरासिचक्रधारिणो विषक्खसूरदारिणो, ससामिभत्तिमंतया अईव जुत्तिजुत्तया ।

जएकलाभलालसा अचिंतणिज्जसाहसा, सरीरवद्धकंकडा पयट्टिया महाभडा ॥ ४ ॥

अह लाडचोडमरहट्टकच्छकालिंगपमुहनरवइणो । आणामेत्तेणं चिय समुज्झियासेसनियकज्जा ॥ ५ ॥

सन्नद्धवद्धकवया बहुपहरणसालिणो जयपसिद्धा । आसग्गीवसयासं पत्ता सयलेणवि वलेणं ॥ ६ ॥

एवं च समग्गसंवाहगे जाए दवावियं रण्णा पयाणयं, चलिओ खंधावारो, गच्छंताण य सहसचिय समुच्छलियं  
खरसमीरणंदोलणेणं, निवडियं छत्तं भग्गो दंडो गयणंगणाओ फारफुलिंगंदारुणा पडिया उक्का, दिवसेचिय उल्लसिया  
तारया, जायं रुहिरवरिसं, निरब्भंमि चेवअंवरे फुरिया सोयामणी, अविण्णायसरूवो तडत्ति विहडिओ जयकुंजरो, नि-  
त्रिमित्तं चिय जलणजालाकलावेण कवलियाइं जचतुरंगमपुच्छाइं, परिगलिया सयमेव भग्गदंडां जयपंडाया, जाया य  
पलीणमयजला हत्थिमंडली, अणवरयरेणुवरिसदुरालोयं विच्छाइभूयं दिसाचकं, अंसुप्पवाहो मुक्को देवयापडिमाहिं,  
परोप्परं हसियाइं चित्तकम्मरूवाइं, उट्टमुहेहिं दीणस्सरं परुत्तं सारमेएहिं, एवमाईणि उप्पन्नाणि बहूणि असिवाइंति ।

ताहे असिवनिरिक्खणसंजायमहाभया कुसलमइणो । आसग्गीवणरिंदं भणन्ति विणओणया सचिवां ॥ १ ॥

देव ! हिमं व विलिज्जइ पयावमेत्तेण तुम्ह पडिवक्खो । किमकंडविडुरकरो पारद्धो समरसंवाहो ? ॥ २ ॥

तुह तुरयखरखुरुद्धुययपडलेणं पणट्टकरपसरो । सूरौवि अंतरिज्जइ को अन्नो जो परिप्फुरइ ? ॥ ३ ॥

श्रीगुणचंद  
महावीरच०  
३ प्रस्तावः

॥ ५३ ॥

ता सुयह विजयजतं नयराभिमुहं लहुं नियत्तेह । असिवोवसमनिमित्तं कीरंतु य होमजागाई ॥ ४ ॥

नहु एरिस असिवेहिं कोसलं किंपि देव ! पेच्छामो । पूरिजंति किमेवं सत्तूण मणोरहा धणियं ? ॥ ५ ॥

एवमाइन्निऊण भणियं रत्ता—भो भो किमेव वाउलत्तणं तुब्भे निन्निमित्तं पडिवत्ता?, किं न सुणह मम भुय-  
दंडपरकमं? न वा सुमरह चिरपभूयसमरसम्मद्विद्वियपडिवक्खसंपत्तविजयं? न वा पेच्छह अपरिकलियसंखं भरिय-  
निणुन्नयमहिविभागं महोदहिसलिलंपि व चाउदिसिं पसरियं चाउरंगं वलं?, किमिव अट्टाणे चिय भायह, किं वा  
सनयराभिमुहं मं नियत्तावेह?, न हि पारद्धवत्थुपरिचाइणो सलहिजंति पुरिसा, न य तहाविहसंदिद्धकइवयअमं-  
गलमेत्तेणवि खुब्भंति वीरा, जओ—

गहगणचरियं सुमिणाण दंसणं देवयाण माहप्पं । सुणखररसियप्पमुहा सउणा य तहा जणपसिद्धा ॥ १ ॥

उक्कानिवडणरुहिराइवरिसपमुहाइं दुन्निमित्ताइं । सवाइं घुणक्खरसंनिभाइं को तेसि भाएज्जा? ॥ २ ॥

ता धीरा होह, निवाडेमि नीसेसदुन्निमित्तसत्थं मत्थए पयावइस्स, इति भणिऊण विसुमरियनिमित्तिगवयणो  
अवस्संभवियव्वयाए विणासस्स पडिकूलयाए देवविलसियस्स वारिज्जमाणोऽवि पुराणपुरिसेहिं पडिखलिज्जमाणोऽवि  
कुसउणेहिं सोवरोहं नियत्तिज्जमाणोऽवि अंतेउरजणेण छत्तभंगं सुणाविज्जमाणोऽवि निमित्तपाडगेहिं सयलवलसमेओ  
गंतुं पयट्ठो, कमेण य पत्तो सदेससीमासंवत्तिणं रहावत्तपवयदेसं, तहिं च खंधावारनिवेसं कारावेऊण वाहराविओ

दुर्निमित्तेषु  
मन्त्रिशिक्षा.

॥ ५३ ॥

दूओ, भणिओ य-अरे गच्छसु पयावइस्स सगांसे, भणसु य तं-एस आगओ आसग्गीवो राया जुज्झसज्जो वट्ठइ, सिग्गं संमुहो एहि, कुमारपेसणेण संमाणं वा करेहि, मा अकालेच्चिय कुलक्खयं जणेषुत्ति, जं देवो आणवेइत्ति पडिच्छिऊण से सासणं नीहरिओ दूओ, कमेण य गओ पयावइस्स मूलं, कहिओ णरिंदाएसो, रुढो तिविट्ठुकुमारो, भणिउमाढत्तो य—

रे दूय ! तुममवज्झो निब्भयचित्तो ममोवरोहेण । घोडयगीवं गंतुं फुडक्खरं भणसु वयणमिमं ॥ १ ॥

मा होहिसि विगयभओ बहुपरिवारोत्ति चिंतितुं अचिरा । सीहोव मइसिलिं वं एस तिविट्ठु तुमं हणिही ॥ २ ॥

अज्जवि पयावइनिवो नियनामत्थं फुडं सुमरमाणो । रक्खइ तं जइ परिहरसि निट्ठुरत्तं वहसि पणयं ॥ ३ ॥

अहऽभिणिविट्ठुमईणं सुट्ठु भणियं पि दोसमावहइ । ता किं निरत्थएणं सिक्खादाणेण एएण ? ॥ ४ ॥

दूएण तओ भणियं अज्जवि दुस्सिक्खिया दढं तुम्हे । न मुणह देवस्स वलं तेणेवमसंकमुल्लवह ॥ ५ ॥

अह पयावइणा भणियं-भइ ! वच्च नियनरिंदसगासं, साहेसु य जहा-एस आगओ पयावइत्ति, एवमाइन्निऊण निग्गओ दूओ, राइणावि काराविओ सेन्नसंवाहो, तओ पक्खरिज्जंतदप्पियवग्गंततुरंगमं गुडिज्जंतगयघडं समरपरि-  
हत्युच्छंतफारफारक्कचकं चंडंगंडीवगुणज्झणकारसुहलुच्छलंतधणुद्धरं रहारूढपवरवीरं नाणाउहंत्यसमुत्थरंतसुहड-  
सत्थं चलियं चाउरंगं वलं, तेण य परिखुडो पयंडगुडाडोवभासुरकुंजरकंधराधिरूढो नीहरिओ पुराओ पयावई, एत्थं-



श्रीगुणचंद  
महावीरच०  
३ प्रस्तावः

॥ ५४ ॥

तरे नीलचलंतमहंततालज्झयाणुसारमिलियसामंतपरिगण पवलनीलीनीलयदुल्लनियंसणेण करयलफुरंतहलमुसल-  
पहरणेण संगामसंगमुकंखिरेण अयलकुमारेण अणुगम्ममाणमग्गो आमलगथूलमुत्ताहलहारेण गयणाभोगोव नहसुरस-  
रिपवाहेण सोहंतवियडवच्छत्थलो तरुणतरणिकिरणसन्निगाससिचयजुयलेण वडवानलजालाकलावेण जलरासिव  
रेहंतदेहो सवणकयकणयकुंडलकंतिपसरेण तक्कालसंगमूसुयरायसिरिसरागतिरिच्छच्छिविच्छोहेहिं व भासमाणवयणो  
पुरो पइट्टियरणलट्टिनिविट्टुकणयकविलगरुलकंतिपडलच्छलेण कोवं व उगिरंतो तिविट्टुकुमारो, सिग्घं गंतूण मि-  
लिओ पयावइनरिंदस्स, भणिउमाढत्तो य-ताय ! नियत्तह तुम्हे, देह ममाएसं, कित्तियमेत्तो एसो घोडयग्गीवो ?,  
अवणेमि तुम्ह पसाएण एयस्स धिट्ठसोंडीरयं, न य बहुसहाओत्ति संकणिज्जं, जओ भोयणमेत्तसहायिणो इमे,  
परमत्थेण एगागी चेव एसो, रायणा भणियं-पुत्त ! लीलाविहाडियसमुक्कडकेसरिकिसोरस्स अविगणियपडिवक्ख-  
लक्खस्स किं असज्झं तुह परक्कमस्स ?, केवलं दूरट्टिया कोऊहलपेच्छगा एत्थ अम्हे, कुमारेण वुत्त-एवं होउ,  
अह विसिट्ठसउणोवलंभवहंतपरितोसाणं अणवरयपयाणगेहिं वच्चंताणं तोसिं तस्स रहावत्तपव्वयस्स समीवे संप-  
त्ताणं अवरोप्परासन्नदंसणवसेण जाए हलवोले परिकप्पियपक्खरगुंडाडोवाइं उट्टियाइं तुरङ्गहत्थिसाहणाइं उड्डुयध-  
यचिंधाइं, संपलग्गाइं उभयवलाइं, तओ-ताडियसरतूरतुट्टजणं भयथरहरंतकायरगणं, उद्दामवंदिसदपढणुच्छहंतसु-  
हडं वरधूलिधूसरियरहधयवडं ॥ १ ॥ खरखुरूपकप्परियतुरयपक्खरियनियतुरयघट्टलोट्टावियकुंतयरं । आसवारकरु-

त्रिपृष्ठाच-  
लयोर्गमनं.

॥ ५४ ॥

क्खयतिक्खकरवालविदारियसूरसिरं गुंडियगुरुकरडिघडफोडियतुरयघट्टं अत्रोन्नमिलणजायनिविडसंघट्टं ॥ २ ॥  
 सरलसेलकलोलकीलिजंतकुंभपलायंतगयं सुन्नपुन्नहिंढंतचंडचंडुलहयं । तिसूलमल्लिसेल्लभिन्नवेलंतनरं, उत्तालनिवडियल-  
 त्तत्तधरं ॥ ३ ॥ दंतिदंतसंघट्टपयट्टानलकणं, उद्धवाहुनचंतकवंधपवन्धघणं । विप्फुरंतकुंतग्गघायघुम्मियरहियं, सारि-  
 मज्झजुज्झंतजोहघायदुविसहं ॥ ४ ॥ कुंभिकुंभघायसमुच्छलियरुहिरप्पवहं भूमिवट्टनिचेट्टपडियसमुत्तुंगमायंगरुद्धपहं ।  
 महल्लच्छभल्लभल्लुकमुक्केफकारभीसणं, संगामरसियसुहडलोयतोसणं ॥ ५ ॥ काऊण(दंडपडण)विचित्तसमरवाचारं ॥  
 धाणुकदुकधाणुकयाहं, फारकियभडफारकियाहं । कुंतयरभिडियसमवग्गियाहं, खग्गाउहउक्खयखग्गियाहं ॥ १ ॥  
 पडिखलियतुरंगतुरंगमेहिं, मेल्लंतसेल्लभडदुग्गमेहिं । मयगलगिलंतमयगिण्णगंड, अम्मिदुपरोप्परवद्धसुंड ॥ २ ॥

पाउम्मवंतजइघोररोस खणिं खणिं विमुक्कभीसणनिघोस ।  
 चाउदिसि सुहड समोत्थरेवि पहरंति समरि नियपाण देवि ॥ ३ ॥  
 नाणाउहहत्यनरिंदवग्ग अवरोप्परजुज्झितसंपलग्ग ।  
 गयजीविय निवडहिं दंडनाह, पवहंतरुहिरपहजुय अगाह ॥ ४ ॥  
 सेसारुणञ्चुरणवद्धकच्छु, मह दंसह आसग्गीवु हत्थु ।  
 इय जंपिरु रिउ पडिसत्तुराओ, एत्थंतरि पडियहरंतु आउ ॥ ५ ॥  
 तो वंगकलिंगनगराहिवेहिं, जुगवं चिय मुक्कमहाउहेहिं ।

श्रीगुणचंद  
महावीरच०  
३ प्रस्तावः

॥ ५५ ॥

पडिखलियउ पयावइ जुज्झमाणु, साहुव जाओ परिचत्तुमाणु ॥ ६ ॥  
आसग्गीवह सेनेण अइवहुसंखेण हरिकरिसंदणदुद्धरेण ।  
निम्महिय परकमु पहणिय उज्जमु कयउ पयावइ तक्खणेण ॥ ७ ॥  
मुणिवि तं निज्जियं जायकोवुग्गमो, भिउडिभीमाणणो पायडो नं जमो ।  
अयलु पयलंतहलमुसलदिवाउहो, सिग्घवेगेण सत्तूण ठिओ संमुहो ॥ ८ ॥  
तयणु चिरलद्धजयवायगव्वुद्धुरा, ते नरिंदा समुवूढदढमच्छरा ।  
सेल्लनारायसरनिरयमेलंतया, अयलपासंभि वचंति वग्गंतया ॥ ९ ॥  
हरिसभरतडयडुत्तुट्टकंकडगुणो, सोयते पेच्छिउं बाढमखुभियमणो ।  
जंपए रे लहुं चयह चक्खुप्पहं, कीस वच्चह विणा कारणं जमगिहं ? ॥ १० ॥  
किं न भो नियह मह लंगलं सियसिहं, कुवियकीणासजीवं व अइदुस्सहं ।  
वइरिवच्छत्थलीविलिहणुडामरं, जस्स कंतीहिं अरुणिज्जए अंवरं ॥ ११ ॥  
किं न वा मुसलमलिवलयकसिणप्पहं, धरणिमणिसारपरमाणुनिम्मियमुहं ।  
जयह तुब्भे जमेवं रणे उज्जया, तेहि वुत्तं अरे तुज्झ का चंगया ? ॥ १२ ॥

त्रिपुष्पाश्व-  
ग्रीवयो-  
र्युद्धम्

॥ ५५ ॥

जेण दीसंति तुह सन्निहा हालिया, घरइ लीलाएँ मुसलंपि किल महिलिया ।

एवमुलाविरं वइरिसत्थं बलो, सरइ वेगेण करकलियसियलंगलो ॥ १३ ॥

केऽवि मुट्ठिप्पहारेण ताडइ भडे, अवरि मुसलेण चूरइ सहावुम्भडे ।

हलसिंहगेण केसिंपि उरु दारण, अन्नि चलणप्पहारेण मुसुमूरण ॥ १४ ॥

एकघाएण पाडइ महाकुंजरे, तणयपूलं व गयणे खिवइ रहवरे ।

मुयइ करुणाय परिचत्तसयलाउहे, ठाइ निग्गयपयावोऽवि नो से मुहे ॥ १५ ॥

इय निट्ठुरगत्तेण निरुवमसत्तेण निट्ठुरेण बलदेवेण बलु बलु विरियहं ।

तक्खणि विद्धंसिओ भडमंड नासिउ सयलदिसामुह पसरियहं ॥ १६ ॥

एवं चिय पइदिवसं दोण्हवि सेन्नाण जुज्झमाणाणं । विविहप्पयारभीमं एयं जायं समरठाणं ॥ १७ ॥

एगत्य पडियनरवइपियंगणाकरुणरुन्नरवभीमं । अन्नत्थ वंदितज्जणसवडंमुहचलियपडिसुहडं ॥ १८ ॥

एगत्य दंतिदसणग्गभिन्नसूरासिलेहहयरहियं । अण्णत्थ भीयकायरनियमुहखित्तंगुलीवल्यं ॥ १९ ॥

एगतो ऊसियकरमाहूयऽण्णोण्णवीरवरपुरिसं, अवत्थोमिठविण्णट्ठमिठपरिभमियगयनिवहं ॥ २० ॥

एगत्युत्तालिमिलंतघोरवेयालविहियहलवोलं, अन्नत्थ सिवागणखज्जमागगयजीवनरनिवहं ॥ २१ ॥

श्रीगुणचंद  
महावीरच०  
३ प्रस्तावः

॥ ५६ ॥

एगत्तो दंसणतिक्खचक्कछिजंतमहिगयजणोहं, अन्नत्तो भडतोसियमागहगिजंतवरचरियं ॥ २२ ॥  
इय विहियविविहभीसणकिरिएहिं उभयसेन्नसुहडेहिं । समरंगणं सुराणवि जायं अचंतमयजणगं ॥ २३ ॥  
किं च—रणट्टाणनिवडियकण्णसीसकरचरणजंघतणुखंडं । विहिणो घरं व नज्जइ जयजणघडणुज्जयमइस्स ॥ २४ ॥  
एवं च बहूइं वासराइं महासम्मद्देण निवाडियाणेगसुहत्थिसु तिक्खनारायनिन्मिन्नकुंभिकुंभत्थलेसु, चुरियचारु-  
तुंगसिंगरहवरेसु सुसुमूरियनरवइसहस्सेसु जायंतेसु आओहणेसु पेच्छिऊण बहुजणक्खयं तिविट्ठुणा भणाविओ  
दूयवयणेण आसग्गीवो, जहा—किमणेण निरत्थएणं निदोसपरियणक्खएणं?, तुमं च अहं च परोप्परवद्धवेरा, ता  
अंगीकरेह नियभुयवलं, सम्मं ठवेहि चित्तावट्टंभं विमुंच कायरत्तं परिचय परपुरिसायारं दावेहि सहत्थकोसलं मेळेहि  
सरीरसोकुमलं पगुणो भवाहि असहाओ मए एगागिणा सह जुज्झिउंति, सम्ममवधारिऊण गओ दूओ, निवेइओ  
आसग्गीवस्स कुमारसंदेसगो, पडिवन्नो य राइणा, जाए वीयदिवसे विचित्तपहरणपडिहत्थं जोत्तियपवरतुरयं  
सारहिमेत्तपरियत्तपरियरं संदणमारुहिऊण ओइण्णा रणभूमीए आसग्गीवतिविट्ठुणो, ठियाइं उभयपासेसु सपहुपरक्क-  
मावलोयणकोऊहलाइं दोन्निवि वलाइं, रुंदखंदचंडिकोहंडिपमुहदेवउवजाइयसयदाणपरायणाइं निलीणाइं उच्चपएसेसु  
अंतेउराइं, पेक्खणुकंखिरा य गयणंगणमोगाढा सुरकिंनरकिंपुरिसविज्जाहरा, लंवंतमुक्कजडाडोवो पाणिपरिग्गहिय-  
छत्तगो संगामदंसणुवूढगाढहरिसो पइक्खणअट्टट्टहासे सुयमाणो देवसमूहं च सोवओगं कुणमाणो वियंभिओ अंतरे

त्रिपृष्ठाश्व-  
ग्रीवयो-  
र्युद्धम्.

॥ ५६ ॥

नारयमुणी । एत्थंतरे आसग्गीवेण भणिओ तिविद्ध—

गिरिगुहनिवाससि(खि)त्रे रोगजराजजरंगए सीहे । निहए करुणाठाणे अहो तुमं वलमयं वहसि ॥ १ ॥  
किमहं तं न समत्थो विणासिउं पढममेव लीलाए । किं तु मयमारणे अवयंसो सिया तेण नो हणिओ ॥ २ ॥  
जइ कहवि दुद्धवयणोत्ति कलिय नो सिक्खविंति तं कुसला । किं एत्तिएणऽवि मुहा परंमुहो सुंदर ! नयस्स ॥ ३ ॥  
सयं चिय न कयंतो कुद्धो विद्वइ करचवेडाए । किं तु दुबुद्धी दाउं परस्स हत्थेण मारेइ ॥ ४ ॥  
जं चिय किंचि परूढं बाहुवलं तुज्झ नरजणम्महियं । पक्खुम्भेओव पिवीलियाण तंपि हु वहट्ठाए ॥ ५ ॥  
धेरस्स पयावइपत्थिवस्स पुत्तच्छलेण तं भइ ! । नूणं विणासपिसुणो समुग्गओ धूमकेउव ॥ ६ ॥  
ताहे तिविद्धुणा सो भणिओ बुहुत्तणस्स तुह पढमो । पाओ पाउम्भूओ दुव्वयणुल्लावरूवो किं ? ॥ ७ ॥  
किं वा सन्निहियकयंतसंगसंजायनिट्ठुरसहावो । निम्मेरं थेर ! समुल्लवेसि वन्नसि समाहण्णं ॥ १ ॥  
रणकसवट्ठयनिवडियपवरसोडीरिमासुवण्णस्स । अत्तुकरिसो सोहइ नरस्स वन्निज्जमाणोऽवि ॥ ९ ॥  
ता संवरेसु वयणं खणमेकं अंतरे परिभमंतु । तुज्झ महच्चिय वाणाऽरिपक्खमहणा महावेगा ॥ १० ॥  
आसग्गीवेण पुणो भणिओ डिंभोत्ति मज्झ नो घायं । दाउं खमंति हत्था ताहे पहरसु तुमं पढमं ॥ ११ ॥  
तिविद्धुणा भणियं—भो घोडयग्गीव ! पुरा मम तायस्स तुमं सामिसइमुवहंतो ता तयणुवित्तीए चेव अणइकम-

श्रीगुणचंद  
महावीरच०  
३ प्रस्तावः

॥ ५७ ॥

णिज्जवयणोऽसि अओ अवहिओ होहि एसा निवडइ कयंतदिट्ठि व दुविसहा विसिहपरंपरत्ति भणिऊण आयन्नमा-  
कट्ठिय कोयंडं रणज्झणाविया पडंचा, मुक्का सलोहा मम्मावेहिगा खलालिं व निडुरा सरधोरणी, तओ आसग्गीवेण  
धणुवेयकुसलयाए अद्धमग्गमपत्तेच्चिय खंडिया तिकखलुरुप्पेहिं, पुणरवि कुमारेण भिच्चोव्व सपक्खो निरवेक्खगामी  
खित्तो नारायनिवहो, सोऽवि निप्पुण्णजणमणोरहोव्व पडिखलिओ आसग्गीवेण, किं बहुणा?—

जं जं सत्थं किंपिवि खिवइ नरिंदस्स संमुहं कुमरो । तंतं आसग्गीवो दक्खत्तणओ पडिक्खलइ ॥ १ ॥

आसग्गीवोऽवि पयंडकोवओ मुयइ पहरणं जमिह । वेज्जोव्व रोगजायं कुमरोऽवि तयं पडिहणेइ ॥ २ ॥

अह भरहवाहुवल्लिणोव्व गाढममरिसभरेण पहरंता । खयसमए राहुसणिच्छरव रेहंति ते दोऽवि ॥ ३ ॥

एवं परोप्परं जुज्झिराण तेसिं पगिट्ठदप्पाणं । सचराचरावि धरणी धरहरिया पयभरकंता ॥ ४ ॥

एत्थंतरंमि अणवरयखिवणओ पहरणुच्चओ सव्वो । आसग्गीवनरिंदस्स निट्ठिओ सुकयरासिव ॥ ५ ॥

ताहे किंकायव्वयवाउलचित्तेण खेयविहुरेण । अविभग्गपसररिउदप्पदंसणुवूढकोवेणं ॥ ६ ॥

आवयधणं व दढपणयचित्तमित्तं व पियकलत्तं व । विसमावडिएणं नरवरेण संसुमारियं चक्रं ॥ ७ ॥

अह जलणुब्भडपसरंतकिरणमालासहसपलवियं । जुगविगमुग्गयमायंडचंडमंडलयदुप्पेच्छं ॥ ८ ॥

रुद्धजमारुणनयणं व मिलियनीसेसविज्जुपडलं व । आसग्गीवस्स झडत्ति चक्करयणं करे चडियं ॥ ९ ॥

त्रिपृष्ठाश्व-  
ग्रीवयो-  
र्युद्धम्.

॥ ५७ ॥

तयणंतरं च पहरिसतडत्तितुदंतवम्मबंधेण । तेण विमुकं वहणद्वयाए सिग्घं तिविदुस्स ॥ १० ॥

गंतुं कवाडवियडे वच्छयले तं जवेण कुमरस्स । चिरदंसणुस्सुयं वल्लहं व तुंवेण संलग्गं ॥ ११ ॥

एत्थंतरंमि दडचकतुंवसंघट्टघायवियलंगो । मुच्छानिम्मिलियच्छो पडिओ धरणीयले कुमरो ॥ १२ ॥

आसग्गीववलेणं ताहे संपन्नवहुपमोएणं । जयजयसहुम्मिस्सो पकओ कोलाहलो सहसा ॥ १३ ॥

तथा—जाव य उग्गीरियविविहपहरणां नावडंति सत्तुभडा । ताव तिविदुक्कुमारेण तक्खणं विगयमुच्छेणं ॥ १४ ॥

भो घोडयगीव ! गओऽसि नासमहुणत्ति संलवंतेणं । तं चिय तस्साभिमुहं मुकं चकं झलहलंतं ॥ १५ ॥

तो तं तालफलंपिव तडत्ति छेत्तूण तिकखधाराए । आसग्गीवस्स सिरं करे ठियं पुण तिविदुस्स ॥ १६ ॥

जह निहयंमि आसग्गीवे हरिसवसविसप्पमाणसमुचरोमंचेहिं सहसच्चिय जयजयरवं करंतेहिं सुरासुरेहिं सरसपा-  
रियायतरुमंजरीनियरसंवलिया सोरभभरगंधलुद्धमिलंतभसलजालमुहला अणवरयविणिंतामंदमयरंदविंदुसंदोहविच्छु-  
रियसयलदिसा कमलकुवलयमालइपमुहा मुक्का पंचवन्नकुसुमवुट्ठी, उग्घोसियं च महया सहेण जहा—भो भो पत्थिवा !  
परिचयह कोवकंडुं मुयह दुब्बहदुघिणयपणयं परिहरह आसग्गीवपक्खवायं उज्झह असज्झावारं पणमह सघायरेण  
तिविदुं, एसो सु एत्थ भरहखेत्ते समग्गवलवंतपुरिसप्पहाणो पुब्बभवसमुवज्जियसुकयसंभारवसविसप्पमाणमहल्लक-  
लाणनिहाणो उप्पन्नो पढमो वासुदेवोत्ति । एवं च आयत्तिरुण संभंतविलोयणेहिं दूरपरिमुक्कपहरणपबंधेहिं अहमह-



श्रीगुणचंद  
महावीरच०  
३ प्रस्तावः

॥ ५८ ॥

सिगाए पडिक्खलंतमणिकिरीडकोडिमसिणियकमनहनिवहेहिं भालयलघडियकरसंपुडेहिं पंचंगपणिवायपुरस्सरं  
पणमिओ पत्थिवसहस्सेहिं तिविडू । विन्नत्तो य—

देव ! परायत्तेहिं जुत्ताजुत्तं अयाणमाणेहिं । अम्हेहिं जमवरद्धं तमियाणिं खमह नीसेसं ॥ १ ॥

कुणह पसायं नियचरणनलिणसेवापयाणओ अम्हं । मोत्तूण तुमं एकं अन्नो नो विज्जए नाहो ? ॥ २ ॥

एयमायन्निऊण तिविडुणा भणियं—भो भो नरेसरा ! किमेवं जंपह ? को तुम्ह दोसो ?, परायत्तचित्ताणं एस-  
च्चिय गई, ता मुयह पडिभयं, पसंतडिंवडमराइं भुंजह नियनियरज्जाइं, मम छत्तच्छायापरिग्गहियाण पुरंदरोऽवि न  
पहवेइ तुम्हाणंति । एत्थंतरे तिविडुसेवोवगयनरवइवग्गावलोयणसंपन्नासग्गीवविणासनिच्छयं समागयं तं पएसमं-  
तेउरं, दिट्ठो छिन्नगलनाडिनिस्सरंतरुहिरपंकविलुत्तगतो रत्तचंदणकयंगराओव्व उवरि परिब्भमंतपि सियासिपक्खि-  
निवारियरविकरपसरो धरियमहप्पमाणत्तोवमंव सन्निहिनिवडियपहाणपुरिसवग्गो अत्थाणगओव्व आ सग्गीवनरिंदो ।  
अह अदिट्ठपुव्वं अचंततिकखदुक्खावहं तारिसमवत्थंतरं से पासिऊण अकंदिउमारद्धमेवमंतेउरं—

हा हा कयंत ! निक्करुण ! किं तए पाव एवमायरियं ? । जं एवंविहपुहईपहूऽवि एसो हयास हओ ॥ १ ॥

किं एत्तियाहिं निहयाहिं तुज्झ तित्ती न सुहडकोडीहिं । उप्पन्ना निप्पुन्नय ! जमेस रायावि संहरिओ ॥ २ ॥

हे चक्क ! निक्खिव ! कहं सपहुविणासाजसो तए विहिओ ? । तुब्भेहिऽवि किं जक्खा ! उवेक्खियं निग्घिणा एयं ? ॥ ३ ॥

त्रिपृष्ठस्य  
जयः अश्व-  
ग्रीवान्तः पु-  
रविलापः

॥ ५८ ॥

हे काल ! बद्धवरवंसजाय तुज्झवि गुणेण किं तेण ? । हा हा रक्खामणिणो वीसत्थविणासगा तुम्हे ॥ ४ ॥  
 धी धी पुरोहियाहम ! चिरकालं तप्पियं तए जलणं । निलज्ज ! कहसु संपइ असिवं किं जं पडिक्खलियं ? ॥ ५ ॥  
 हे अंगरक्खवग्गा ! तुम्हेऽविहु कीस संपइ पलाणा ? । हा हा एगपए चिय सवंपि परंमुहं जायं ॥ ६ ॥  
 हा पाणनाह ! संपइ पडिहयपडिवक्खसुहडलक्खंमि । तुमए सग्गोवगए तडक्किही कस्स जयठक्का ? ॥ ७ ॥  
 हा रायलच्छि ! वेहव्वदूसिए कीस जीवसि इयाणिं ? । इहराणुहवसि दुक्खं दूभिज्जंती कुनाहेहिं ॥ ८ ॥  
 इय विलविरीहिं निइयताडियथणवट्टतुट्टहाराहिं । वेहव्वदुक्खभरंभज्जिरीहिं पल्हत्थवल्याहिं ॥ ९ ॥  
 अणवरयघोरगलियंसुवाहं रुन्नं तहा मयच्छीहिं । जह तद्देसगएणं रुन्नं पक्खीणवि गणेणं ॥ १० ॥  
 ताहेऽणुजीविणा परियणेण पम्मुकपोक्करुत्तेण । आसग्गीवसरीरं खित्तं जालाउले जलणे ॥ ११ ॥

एत्थंतरे अंतोउरीजणवेहव्वदुक्खमसहमाणोव्व पयंडरणकम्मदंसणभयभीओव्व तिकखासिखंडियहयरुंडावलोयणु-  
 त्तरहत्तरंगोव्व समीरणुदुयरुहिरसीयरासारसंसित्तोव्व आलोहियमंडलो झडत्ति चक्खुगोयरमइकंतो सहस्स-  
 किरणो, गवलगुलियालिवलयकज्जलतिमिरपडलपडकयावगुंठणा फुरंततारनयणा अणवरयनिवडंतउक्काफुलिं-  
 गुग्गारच्छलेण मणोइरित्तपरिपीयसुहडजणरुहिरगंडूसं व मुयंती महारक्खसिध्व भयजणणी पसरिया रयणी, ठिओ  
 नियनियट्ठाणेषु जणो, कमेण य जाए पहायसमए भणिया तिविट्ठणा नियपुरिसा-भो भो गच्छह संगामभूमिं,

श्रीगुणचंद  
महावीरच०  
३ प्रस्तावः

॥ ५९ ॥

निरुवेह पहारपरव्वसे जोहनिवहे करेह ओसहघायवंधाइणा परित्ताणं परिमग्गह दुट्टतुरंगमपल्हत्थिए पत्थिवेत्ति-  
सम्मं निउंजिऊण(अंतेउरेण)समं समग्गनरवइवग्गपरियरिओ समेओ पोयणपुरं, तओ नयरलोएण कयं वेजयंती,  
सहस्साभिरामं ठाणठाणनिवद्धमंचारूढविलासिणीनट्टरमणिज्जं पमुक्कसुरभिपुक्कपुंजोवयारकलियरायमग्गं पहयपडु-  
पडहपमुहजयतूरनियरं नयरं पविट्ठो महया विभूइए तिविट्ठू, जहोचियठाणेसु ठिओ सेसो परिवारो । तओ कइवय  
वासराइं तत्थ ठाऊण पुणोऽवि समग्गवलकलिओ चक्कलत्तधणुमणिमालागयासंखरयणपरिगओ निग्गओ दिसि-  
विजयनिमित्तं तिविट्ठू, कमेण पसाहियं भारहद्धखेत्तं, अपणयपुव्वा नामिया पत्थिवा, गाहिया सेवावित्तिं, गहियाइं  
तेहिंतो करितुरययणपमुहाइं पहाणपाहुडाइं, एवं च नीसेसमंडलाहिवसहस्साणुगम्ममाणमग्गो पेच्छंतो अपुव्वा-  
पुव्वनयराइं ठाविंतो अंगवंगकलिंगाइसु अन्नन्ननरिंदे पत्तो मगहाविसए, तहिं च दिट्ठा कोडिपुरिसवोज्झा महा-  
सिला, सा य भुयवलावलेवओ लीलाए वामभुयदंडेण उक्खिविऊण छत्तगं व धरिया सीसोवरिं, अतुलियवलावलोय-  
णहरिसुप्फुल्लोयणेहि य कओ नरवईहिं जयजयारवो, पढियं च मागहगणेहिं, कहं?—

देव ! मणालागारो तुज्झ करो कलियरुंदकोडिसिलो । सिरिधरियधरणिवट्ठस्स वहइ सेसस्स समसीसिं ॥ १ ॥  
तुह एवंविहलीलाइएण चित्तं न कंपए कस्स । जइ सव्वहावि पत्थरविणिम्मिओ होज्ज सो न जणो ? ॥ २ ॥  
इय मागहेहिं णेगप्पयारवयणेहिं संथुणिज्जंतो । मोत्तूणं कोडिसिलं चलिओ राया सपुरहुत्तं ॥ ३ ॥

त्रिखण्ड-  
साधनं  
कोटीशि-  
लोत्पादनं

॥ ५९ ॥

गच्छन्तो य पत्तो दंडगारन्नपरिसरं, तर्हि च खंधावारनिवेशं काञ्चन ठिओ कइवय वासराइं, एगया य रयणी-  
 मज्झनिम्भरपसुत्ते सेवगजणे अणुरत्तविरत्तपरिवारचारमुवलंभिउं करकलियचको कयवेसपरियत्तो अणुवलक्खिज्जमाणो  
 जामकरिघडारूढेहिं अंगरक्खेहिं नीहरिओ एगागी वासुदेवो निययगुडुराओ, अमुणियपयप्पयारो य इओ तओ  
 परिन्भमंतो जाव खंधावारनिवेशमइकमिऊण गच्छइ ताव निसामेइ थेवदेसंतरियं मंदं मंदं कोलाहलं, तं  
 च निसामिऊणुप्पन्नकोऊहलो पधाविओ तयभिमुहं, कमेण पत्तो एगं वहलतरुवरसंछन्नं काणणं, तर्हि च पत्तस्स  
 उवसंतो सो कोलाहलो, तओ किं विभीसिया एसा? मइविन्भमो वा ममेत्ति जाव चित्तेइ ताव काणणन्भंतराओ  
 समुट्ठिओ सदुक्खनरघणियसहो, तदणुमाणेण य पुणो पट्ठिओ तिविट्ठुं, अह वच्छत्यलविप्फुरंतकोत्थुभमणिमऊहवि-  
 द्दंसियंधयारे जाए तत्थ पएसे थेवंतरगएण हरिणा दिट्ठो रुक्खेण समं विविहबंधणवद्धो पुरिसो, (पुच्छिओ सो  
 उचियायरेण) भो को तुमं? केण वा इममवत्थंतरं पाविओसित्ति?, तेण जंपियं-महाणुभाग! निविडबंधणत्तणओ  
 न सक्केमि परिकहिउं, ता अयणेहि वंधे जेण साहेमित्ति कहिए तिविट्ठुणा चक्केण निकंतिया बंधा, जाओ वीसत्थो,  
 भणिउं पवत्तो य-अहो निक्कारणपरमबंधुव्व निसामेहि मम वित्तंतं, अहं रयणसेहरो नाम विज्जाहरो खूलावन्नसु-  
 दराइगुणावहिभूयाए सिंहलरायधूयाए विजयवईनामाए पुव्वं चियं वहुप्पयारपत्थणाहिं दिन्नाए परिणयणत्थं  
 संपयं समग्गसामग्गीसणाहो जाव तत्थ पट्ठिओ ताव एत्थप्पएसे संपत्तो समाणो वाउवेगाभिहाणेण वेरिणा चि-

श्रीगुणचंद  
महावीरच०  
३ प्रस्तावः

॥ ६० ॥

ज्जाहरेण सव्वस्समवहरिऊण दुक्खेण मरउत्ति विभावित्तेण एवं गाढं वंधिऊण चत्तोऽम्हि, तिविहुणा भणियं-तुमं विज्जाहरो होऊण कैण कारणेण भूमिगोयरधूयं उव्वोडुमिच्छसि?, तेण जंपियं-महाभाग! अपुव्वं किंपि से रूवं असरिसं च लायन्नंति, तिविहुणा चिंतियं-जइ सच्चं चिय एवंविहगुणोववेया सा ता मम जोग्गा परिणेउंति विभाविऊण भणिओ एसो-अहो तुमए उव्वूढावि एसा तेण वेरिणा हीरिही, ता किं निरत्थएण तदुवलंभेण?, विज्जाहरेण जंपियं-सच्चमेयं जइ तुम्ह सत्ती अत्थि ता तुब्भे परिणेह, परिचत्ता मए इयाणिं, पडिवन्नं तिविहुणा, कयप्पणामो गओ सट्ठाणं विज्जाहरो, हरिणावि सिंहलेसरं अणेगप्पयारेहिं पत्थिऊण परिणीया सा विजयवई धूया, आगओ य निययपुरं, पडिच्छिओ महारायाभिसेओ, जाया वत्तीसं सहस्सा जुवईणं-

अह निचपयट्ठविसट्ठगीयझंकारमिस्ससुवरवे । नडचेडचाडुकारयकिंकरनरनियरपरियरिए ॥ १ ॥

सुविभत्तचित्तविच्छित्तिमुंदरे मंदिरे निवसमाणो । अइपडिहयपडिवक्खं तिखंडभरहं च रक्खंतो ॥ २ ॥

भयवसनमंतसामंतमंडलो तरुणिसत्थमज्झगओ । आखंडलोव्व भुंजइ विसए पंचप्पयारेऽवि ॥ ३ ॥

नवरं विजयवईए नामंपिडु नेव गिणहइ तिविहु । ईसाविसायवसओ सा य पओसं समुव्वहइ ॥ ४ ॥

एवं वोळंतंमि काले अन्नयां नियमाहप्पनिहयदुब्भिक्खाइदुक्खनिवहो समागओ भयवं सेयंसत्तिथयरो, विरइयं देवोहिं विसालसालवलयपरिक्खित्तं विचित्तमणिमयसिंहासणाभिरामं भवभयत्तसत्तसंताणेक्कसरणं समोसरणं, तओ

विद्याधर-  
मोक्षःविज-  
यवत्युद्वाहः

॥ ६० ॥

सायरमिलंतसुरिंदसंदोहधुणिज्जमाणो उवविद्धो सिंहासणे जिणो, एत्थंतरे जिणागमणनिउत्तपुरिसेहिं वद्धाविओ तिचिद्ध,  
कहिओ जिणागमणवइयरो, तओ हरिसमरसमुल्लसंतरोमंचेण य दवावियं पीइदाणं सद्धुवालसकलहोयकोडीओ तेसिं  
पुरिसाणं, समग्गवलवाहणो अचलेण समेओ य गओ चासुदेवो वंदणवडियाए, लत्ताइच्छत्तपमुहं जिणाइसयमवलोइऊण  
परिचत्तसयलरायचिंधो दूराओ चिय पयचारेण गंतूण तिपयाहिणापयाणपुवयं जयगुरुं नमंसिऊण एवं थोउं पवत्तो—

जय संसारमहोयहिपडंतजणजाणवत्त ! जयनाह ! । परमसिक्खमोक्खकारण ! रणवज्जिय ! विजियमयमाण ! ॥ १ ॥

निम्महियमोहमाहप्प ! दुद्धकंदप्पदप्पनिहलण ! । मायाविसवल्लिविणासपरसु जय जय जयप्पवर ! ॥ २ ॥

जय संजमसिरिवल्लह कोहमहाजलणंसजलजलवाह ! । जय निम्मलकेवलकलियसयलजीवाइयपयत्थ ! ॥ ३ ॥

जय विणहुकुलंवरपुण्णचंद ! सुररायनमियपयकमल ! । निप्पडिमपसमवरपुरपायार ! गुणोहसाहार ! ॥ ४ ॥

जय करुणामयसारणिसरिच्छ ! निच्छिन्नकम्मदुममूल ! । दुहसेलदलणदंभोलिसरिसनामग्गहण ! देव ! ॥ ५ ॥

नाह ! तुह पायपंकयममंदमयनिवहकंतिमयरंदं । फुलंधयं व धण्णो सयाऽवितण्हो समल्लियइ ॥ ६ ॥

को तुह जिणवर ! वयणं जमयं व समत्थदोसहरणखमं । पाऊण कुतित्थियवक्ककलुससलीलं समीहेइ ॥ ७ ॥

जइविहु दूरमसारो संसारो तहवि देव ! तुम्हेहिं । विहरंतेहिं मुणिज्जइ सारो निब्बुइपुरीओऽवि ॥ ८ ॥

आसग्गीवाइनरिंदविजंयलाभाइ(भेऽवि)नेरिसो नाह ! । जाओ ममप्पमोओ जह दंसणमेत्तओ तुज्झ ॥ ९ ॥

श्रीगुणचंद  
महावीरच०  
३ प्रस्तावः

॥ ६१ ॥

तां पसिय भुवणबंधव ! जइवि तुमं सव्वहा विगयरगो । नियचरणदंसणणुगहेण मम तहवि सेयंस ! ॥ १० ॥  
एवं च सुचिरं थोऊण सो तिविट्ठनरिंदो निविट्ठो समुचियट्ठणे, भगवयावि आजोयणमित्ताणुसारिणीए वाणीए  
समारद्धा धम्मदेसणा, जहा—भो भो देवाणुप्पिया ! कहकहवि चिरं संसारकंतरमणुपरियट्ठमाणेहिं तुम्हेहिं पा-  
विओ एस मणुयजम्मो, जायं अविकलपंचिदिअत्तणं, संपत्ता निकलंककुलारोगाइया सामग्गी, समुल्लसिया सद्धम्म-  
बुद्धी, ता दुगुञ्जह मिच्छत्ताविरइसंगं समीहह संमत्तनाणचरित्तवित्तं पेच्छह पमायपरपाणिगणदुहविवागं अणुचिं-  
तह खणदिट्ठनट्ठसरूवयं सव्वभावाणं विमंसह पुणो दुल्लहत्तणं आरियखेत्ताइलाभस्स, अन्नं च—

तुच्छेहियसुहलवमेत्तलालसा कीस वसह निस्संका ? । किं तुम्ह कयंतेणं निब्भयपत्तं सयं लिहियं ? ॥ १ ॥

किं वा केणवि अजरामरत्तणं तुम्ह दावियं ? अहवा । मरणाइदुक्खरहियं ठाणं वा कत्थविय दिट्ठं ? ॥ २ ॥

अहवा सासयभावत्तकारणं किं रसायणं लद्धं ? । जेणूसुगत्तठाणेऽवि गाढमंदायरा होह ॥ ३ ॥

भो भो देवाणुप्पिया ! सद्धम्मोवज्जणे समुज्जमह । परिहरह पावमित्तेहिं संगतिं दुक्खसयजणणिं ॥ ४ ॥

पडिवज्जह निरवज्जं पव्वज्जं देसविरइमहवावि । निसुणह पसिद्धसिद्धंतदेसणं मोहनिम्महणिं ॥ ५ ॥

अत्तसमं पाणिगणं रक्खह पालेह सीलमकलंकं । साहम्मिएसु रज्जह वज्जह विसएसु य पवित्तिं ॥ ६ ॥

निग्गुणजणं उवेक्खह अत्तुकरिसं सयावि परिहरह । अप्पत्तपुव्वगुणगणमव्वभस्सह नासह कसाए ॥ ७ ॥

भगवतः  
स्तुतिः  
देशना च.

॥ ६१ ॥

संतोसं च निसेवह परपरिवायं कयावि माऽऽयरह । ईसरिए मा म(जह मा र)जह पावकजेसुं ॥ ८ ॥

दाणाईसु पयट्टह सेवह सुविसुद्धबुद्धिणा गुरुणो । परउवयारे गिज्जह मा मुज्जह वुज्जह सतत्तं ॥ ९ ॥

एवं च भगवओ धम्मकहमायन्निऊण हरिसुप्फुल्लोयणेहिं केहिंवि परिचत्तपुत्तकलत्तेहिं पडिवन्ना सबविरई, के-  
हिंवि परिग्गहियं सम्मदंसणं, अन्नेहिं अंगीकया देसविरई, अन्ने य छिन्नसंसया जाया वहवे पाणिणो, हलहरनारा-  
यणेहिंवि अणाचक्खणिजं पमोयभरमुवहंतोहिं पडिवन्नं सम्मत्तरयणं । अह समइकंताए पोरिसीए वंदिऊण जयगुरुं  
गया निययावासं । भयवंपि अन्नत्थ विहरिओ । एवं च वचंतंमि काले अचंतसुहसागरावगाढस्स तिविहुराइणो  
एगया समागया परिभूयकिन्नरकंठा गायणा, तेहि य पदंसियं गीयकोसलं, हरियं हियं तिविहुस्स,  
अन्नं च—गीउग्गारो तेसिं जस्स मणागंपि विसइ सवणंमि । उज्झियनियवावारो चित्तलिहिउव सो सुणइ ॥ १ ॥

अच्छउ दूरे एयं तिरियाविहु तेसिं गेयवसणेणं । निम्मीलियच्छिणो उच्छहंति नो भोयणाईसु ॥ २ ॥

एयंविहसुस्सरयागुणेण हरिस्स ते सयावि पासवत्तिणो परमप्पसायठाणं जाया ।

अन्नया य सुसेज्जानिसन्नस्स वासुदेवस्स रयणीसमए समारद्धंतेहिं गेयं, जणिओ वाढं चित्तस्स अक्खेवो, निदागम-  
णकाले य निरुविओ वासुदेवेण सेज्जावालो, जहा—भइ ! जया मम निदा एइ तथा इमे गायणा तुमं विसजेज्जासि, जं  
देवो आणेवइ तं करिस्सामित्ति पडिवज्जियं सेज्जावालेणं, खणंतरेण य आगया राइणो निदा, तेऽवि अविसज्जियत्ति तहेव



श्रीगुणचंद  
महावीरच०  
३ प्रस्तावः

॥ ६२ ॥

गाइउमारद्धा, नवरं पच्छिमरयणिसमए पबुद्धेण राइणा ते तथा गायंते निसामिऊण, पुच्छिओ सिज्जावालो-अरे ! कीस  
एए न विसज्जिया ? , तेण भणियं-देव ! अइसवणसुहत्तणेणं मए खणंतरं पडिवालिया, एयमायन्निऊण जायंगाठकोवो  
आगारसंवरं काऊण तुण्हको ठिओ तिविडू, उग्गए य कमलसंडपडिवोहणे मायंडमंडले उट्टिऊण सयणीयाओ कयपा-  
भाइयकायवो निसण्णो अत्थाणमंडवे राया, ठिया य नियनियट्ठाणेषु सामंतमंतिसुहडाइणो, एत्थंतरंमि सुमरिओ रा-  
इणा रयणिवइयरो, आहूओ सेज्जावालो, भणिया य नियपुरिसा-अरे गीयस्स (रत्तत्तणेण ममाणाभंजगस्सेयस्स) तत्तत-  
उयतंवरसं खिवेह सवणेषुत्ति, एयमायन्निऊण नीओ सो तेहिं एगंतदेसे, कट्ठियतउयतंबयरसेण भरिया कन्ना, महावेयणा-  
भिभूओ गओ य सो झत्ति पंचत्तं । तिविड्डुणावि गाढामरिसवसेण निबद्धं निविडं दुहविवागवेयणिज्जं कम्मं । सावि सिंह-  
लेसरसुया ठाणे ठाणे अत्तणो पराभवं पेच्छंती हरिणा वयणमेत्तेणवि अविगणिज्जंती सुचिरमप्पाणं झूरिऊण मया  
तिरिएसु य उववन्ना, सेसं उवरि भन्निही । तिविड्डुवि कालंतरेण विविहसोक्खमणुभुंजमाणो रज्जे रट्ठे (य) मुच्छाणु-  
बंधमुव्वहंतो नियभुयवलेण सेसपुरिसवग्गमवमन्नंतो विविहपाणाइवायकिरियाए महारंभमहापरिग्गहेहिं अइकूरज्जवसा-  
णेण य परिगलियसम्मत्तरयणो नारगाउयं (निकाइऊण) चुलसीईवाससयसहस्साइं सवाउयं पालिऊण कालमासे  
कालं किच्चा उववन्नो सत्तममहीए तमतमाभिहाणाए अप्पइट्ठाणंमि नरयावासे लक्खपमाणे पंचधणूसियसरीरो  
नारगो । अइगाढपावकम्मेहिं पुव्वभवसंचिएहिं गरुएहिं निहओ विसहतो दुक्खाइं परमतक्खाइं चाउदिसिनिहुर-

शय्यापा-  
लकवधः।

॥ ६२ ॥

पञ्चसूलतिक्खस्वग्गभिज्जमाणो अइदीणकरुणसइं पइक्खणं विलम्बमाणो य॥

किं पुव्वभवमि मए कयंति जेणेरिसंमि ठाणंमि । निबंघयारतमसे उववन्नो कुञ्चणिज्जंमि ? ॥ १ ॥

एवं विचिंतयंतो खणे खणे घोरवेयणाभिहओ । पज्जलियगेहमज्झप्पविट्ठपंगुव विलवेइ ॥ २ ॥

अयलोऽपि कयत्तप्पारलोइयकायवो गाढसोगाभिभूओ सुसाणं वं भवणं भन्नमाणो अदिट्ठपुव्वयं पिव पियजणं  
च अवगणितो विसं विसयं भन्नमाणो वंधुणो वंधणं परिकप्पेमाणो पंवरंतरुसंडमंडिए नंदणवणे कमलकुवलयकल्हा-  
रवंधुरासु सरसीसु सिंगारागारचारुवेसासु अंतेउरीसु खणंपि चक्खुमक्खिवंतो कत्यवि रइं अलभमाणो अचंतं संसा-  
रासारयं भावेंतो सेयंसत्तिथयरुवइट्ठधम्मवयणाइं चिंतितो वइरिभवणं व गिहावासं परिचइउकामो सयणोवरोहेण  
कइवयवासराइं ठाऊण गओ धम्मघोसायरियसमीवे, वंदिओ परमाए भत्तीए, सूरिणाऽपि दिव्वणाणेण णाऊण तस्सा-  
भिप्पायं संमारद्धा धम्मदेसणा, जहा—

खणसंजोगविओगं खणपरियदंतविविहसुहदुक्खं । नडनचियव संसारविलसियं चित्तरूवधरं ॥ १ ॥

दट्ठूण कों पमायइ जिणिंदधम्मंमि सोक्खहेउम्मि ? । अचंतवल्लहे वा मयंमि को सोयमुव्वहइ ? ॥ २ ॥

जइ एगस्सेव भवेज्ज एत्थ वल्लहजणेण सह विगंमो । ता परिभवोत्ति काउं सोमोऽपि जणेण कीरेज्जा ॥ ३ ॥

जाव य समग्गभरहाहिवावि भरहाइणो कयंतेणं । विज्झविया दीवा इव पवणेण पयंडवेगेण ॥ ४ ॥

श्रीगुणचंद  
महावीरच.  
३ प्रस्तावः

॥ ६३ ॥

तां कीसं कुसलमइणो अट्टाणे चियं कुणंति संतावं ? । नाए वत्थुसरूवे खिज्जंति न जेण सप्पुरिसा ॥ ५ ॥ तीहिं विसेसयं ।  
नियजीवियस्सवि जया धरणोवाओ न तीरणं काउं । तत्थऽण्णजीवियवे चलंमि कहं कीरइ थिरत्तं ? ॥ ६ ॥  
इयरजणस्स व सोगो काउं न उ जुज्जए तुहं कहं पि ।  
किं गिरितरूणि(ण) मंतरमणिलेण चलंति जइ दोवि (अणिलेण गिरितरूणि चलिज्जं नवि मंदरो उ गिरी) ॥ ७ ॥  
एसो खु सुद्धबुद्धिस्स विब्भमो जं पियस्स मरणंमि । अकंदणेण सिरकुट्टणेण अवणिज्जइं सोगो ॥ ८ ॥  
उत्तममइणं पुणं भवविरूवयाऽऽलोयणेण निवेओ । उप्पज्जइं तत्तो चियं विसेसधम्मज्जमो होइ ॥ ९ ॥  
इयं चयसु सोगपसरं सरेसु संसारदारुकरवत्तं । पवज्जं निरवज्जं चिच्चा रज्जं च रट्ठं च ॥ १० ॥

एयं च समायन्निज्जणं ववगयसमग्गसोगसंतावो हलहरो भणिउमाढत्तो-भववं ! सचं तुम्हेहिं करुणापरहि-  
यएहिं ममोवइट्ठं, ता पस्सिय इयाणिं देहं पवज्जं निरवज्जंति बुत्ते पवाविओ सो गुरुणा, सिक्खविओ समणधम्मं,  
देसिया दसविहचकवालसामायारी, अब्भुवगया य तेण सम्मं । अहं गामागरेसु अण्णडिवद्धो विहरिज्जणं किंपि कालं  
दुकरतवचरणोहिं सोसिज्जणं सरीरं कम्मनिवहं च पत्तो सो सासयसोक्खं मोक्खंति ॥

तिविट्ठुवि तेत्तीसं सांगरोवमाइं अण्णइट्ठाणे अणुहविज्जणं दुक्खं तुओ समाणो उववन्नो सीहत्ताए एगंमि गिरिकंदरे,  
तओ-उम्मुक्कवालभावो विगयासंको समग्गरणंमि । परिभवइं कूरचित्तो जमोव अनिवारियप्पसरो ॥ १ ॥

अचलस्य  
वैराग्यं

॥ ६३ ॥

दारइ गइंदकुंभत्थलाइं अइतिकखनक्खनिवहेण । सारंगकुलं अचलं तासइ गलगंज्जिमेत्तेण ॥ २ ॥

हिंसइ चिविहजीवे इय एवं जीविऊण चिरकालं । मरिऊण पुणो जाओ नेरइओ नरयपुढवीए ॥ ३ ॥

छिंदणभिंदणसामलिसूलारोवणपराइं दुक्खाइं । रोमुद्धोसकराइं सुमरणमेत्तेणवि जणाणं ॥ ४ ॥

आमरणंतं सोढुं भमिओ चिविहासु तिरियजोणीसु । अह एगत्य भवंमी कम्मखओवसमभावेणं ॥ ५ ॥

लद्धण माणुस्सत्तं काउं छट्ठट्ठमाइ तवचरणं । भोगफलमज्जिऊणं उववन्नो देवलोगंमि ॥ ६ ॥

तओ आउक्खएणं चुओ समाणो रिद्धित्थिमियसमिद्धे निरंतरमुप्पज्जमाणजिणचक्कवट्ठिवलदेववासुदेवंपहाणपुरि-  
ससरिए हिए एगवीस(परियरिए एगस)रूवकालपरिकलिए अवरविदेहे खेत्ते मूयाए रायहाणीए धणंजयस्स रा-  
इणो सयलंतेउरपहाणाए धारिणीए देवीए चउइसमहासुमिणसूइओ सो तिविहुजीवो कुञ्चिसि पुत्तत्तणेण उवव-  
न्नोत्ति । समुचियसमए य कयं से पियमित्तोत्ति नामं । वट्ठिओ य देहोवचएणं विण्णाणपगरिसेण य, अण्णया य  
सो धणंजयराया सरयनिसायरसरिसवयणं तरुणतरणिपडिवुद्धपुंडरियलोयणं मणिखंडमंडियकुंडलुल्लिहियपीणगंड-  
मंडलं अकुडिलुचुंगनासावंसं वालप्पवालपाडलोद्धसंपुडं कुंदमउलमालासिणिद्धसुसिलिद्धदंतपंतिं पसत्थरेहावलयरहं-  
तकंठकंदलं मंसलसुविसालवच्छत्थलं महानयरगोपुरपयंडवाहुदंडं संगयपासोवसोहियसुप्पमाणमज्झभागं वियसिय-  
सयवत्तसरिच्छातुच्छनाभिं जचतुरयवट्ठियकडिभागं सुरिंदवारणकरकरणिजंघाजुयलं सुपइट्ठियलट्ठसुकुमालरत्ततलं

श्रीगुणचंद  
महावीरच०  
३ प्रस्तावः

॥ ६४ ॥

चलंतं कुमारं पेच्छिऊण जायपरमसंतोसो पवररायकुलपसूयाओ कण्णगाओ परिणाविऊण पसत्थवासरे रज्जे  
अभिसिंचिउं तओ तहाविहाण य सूरीणं पासे पवज्जं पडिवज्जइ । पियमित्तस्सवि अण्णडिहयसासणं रज्जं करित्तस्स  
कालकमेण समुप्पन्नाइं चउइस रयणाइं, ताणि य इमाणि—

सेणावइ गाहावइ पुरोहिय तुरय वड्डइ गयित्थी । चकं छत्तं चम्मं मणि कागणि खग्ग दंडो य ॥ १ ॥

एवं सो पियमित्तो समुप्पन्नचक्काइरयणो अणेगनरनाहनिवहपरियरिओ चकरयणदंसिज्जमाणमग्गो विजयज-  
त्ताए मागहतित्थाभिमुहं संपत्थिओ, कमेण य तस्सादूरदेसं पत्तो समाणो खंधावारनिवेसं काऊण मागहतित्थाहि-  
वस्स देवस्स साहणत्थं अट्टमभत्तं तवोकम्मं पडिवज्जइ, तस्स पज्जंते य हयरहजोहपुरिखुडो जोत्तियपवरतुरंगं चाउ-  
ग्घटं रहमारूढो चक्काणुमग्गेण केत्तियंपि भूमिभागं गंतूण कुवियकयंतभूविब्भमं अणेगरयणकिरणजालकच्चुरियदि-  
सावलयं वामपाणिणा सज्जीकयजीवं कोदंडं गिण्हिऊण तहा वज्जसारतुंडं विविहरयणविरइयपंखदेसं मणिविणि-  
म्मियचक्कवट्ठिनामचिंधं दाहिणकरेण सरं आयन्नमाकट्ठिऊण मागहतित्थाहिवस्स सम्मुहं मुयइ, सोऽवि सरो दुवा-  
लस जोयणाइं गंतूण मागहदेवस्स सहाए निसन्नस्स तस्स पुरओ निवडिओ, तं च सो दट्ठूण निट्ठुरनिडालवट्ठनि-  
विट्ठभिउडिभीसणवयणो गाढकोवभरारूणनयणो भणिउमाढत्तो—

रे रे कस्स कयंतेण सुमरियं? कस्स वल्लहं न जियं? । को मज्झ कोवदीवयसिहं व वंछइ पयंगोव? ॥ १ ॥

सिंहादि-  
भवाः प्रिय-  
मित्रचक्री.

॥ ६४ ॥

किं केणइ भुयबलदप्पिएण देवेण अहव मणुएणं । जक्खेण रक्खसेण वं एसो खित्तो सरो होही ? ॥ २ ॥

इय खणमेगं परिचित्तिऊण गिण्हइ सरं सहत्थेणं । पेच्छइ य चक्कवट्ठिस्स नामयं मणिविणिम्मवियं ॥ ३ ॥

एवं च ववगयसंसओ उवसंभियकोवविगारो विविहमहामोल्लचित्तमणिरयणाभरणनामंकियसरसणाहो पियमित्त-  
चक्कवट्ठिणो सगासमुवगंतूण मत्थए अंजलिं काऊण य विजएणं वद्धावेइ, भणइ य-जहाऽहं इयाणिं तुम्ह आणा-  
निहेसवत्ती किंकरनिविसेसो, ता पडिच्छइ इमं पीइदाणंति भणिऊण आभरणाइं सरं च समप्पेइ, चक्कवट्ठीवि तं  
सक्कारिऊण सम्माणिऊण य सट्ठाणे विसज्जेइ, रहंपि परावत्तिऊण खंधावारमुवांगच्छइ, भोयणाइ काऊण य किंकर-  
पुरिसेहिं मागहंदेवस्स अट्ठाहियामंहिमं कारावेइ । तस्स य पज्जंते चक्काणुमंग्गेण खग्गचावंनारायकणकप्पणिसू-  
ललडलिंभिं डिमालपमुहपहरणहत्थसुहडसत्थाणुजायमग्गो हत्थिरयणमारूढो नरिंदो कालपीयरत्तपंडुरवण्णाणेगं चिंध-  
सहस्सेहिं छायामाणोव अंबरतलं हयहेसियगयगुलगुलाइयरहघणघणाइयरवेहिं वहिरयंतोव जीवलोयं वरदामति-  
त्थाभिमुहं वच्चइ । कमेण य तहिं पत्तो समाणो पुवविहीए वरदामदेवस्स अट्ठमभत्तं रयणंपहरणं अट्ठाहियामंहिमं च  
करेइ । एवं पहासतित्थाहिवस्सऽवि, नवरं पभांसतित्थदेवो मालं मउडं मुत्ताजालं कडगंतुडियाणि यं चक्कवट्ठिस्स  
पीइदाणं पयच्छइत्ति । तओ पुणोऽग्निं जक्खसहस्सपरिवुडेण अंतरिक्खगएण चक्करयणेण दंसिजमाणमंग्गो चक्कवट्ठी  
सिंधुमहानईए दाहिणिल्लेणं कूलेणं सिंधूदेविभवणाभिमुहं गओ, तत्थंवि अट्ठमभत्तं पंगिण्हइ तस्स पज्जंते यं सिंधु-

श्रीगुणचंद  
महापीरच०  
३ प्रस्तावः

॥ ६५ ॥

देवीए सुहासणत्थाए चलियं सीहासणं, ओहिनाणमुणियचक्कवट्टिसमागमा य नाणामणिकणगरयणभत्तिचित्ताणि  
दोन्नि भहासणाइं कडगाणि तुडिगाणि वत्थाणि पगहिऊण चक्कवट्टिसगासमागया पंजलिउडा विणएण सम-  
प्पेइ, रायाऽवि तं सक्कारिय सम्माणिय सट्ठाणे विसज्जेइ । तओ पुगरवि चकरणं वेयहपवयाभिमुहं गंतुमारद्धं,  
रायाऽवि सबलवाहणो तदणुसारेण य(गच्छइ)कमेण य पत्तो वेयहपवयस्स नियंवदेसं, तत्तय य खंधावारं निवे-  
सावेइ, वेयह्गिरिकुमारदेवोऽवि पुव्वनाएण चलियासणो विविहालंकारहत्यो सेवं पडिच्छइ । कइवयदिणाणंतं च  
तिमिसगुहासमीवमुवागयस्स चक्किणो अट्टमभत्ततवचलियासणो कयमालयदेवो भालयलविलुलंतकरकमलो झडत्ति  
चक्खुगोयरमागओ, थीरयणजोग्गं रयणालंकारं अन्नाणि य विविहाणि भूसणाइं पणामेइ, आणानिहेसं च बहुम-  
न्निऊण गए तंमि राया विजयसेणं सेणावइं रयणभूयं सहाविऊण एवं वागेइ-भो विजयसेण ! गच्छाहि तुमं  
सिंधुमहानईए पच्चत्थिमिलदेसं नगनगरागराइपरिविखत्तं सिग्घं साहिऊण एहत्ति, जं देवो आणवेइत्ति विणएण  
सासणं पडिच्छिऊण सेणाहिवो विहियतक्कालोचियमज्जणाइवावारो महापरक्कमो तेयंसी मेच्छभासाविसारओ  
विस्सुयजसो पवरकुंजरखंधाधिरूढो सन्नद्धवद्धकवओ उप्पीलियसरासणधणुपट्ठो अणेगगणनायगदंडनायगपरिवुडो  
धरियधवलायवत्तो चलंतविमलचामरो पहयतूररववहिरियदियंतरो सिंधुमहानईतीरमुवागच्छइ ।

ताहे स चम्मरयणं सिंधुमहानइजलंमि वित्थरइ । वारसजोयणमेत्तं नावारूवेण तरणठा ॥ १ ॥

प्रियमित्रस्स  
दिग्विजयः०

॥ ६५ ॥

तो तंमि समांरुढो हरिकरिपाइकचक्रपरियरिओ । वीसत्यो पवणवसुलसंतसुमहल्लकलोलं ॥ २ ॥

गोपयमिव सिंधुनइं लंघित्ता मेच्छजाइए सवे । आणानिदेसे संठवेइं रयणाइं गिण्हेइं ॥ ३ ॥

सामी ! तुम्हे सरणं गई य एमाइं जंपमाणे ते । ठविउं सट्ठाणेसुं विणियत्तइं विजयंसेणो तो ॥ ४ ॥

पियमित्तचक्रवट्टिस्स पायपंकयजुयं पणमिऊण । रयणाइं समप्पइं सो मिलक्खुविजयं च वज्जरइं ॥ ५ ॥

पुनरवि रण्णा भणिओ सेणाहिचइं जहा तुमं भइ ! । गच्छसु तिमिसगुहाए कवाडउग्घाडणत्थाए ॥ ६ ॥

ताहे तहत्ति सम्मं पडिसुणिऊणं समग्गवलकलिओ । गंतुं गुहासमीवे अट्टमभत्तं तवो कुणइं ॥ ७ ॥

अह तिकखुत्तो पइणइं निविडेणं तिघदंडरयणेणं । ते तिमिसगुहाकवाडे महप्पमाणे चइरघडिइं ॥ ८ ॥

दंडाभिधायपरिपेल्लियाइं कुंचारवं करेंताइं । कुकलत्तकहियंगुज्झं व ताइं विहडंति वेगेण ॥ ९ ॥

तयणंतरं च वलिउं साहइं सो चक्रवट्टिणो वत्तं । सोऽवि य गयमारुढो समग्गसेणाए संजुत्तो ॥ १० ॥

चउरंगुलप्पमाणं रोगासिवनासणं मणिं घेतुं । चक्काणुमग्गलग्गो तिमिसगुहं विसइं भयराइओ (महराया) ॥ ११ ॥

तत्तो तिमिसगुहंतंधयारविद्धंसणट्ठमइगरुए । मंडलगे सो विलिहइं कांगिणिरयणेण भित्तीसु ॥ १२ ॥

ताहे मंडलगमऊहजालउज्जोयहणियतिमिराओ । नीहरइं सुहेणं समं सेणाए सो गुहाहितो ॥ १३ ॥

इओ य वेयहपरभागवत्तिणो विलाया महापरकर्मा अपरिभूयसामंत्या कणगरययधंणधनंसमिद्धा नियनियट्ठाणेसु



श्रीगुणचंद्र  
महावीरच०  
३ प्रस्तावः

॥ ६६ ॥

निवसंता बहूणि गंधवनगररुहिरवरिसभूमिकंपपमुहाइं उप्पाइयसयाइं पेच्छंति, तते णं ते ताणि पेच्छंऊण उच्चि-  
ग्गा निराणंदा ओहयमणसंकप्पा विणि(दीण)यं पिव अप्पाणं मन्नंता जाव चिट्ठंति ताव सहसच्चिय उक्किट्ठिसी-  
हनायकलयलरवेण समुद्धमहणसंकं समुप्पायमाणो निसियकरवालसेल्लभल्लिकुंतपहरणकरोहिं सूरुहिं अणुगम्ममाणो  
पत्तो तेसिं देसं पियमित्तनरवई, तं च आगयं निसामिऊण ते मिलेच्छा पयंडकोवारुणच्छा परोप्परं संतंति—भो भो  
एस कोइ कयंतचोइओ अम्ह विसयं उवहविउकामो वट्ठइ, ता तहा करेमो जहा एस अंतरा चेव विणस्सइत्ति,  
एवं संपहारित्ता पीडियदुब्भेयकवया विचित्तपहरणहत्था समुद्धुयमगरनरवसहसदूलगरुलाइचिंधा पोरुसाभिमाण-  
मुवहंता अहमहमिगाए गंतूण चक्किणो अगगसेत्तेण संपलग्गा जुज्झिउं, तओ य अगगसेणं हयपरकमं निवडियसु-  
हडं पडिभग्गरहवरं खंडियजच्चतुरंगवग्गं पडिखलियनरवइजणं तेहिं कयं पेच्छंऊण विजयसेणो सेणाहिवई जाय-  
कोवो कमलामेलगनामं आसरयणं आरुहिऊण कुवल्लयदलसामलं सवत्थ अप्पडिहयं नरवइहत्थाओ खग्गरयणं  
च गहिऊण ते विलाए चाउदिसिंपि पसरिए पडिखलइ । किं बहुणा?—

तिमिरं व दिणयरेणं भुयगसमूहोव पक्खिराएणं । सेणाहिवेण निहया भीया ते अइगया सगिहं ॥ १ ॥

धेत्तूणं घरसारं पुत्तकलत्ताइयं च मरणभया । अइदूरमवकंता सिग्घं विसमेसु ठाणेसु ॥ २ ॥

ताहे सिंधुनईए कूले परिचत्तसववावारा । उत्ताणा निवसणा अट्ठमभत्तं पगिण्हंति ॥ ३ ॥

प्रियमित्रस्य  
दिग्विजयः.

॥ ६६ ॥

सत्तुबलहणणहेउं पुर्विपिय पाडिहेरकरणपरे । सुमरंति एगचित्ता कुलदेवे मेहसुहनामे ॥ ४ ॥

अट्टमभत्तस्संते तत्तो चलियासणा सुरा एंति । गयणंगणमोइन्ना भणंति किं सुमरिया अम्हे ? ॥ ५ ॥

सिट्ठं च चिलाएहिं जह अम्हे रिउवलेण पडिहणिया । ता तुम्हे मुसुमूरह रिउपक्खं अम्ह रक्खट्ठा ॥ ६ ॥

देवेहिं तओ भणियं एसो पियमित्तनाम वरचक्की । काउमिमस्स विणासं अहो न सक्कोऽवि सक्केइ ॥ ७ ॥

तां भो अणंभिभवणिज्जो एस, केवलं तुम्ह पक्खवायमणुसरंतां किंपि उवसग्गेमोत्ति निवेइऊण तेसिं अंति-  
याओ ते मेहसुहा अवक्कमंति, नरवइखंधावारस्स उवरिं मेहनिवहं विउवंति, तओ जुगमुसलमुट्ठिप्पमाणधाराहिं  
निरंतरं वारिनिवहं संत्तरत्तं जाव मुयंति । पियमित्तचक्कवट्ठीऽवि तं तहाविहं पिच्छिऊण दिवचम्मरयणं परामुसइ,  
तंपिय खिप्पमेव दुवालस जोयणाइं तिरियं पवित्थरइ, तत्थ सो समत्थोऽवि खंधावारो समारुइइ, पुणोऽवि नरिंदो  
नवनवइसहस्सकंचणसलागपरिमंडियं महरिहं विविहभत्तिचित्तं डिंडीरपिट्ठपंडुरं उत्तरयणं खंधावारस्स उवरिं वारस  
जोयणाइं समहियाइं वित्थारेइ, मणिरयणं च किरणजालं मुयंतं सरयरविसरिच्छं उत्तमञ्जभागे ठवेइ, गाहावईवि  
चम्मरयणेगदेसंमि तद्विसपइन्ननिप्फण्णपूयाणं सव्वधण्णाणं अणेगकुंभसहस्साइं उवट्ठवेइ, एवं च सो राया सव्व-  
प्पयारेहिं अणुविग्गो चम्मरयणमारूढो उत्तरयणच्छन्नोवरिमविभागो मणिरयणकओज्जोओ गाहावइउवट्ठावियधन्न-  
निचओ नियभवणगओव सुहेण अच्छेइ । किं वडुणा ?

श्रीगुणचंद  
महावीरच०  
३ प्रस्तावः

॥ ६७ ॥

नविसे लुहा न वाही नेय भयं नेव विज्जए दुक्खं । विजयाहिवस्स रण्णो खंधावारस्सवि तहेव ॥ १ ॥  
अह पियमित्तनरिंदो संपत्ते सत्तरत्तपज्जंते । चित्तेइ को णु एसो जो मं विद्वइ सलिलेणं ? ॥ २ ॥  
एत्थंतरंमि आवद्धपरियरा विविहपहरणसमेया । सोलस जक्खसहस्सा मेहमुहाणं गया पासे ॥ ३ ॥  
भणिया य तेहिं रे रे अप्पत्थियपत्थिया धुवं तुम्हे । जं चक्खवट्ठिणोऽविहु उवसग्गं एवमायरह ॥ ४ ॥  
ता मुंचह चक्खुपहं अहवा जुद्धत्थमभिमुहा होह । इइ भणिए मेहमुहा गया चिलायाण पासंमि ॥ ५ ॥  
साहंति सव्ववइयरमसमत्थत्तं च अत्तसत्तीए । नरवइसेवाकज्जे पेसेंति य ते चिलाएऽवि ॥ ६ ॥  
अह मुक्ककेसहत्था पहरणरहिया नियंसिओल्लपडा । भयवसविसंतुलंगा गंतूण नमंति ते मेच्छा ॥ ७ ॥  
कणगं विचित्तरयणे अन्नं पि विसिद्धवत्थुमप्पिंति । पडिवज्जिय तस्सेवं नियावराहं च खामेति ॥ ८ ॥  
एवं च पवज्जियसेवा मिलेच्छा सम्माणिऊण चक्किणा विसज्जिया सट्ठाणेषु, सेणावईवि सिंधुमहानईए वीअखंड-  
साहणत्थं पेसिओ पुवविहीए, तं च साहिऊण पच्छाऽऽणए तंमि पियमित्तो राया चक्काणुसग्गेण पट्ठिओ वेयट्ठा-  
भिमुहं, कमेण य पत्तो पव्वयनियंवदेसं । तओ मणसीकरेइ उत्तरदाहिणसेठिविज्जाहरे, तेऽविय भयखुभियचित्ता-  
नाणाविहकणगरयणपमुहपहाणवत्थुसमप्पणपुव्वयं नरवइणो सिरसा सासणं पडिच्छंति । सेणावईऽवि पुव्वकमेण गंगा-  
महानईपुव्वखंडं साहिऊण पासमल्लियइ ॥

मेघमुखोप-  
द्रवः उत्तर-  
खंडजयः.

॥ ६७ ॥

पुष्पकमेणः पुनरविः खंडगुहं लंघिऊणः नरनाहो । चउरंगवलसमेओ गंगापचत्थिमेः कूले ॥ १ ॥

खंधावारनिसेसं काऊणं पवररयणपडिपुण्णो । अट्टमभत्तपुरस्सरमहः गिण्हइ नवः महानिहिणो ॥ २ ॥

मणवच्छियत्थकरणेकपचला वडरनिम्मियकवाडा । बहुपुत्तपावणिंजा इमेहिं नामेहिं ते नेया ॥ ३ ॥

नेसप्पः पंडुए पिंगले यः तह सवरयण महपउमे । काले यः महाकाले माणवग महानिही संखे ॥ ४ ॥

एएसिं चिय चक्की निहीणमनिहीणपोरिसारंभो । सकारपुवयं कारवेइ अट्टाहियामहिमं ॥ ५ ॥

गंगापुरत्थिमिहं सेणावइणा दुइज्जमविः खंडं । गाहावइ तत्थ ठिओ भुंजंतो विविहविसयसुहं ॥ ६ ॥

एवं च सो पियमित्तचक्कवट्ठी पसाहियछवखंडो निजियपडिंक्खचक्को अप्पणो आणाए ठवेंतो नराहिक्के दंसेंतो  
नियपरक्कमं सम्माणंतो सेवगजणं विरयंतो दीणाणाहाण अणवरयदाणं वत्तीसनरवइसहस्साणुगम्ममाणो पडिंनियत्तो  
मूयानयरीए; पडिच्छिओ दुवालसवारिसिओ महारायाभिसेओ । एवं च कयकायवो वत्तीसाए वत्तीसवद्धत्ताडयस-  
हस्साणं सोलसण्हं जक्खसहस्साणं तिण्हं तिसट्ठीणं सूयसयाणं अट्टारसण्हं सेणिप्पसेणीणं चउरासीए तुरगसयस-  
हस्साणं चउरासीए पवरकुंजरसयसहस्साणं छण्णउइए मणुसकोडीए वावत्तरीए पुरवरसहस्साणं वत्तीसाए जण-  
वयसहस्साणं छन्नउइए गामकोडीणं नवणउइए दोणमुहसहस्साणं चउवीसाए कच्चडसहस्साणं अडयालीसाए  
पट्ठणसहस्साणं चउवीसाए मडंवसहस्साणं वीसाए आगरसहस्साणं सोलसण्हं खेडसयाणं चउदसण्हं संवाहसह-

श्रीगुणचंद्र  
महावीरच०  
३ प्रस्तावः

॥ ६८ ॥

स्साणं अन्नेसिं च राईसरसेट्टिसेणावइपमुहाणं जणाणं आणिससरियसारं सामित्तमणुपालितो दिव्वं विसयसुहमणु-  
भुंजंतो य कालं वोलेइ ।

एगया य पसंतचित्तो भवणोवरिभूमिगाए ओलोयणगओ जाव दिसावलयमवलोएइ ताव सहसचिय पेच्छइ  
गयणंगणे समुत्थियं थेवचित्थारं मेहखंडं, तं च—कज्जलभसलगवलकोइलकालिंदीजलसामलं फुरंतविज्जुदंडुडामरं  
धंतकलहोयधवलगोपंतिमणहरं समुल्लसंताखंडलगंडीवाडंबरमणिज्जं मंदमंदमुक्कविंदुसंदोहसुंदरं गंभीरगज्जिरवतं-  
डवियसिंहंडिगणं खणमेगं दिसामुहेसु पसरिऊण सहसचिय समुच्छलियपवलपवणप्पणोलिज्जमाणं सच्चहा पणट्ट-  
मवलोइऊण चिंतेइ—अहो केरिसी वत्थुपरिणई? जं तारिसं घणपडलमचंतनयणाभिरामं खणमेत्तमुन्नइं पाविऊण संपयं  
सवुच्छेयमावन्नं, एयाणुमाणेणं चिय सच्चवत्थूणं एसा गई, खणविगमधम्मो य एत्थ किं पडिवंधडाणं?, का वा रई?  
को वा उत्तरोत्तरकायव्वविहाणुज्जमो? कहं वा खणमेत्तं पि वज्झवत्थूसु विस्सासो, अच्छंतु वा वज्झवत्थुणो, जं  
इमं सयलमणोरहमंदिरं सरीरं जस्स किर निमित्तं कीरइ करितुरयरहजोहजुवइपुरागरपमुहरज्जंगोवज्जणसमुज्जमो  
तं पि उप्पायधम्मत्तणेण पच्चक्खदिट्ठविणट्ठमेहमालं व ध्रुवं विणस्सरसीलं, अओ कुसला कहमेयस्स निस्सार-  
पोगगलचओवचयरूवस्स अट्ठिमिंजवसारुहिरमंससुक्काइविलीणकारणसमुब्भवस्स विविहरोगनिवहपरिग्गहियस्स पइ-  
दिवसण्हाणविलेवणभोयणपमुहोवयारपरिपालणिज्जस्स सीयतावायंकाइदोसरक्खणिज्जस्स परमदुगुच्छणिज्जगंधस्स

चक्रिकादिः  
वैराग्यं च.

॥ ६८ ॥

असुइपडिपुण्णकलसस्सेव वाहिरमेत्तरमणीयस्स दुज्जणचेट्ठियस्सेव अविचारसुंदरस्स महानरिंदस्सेव विसिद्धविस-  
याणुरागिस्स दुद्धपाणपरव्वसमज्जारस्सेव अणवेक्खियपयंडजमदंडाभिघायस्स विविहप्पयारेहि उवलालणत्थं गि-  
ण्हंति रज्जं करेति निरवेक्खचित्ता पाववावारं सयाचि रक्खणत्थं विविहपहरणहत्थं धरेति सुहडसत्थं अणवरयसं-  
तावकरं कोहलोहाइवेरिनियरं निच्चं पचासन्नट्ठियंपि अणवेक्खिऊण जोयणसहस्संतरियं संकंति सत्तुनिवहं सक-  
ज्जमत्ताणुरागिणंपि निक्खड्डपेम्मं मण्णंति परियणं अवस्संभाविनिहणंपि धुवं लक्खंति धणं, ता अहो तेसिं पम-  
त्तचित्तया अहो निधिवेयया अहो महामोहमहिमया अहो इहलोयपडिवंधपरव्वसया अहो आगामिदुक्खनिरवे-  
क्खया अहो दुहविवागावलोयणपडिकूलया, इइ चिंतयंतस्स पढियमेगेण कालनिवेयएण वेयालिएण—

विच्छायं पच्छिमासागयमिममहुणा सूरविंवं मिलंता, रोवंति द्वाऽलिजालुब्भडरवमिसओ पुंडरीयाण संडा । कंदंते  
चक्कवाया गुरुविरहमहादुक्खसंतत्तंगत्ता, धी संसारो (संसारो धी) असारो जमिह फुडमहो सासयं नत्थि किंपि ॥१॥

राइणाऽवि एवमायन्निऊण चिंतियं अहो अणिचयाए संवद्धं साहु पढियं एएण, जुत्तो संपयं मम धम्मज्जमो काउंति  
निच्छिऊण पसुत्तो रयणीए । ततो खणे खणे भवनिग्गुणत्तं पेहमाणस्स पाणिचहपसुहाइं दुक्कियाइं गरिहंतस्स संसारुव्वेयं  
वहमाणस्स सुहिसंवद्धं वंधणं व गणेंतस्स भोगे भुयंगेव परिकर्णितस्स मायंदजालं व जीवलोयविलसियमवलोयंतस्स  
विसालसेजाएचि तल्लुवेलिं करेतस्स कहकहचि वोलीणा रयणी, समुग्गओ दिवायरो । एत्थंतरे पढियं मागहेण—

श्रीगुणचंद  
महावीरच०  
३ प्रस्तावः

॥ ६९ ॥

पडिहयपडिवक्खं चकदिन्नेकसोक्खं, मिउकररमणिज्जं सज्जणासंसणिज्जं ।

तुममिव रविर्विवं पुवसेलावलंवं, उदयमिममियाणिं जाइ दोसेक्कहाणिं ॥ १ ॥

इमं च उदयसद्वसुंदरं सिलोगमायन्निऊण संभावियापुव्वलाभो नरवई समुट्ठिऊण सयणिज्जाओ कयपाभाइयकायवो  
निसन्नो सीहासणे । एत्थंतरे समागया उज्जाणवालया, कयप्पणामा विन्नविउमाठत्ता य—देव! वद्धाविज्जह तुव्वे  
जेण समागया भगवंतो बहुसीसगणसमेया पोट्टिलाभिहाणसूरिणो, समोसरिया य तुम्ह उज्जाणेत्ति । एवमायन्नि-  
ऊण निव्वरं पमोयभरमुव्वहंतो दाविऊण तेसिं चिंताइरित्तं पारिओसियं पवरवारणखंधाधिरूढो सव्वपरियणस-  
हिओ महाविभूईए गओ चकी उज्जाणे, वंदिया सव्वायरेणं सूरिणो, उवविट्ठो य जहासन्निहियधरणीए,  
जोडियकरसंपुडेण साहिओ गुरुणो मेहविगमदंसणुव्वभूओ सद्धम्मसमुज्जमसंमुहो नियचित्तपरिणामोत्ति, गुरुणा भणियं-  
भो महाराय! कुसलाणुसारिणी तुज्झ बुद्धी, संपन्नो कम्मविवरो करकमलं निलीणा मोक्खलच्छी, जस्स तुह एवं-  
विहा वासणा, ता महाराय! तिविहा पुरिसा भवंति, तंजहा—उत्तिमा मज्झिमा जहन्ना य । तत्थ—

उत्तमपुरिसा भवभंगुरत्तणं जाणिऊण णियमईए । परिचत्तगिहकलत्ता परलोयहियं पवज्जंति ॥ १ ॥

गरुयं रोगायकं तहाविहंपि अ विओगदुक्खं च । दट्ठूण मज्झिमा पुण कहमवि लग्गंति जिणधम्मे ॥ २ ॥

जे उ जहन्ना ते सब्बहांवि त्रिविहावईनिमग्गावि । दुक्खसयपीडियाविडु न मुत्तिमग्गंमि लग्गंति ॥ ३ ॥

करुणोयहिषा गुरुणा भणिज्जमाणावि विविहवयणेहिं । अच्छउ काउं धम्मं सहहिउंपि यि न सकंति ॥ ४ ॥  
इय मज्झिमा जहन्ना य हुंति धम्माहिगारिणो न तहा । जह मुणियभवसरूवा सभावओ उंत्तिमा पुरिसा ॥ ५ ॥  
ता भो महायस ! तुमं जोग्गो सवण्णुभणियधम्मस्स । संपइ करेसु सहलं एयायरणेण नियजीयं ॥ ६ ॥  
नहि विन्नायसरूवे चिंतामणिपमुहदिव्वरयणंमि । अग्गहणिच्छा जायइ क(इ)यावि (वि)सुद्धिबुद्धीण ॥ ७ ॥

अन्नं च-जललवतरलं जीयं सुरिंदकोदंडविन्भमं पेमं । गयकण्णतालचवलं पुण्णंपि सरीरलायणं ॥ ८ ॥

मारुयपणुण्णपण्णं व भंगुरं सुंदरंपि तारुण्णं । आवयलक्खनिमित्तं वित्तंपि कहांपि पविढत्तं ॥ ९ ॥

एएसिं एक्केकंपि नूण वेरग्गकारणं गरुयं । सुहबुद्धीणं जायइ किं पुण सवेसि समवाओ ? ॥ १० ॥

अच्छरियमिमं जे एरिसेहिं संवेगभावहेऊहिं । निच्चं विज्जंतेहिवि न मोक्खमग्गे पयट्ठंति ॥ ११ ॥

किं बहुणा कुणसु तुमं संपइ सद्धम्मकम्मपडिवंत्ति । बहुविग्घो सेयत्थो कालविलंबो न ता जुत्तो ॥ १२ ॥

एवं सोचा चक्कवट्टिणा भावसारं चलणेसु निवडिऊण भणिओ गुरु-अचित्तहमेयं, इयाणिं समीहामि अगाराओ  
अणगारियं पडिवज्जिउं, गुरुणा भणियं-भइ ! मा पडिवंधं करेसु, जुत्तमेयं तुम्हारिसाणं मुणियपरमत्थाणंति बुत्ते  
वंदिऊण गुरुं गओ नयरीए चक्कवट्टी । संमाहूया नायरयमंतिसामंतसेणावइपमुहपहाणपुरिसा, भणिया य-भो भो  
इयाणिं जाया अहं गिहपरिचायबुद्धी, काउं वंछामो निग्गंधपावयणपडिवत्ति, ता खमियधं तुब्भेहिं जं मए पुरा



श्रीगुणचंद  
महावीरच०  
३ प्रस्तावः

॥ ७० ॥

निओइया आणानिहेसे, काराविया सेवाविहिं, पीडिया समहिगकरगहणेणत्ति, तेहिं भणियं-देव !  
वज्जोवलेहिं घडियं हियं अम्हारिसाण निम्भंतं । जं एरिसाइं वयणाइं तुम्ह सोउं न विहडेइ ॥ १ ॥  
जणणीजणगा जेणं पढमं उवगारिणो परं जाया । परमुत्तरुत्तरगुणेषु नूणं अम्हे तए ठविया ॥ २ ॥  
ता कह इयाणिं तुह चरणकमलसेवाविवज्जिया गेहे । निग्घिणचित्ता अम्हे निवसंता नेव लज्जामो ॥ ३ ॥  
जह तुम्हे तह को वा अवराहपयं तितिविखही अम्ह । जह इहलोए तह परभवेऽवि ता नाह ! तं सरणं ॥ ४ ॥  
एवं भणिए राइणा वुत्तं-जइ एवं ता निययगेहेसु गंतूण सट्ठाणे पुत्ते ठविऊण य कयसयलकायवा पवरसिविगा-  
धिरूढा ममंतियं पाउम्भवह, तहत्ति पडिवज्जिऊण गया ते सगिहेसु, कयं तक्कालोचियं किच्चं, राइणावि  
अभिसित्तो नियरज्जे पुत्तो, समप्पिया करितुरगाइणो, कयमज्जणालंकारपरिग्गहो य चारुसिविगाधिरूढो तेहिं सवेहिं-  
वि पवज्जागहणाभिलासीहिं परिवुडो दिज्जंतंसेसु अणिवारियप्पसरं कणगाइदाणेसु वज्जंतंसेसु चउव्विहतूरेसु नच्चंतंसेसु तरुणि-  
सत्थेसु थुणंतंसेसु मागहनिवहेसु गओ उज्जाणं, ओयरिओ सिविगाओ, तिपयाहिणीकाऊण वंदिओ सूरी परिचत्ता-  
भरणस्स य दिन्ना से गुरूहिं पवज्जा, अंगीकया य तेण भावसारं । अह पढियजिणिंदुद्धिट्ठसिद्धंतसत्थो गुरुजणपय-  
आराहणुज्जुत्तचित्तो परिहरियपमायुम्मायमायापवंचो बहुविहतवकम्मासेवक्खीणदेहो ॥

विमलगुणकलावं अज्जिणंतो जिणंतो, कुसुमसरपमोक्खं वेरिवग्गं समग्गं ।

प्रियमित्र-  
दीक्षा,

॥ ७० ॥

नियजियमिव सन्वे पाणिणो रक्खमाणो, खणमिव अचयंतो सुत्ततत्तत्थचित्तं ॥ १ ॥

सुहदुहमणिलेहूसत्तुमित्ताइएसुं, तुलमिव समरूवं चित्तवित्तिं धरिंतो ।

तिणमिव पडलग्गं छंडिउं सव्वसंगं, विहरइ वसुहाए निप्पकंपो महप्पा ॥ २ ॥

तो वासकोडिमेगं पव्वज्जं पालिऊण कयमरणो । सुक्कंमि देवलोए जाओ देवो महिद्धीओ ॥ ३ ॥

इय वीरनाहचरिए सुपवित्ते दुक्खदारुकरवत्ते । सिवपुरसंमुहपत्थियमंगलकलसेक्कवरसउणे ॥ ४ ॥

उसभजिणकहियहरिचक्कवट्ठिपयपवरलाभपडिवद्धो । जणमणविम्हयजणणो संमत्तां तइयपत्थावो ॥ ५ ॥ जुम्मं ॥

( इति तइओ पत्थावो )

चतुर्थः प्रस्तावः

हरिचक्कवईण इमा भणिया वत्तवया पयत्तेणं । एत्तो नंदणनरवइचित्तंतं मे परिकहामि ॥ १ ॥

अत्थि सयलवसुंधरारमणीरयणकन्नपूरोवमा वेसमणरायहाणिविब्भमा छत्ता नाग नयरी, तत्थ धम्मराओ नयमंगपव्वत्तणेण कयंतो कोवेण अज्जुण्णो कित्तीए वलभहो भुयवलेण मयलंछणो सोमयाए दिणयरो पयावेणे पवणो सरीरसामत्थेण गुरु गुरुवुद्धिविभवेण महुमहो वलिसत्तुदमणेण वम्महो रूवेण सयलजयपायडजसो जियसत्तू नाम राया, तस्स य मयरद्धयपणइणीसमइरेगरूवविभवेऽवि विगयदप्पा इत्थिभावेऽवि दूरपरिचत्तमाया जहत्थाभिहाणा

श्रीगुणचंद  
महावीरच०  
४ प्रस्तावः

॥ ७१ ॥

भद्रा नाम देवी, तीए सद्धिं अणुखविसयसोक्खमणुहवंतस्स राइणो वच्चंति वासरा, अन्नया य सो पियमित्तो  
आउयक्खएणं देवलोगाउ चइऊण समुप्पण्णो तीसे पुत्तत्तणेण, कयं च समुचियसमए नंदणोत्ति नामं, धवल-  
पक्खससहरव वट्ठिओ सरीरेणं कलाकलावेण य । अन्नया पिउणा जोगोत्ति कलिऊण निवेसिओ नियपए, जाओ  
सो नंदणो राया, पुव्वप्पवाहेण पालेइ मेइणीं । एवं च तस्स निज्जिणंतस्स सत्तुनिवहं इंदियगणं च वित्थारंतस्स  
दिसामुहेसु निम्मलं जसप्पसारं गुणनिवहं च पणासंतस्स दोससमूहं पिसुणवग्गं च नितस्स समुन्नइं कोसं बंधुजणं  
च परिपालितस्स साहुलोयं गुरुजणोवएसं च समइकंताइं चउवीसवाससयसहस्साइं । अन्नया य बाहिरुज्जाणे समोसढा  
भयवंतो भीमभवजलहितरणतरंडा विमुद्धसन्नाणाइगुणरणकरंडा मोहमहामल्लपेळणपयंडा कुमयतमोमुसुमूरण-  
चंडमायंडा मिच्छत्तंधजगअवलंबणेकदंडा पडिबोहियभवियकमलखंडा सुगहियनामधेया पोट्टिलाभिहाणा थेरा,  
तओ सो राया विण्णायतदागमणो वियसियवयणो समुल्लसियकवोलो वियंभियसवंगरोमंचकंचुओ समागओ वंद-  
णत्थं । तओ तिपयाहिणीकाऊण पढमदंसणुच्छलियहरिसपगरिसविप्फारियाणं धवलदिट्ठिवायाणं छलेण विल-  
सियसभमरसियकुसुमेहिं पूयापन्भारंपिव सव्वंगियं गुरुणो करेमाणो पयलंतनयणाणंदजलेण पक्खालेउसुवट्ठिओव्व  
चरणे चरणेकरसियमाणसो माणसोयरहिओ हिओवएसोवलंभकामो कामोवघायसूरस्स सूरिणो निवडिऊण चलणेसु  
परमपमोयमुव्वहंतो भणिउमाढत्तो—

नन्दन-  
जन्मादि०

॥ ७१ ॥

यज्विहरहरिसुराणं पि अज्ज मन्नामि अप्पयं अहियं । जं तुम्ह पायपउमं दुल्लहलंभं मए पत्तं ॥ १ ॥  
 ते दूरनिरंतरवित्थरंतसुहं निवहभाइणो मणुया । जे तुम्ह चलणकमले कुणंति भसलत्तणं धन्ना ॥ २ ॥  
 जीविज्जइं कज्जि एत्तियस्स तुच्छेऽवि जीवलोयंमि । जेण किरं कहवि तुम्हारिसेत्थ दीसंति तित्थसमा ॥ ३ ॥  
 उव्वहउ मही भुवणत्तएवि पयडं वसुंधरा नामं । जा अज्जवि तुम्ह सरिच्छपुरिसरयणाइं धारेइ ॥ ४ ॥  
 इय युणिऊणं विरए भत्तीए नंदणे नरिंदमि । जोगोत्ति कलिय कहिउं पारदो सूरिणा धम्मो ॥ ५ ॥  
 भो नरवइ ! संसारे सुचिरं परिभमिय दुक्खसंतत्ता । नरयाइगईसु केऽवि पाणिणोऽणंतकालेणं ॥ ६ ॥  
 बालतवायरणाओ अहवावि अकामं निज्जरवसेण । पावंति माणुसत्तं कहकंहवि हु रिद्धिसंजुत्तं ॥ ७ ॥ जुम्मं ॥  
 पत्ते य तंमि अबिगणियभवभया चत्तधम्मपडिवंधा । हीलियधम्मायरिया उव्वहसियविसिद्धजणवेढा ॥ ८ ॥  
 विसंएसे पसज्जंती पाणिंवहाईसु संपयट्ठंति । भंगुरमवि ससरीरं मन्नंता सांसयं मूढा ॥ ९ ॥ जुम्मं ॥  
 अज्जे पुण मणवंछियभोगुवभोगोवलंभभावेऽवि । आणिस्सरियपहाणे विस्संभरनायगत्तेऽवि ॥ १० ॥  
 विसंयवामूढाविहु धम्मगिरं सुणिय धम्मगुरुमूले । नरवइ ! नरसिंहो इव पव्वज्जं संपव्वज्जंति ॥ ११ ॥ जुम्मं ॥  
 अहवा पुण्णवसज्जियरज्जदुगुहामलच्छिविच्छडो । नरविक्रमनरनाहो तस्सेव सुओ महासत्तो ॥ १२ ॥  
 एय धियं महणिज्जा पयरं एयाण चेव पुरिसत्तं । जेसिं जणविम्हयकरं चरियं सलहिज्जइं जयंमि ॥ १३ ॥

श्रीगुणचंद  
महावीरच०  
४ प्रस्तावः

॥ ७२ ॥

इमं च सोचा नंदणनराहिवेण जंपियं-भयवं! को एस नरसीहो? को वा तस्स सुआ नरायकमा ॥ १ ॥  
एसो रज्जदुगं लद्धूणवि पव्वजं पवन्नोत्ति सवित्थरं साहेह, महंतं मे कोउगं, सूरिणा जंपियं-निसामेहि ।

अत्थि कुरुविसयतिलयभूया अदिट्ठपरचक्कभया जणनिवहाणुगया जयंती नाम नयरी,  
पालेइ तं च ससहरसरिच्छपसरंतकित्तिपम्भारो । निप्पडिमपयावकंतसत्तुपणिवइयकमकमलो ॥ १ ॥  
उत्तुंगतुरयसिंधुरपकलपाइक्कचक्कवलकलिओ । सक्कोव्व सुरपुरिं परमविक्रमो राय नरसिंधो ॥ २ ॥  
विसमच्छो इत्थीलोलुओ य दुग्गाववद्धनिचरई । जस्स हरोऽवि न सरिसो तस्स समं कं जणं भणिमो? ॥ ३ ॥  
तस्स य नीसेसअंतेउरप्पहाणा वयणलायण्णावगणियपडिपुण्णचंदमंडला सललियवेल्लहलगइविजियराय-  
हंसा कुम्मुण्णयकमलकोमलपाडलचलणजुयला रायहाणिव्व मयरद्धयनरनाहस्स विसालसालव्व विमलसीलसाली-  
णयामहामोल्लभंडस्स मंजूसव्व सव्वरइसोक्खमणिखंडभंडारस्स चंपयमाला नाम भारिया अहेसि, जीसे भंगुरत्तणं  
तिरिच्छच्छिविच्छोहेसु न धम्मकम्मुच्छाहेसु तरलया विमलमणिमुत्ताहारे न विसिट्ठलोयववहारे तणुत्तमुदरस्स न  
सरस्स कुडिलत्तं केसकलावस्स न सप्पणयालावस्स, अवि य—

नियरूवविजियसुरवहुजोव्वणगव्वाए कुवलयच्छीए । उब्भडसिंगारमहासमुद्दुद्धरिसवेलाए ॥ १ ॥  
को तीए भणियविब्भमनेवत्थच्छेययागुणसमूहं । वण्णेउ तरइ तूरंतओऽवि जीहासएणंपि ? ॥ २ ॥

नरविक्रम-  
चरित्रं.

॥ ७२ ॥

तथा-नियचक्रसंधिरक्खणवियक्खणो पयइपालणाभिरओ । अन्नोऽन्नवद्धपणओ दूरं संतोससारो य ॥ ३ ॥

मुप्पणिहियपणिहियओ पमुणियरिउचक्कगुविलवावारो । पडुमत्तो गुणरागी निवूढभरो महारंभो ॥ ४ ॥

एक्केक्कपहाणगुणो मंतिजणो बुद्धिसारपमुहो से । अत्थी समत्थनयसत्थ(नि)समणवित्थरियमइपसरो ॥ ५ ॥

अणवरयमसुरकीरंतडमरभयविदुरसुरवहसुहडं । हीरंतपवररणं जो सोच्चा तियसरायपुरिं ॥ ६ ॥

उवहसइ सुरगुरुंपिव सवुद्धिमाहप्पपडिहयविपक्खो । तस्स किर मंतिवग्गस्स भणसु केणोवमं कुणिमो ? ॥ ७ ॥ जुम्मं ।

एवंविहगुणे मंतिजणे समारोवियरज्जचिंतामहाभरस्स लीलाए चिय धरं धरंतस्स गामागरनगराउलं धरणिमंडलं  
वसमुवर्णितस्स जायमरणभयवामोहं दुइंतसामंतसमूहं पवत्तयंतस्स दीणाणाहजणमणोवंछियपूरणेक्कपच्चलाओ महा-  
दाणसालाओ कारितस्स तुंगसिंगोवहसियहिमसेलसिहरसिंगाइं मयणाइमंदिराइं निसामितस्स धम्मत्थपयासण-  
समत्थाइं समयसत्थाइं आराहितस्स दुकरतवचरणसलिलपक्खालियपावमलाइं गुरुचरणकमलाइं निवारितस्स ज-  
णियजणवामोहं धम्मविरोहं सम्माणितस्स गुणगणोदग्गं पणइसयणवग्गं पुवज्जियसुकयसमुब्भवंतचिंताइरित्तसो-  
क्खस्स पुरिसत्थसेवणम्भुज्जयस्स नयविणयवंतस्स दाणाणंदियवंदिजणसंदोहुग्घुट्टलट्टचरियस्स वोळित्ति वासरा तस्स  
राइणो भुयणपयडस्स । अन्नया य विचित्तचित्तमणहरंमि मंदिरंमि पच्छिमरयणीसमए सुहसेज्जाए सुत्तस्स तस्स  
मंदीभूयंमि निहापसरे वियक्खणेण पडियमेक्केण जामरक्खगपुरिसेण—

श्रीगुणचंद  
महावीरच०  
४ प्रस्तावः

॥ ७३ ॥

जे पुत्रपुरिसवंसप्परोहगाढप्परूढमूलसमं । वेरिकुलकमलनिदलणकुंजरं सयलगुणनिलयं ॥ १ ॥  
पुत्तं ठविउं नियए पयंमि पडिवन्नसंजमुज्जोगा । इह परभवे य कह ते पावित्ति न निव्वुइं पुरिसा ? ॥ २ ॥ (जुम्मं)  
एवं च सोचा चिंतियं रत्ना-अहो दुल्लंभमेयं, जओ मम एत्तियकालेऽवि पउरासुवि पणइणीसु न एकस्सवि कुलालं-  
बणस्स पुत्तस्स लाभो जाओ, अच्छउ सेसं, एवं ठिए य किं करेमि ? किं समाराहेमि ?, कत्थ वचामि ? कस्स  
साहेमि ? को उवाओ ? के वा एरिसकज्जे सहाया ? को य मे पुरिसयारो ? का वा पुत्रकम्मपरिणइत्ति खणं किं-  
कायवयमूढयं अणुभविय तवेलं चेव अंगीकयसत्तभावो एवं सम्मं परिभाविउं पवत्तो-

परलोयपवत्ताणं जइवि सुएहिं न होइ साहारो । जं सवंसय उवरिं गओवि नगओ दुहं कुणइ ॥ १ ॥  
तहविय पुत्रनराहिवसंतइवुच्छेय दुक्खमक्खिवइ । मज्झ मणो पुत्रनरिंदरक्खिओ कुरुजणवओ य ॥ २ ॥ (जुम्मं)  
एत्थंतरे जायाइं समुद्धियभारुंडकारुंडवहंसचक्कवायकुलकोलाहलाउलियाइं दिसिमुहाइं वियलंतपभापसरो वि-  
च्छाईभूओ तारयानियरो पसरिया सिंदुरेणुपुंजपिंजरा सूरसारहिपभा ताडियाइं पडहसुरवझल्लरिभंभाभेरीभंकार-  
भासुराइं पभायमंगलतूराइं समुग्गओ कमलसंडपयंडजडुविच्छडुखंडणुडामरकरपसरो दिणयरो, तओ उट्टिऊण स-  
यणिज्जाओ निस्सरिओ वासभवणाओ कयपाभाइयकिचो अंगरक्खपीढमइप्पमुहपहाणपरियणाणुगओ अत्थाणीमंडवे  
गंतूण राया अणेगमणिकिरणविच्छुरियंमि सूरुव पुत्रपवयसिहरंमि कणयसिहासणंमि निविट्ठो, तयणंतरं च ठियाओ

नरसिंहस्य  
सुतचिन्ता.

॥ ७३ ॥

उभयपासेसु चामरगाहिणीओ निविट्ठा य नियनियट्ठाणे मंतिसामंतमुहडखंडरक्खपामोक्खा पहाणपुरिसा पडि-  
 न्ठियाइं पमंतरायपेसियमहरिहपाहुडाइं चित्तियाइं रज्जकज्जाइं, खणंतरे य पेसियनीसेससामंतपभिइजणो कइव-  
 यपहाणजणपरियरिओ एगंतट्ठिओ रयणिवइयरं बुद्धिसारपमुहाण मंतीणं संसिऊण पुच्छिउमेवं समारद्धो-भो  
 मंतिणो ! गुणह तुग्गे समयसत्थाइं बुज्झह तंतमंतपडलाइं पज्जुवासह विज्जासिद्धे सयंपि सबोवहासुद्धबुद्धिणो विवे-  
 पह गुविलंपि कज्जजायं, ता साहह कहमिमस्स सुयलाभचिंतासायरस्स पारं वच्चिस्सामोत्ति ? खणंतरं च चित्तिय  
 जुत्ताजुत्तं भणियं मंतिवग्गेणं-देव ! सुट्ठु सट्ठाणे समुज्जमो, अम्हे पुरावि देवस्स एयमट्ठं विन्नविउकामा आसि,  
 संपयं पुण सयमेव देवेण सिद्धे लट्ठं जायं, किं तु देवो अम्हे उवायं पुच्छइ, तत्थ य किं साहेमो ?

अइदिघनाणनयणोवलम्भरूवंमि एत्थ वत्थुंमि । कमुवायविहिं भणिमो ? किं वा पञ्चुत्तरं देमो ? ॥ १ ॥

आगारिगियगइभणिइगोथरं मिणइ मारिसो अत्थं । एवंविहे य कज्जे अम्हं को बुद्धिवावारो ? ॥ २ ॥

एयं पुण जाणेमो नियनियकम्माणुरूवठाणेसु । जीवा उवायविरहेवि होंति पुत्ताइभावेणं ॥ ३ ॥

हसिऊण भणइ राया जइ एवं जणणिजणगविरहेऽवि । गयणंगणे पइक्खणमुववज्जंतीह किमजुत्तं ? ॥ ४ ॥

कम्मपहाणत्तणओ ता मा एगंतपक्खमणुसरह । जं दवखेत्तकालावि कारणं कज्जसिद्धिमि ॥ ५ ॥

अह भालयलमिलंतकरकमलं जं देवो आणवेइ अवितहमेयंति मन्निऊण बुद्धिसारपमुहो मंतिवग्गो भणिउमा-



ढत्तो—देव ! जइ एवं ता निसामेहि, अत्थि इहेव साहियपयंडचंडियाविजो मुंडमालालंकियविग्गहो निउणो पि-  
सायसाहणेसु साहसिओ साइणीनिग्गहे कयकरणो खेत्तवालावयारेसु खोदकखमो कन्नविज्जासु ओसहीसहस्ससंपि-  
ट्टरसायणपाणपणासियजराविहुरो विवरपवेसपरितोसियजक्खिणीलक्खपरिभोगप्पयारपरूवणपंडिओ महवइयवे-  
सधारी घोरसिवो नाम तवस्सी ।

अवि य—आगिट्ठमि पगिट्ठो खुन्नो पन्नगमहाविसुद्धरणे । विक्खेवकरणदक्खो अमूढलक्खो वसीकरणे ॥ १ ॥

जं सत्थेसु न सिट्ठं बंधुरबुद्धीहिं पुव्वपुरिसेहिं । जं नो पुव्वकर्इणवि कहिंपि मइगोयरंमि गयं ॥ २ ॥

जुत्तीहिवि जं विहडइ सुयंपि जं सद्वहंति नो कुसला । जं सुइरंपि हु दिट्ठं संदिज्झइ तंपि दंसेइ ॥ ३ ॥ (जुम्मं)

भणइ य अत्थि असज्झं मज्झं भुवणत्तएवि नो किंपि । जइ सो एयसमत्थो एत्थवि देवो पमाणंति ॥ ४ ॥

एवं सोचा रत्ता कोउहलेण भणिया पहाणपुरिसा—अरे आणेह तं सिग्घमेव, जं देवो आणवेइत्ति भणिऊण  
निकुखंता ते य रायभवणाओ, गया तस्सासमपयं, पणमिऊण निवेइयं से आगमणप्पओयणं, तओ हरिसुप्फुल्लो-  
यणो कयकिच्चमप्पाणं मन्नंतो तो चलिओ घोरसिवो रायपुरिसेहिं समं, पत्तो य रायभरणं, दुवारपालनिवेइओ गओ  
रायसमीवं, दिन्नासणो उवविट्ठो, सम्माणिओ उचियपडिवत्तीए नरवइणा, खणंतरे य पुच्छिओ एसो—भयवं ! कयरीओ  
दिसाओ आगमणं ? कत्थ वा गंतवं ? किं वा एत्थावत्थाणप्पओयणंति ?, घोरसिवेण भणियं—महाराय ! सिरिपवयाओ

आगओऽम्हि, संपयं पुण उत्तरदिसिसुंदरीसवणकन्नपुरे जालंधरे गन्तुमिच्छामि, जं पुण पुच्छह अवत्थाणपओयणं तत्थ  
य तुम्ह दंसणमेव, संपयं एयंपि सिद्धंति, नरवइणा भणियं—भयवं! निरवग्गहा सुणिज्जइ तुम्ह सत्ती मंतंतंतेसु ता  
दंसेसु किंपि कोउगं, तओ जं महाराओ निवेयइत्ति पडिवज्जिय तेहिं तेहिं दिट्ठिवंचणदेवयावयारणनरवेहपुप्फवेहनट्ट-  
मुट्ठिसुहदुक्खपरिजाणणप्पमुहकोऊहलेहिं वसीकयं घोरसिवेणं नरिंदचित्तं, अह अवसरं लहिऊण भणियं राइणा-  
भयवं! किं एएसु चेव कोऊहलेसु तुह विन्नाणपगरिसो उआहु अन्नत्थवि अत्थि?, मुणिणा भणियं—किमेवमसं-  
भावणागम्भमम्हारिसजणाणुचियं बाहरसि?, एगसद्देणेव साहेसु जं दुक्करंपि कीरइ, तओ राइणा निवेइओ पुत्त-  
जम्मलाभविसओ वुत्तंतो, घोरसिवेण भणियं—किमेत्तियमेत्तेण किलिस्ससि?, अहमेयमट्ठं अकालेवि अविलंबं पसा-  
हेमि, राइणा भणियं—जइ एवं ता परमोऽणुग्गहो, केवलं को एत्थ उवाओ?, घोरसिवेण भणियं—एगंते निवे-  
यइस्सं, तओ उक्खित्ता कुवलयदलसच्छाहा मंतीसु राइणा दिट्ठी, उट्ठिया य इंगियागारकुसला सणियं सणियं नरिं-  
दपासाओ मंतिणो, जायं विजणं, घोरसिवेण जंपियं—महाराय! कसिणचउहसीनिसिए मए बहुपुप्फफलधूवक्ख-  
यवलिभक्खपरियरेण तुमए सह भयवं महामसाणहुयासणो तप्पणिज्जो, राइणा चिंतियं—कहं नु मए पुप्फाइपरि-  
यरेण सह हुयासणो तप्पणिज्जोत्ति?, अवसद्दोत्ति, अहवा अभिप्पायसाराइं इसिवयणाइं, नो विसंबंधलक्खणदूसण-  
मावहंति, मुणिणा भणियं—महाराय! सुण्णचक्खुक्खेवो इव लक्खीयसि, राइणा भणियं—मा एवमासंकह, निवेयह

श्रीगुणचंद  
महावीरच.  
४ प्रस्तावः

॥ ७५ ॥

जहा पारद्धं, मुणिणा भणियं—तओ सो भयवं हुयासणो—उब्भडपयडियरूवो पयंडजालाकलावभरियनहो । दाही  
तुज्झं वंछियफलनियरं कप्परुक्खोव ॥ १ ॥ राइणा भणियं—जइ एवं ता सव्वहा आगमिस्सं चउद्दसीनिसाए, एस  
अत्थो साहियवोत्ति, पडिवन्नं च तेण, अह कयकुसुमतंबोलदाणसम्माणे सट्ठाणंमि गए घोरसिवे राया निव्वत्तियदेव-  
याचरणकमलपूयापडिवत्तीहिं तेहिं तेहिं अस्सदमणाइएहिं विचित्तविणोएहिं अप्पाणं विणोएंतो पइक्खणं दिणाइं  
गणमाणो य कालं गमेइत्ति, कमेण य पत्ताए कसिणचउद्दसीए आहूयं मंतिमंडलं, निवेइयं रहस्सं, पुच्छियं च-संपयं  
किं कायव्वंति?, मंतीहिं पभणियं—देव ! किंपागफलाइंपिव सुहंमि महुराइं परिणइदुहाइं अन्नाइं तदियराइं दुहावि  
दीसंति कज्जाइं, अत्थस्स संसओऽविहु पवित्तिहेउत्ति किं तु निहिट्ठो, अविमुक्काविस्सासेहिं सव्वहा उज्जमेयवं, एवं  
भणिए राइणा कुसुमतंबोलाइदाणपुव्वगं सम्माणिऊण मंतिवग्गो पेसिओ सगिहे, जाए य रयणिसमए सयं कयवे-  
सपरियत्तो नियत्तियपीढमद्दाइपरियणो समग्गवल्लिफलफुल्लपमुहसाहणपडलसमेओ करकलियत्तिक्खग्गखग्गमंडलो  
घोरसिवसमेओ अलक्खिज्जंतो अंगरक्खेहिं अमुणिज्जंतो दासचेडचाडुकारनियरोहिं वारिज्जमाणो पवत्तिज्जमाणो  
य पडिकूलेहिं अणुकूलेहि य अणेगेहिं सउणेहिं सवंगनिविट्ठविसिट्ठरक्खामंतक्खरो संपत्तो महीवई महामसाणदेसं ।  
जं च केरिसं ?—

निलीणविज्जसाहगं पवूढपूयवाहगं, करोडिकोडिसंकडं, रडंतधूयकक्कडं ।

हुताश-  
तर्पण-  
स्वीकृतिः

॥ ७५ ॥

सिवासहस्रसंकुलं मिलंतजोगिणीकुलं, पभूयभूयभीसणं कुसत्तसत्तनासणं ॥

पधुट्टदुट्टसावयं जलंततिष्ठपावयं, भमंतडाइणीगणं पवित्तमंसमग्गणं ॥ १ ॥

कहकहकहट्टहासोवलक्खगुरुरक्खलक्खदुप्पेच्छं । अइरुक्खरुक्खसंवद्धगिद्धपारद्धघोररवं ॥ २ ॥

उत्तालतालसहुम्मिलंतवेयालविहियहलवोलं । कीलावणं व विहिणा विणिम्मियं जमनरिंदस्स ॥ ३ ॥

तत्थ य निरुविओ सल्लक्खणभूमिभागो घोरसिवेण, खित्तं च वलिविहाणं कया खेत्तवालपडिवत्ती खणिया वेइया  
भरिया खाइरंगाराणं मसाणसमुत्थाणं, भणिओ य राया-अहो सो एस अवसरो ता दढमप्पमत्तो ईसाणकोणे  
हत्थसयदेससंनिविट्ठो उत्तरसाहंगत्तणं कुणमाणो चिट्ठसु, अणाहूओ य मा पयमवि चलेज्जासित्ति पुणो पुणो निवा-  
रिय पेसिओ नरिंदो, गओ य एसो, घोरसिवेणावि आलिहियं मंडलं, निसन्नो तहिं, निवद्धं तहिं पउमासणं, कयं  
सकलीकरणं, निवेसिआ नासावंसग्गे दिट्ठी, कओ पाणायामो, नायविंदुलवोववेयं आढत्तं मंतसुमरणं, समारूढो  
आणपगरिसंमि । इओ य चिंतियं राइणा-अहं किर पुवं सिक्खं गाहिओ मंतीहिं, जहा-अविस्सासो सव्वत्थ काय-  
वोत्ति, निवारिओ य सव्वायरं पुणो पुणो एएण जहा अणाहूएण तए नागंतव्वंति, ता समहियायरो य जणइ संकं, न  
एवंविहा कावालिवमुणिणो पाएण कुसलासया हवंति, अओ गच्छामि सणियं सणियमेयस्स समीवं, उवलक्खेमि से  
किरियाकलावंति विगप्पिडं जाव पट्ठिओ ताव विप्फुरियं से दक्खिणलोयणं, तओ निच्छियवंच्छियत्थलाभो करकलिय-

श्रीगुणचंद  
महावीरच०  
४ प्रस्तावः

॥ ७६ ॥

करवालो कसिणपडकयावगुंठणो मंदं मंदं भूमिविमुक्कचरणो गंतूण पुट्टिदेसे ठिओ घोरसिवस्स, सुणिउमाढत्तो य,  
सो य ज्ञाणपगरिसत्तणेण अणावेक्खिय अवायं अविभाविय पडिकूलत्तं विहिणो अविन्नायतदागमणो नरवइथोभक-  
रणदक्खाइं मंतक्खराइं पुव्वपवित्तविहिणा समुच्चरितो निसुणिओ रत्ता, परिभावियं चऽणेण—अहो एस दुट्ठतवस्सी  
मं थोभविहिणा विवलं काऊण सन्निहितनिहित्तकत्तियाए परिकुवियकयंतभसुहकोणकुडिलाए विणासिऊण हुयवहं  
तप्पिउं वंछति, पहाणनरोवहारविहिणा हि सिज्झंति दुट्ठदेवयाओ, ता किमेत्थ जुत्तं?, अवि य—

एतस्स किं इयाणिं वावडचित्तस्स तिव्वखग्गेण । कदलीदलं व सीसं लुणामि पासंडिचंडस्स ॥ १ ॥

अहवा दुद्धररिउगंधसिंधुराघायदंतुरग्गेण । खग्गेण मज्झ लज्जिज्जईह घायं करंतेण ॥ २ ॥

केवलमुवेहणिज्जो नयेस एयंमि होइ पत्थावे । जं थोभकरणविहिणा मरणं मह वंछई काउं ॥ ३ ॥

तथापि—ज्ञाणावरोहवक्खित्तचित्तपसरंमि हणिउकामस्स । सग्गं गयावि गुरुणो होहिंति परंमुहा मज्झ ॥ ४ ॥

ता जुत्तमिणं ठाऊण दूरदेसंमि वोहिउं एयं । पढमं दिन्नपहारे पडिपहरेउं ममेयंमि ॥ ५ ॥

इय चिंतिऊण रण्णा ठाउं दूरे पयंपियं एयं । गिण्हसु करेण सत्थं रे रे पासंडिचंडाल ! ॥ ६ ॥

इइ सोच्चा ज्ञाणेगग्गभंगरोसोवरत्तनयणजुओ । भालयलवडियभडभिउडिभीसणो उट्ठिओ सोऽवि ॥ ७ ॥

करकलियनिसियकत्तियनियंतकसिणप्पमोलिजडिसंगो । अह तिव्वगव्वघोरं घोरसिवो भणिउमाढत्तो ॥ ८ ॥

घोरशिव-  
जालस्फोटः

॥ ७६ ॥

रे रे दुट्टनराहिव ! विलज्ज निस्सत्त मा पलाइहिसि । सुयविसयतिक्खदुक्खाओ जेण मोएमि तं ज्ञत्ति ॥ ९ ॥  
रण्णा पढियं मा गज्ज निप्फलं पहर रे तुमं पढमं । न कयाइवि अम्ह कुले पढमपहारो कओ रिउणो ॥ १० ॥  
तत्तो विचित्त चग्गणसुनिउणकरणप्पयारकुसलेण । घोरसिवेणं रत्तो पवाहिया कत्तिया कंठे ॥ ११ ॥  
रत्तावि तक्खणं चिय दक्खत्तणओ इमस्स सत्थजुओ । हत्थो पहारसमए बद्धो नियवाहुवंधेण ॥ १२ ॥  
भुयदंडनिविडपीडणविहडियदढपहरणंमि हत्थंमि । मुट्ठिप्पहारपहओ निवाडिओ सो धरणिवट्ठे ॥ १३ ॥  
दढमंततंतसिद्धीवि विहडिया तस्स तंमि समयंमि । विवरंमुहंमि दइवे अहवा सव्वं विसंययइ ॥ १४ ॥  
अह वीसमिऊण खणं घोरसिवो फुरियवीरिओ सहसा । पारद्धो रत्ता सह जुज्झेउं वाहुजुज्झेणं ॥ १५ ॥  
मल्लाण व खणमुट्ठीण पडणपरिवत्तणुवलणभीमो । सरहसहसंतभूओ अह जाओ समरसंरंभो ॥ १६ ॥  
निविडभुयदंडचंडिमसंपीडणविहडियंगवावारो । मुच्छानिमीलियच्छो अह निहओ सो महीवइणा ॥ १७ ॥  
एत्थंतरंमि तियसंगणाहिं वियसंतसुरहिकुसुमभरो । जयजयसहुम्मीसो पम्मुक्को नरवइसिरंमि ॥ १८ ॥  
हारद्धहारकंचीकलावमणिमउडमंडियसरीरा । रणज्झणिरमदुरनेउरखपूरियदसदिसाभागा ॥ १९ ॥  
नवपारियायमंजरिसोरभरहसुम्मिलंतभसलकुला । धरियधवलायवत्ता तहागया देवया एक्का ॥ २० ॥ जुम्मं ।  
तीए भणियं नरसिंघ ! निच्छियं तंसि चेव नरसिंघो । जेणेस महापावो खत्तियखयकारओ निहओ ॥ २१ ॥

श्रीगुणचंद  
महावीरचं  
४ प्रस्तावः

॥ ७७ ॥

रणणा भणियं कह देवि ! कहसु खत्तियखयंकरो एस ? । मइ जीवन्ते संपइ, पडिभणइ निवन्तओ देवी ॥ २२ ॥  
एएण किंपि सिद्धिं समीहमाणेण पावसमणेण । हणिआ कलिंगवंगंगहूणपंचालपमुहनिवा ॥ २३ ॥  
दिट्ठिप्पवंचमाइंदजालपमुहेहिं कूडकवडेहिं । अच्छरियाइं दावितएण को को न वा नडिओ ? ॥ २४ ॥  
न य केणवि एस जिओ न यावि एयस्स लक्खियं सीलं । तुमए उभयंपि कयं अहह मई निम्मला तुज्झ ॥ २५ ॥  
इय तुह असरिससाहससुंदरचरिएण हरियहिययाए । मम साहसु किंपि वरं जेणाहं तुज्झ पूरेमि ॥ २६ ॥  
ताहे मउलियकरकमलसेहरं नामिउं सिरं राया । भणइ तुह दंसणाओऽवि देवि ! अन्नो वरो पवरो ? ॥ २७ ॥  
भणियं सुरीएँ नरवर ! इयरजणोव्व न जइवि पत्थेसि । तहवि तुह वंचियत्थो होही मज्झाणुभावेण ॥ २८ ॥  
इय भणिए नरवइणा पराएँ भत्तीएँ पणमिया देवी । लच्छिव पुण्णरहियाण ज्ञत्ति अदंसणं पत्ता ॥ २९ ॥  
नरिंदोऽवि तारिसमच्चभुयं देवीरूवं सहसच्चिय नयणगोयरमइकंतमुवलब्भ चिंताकल्लोलमालाउलो एवं परि-  
भावेइ—किमेयं सुमिणं उआहु विभीसिया अहवा एयस्स चेव दुट्ठकावालियस्स मायापवंचो किं वा मम मइ-  
विब्भमो उयाहु अवितहमेयंति ?

इय जाव निवो संदेहदोलमालंविउं विकप्पेइ । मा कुणसु संसयं ताव वारिओ गयणवाणीए ॥ १ ॥

घोरसिवोवि मत्तो इव मुच्छिओ इव दढदुघणताडिओ इव महापिसायनिप्फंदीकओ इव सुसियसारवक्खरो इव

घोरशिव-  
पराजयः

॥ ७७ ॥

पियविरहमहागहगहिओ इव दुट्टोसहपाणप्पणट्टचित्तचेयणो इव खणंतरं चिट्ठिय सिसिरमारुण समासासियसरीरो  
 योवोवलद्धचेयणो मंदमंदमुम्मीलियलोयणजुयलो लज्जावसविसंडुलसव्वंगोवंगो अइदीणवयणो दीहमुस्ससिय राया-  
 णमयलोइउं पवत्तो, नरवइणावि दढसंजायकरुणभावेण अइदुक्खिओ एसोत्ति उवलक्खिय भणिओ घोरसिवो-  
 मो किमवल्लोएसि?, घोरसिवेण सगग्गयं भणियं-महाराय! अवलोएमि नियकम्मपरिणइविलसियं, राइणा  
 भणियं-किमेवं सविसायं जंपसि?, सव्वहा धीरो भव परिहर दुरज्झवसायं परिचय कोवकंडुं विमुंच विजयाभिलासं  
 जणुसर पसमाभिरइं पियसु करुणारसं परिचित्तसु जुत्ताजुत्तं समुज्झसु खुदजणोचियं वावारंति, अह समीहियत्य-  
 सिद्धी न जायत्ति सम्मसि ता गिण्हसु इमं परिकुवियकयंतजीहाक्खालं नीलपहापडलसामलियसयलदिसिचक्कवालं  
 मम करवालं, करेसु मम सरीरविणासणेण नियसमीहियसिद्धिं, जओ मुक्को मए संपयं पोरिसाभिमाणो तुह कज्जसाह-  
 णव्वाएत्ति । अवि य—

अञ्जउ तरंगभंगुरमसारगं नियसरीरयं दूरे । जीयंपि हु परहियकारणेण धारित्ति सप्पुरिसा ॥ १ ॥

जं पुण पढमं चिय तुज्झ कारणे नो समप्पिओ अप्पा । विहिओ य ज्ञाणविग्घो एयं नणु कारणं तत्थ ॥ २ ॥

मम विरहे एस जणो एसो नीसेससाहुवग्गो य । धम्मव्वंसमवस्सं पाविस्सइ पावलोयाओ ॥ ३ ॥

इण्हि तुह गुरु दुक्खं उवलक्खिय वद्धकक्खडसहावं । निरवेक्खं मज्झ भणो जायं सेसेसु कज्जेसु ॥ ४ ॥



श्रीगुणचंद  
महावीरच०  
४ प्रस्तावः

॥ ७८ ॥

घोरसिवेण भणियं—महाभाग ! मा एवमुल्लवेसु, जीवसु तुमं मज्जीविण्णावि जाव जलहिकुलसेलससितारयदिवोयरे,  
पसीयसु मे, वियरसु एकं पसायंति, राइणा भणियं—किमेवं वाहरसि ?, जीवियदाणाओऽवि किमवरमदेयं ? ता असं-  
भंतो पत्थेसु, घोरसिवेण भणियं—जइ एवं ता अणुजाणसु मम एयंमि पज्जलंतजालासहस्सकवलियसलभकुलसंकुले  
मिसिमिसंतद्धदद्धकलेवरुच्छलंतविस्सगंधुदुरे मसाणहुयासणे पवेसुज्जमं, हवसु धम्मबंधवो, नन्नहा मे पुवविहिय-  
महापावपवयकंतस्स अवस्सं विस्सामो भविस्सइत्ति, रण्णा भणियं—कुओ तुह पुवं पावसंभवो ?, जओ कयाइं  
तुमए विविहाइं तवचरणाइं आपूरियाइं पावभक्खणदक्खाइं मंतज्झाणाइं पूइयाइं देवकमकमलाइं निवत्तियाइं  
वेयरहस्सज्झयणाइं उवासिओ गुरुजणो पवट्टिया धम्ममग्गेसु पाणिण्णो, ता न सब्बहा वोत्तुमवि जुत्तमेयं भवारिसाणं,  
घोरसिवेण भणियं—महाराय ! अलमलं मम पासंडिचंडालस्स वीसत्थघाइणो पयडियविचित्तकूडकवडस्स दक्खिन्नर-  
हियस्स निसायरस्सेव निकरुणस्स, किंपागतुरुफलस्सेव वाहिरमेत्तरमणीयस्स वगस्सेव सुसंजमियपाणिप्पायप्पया-  
रस्स भुयंगमस्सेव परच्छिद्दावलोयणनिरयस्स दुज्जणस्सेव मुहमहुरभासिणो संकित्तणेणं, एवं च सब्बहा विरत्तोऽमिहि  
पावपंकपडिहत्थाओ नियकडेवराओ, नेव य अन्नो पावविसोहणोवाओ, राइणा भणियं—भो भो किमेवं पुणो पुणो  
अत्ताणं अत्ताणं व पुरिसं दूसेसि ?, पयडक्खरं निवेएसु नियपुव्वित्तंतं, घोरसिवेण भणियं—महाराय ! गरुओ एस  
वुत्तंतो, राइणा भणियं—किमजुत्तं ?, साहेसु, घोरसिवेण भणियं—जइ एवं ता निसामेहि—

घोरशिव-  
पश्चात्तापः

॥ ७८ ॥

अत्थि सुरसरितुसारपवित्तपरिसरुहेसं विविहावणभवणमालाविभूसियं समूसियसियवेजयंतीरेहंतसुरमंदिरसिहरं  
सिरिभवणं नाम नयरं, तत्थ य पयंडमायंडमंडलुहामपयावपरिसोसियविपक्खजलासओ अणेगसमरवावारविठत्तजसो  
अवंतिसेणो नाम राया अहेसि, जस्स विजयजत्तापत्थियस्स पत्थिवसहस्साणुगम्ममाणमग्गस्स उहंडपुंडरीयपंडुरच्छत्त-  
च्छाइयगयणाभोगा नट्टदिवसावगासव सोहंति दस दिसाभागा, जस्स य गजंतमत्तकुंजरगंडत्थलगलंतनिरंतरमयजला-  
सारजायदुद्दिणंधयारभीयाभिसारियव अणुसरइ कवाडवियडं वच्छत्थलं रायलच्छी, जस्स चउविहाउज्जघोरघोसं मे-  
होहरसियंपिव सोऊण दूरं पलायंति रायहंसा, जस्स समरंगणेषु रोसारुणाओ पडिसुहडेसु पडिबिंबियाओ पप्फु-  
ल्लसुकुमारकरवीरकुसुममालाउव रेहिंति दिट्ठीओ, तस्स य नियरूवलावन्नजोवणगुणावगणियरइप्पवायाओ नीसे-  
सपणइणीपहाणाओ दुवे भारियाओ अहेसि, पत्तलेहा मणोरमा य, पढमाए जाओ अहमेको पुत्तो वीरसेणो नाम,  
वियाए पुण विजयसेणोत्ति, गाहिया दोऽवि अहे धणुवेयपरमत्थं कुसलीकया चित्तपत्तच्छेयविणोएसु सिक्ख-  
विया य खेडयस्वग्गगुणवणियं जाणाविया महल्लजुद्धं, किं बहुणा?, मुणाविया सब्बकलाकलावं, अन्नया य उंचिओत्ति  
परिचिंतिय ठाविओऽहं ताएण जुवरायपए, दिन्ना य मज्झ लाडचोडमरहट्टसोरट्टपमुहा देसा कुमारभुत्तीए, परिपालेमि  
जुवरायत्तणं, ममंपि अणुमग्गमणुसरइ सुहडाडोवसंकुडा पगलंतगंडत्थला दप्पुदुरसिंधुरघडा, ममावि मग्गओ धावंति  
तरलतरतुरंगपहकरा, मज्झंपि परसुसेलचंडगंडीवसरविसरकुंतगयापहरणहत्थाइं वित्थरंति चउदिसिंवि पुरिसवलाइंति,

श्रीगुणचंद  
महावीरच०  
४ प्रस्तावः

॥ ७९ ॥

दुइयस्सवि मज्झ सवत्तभाउणो दिन्नाइं ताएण कइवय गामसयाइ, एव च ।वसयसुहमणुहवंताणं वच्चंति वासरा ।  
अण्णया खणविपरिणामधम्मयाए जीवलोयविलसियाणं पइसमयविणाससीलयाए आउयकम्मदलियाणं अप्प-  
डिहयसासणत्तणओ जममहारायस्स सुरिंदचावचवलयाए पियजणसंपओगसमुब्भवसुहस्स पाविओ अवंतिसेणराया  
पंचत्तंति, कयंमि य तम्मयकिच्चे मंतिसामंतसरीररक्खप्पामोक्खपहाणलोएण निवेसिओऽहं रायपए, पयट्ठियाइं  
मए तायस्स सग्गंगयस्स कएण तडियकप्पडियदीणाणाहाणिस्सियविदेसियजणाण महादाणाइं कारावियाइं उत्तुं-  
गसिंगसुंदराइं देवमंदिराइं निरुवियाइं अवारियसत्ताइं, कालकमेण य विगओ मम सोगो, वसीकयं सामंतचकं, नि-  
वासिया नियमंडलविलुंपगा पयट्ठिओ पुव्वपुरिसमग्गो । अन्नया य—

सियसिंधुरखंधगओ विलयाजणधुवमाणसियचमरो । धरियधवलायवत्तो किंकरनरनियरपरियरिओ ॥ १ ॥

उम्मग्गपयट्ठुहामतुरयघट्टुक्खउद्वयरओहो । नयरओ निग्गओऽहं वणलच्छीपेच्छणट्ठाए ॥ २ ॥

जाव य तत्थ पेच्छामि पुप्फफलसमिद्धवंधुरं तरुणतरुगणं परिभमामि माहवीलयाहरेसु अवलोएमि कयली-  
दलाणं रुंदत्तणं निरिक्खामि संपिंडियससिखंडपंडुरं केयइपत्तसंचयं अग्घाएमि अणग्घवउलमालियासुरहिपरिमलं  
करेमि करतलेण सोरभभरलोभमिलंतरणज्झणंतफुलंधयरिंछोलिलिहिज्जमाणमयरंदं नवसहयारीमंजरीपुंजं ताव सह-  
सच्चिय सुणेमि नियपरियणकलयलं । कहं ?—

नवृत्ते-  
राज्याप्तिः०

॥ ७९ ॥

सामी ! पेच्छह गयणंगणंमि कह वट्टए महाजुज्झं ? । सज्झसकरमइभीमं सुराण विज्जाहराणं वा ॥ १ ॥  
एवं सोभा मएवि उत्ताणीकयानिमेसलोयणेण उट्टमवलोयमाणेण दिट्ठा विविहप्पयारेहिं जुज्झमाणा गयणंमि  
विज्जाहरा, ते य एवं जुज्झंति—

सियमत्तगसपलसित्तसूलं अवरोप्परु मेलहिं भिंडिमाल । वंचावहि तक्खणि लद्धरक्ख पुण पहरह जय जस संवपक्ख १

खणु निट्ठुरगुट्ठिहिं उट्ठियंति, खणु पच्छिमभागमणुवयंति ।

खणु जणगजणणि गालीउ देंति, खणु नियसोंडीरिम कित्तयंति ॥ २ ॥

अच्छी निमीलियसुय रहिं चिर साहिय विजयविज्ज, उणु खणे खणे जायहिं जुज्झसज्ज ।

अविगणिय मरण रणरसियचित्त, भुयदंडमहावलमयविलित्त ॥ ३ ॥

इय तेसिं खयराणं परोप्परं जुज्झिराणमेक्केणं । लद्धूण छलं अन्नो पहओ गुरुमोग्गरेण सिरे ॥ ४ ॥

पडिओ धरणीवट्ठे ममंतिए विगयचेयणो सो य । मुच्छानिमीलियच्छो विच्छाओ छिन्नरक्खोव ॥ ५ ॥

एत्थंतरे तयणुमग्गेण चेव कट्ठियनिसियखग्गो पधाविओ इयरो विज्जाहरो तस्स वहनिमित्तं, मुणिओ य मए  
जहा एसो एयस्स विणासणकए एतित्ति, तओ मए भणिया सद्वेहिणो धाणुहिया अंगरक्खा य, जहा—

रे रे रक्खह एयं भूमीतलनिवडियं महाभागं । एयं विणासणुज्जुयमित्तं खयरं पडिक्खलह ॥ १ ॥

श्रीगुणचंद  
महावीरच०  
४ प्रस्तावः

॥ ८० ॥

असिखेडयहत्येहिं तस्संगं छाड्यं वरभडेहिं । ओगासगलभमाणो रुद्धो खयरो तओ भणइ ॥ २ ॥  
हे भो नरिंद ! मुंचसु एयं खयराहमं मम वहट्ठा । एसो खु मज्झ वइरी विणासियवो मएऽवस्सं ॥ ३ ॥  
भणिओ य मए खयरो किं पलवसि तं पिसायगहिओव । किं एस खत्तधम्मो ? जेणेवमहं करेमिति ॥ ४ ॥  
किं चावरद्धमिमिणा जेणेयं मारिउं समीहेसि । सो भणइ एस मम दारभोगरसिओत्ति ता हणिमो ॥ ५ ॥  
ताहे मए स भणिओ साहू इयरो व होउ नऽप्पेमि । सरणागयरक्खणलक्खणं च राईण खत्तवयं ॥ ६ ॥  
उच्चद्धभिउडिभंगो रोसारुणनयणजुयलदुप्पेच्छो । फरुसक्खरेहिं खयरो ताहे मं भणिउमाढत्तो ॥ ७ ॥  
रे रे दुट्ठनराहिव ! मा वोहसु केसरिं सुहपसुत्तं । दिट्ठीविसाहितुंडं कंइयसु मा करग्गेण ॥ ८ ॥  
जालालिभीममग्गिं अवक्कमसु य मा तुमं पयंगोव । जइ वंछसि चिरकालं रज्जं काउं महियलंमि ॥ ९ ॥  
भणिओ य मए एसो किं रे वाहरसि मुक्कमज्जाय ! । सप्पुरिसमग्गलग्गस्स मज्झ जं होइ तं होउ ॥ १० ॥  
चिरकालजीविणवि पेरेतेऽवस्समेव मरियव्वं । ता अवसर दिट्ठिपहाओ कुणसु जं तुज्झ पडिहाइ ॥ ११ ॥  
जइ एवं ता विहिणो मा दाहिसि दूसणं तुमं राय ! । इय भणिऊण सरोसो खयरो सो गयणमुप्पइओ ॥ १२ ॥  
तयणंतरं मए निरूविओ सो भूमितलनिवडिओ विज्जाहरो जाव अज्जवि सजीवो ताहे काराविया  
चंदणरसच्छडापहाणा सिसिरोवयारा संवाहियाइं सरीरसंवाहणनिउणेहिं पुरिसेहिं सवंगाइं, खणंतरेण लद्धा तेण

चेयणा उम्मीलियं नयणनलिनं अवलोइयं दिसिमंडलं आलविओ पासवत्ती परियणो—भो भो महायस ! कहमहमिह  
 महीवट्टे निवडिओ ? , कथ वा वेरिविज्जाहरो ? , को वा एस देसो ? , किंणामं इमं नयरं ? को वा एसो लुत्तच्छायानि-  
 वारियरविकरपसरो परिचलंतधवलचामरजुयलो मज्झकए नरनियरं वावारित्तो पुरो संठिओ चिट्ठइ महायसो नराहिव-  
 इत्ति ? , इमं च सोचा निवेइयं से परियणेण गयणपडणाओ आरम्भ सधं जहावित्तंति । तओ सो खयरो दीहं नीससिय  
 मम पचासत्ते ठाऊण जोडिय करसंपुडं विन्नविउमाढत्तो—महाभाग ! धन्ना सा महिमहिला जीसे तं पई कयलक्खणा  
 इमे भिच्चा सेवंति जे तुह चरणकमलं धन्ना ते सुहडा जे तुह कज्जे तणं च नवि गणंति नियजीवियं, अहो ते परो-  
 वयारित्तणं अहो सप्पुरिसकम्माणुवत्तित्तणं अहो नियकज्जनिरवेक्खया अहो सरणागयवच्छलत्तणं, न सब्बहा मम  
 मणागंपि पीडमुप्पाएइ सत्तुपराभवो जं तुमं सयमेव पुरिसरयणभूओ दिट्ठोसि, मए भणियं—महाभाग ! अणवेक्खिय-  
 जुत्ताजुत्तवियारो हयविही जं तुम्हारिसाणवि निवडंति एरिसीओ आवयाओ, अणुभूयपुव्वमवि पावंति विसमं  
 दसाविवागं, सब्बहा असरिसमिमं जेण न कयाइ रंभाथंभो सहइ मत्तमायंगगंडयलकंदूवुच्छेयं, (न रेहइ जुज्जमाणो  
 मुणालतंतू ) पासंमि, को पुण साहेसु एत्थ वइयरो ? , खयरेण भणियं—किमेत्थ कहियच्चं ? , पच्चक्खमेव दिट्ठं महा-  
 णुभागेणं, मए भणियं—सम्मं निवेएसु, खयरेण भणियं—जइ कोऊहलं ता निसामेसु—

कलहोयकूलकोडीविराइओ रयणकोडिविच्छुरिओ । वेयहगिरी तुमएवि निमुणिओ भरहखेत्तंमि ॥ १ ॥

श्रीगुणचंद  
महावीरच०  
४ प्रस्तावः

॥ ८१ ॥

सुरसिद्धजक्खरक्खसकिंनरकिंपुरिसमिहुणरमणिज्जो । सुरहिवरकुसुमतरुसंडमंडिउद्दामदिसिनिवहो ॥ २ ॥  
विज्जाहररमणीजणरमणीयं विजियसवपुरसोहं । तत्थऽत्थि गयणवल्लभनयरं नामेण सुपसिद्धं ॥ ३ ॥  
तत्थ य राया निवसइ समग्गविज्जासहस्सवलकलिओ । पणमंतखयरमणिमउडकिरीडटिविडिक्खियग्गकमो ॥ ४ ॥  
नियवलतुलियाखंडलपरकमो गुरुपयावहयसत्तू । तिहुयणविक्खायजसो नामेणं विजयराओत्ति ॥ ५ ॥  
रूवाइगुणसमिद्धाए तस्स भज्जाए हिययदइयाए । कंतिमईए पुत्तत्तणेण जाओ अहं एक्को ॥ ६ ॥  
पकओ पुरे पमोओ मह जम्मे तत्थ खयरराएणं । करिणो मोत्तूण परे विमोइया बंधणेहिंतो ॥ ७ ॥  
अह सुपसत्थंमि दिणे सम्माणिय पणइसयणगुरुवग्गं । जयसेहरोत्ति नामं ठवियं मम गुरुजणेणंति ॥ ८ ॥  
गयणंगणपरिसक्कणपमोक्खविज्जाओ गाहिओ अहयं । अह तरुणभावपत्तो गुरुहिं परिणाविओ भज्जं ॥ ९ ॥  
पउमावइत्ति नामेण पवरविज्जाहरिंदिकुलजायं । रूवाइगुणगेणंण विजयपडायंव कामस्स ॥ १० ॥ जुम्मं ।  
एस पुण वइरिखयरो रहनेउरचक्कवालपुरपहुणो । सिरिसमरसिंहनामस्स अत्तओ अमरतेओत्ति ॥ ११ ॥  
वालवयस्सो मम गाढरूढपेमाणुबंधसव्वस्सो । विस्सासपयं सवेसु पुच्छणिज्जो य कज्जेसु ॥ १२ ॥  
सहसयणपाणभोयणचंकमणट्टाणकरणनिरयाणं । अहं दोण्हवि कालो वोळइ दढमेक्कचित्ताणं ॥ १३ ॥  
अह परियणेण मज्झं निवेइयं एगया रहट्टाणे । जह एस तुज्झ मित्तो विरूवचारी कलत्तंमि ॥ १४ ॥

जयशेखर-  
वृत्तम्.

॥ ८१ ॥

असद्वहणाओ मए स परियणो वारिओ खरगिराहिं । अघडंतमेवमन्नं न भासियव्वं मह पुरोत्ति ॥ १५ ॥  
 सयमवि दिट्ठं जं जुत्तिसंगयं तं वयंति सप्पुरिसा । सहसत्ति भासियाइं पच्छाऽपत्थं व्राहिति ॥ १६ ॥  
 रविकरपसरोघ जणे घणपडलच्छाइओऽवि विप्फुरिओ । अह एस वइयरो गोविओऽवि पणयाणुरोहेण ॥ १७ ॥  
 रायमवणाओ सगिहंमि एगया आगओऽम्हि पेच्छामि । सयमेव तं कुमित्तं अणज्जकज्जंमि आसत्तं ॥ १८ ॥  
 दट्ठूण तं तहट्ठियमेगंते जाव चिंतिउं लग्गो । नियपरियणपरियरिओ तावेस पलाइओ झत्ति ॥ १९ ॥  
 अहमवि पहरणसहिओ नियधोवपहाणपुरिसपरियरिओ । तस्साणुपहे लग्गो सोऽवि य अहंसणं पत्तो ॥ २० ॥  
 मणपवणजइणवेगेण जाव पत्तोऽम्हि एत्थ ठाणंमि । ता एस महापावो मम पडिओ चक्खुमग्गंमि ॥ २१ ॥  
 परियणपुरिसावि मए सयलासु दिसासु पेसिया पुवं । एयस्स विणासकए अहमेक्को एत्थ संपत्तो ॥ २२ ॥  
 असहायं मं दट्ठुं एसो सहसत्ति जुज्झिउं लग्गो । एत्तो अन्नं सवं जायं तुम्हंपि पचक्खं ॥ २३ ॥  
 एत्थंतरंमि सन्नाहकरणदढगूढकायदुद्धरिसा । भूमियलं पेक्खंता खयर तत्थागया तुरियं ॥ २४ ॥  
 पुट्ठा य मए साहह किं भो तुज्झं समागमणकज्जं । तेहिं कहियं सामी इह सुवइ निवडिओ अम्हं ॥ २५ ॥  
 सो दंसिओ य तेसिं तो ते दट्ठूण तस्स पडियरणं । अचंतहरिसियमणा मं पइ भणिउं समाढत्ता ॥ २६ ॥  
 संमं कयं नराहिय ! जमेवमेयस्स पालणा विहिया । जं एयकए वाढं परितप्पइ खयरनरनाहो ॥ २७ ॥



श्रीगुणचंद  
महावीरच०  
४ प्रस्तावः

॥ ८२ ॥

एयस्स मग्गणकए सवत्थवि पेसिया खयरसुहडा । जं एको चिय पुत्तो एसो सिरिखयरनाहस्स ॥ २८ ॥  
ता जयसेहरकुमरं पेसह एयं जहा समप्पेमो । सुहिसयणजणणिजणयाण दंसणुकंठियमणाणं ॥ २९ ॥  
भणिओ मए स खयरो कुमार ! तुह परियणो भणइ किंपि । ता साह तुमं चिय किं पुणेसि पच्चुत्तरं देमो ॥ ३० ॥  
कुमरेण तओ भणियं एगत्तो तुज्झ असरिसो पणओ । एगत्तो गुरुविरहो दोन्निऽवि दोलंति मह हिययं ॥ ३१ ॥  
ताहे विसिट्ठभोयणदिवंसुयरयणभायणाईहिं । सम्माणिकुण कुमरो सट्ठाणं पेसिओ स मए ॥ ३२ ॥  
तेणावि भणियमेयं नरिंद ! काएण एस वच्चिस्सं । हिययं तु निगडजडियं व तुम्ह पासे परिव्वसिही ॥ ३३ ॥  
वरमत्थखओ वरमन्नदेसगमणं वरं मरणदुक्खं । सज्जणविरहो पुण तिक्खदुक्खलक्खंपि अक्खिवइ ॥ ३४ ॥  
इय भणिउं सोगगलंतनयणजलविंदुधोयगंडयलो । काऊण मम पणामं सपरियणो अइगओ गयणं ॥ ३५ ॥  
अहंपि तेसिं गयणुप्पयणसामत्थमवल्लोइंतो पुव्वदिट्ठसमरवावारसंरंभमणुचिंतयंतो चिंतयंतो केत्तियंपि वेलं विलंबि  
नियरज्जकज्जाइं अणुचिंतितुं पवत्तो, विसुमरियं च मम भोगपमुहकज्जकोडिकरणपसत्तस्स तं गयणनिवडियविज्जाहरमार-  
णउज्जुयदुट्ठखयरस्स सामरिसं वयणं । एगया य रयणीए जाव कइवयपहाणजणपरियरिओ नियदेससुत्थासुत्थपरिभाव-  
भावणेण य रायंतररहस्सायन्नणेण य गयतुरयगुणवन्नणेण य किन्नराणुकारिगायणजणपारद्वकागलीगीयसवणेण य  
सायरपणच्चिरवारविलासिणीचित्तपयक्खेवनिरिक्खणेण य नम्मालावकरणेण य विंदुचुयपहेलियापणहुत्तरजाणणेण य

जयशेखर-  
गमनं.

॥ ८२ ॥

विश्रोयंतो चिद्वामि ताव अयंडविहडियवंमंडमंडुडामरो जुगंतपणचिरभेरवपहयडमडमेंतडमरुयनिनायनिदुरो खरनहर-  
निहारिमवगलगलगजियदारुणो पासपरिवत्तिभवणभित्तिपरिफालणसमुच्छलंतपडिसद्वयसहस्सदुधिसहो समुद्विओ  
हलबोलोत्ति, तं च सोऊण विप्फारिनयणजुयलो सयलदिसिमंडलमहपवलोयमाणो पेच्छामि तडिदंडपयंडकरवाल-  
पावडकरे भवणंगणमभिसरंते हणहणहणत्ति भणंते विज्जाहरे, ते य दड्डणमम परियणो भयभरधरहरंतसरीरो करुणाइं  
दीणाइं वयणाइं समुल्लपितो सयलदिसासु सिग्घं पलाओत्ति, ताहे पहरणरहिओ एगागीवि ठाऊणाहं तेसिं संमुहं  
जंपिउमेयं पवत्तो य-रेरे किं गलगहियव्व निरत्थयं विरसमारसह? के तुम्हे? केण पेसिया? किं वा आगमणकज्जं?,  
तेहिं भणियं-रे रे नरिंदाहम! तइया अम्ह पडुणो सत्तुरक्खणेण वयणमवगणिय संपयं धिद्वयाए अयाणमाणो इव के  
तुम्हे केण पेसिया किं वा आगमणकज्जंति पुच्छसि, जइ पुण विसेसकहणेण तूससि ता निसामेहि, अम्हे विज्जा-  
हरा रहनेउरचफावालपुरविज्जाहरनरिंदसिरिसगरसिंघनंदणेण वेरिखयरासमप्पणपरूढगाढकोवानलेन सिरिअमरते-  
यकुमरेण तुह दुपिणयतरुफलदंसणत्थं पेसियत्ति, मए भणियं-जइ एवं ता जहाइट्टं उवचिद्वहत्ति, तओ अखयसरीरं  
पेय मं गहिऊण उप्पइया ते गयणमग्गेण, गया य दूरदेसं, मुक्को य अहं एगत्थ भुयंगभीमे गिरिनिगुंजे, भणियं च  
मए-किं रे! एवं मुंचह? जं नेव पहरह, तेहिं भणियं-एत्तिया चेव पडुणो आणा, पडुचित्ताणुवत्तणं हि सेवगस्स  
पम्भो, एवं भणिय उप्पइया ते तओ ठाणाओ। अहंपि कोइलकुलगवलगुलियसामलासु सयलदिसासु केसरिकि-

श्रीगुणचंद  
महावीरच०  
४ प्रस्तावः

॥ ८३ ॥

सोरनिद्वयनिदारियसारंगपमुक्कविरसारावभीसणेसु काणणेसु वणमहिसावगाहिजंतपल्लसमुच्छलंतपंकपडलदुग्गेसु म-  
ग्गेसु तरुवरसाहासंहरिसवसनिवडंतदहणनिदज्झमाणेसु वेणुगहणेसु पज्जलंतपईवसिहाभीसणविप्फुरंतरत्तलोयणेसु  
इओ तओ वियरंतेसु निसायरगणेसु वराहतिकुखदादुक्किण्णलेट्टुनियरुचावचासु वणत्थलीसु अमुणियमग्गुम्मग्गो  
विमूढदिसाभागो असोढपयप्पयारो एकंमि गुरुतरुवरे समारुहिउं साहाए पसुत्तोमिह, दुट्ठमहिलव्व कट्ठेण समा-  
गया निदा, पच्छिमरयणिसमए य जामकरिघडव्व पासमल्लीणा चित्ता पवोहमंगलतूरेहिं पिव रसियं पुराणसि-  
यालेहिं मागहेहिं व पढियं सुयगणेहिं, अह उइयंमि सयलतिहुयणभुवणप्पईवंमि दिवायरंमि उट्टिऊण कयपाभाइ-  
यकिच्चो ओयरिऊण तरुवराओ एकदिसाए पयट्ठो गंतुं, खणंतरेण य तरुणतरुचक्कलाववद्धपरियरो कोदंडकंडवावड-  
करो नियपणइणीए अणुगम्ममाणो गुंजाफलमालियामेत्तकयाभरणो भुयंगकंचुयनिव्वत्तियकेसकलावसंजमणो त-  
क्खणविणिवाइयसिहंडिससिहमुहविरइयकन्नपूरो दिट्ठो एको पुलिंदो, सो य पुच्छिओ मए-भो महाणुभाग ! का एसा  
अडवी ? को वा नियसिहरग्गभग्गरविरहतुरयमग्गो एस गिरिवरो ? का वा नयरगामिणी वत्तिणित्ति ? , पुलिंदेण भ-  
णियं-अणामिया नाम एसा अडवी, सज्झाभिहाणो य एस गिरिवरो, एसावि वित्तिणी कंचणपुरनयरमणुसरएत्ति ।  
तओ लग्गोऽहं तीए वत्तणीए तावसतवस्सीव कंदमूलफलेहिं पाणवित्तिं करिंतो पत्तो कइययवासरेहिं कंचणपुरं,  
तत्थ य मुणिवरो इव निप्पडिवद्धो वीयरगो इव सव्वसंगरहिओ ठाऊण कइयय दिणाणि पेच्छंतो पुव्वट्ठाणाइं अव-

अमितते-  
जसा वीर-  
सेननयनं.

॥ ८३ ॥

लेपंतो गामागरे निरुधितो धम्मियज्जकारावियाइं समुत्तुंगसुंदरागाराइं सुरमंदिराइं कप्पडिओ इव दाणसालासु पा-  
णविंत्ति कुणमाणो अणवरयपयाणएहिं पत्तो सरज्जसीमासन्निवेसं, तत्थ य कइवयदिणाणि वीसमिय पुणरवि चलिओ  
नियनयराभिमुहं । इत्तेण य सुणिऊण नियलहुभाउणो विजयसेणस्स संपत्तरज्जस्स विभववित्थरं चिंतियं मए—नूणं  
विजयसेणेणाहिद्वियंमि रज्जे न जुत्तं तत्थ मे गमणं । जेण—

पुव्वकयधम्मकम्माणुभावओ पाविऊण रज्जसिरिं । चिंतामणिन्व दाउं को वंछइ वल्लहस्सावि ? ॥ १ ॥

पिच्छामि तहाविय मित्तमंतिसामंतवयणविन्नासं । जं नद्वं नणु रज्जं तं दिद्वं हरणकालेऽवि ॥ २ ॥

इह चिंतयंतो पत्तो कमेण सिरिभवणनयरं, अलक्खिज्जमाणो पुरज्जणेण पविट्ठो सहपंसुकीलियस्स सोमदत्ता-  
भिहाणस्स वयंसस्स गिहे, सो य ममं दट्ठूण झडत्ति जायपचभिन्नाणो सहरिसं पाएसु निवडिय गाढं परुत्तो;  
भणिउमाडत्तो—

तुह विरहे मम नरवर! वरिसं व दिणं न जाइ पज्जंतं । हिमहारचंदचंदणरसावि दूरं तविंत्ति तणुं ॥ १ ॥

भवणं पेयवणं पिव पणइणिवरगो य डाइणिगणोव । सयणावि सुयंगा इव न मणंपि मणा सुहाविंत्ति ॥ २ ॥

एत्तिवदिणाइं लोएण धारिओ कहवि गुरुनिरोहेण । जंतो इण्हिं विदेसे जइ नाह! तुमं न इंतोऽसि ॥ ३ ॥

तो एयं वरभवणं एसो घणवित्थरो इमे तुरया । एसो किंकरवग्गो पडिवज्जसु तं महीनाह! ॥ ४ ॥

एमाइं पणयसाराइं वयणाइं भासंतो भणिओ मए सोमदत्तो—पियवयंस ! किं सोयविहुरो हवसि ? किं वा निय-  
भवणधणाइयं समप्पेसि ? किमेवं तुह पणयसारो पयडीभविस्सइ ? को वा अन्नो ममाओवि तुह पाणप्पिओ ? किं  
वा तुह दंसणाओऽवि अन्नं ममेहागमणप्पओयणं ? ता धीरो भव , अच्छउ सवस्ससमप्पणं, तुह जीवियंपि ममायत्तं  
चेव, तओ काराविओऽहं ण्हाणविलेवणभोयणपमुहं कायवं, खणंतरेण पुच्छिओ मए—पियवयंस ! साहेसु किमि-  
याणिं कायवं ?, सोमदत्तेण भणियं—देव ! किं निवेदेमि ?, मं एकं पमोत्तूणं अन्ने सवे ऽवि मंतिसामंता दढपक्खवाया  
विजयसेणे, नेच्छंति नाममवि तुह संतियं भणिउं, जइ सो कहवि आगमिस्सइ तथावि एयस्स चेव रज्जं, जओ एयस्स  
मुद्धा मती अम्ह दढं वसवत्ती थेवंपि वयणं न विलंघेइत्ति, विजयसेणो पुण नियसरीरमेत्तेण तुम्ह विरहे वाढं परि-  
तम्मइ, भणइ य—जइ एइ जेठ्ठभाया ता धुवं समप्पेमि रज्जधुरं, जहाजेट्ठरज्जपालणमेव अम्ह कुलधम्मोत्ति, एवं ठिए  
किंपि न जाणिज्जइ जुत्ताजुत्तं, ता एत्थेव अलक्खिज्जमाणो तुमं चिट्ठसु कइवयदिणाणि जाव उवलक्खेमि नरिंदाईण  
चित्तं, मए भणियं—एवं हवउत्ति, तओ सोमदत्तेण सामेण य दंडेण य भेएण य उवप्पयाणेण य आढत्ता मंतिसामं-  
तादओ भेइउं, निट्ठुरवज्जगंठिंपिव न य केणवि भिज्जंति उवाएणं, नाओ य तेहिं समागमणवइयरो, निवारिया य  
रायदुवारपाला जहा न सोमदत्तस्स रायभवणे पवेसो दायवोत्ति, विजयसेणस्सवि सिट्ठं जहा तुम्ह जेठ्ठभाया  
पंचत्तं गओत्ति निसामिज्जइत्ति, तेणावि एवं निसामिय कओ महासोगो; पयद्वियाइं मयकिचाइंति, एवंति मह

रज्जकज्जविसयं जं जमुवायं घडेइ सो निउणो । दइवो पडिक्कलो इव तं तं विहडेइ निक्करुणो ॥ १ ॥ अन्नया य गाढवि-  
सायवसविसंठुलेण सुणियपरमत्थेण भणियं सोमदत्तेण-देव ! निम्मज्जाएहिं मंतिसामंताईहिं तुम्ह पंचत्तगमणवत्ता  
निवत्तिया राइणो पुरो, ता जइ कहं पि रायवाडियांए निग्गयस्स विजयसेणस्स दंसणपहे ठाऊण नियदंसणं  
ठावेसि ता जुत्तं होइत्ति, जओ तुम्ह दंसणं वाढमभिकंस्सइ एसो, पडिवत्तं च मए एयं तदणुरोहेण, अन्नया य  
पवरकरेणुगाखंधगओ निग्गओ विहारजत्ताए विजयसेणो, पासायसिहरमारुहिऊण य ठिओ अहं से चक्खुगोयरे,  
झडत्ति दिट्ठोऽहमणेण, सागयं २ चिरागयबंधवस्सत्ति हरिसुप्फुल्लोयणो य जाव सो वाहरिउं पवत्तो ताव तक्खणा  
चेव मंतिसामंतपमुहेहिं रइया अंवरे अंतरवडा, कओ हलवोलो, नियत्तिओ विहारजत्ताओ राया । भणियं च-

असिचं तुह किंपि इमं जं देव ! पिसायदंसणं जायं । किं पंचत्तगयजणो दीसइ य कयावि पच्चक्खो ? ॥ १ ॥

ता लहु गच्छइ भवणं संतिं कारेइ देह भूयवलिं । पारंभइ होमविहिं सुमरइ मच्चुजयं मंतं ॥ २ ॥

वियरसु सुवण्णदाणं माहणसमणाण तक्कुयजणाणं । एवं कहिए सिग्घं मिठेणं चोइया करिणी ॥ ३ ॥

भवणंमि तओ गंतुं जं जइ भणियं तहेव नीसेसं । अइमुद्धुद्धिभावा करावियं विजयसेणेण ॥ ४ ॥

अहं पुण निरुच्छाहो निराणंदो ववगयधीरिमभावो अवयरिय तओ ठाणाओ सोमदत्तस्स अकहमाणो चेव  
पच्छन्नदेसे ठाऊण चित्तिउमाढत्तो, कहं ?—

अणवरयकणयवियरणपरितोसियमाणसावि कह पावा । सामंता मत्ता इव पुरट्टियंपिहु मुणंति न मं ? ॥ १ ॥  
कह वाऽवराहमणेण (सहणेण) भूरिसोगु(मइ) सपयंमि ठवियावि । न गणंति मंतिणो मं तणं व पम्मुक्कमज्जाया ? ॥ २ ॥  
कह नयरमहत्तरया उवयरिया णेगसोऽवि कज्जेसु । माणंति न मं सप्पणयवयणमेत्तेण विहयासा ? ॥ ३ ॥  
जयसेहरकुमरो सो विज्जाहररायसुकुलजाओऽवि । तह उवयरिओऽवि कहं उवेहए मं तदियरोव्व ? ॥ ४ ॥  
होउ वा, किं एएण विगप्पिएण?, अत्तहियमियाणि कीरइ मुच्चइ इमं नयरं गम्मइ अन्नत्थ देसे ओलग्गिज्जइ  
अन्नो गरुओ नरवइत्ति, अहवा सयलजयपयडपरकमस्स सिरिअवंतिसेणमहानराहिवस्स सुओ होऊण कइवय दिणाइं  
रज्जरिद्धिमुद्धुरमणुभविय कहमियाणि अन्नस्स हेट्ठा ठाइस्सामित्ति सव्वहा न जुत्तं परिचिंतिउं, भेरवपडणेण अत्त-  
परिच्चाओ चेव संपयं मे सव्वोवाहिविसुद्धोत्ति निच्छिऊण निग्गओ नयराओ लग्गो भेरवपडणाभिमुहं, वत्तिणीए  
अखंडपयाणेहिं पवच्चंतो संपत्तो तरुणतरुसंडमंडियं उव्वडसिहंडितंडवाडंवररमणिज्जं हंससारसकपिंजलकोकिलकु-  
लकलकलरवमुहलं पुंनागनागजंबुजंवरिनिंवंचंपयासोयसोहियपरिसरुद्धेसं भेरवपडणपच्चासन्नं एकमुचवणं, दिट्ठो  
य तत्थ अणेगजणनमंसिज्जमाणचरणो सल्लक्खणनरसिरकवालमेत्तपरियरो मंतज्झाणपरायणो करकमलकलियजो-  
गदंडो समत्थनाणविन्नाणपरमपगरिसपत्तो ससाहसपरितोसियवेयालो महाकालो नाम जोगायरिओ, पणमिओ य मए  
सवायरेणं दिन्नासीसो य निविट्ठो संनिहियधरणिवट्ठे, अवलोइओऽहं तेण सिणिद्धाए दिट्ठोए, खणंतरे संभासिओ य-

भइ ! उविग्गचित्तो इव लक्खीयसि, ता किं भट्टलच्छीविच्छइति उयाहु विदेसागओत्ति, अन्नं वा किंपि कारणं ?  
 मए भणियं-भयवं ! अम्हारिसा पुत्तरहिया पाणिणो पए पए उविग्गचित्ता चेव, कित्तियाइं कारणाइं साहिज्जंति ?  
 तेण जंपियं-तहावि विसेसयरं सोउमिच्छामि, मए भणियं-भयवं ! किं एएण ज्ञाणविग्घकारण नियवइयरसाह-  
 णेण ? महाकालेण भणियं-किं तुज्झ ज्ञाणचित्ताए ? जहाइट्ठं कुणसु, तओ मए विज्जाहरावलोयणं च जुज्झनिवडि-  
 यखयररक्खणं च महाडविनिवाडणं च नियनगरागमणं च मंतिसामंतपमुहजणावमाणणं च रज्जावहारदुक्खं च  
 उययरियविज्जाहरोवेक्खणं च नयरनिग्गमणं च भेरवपडणं पडुच्च समागमणं च सिट्ठमेयस्स, अह महाकालेण  
 भणियं-अहो विरुद्धकारित्तणं हयविहिणो जमेरिसे असमसाहसधणे जणे विणिम्मिय एरिसत्तिक्खदुक्खभायणं  
 करेइ, अहवा—

साहसधणाण हिययं दुक्खं गरुयंपि सहइ निवडंतं । इयराण दुहलवेणवि विहडइ जरसिप्पिणिपुडं व ॥ १ ॥  
 जह निवडइ गुरुदुक्खं तहेय सोक्खंपि संभवइ तेसिं । इयराण तुल्लसुहदुक्खसंभवो निच्चकालंपि ॥ २ ॥  
 कस्स व निरंतरायं सोक्खं ? कस्सेव नावया इति ? । को वूसिओ खलेहिं नो ? कस्स व संठिया लच्छी ? ॥ ३ ॥  
 इय नाउं चय सोयं पुणोऽवि तुह वंछियाइं होहिंति । सूरुओवि रयणित्तमनियरविगमओ पावए उदयं ॥ ४ ॥  
 जं पुण तुमए भणियं भेरवपडणं करेमि मरणट्ठं । तं बुहजणपडिसिद्धं खत्तियधम्मे विरुद्धं च ॥ ५ ॥



श्रीगुणचंद  
महावीरच०  
४ प्रस्तावः

॥ ८६ ॥

जेण-वंभणसमणच्चिय मरणकज्जमब्भुज्जमंति नो धीरा । विहिविहडियंपि कज्जं घडंति ते बुद्धिविहवेणं ॥ ६ ॥  
तहा-चत्तविसायपिसायं अणलसमविमुक्कविक्रमेकरसं । अणुसरइ सिरी दूरं गयावि पुरिसं हरिसियव ॥ ७ ॥  
तओ मए भणियं-भयवं ! विमूढचित्तलक्खो हि संपयं, न जाणामि जुत्ताजुत्तं न मुणामि उवायं न समीहेमि  
खत्तधम्मं न वियारेमि जणनिंदं न लक्खेमि सुहदुक्खं, सव्वहा कुलालदढदंडचालियवक्काधिरूढं व मम मणो न  
मणागंपि कत्थवि अवत्थाणं पावइ, तो भयवं ! तुमं चेव साहेहि, किं कायवं ? को वा उवाओ समीहियत्थसि-  
द्धीए?, महाकालेण भणियं-वच्छ ! पवज्जसु मम पवज्जं, आराहेसु चरणकमलं, अब्भस्सेसु जोगमग्गं, होहिति  
गुरुभत्तीए मणोरहसिद्धीओ, तओ भयसंभंतो इव सरणागयवच्छलं दालिदाभिभूओ इव कप्पपायवं महारोगपी-  
डिओ इव परमवेज्जं पहीणचक्खुबलो इव पढदेसगं सच्चायरेण तमाराहिउं पवत्तो, दूरमागरिसियं च विणएण मए  
तस्स चित्तं, निउत्तोऽहमेक्को तेण नियरहस्सठाणेसु सिक्खाविओ निस्सेसाइं आगिडिपमुहाइं कोऊहलाइं, अन्नया  
य पसत्थेसु तिहिनक्खत्तमुहुत्तेसु परमपमोयमुव्वहंतेण तेण एगंते उवइट्ठो मम तइलोकविजओ मंतो, कहिओ साहण-  
विही जहा-अट्ठोत्तरसयपहाणखत्तिएहिं मसाणहुयासणो तप्पणिज्जो, कायवं दिसिदेवयावलिवियरणं, पवहियवं  
अणवरयमंतसुमरणं, तओ एस सिज्झिहिई, काही य एगच्छत्तधरणियलरज्जदाणं, पडिवन्नो य मए विणयपणएण,  
समाढत्तो य साहिउं, गओ कलिंगपमुहेसु देसेसु, आरद्धो य जहालाभं खत्तियनरुत्तमेहिं होमो जाव एत्तियं कालंति ।

महाकाल-  
सेवा त्रैलो-  
क्यविजयः

॥ ८६ ॥

ता नरसेहर ! नरसिंघ जं तए पुच्छियं पुरा आसि । किं अप्पाणं निंदसि इणमो नणु कारणं तत्थ ॥ १ ॥  
 भयवसविसंतुलंगा सारंगा इव विचित्तकूडेहिं । जं सत्ता विद्वियां तमियाणिं दहइ मह हियं ॥ २ ॥  
 दुज्झाणकलुसबुद्धित्तणेण पुवं न याणियं एयं । तुह दंसणेण इणिं विवेयरयणं समुल्लसियं ॥ ३ ॥  
 नरसिंहेणं भणियं सचं पावं कयं तए भूरि । जं कीडियाणवि वहे पावं गुरु किमु नरिंदाणं ? ॥ ४ ॥  
 तेसि विणासे जम्हा धम्मभंसो य सीमविगमो य । अवरोप्परं च जुज्झं विलयाजणसीलविलंओ य ॥ ५ ॥  
 ता ठाणे तुह दुच्चरियगरिहणं धम्मगोयरा बुद्धी । एवं ठिएऽवि जलणप्पवेसणं तुज्झ नो जुत्तं ॥ ६ ॥  
 तित्थेसु वच्च कुरु देवपूयणं मुंच निंदियं भावं । पायच्छित्तं पडिवज्ज सुगुरुसयासे पयत्तेण ॥ ७ ॥  
 निंदसु पइक्खणं दुक्कयाइं निसुणेसु धम्मसत्थाइं । उत्तमसंसर्गिं कुणसु चयसु तिवं कसायं च ॥ ८ ॥  
 ईसाविसायमुच्छिद भिंद विसमविसयतरुनियरं । नियजीयनिविसेसं नीसेसं पेच्छ पाणिगणं ॥ ९ ॥  
 पसमरसं पिवसु सया दूरं परिहरसु खुदचरियाइं । जुत्ताजुत्त वियारसु सब्बकज्जेसु जत्तेणं ॥ १० ॥  
 खणपरिणइधम्मत्तं चित्तेसु भवंभि सच्चवत्थूणं । नियसुकयदुकयसचिवत्तणं च लक्खेसु परजम्मे ॥ ११ ॥  
 इय जयमाणस्स सया सुद्धी तुज्झं भविस्सइ अवस्सं । जलणपवेसं सलभा कुणंति कुसला उ न कयावि ॥ १२ ॥  
 एवं संठविज्जण मरणदुरज्जवसायाओ घोरसिवं जाव चिरओ नरिंदो ताव पहयपडहंसुरवपसुहत्तरनिनायवहि-

श्रीगुणचंद  
महावीरच०  
४ प्रस्तावः

॥ ८७ ॥

रियदियंतरा विचित्तमणिभूषणकिरणकच्चुरियमसाणंगणा गयणाओ ओयरिया विज्जाहरा, परमपमोयसुवहंता निव-  
डिया घोरसिवचरणेसु, भणिउमाढत्ता य-देव ! अम्हे गयणवल्लहपुराहिवविजयरायविज्जाहरिंदसुएण सिरिजयसे-  
हररायकुमारेण पेसिया तुम्ह आणयणनिमित्तं, ता कुणह पसायं, आरुहह इमं समुद्धयविजयवेजयंतीसहस्साभि-  
रामं उज्झंतकसिणागरुकप्पूरपूरसुरहिधूवधूमंधयारियदिसाभोगं मणिकणगरयणरइयविचित्तविच्छित्तिभित्तिभागं कुसु-  
मावयंसाभिहाणं वरविमाणं, घोरसिवेण भणियं-भो विज्जाहरा ! मुयह मम विसए पडिवंधं, अन्नोऽहमियाणिं विगय-  
भोगपिवासो, विजणविहारेसु रण्णेसु जाया निवासवुद्धी वद्धा मिगकुलेसु सयणसंबंधसद्धा पलीणो मायामोहो  
जलणजालाकलावकवलियमिव पेच्छामि जीवलोयं, ता जहागयं गच्छह तुम्हे, जहादिट्ठं च से निवेएज्जहत्ति, विज्जा-  
हरोहिं भणियं-मा भणह एयं, जओ जदिणाओ तुम्ह पासाओ गओ जयसेहरकुमारो तदिणादारब्भ जाओ रहने-  
उरचक्कवालपुरनाहेण सिरिसमरसिंघखेयराहिवइणा सह महासमरसरंभो निवडिया अणेगसुहडा, कहमवि महाक-  
ट्टेण निप्पिट्ठो सो अमरतेयाभिहाणो दुट्ठमित्तो, घडिया इयाणिं परोप्परं संघी, कयाइं अन्नोऽन्नघरेसु भोयणवत्थ-  
दाणाइं, अओ एत्तियकालं नियकज्जकोडिवावडत्तणेण संपयमेव नाओ तुम्ह अडविनिवाडणपासोक्खो वइयरो,  
कुमारेण तओ अचंतजायतिवसोगसंदब्भेण विसज्जिया अम्हे सव्वासु दिसासु तुम्हावल्लोयणत्थं, भणिया य-अरे  
सिरघं जत्थ पेच्छह तं महाणुभावं तत्तो सव्वहा आणेज्जह, नन्नहा भोयणमहं करिस्सामि, तओ सव्वत्थ निउणं निउणं

जयशेखर-  
नरागमनं.

॥ ८७ ॥

निरुवंता पत्ता एत्तियं भूमिभागं, एत्थ आगएहिं य निसामिओ तुम्ह संहो, को पुण भीसणे मसाणे एसियवेलं  
होहिति कोऊहलेण सुणंतेहिं कुमारपचाणयणकालागएहिं पुरा तुम्ह निसुयसहाणुमाणेण पञ्चभिन्नायत्ति, ता कुणह  
पसायं जयसेहरकुमारजीवियदाणेण, एत्थंतरे विण्णायपरमत्थेण भणियं पत्थिवेण-भो महासत्त ! परिचय फरुस-  
मावं, पणयमंगमीरूणि भवंति सप्पुरिसहिययाणि ता अंगीकरेसु एएसि पत्थणं, घोरसिवेण भणियं-महाराय !  
चाढं विरत्तं मम रज्जादीहिंतो चित्तं, गाढपावनिबंधणं खु एयं, रण्णा भणियं-मा मेवं जंपेसु, जओ-

सन्नायं दिसओ विसिद्धमुणिणो पालितयस्साणिसं, सासितस्स विसिद्धनीइ मणुए दाणाइं दितस्स य ।  
धम्मो होइ निवस्स वस्समइणो रज्जेऽवि संचिट्ठओ, नो साहुस्स स सत्थवज्जियविहीजुत्तस्स गुत्तस्सवि ॥ १ ॥  
घोरसिवेण भणियं-महाराय ! एवमेवं, राइणा भणियं-जइ एव ता गच्छह तुम्हे, पडिच्छह [वि]जयसेहरकुमार-  
पूयापडिवत्तिं, घोरसिवेण भणियं-महाराओ निवेयइ तं कीरइत्ति, तओ पहरिसिया विज्जाहरा, सायरं पणमिउं  
तेहिं राया विन्नत्तो-जहो महायस ! परमत्थेण तुम्हेहिं दिन्नं अह पडुणो जीवियं, अह पमुक्ककवालपमुइकुल्लिंगो-  
वगरणो विजोगवेयणावसविसप्पमाणनयणंसुधाराधोयवयणो घोरसिवो गाढमालिंगिय नरवइं सगग्गयगिरं  
भणिउमाढत्तो-

कुब्भमतिमिरुब्भामियलोयणपसरेण तुज्झ अवरद्धं । जं किंपि पावमइणा तमियाणि खमसु मम सधं ॥ १ ॥

श्रीगुणचंद  
महावीरच०  
४ प्रस्तावः

॥ ८८ ॥

सीसो इव दासो इव रिणिओ इव किंकरो इव तुहाहं । ता साहसु किं करणीयमुत्तरं राय नरसिंह ! ॥ २ ॥  
रत्ना भणियं जइया नियरज्जसिरिं समग्गमणुहवसि । मम संतोसनिमित्तं तइया साहिज्जसु सवत्तं ॥ ३ ॥  
एवं काहंति पयंपिऊण विज्जाहरोहिं परियरिओ । दिव्विमाणारूढो सो इत्ति गओ जहाभिमयं ॥ ४ ॥  
रायावि पत्ततिहुयणरायसिरिवित्थरं पिव सयलसुकयसंचयपत्तोवचयंपिव समत्थपसत्थतित्थदंसणपूयं पिव जप्पाणं  
मन्नंतो पाणिपइट्ठियखग्गरयणो गओ नियभवणं, निसण्णो सेज्जाए सुत्तो खणंतरं समागआ निहा, निसावसाणे य  
रणज्झणंतमणिनेउररवाणुमग्गलग्गचकंगखलियचंकमणा अणायरसट्ठाणणिउत्तलट्ठकंचीकलावप्पमुहाभरणा सहरिस-  
पधावियखुज्जिवामणिपुल्लिंदिपमोक्खचेडीयाचक्कवालपरिवुडा पविट्ठा चंपयमाला देवी, दिट्ठो राया निहावसंनिस्स-  
हसेज्जाविमुक्कसवंगोवंगो, भणियं चऽणाए-परिणीयपुत्तिओ इव हयसत्तू इव विट्ठत्तदविणोव परिपट्ठियसवसत्थोव  
निब्भयं सुयइ नरनाहो, अह खणंतरे पवज्जियाइं पाभाइयमंगलतूराइं पयडीह्याइं दिसिमुहाइं, पट्ठियं मागहेण-  
लंघेउं विसमंपि दोसजलहिं गंजित्तु दोसायरं, गोत्तं पायडिउं सवीरियवसा चंकंमिउं भीसणे ।  
आसाअंगसमुब्भवेण महसा सारेण संपूरिउं, सूरु देव ! तुमं पिवोदयसिरिं पावेइ सोहावहं ॥ १ ॥

एवं च निसामित्ता पबुद्धो राया, चिंतिउमाढत्तो य-अहो सारस्सयंपिव वयणं जहावित्तवत्थुगब्भं कहं पट्ठियं  
मागहेण ?, एवमेव पुणो पुणो परिभावेमाणो उट्ठिओ सयणाओ, अवलोइया य हरिसवसवियसंतनयणसहस्सपत्ता

चम्पकमा-  
लाखमः.

॥ ८८ ॥

देवी चंपयमाला, पुढा य सा आगमणपओयणं, भणियं च तीए-देव ! अज्ज पच्छिमद्धजामे सेसरयणीए सुहपसु-  
त्ताए सुमिणयंमि सहसच्चिय वयणंमि पविसमाणो मए अनणुप्पमाणो मणिरयणमालालंकिओ पवणसमुद्धुयंचला-  
भिरामो फलिहमयडिंडिरपंडुरडंडोवसोहिओ महज्झओ दिट्ठो, एवंविहं च अदिट्ठपुवं सुमिणं पासिऊण पडिवुद्धा  
समाणी समागया तुम्ह पासंसि सुमिणसुभासुभफलजाणणत्थं, ता साहिउमरिहइ देवो एयस्स फलंति, रत्ता  
भणियं-देवि ! विसिट्ठो तए सुमिणो दिट्ठो, ता निच्छियं होही तुह चउसमुद्दमेहलावलयमहिमहिलापइस्स कुल-  
केउस्स पुत्तस्स लाभो, जं तुम्हे वयह अवितहमेयंति पडिवज्जिय निवद्धा देवीए उत्तरीयंमि निट्ठुरा सउणगंठी,  
खणंतरं च मिहोकहाहिं विगमिय गया देवी निययभवनं, रायावि कयपांभाइयकायंघो निसण्णो सभामंडवंमि  
अह पढममेव गाढकोउहलाउलिज्जमाणमाणसा समागया बुद्धिसांगरपमुहा मंतिणो, भूमितलविलुलियमंडलिमंडला  
निवडिया चरणेसु, दिन्नासणा निविट्ठा सट्ठाणेसु, विन्नविउमाढत्ता य-देव ! अज्ज चउजामावि सहस्सजामव कहमवि  
पमाया अम्ह रयणी घोरसिवमुणिवइयरौवलंभसमूसुगत्तणेणं, जइवि किंपि पसंतवयणावलोयणाइलिं गोवगया कज्जसिद्धी  
वट्ठइ तहावि विसेसेण तुम्हेहिं साहिज्जमाणं सोउमिच्छामो, ता पसियउ देवो रयणिवइयरनिवेयणेणंति, ताहे तेसिं  
वयणाणुरोहओ ईसिं विहसियं काउं जहा घोरसिवेण समं मसाणदेसंमि संपत्तो जह विन्नाओ छोभमायरमाणो  
जहा य सो भणिओ गिण्हसु सत्थं जह तेण कत्तिया वाहिया कंठे जह पडिरुद्धो बाहू सकत्तिओ जह महीयले

निहओ जह उट्ठिओ पुणोऽविहु निष्फंदो जह हओ पच्छा सुरसुंदरीहि खित्तो जह कुसुमभरो समागया देवी जह  
दिन्नो तीए वरो जह सा अहंसणं पत्ता जहा घोरसिवो निवेयमुपगओ पट्ठिओ य मरणत्थं जह पुव्ववइयरो तेण  
संठिओ ( निवेइओ ) जह व संठविओ जह परिचियविज्जाहरविमाणमारुहिय सो गओ नमिउं संखेवेणं तह नरवरेण  
सिट्ठं समत्थंपि, सोच्चेमं हरिसिओ मंतिवग्गो, पयट्ठिओ य नयरीए महंतूसवोत्ति ।

अह अन्नया कयाई चंपयमालाए रायमहिलाए । दुहिसत्तरक्खणंमी दीणाणाहाण दाणे य ॥ १ ॥

देवगुरुपूयणंमी पणईणं चित्तियत्थदाणे य । उप्पण्णो दोहलओ विसिट्ठगब्भाणुभावेण ॥ २ ॥ जुम्मं ।

चित्तेइ य सा एवं ताओ धन्नाओ अम्मयाउ इहं । इय पुन्नदोहलाओ जाओ गब्भं वहंति सुहं ॥ ३ ॥

एवं च अपुज्जंतदोहलयसंकप्पवसेण कसिणपक्खमयलंछणमुत्तिव्व कसित्तणमणुभविउं पवत्ता देवी । अन्नया य  
पुट्ठा नरवइणा-देवि ! किमेवं पइदिणं कसित्तणं पावेसि?, साहेसु एयकारणं, गाढनिबंधे सिट्ठं तीए नियमणवंचियं,  
ताहे परं पमोयमुव्वहंतेण विसेसयरं पुरियं नरिदेण, माणियडोहला य धरणिव्व निहाणसंचयं दिसव्व नलिणीनाहं  
सुहंसुहेणं गब्भं वहमाणी देवी कालं गमेइ, अण्णया य पडिपुण्णेसु नवसु मासेसु अद्धट्ठमराइंदिएसु सुभेसु तिहि-  
करणनक्खत्तमुहुत्तेसु पुरंदरदिसिव्व दिणयरं कोमलपाडलकरपडिपुण्णसव्वंगोवंगसुंदरं पुत्तं पसूया । तओ सहरिसं  
गयाओ नरिंदभवणंमि चेडीयाओ, दिट्ठो राया, भणिओ य-देव ! वद्धाविज्जसि जएण विजएण य तुमं, जओ

श्यामि चैव पश्या देवी चंपयमाला, जाओ यं समुज्जीतियसयलदिसामंडलो तेयंरासिधं पुत्तोत्ति, इमं थं सोचा नरि-  
देण दिमं तासिं भूरि पारिओसियं, कओ दासित्तविंगमो, आहूया पहानपुरिसां, संमादिट्ठा यं जहां पयट्टेह नीसेस-  
नयरीए तियचउक्कचचरेसु खंदमुगुंदसूरिदियमुहमंदिरेसु थं परममहसवं, वियरहं अणिवारियपसरं कणयदाणं सुयह  
चारगाहितो जणंति युत्ते जं देवो अणिवेइत्ति भणिऊण पुरीए पारद्धं तेहिं वद्धावणयं ।

फहं चिय?,—पंचप्पयोरवन्नयविरइयसुपंसत्थसत्थियसंमूहं । विक्खित्तंक्खयदोवापवालसोहंतमहिवीढं ॥ १ ॥

रहसपणधिरतरुणिगणवच्छत्थलतुट्टहारसिरिनियरं । अन्नोन्नविहरियपुण्णपसवट्टंतहलवोलं ॥ २ ॥

पडिभवणदारविरइयवंदणमालासहस्सरमणिज्जं । कमलपिहाणामलपुन्नकलसरेहंतगेहंसुहं ॥ ३ ॥

यजंताउज्जसमुच्छलंतघणघोरघोसभरियदिसं । चिन्ताइरित्तदिज्जंतदविणसंतोसियत्थिगणं ॥ ४ ॥

पमुइयनीसेसजणं कुलघेरीकीरमाणमंगलं । इय नरवइकयतोसं वद्धावणयं कयं तत्थ ॥ ५ ॥

एत्थंतरे मंतिसामंतसेणावइसत्थवाहपमुहा पहानलोया गहियविविहतुरयरणसंदणपमोक्खविसिद्धं वत्थुवित्थरा  
गच्छुण नरवइं वद्धाविसु ?

इओ य सो घोरसिवो विज्जाहरेहिं नेऊण समप्पिओ जयसेहरेस्स कुमारस्स, तेणावि पिउणोव गुरुणोव तदागमणे  
कओ परममहसवो, पुट्ठो य एसो पढमदंसणाओ आरब्भ सववुत्तंतं, धरिओ पहानविलेवणंभोयणदिवंसुयदाणंपुरस्सरं



श्रीगुणचंद्र  
महावीरच०  
४ प्रस्तावः

॥ ९० ॥

कइयवि वासराइं, अन्नदियहे चाउरंगसेणासण्णाहेण जयसेहरकुमारेण गंतूण सिरिभवनंमि नगरे विजयसेणरणो  
दंसिऊण जहावित्तं संसिऊण य दुइंतमंतिसामंतुस्सिखलदलणपुव्वं सो घोरसिवो सहत्थेण निवेसिओ रायपए, विजय-  
सेणोऽवि ठविओ जुवरायत्ते, एवं कयकायव्वो जहागयं पडिगओ जयसेहरो, घोरसिवोऽवि पुव्वंपिव भुंजिउं पवत्तो  
नियरज्जंति । अन्नया तेण सुमरिऊण नरसिंहनरवइणो रज्जसंपत्तिवुत्तंतनिवेयणं पुव्वकालपडिवन्नं तक्खणंचिय विसज्जिया  
पहाणपुरिसा विसिद्धपाहुडसमेया नरसिंघनरवइणो समीवे नियवइयरनिवेयणत्थं, पत्ता य ते अणवरयपयाणएहिं  
जयंतीनयरिपरिसरुद्धेसं, निसुणिया य रत्ता, पवेसिया य महाविभूर्इए, समप्पियाइं रत्तो तेहिं पाहुडाइं, साहिओ  
घोरसिवनरवइसमाइट्टवुत्तंतो, हरिसिओ राया, सम्माणिया उचियपडिवत्तीए, पेसिया य सट्ठाणंमि ।

अन्नदिवसे य समारद्धो कुमारस्स नामकरणमहूसवो, समाहूओ कुलथेरीजणो, तओ वज्जंतेसु चउव्विहाउज्जेसु  
नचंतेसु तरुणीसत्थेसु मंगलमुहलेसु वारविलयाजणेसु पढंतेसु मागहेसु पइट्ठियं कुमारस्स पुव्वपुरिसक्कमागयं नरवि-  
क्कमोत्ति नामं, कालक्कमेण य विइक्कंतवालभावो नीसेसविज्जापारयस्स लेहायरियस्स चेडयचक्कवालपरिवुडो महा-  
विभूर्इए पढणत्थमुवणीओ, अकालक्खेवेण य बुद्धिपगरिसेण जाओ एसो कलासु कुसलो, कहं चिय?—

पत्तट्ठो धणुवेए कुसलो नीसेसमल्लविज्जासु । कयकिच्चो करणेसुं विचित्तचित्तेसु निउणमई ॥ १ ॥

परभावलक्खणम्मी वियक्खणो जाणओ समयसत्थे । पत्तच्छेये छेओ निम्माओ सहमग्गेसु ॥ २ ॥

घोरशिवे  
राज्यं हरि-  
विक्रमजन्म.

॥ ९० ॥

निउणो मंतवियारे तंतपओगेसु कुसलबुद्धी य । पुरिसकरितुरयनारीगिहलक्खणवोहनिउणो य ॥ ३ ॥

आउज्जनट्टजूयप्पओगवहुभेयगेयचउरो य । किं बहुणा?, सवत्थवि गुरुव सो पगरिसं पत्तो ॥ ४ ॥

एवं च गहियकलाकलावं कुमरं घेत्तूण गओ कलायरिओ नरवइसमीवं, अब्भुट्ठिओ परमायरेणं नरवइणा, दवावियास-  
णो उवविट्ठो पुट्ठो य-किमागमणकारणंति, कलायरिण भणियं-देव ! एस तुम्ह कुमारो गाहिओ नीसेसकलाओ सुरगु-  
रुव पत्तो परमपगरिसं, न एत्तो उत्तरेण गाहियधम्मत्थि, ता अणुजाणेउ देवो अग्गे सट्ठाणगमणायत्ति, अह अकालक्खे-  
वसिक्खियकुमारकलाकोसलसवणपवहुमाणहरिसभरनिब्भरेण नरवइणा आचंदकालियसासणनिवद्धदसग्गहारदा-  
णेण पवरचामीयररणरासिवियरणेण विसिट्ठवत्थफुल्लतंवोलसहत्थसमप्पणेण य सम्माणिऊण परमायरेणं पेसिओ  
कलायरिओ सट्ठाणं, कुमारोऽवि निउत्तो गयतुरयवाहीयालीसु समकरणत्थं, सो य दढासणवंधधीरयाए महावलेण  
य जाममेत्तेणवि सममुवणेइ सत्त मत्तसिंधुरे पवणजवणवेगे परमजच्चे चउइस तुरंगमे अट्ठ महामल्ले य, एवं च राया  
असमवाहुवलेण य मइपगरिसेण य कलाकोसल्लेण य नयपालणेण य विणयपवत्तणेण य समओचियजाणणेण य  
असरिससाहसत्तणेण य मयणाइरेयरूवविभवेण य जणवच्छलत्तणेण य वाढमक्खित्तचित्तो कुमारमेकमेव पढावेइ  
मंगलपाढेसु लेहेइ चित्तभित्तिसु निसामेइ कित्तीसु गायावेइ गीएसु अभिणच्चावेइ नट्टेसु, अविय-

रुदेवि दुइसीलेऽवि रूवरहिण्णऽवि गुणविहीणेऽवि । लोओ पुत्ते पणयं किंपि अपुवं पयासेइ ॥ १ ॥

श्रीगुणचंद  
महावीरच०  
४ प्रस्तावः

॥ ९१ ॥

किं पुण चिरकालसमुन्भवमि नीसेसगुणमणिनिहिमि । सकुलभुद्धरणखमे न होज्ज नेहो नरवइस्स? ॥ २ ॥  
एगया य अत्थाणमंडवनिसन्नमि नरवइमि पायपीढासीणे कुमारे नियनियट्ठाणनिविट्ठेसु मंतिसामंतेसु समारद्धमि  
गायणजणे मणोहारिसरेण गेए पणचिरंमि चित्तपयक्खेवनट्ठविहिवियक्खणे वारविलासिणीजणे पच्चासन्नमागंतूण  
विन्नविद्यं पडिहारेण-देव ! हरिसपुरनयराहिवइस्स देवसेणभूवइस्स दूओ दुवारे देवदरिसणं समीहेइ, राइणा  
भणियं-भइ ! सिग्घं पवेसेहि, जं देवो आणवेइत्ति भणिऊण पवेसिओ अणेण, कया से उचियपडिवत्ती, पुट्ठो य  
आगमणप्पओयणं, दूएण जंपियं-देव ! हरिसपुरपहुणा देवसेणनरिंदेण रूवजोवणगुणोवहसियनागकन्नगाए निय-  
सुयाए सीलवइनामाए वरनिरूवणत्थं पेसिओऽम्हि तुम्ह पासे, रण्णा जंपियं-भइ ! पेच्छसु पायपीढासीणं कुमारं,  
परिभावेसु य किमणुरूवो वरो न वत्ति, दूएण भणियं-देव ! विन्नवणीयं अत्थि किंची, रत्ता भणियं-विन्नवेसु, दूएण  
जंपियं-जइ एवं ता निसामेसु, अत्थि अम्ह नराहिवस्स देवसेणस्स समग्गवीरवग्गपहाणो कालमेहो नाम  
महामल्लो, तस्स य किं वन्निज्जइ वलपगरिसंमि?, तथाहि-

दढकटिणकायवणमहिसजूहनाहेण सह सरोसेणं । सीसेण संपलग्गइ जुज्जेउं सो वलमण्णं ॥ १ ॥

सुंडादंडे घेत्तूण पाणिणा मत्तदंतिनाहंपि । तद्धिणपसूयसुरहीसुयं व कट्ठेइ लीलाए ॥ २ ॥

भारसयसंकलंपि हु तोडइ हेलाए जुण्णरज्जुं व । नियमुट्ठिपहारेण य सिलंपि सो जज्जरं कुणइ ॥ ३ ॥

देवसेनदू-  
तविज्ञप्तिः.

॥ ९१ ॥

मंसस्स विरुद्धं किर लोहं एयंपि तत्थ विवरीयं । जं नाराया खित्तावि तस्स वाहिंपि न छिबंति ॥ ४ ॥

इय सो नियगाढवलावलेवओ तिहुयणं जरतणं व । मन्नंतो भमइ पुरे निरंकुसो मत्तहत्थिव्व ॥ ५ ॥

अन्नया य तस्स पसिद्धिमसहमाणा समागयां देसंतराओ मल्ला, दिट्ठो तेहिं राया, साहियं आगमणपओयणं, समाहूओ य रण्णा कालमेहमल्लो, निवेइओ से तव्वइयरो, अब्भुवगयं तेण तेहिं समं जुज्झं, सज्जीहूया दोवि पक्खा, कओ अक्खाडओ, विरइया उभयपासेसु मंचा, निविट्ठो अवलोयणकोऊहलेण नीसेसअंतेउरसमेओ नरवई पुरपहाणपुरिसवग्गो य, समाढत्तं च भुयाहि य अड्डपायइयाहिं च बंधेहि य विसमकरणपओगेहिं मल्लेहिं सह तेण जुज्झिउं, खणंतरेण य दढमुट्ठिप्पहारेहिं निहया कालमेहेण देसंतरागया मल्ला, कओ लोणेण जयजयसहो, दिन्नं से नरिंदेण विजयपत्तं, सम्माणिओ विचित्तवत्थाभरणेहिं, गओ नियनियट्ठाणेसु नयरजणो, रायावि अंतेउरपरियरिओ संपत्तो नियमंदिरं, वीयदिवसे य सव्वालंकारविभूसिया काऊण देवीए पउमावईए पेसिया सीलवई कण्णगा पिउणो पायवडणत्थं, चेडीचकवालपरिवुडा य सा पत्ता नरिंदसगासे, निवड्डिया चरणेसु, निवेसिया रण्णा उच्छंगे, पुच्छिया य-पुत्ति ! केण कारणेण आगयाऽसि ?, तीए भणियं-ताय ! तुम्ह पायपडणनिमित्तं अम्मगाय पेसियम्हि, राइणा चिंतियं-अहो वरजोगत्ति कलिऊणं नूणं देवीए पेसिया, ता किमियाणिं कायव्वं ?—

एकं चिय मह तणया परूढपणयाएँ अग्गमहिसीए । एसा वरस्स जोग्गा को पुण एयाएँ होज्ज वरो ? ॥ १ ॥

श्रीगुणचंद  
महावीरच०  
४ प्रस्तावः

॥ ९२ ॥

एयाए चित्तवित्तिं अविद्याणिय जइ वरेज निवपुत्तो । जो वा सो वा आजम्म दुक्खिया होज ता एसा ॥ २ ॥  
इति परिभाविऊण पुच्छिया सा नरवइणा-पुत्ति ! को तुज्झ वरो दिज्जइ ? किं सुखो उयाहु समरंगणसवडंसुह-  
सुहडपडिक्खलणपयंडपरक्कमो किं वा समरभीरुओत्ति, तओ ईसिं विहसिऊण भणियं तीए-ताओ जाणइ, राइणा  
भणियं-पुत्ति ! अवरोहकयकजाइं न सुहावहाइं होंति ता सम्ममणुचिंतिय भणसु, तीए भणियं-ताय ! जइ एवं  
ता जो एयं कालमेहमल्लं नियमुयवलेण महियपरक्कमं करेज्जा सो मम वरो होज्जत्ति, राइणा चिंतियं-अहो बलाणु-  
रागिणी मम तणया, को पुण समत्थो एयस्स वइयरस्स ?, भणिया य सा-पुत्ति ! मा कुणसु एवं, अतुलमल्लो खु  
एसो, ता अन्नं वरं पत्थेसु, तीए भणियं-ताय ! जइ परं हुयासणो अन्नोत्ति, इय तीए निच्छयमुवलब्भ रत्ता पेसिया  
सव्वनरवइणं दूया, निवेयाविओ एस वुत्तंतो, एयं च अणभुवगच्छमाणा नरवइकुमारा एवं पयंपंति-

को बोहेज्ज कयंतं ? को वा हालाहलं विसं भक्खे ? । को कालमेहमल्लेण जुज्झिउं सह पवज्जेज्जा ? ॥ १ ॥

तेण न कज्जं रज्जेण किंपि न कज्जं च तीए भज्जाए । जा लब्भइ खित्तसंसयजीवियवेहिं कट्ठेण ॥ २ ॥

एवं च निब्भग्गजणमणोरहेहिं असिद्धकज्जेहिं चेव पडिनियत्तिऊण दूएहिं रण्णो कहिओ मल्लजुज्झाणभुवग-  
मगब्भो नीसेसनरेसरकुमारवुत्तंतो, तं च सोऊण गाढसोगाडलो जाओ देवसेणनरवइ, एत्थंतरे विन्नत्तो मंतिसामं-  
तेहिं-देव ! किमेवं उच्छन्नच्छाहा होह, अज्जवि देवेण अनिरुविओ चिट्ठइ कुरुदेसाहिवनरवइसुओ नरविक्रमकुमारो,

शीलमत्याः  
प्रतिज्ञा.

॥ ९२ ॥

राइणा भणियं—सोऽवि एवं चेव परंमुहो हविस्सइ, मंतिसामंतेहिं वुत्तं—देव । मा एवं जंपह, जओ अपोरिसे(परिमे)ओ  
 तस्स चल्पगरिसो असंभावणिज्जो निजुद्धपरिस्समो अणाइक्खणिज्जा मल्लविज्जाए कोसल्लया, किं बहुणा ?, नरसिंहनरवइ-  
 साइसतोसियाए भगवईए जो दिण्णो तस्स किं वन्नियवं ?, सरीरमेत्तेण चेव सो नरूवो सेसगुणेहिं निच्छियं देवोत्ति,  
 एयं च समायणिऊण संजायहरिसेण देवेण पेसिओऽहं तुम्ह समीवे, ता देव । एयं तं विण्णवणिज्जंति, राइणा भणियं-  
 भइ ! पररयणपुत्तकेसरिगुहव सेसाहिमत्थयमणिच्च समगं चिय भयहरिसे जणेइ विण्णत्तिया तुज्झ, दूएण कहियं-  
 देव ! एवमेयं, तओ राइणा अद्धच्छीए पेच्छियं कुमारवयणं, कुमारोऽवि तक्खणं चिय उट्ठिओ निवडिओ रण्णो  
 चरणेषु, भणिउमाढत्तो य—ताय ! समाइसह किं कीरउत्ति ?, राइणा भणियं—कुमार ! निसुणियं तए दूयवयणं ?,  
 केरिसो वा तुह भुयदंडपरफमो ?, कुमारेण भणियं—ताओ जाणइ, तओ राइणा जोग्गयमुवल्लभ अम्भुवगयं मल्ल-  
 जुज्झं, सम्माणिऊण सट्ठाणं पेसिओ दूओ, गओ जहागयं, निवेइयं च तेण जहावित्तं देवसेणरण्णो, जाओ से परमो  
 पमोओ, निरूवियं परिणयणजोग्गं लग्गं, पेसिया य वरागरिसगा पहाणपुरिसा, अणवरयपयाणएहिं पत्ता जयंति-  
 नयरिं, विरइओ आवासो, अणुरूवसमए दिट्ठो राया, सिट्ठं नियकज्जं, तओ पउरकरितुरगमुहडकोडिपरिवुडो पेसिओ  
 तेहिं समं कुमारो, पत्तो कालकमेण हरिसिपुरनगरसमीवे,

तो तं इत्तं नाउं, रत्ता काराविओ पयत्तेणं । वंसग्गवद्धधयच्चिंधवंधुरो इत्ति नयरमहो ॥ १ ॥

श्रीगुणचंद  
महावीरच०  
४ प्रस्तावः  
॥ ९३ ॥

विहिया नरोहिं कुसलेहि कुसुमछडाडोवसुंदरा मग्गा । खित्ता य कुसुमपयरा रणज्झणिरभमंतभमरउला ॥ २ ॥  
नचंतनाडइज्जा तालायरकहगपवररमणिज्जा । जाया चउक्कचचरचउम्मुहप्पमुहदेसावि ॥ ३ ॥  
ठाणे ठाणे रइया दसद्धवण्णेहिं सुरभिकुसुमेहिं । विच्छित्तिविचित्ताओ लंवंतुद्दामदामाओ ॥ ४ ॥  
भवणंपि तस्स जोग्गं निरुवियं सत्तभूमियं रम्मं । चंदणरसलिहियपसत्थसत्थियं थंभसयकलियं ॥ ५ ॥  
तं नत्थि जं न विहियं कुमरागमणे पुरंमि नरवइणा । अहवा हरिसुक्करिसा पुरिसा किं किं न कुंवंति ? ॥ ६ ॥  
एत्थंतरे समागया पहाणपुरिसा, पणमिऊण भणियं तेहिं—देव ! वद्धाविज्जह तुब्भे पुरसमीवसमागयकुमारकु-  
सलोदंतसवणेण, तओ समुद्धुयविजयवेजयंतीसहस्साभिरामाए चाउरंगिणीए सेणाए समेओ सियसिंधुरखंधाधि-  
रूढो पडिपुण्णचंदमंडलाणुकारिणा छत्तेण धरिज्जमाणेणं निग्गओ राया कुमाराभिमुहं, खणंतरेण दिट्ठो कुमारो  
समालिंगिओ गाढपणयं पुट्ठो य सरीरारोग्गयं, दट्ठूण कुमारसरीरसंठाणसिरिं चिंतियं रणणा—निच्छियं इयाणिं विण-  
स्सइ कालमेहमल्लस्स बाहुवलमडप्फरोत्ति, अह मुहुत्तमेत्तमणुगच्छिय पुवनिउत्तनियनियट्ठाणेसु पेसिओ कुमारप-  
रियरो, कुमारोऽवि विमुक्को तंमि चेव पासाए, दवावियाइं करितुरयाईणं जोग्गासणाइं, कुमारस्सवि कए पेसिया  
पउरवंजणभक्खभोयणसमिद्धा रसवई, कयं च अन्नंपि तक्कालोचियं करणिज्जं, आहूया य अवरणहसमए पहाणपुरिसा,  
भणिया य—भो गंतूण निवेयह कुमारस्स जहा एसा अम्ह सुया वलाणुरागिणी, ता दंसेह कालमेहमल्लस्स विजएण

हरिविक्र-  
माभ्युप-  
गमः।

॥ ९३ ॥

नियसामत्यंति, जं देवो आणवेइत्ति भणिऊण ते गया कुमारसमीवे, निवेइओ तस्स नीसेसंवइयरो, अब्भुवगओ कुमारेण, ततो वीयंदिवसे आढत्तो अक्खाडयपरिक्खेवो निवद्धा मंचा परमकोऊहलाउलिज्जमाणमाणसो मिलिओ नयरजणो, ठिओ मंचंमि संतेउरो नरवई, आरूढा य एक्कदेसंमि चेडीचक्कवालपरिवुडा पाणिपइट्टियलट्ठपप्फुलफुल-  
माला सीलमई रायसुया, पडिक्खलिओ सच्चत्थ जणसंचारो, कओ अंगरक्खेहिं परिक्खेवो, वज्जियं पलयकालगज्जं-  
तपक्खुहियपुक्खलायत्तपगज्जिररवगंभीरं चउविहमाउज्जं, जाओ अवसरो, मंचाओ तओ कुमारो गाढुप्पीडियनियं-  
सियकडिलो दढवद्धकेसपासो पमुक्काभरणसंभारो कुलधेरीकयरक्खो जलणुब्भडगुरुपयावदुप्पेक्खो संनिहियपाडिहे-  
रोप भासुरो झत्ति अवयरिओ, तहा—

कंठतडुब्भडपरिहियपयतलविलुलंतविमलवणमालो । आवद्धमलवलओ गज्जंतो पलयमेहोव ॥ १ ॥

मयभिंभलरत्तच्छो गघुद्धुरकंधरो तुरियचवलं । पेच्छयजणपरियरिओ संपत्तो कालमेहोवि ॥ २ ॥

रे मल ! मेल्लसु लहुं पुवज्जियविजयगघमेत्ताहे । अणुसरसु ममं सिग्घं अह भणिओ सो कुमारेण ॥ ३ ॥

सोउं कुमारवयणं जरोव गघो झडत्ति तस्स गओ । अणुचिंतिउं च लग्गो जुत्ताजुत्तं सवुद्धीए ॥ ४ ॥

कहं ?—जइ एस मए विजिओ एयजणाओ तहावि नो कुसलं । अह एएण जिओऽहं वित्तिच्छेओ तओऽवस्सं ॥ ५ ॥

अतुलवलविक्कमस्स उ इमस्स विजएऽवि मज्झ संदेहो । ता उभयपासरज्जुव संकडं एयमावडियं ॥ ६ ॥



श्रीगुणचंद  
महावीरच०  
४ प्रस्तावः

॥ ९४ ॥

इय बहुभेयविकप्पणवसाउलिज्जंतचित्तवित्तिस्स । फुट्ठं तडत्ति हिययं तस्स कुमित्तस्स व रहस्सं ॥ ७ ॥  
तओ जाओ कलयलो, उग्घोसियं च जणेण—अहो महप्पभावं दंसणं कुमारस्स, जेणावलोयणमेत्तेणवि वज्जगंठिव  
निट्ठुरं फुट्ठं तडत्ति हिययमेयस्स, ता जयइ सव्वहा कुमारो, एत्थंतरे ओयरिऊण मंचाओ चेडीजणपरिवुडाए सील-  
मईए खित्ता कुमारकंठदेसे समं नियचित्तवित्तीए वरमाला, पवज्जियाइं असंखघोससंखोभियभवणाइं मंगलतूराइं, जाओ  
णयरे पमोओ, तुट्ठो राया सह मंतिसामंतेहिं, पारद्धो विवाहो महाविभूर्इए उभयपक्खपरितोसेणं, निवत्तिए य तंमि—  
पगलंतमयजलुम्भडकरडतडुद्दामभमिरभमराणं । सुहलक्खणंक्रियाणं पंचसयाइं गइंदाणं ॥ १ ॥  
मणपवणजविणवेगाण जच्चतुरंगाण वंकगीवाणं । वारस चेव सहस्सा रहाण दो तुंगसिंगाणं ॥ २ ॥  
कणगस्स तीस कोडी चीणंसुयपमुहवत्थरासीओ । दिन्नाओ कुमारस्सा पाणिस्स विमोयणे रत्ता ॥ ३ ॥  
कयमन्नंपि सविसेसं कायवं, जाओ अवरोप्परं पणयभावो । अवरवासरे व पेसिया कुमारेण पहाणपुरिसा देवसेण-  
नरवइस्स पासे नियट्ठाणगमणाणुन्नागहणनिमित्तं, गंतूण निवेइयं तेहिं नरवइस्स, तओ देवसेणेण पुणरवि सम्माणिओ  
पहाणवत्थुसमप्पणेण कुमारो, निरुवियं गमणजोग्गं दिणं, निउत्ता दंडनायगा अणुगमणत्वं, अह पसत्थवासरे  
ससुरप्पभिईण कयमुचियकायवो पत्थिओ कुमारो हरिकरिनरनियरसमेओ सनयराभिमुहं । एत्थंतरे—  
सवालंकारधरिं सीलवइं चेडियाजणसमेयं । लच्छिंय कुमारपुरो काउं रत्ता भणियमेयं ॥ ४ ॥

कालमेघ-  
मल्लमरणं.

॥ ९४ ॥

पुत्ति ! पवित्तं सीलं पालेज्जसु मा करेज्जसु कुसंगं । अणुवत्तिज्जसु गुरुजणमवणिज्जसु दुव्विणयभावं ॥ २ ॥

सेविज्जसु नयमग्गं मियमहुरक्खरगिरं वएज्जासि । आराहेज्जसु सपियं देवो भत्ता कुलवहूणं ॥ ३ ॥

कुमरोऽपि इमं वुत्तो एसा एका सुया ममं इट्ठा । छायव सहयरी जह हवइ सया तह तए किच्चं ॥ ४ ॥

इय सिक्खविउं राया धूयं विरहग्गिदूमियसरीरो । अणुगमिऊण कुमारं नियनयराभिमुहमह चलिओ ॥ ५ ॥

कुमारोऽपि पेच्छंतो नगनगरागरगामकाणणरमणिज्जं मेइणिं साहितो विसमपल्लीनिलीणे भिल्लाहिवइणो पयट्ठंतो पुष्पनीईओ अवलोयंतो तावसजणनिसेविए अणवरयडज्जंतधयमहुसमिहमहोसहिसमुच्छलंतवहलधूमपडल-  
कयमेहसंकसिहंडितंडवाडंवररमणिजे आसमपए, पइदिणपयाणएहिं संपत्तो जयंतीए नयरीए वाहिरुज्जाणे, वद्धाविओ  
नरसिंघनरवई, काराविया नयरसोहा, जाया समुद्धयविचित्तचीणंसुयचिंधवंधुरा रायमग्गा, अह पसत्थंमि मुहुत्ते  
अंतेउरपुरप्पहाणजणपरियरिएण नरिंदेण अणुगम्ममाणो नरविक्रमो नयरिं पविसिउमारद्धो, ठिया य रायमग्गोभय-  
पासपासायमालासु तदवलोयणकोऊहलाउला कुसुमुम्मिस्सक्खयहत्था लोयसत्था, जाया य कुमाररूवपलोयणपा-  
उम्भवंतविविहवियाराण जुवईजणाण विन्भमा । कहं चिय ?—

ददूण कायि पडिजुवइकंतगंडत्थलंतसंकंतं । कुसुमक्खएहिं ताडइ ईसाइंतिव्व रायसुयं ॥ १ ॥

पवियंभियकुसुमाउहवसवियसियलोयणा पलोयंती । न मुणइ सकडिंलंपिहु पवणेणायट्ठियं अवरा ॥ २ ॥

श्रीगुणचंद  
महावीरच०  
४ प्रस्तावः

॥ ९५ ॥

कुमरपलोयणवामूढमाणसा निचला गिहग्गया । अनिलचलंचलचूडा काविहु रेहइ पडायव ॥ ३ ॥  
अम्मे ! जामि पलोइदुं दसदिसं कोलाहला सुवए, सा मा गच्छ मयच्छि ! निच्छियमिमो सो एइ रण्णो सुओ ।  
दिट्ठे जम्मि पणट्टनिव्वुइमणा मुद्धावरा मग्ग(ङ्ग)णा, वट्ठंती विव सासुयाए पुरओ अन्ना इमं जपइ ॥ ४ ॥  
इय एवं सविलासाहिं नयरनारीहिं सचविज्जंतो । कुमरो वहुसमेओ संपत्तो निययभवणंमि ॥ ५ ॥  
तहिं गएण य कया सविसेसं गुरुजणाण पणामाइपडिवत्ती, समप्पिओ य रण्णा अंवरतलमणुलिहंतो निययभव-  
णनिव्विसेसो पासाओ कुमारस्स, तत्थ ट्ठिओ य सो सको इव देवलोए धरणो इव पायाले विसयसुहं भुंजंतो  
कालं गमेइ, अन्तरंतरा य तुरगवाहियालिं च मत्तसिंधुरदमणं च मल्लजुज्झब्भसणं च राहावेहकोऊहलं च धम्मसत्थ-  
सवणं च देसंतरनयरवत्तानिसामणं च गुरुचरणनिसेवणं च मग्गणजणमणोरहपूरणं च करेइत्ति । अह कुमारस्स का-  
लकमेण सीलमईए सह विसयसुहं भुंजमाणस्स कुसुमसेहरविजयसेहरनामाणो जाया दोन्नि पुत्ता, ते य वल्लहा पिया-  
महस्स, विविहप्पयारेहिं उवलालिज्जमाणा वट्ठंति । अन्नया राइणो समीवे निसन्नंमि नरविक्कमे जहोचियठाणनिवि-  
ट्ठंमि सेवगजणे मयभरसंभरियसच्छंदजसुणावणविहारो तडयडारावतोडियनिविडघडणुत्तरतारसयप्पमाणलोहनिगडो  
सयखंडचुन्नियमहालाणखंभो निदयकरप्पहाराहयारोहगवग्गो पहाविओ नयरमज्जेण जयकुंजरो उम्मूलियगरुयहुमसो-  
डियगुरुविडवंकडयडरउदो कुंभत्थलपणोल्लणपाडियसुरभवणसिहरग्गो अइकट्ठिणकरप्फालणविहाडिउद्दामतुंगपागारो

विवाहः  
गजोपद्रवः

॥ ९५ ॥

अइवेगुगालियकन्नतालविहचियभसलउलो अइरभसभरपहावणसपक्खकुलसेलचल्लिकयंसंको दढदंतदंडताडणढलढ-  
लियंढालयसमूहो करघायदंतवेहणचरणुप्पीडणनिवाडियजणोहो सव्वत्थ भमइ भीमो जमोव्व जुगविगमसमयंमि, अह  
मंदरमहिज्जमाणमहोयहिघोसघोरे समुच्छलिए तियचउंक्कचचरेसु जणाणं अक्कंदियरवे पुच्छियं नरवइणा-भो भो  
किमेवं नयरे कोलाहलो सुम्मइत्ति?, जणेण भणियं-देव! एस तुम्ह जयकुंजरो भग्गालाणखंभो नयरं विह्वेइ,  
एवं सोचा विसज्जिया कुमारपमुहा पहाणलोया जयकुंजरगहणनिमित्तं, भणिया य-अरे! सव्वहा सत्थघायं परिहरं-  
तेहिं एयस्स वट्ठियव्वं, एवं च पडिवज्जिय गया ते तदभिमुहं, न य पेच्छंति कमवि उवायं जेण हत्थी वसमुवग-  
च्छइत्ति, एत्थंतरे वेलामासवत्तिणी गुरुगन्धमारवसविसंदुलनिवडंतचरणा गाढपाणभयकंपंतसरीरजट्टी इओ तओ  
य धायंती एंगा कुलंगणा दिट्ठा जयकुंजरेण, तओ उल्लालियकरगो पवणवेगेण धाविओ तीसे अभिमुहो, सावि  
कुंजरं तहा सिग्घमागच्छंतं पेच्छिऊण सज्झसभरनिरुद्धपयप्पयारा कलुणाइं दीणाइं विलविउं पयत्ता, कहं चिय?—

हे माइ भाय ताया तायह मं मा उवेक्खह इयाणिं । एसो मम वहणट्ठा दुट्ठकरी पासमल्लियइ ॥ १ ॥

हं हो पेच्छंगलोया । निक्करुणा करिवरं पडिक्खलह । गुरुगन्धभरकंता एसा संपइ विवज्जामि ॥ २ ॥

अहहं कहं पावंकरी एसो सो आगओ मम समीवे । निस्सरणा नित्ताणा कमुवायं संपइ सरामि ? ॥ ३ ॥

किं कोऽवि महापुरिसो परोचयारत्थधरियनियपाणो । एत्थ न पेच्छइ सहसा मं दुक्खत्तं विणस्संति ॥ ४ ॥

श्रीगुणचंद  
महावीरच०  
४ प्रस्तावः

॥ ९६ ॥

इय दीणकलुणवयणाइं णेगसो भासिऊण खणमेकं । मुच्छानिमीलियच्छी धसत्ति सा महियले पडिया ॥ ५ ॥  
सोवि करिवरो दढरोसभररत्तणेत्तो संपत्तो तीसे थेवंतरेण, दिट्ठा य सा कुमारेण भयवसभूमिनिस्सहनिवडियंगी,  
चित्तियं च-अजुत्तमजुत्तमियाणिं उवेहणं एयाए, जओ—

एकं अवला एसा अन्नं गुरुगब्भभारविवसंगी । अन्नं पुण मुच्छाए निमीलियच्छी धरणिपडिया ॥ १ ॥

अन्नं च पुणो तायस्स एस जयकुंजरो अतीव पिओ । सत्थेण न हंतव्वो विसममिमं निवडियं कज्जं ॥ २ ॥

अहवा रूसउ ताओ जं भवइ तं करेउ मम इण्हि । हंतव्वो एस करी दुव्वलजणपालणं धम्मो ॥ ३ ॥

इय निच्छिऊण निविडवद्धदुगुलंचलो तुरंगाओ अवयरिऊण अवलोइज्जंतो नरनारीजणेण निवारिज्जंतो पासव-  
त्तिपरियणेण पडिखलिज्जमाणो अंगरक्खेहिं निरवेक्खो नियजीवियस्स सिग्घं पधाविऊण मेहस्स व मयजलासार-  
पसमियरयनियरस्स कयगंभीरगलगज्जियस्स सहस्सनयणोव्व थेवंतरेणासंपत्तस्स जयकुंजरस्स करणप्पओ-  
गवसेण आरूढो पट्टिदेसंमि कुमारो, ताडिओ य कुलिसनिट्टुरेण मुट्ठिप्पहारेण करी कुंभत्थलंमि, अह खरयरं रोस-  
मुवागओ मणागंपि अनियत्तंतो नारीवहाओ सो कुमारेण जमजीहादुव्विसहाए खग्गधेणूए आहओ सव्वसत्तीए  
कुंभजुयलंतराले, तओ पढमुग्गमंतरविमंडलाओव्व करपसरो खरपवणपणुन्नकमलसंडाओव्व मयरंदनीसंदो महागिरि-  
गेरुयागराओव्व निव्वभरसलिलुप्पीलो कुंभत्थलाओ से वूढो महारुहिरप्पवाहो, सहसच्चिय विगयनयणोवलंभो विहलं-

सगर्भ  
युवतिरक्षा.

॥ ९६ ॥

घलीभूओ मओ इव मुच्छिओ इव दढपाससहंस्ससंजमिओ इव निचलो ठिओ करी, तओ अवयरिऊणं कुमारेण संठविया  
सा भूमिगया इत्थिया, विमुक्का य समीहियपएसंमि, सयंपि गंओ नियमंदिरं, सोऽवि करिवरो गहिओ आरोहेहिं,  
पारद्धो अणवरयजलघडसहस्सखेवेण सिसिरोवयारो, पयट्ठावियाइं घायविसोहणाइं, महाविमद्देण नीओ निययावासे,  
निवेइयं नरवइणो जहावित्तं, रुद्धो राया, परं सोयमुवागओ, भणिउमाढत्तो य—

रे रे वचह पुरिसा ! निस्सारह तं सुयं दुरायारं । जयकुंजरेऽवि निहए अज्जवि इह वसइ जोऽलज्जो ॥ १ ॥

अधो साहसतुट्ठाए तीए देवीए सुंदरो दिन्नो । पुत्तो अमित्तरूवो देवाविहु विप्पयारंति ॥ २ ॥

नूणं मूढो लोओ तम्मइ पुत्तस्स जो निमित्तंमि । न मुणइ एवंविहदोससाहणे पयडसत्तुत्तं ॥ ३ ॥

अन्नाणविलसियमिणं गइं अपुत्तस्स जं निवारंति । इहलोयप्पडिणीओ परलोयसुहो कहं होज्जा ? ॥ ४ ॥

नीसेसरज्जसारं एयं जयकुंजरं हणंतेण । कह मह सावेक्खत्तं पुत्तेण पयासियं भणसु ? ॥ ५ ॥

ता जह पुधं एफेण रक्खियं खोणिवलयमक्खंडं । रक्खिस्सामि तहेणिंह निस्सारह बेरियं एयं ॥ ६ ॥

जो एरिसं अणत्थं वीसत्थो कुणइ वसइ निस्संको । सो नूण ममंपि विणासिऊण रज्जंपिहु हरेज्जा ॥ ७ ॥

इय पुणरुत्तं नरवइस्स निच्छयमुवलब्भ विमणदुम्मणा गया कुमारसंमीवं रायपुरिसा, तं च पणमिऊण सामव-  
यणा निविट्ठा एगदेसे, पलोइऊण य तेसिं मुहसोहं भणियं कुमारेण—किं भो ! गाढमुविग्गा दीसह ? साहह किमेत्थ

श्रीगुणचंद  
महावीरच०  
४ प्रस्तावः

॥ ९७ ॥

कारणं?, खणंतरं निरुद्धकंठं चिद्विय दीहुणहुणहमुकनीसासपुरस्सरं दुस्सहविरहविहुरनिस्सरंतवाहप्पवाहं परासुसियलो-  
यणजुयलं भणियं पुरिसेहिं-कुमार! निब्भग्गसिरसेहरा किं साहेमो?, कुमारेण भणियं-कहं चिय?, पुरिसेहिं भणियं-  
जेण तुम्हेहिं सह दुस्सहो दीहविरहो भविस्सइत्ति, इंगियाकारकुसलत्तणओ परियाणिऊण तेसिमभिप्पायं भणियं  
कुमारेण-किं कुविओ ताओ निव्विसयमाणवेइ?, रायपुरिसेहिं भणियं-कहमेयं परुसक्खरं देवदुल्लाहाणं तुम्ह भणि-  
ज्जइ?, सयमेव जाणह तुम्हे जमेत्थ पत्तकालं, तओ वत्थतंवालाइणा पूइऊण रायपुरिसा सट्ठाणे पेसिया कुमारेण,  
वाहराविया य निययसेवगा, भणिया य-भो महाणुभावा! वारणसिरवियारणकुविएण ताएण निव्विसओ आणत्तोम्हि,  
ता गच्छह नियट्ठाणेषु तुम्हे, अवसरे पुणरवि एज्जहत्ति, सम्माणिऊण सप्पणयं पेसिया, देवी य सीलमई भणिया,  
जहा-गच्छसु पिए! तुमं पि पियहरं, पत्थावे पुणरवि एज्जाहि, सा य खणमवि विओगदुक्खमसहमाणी जमुणाजलस-  
च्छहं सकज्जलं नयणवाहप्पवाहं मुंचंती रोविउं पयत्ता, संठविया कुमारेण तेहिं तेहिं मडुरवयणेहिं, नेच्छइ य सा खण-  
मवि विओगं, तओ भणिया कुमारेण-पिए! दुग्गा मग्गा आजम्मसुहलालियाणं दढमजोग्गा य, असंजायसरीरवला  
वालजुयलपरिवुडा य तंसि, ता विरम सव्वहा ममणुग्गहं कुणमाणी इमाओ असग्गहाओत्ति, सीलमईए भणियं-  
अज्जपुत्त! तइया ताएण तुह किमुवइट्ठं?, कुमारेण भणियं-न सरामि, सीलमईए जंपियं-मम एकच्चिय धूया एसा  
अचंतं निवुइठाणं छायव सहचरी जह हवइ सया तह तए किंचंति, कुमारेण भणियं-पिए! सुमरियमियमियाणिं,

नरविक्र-  
मस्य  
प्रवासः.

॥ ९७ ॥

तीए जंपियं-ता कीस नियत्तेसि मं ? , कुमारेण भणियं-मग्गगाढपरिस्समकारणेण नियत्तेमि, जइ पुण अवस्समेवागंतधं  
मए समं ता पडणा भवसु, विमुंचसु भवणनिवासाभिरइं परिचय सुकुमारत्तणंति, सीलमईए भणियं-एसा समसुह-  
दुक्खसहा जाया पगुणहि, तओ करकलियसरासणो पिट्ठिप्पएसवद्धतोणीरो सुयजुयलसमेयाए सीलमईए सहिओ  
सुहपसुत्तेसु नयरलोएसु पसंतेसु गीयरवेसु सट्ठाणनिविट्ठेसु अंगरक्खेसु पमत्तेसु जामकरिघडाधिरूढेसु सुहडेसु इओ  
तओ पेसिएसु नियचेडगेसु नीहरिओ नयराओ कुमारो, अविच्छिन्नप्पयाणएहिं परं रज्जंतरं गंतुं पवत्तो य ।

इओ य आयन्निऊण कुमारस्स विदेसगमणं सयलोऽवि नयरीजणो मुक्ककंठं विलविउमारद्धो, मंतिणोऽवि परिच-  
त्तनीसेसरज्जवावारा हरियसवस्ससारा इव विमणदुम्मणा गंतूण नरनाहं उवलंभिउं पवत्ता, कहं विय ?

तिलतुसमित्तंपिहु नियपओयणं अम्ह साहिउं देवो । पुट्ठिं करिंसु इण्ह पव्वयमेत्तेऽवि नो पुट्ठा ॥ १ ॥  
ता देव ! जुत्तमेयं काउं किं तुम्ह थेवकज्जेऽवि ? । रज्जभरधरणधीरो जमेस निवासिओ कुमरो ॥ २ ॥  
किं एगदुट्ठकुंजरकएण नियजीयनिव्विसेसस्स । पुत्तस्स एरिसगई विहिया केणावि नरवइणा ? ॥ ३ ॥  
किं वा विंझमहागिरिपरिसरधरणीए कुंजरकुलाइं । हरियाइं तकरेहिं जं देवो ववसिओ एवं ॥ ४ ॥  
इत्थीए रक्खणओ किमजुत्तं नणु कयं कुमारेण ? । नियडिंभदुट्ठचेट्ठावि जणेइ जणयस्स संतोसं ॥ ५ ॥  
पररज्जेसु य अजसो अम्हाण पयासिओ तए नूणं । जह नरसिंघनराहिवरज्जमुवेक्खंति गुरुणो य ॥ ६ ॥



श्रीगुणचंद  
महावीरच०  
४ प्रस्तावः

॥ ९८ ॥

ता गिणहह नियमुदं सह भवणधणेहिं मोकलह अम्हे । न सहिस्सामो एत्तियमवजसरयफंसणं देव ! ॥ ७ ॥  
इय मंतीहिं भणिए राया संजायचित्तसंतावो । अब्भुवगयनियदोसो ताहे ते भणिउमाढत्तो ॥ ८ ॥  
सरिसह मम अवराहं जमपुच्छिय एरिसं कयं कज्जं । नो कोवभराओ जओ जुत्ताजुत्तं मए नायं ॥ ९ ॥  
जह तुब्भे भणह तहा न कोऽवि दोसेऽवि चयइ नियपुत्तं । इय वइयरछउमेणं मन्ने लच्छीए छलिओऽहं ॥ १० ॥  
जं पुण इय दोसाओ मंतित्तविमोयणं कुणह तुब्भे । एसेव निरंजणसामिभत्तिजुत्ताण होइ मई ॥ ११ ॥  
केवलमेको पुत्तो रज्जसमत्यो गओ विदेसंमि । तुम्हेवि उवेक्खह मं उभयं सोढुं न सक्कोऽहं ॥ १२ ॥  
ता संपयं पसीयह रज्जं चित्तेह लहह कुमरस्स । सवत्थावि पउत्तिं एत्तो रोसेण पज्जत्तं ॥ १३ ॥  
एवं गाढनिबंधेण पडिवन्नं मंतिजणेणमेयं, पेसिया य सयलदिसासु वरतुरयाधिरूढा पुरिसनियरा कुमारन्नेसण-  
निमित्तं, गया य सवत्थ, निरूविओ सवजत्तेण, न केणवि दिसाभागमेत्तंपि वियाणियं, तओ कइवयवासराइं  
वियरिय तेसु तेसु ठाणेषु अकयकजेहिं चेव नियत्तिऊण तोहिं सिट्ठो सभानिविट्ठस्स मंतिजणसमेयस्स नारिंदस्स  
कुमाराणुवलंभवुत्तंतो, तं च सोचा अचंतं सोयं कुणंतो राया वागरिओ मंतीहिं-देव ! अलं परिदेविण, न  
कयाइ करतलाओ विगलिओ पुणोवि पाविजइ चिंतामणी, न य दढकुनयदंडताडिया पुणोऽवि मंदिरे निवसइ  
रायलच्छी, न गाढमकारणावमाणिओ नियत्तइ सप्पुरिसजणो, राइणा भणियं-जइ पढममेव सो तुम्हेहिं नियत्तिओ

मन्त्रिणां  
रोषः कुमा-  
रान्वेषणं,

॥ ९८ ॥

होंतो ता जुत्तं हुत्तं, मंतीहिं भणियं—जइ मूलेऽवि से न रोसुप्पायणं देवो करेंतो ता जुतत्ततरं हुंतं । अवि य—  
कज्जविणासे जाए जह बुद्धी वंधुरा पवित्थरइ । तह जइ पढमं चिय होज्ज देव ! ता किं न पज्जत्तं ? ॥ १ ॥

धन्ना सबुद्धिविभवेण जाणिउं वत्थु तस्स य सरूवं । पढमं चिय सुग्गहियं कुणंति सप्पस्स वयणं व ॥ २ ॥

रत्ता बुत्तं सचं एयमहो केवलं बहुसणाहो । जाणेण विणा कह सो दूरपहं पाविओ होही ? ॥ ३ ॥

मंतीहिं तओ भणियं जेणेसा विहडणा कया देव ! । सो दूरेऽवि नएज्जा नूण कुमारं लहुं दंइवो ॥ ४ ॥

एवं चिरं परितप्पिय पुणोवि चारपुरिसे[हिं] कुमारवत्ताजाणणंत्यं पेसिय नियनियठाणेसु गया मंतिणो, रायावि  
सुयविरहवेयणाविहुराए चंपयमालाए देवीए संठवणनिमित्तमंतेउरं गओत्ति ॥

इओ य सो कुमारो कमंकमेण गच्छंतो चिरकमलवणविहारुविग्गाए लच्छिदेवीए तुट्टेण पयावइणा निवासनिमित्तं  
य विरइए नाणाविहतुरुणतरुसामलियसयलरविकरपसरे अणेगकोडीसरीयजणसंकुले संदणपुरवेलाउले संपत्तो, अवि-  
याणमाणो य तहाविहं गेहंतरं गोपुरपचासन्नस्स पाडलाभिहाणमालागारस्स मंदिरंमि पविट्ठो, दिट्ठो य सो पाड-  
लेण विन्नाओ य विसिट्ठागिईए जहा नूणं कोई एस महापुरिसोत्ति, तओ अब्भुट्ठिऊण सपणयं कया उचियपडिवत्ती,  
दंसिओ गिहस्स एगदेसो, निक्कारणवच्छल्लयाए य भायरं व तं उवयरिउमाढत्तो, कुमारोऽवि तत्थट्ठिओ सज्जूहभ-  
ट्ठोव पवंगमो दिणगमणियं कुणंतो अच्छइ । अन्नया य पुवसमाणियंमि निट्ठियंमि दविणजाए पाडलेण भणियं—कुमार !

श्रीगुणचंद  
महावीरच०  
४ प्रस्तावः

॥ ९९ ॥

महायस निव्ववसायाणं केरिसो निव्वाहो?, ता परिचयसु आलस्सं, गिण्हसु ममारामस्स एगदेसं, ससुचिणखु  
कुसुमाइं, गुंधिऊण य विविहमालाओ विक्किणसु रायमग्गंमि जहा सुहेण चेव निव्वहइ तुह परिग्गहोत्ति ।

तओ—जह जह वाएइ विही विसरिसकरणेहिं निठुरं पडहं । धीरा पहसितवयणा नचंति तहा तह चेव ॥ १ ॥  
इय चिंतिऊण खत्तधम्ममाणणुरूवंपि तयणुरोहेण पडिवन्नमेयं कुमारेण, पइदियहं च सह सीलमईए मालागारो-  
वदंसियकाणणेगदेसतरुकुसुमाइं उच्चिणिय नियगेहमागंतूण मालाओ विरएइ, पाडलगभज्जाए य समं सीलमइं तविक्रय-  
निमित्तं रायमग्गे पेसेइ, उप्पज्जइ वहु अत्थो, एवं च पइदिणं पुप्फविक्रयकरणेणं सुहेण संपज्जइ निव्वाहो, अन्नया  
पप्फुल्लविइल्लमालाओ गहाय सीलवई गया रायमग्गे, अह तीसे रूवेण जोघणेण य लायण्णेण य सोहग्गेण य अक्खि-  
त्तचित्तो समागओ एगो कोडीसरीओ देहिलो नाम नावावणिओ, भणिया य तेण—भइ! केत्तिएण इमाओ मालाओ  
लब्भंति?, तीए भणियं—पंचहिं सुवण्णधरणेहिं, तओ

दानेन वैराण्युपयान्ति नाशं, दानेन भूतानि वशीभवन्ति । दानेन कीर्तिर्भवतीति दुशुभ्रा, दानात्परं नो वरमस्ति वस्तु ॥ १ ॥  
इय चिंतितेण तीसे चित्तावहरणत्थं समप्पिया तेण तिण्णि दीणारा, सहरिसाए तीए गहिऊण समप्पियाओ  
फुल्लमालाओ, विणएण भणिया य सा—भइ! इओ दिणाओ आरब्भ मा अन्नस्स दाहिसि, समहिगतसुहेणवि अइमेव  
गहिस्सामि, पडिवन्नं च तीए, गयाइं दोन्निवि नियनियगेहेसु, एवं पइदिणं सो तीए सगासाओ पुप्फमालाओ गि-

स्यन्दनपुरे  
नरविक्रमः,

॥ ९९ ॥

पहइ, साऽवि समहिगदविणलोभेण तस्स चेवं दलयइ । अन्नया परतीरेगमणनिमित्तं नाणाविहअमुल्लभंडभरियं जाणवत्तं  
ठावियं जणेण समुद्धतीरे, सावि भणिया, जहा-कलेऽहं परतीरे गभिस्सामि, तम्हा तुमे समुद्धतीरे अमुगंभि पएसे  
आगंतूण नीसेसाइं कुंदवेइल्लनयमालईपाडलाइमुत्तयचंपयपमुहाइं कुसुमाइं समप्पेज्जासि, अहं ते चउग्गुणं मोल्लं  
दवाविस्सामि, पडियन्नं च तीए हट्ठहिययाए, न मुणिओ कोऽवि परमत्थो, वीयदिवसे गया समग्गकुसुममालाओ  
गहिऊण निदिट्ठद्वाने, दिट्ठो सो वणिओ जाणवत्ताधिरूढो, पणामियाइं तीए कुसुमाइं, पसारिओ तेण हत्थो, तीएवि  
समप्पणं(णत्थं)पलंविआ मुणालकोमला नियमुयलया, तेणवि हरिसभरनिभरंगेण सकुसुममाला चेव गहिऊण आरो-  
विया सीलयई जाणवत्ते, उक्खित्ता उवरिगाए, एत्थंतरे वज्जावियाइं मंगलतूराइं पयट्ठियं पवहणं विमुक्का सियवडा  
वाहियाइं आवल्लयाइं चंडगंडीवविमुक्ककंडंवे वेगेण गंतुं पवत्तं जाणवत्तं । इओ य सो नरविक्रमकुमारो अच्चंतं तदणाग-  
मणकालविलंबुधिग्गचित्तो इओ तओ सीलमइं पलोइउं पवत्तो, तं अपेच्छमाणेण य तेण पुट्ठा पाडिवेसिया, अवलो-  
इओ रायमग्गो, सम्मं निरिक्खिया तियचउक्कचचरा, अवलोइयाइं सयलदेवउलभवणकाणणाइं, निवेइया वत्ता पाड-  
लयमालागारस्स, तेणावि सच्चायेरेण गवेसिया सीलमईसच्चद्वानेसु, कत्थविय पउत्तिमपावमाणेण सिग्घमेव नियत्तिय  
भणिओ कुमारो-महायस । धीरो भव, परिचयसु कायरत्तं, कुमारेण भणियं-भद्द ! न किंपि मम कायरत्तं, केवलं एए वालए  
जणणीविओगवसविसंडुलं रोयमाणे न सक्केमि पेच्छिउं, पाडलेण भणियं-एवं ठिएवि पुरिसाय(सयार)त्तं कायवं, ता

श्रीगुणचंद  
महावीरच०  
४ प्रस्तावः

॥ १०० ॥

पुत्रदिसिविभागे तीसे अन्नेसणनिमित्तं अहं गच्छामि, तुमं पुण पुत्तसमेओ चिय उत्तरदिसिहुत्तं इमाए नईए उभयकूलेसु उज्झरेसु य दरीसु य दुत्तडीसु य विसमप्पवेसेसु य अवलोइज्जासित्ति, एवं करेमिच्छि पडिवज्जिय पुत्तजुयलसमेओ चेव गओ नरविक्रमो नईए पासदेसंमि, ते य पुत्तए मणागंपि सन्निहिममुंचमाणे संठविय चिंतिउमारद्धो । कहं चिय?—

किं होज्ज केणवि हडा? वसीकया वावि केणवि नरेण? । किं वा सरीरपीडाए होज्ज कथवि निसन्ना सा ॥ १ ॥

किं वा ममावमाणं किंपि हु दट्ठुण विलयमावन्ना । पुरिसंतरंमि अहवा जाओ तीसे पणयभावो ॥ २ ॥

सुमरामि न तावडवमाणकारणं होउ वाडवमाणेऽवि । नो सा चएज्ज पुत्तं अवचनेहो जओ गरुओ ॥ ३ ॥

संभवइ न एयंपिहु जमन्नपुरिसं मणेऽवि चिंतेज्जा । कह तारिसकुलजाया सीलं मइलेज्ज ससिधवलं? ॥ ४ ॥

अहवा जुवईण मणं कुडंगुविलं क एव जाणेज्जा? । वाहिंदंसियपणयाण कवडभरियाण मज्झंमि? ॥ ५ ॥

अन्नं वयंति पुत्रं पच्छा पुण वाहरंति गिरमन्नं । अन्नं धरंति हियए साभिप्पेयं करंति पुणो ॥ ६ ॥

गयणे गणंति गहगणमुयहिंमि जलंपि जे परिमिणंति । पेच्छंति भावि कज्जं न तेऽवि जाणंति जुवइयणं ॥ ७ ॥

सच्चं चिय जुवईओ एरिसियाओ न एत्थ संदेहो । केवलमेयाए मए दिट्ठं लहुयंपि नो विलियं ॥ ८ ॥

ता सबहा न उवेहणिज्जा होइ एसत्ति निच्छिऊण पुत्ते य नईकूले संठविय परकूलन्नेसणट्ठाए पविट्ठो नईए, पत्तो य मज्झयारे, एत्थंतरे अचंतपडिणियत्तणओ हयविहिस्स अघडंतवत्थुसंघडणसीलयाए भवियवयानिओगस्स वलवत्त-

शीलवत्य  
न्वेपणा.

॥ १०० ॥

णओ वेयणीयकम्मस्स गिरिसिरवरिसणवसविसप्पमाणसलिलप्पवाहेण पूरिया तक्खणेण नई, जाया अगाहा, खलिओ  
पवप्पयारो पवाहिओ तरुपल्लववारिपूरेण नरविक्रमकुमारो नीओ दूरप्पएसं, अह कहवि कुसलकम्मवसओ पाविय-  
मणेण फलंगं, तंनिस्साए अवयरिओ तीरे तीए, नुवन्नो तरुवरच्छायाए, चिंतिउं पवत्तो—

कह नियनयरचाओ ? कहेत्थ चासो ? कहिं गया भज्जा ? । कह पुत्तेहि विओगो ? कह वा नइवेगवहणं च ? ॥ १ ॥

स्वरपयणाहयजरतिणनियरो विव देवया दिसिवलिच्च । एकपए चिय कह मज्झ परियरो विसरिओ झंत्ति ? ॥ २ ॥

हे दइव ! तुज्झ पणओ एसोऽहं खिचसु सवदुक्खाइं । मज्झं सयणजणाओ जेणऽन्नजणो सुहं वसइ ॥ ३ ॥

एत्थंतरे पचासन्नजयवद्धणनयराहिचई कित्तिवम्मनामो नरवई अनिवत्तगसूलवेयणाए अपुत्तो सहसा पंचत्तमुवगओ,  
तओ मिलिआ मंतिसामंताइणो लोया, कओ पंचदिवाभिसेओ, रज्जारिहं च पुरिसं सवत्थ मग्गिउं पवत्ता, खणं-  
तरेण नयरच्चंतरे रज्जारिहमपेच्छंताणि बाहिं अवलोयणट्ठा निग्गयाणि पंच दिवाणि, गंतुं पयट्ठाणि च तमुहेसं जत्थ  
सो चिंताउरो नरविक्रमकुमारो निवसइ, अह तदग्गगामिणं पयंडसुंडादंदुडामरं वेगेण पवरकुंजरमिन्तं दट्ठूण विग-  
प्पियं एवं कुमारेण—

भन्ने पुच्चभत्तं इयाणि दइवो समीहए काउं । कहमन्नहेह हत्थी दूरुलालियकरो एज्जा ? ॥ १ ॥

अहवा एउ इमो लडु कुणउ य मणयंछियं जहा मज्झं । ससुयदइयविरहपमोकखदुक्खवोच्छेयणं होइ ॥ २ ॥

श्रीगुणचंद  
महावीरच०  
४ प्रस्तावः

॥ १०१ ॥

अह गलगजिं घणघोसविभ्रमं कुंजरेण काऊण । नियपट्टीए ठविओ झत्ति कुमारो करग्गेण ॥ ३ ॥  
हयहेसियं च जायं जयतूररवो वियंभिओ सहसा । सामंतमंतिलोएण परिवुडो तो गओ नयरं ॥ ४ ॥  
जाओ पुरे पमोओ अपणयपुवावि पत्थिवा पणया । नरविक्रमेण रज्जं अत्तायत्तं कयं सबं ॥ ५ ॥  
नरसिंघनिविसेसा जाया करितुरयरयणभंडारा । सक्कोव देवलोए विलसइ सो विविहकीलाहिं ॥ ६ ॥  
केवलमेको चिय फुरइ तस्स हिययंमि नट्टसल्लं व । दइयासुयदीहरविरहवइयरो दुस्सहो अणिसं ॥ ७ ॥  
अन्नया जयवद्धणनयरासन्नज्जाणे अणेगसीसपरिवुडो सीहोव दुद्धरिसो सूरुव निहियतमपसरो चंदोव सोम-  
सरीरो मंदरो इव थिरो जच्चकणगंवं परिकखखमो दूरविवज्जियराओवि अणंतराओ धरियपयडजमवओवि नीसे-  
ससत्तरक्खणवद्धलक्खो समिइवावारियमणपसरोऽवि सया पसंतचित्तो छत्तीसगुणमहामणिरोहणभूमिव धीनि-  
हाणं व पच्चक्खधम्मरासिव भुवणभवणेक्कदीवोव सिवपंथसत्थवाहोव कम्मतरुनियरहववाहोव दढजा-  
यदप्पकंदप्पसप्पसन्नागदमणिव ससमयपरसमयजलप्पवाहसिंधुव लोयचक्खुव नियनियविसंडुलकरणकुरंगे-  
क्कपासोव मिच्छत्तजलाउलभवसमुदनिवडंतजंतुवोहित्थो पंचविहायारमहाभरेक्कनित्यारणसमत्थो जइधम्मे असमत्थे  
सावयधम्मंमि संठवमाणो इयरे पुण जइधम्मे सिद्धंतपसिद्धनाएणं अपुवापुवजिणभवणाइं वंदमाणो गामाणुगामं  
विहरंतो आगंतूण समंतभदाभिहाणो सूरी समोसरिओत्ति, जाया नयरे पसिद्धी, जहा असेसगुणगणावासो सूरी

जयवर्धने  
नरविक्रमो  
नृपः.

॥ १०१ ॥

आगओ, तओ कोऊहलेण य भवनिव्वेणत्ति य संदेहपुच्छणेण य बहुमाणेण य धम्मसवणनिमित्तेण य नियनियद-  
रिसणाभिप्पायविमरिसेण य समागया वहवे मंतिसामंतसेट्ठिसेणावइसत्थवाहदंडनाहप्पमुहा नयरलोया, निवडिवा  
चरणेसु, निविट्ठा जहासंनिहिया धरणिवट्ठे, सूरीवि पुवभवज्जियगुरुकम्मजलणजालालितत्तगत्तेसु करुणामयवुट्ठिपिव  
दिट्ठिं सत्तेसु पेसंतो मंदरगिरिमंथमहिज्जमाणखीरोयरवगंभीरेण सहेण सद्धम्मदेसणं काउमारद्धो, कहं ?—

खरपवणपणुन्नकुसग्गलग्गजलविंदुचंचलं जीयं । सुररायचावचवलं खणेणवि गलइ सरीरवलं ॥ १ ॥  
पेम्मं पि तुंगगिरिसिरसरंतसरियातरंगमिव तरलं । लच्छीवि छड्डणुड्डमरवंछिरी पेच्छइ छलाइं ॥ २ ॥  
पयडपयट्ठियदारुणविविहवियारा महासमुदे व । निवडंति आवया आवयव निचं सरीरंमि ॥ ३ ॥  
मणिमंततंतदिद्वोसहीण वावारणेवि अविणासं । भुंजंता देंति दुहं विसया विसवल्लरीडव ॥ ४ ॥  
मिच्छत्तमोहमोहियमईहिं कीरंति जाइं पावाइं । भवसयपरंपरासुवि वेरिद्व मुयंति नो ताइं ॥ ५ ॥  
पियपुत्तकलत्ताइं जाण कज्जेसु वट्ठियं बहुसो । परलोयपयट्ठाणं ताणिवि नो हुंति ताणाय ॥ ६ ॥  
इय भो नाउं जिणधम्ममणुदिणं सरह सरहसं कुसला । जावज्जवि वज्जमहासणिव निवडइ न तुम्ह जरा ॥ ७ ॥  
तीसे पडणे पुण छिन्नपक्खपुडया विहंगवग्गव । उट्ठियदाढाभुयगव हरियरज्जा णरिंदव ॥ ८ ॥  
सच्छंदगमणपरभीइजणणसव्वत्थसाहणविहीणा । चिररिद्धिं सुमरंता सुचिरं तुब्भे किलिस्सिहिह ॥ ९ ॥



श्रीगुणचंद  
महावीरच०  
४ प्रस्तावः

॥ १०२ ॥

पज्जंतं एत्तो जंपिएण जइ कामियाइं सोक्खाइं । भोत्तुं वंछह ता वीयरायवयणे समुज्जमह ॥ १० ॥  
इय संसारनिस्सारत्तणपरिकहणेण पडिबुद्धा वहवे पाणिणो । वीयदिवसे य समायन्नियसूरिसमागमणवुत्तंतो सम-  
ग्गयतुरयनरनियरपरियरिओ भारियासुयसंपओगपुच्छणकए समागओ नरविक्रमनराहिवो, तओ वंदिऊण सूरिं  
चिंतिउमाढत्तो-अहो एयस्स भुवणच्छरियभूयं रुवं विमुक्कामयवुट्ठी दिट्ठी सजलघणघोससुंदरो सरो नीसेसपसत्थल-  
क्खणजुत्तं गत्तं पाणिगणकयरई भारई, तहा—

तमनिग्गहिओ चंदो तवंमि मंदा रुई दिणयरस्स । गिरिविहियाभिभवो सायरोऽवि को हुज्ज एयसमो ? ॥ १ ॥

तं नत्थि जं न जाणइ भूयं भव्वं भविस्समवि वत्थुं । ता होइ पुच्छणिज्जो नियदइयापुत्तवुत्तंतं ॥ २ ॥

इय निच्छिऊण उवविट्ठो उचियासणे राया, गुरुणावि पारद्धा धम्मकहा, पुणरवि पडिबुद्धा पभूयपाणिणो,  
राइणावि पत्थावसुवलब्भ पुच्छिओ सूरि-भयवं ! निच्छियं मए, जहा-तं नत्थि जं न जाणह तुब्भे, ता काऊणाणुकंपं  
साहह कइया भारियाए सुएहि य सह मम समागमो भविस्सइत्ति, गुरुणा भणियं-महाराय ! धम्मज्जमेण तदंतरा-  
इयकम्मक्खओवसमो जया होहिइ, राइणा भणियं-भयवं ! जाणामि एयं, केवलं दुस्सहविओगविहुरो न सक्केमि  
धम्मज्जमं काउं, चित्तनिरोहसव्वपेक्खो हि धम्मलक्खो कहमम्हारिसेहिं साहिउं तीरइ ?, ता सव्वहा कुणह पसायं,  
निवेयह अवरसुवायंति, गुरुणा भणियं-जइ एवं ता पज्जुवासेसु पइदिणं सुणिजणं, एयं खु परमोवाओ वंछियकज्ज-

सामन्तभ-  
द्रदेशना.

॥ १०२ ॥

सिद्धीए, जओ-विहडइ निविडकम्मनिगडंपि डु भिंदइ दुग्गइ, लहु कल्लाणवेळिमुल्लासइ नासइ दुक्खसंगइ ।

वंछइ लच्छि पास परिसप्पणु दप्पणु जिम पभासए, मुणिजणसंगमेवि किं किं जणु जं नवि सोक्खु पासए ? ॥१॥

तओ रोगिणव वेज्जोवइट्ठोसहं पंथपरिचमट्ठेण व सुमग्गदेसणं तण्हाभिभूएण व विमलसलिलपडिपुण्णमहास-  
रोवरनिवेयणं राइणा संममब्भुवगयमिमं गुरुवयणं, गओ य पणमिऊण सट्ठाणं ।

इओ य ते दोवि तस्स सुया नदीए कूलंमि निलीणा तण्हालुहाभिभूया जाव खणंतरं चिट्ठंति ताव एगो गोउलिओ  
दहिमहियाणि णयरे विक्किणिऊण समागओ तत्थ पएसे, पेच्छइ देवकुमारनिचिसेसरूवे करुणसरं रुयमाणे ते दोऽवि  
दारगे, तओ पुच्छिया तेण-रे पुत्तगा ! कीस रोयह ? केण तुच्चे एत्थ ठविया ? को वा तुम्ह एत्थ सयणजणोत्ति ?  
जेट्ठेण साहिओ सबो पुव्वुत्तंतो, अह अणाहत्ति परिकळिऊण तेण जहासंनिहियअसणयाणदाणेणमहिनंदिऊण तेहिं  
तेहिं पयारेहिं उवलोमिऊण य नीया ते नियगोउलंमि, समप्पिया य गोउलाहिवस्स, तेणावि पुत्तविरहियाए समप्पिया  
नियदइयाए, सावि उदरुब्भवे इव परिपालेइ सव्वजत्तेण, उवयरइ खंडखज्जाइपमुहविसिट्ठवत्थुप्पयाणेण अणवरयं,  
सोऽवि गोउलाहिवई किल जयवद्धणनयराहिवस्स संबद्धोत्ति अन्नया कयाइ तेहिं दोहिवि पुत्तेहिं समेओ महामुल्लं  
पाहुडमादाय नरविक्रमनरिंदंसणत्थं समागओ जयवद्धणनयरं, दिट्ठो य नरवई, पणमिओ सव्वायरेणं, समप्पियं पाहुडं,  
दिट्ठो राइणा सहत्थेण तंवोळो, पुट्ठो य सयलसुत्थासुत्थवत्ताओ, एत्थंतरे निवडिया दोसु तेसु पुत्तेसु राइणो दिट्ठी,

श्रीगुणचंद  
महावीरच०  
४ प्रस्तावः

॥ १०३ ॥

जाओ गाढं पमोओ, परिभावियं च जहा धुवं एए मम तणयत्ति, तहावि पुच्छामि एयं-को पुणं एत्थ चइयरोत्ति  
परिभाविय पुट्ठो गोउलाहिवई, कस्स भो एए पुत्तगत्ति?, तेण भणियं-देव! मम संवंधिणो, गेहिणीए आवालाका-  
लाओ उ वड्ढियत्ति, राइणा भणियं-संमं साहेसु, जायसंखोभेण तेण सिट्ठो नईकूलाओ आरब्भ सयलो वुत्तंतो, एयमाय-  
न्निऊण राइणा परमहरिसपगरिसमुव्वहंतेण ते दोऽवि दारणा गाढमालिंगिय उच्छंगे निवेसिया, गोउलनायगेण भणियं-  
देव! पुरावि मए विविहचेट्ठाहिं नाया एए जहा कस्सइ सामंतस्स वा सेणावइस्स वा नरवइस्स वा मग्गे गच्छंतस्स  
केणावि विसमपओगेण पब्भट्ठा होहिति, कहमन्नहा एएसिं पइदिणंपि मट्ठियाघडियदोघट्टघडभेडणेण य कित्तिम-  
तुरयघट्टपयट्टणेण य संपिंडियसरिंडयपरिकप्पियसंदणवाहणेण य बुद्धिपइट्ठियकट्टलट्टिखग्गुव्वहणेण य चाउरंगसेणा-  
संमहुद्दामसंगामपरिकप्पणेण य डिंभाण गामागरनगरपसायदाणेण य विविहा कीला अहेसि?, न य एवंविहा चेट्ठा  
पागयसुयाण होइ, तहा सव्ववेलासु मम तुम्ह दंसणत्थमंतस्स एयाणवि नरिंदभवनदंसणकए गाढनिच्चंधो आसि,  
केवलमहं वावत्तिऊण विसिद्धवत्थदाणेण दिट्ठिवंचणेण य पुरा एंतो, इण्हिं पुण गाढनिच्चंधं काऊण मम खणंपि पुट्ठिं  
अमुंचमाणा समागयत्ति, अहो महाणुभावेण कहं ममोवयरियंति चिंतंतेण रत्ता परमपमोयभरनिच्चरंगेण दिन्नं तस्स  
तं चेव गोउलं गामसयं च आचंदकालियं सासणनिवद्धं भुत्तीए, पभूयवत्थतंवोलाइणा य पूइऊण पेसिओ सट्ठाणंति ।  
सयंपि पुत्तजुयलपरियरिओ गओ सूरिसमीवं, वंदित्ता परमायरेणं निवेइओ पुत्तसमागमवुत्तंतो, सूरिणा भणियं-महा-

पुत्रयुगल-  
समागमः.

॥ १०३ ॥

राय ! मुमरिसि पुव्वभणियं अम्हं वंयणं ? राइणा भणियं—भयवं ! नियनामंपिव सुमरामि, सूरिणा भणियं—महाभाग !  
केत्तियमेत्तमेयं ? गुरुजणपज्जुवासणेण तं नत्थि जं न सिज्झइत्ति, रत्ता भणियं—अवितहमेयं, किं पच्चक्खेवि अणुववन्नं  
भंणिज्जइ ? पसीयसु इयानि एकेण दइयवियोगदुक्खवोच्छेयणेणं, गुरुणा भणियं—भा ऊसुगो होसु, एवन्ति पडिव-  
ज्जिय पणमिऊण य सव्वायरेण गओ राया सट्ठाणं ।

इओ य सो देहिलो नावावणिओ अणुकूलपवणपणोलिज्जमाणसियवडवसवेगपयट्ठियजाणवत्तो गंतुं पवत्तो ससु-  
हंमि, सीलमईवि तहाविहं अदिट्ठपुव्वं वइयरं अवलोइऊण हा पिय ! पाणनाह ! किमेवंविहं वसणं विसममावडियन्ति  
जंपिऊण य अकंडनियडियवज्जदंडताडियव्व मुच्छानिमीलियच्छी परसुछिन्नव्व चंपगलया निवडिया जाणवत्तभूमितले,  
समासासिया पासवत्तिणा परियणेण सिसिरोवयारेहिं, खणंतरेण लद्धचेयणा गाढसुयपिययमवियोगवसविसंडुला  
गलंतनयणजलप्पवाहा विलविडमेवं पवत्ता—

हा भुवणपयडपोरिस ताय ! सजीयस्स संनिहं दट्ठुं । किमुवेहसि अइदुहियं नियदुहियं संपयं एयं ? ॥ १ ॥

नरासिहनराहिव ! नियवडुं पि किमुवेहसे अणज्जेण । एवं पि हीरमाणिं ? हा हा विपरंमुहो दइवो ॥ २ ॥

हा पाणनाह ! हा गोत्तदेवया हा समत्थदिसिनाहा । रक्खह रक्खह एयं हीरन्ती पावमिच्छेणं ॥ ३ ॥

एवमाईणि करुणाइं जंपन्ती सा संभासिया नावावणिण्ण—भहे ! कीस एवं विलवसि ? धीरा भव, नाहं सुमि-

श्रीगुणचंद  
महावीरच०  
४ प्रस्तावः

॥ १०४ ॥

णेवि तुह पडिकूलकारी, जओ एसा समुद्धुरा रिद्धी तुहायत्ता, एसोऽहं दासनिव्विसेसो, ता पडिवज्जसु सामिणीसहं,  
वावारेसु नियबुद्धीए गेहकज्जेसु एयं परियणंति, सीलमईए भणियं—

अवसर दिट्ठिपहाओ निट्ठुर! पाविट्ठ! धिट्ठ! दुचेट्ठ! । अहवा सासनिरुहेण जीवियं लहु चइस्सामि ॥ १ ॥

रे रे खत्तियकुलसंभवंपि आजम्मसुद्धसीलंपि । मं एवमुल्लवंतो नियजीयस्सवि न लज्जेसि? ॥ २ ॥

किंच-खिज्जउ देहं निहरउ जीवियं पडउ दुक्खरिंछोली । नियतायदिन्ननामत्थविहडणं नेव काहामि ॥ ३ ॥

इय तीए निच्छयमुवलम्भ निवारियं तेण भत्तपाणं, छुहापिवासाभिभूयाएवि न परिचत्तो तीए नियनिच्छओ,  
एत्थंतरे तीए विसुद्धसीलपरिपालणतुट्ठाए सण्णिहियसमुद्देवयाए खित्तं महावत्ते तस्स जाणवत्तं, कओ जुगंतसम-  
यदारुणो समीरणो, समुल्लासिया कुलसिहरविम्भमा जलकल्लोला, विउवियाइं गयणे घोरायाराइं गंधवनयराइं,  
दंसिया गहिरगज्जिरवभीसणा फुरंतफारविज्जुपुंजपिंजरा जलहरा, तओ वाउलीहूओ कन्नधारो, जाया विहत्था  
सुहडसत्था, ठिया विमणदुम्मणा अवल्लाहगजणा, वाढं वाउलीभूओ नावावणिओ, एत्थंतरे गयणट्ठियाए  
जंपियं देवीए—

रे रे जइ दुट्ठवणियतणय! णयविरहिय हियकाम कामगदह दहणसारिच्छ रिंछोव तुच्छपेच्छय छयलगलथणसमाण  
माणवजणगरहणिज्जसील! सीलमइं धरिसिहसि एवं ता पाव! पावेसि इयाणिं विणासंति सोचा पंडुरपडपाउ-

समुद्रे शी-  
लवत्याः  
शीलं.

॥ १०४ ॥

रणो कयपूयावित्थरो विणयपणओ करकलियधूवदहणो सो विन्नविडं समाढत्तो-देवि! ममेकं दोसं दासस्स व  
खमसु परिहरसु कोयं न पुणो काहामीमं, पणए न परंमुहा देवा, ताहे भणियं देवीए-रे तुमं जइ सुहेण पालि-  
हिसि नियजणणिनिविसेसं एयं ता जीवसि हयास!, तेण तहत्ति सव्वं पडिवन्नं गाढभयवसट्ठेण, उवसंहरियं देवीए  
डमरं अहंसणं च गया । अह जाओ अणुकूलो पवणो, मग्गेण लग्गं जाणवत्तं, हरिसिया कन्नधाराइणो जणा, परि-  
तुट्ठो सो वणिओ, पडिओ सवायरेण चलणेसु सीलमईए, खामिया नियदुच्चरियं, भणिया य सा-सुयणु! मा काहिसि  
सव्वहा सोगं, अचिरेण तहा काहामि जहा मिलसि नियपिययमस्स, काराविया य पाणवित्तिं, समप्पिया निरुवहव-  
निवासनिमित्तमेका उच्चरिगा, तओ पइदिणं मायरं व भयणिं व देवयं व गुरुं व सामिं व वत्थेण य भोयणेण य भेसहेण  
य तंवोलेण य संमं पडियरमाणो पत्तो परतीरं, विक्किणियाइं निययभंडाइं पाविओ भूरिअत्थसंचओ निवत्तियासे-  
सकज्जो वलिओ सनयराभिमुहं, अंतरे आगच्छंतस्स अणणुकूलपवणपणोल्लियं लग्गं जयवद्धणनयरपरिसरंमि बोहित्थं,  
तओ विमुक्का नंगरा पाडिओ सियवडो उत्तरिओ वडुकिंकरनरपरियरिओ सो वाणिओ, गओ विचित्ताइं महारिहाइं  
परतीरभवाइं पाहुडाइं गहाय नरविक्रमनराहिवस्स दंसणत्थं, पडिहारनिवेइओ य पविट्ठो रायभवणं, दिट्ठो राया, सम-  
प्पियाइं पाहुडाइं, कओ राइणा सम्माणो, तओ समुदलंघणवइयरनिवेयणेण परतीरनयररायसरूववत्ताकहणेण नियक-  
याणगुणदोसपडणेण य ठिओ नरवइस्स समीवे पहरमेकं, एत्थंतरे पणमिऊण विन्नत्तं तेण-देव! सुन्नं पवहणं समागच्छइ

श्रीगुणचंद  
महावीरच०  
४ प्रस्तावः

॥ १०५ ॥

रयणी ता अणुजाणहं ममं गमणायत्ति, राइणावि पिययंमाविओगविहुरेण एसं चेव अज्ज दीहरनिसाए विणोयकारी  
हवउत्ति परिचितयंतेण भणिओ सो-भद्द! वीसत्थो इहेव चिट्ठसु, नियपहाणपुरिसेहिं रक्खावइस्सामि तुह जाण-  
वत्तं, जं देवो आणवेइत्ति भणिऊण पडिवत्तं तेण, विसज्जिया य राइणा नियपहाणपुरिसा पवहणरक्खणत्थं, एत्थंतरे  
उट्ठिया दोवि कुमारा, विन्नत्तं च तेहिं, जहा-ताय! अदिट्ठपुवं अम्ह पवहणं, गाढं च कोउयं तहंसणे, ता अणु-  
जाणउ ताओ जेण गच्छामोत्ति, तन्निच्छयमुवलब्भ अणुन्नाया य नरिंदेण, गया य अंगरक्खनरपरिक्खित्ता ते जाण-  
वत्ते, तं च इओ तओ निरिक्खऊण पसुत्ता तत्थेव । अह पच्छिमरयणिसमए पडिवुद्धा परोप्परं वत्ता काउमारद्धा,  
खणंतरेण लहुएण भाउणा पुट्ठो जेट्ठो भाया-अहो भाय! कहसु किंपि अपुवं अक्खाणयं, इह ट्ठियाण न झिज्जइ  
कहमवि विभावरी, जेट्ठभाउणा भणियं-भद्द! किमन्नेण अक्खाणयसवणेण?, एयं चिय अप्पणोतणयं अक्खाण-  
यमपुवं निसुणेहि, तेण जंपियं-एयमवि साहेहि, तओ

करकलियकुसुममाला जह जणणी रायमग्गमणुपत्ता । जह वलिया नो पुणरवि जह नयरे मग्गिया बहुसो ॥ १ ॥

जह ताओवि दुहत्तो अम्हेहिं समं गओ नईकूले । जह परतीरनिरुवणकएण सलिलंमि ओगाढो ॥ २ ॥

जह सरियनीरपूरप्पवाहिओ दूरदेसमणुपत्तो । जह अम्हे गोउलिण्ण गोउलं पाविया विवसा ॥ ३ ॥

जह बुद्धिं संपत्ता रायउले जह गया तओ अम्हे । रायावलोयणत्थं जह विन्नाया य ताएणं ॥ ४ ॥

देहिलव-  
णिजो जय-  
न्त्यामाग-  
मनं.

॥ १०५ ॥

जह वा महलकोऊहलेण एत्थागया तहा सबं । अक्खाणयमप्पणर्ग उवइट्ठं लहुगभाउस्स ॥ ५ ॥

एयं च कहिज्जमाणमामूलाओ निसुणियं समंगमवि समीवदेससंठियाए सीलमईए, तओ अपुवं अणाइक्खणिज्जं  
केवलमणुभवगम्मं नियसुयसाहियवइयरपरिन्नायसमुत्थहरिसपगरिसमुवहंती समुचरोमंचुचाइयकंचुया सुयसिणेहव-  
सपगलंतघणमुहसुद्धदुद्धधारा एह चिरकालपत्तगा पुत्तगा ! नियजणर्णि गाढमालिंगहत्ति भणंती गया तेसिं पच्चा-  
सन्नं, निवेइओ पुघवित्तंतो, विन्नाया जेट्ठपुत्तेण, तओ गाढं कंठमवलंबिय चिरविरहदुहावेगसूयगविसंडुलवयणगव्वं  
निम्भरं संपुत्तावि रोविउं पवत्ता, विन्नायपरमत्थेण मुहुत्तमेत्तं विलंबियं समासासिया कुमारपरियणेण, अहं उग्ग-  
यंमि दिणयरे परियणमज्झाओ एगेण पुरिसेण तुरियं गंतूण भणिओ नरविक्रमो-देव ! तुम्ह दइया कुमारेहिं एयस्स  
चेय नावावाणियस्स जाणवत्ते पत्तत्ति, तओ हरिसभरनिम्भरहियएण सविम्हयं पुच्छिओ राइणा एसो-भह ! को  
एस वुत्तंतोत्ति ? तेणवि संजायभएण भणियं-देव ! वियरसु मे अभयदाणेणप्पसायं जेण जहा वित्तं निवेएमि, पडिवन्नं  
नरिंदेण, तओ पढमाणुरागाओ आरब्धं जाणवत्तारोवणंकंदणोवल्लोभणदेवयाभेसणप्पमुहो साहिओ नीसेसो  
वुत्तंतो, एयमायन्निज्जण य नरवइणा समग्गधणजाणवत्तसहिओ निव्विसओ आणत्तो सो वाणियगो, सीलमईवि देवी  
करेणुगाखंधगया धरियसियलत्ता चामरेहिं वीइज्जमाणी पएपए पडिच्छंती नयरजणकयं पूयासक्कारं ठाणे ठाणे वियर-  
माणा दीणाणाहाण कणगदाणं पवेसिया परमविभूईए निययमंदिरं, काराविओ पुरे अट्ठदिवसिओ महुसवो, अह



श्रीगुणचंद  
महावीरच०  
४ प्रस्तावः

॥ १०६ ॥

प्रियासमा-  
गमः यथा-  
भद्रकता च

॥ १०६ ॥

णहवियविलित्ताए नियंसियामलमहग्घवत्थाए सुयजुयलपरिवुडाए पमोयभरनिभरंगीए सीलमईए पुरओ पुवणु-  
भूयं कहं कहंतेण तीसे य हरणपमुहं वित्तंतं निसुणमाणेण रण्णा मालागारस्स तस्स पाडलयनामधेयस्स सच्चरिय-  
मणुवयारं तहाविहं सुमरियं झत्ति, तो भणिया सीलमई-पिए ! पियाविहु न एरिसो होइ जारिसओ स महप्पा  
मालागारो सिणेहपरो, भणियं सीलमईए-सच्चमिणं नाह !, ता कुण पसायं सुसमिद्धिवियरणेणं महाणुभावस्स  
तस्स तुमं, फलमेयं चिय लच्छीए नाह ! संझभरागचवलाए जं पूरिज्जंति मणोरहाओ उवयारिलोगस्स ।

इय सोचा से वयणं रण्णा संदणपुराउ सो सिग्घं । आणाविऊण ठविओ चोडयविसए महाराओ ॥ १ ॥

दिन्नो से भंडारो समप्पिया करितुरंगरहजोहा । किं बहुणा ? अत्तसमो सोऽवि कओ तेण नरवइणा ॥ २ ॥

अन्नदिवसे य भज्जासु यसमेओ नरविक्रमो महया रिद्धिसमुदएणं गओ उज्जाणे, दिट्ठो सूरी, सच्चायरेण पणमिऊण  
पसाहिओ समीहियसंपत्तिवइयरो, गुरुणा भणियं-महाराय ! एरिसकल्लाणवल्लिनिबंधणाणि मुणिज्जणचरणसेवणाणि,  
राइणा चिंतियं-अहो अमोहं गुरुवयणं, अहो जिणधम्मस्स माहप्पं, सवहा धन्नोऽहं जस्स मे एवंविहेण मुणि-  
णाहेण समं संगमो जाओ, एवं च चिंतयंतेण रत्ता उवज्जियं सुगइकप्पतरुस्स सम्मत्तस्स वीर्यंति, गुरुणा भणियं-  
महाराय ! पडिवज्जसु निच्छइयं संपइ जिणधम्मं, राइणा भणियं-भयवं ! दढमप्पमत्तुत्तमसत्तजणजोग्गो जिणधम्मो,  
कहमम्हारिसजणा सकंति अणुपालिउं ?, गुरुणा नायं-अज्जवि निट्ठुरो मोहगंठी दढनिबंधणा मिच्छत्तवासणा

तिवाणुबंधों विसयपडिवंधो सवणमेत्ता विसेसधम्मवत्ता, तम्हा जहांभइगत्तमेव एयस्स इण्हमुचियंति चित्तिऊण  
वुत्तो सो—महाराय ! जइ एवं ता पज्जुवासेज्ज सुसादुणो पसंसेज्जसु जिणधम्मं अणुमोएज्जसु तप्पडिवत्ते भवजणे,  
एत्तियमेत्तेणवि होही दढकम्मविगमो, एवंति पडिवज्जिऊण गओ राया सट्ठाणंमि ।

निप्पच्चवायमउले भोगे भुंजेति पंचरूवेवि । सवत्थ जायकित्ती नरविकमनरवई ताहे ॥ १ ॥

सूरीवि धम्ममग्गे आरोविय भूरि भवपाणिगणे । सीसगणसंपरिवुडो नयराउ विहरिओ वार्हि ॥ २ ॥

पडिवोहेंतो सूरुव भवकमलाइं वयणकिरणोहिं । कालक्कमेण पत्तो जयंतिनयरिं विहारेण ॥ ३ ॥

उग्गहमणुजाणाविय नयरीए वार्हि चंपगुज्जाणे । सद्धम्मकम्मउज्जुयजइजणसहिओ ठिओ भयवं ॥ ४ ॥

जाया पुरे पसिद्धी सिद्धंतविसारओ जहा सूरी । इह आगउत्ति ताहे वंदणवडियाए नयरिजणो ॥ ५ ॥

अंतेउरेण सहिओ हरिकरिरहजोहवूहपरिकिण्णो । नरसिंहभूमिनाहोवि आगओ सूरिपासंमि ॥ ६ ॥

सायरमह विणमंतुत्तिमंगमणिमउडलीढपयपीढं । पणमिय मुणिजणसहियं गुरुमुवविट्ठो धरणिवट्ठे ॥ ७ ॥

संसारासारयागन्भा, तओ सद्धम्मदेसणा । गुरुणा काउमाढत्ता, मोहविद्धंसकारिणी ॥ ८ ॥

जहा—वलयासिंधुनिम्मग्गवडवीयं व दुल्लहं । को माणुसत्तं संपप्प, पमाएज्ज वियक्खणो ? ॥ ९ ॥

खणोऽवि नाउकम्मस्स, जाइ जेणाविणस्सरो । तेणेस मुच्छिओ लोओ, निरुच्चिग्गो कहं भवे ? ॥ १० ॥

श्रीगुणचंद  
महावीरच०  
४ प्रस्तावः  
॥ १०७ ॥

भवेज्ज कोऽवि किं धीमं, निदाकरणलालसो । मंदिरे हववाहुग्गजालामालापलीविए ? ॥ ११ ॥  
विएसे सुहगम्मेवि, सप्पाहेओ पयट्ठइ । दुग्गेऽणंते भवट्ठाणे, जे न किंपि समीहए ॥ १२ ॥  
हए से नियबुद्धीए, ठाणे ठाणे विसीयइ । अन्ने सोक्खे न पावेइ, सिद्धिसद्धम्मसंवले ॥ १३ ॥  
वलेण तेण किं कज्जं ?, किं वा तेण धणेणवि ? । न जं सद्धम्ममग्गस्स, उवयारे निजुज्जइ ? ॥ १४ ॥  
जएज्ज सब्बहा धम्मे, पमायपरिहारओ । जीवघायनिवित्तिमि, पवित्तिमि सुहेसु य ॥ १५ ॥  
सुयाइमोहसंवद्धा, पावं कुवंति पाणिणो । तेण पावेण संतत्ता, निवडंति अहो गइं ॥ १६ ॥  
गइंदा इव वज्झंति, जोणिलक्खेसु णेगसो । किं किं दुक्खं न पेक्खंति, ते तिक्खमवियक्खणा ? ॥ १७ ॥  
तम्हा एवं नाउं जइधम्मं सब्बहा समायरह । एसो खु तिवदुहजलणसमणघणवरिसणसमो जं ॥ १८ ॥  
सग्गापवग्गमंदिररोहणनिस्सेणिदंडसारिच्छो । कम्ममुब्भडविडविविहाडणेक्कधारुक्कडकुहाडो ॥ १९ ॥  
अचिरेण दिन्ननिस्सेससारनिस्सेयसो सुहत्थीहिं । अणुसरियवो सम्मं सुसत्तिजुत्तेहिं सत्तेहिं ॥ २० ॥  
रत्ता भणियं भयवं ! जं तुब्भे वयह तं पवज्जामि । जाव नियरज्जभारप्पणेण सुत्थं करेमि जणं ॥ २१ ॥  
गुरुणा भणियं जुत्तं एयं तुम्हं भवेक्कभीयाणं । निविग्गं कुणह लहुं चयह पमायं पयत्तेण ॥ २२ ॥  
अह गुरुं पणमिऊण गओ राया सभवणं कयमणंतरकरणिज्जं आहूया मंतिणो कहिओ निययाभिप्पाओ अवगओ

सुरेरागमनं  
देशना च.

॥ १०७ ॥

मंतीहिं, एत्थंतरे संमागया कुमारचारोवलंभनिमित्तं पुषपेसिया गूढपुरिसा, पणमिओ तेहिं रायां, निवेइओ नयरनि-  
ग्माओ आरब्भ जयवद्धणपुररज्जलाभपज्जंतो सवो कुमारवुत्तंतो, तुट्ठो राया, दिन्नं च चित्तियाइरित्तं तेसिं वित्तं, पेसिया  
य कुमाराणयणनिमित्तं बुद्धिसागरपमुहा मंतिणो, अणवरयप्पयाणएहिं पत्ता य ते जयवद्धणपुरं, नरविक्रमोवि नाऊण  
तेसिमागमणं सपरियणो निग्गओ अभिमुहो, पवेसिया वड्डविच्छडेणं, कया जणगनिव्विसेसा पडिवत्ती, पुट्ठा य उचि-  
यसमए आगमणप्पओजणं, निवेइयं तेहिं जहा-पव्वज्जापडिवज्जणाभिलासो राया, तुमंमि नियरज्जभरारोवणमणोरहो  
य देवस्स, अओ तुम्हाणयणनिमित्तं पेसियम्हिं, इमं सोचा तक्खणमेव तत्थ रज्जे जेट्ठपुत्तं ठविऊण समग्गनियखंधा-  
वारसमेओ चलिओ नरविक्रमो समं मंतीहिं, कालक्कमेण पत्तो जयंतिनयरिपरिसरं, विन्नायतदागमणो दूरं संमुहमागओ  
नरसिंहनरवई समं चंपगमालाए देवीए, तओ दूराओ चेव नरविक्रमो जणगमागच्छंतं पेच्छिऊण हरिसुप्फुल्लोयणो  
उयरिऊण करिवराओ मंतिजणसमेओ गंतूण निवडिओ चलणेसु जणयस्स जणणीएय, तेहिवि चिरदंसणुप्पन्नाणं-  
दसंदिरंछेहिं गाढमालिंणिऊण निवेसिओ नियउच्छंगे, पुट्ठो य सरीरारोग्गयं, खणंतरे य पविट्ठाइं नियमंदिरं,  
पत्यावे पुट्ठो नरवइणा नरविक्रमो पुरीगमणकालाओ आरब्भ पुव्ववइयरं, साहिओ नरविक्रमेण समत्थोऽवि, एवं  
च चिरफालदंसणसमुब्भवसुहसंदोहमणुहवंताण गया कइवि वासरा, अन्नदियहे य भणिओ राइणा नरविक्रमो-पुत्त !  
पुव्वपुरिसंपवित्तियवत्तिणीपरिपालणेण उस्सिखलज्जणताडणेण य एत्तियं कालं जाव मए पालियं रज्जं, इयाणिं पुण

श्रीगुणचंद  
महावीरच०  
४ प्रस्तावः

॥ १०८ ॥

ममाहितो सरीरवलेण य पुन्नपगारसेण य विक्रमेण य समत्थो तुमं ता अंगीकरेसु रज्जमहाभरं, परिवालेसु पुव्वप-  
वाहेण जणवयं, अहं पुण पुव्वपुरिसायरियं धम्ममग्गं अणुचरिस्सामि, कुमारेण भणियं-ताय ! विरमह इमाओ  
अज्झवसायाओ, तुम्ह दंसणुस्सुओ चिरकालेण अहमिहमागओ, नवि य अज्जवि एस पत्थावो पत्थुयवत्थुस्स, निव-  
सह ताव सगेहे चिय कइवय वरिसाइं, राइणा भणियं-वच्छ ! किं न पेच्छसि जायविमलपलियसंगमुत्तिमंगं ?, न  
वा निरूवेसि विसंदुलसयलट्ठिं सरीरलट्ठिं ?, न निरिक्खसि थेवपयासेवि चलंतिं दंतपंतिं ?, न विभावेसि वत्थुवि-  
देहं ?, एवं च पच्छिमदिसावलंबि विंबं व रविणो रयणीविराममलिणं मंडलं व ससिणो गाढजरत्तणपत्तं पत्तं व तरुणो  
जायसूरत्थमणसंभावनं वणं व कमलाण पम्भट्टलट्ठपुव्वसोहं अप्पाणप्पाणमवलोइऊण कहां खणमवि गेहे वसामि ?,  
ता मुयसु पडिवंधं पडिवज्जसु मम वयणं भवसु धम्मसहाओ, तओ तायनिच्छयमुवलब्भ नरविक्रमो अणणुभूयपुव्व-  
दुक्खकंतो वज्जताडिओ इव लेप्पघडिओ इव पत्थरुक्कीरिओ इव चित्तलिहिओ इव खणं ठाऊण वाढं रोविडं पवत्तो,  
समासासिओ य रत्ता कोमलवयणोहिं, पडिवन्नो य तेण महाकट्ठेण रज्जाभिसेओ, समागए य पसत्थवासरे सव्वसा-  
मग्गीए मंतिसामंतमित्तयप्पमुहमहाजणसमक्खं निवेसिओ नरविक्रमो निययसीहासणंमि, कओ अट्ठोत्तरकलस-  
सएणं महाविभूर्इए रायाभिसेओ, पणमिओ य रत्ता मंडलाहिवपुरपहाणलोयपरियरिएण, भणिओ य सव्वायरेण

नरसिंह-  
वैराग्यं नर-  
विक्रमा-  
भिषेकः.

॥ १०८ ॥

वञ्छ ! जइवि नयविणयसच्चाइगुणगणमणिमहोयही तुमं तहवि किंपि भणेज्जसि, एसा हि रायलच्छी अपडमंध-  
 त्तणं अमज्जपाणं मयजणणं सूरससहरकरप्पसरासज्झमंधयारं, ता तहाकहंपि वट्टिज्जासि जहा न महलिज्जइ ससहर-  
 धवलं नियकुलं, जहा न खंडिज्जइ दूरप्परूढो पयावपायवो, जहा न पमिलायइ नीइकंमलिणी, जहा न उस्सिखली-  
 हवंति खला, जहा न विरचंति पयइणो, जहा करभरोहिं न पीडिज्जइ जणवउत्ति, एवं च वट्टमाणस्स पुत्त ! इहलोए  
 इच्छिया होहिंति सयलवंछियत्थसिद्धीओ, किमंग पुण परलोएत्ति ?, एवं सिक्खविऊण नरसिंघनरवई पट्टिओ समंत-  
 भइसूरिसमीवंमि, तओ पउणाविया नरविक्रमनरचइणा सहस्सवाहिणी सिविगा से निक्खमणनिमित्तं, कयमज्जणो-  
 ययारो सन्वालंकारविभूसिओ समारूढो तत्थ नरसिंहनरवई, उक्खित्ता पवराभरणविभूसियसरीरोहिं सुइनेवत्थेहिं  
 पवरपुरिसेहिं सिविगा, तओ दिज्जंतेहिं महादाणेहिं वज्जंतेहिं चउव्विहांउज्जेहिं पढंतेहिं मागहसत्थेहिं गायंतेहिं  
 गायणेहिं मंगलमुहरमुहीहिं नयरनारीहिं पणचिराहिं वारविलियाहिं महाविभूईए निग्गओ नयरीओ, पत्तो सूरि-  
 सगासं, ओयरिऊण सिविगाओ तिपयाहिणपुव्वं पडिओ गुरुचलणेसु—

भालयलघडियकरसंपुडेण भणिओ गुरू तओ रण्णा । भयवं ! तायसु इण्ह जिणिंददिक्खापयाणेण ॥ १ ॥

पडिवन्नंमि य गुरुणा पुव्वुत्तरदिसिसमुज्झियाहरणो । एगनियंसियवत्थो पसंतवड्ढंतसुहलेसो ॥ २ ॥

सिद्धंतभणियजुत्तीए तत्थ सूरीहिं गाहिओ सम्मं । पवज्जं निरवज्जं कम्ममहासेलवज्जसमं ॥ ३ ॥

श्रीगुणचंद  
महावीरच०  
४ प्रस्तावः

॥ १०९ ॥

भणिओ य जहा भइय ! एसा संसारसिंधुनावव । तुमए गहिया दिक्खा ता सम्मं उज्जमिज्जासु ॥ ४ ॥  
 मा काहिसि खणमेकं पि पावमित्तेहिं दुहनिमित्तेहिं । संसग्गिं दुक्खेहिं विसयकसाएहिं सह भइ ! ॥ ५ ॥  
 एवं चंक्रमियवं भोत्तवं एवमेव सइयवं । एवं भासेयवं इचाइ निवेइयं गुरुणा ॥ ६ ॥  
 संमं संपडिवज्जिय छट्ठट्ठमखमणकरणखीणंगो । अप्पडिवद्धविहारं विहरिय गामागराईसु ॥ ७ ॥  
 अहिगयजइधम्मविही विहियाणुट्ठाणनिच्चतल्लिच्छो । लच्छिच्च संजमं रक्खिऊण निम्महियकम्मंसो ॥ ८ ॥  
 सो मोक्खपयं पत्तो नरविक्रमनरवईवि तस्स सुओ । उवभुंजिय रज्जदुगं निययपए ठविय पुत्तं च ॥ ९ ॥  
 पावियसम्मत्तगुणो पज्जंते पालिऊण पवज्जं । कयदुक्करतवचरणो महिंदकप्पे सुरो जाओ ॥ १० ॥  
 इय नंदण ! नरपुंगव ! चरियं एएसिं पुरिससीहाण । तुज्झ मए परिकहियं जं तुमए पुच्छिअं आसि ॥ ११ ॥  
 सोऊण इमं तुममवि नरिंद ! धम्मे तहुज्जमं कुणसु । जह उत्तिमपुरिसाणं अचिरेण निदंसणं होसि ॥ १२ ॥  
 इमं च सोच्चा राया जायपव्वज्जापरिणामो गुरुं विन्नविउं पवत्तो-भयवं ! तुमं महातावतवियस्स व अमयधारा-  
 वरिसो छुहाभिभूयस्स व सुन्नखज्जगावणो दोगच्चचक्कंतस्स व चिंतामणी दुरालोयंधयारगिरिगुहागयस्स व पयास-  
 दीवो नीरनिहिनिहित्तस्स व समासासदीवो वियडाडवीपडियस्स व पसत्थसत्थनाहो मह कहकहवि चक्खुगोयरं  
 गओ, ता इयाणिं परमपहु ! करुणाकुलभवण ! एयं पवाहओ अणाइयं अणवदग्गं अपरिच्छेयमिच्छाजलुप्पीलपडि-

हृत्यं मोहमहावत्तदुत्तरिष्ठं निरंतरुन्मवंतजम्मणमरणकल्लोलमालाउलं कंसायकलुसंपंकसंकुलं वियरंतविविहायंकनक-  
 चलाउलं वियारगोअरुत्तिण्णऽण्णाणतिमिरभरगुविलं पयइदुग्गेज्झमज्झं पयइभीसणं पयइविवागदारुणं पयइ-  
 निग्गुणं पयइकिलेसायासाइदुक्खसंखोहकारणं रणं व कायरंणं संबहा चित्तिज्जमाणमवि परमरोमुद्धोसजणगं भव-  
 समुहं निरयज्जपव्वज्जाजाणवत्तेण सुवद्धेण नाणदंसणविहिसंछाइयच्छिडेणं संवरवज्जलेवेणं संममाविद्धेण तवपवणज-  
 वेणं अणुलग्गेणं वेरग्गमग्गंमि अक्खोभेण विसुत्तियावीईहिं पडिपुण्णेण अणेगंसीलंगरयणसहस्सेहिं तुम्हेहिं कन्न-  
 धारेहिं इत्ति समुत्तरिउं समीहामित्ति, सूरिणा भणियं—महाराय ! मा पडिवंधं करेहि, तओ नंदणनरिंदो पुत्तारो-  
 वियरज्जभारो वार्हिं व मोत्तूण रायलच्छिं विहगोव्व पंजराओ घरवासाओ निकखंतो, जाओ य तिगुत्तिगुत्तो पंचसमि-  
 इजुत्तो जियपरीसहो निहयपंचिंदियपसरो समणो समियपावोत्ति । तओ कमेण अहिगयंएकारसंगो कडाणं कम्माणं  
 पुर्व्वि दुप्पडिक्कंताणं खवणत्थं मासंमासेण अणिकिखत्तेणं कायरदुरणुचरेणं घोरेणं तवोकम्मेणं अप्पाणं सोसितो  
 अप्पडिबद्धविहारेणं विहरइ । तित्थयरत्तलाभवीयभूयाइं वीसइ ठाणाइं सम्मं फासेइ य, कहं ?—

सव्वजगजीववंधुरवंधवभूए जिणे जियकसाए । सिवपंथसत्थवाहे तत्थाहिं गिराहिं थुणमाणो ॥ १ ॥

ववगयजरमरणभए सिवमयलमणंतमक्खयं पत्ते । परमेसरे य सिद्धे समिद्धसोक्खे नमंसंतो ॥ २ ॥

सन्नाणचरणदंसणमहाभरुद्धरणपचलसहावं । चाउवन्नं संघं एक्कं सरणंति मंनंतो ॥ ३ ॥



श्रीगुणचंद,  
महावीरच०  
४ प्रस्तावः  
॥ ११० ॥

करुणोयहिणो गुरुणो पंचविहायारंधरणधीरस्स । अणुवकयजणाणुगहभावं सम्मं पसंसंतो ॥ ४ ॥  
सद्धम्मसिढिलचित्ते सत्ते धम्मे थिरीकरेमाणे । परियायपमुहथेरे उववूहंतो य भयवंते ॥ ५ ॥  
ससमयपरसमयपरूढगाढसंसयसहस्सनिम्महणे । सुस्सूसंतो निच्चं बहुस्सुए साहुणो पवरे ॥ ६ ॥  
मासदुमासतिमासाइविविहतवकम्मकरणपडिबद्धे । विस्सामणाइणा तह तवस्सिणो पडिचरेमाणो ॥ ७ ॥  
अंगाणंगसरूवे सुयंमि सव्वन्नुनिच्छियत्थंमि । अणवरयं गयचित्तो तयत्थपरिभावणुज्जुत्तो ॥ ८ ॥  
तत्तत्थसद्दहाणप्पहाणसम्मत्तपवरवत्थुंमि । संकाइदोसजालं परिहरमाणो पयत्तेण ॥ ९ ॥  
नाणार्इणं उवयारपमुहविणयंमि बहुविगप्पंमि । अइयारपरंपरयं वज्जंतो निउणबुद्धीए ॥ १० ॥  
पडिलेहणापमज्जणपमुहावस्सयविहीसु विविहासु । सद्धम्मवद्धलक्खो खलियं निच्चंपि रक्खंतो ॥ ११ ॥  
सीले पिंडुग्गमपभिइदोसविरहा वएसु पंचसुवि । पाणवहार्इएसु य विसोहयंतो य मालिन्नं ॥ १२ ॥  
पइसमयं संवेगाइभावणाजालभावणुज्जुत्तो । ससरीरेऽविहु निच्चं ममत्तबुद्धिं अकुणमाणो ॥ १३ ॥  
वज्जन्वभंतररूवं बारसभेयंपि धोरतवकम्मं । अनिगूहियनियसत्ती आयरमाणो य पइदिवसं ॥ १४ ॥  
धम्मोवगारिसाहुण वत्थकंवलपमोक्खमुवगरणं । देंतो कोहार्इणं निच्चं चायं कुणंतो य ॥ १५ ॥  
आयरिओज्झायतवस्सिथेरसाहम्मियाण सेहाणं । कुलगणगिलाणसंधे वेयावच्चंमि वट्टंतो ॥ १६ ॥

विंशतिस्था-  
नकाराधनं.

॥ ११० ॥

एषसिंपि तद्वाविहवावयवसजायदुत्यचित्ताणं । ओसइदाणाईहिं समाहिभावं च जणमाणो ॥ १७ ॥

अक्खरपयगाहसिलोगमेत्तयं सब्बा अपुवसुयं । अहिगयसुत्तत्थोऽविहु सुयाणुरागेण पढमाणो ॥ १८ ॥

भत्तिं तद् बहुमाणं तद्दिट्ठत्थाणं सम्मभावणयं । विहिगहणं चिय निचं सुयस्स सम्मं पयासितो ॥ १९ ॥

भद्वाणं धम्मकहणेण पइदिणं पवयणुत्तइं परमं । सियवायसाहणेण य कुणमाणो सुद्धचित्तेणं ॥ २० ॥

सो नंदणमुणिवसहो इय वीसइठाणगाइं फासित्ता । तित्थयरनामगोत्तं कम्मं वंधेइ परमप्पा ॥ २१ ॥

अह पमायपरिहारपरायणो एगं वाससयसहस्सं समणपरियागं पाउणित्ता पज्जंतंसमए य सम्ममालोइयनिय-  
दुवरियवग्गो समुच्चारियपंचमहवजो खामियसव्वसत्तसंताणो मासियसंलेहणासंलिहियसरीरो पंचनमोक्कारपरायणो  
मरिऊण समाहीए समुप्पन्नो पाणयकप्पे पुप्फुत्तरवडिंसए विमाणे देवोत्ति ॥

ताहे सो सरभसभाविरेण नियपरियणेण परियरिओ । विलसइ तत्थ विमाणे अयराइं वीसइं जाव ॥ १ ॥

आउयकम्मविगमे य तत्तो चविऊण इहेव जंवुहीवे दीवे भारहे खेत्ते माहणकुंडग्गामे सन्निवेसे सयलवेयविज्जावियक्ख-  
णस्स उसभदत्तस्स माहणस्स देवाणंदाए भारियाए गन्मे सो नंदणदेवजीवो मिरियभवकयकुलप्पसंसणदोससमुवज्जि-  
यनीयगोयकम्मसामत्थेणं आसाढसुद्धलट्ठीए हत्थुत्तरे नक्खत्ते पाउब्भूओ पुत्तत्तणेणंति, दिट्ठा य तीए रयणीए सुहप-  
सु चाए गयवसहाइणो चउहसं महासुमिणा, तओ अदिट्ठपुव्वतद्वाविहसुविणोवलंभजायहरिसा गया उसहदत्तस्स

माहणस्स सगासे, सिट्ठा चउदसवि सुमिणा, उसहदत्तेणवि ते सम्ममणुचिंतिऊण भणियं—

तुज्झ पिण्ण! धणलाभो पंचविहविसिट्ठभोगलाभो य । होही नीरोगत्तं नूणं एयाणुभावेण ॥ १ ॥

रिउजउसामाथव्वणचउवेयवियक्खणं जणपसिद्धं । जणिहिसि पुत्तं च तुमं समहिगनवमासपज्जंते ॥ २ ॥

इय सा निसामिऊणं पहिट्ठचित्ता विमुक्ककुविगप्पा । निययावासमुवगया सम्मं गब्भं समुव्वहइ ॥ ३ ॥

जद्विसं चिय चिंतामणिव्व गब्भे जिणो समोइन्नो । करितुरगरयणनिवहो तद्विसं चिय न माइ गिहे ॥ ४ ॥

अणवरयहोमकरणुच्छलंतधूमोलिसामलं गयणं । उन्नयमेहासंकं कुणइ अकालेऽवि हंसाणं ॥ ५ ॥

अह भयवओ गब्भगयस्स विइकंतेसु वायासीदिवसेसु वट्ठंते य तियासीतमदिणंमि सोहम्मकप्पवासी देविंदो सोहम्माए  
सभाए निसन्नो वत्तीसाए विमाणसयसहस्साणं चउरासीए सामाणियसाहस्सीणं तायत्तीसाए तायत्तीसाणं चउण्हं  
लोगपालाणं अट्ठण्हं अग्गमहिसीणं तिण्हं परिसाणं सत्तण्हं अणियाणं सत्तण्हं अणियाहिवईणं चउण्हं चउरासीणं  
आयरक्खदेवसाहस्सीणं अन्नेसिंपि देवाणं देवीण य सामित्तमणुपालेमाणो इमं च जंबुद्दीवं दीवं विउलेणं अक्खलिय-  
पसरेण ओहिनाणेण करकमलनिलीणमुत्ताहलं व अवलोएमाणो भयवंतं चरिमतित्थयरं माहणपणइणीकुच्छीगयं  
पेच्छइ, तओ आणंदवियसियनयणकमलो हरिसवससमुच्छलियरोमंचंचियसरीरो संभमसट्ठाणचलियकडगतुडियके-  
ऊरकिरीडकुंडलाइभूसणो तक्खणविमुक्कसीहासणो पायपीठाओ पच्चोरुहइ, वेरुलियवरिट्ठरिट्ठरत्तरयणखंडमंडियाओ

पाउयाओ विमुंचइ, एगसाडियं उत्तरासंगं करेइ, निडालतड घडियकरसंपुडो संतट्ट पयाइं तित्थयरामिमुहं अणुगच्छइ,  
तओ वामजाणुं अंचित्ता दाहिणजाणुं धरणियले निहट्टु तिक्खुत्तो मुद्धाणं धरणियले निवाडेइ, तहा मत्थए अंजलिं  
काऊण सुचिरं पराए भत्तीए संथुणइ, कहं ?—

तुम्ह नमो जिण ! निहयारिवग्ग ! भयवंत णाह ! आइगर ॥ तित्थयर सयं चिय जायवोध ! पुरिसोत्तम ! पसिद्ध ! ॥ १ ॥

भवभीममहाडविपडियपाणिगणसत्थवाह गयवाह । सिव मयलमणंतसुहं संपावियकाम गयकाम ! ॥ २ ॥

परमेसर तत्थ गओवि ताव अक्खलियनाणनयणेण । एत्थ गयंपिहु पणयं मं पेच्छसु किंकरसरिच्छं ॥ ३ ॥

एवं च शुणिऊण पुढाभिमुहसीहासणनिसन्नस्स देविंदस्स एवरूवो संकप्पो समुप्पन्नो—अहो तित्थयरा भयवंतो न  
कयाइ तुच्छकुलेसु दरिदकुलेसु किवणकुलेसु भिक्खागकुलेसु उप्पजिंसु वा उप्पज्जंति वा उप्पज्जिस्संति वा, किं तु उग्ग-  
भोगराइन्नखत्ति यइक्खागहरिवंसाइएसु सयलभुवणसलाहणिज्जेसु, केवलं कहवि कम्मवसेण हीणकुलेसु अवयरियाविय  
भयवंतो अजोणीनिक्खंता चेव सक्केहिं उत्तमकुलेसु संहरिज्जंति, जओ तीयपच्चुप्पन्नाणागयाणं सुरिंदाणं जीयमेयं,  
एवं च जुत्तं ममावि इमं चरिमत्तित्थयरं इमाउ माहणकुलाओ कासंवगोत्तस्स सिद्धत्थनरिंदस्स वसिट्ठगोत्ताए तिस-  
लाए कुच्छिसि संकामिउं, तिसलागम्भंपि देवाणंदाए कुच्छिसित्ति, एवं संपेहित्ता पायत्ताणीयाहिचइं हरिणेगमेसिं  
तिसलाकुच्छिसि गम्भोवसंहरणत्थं निरूवेइ, सो य हरिणेगमेसी सक्काएसेणं उत्तरवेउवियरूवधरो मणपवणजइणीए

श्रीगुणचंद  
महावीरच०  
४ प्रस्तावः

॥ ११२ ॥

गईए संपत्तो देवाणंदाए माहणीए समीवं, ओसोयणीदाणपुवगं च तीसे अवहरइ भयवं गम्भाओ, माहणीवि  
तक्खणं चिय वयणकमलेण ते चउद्दसवि महासुमिणे पडिनियत्तमाणे पेच्छिऊण ववगयनिहा निदयताडियउरपंजरा  
जरावेगविहुरियव नित्थामसरीरा अवहरिओ मम गम्भोत्ति सुचिरं अप्पाणं निंदंती करयलनिवेसियकवोला परमसो-  
गसंभारं काउमारद्धा ॥ १

इओ य इहेव जंबुदीवे भारहवासतिलयभूयं समुत्तुंगपायारपडिहयविपक्खपक्खुक्खेवं विचित्तपासायसहस्ससिहर-  
रुद्धदिसावगासं खत्तियकुंडग्गामं नाम नगरं, तत्थ य कसिणत्तणं कलयंठिकंठेसु सवावहारलोवो सहसत्थेसु कंटगु-  
प्पत्ती कमलनालेसुं कुडिलत्तं कोदंडदंडेसु निट्ठुरत्तं तरुणीपओहरेसु मित्तविरोहो रयणियरस्स वंधो य सारणिसलि-  
लेसु । जहिं च पढमाभासी पियंवओ करुणापरो वेसमणोव्व अणवरयदाणरसिओ महातरुव्व सउणजणकयपक्ख-  
वाओ पारद्धिलुद्धव्व कयसारमेयसंगहो गेवेज्जयसुरजणोव्व अणिंदो सारयसलिलं व अकलुसो निवसइ लोओ । जत्थ  
य चउद्दिसिंपि अणवरयवहंतऽरहट्ठघडिमुहमुक्कसलिलसिचमाणाइं सव्वोउयफुल्लफलमणहराइं जंबूजंवीरखज्जरता-  
लतमालपमुहतरुसंडमंडियाइं परिभूयनंदणवणाइं सोहंति काणणाइं, जं च संकेयठाणं व तिहुयणलच्छीए समुप्पत्तिभू-  
मिव्व विविहच्छेरयाणं लीलाभवणं व सिंगारस्स आवासोव्व धम्मस्स मुहमंडणं व वसुंधरारमणीए । तत्थ य पुरंदरोव्व  
छिन्नभूधरपक्खो मुणिव्व समरसोवओगो सुरवारणोव्व दाणसिच्चकरो जलनिहिं व्व समज्जायाणुवत्ती अणेगनरिंदमउ-

शक्रस्तुतिः  
गर्भपरा-  
वर्त्तः.

॥ ११२ ॥

लिमालानमंसियकमकमलो भुवणपसिद्धो सिद्धत्यो नाम नरिंदो ।

हरिपीलुपरिक्खितं भमंतविविहग्गमहिसिपरिकलियं । सुन्नपि वसंतं पिव नज्जइ जस्सारिजणभवनं ॥ १ ॥

एगेसु पलाणेसुं जयतूरवेण सत्तुसु परेसुं । पणमंतेसुं जेणं समरसुहं नेव संपत्तं ॥ २ ॥

तस्स य वम्महस्स व रई महुमहणस्सेव लच्छी संव्वंतेउरपहाणा रुवाइगुणगणाभिरामा तिसला नाम देवी,  
जहत्याभिहाणो य नंदिवद्धणो नाम पुत्तो सुदंसणा य धूया, अह आसोयवहुलेतरसीए अद्धरत्तसमए हत्थुत्तर-  
नक्खत्ते सुकुमालहंसतूलीपडलसुंदरंमि दहिपिंडपंडुरपडपच्छाइयंमि गंगापुलिणविसाले संयणिज्जे सुहपसुत्ताए तिस-  
लादेवीए पुव्वगम्भं देवाणंदाकुच्छिमि संकामिऊण दिव्वसत्तीए सो पुव्वभणिओ हरिणेगमेसिदेवो असुभपोग्गलाव-  
णयणपुव्वयं जिणं कुच्छीए मोत्तुण पणमिऊण य जहागयं पडिगओ, गम्भाणुभावेण य सा तिसलादेवी पच्छिमरय-  
णीसमयंमि चउइस सुमिणाणि पासइ, कहं चियं ?—

करडतडगलियमयसलिलगंधुद्धुरं, गुलुगुलंतं सुदंतं महासिंधुरं ।

वसहमुल्लासिसुइलंवपुच्छच्छडं, चारुसिंगं सुतुंगं रवेणुब्भडं ॥ १ ॥

धुसिणरसरगकेसरसडाडंवरं, केसरिं कंठरवभरियगयणंतरं ।

कुंभिकरकलियकलसेहि कयमज्जणं, लच्छिमुद्दामकामत्थियुयसासनं ॥ २ ॥

श्रीगुणचंद  
महावीरच०  
४ प्रस्तावः  
॥ ११३ ॥

मालईमल्लियाकमलरेहंतयं, मालममिलाणमलिवलयलीढंतयं ।

किरणजालं मुयंतं ससिं सुंदरं, निहयतमपसरमइरुग्गयं दिणयरं ॥ ३ ॥

फलिहडंडगगलोलंतसियधयवडं, पुन्नकलसं च सुहकमलगंधुब्भडं ।

कुमुयकल्हाररम्मं महंतं सरं, बहुलकल्लोलमालाउरं सायरं ॥ ४ ॥

विविहमणिथंभसालं विमाणं वरं, कंतिकच्चुरियगयणं च रयणुक्करं ।

धूमरहियं तहा हुयवहं सुमिणए, देवि वयणंमि पविसंतयं पेच्छए ॥ ५ ॥

पेच्छिऊण य इमे सुमिणे हरिसुद्धुसियरोमकूवा परमाणंदमुवहंती गयां सिद्धत्थपत्थिवसमीवं, कहिओ चउद्दस-  
महासुमिणोवलंभवइयरो, तेणावि नियमइविभवाणुसारेण संमं चिंतिऊण भणियं—सुंदरि ! सयलनरिंदसंदोहवंदणिज्जो  
निरुवक्कमविक्रमकंतसत्तुचक्को निप्पडिमपयावपरिभूयरविमंडलो निरुवमसत्तो पुत्तो ते भविस्सइ, सायरं पडिच्छिऊण  
य इमं अणाइक्खणिज्जभूरिहरिसपब्भारमंथरगई गया नियमवणं, ताहिं च देवगुरुसंवद्धाहिं मंगल्लाहिं असिवोवघाय-  
दक्खाहिं सुहावहाहिं कहाहिं रयणिसेसमइवाहिउं पउत्तत्ति, राइणावि जाए पभायसमए समाहूया अट्ठंगनिमित्तस-  
त्थपरमत्थवियक्खणा नेमित्तिगा, आसणदाणपुव्वयं सकारिऊण पवरवत्थाइणा निवेइओ देवीदिट्ठचउद्दससुमिणवुत्तंतो,  
तओ ते सम्मं निच्छिऊण परोप्परं जहावट्ठियमत्थं भणिउमारद्धा—देव ! एयारिससुमिणाणुभावेण नूणमुप्पज्जिही

धम्मपरचक्रवट्टी तिहुयणपूयणिज्जपायवीढो नियकुलनहयलमियंको अणुवमचरिओ तित्थयरो तुम्ह पुत्तोत्ति, एवमाय-  
न्निऊण परमहरिसमुद्धतंतेण राइणा दवावियं तेसिं आसत्तपुरिससंतइदालिद्विद्वकरं मणोरहपहाइकंतं दविणजायं,  
विसज्जिया य नियनियठाणेसु, निवेदओ य एस वइयरो देवीए, जाओ य परमो पमोओ तीसे। एवं च पइदिणपुजं-  
तमणोरहाए जिणाणुभावेण दूरपलीणरोगाए सुररमणीसरिच्छवट्टंतविलासाए वड्डिउमारद्धो गम्भो; तयणुभावेण य  
एवं सा सोहिउं पउत्ता—

अंतरनिहितवररयणसंचया फलिहमयधरित्तिव । संकंतफारदिणनाहमंडला मेरुभित्तिव ॥ १ ॥

अंतद्वियमुत्ताहलरेहंतुद्वामजलहिवेलघ । पढमुग्गमंतससहरपसाहिया गयणलच्छिव ॥ २ ॥

अंतोविफुरणसमुल्लसंतसोयामणीनिवहकिन्ना । उब्भडघणंतघणपडलपुन्ननवपाउससिरिव ॥ ३ ॥

इय गम्भगयजिणिंदाणुभावसोहंतकंतसधंगा । नवकप्पहुमलइयव मणहरा रेहाए देवी ॥ ४ ॥

जह्विसं च भयवं भुवणमहासरेकरायहंसो तिसलादेवीए उदरकमलमइगओ तद्विसाओवि सुरवइवयणेण तिरियजं-  
मगा देवा विविहाइं महानिहाणाइं सिद्धत्थनरिंदभुवणंमि भुज्जो भुज्जो परिक्खिवंति, तंपि नायकुलं धणेणं धन्नेणं रज्जेणं  
रुत्तेणं वलेणं वाहणेणं कोट्टागारेणं पीइसकारेणं वाढसभिवड्डइ, सिद्धत्थनराहिवस्सवि अचंतवाहुवलदप्पिणो तहाविह-  
विसमपएसु संठिया अपणयपुब्बावि वसमुवगया पच्चंतद्वियावि नराहिवा । अन्नवासरे भगवओ अम्मापिऊणं एया-



श्रीगुणचंद्र  
महावीरच०  
४ प्रस्तावः

॥ ११४ ॥

रूवो वियप्पो समुप्पण्णो, जहा-जप्पभिई एस गब्भो संभूओ तप्पभिई धणकणगाइरज्जविभवेणं अम्हे बह्मामो, ता  
जइया एस जाओ भविस्सइ तइया एयस्स इमं गुणनिप्फण्णं वद्धमाणोत्ति नामधेयं वयं करिस्सामोत्ति, एयरूवाइं  
मणोरहसयाइं परिकप्पयंति ॥

अह भगवं भुवणपहू नाणत्तयपरिगओ महाभागो । करुणापरेक्कचित्तो समुहविरत्तो महासत्तो ॥ १ ॥  
चलणप्फंदणरूवं संहरिउं सव्वमंगवावारं । सेलेसिपवन्नो इव अणुकंपट्ठा सजणणीए ॥ २ ॥  
तह कहवि वसइ गब्भे जह नियजणणीवि नो मुणइ सम्मं । तइलोकविम्हयकरो गरुयाणं कोऽवि वावारो ॥ ३ ॥  
नवरं तिसलादेवी तहट्ठिए जिणवरे विचिंतेइ । किं गलिओ मम गब्भो? उयाहु देवेहिं अवहरिओ? ॥ ४ ॥  
किं मज्झेवि विणट्ठो? किं वा केणावि थंभिओ होज्जा? । अहवा निप्पुन्नाणं रयणं किं करयले वसइ? ॥ ५ ॥  
जइ सच्चं चिय विगओ एसो ता निच्छयं निए पाणे । नीसेसदुक्खलक्खेक्कभायणेऽविहु परिचयामि ॥ ६ ॥  
अट्ठज्झाणोवगया करयलपल्हत्थिएण वयणेण । अचंतदुक्खवसया दूरुज्झियमंडणाभरणा ॥ ७ ॥  
परिचत्तसमुल्लावा महियलकयरुक्खचक्खुविकखेवा । दीहुस्सासनिवारियमुहसोरभमिलियभसलकुला ॥ ८ ॥  
इय भूरिसोगसंभारतरलिया गलियकेसपासा य । हिययंतो रोवंती देवी जावऽच्छए ताव ॥ ९ ॥  
सिद्धत्थरायभवणंपि तक्खणं विमणदुम्मणं जायं । उवसंतमुइंगरवं उवरयवरगीयनिग्घोसं ॥ १० ॥

गर्भनिश्च-  
लता.

॥ ११४ ॥

अह भयवं एवंविहवइयरसुवलक्खिऊण नाणेण । अंगं अंगावयवं चालइ जणणीसुहंढाए ॥ ११ ॥

ताहे तुट्ठा देवी हरिसवसुल्लसिरलोयणकवोला । जायं झडत्ति भवणंपि राइणो पमुइयजणोहं ॥ १२ ॥

तत्तो भयवं चित्तइ गम्भुच्चभवमेत्तओऽवि कह जाओ । जणणीजणगाणमहो पडिवंधो कोऽवि अइगरुओ ? ॥ १३ ॥

जं गम्भनिप्पकंपमेत्तेणवि एरिसा विसमरूवा । नियसंवेयणगम्मा एएसि दसा समावडिया ॥ १४ ॥

जइ पुण जीवंतेसुवि समणत्तणमहमहो पवजिस्सं । तो मम विरहेण धुवं एए जीयं चइस्संति ॥ १५ ॥

इय चित्तिऊण भयवं संतोसहं सजणणिजणगाणं । इयरजणाणवि एवं ठिहं व लहं पइहंतो ॥ १६ ॥

जीवंतेसुं अम्मापिईसु नाहं मुणी भविस्सामि । इय गम्भगओऽवि जिणो पडिवज्जइ नियममइगरुयं ॥ १७ ॥

अह सा तिसलादेवी गम्भफुरणसंपत्तपरमपमोया ण्हाया नियंसियमहग्घचीणंसुया सरसचंदणकयंगराया आवि-  
द्वपवररयणा तं गम्भं नाइउण्हेहिं नाइसीएहिं नाइत्तित्तेहिं नाइकडुएहिं नाइकसाएहिं नाइअंविलेहिं नाइमदुरेहिं  
सवोउयसुहावहेहिं भोयणोहिं परिवालयंती पूरियडोहला निब्भया पसंता सुहेण भवणतलसमारूढा कयाइ पंवर-  
नाडयपेच्छणेण कयाइ पुराणपुरिसचरियायत्तणेण कयाइ विचित्तकोज्जहलावलोयणेण कयाइ सहीजणपरिहासकर-  
णेण कयाइ उज्जाणविहारविणोएण कयाइ दुक्खियजणतवणिज्जपुंजवियरणेण कयाइ नयरसोहानिरिक्खणेण कयाइ  
वंधुजणसम्माणणेण कयाइ धम्मसंवद्धकहावियारणेण दिणाहं गमेइत्ति ।

श्रीगुणचंद  
महावीरच०  
४ प्रस्तावः

॥ ११५ ॥

अन्नया य निष्फणसस्सोवसोहिण पण्डुरोगमारिपमुहाणिट्टे जणवण नियनियधम्मकरणुज्जएसु समणलोएसु  
उवसंतपयंडुडुमरेसु परोप्परं नराहिवेसु पमुक्कचाडभडचोरभयासु विलसंतीसु पयासु रेणुपडलविगमरमणिज्जासु  
जणमणाणंददाइणीसु सयलदिसासु उज्जाणतरुकुसुमसंवंधगंधुदुरेसु पयाहिणावत्तपरिभमणरमणिज्जेसु मंदं मंदं वायंतेसु  
समीरणेसु परमविजयसाहगेसु सवसउणेसु गंभीरघोसासु सयं चियवज्जंतीसु विजयडुंडुभीसु चेतसुद्धतेरसीए सुरभव-  
चवणकालाओ आरब्भ नवणहं मासाणं अद्धट्टमाण य राइंदियाणं विइक्कंताणं उच्चट्टाणं गएसु महागहेसु अद्धरत्त-  
समए हत्थुत्तराजोगमुवागए चंदे तिसलादेवी पुवदिसिब पयासियसयलजीवलोयं भयवंतं दिणयरं व भवियजणरहं-  
गमिडुणकयपरमसंतोसं पसूयत्ति ।

तयणंतरं च पवरपंचवण्णरयणविणिम्मियविविहविमाणमालारूढेहिं पहयपडुपडहपमुहजयतूरेहिं उक्कुट्टिसीहना-  
यकलयलमुहलेहिं पवराभरणमणिविच्छुरियगयणंगणेहिं पहरिससमुल्लसंतसरीरेहिं अणेगेहिं देवेहिं देवीहि य इंतोहिं  
पडिनियत्तमाणेहि य देवलोयपुरिंपिव रमणिज्जं अमंदाणंदसंदोहजणगं च कुंडग्गामनयरं जायंति । सिद्धत्थरायभवणे  
य वेसमणवयणाणुवत्तिणो जंभगा सुरा रयणकणगवत्थाहरणवासं वरिसंति, पत्तपुप्फफलगंधचुण्णवासं च सुयंति ।

अह जाए सूइकम्मपत्थावे अहोलोगवत्थवा चउसामाणियसहस्सपरिवुडा सत्तहिं अणिएहिं सत्तहिं अणियाहि-  
वईहिं परियारिया-भोगंकरा भोगवई, सुभोगा भोगमालिणी । तोयधारा विचित्ता य, पुप्फमाला अणिंदिया ॥ १ ॥

गर्भस्य दशा  
जन्म च,

॥ ११५ ॥

एजाओ अट्ट दिसाकुमारीओ जिणाणुभावचलियासणाओ ओहिन्नाणेण जिणजम्मवइयरं नाऊण दिवविमाणा-  
ढाओ सविट्ठीए जिणजणणिसमीवमागच्छंति, तिपयाहिणीकाऊण य जिणमायरं पराए भत्तीए थुणंति, कहं चिय ?-

तुम्ह महायसि ! रामाजणेकसिररयणविब्भमे नमिमो । पयकमलं निम्मलकोमलगुलीपवरदलंकलियं ॥ १ ॥

इत्थीणं मज्झे चंगिमाए लद्धा तए पढमरेहा । तुमए चिय निम्महिओ महिलालहुयत्तणकलंको ॥ २ ॥

पुत्तवईणं मज्झे तुमए चिय पावियं विजयपत्तं । मिच्छत्तंधजणस्सालवणहेऊ तुमं जाया ॥ ३ ॥

सरयनिसायरकरनियरहारगोरो जसो तुमार्हितो । आसंसारं परिभमउ निब्भरं दससुवि दिसासु ॥ ४ ॥

मूढोच्चिय सुयपसवे परमाणंदं जणो समुवहइ । तुज्झ सरित्था धूयावि पुत्तकोडिंपि परिभवइ ॥ ५ ॥

तिहुयणपणमियचलणो जीए कुच्छिमि वाढमुवूढो । कलणाइकंतवलो चरिमजिणिंदो जयाणंदो ॥ ६ ॥

इय सुइरं जिणजणणिं पणमिय परमायरेण जंपंति । देवि ! नहु भाइयवं अम्हे जं दिसिकुमारीओ ॥ ७ ॥

परमेसरस्स भुवणेकचक्खुणो जिणवरस्स एयस्स । निययहिगारऽणुरूवं जम्मणमहिमं करिस्सामो ॥ ८ ॥

एवं भणिऊण तित्थयरजम्मणभवणस्स समंतओ जोयणपरिमंडलं भूभागं ववगयतणकट्टपत्तकयवरं दुरुस्सारिया-  
सुइदुरभिगंधपोग्गलं तक्खणं विउव्विएणं मणहरेणं सवोउयकुसुमगंधाणुवासिएणं संवट्ठगपवणेणं काऊण भगवओ  
तित्थयरस्स तिसलादेवीए य अदूरे गायंतीओ चिट्ठंति ।

श्रीगुणचंद,  
महावीरच०  
४ प्रस्तावः

॥ ११६ ॥

एवं चिय चलियासणपउत्तदिबोहिसुणियपरमत्था । उड्ढदिसावासाओ देवीओ इमा तओ इंति ॥ १ ॥  
मेहंकरा मेहवई, सुमेहा मेहमालिणी । सुवच्छा वच्छमित्ता य, वारिसेणा वलाहगा ॥ २ ॥  
तो निहयरयं वेउच्चिएण मेहेण महियलं काउं । गंधंधलुद्धफुलंधयाउलं पुप्फवरिसं च ॥ ३ ॥  
जिणवरगुणगणमइकोमलेण सुइसोकखकरणदक्खेण । अइदूरंमि ठियाओ गायंति सरेण मडुरेण ॥ ४ ॥  
अह पोरत्थिमरुयगट्ठिईओ अट्ठवि दिसाकुमारीओ । बहुपरियणपरियरियाओ एयाओ आगया झत्ति ॥ ५ ॥  
नंदुत्तरा य नंदा, आणंदा नंदिवद्धणा । विजया य वेजयंती, जयंती अपराजिया ॥ ६ ॥  
रविमंडलसारिच्छं हत्थे धरिऊण दप्पणं ताहे । पुव्वदिसिंमि ठियाओ कित्तित्ति गुणे जिणवरस्स ॥ ७ ॥  
अह दाहिणरुयगनिवासिणीओ अट्ठवि दिसाकुमारीओ । नायजिणजम्मणाओ इंति विमाणेहिं एयाओ ॥ ८ ॥  
समाहारा पइन्ना य, सुप्पवुद्धा जसोहरा । लच्छिमई सेसवई, चित्तगुत्ता वसुंधरा ॥ ९ ॥  
करपल्लवेण कलि(गहि)उं भिगारं सुरहिवारिपरिपुन्नं । दक्खिणपासे पड्डणो गुणथवणपरा परिवसंति ॥ १० ॥  
अह पच्छिमरुयगगया अट्ठेव पुणो दिसाकुमारीओ । भत्तिभरनिब्भराओ इमाओ पविसंति जिणगेहे ॥ ११ ॥  
इलादेवी सुरादेवी, पुहवी पउमावई । एगनासा नवमिया, भद्दा सीया य अट्ठमी ॥ १२ ॥  
करकलियतालियंटा विसट्ठकंदोद्वदीहरच्छीओ । पच्छिमदिसिम्मि ठाउं थुणंति जिणनाहगुणनिवहं ॥ १३ ॥

दिशाकु-  
मारीकृतो  
महोत्सवः.

॥ ११६ ॥

अह उत्तरिखरुयगाभिहाणगिरिवासिणीओ अट्टेव । आगच्छन्ति इमाओ देवीओ दिसाकुमारीओ ॥ १४ ॥  
 अलंबुसा मिस्सकेसी, पुंडरीकी य चारुणी । हासा सबप्पभा चेव, हिरिदेवी सिरी तहा ॥ १५ ॥  
 वंदित्ता जिणजणणीं घेत्तुं सियचामरं करग्गेण । उत्तरदिसिम्मि गुरुणो पुव्वकमेणं परिवसन्ति ॥ १६ ॥  
 अह विदिसिरुयगपच्चयवत्थवा चउ दिसाकुमारीओ । चित्ता य चित्तकणगा सतेय सोयामणीनाम ॥ १७ ॥  
 नमिउं तिसलादेवीं जिणं च विदिसासु चउसुवि निलीणा । सुंदरपईवहत्था जिणगुणनिवहं पगायन्ति ॥ १८ ॥  
 मज्झिमरुयगट्ठिइओ पुणोवि चत्तारि दिसिकुमारीओ । देवी रुया रुयंसा सुरुया रुयगावई नामा ॥ १९ ॥  
 आगंतूणं पुव्वकमेण नाभिं जिणस्स कप्पेति । चउरंगुलपरिवज्जं ताहे वियरं परिखणिंति ॥ २० ॥  
 तं नाभिनालमह तत्थ ठाविउं पंचवण्णरयणेहिं । पूरिन्ति तं समग्गं तदुवरि पीढं च वंधन्ति ॥ २१ ॥  
 पीढस्सोवरि हरियालिगं च वियरन्ति नीलमणिरम्मं । लोयणआणंदयरिं दिवाए देवसत्तीए ॥ २२ ॥  
 तेयणंतरं तिन्नि कयलीहराइं विउवन्ति, तेसिं च मज्झभागे पवरपंचप्पयारमणिविणिम्मियकोट्टिमतलाइं विच्छि-  
 त्तिचित्तरंगावलीमणहराइं दुवारदेसठवियपुण्णकणयकलसाइं दिव्वरुवरेहंतसालभंजियाभिरामाइं दाहिणपुव्वुत्तरदिसासु  
 तिणिण चउसालभवणाइं विसालाइं वियरन्ति, तेसिं च मज्झभागे महग्घमणिखंडमंडियाइं नियकिरणजालसुत्तिय-  
 सुरिंदकोदंडाइं कणगसेलसिलाविच्छिन्नाइं तिणिण सीहासणाइं ठावेति, तओ तित्थयरं करयलपुडेणं तित्थयरज-

श्रीगुणचंद  
महावीरच०  
४ प्रस्तावः

॥ ११७ ॥

णणिं च बाहाहिं घेत्तूण परमायरेण दाहिणदिसिचाउसालसीहांसणे निसियावेंति, तओ सयपागसहस्सपागतेल्लेहिं  
पहाणगंधुदुरेहिं तेसिं सरीरमब्भंगिंति, गंधुवट्टणेणं उवट्टेंति, तओ पुवट्टिईए जिणं जणणिं च पुवदिसिचाउसाल-  
सिंहासणंमि आरोविऊण गंधोदएण पुप्फोदएण सुद्धोदएण मज्झिऊण पवरमणिरयणाभरणसंभारेण विभूसियसरीराइं  
काऊण परमायरेण पुवविहीए उत्तरदिसिचाउसालसिंहासणे निवेसिंति, नवरं नियकिंकरेहिं चोल्लहिमवंताओ  
गोसीसचंदणदारुगाणि आणाविऊण अरणिनिम्महणुट्टिण जलणेण संतिनिमित्तं होमं च करेंति, नियपभावपरि-  
विखयस्सवि भगवओ जीयंतिकाऊण रक्खापोट्टलियं वंधिऊण रयणपाहाणगे सवणमूले ताडिंति, एवं भणंति य-

सत्तकुलपवयाऊ अप्पडिहयसासणो हवसु देव ! । गयरोगसोगदुक्खो पणईयणपूरियासो य ॥ १ ॥

इय भणिऊण पहिट्ठा जम्मणगेहे ठवित्तु जिणजणणिं । गायंति जिणिंदगुणे तिसलापासे समल्लीणा ॥ २ ॥

इय जम्मस्स य कायवचित्थरो तित्थनाहभत्तीए । वेगेण समत्थिज्जइ छप्पन्नदिसाकुमारीहिं ॥ ३ ॥

एत्थंतरे सोहम्मकप्पाहिवइस्स सकस्स सीहासणं चलइ, तच्चलणेण ओहिनाणेण भगवओ तित्थयरस्स जम्मं मुणिऊण  
ससंभमं सक्को सीहासणाओ उट्ठेइ, सत्तट्ठपयाणुगमणपुवयं परमाए भत्तीए तत्थट्ठिओऽवि जिणं थुणिऊण पाइत्ताणी-  
याहिवइं हरिणेगमेसिं देवं आणवेइ-अहो भइ ! गच्छसु सोहम्माए सभाए मेवोघवोरघोसं जोयणपरिमंडलं सुघो-  
सघटं तिक्खुत्तो ताडितो महया सहेणं एवमुग्घोसेहि-सक्को जंबुदीवभारहखेत्तसमुब्भवस्स जिणस्स जम्मणमहिमं

दिशाकु-  
मारीकृतो  
महोत्सवः.

॥ ११७ ॥

काउं पट्टिओ, ता भो देवा ! तुम्हे सबबलेणं सबविभूईए, सबनाडएहिं सवालंकारविभूसाए दिवच्छरागणेणं परिवुडा पवरविमाणाइं आरूढा मम सयासं पाउन्भवहत्ति, एवं भणिए हरिणेगमेसी देवे देवरण्णो वयणं विणएण पडिसु-  
 णित्ता तुरियगईए सोहम्मसभाए गंतूण सुघोसं घंटं तिकखुत्तो ताडेइ, तीसे य पयंडनिग्घोसवसुच्छलंतपडिसइयप-  
 डिफलणवसेण अन्नाइं एगूणाइं वत्तीसं घंटासयसहस्साइं समकालं रणज्झणारवं काउमारद्दाइं, एवं च दिसि दिसि  
 समुब्भवंतपडिनिग्घोसवहिरियदियंतरो सोहमकप्पो समुप्पन्नोत्ति । एत्थंतरे—

पंचविहविसयसेवापमत्तचित्ता समंतओ देवा । तं एगकालवज्जिरघंटागणगुरुसरं सोउं ॥ १ ॥

चित्तंति सबओ किंचि (च) फुट्टवमंडरवसमो घोरो । फालिहविमाणमालापडिफलणचउग्गुणीभूओ ? ॥ २ ॥

आपूरितोव दिसावगासमखिलं चराचरं लोगं । सहेगसरूवंपिव कुणमाणो निययमहिमाए ॥ ३ ॥

संसुद्धमुद्धतियसंगणाहिं भयवेगतरलियच्छीहिं । हा नाह ! रक्ख रक्खत्ति जंपिरीहिं सुणिज्जंतो ॥ ४ ॥

दणुघइरणसुमरणतुट्ठतियसवंठोहकंठरवभीमो । अणिवारियं वियंभइ जयघंटारणरणारावो ॥ ५ ॥

इय चिंतावससिडिलियदइयादढकंठवाहुपासंमि । सबत्तो सुरनिवहे जायम्मि विमूढहिययंमि ॥ ६ ॥

खणमेत्तस्सऽवसाणे समत्थघंटारवंमि उवसंते । हरिणेगमेसिदेवो भणइ सुरे अवहिए जाए ॥ ७ ॥

भो भो तियसा ! सफो तुम्हे आणवइ जह लहुं एह । जेण जिणजम्ममज्जणमहूसवो कीरए इणिंह ॥ ८ ॥



श्रीगुणचंद  
महावीरच०  
४ प्रस्तावः

॥ ११८ ॥

इय आणत्तियमायन्निऊण परिमुक्केसवावारा । सुणियजिणनाहमज्जणमहूसवा हरिसिया तियसा ॥ ९ ॥

तो मज्जणपोक्खरिणीए जंति, बहुविहजलेण मज्जणु करेति । कप्पूरमिस्सचंदणरसेण, आलिंपहि देहु सुबंधुरेण ॥ १० ॥

अइकोमलनिम्मलदूसज्जुअल, परिहंति वियंभियकंतिपडल । अह कंठपइट्ठियलट्ठहार, दूरुज्झियकामुयजणवियार ॥ ११ ॥

अइसुरहिक्कुसुमनिम्मवियदाम, नवपारियायमंजरिसणाम । वंधंति सुगंधसमिद्ध सीसि, तक्खणकयकुंचिरचारुकेसि ३

मणिमउडकिरणविच्छुरियगयण, नियरूवमडप्परहसियमयण ।

वरकडयतुडियभूसियसरीर, तणुकंतिपसरपरिभूयसूर ॥ ४ ॥

किवि मगरमरालयसन्निसन्न, किवि हरिणवसहसिहिप्पवन्न ।

आरुहवि केवि कुंजरि महंति, केवि तुंगतुरए वेगे वयंति ॥ ५ ॥

चीणंसुयचिंधसहस्सरम्म, अवलोयणिमेत्तह दिन्नसम्म ।

आरुहवि चलिय किवि वरविमाणि, किंकिणिरवमुहरि महप्पमाणि ॥ ६ ॥

सहुलसरहहरिपट्ठि चडिय, किवि पट्ठियवेगेऽन्नोन्न घडिय ।

इय सुरसमूहह सव्वे वलेण, सुरवइ समीवमागय जवेण ॥ ७ ॥

एत्थंतरे खंभसहस्ससंनिविट्ठं फलिहमणिघडियसालभंजियाभिरामदारदेसं अणेगलंबंतमुत्ताहलमालं पवरवइरवे-

इगापरिक्खित्तपेरंतविभागं रणंतघंटावलीमहुरसरसुहयं पवणकंपमाणनिविडजयंपडागापयडं सिहरं व तिरियलो-  
यमहामंदिरस्स फलं व पुवकयपुन्नमहापायवस्स तिहुयणसारपरमाणुविणिम्मियं व सयलविभूइविच्छिडाखंडभंडा-  
गारं सोलसभेयरयणरासिघडियं व सुरवइवयणसंभंतपालकामरविउवियं जोयणसयसहस्सविच्छिण्णं पंचजोयण-  
सयसमुवेहं वरविमाणमारूढो अणेगदेवदेविकोडिपरिघुडो पत्थिओ पुरंदरो, तओ पवणविजइणीए गईए तिरियम-  
संखेज्जाणं दीचसमुद्दाणं मज्झंमज्झेणं नंदीसराभिहाणदीवस्स दाहिणपुरत्थिमिल्ले रइकरपवण आगंतूण तं दिवं  
देविहिं विमाणवित्थारं व पडिसंहरिकुण जेणेव जंनुदीवो जेणेव दाहिणडुभरहं जेणेव भगवओ जम्मणभवणं तेणेव  
उयागच्छइ, तयणंतरं च तेण दिव्वेण विमाणेण तिकुखुत्तो आयाहिणपयाहिणं भगवओ जम्मणभवणस्स काऊण विमाणं  
उत्तरपुरच्छिमे दिसिभागे ठवेइ, तओ अट्ठहिं अग्गमहिसीहिं चुलसीइए सामाणियसाहस्सीहिं समेओ जत्थ भयवं  
तित्थयरो तित्थयरजणणी य ताहिं आलोएइ, पणामं करेमाणो पविसइ, सामिं समायरं तिपयाहिणपुवयं वंदइ,  
वंदिता सयिसेसं तिसलादेविं धुणइ, कहं ?—

जयसि तुमं देवि ! सगोत्तगयणपडिपुन्नचंदनवजुण्हे ! । सुविसुद्धसीलसालीणयाइ गुणरयणवरधरणि ! ॥ १ ॥

तिहुयणचिंतामणिकुच्छिधारिण ! तं धुवं जगे धन्ना । तुज्झं चिय सुहफलओ पसंसणिज्जो मणुयजम्मो ॥ २ ॥

एत्तियमेत्तेणं चिय तुमए उल्लंघिउव भवजलही । परमासीसट्ठाणं जायासि मुणीसराणंपि ॥ ३ ॥

एवं च शुणिकुण ओसोयणिदाणपुव्वगं तक्खणविउव्वियजिणपडिरूवं च ठविऊण तिसलादेवीसमीवे सयं पंच सरीरे  
विउव्वइ, तओ एगेण परमसुइभूओ सरससुरभिगोसीसचंदणपंकपंडुरोयरे करकमले कयप्पणामो सवहुमाणं तित्थयरं  
संठवेइ, एगेण य तस्सेव य पिट्ठिदेसट्ठिओ हरट्टहासकुसुमप्पगासं चामीयरचारुदंडं पुंडरीयं धरेइ, दोहि य रूवेहिं  
भगवओ उभयपासेसु सुरसरिवारिप्पवाहविब्भमे चामरे मंदं मंदं चालेइ, एगेण पुरओ ठिओ धारासहस्सभीसणं  
समुच्छलंतकिरणपडलं सरयसूरमंडलं व दिसिवलयमुज्जोवितं पयंडपडिवक्खविकखेवदारुणं कुलिसमुव्वहइ । एवं च  
पंचरूवेहिं समायरियनियनियकायवो अणेगदेवदेवीहिं परियरिओ-

संपत्तपावणिज्जं समत्थतित्थोहदंसणपवित्तं । अप्पाणं मन्नंतो हरिसेणंगे अमायंतो ॥ १ ॥

मंदरसेलाभिमुहं कंठपलंबंतरयणवणमालो । पयलंतदिक्कुंडजुयलो आखंडलो चलिओ ॥ २ ॥

सिग्घाए दिवाए देवगईए कमेण गच्छंतो । जोयणलक्खुच्चत्तं संपत्तो मंदरगिरिंदं ॥ ३ ॥

जस्सावट्ठियरूवा पडिबिंवियसिहरकाणणाभोगा । विमलपरिमंडला दप्पणव्व रेहंति ससिसूरा ॥ ४ ॥

जस्स रमणीययारंजियाइं गंधवदेवमिहुणाइं । उज्झियनियठाणाइं सिहरेसु सुहं परिवसंति ॥ ५ ॥

नाणाविहफलभरभंगुरग्गसाहाइं जत्थ रेहंति । सवोउयकुसुमसमिद्धिसुंदराइं तरुवणाइं ॥ ६ ॥

किविणो व कणगपरिहाणिवज्जिओ सज्जणोव्व अइतुंगो । सुमुणिव्व एगरूवो जो निच्चं सिद्धिखेत्तं व ॥ ७ ॥

एगत्थुन्नयनवमेघगज्जिपरितुट्टनीलकंठो जो । अन्नत्थ किन्नरारद्धगेयसुइनिचलकुरंगो ॥ ८ ॥

एगत्तो भरगयनिस्सरंतकिरणोलिसामलियगयणो । अन्नत्तो रवितावियफलिहोवलगलियजलणकणो ॥ ९ ॥

तत्थ एवंविहे मंदरगिरिंमि नीहारगोकखीरहारुज्जलाए अइपंडुकंवलसिलाए विचित्तरयणप्पभापडलजलपक्खा-  
लियंमि अभिसेयसिंहासणे पुवाभिमुहो सुरिंदो उच्छंगनिवेसियजिणो उवविसइ, एत्थंतरे जिणपुन्नमाहप्पचलियासणा  
ओहिनाणपिन्नायजहट्ठियपरमट्ठां नियनियसेणाहिचइताडियघंटारवपडिवोहियंसुरयपमत्ततियसगणा तत्कालविउच्चि-  
यपवरविमाणारूढा सच्चालंकाररेहंतसरीरा ईसाणप्पमुहा चंदसूरपज्जंता एगत्तीसंपि समागया सुरिंदा, कयपणामा  
य द्विया सट्ठाणेषु, एत्थ य पत्थावे अचुयतियसाहिवेण भणिया नियदेवा-अहो सिग्घमुवणमेह महरिहं पसत्थं  
तित्थयराभिसेयं, तओ ते पहिट्ठचित्ता अट्ठोत्तरसहस्सं सुवन्नकलसाण अट्ठोत्तरसहस्सं कलहोयमयाणं एवं मणिमयाणं  
सुवन्नरूपमयाणं रूपमणिमयाणं सुवन्नरूपमणिमयाणं भोमेयगाणं अट्ठसहस्सं रयणकलसाणं, एवं भिंगाराणं  
पत्तेयं पत्तेयमट्ठसहस्सं विउचित्ता गया खीरोयसमुहं भरिया खीरसलिलेण सयलकलसा, गहियाइं उप्पलकुमुयसय-  
पत्तसहस्सपत्ताइं,

एवं पसत्थतित्थाण मागहाईण वरनईणं च । सलिलं महोसहीओ सुकुमारा मद्विया जा य ॥ १ ॥

वक्खारसेल्लकुलपवणसु सोमणसनंदणवणेसु । अंतरनइहरणसु य जाणि य कुसुमोसहिफलाइं ॥ २ ॥

श्रीगुणचंद  
महावीरच०  
४ प्रस्तावः

॥ १२० ॥

आदाय ताइं खीरोयसलिलपडिपुन्नपुन्नकलसा य । अचुयसुराहिवइणो विणयप्पणयां समप्पेंति ॥ ३ ॥  
अह सो अचुयदेविंदो ददूण अभिसेयसमग्गसामग्गिं जायहरिसो सिग्घमासणाओ उट्टित्ता दसाहिं सामाणिय-  
सहस्सेहिं तायत्तीसाए तायत्तीसेहिं चउहिं लोगपालेहिं तिहिं परिसाहिं सत्तहिं अणिएहिं सत्तहिं अणियावईहिं  
चत्तालीसाए आयरक्खदेवसहस्सेहिं संपरिवुडो तेहिं विमलतित्थुत्थखीरनीरपरिपुत्तेहिं विमलकमलपिहाणेहिं  
गोसीसचंदणपमुहपहाणवत्थुगन्धिणेहिं सव्वोसहीरससणाहेहिं बहुसहस्ससंखेहिं महप्पमाणेहिं कलसेहिं विउत्ति-  
एहिं साभाविएहिं य परेणं पमोएणं भगवओ भुवणिककबंधवस्स चरमतित्थयरस्स जंममज्जणमहूसवं काउं समुवट्ठि-  
ओत्ति । एत्थंतरे चित्तिं सुरिंदेण, जहा—

लडुयसरीरत्तणओ कहेस तित्थेसरो जलुप्पीलं । सहिही सुरसत्थेणं समकालमहो खिविज्जंतं ? ॥ १ ॥  
एत्तियकुंभजलुप्पीलपेल्लिओ गरुयगंडसेलोऽवि । पलहत्थिज्जइ नूणं किमेत्थ जुत्तं न याणेमो ? ॥ २ ॥  
इय एवं कयसंकं सक्कं ओहीए ज्जिणवरो नाउं । चालइ मेरुं चलणंगुलीए बलदंसणट्ठाए ॥ ३ ॥  
तच्चालणे य—चंगतुंगिमरुद्धगयणग्गपरिकंपिय, सिहरसयकडयडंततडवियडविहडिय ।  
टलटलियटोलोवलविच्छिन्नटंकदोत्तडविनिवडिय ॥ १ ॥  
कंदरगयकेसरिविहियगलगज्जियरवभीम । पवियंभियचाउदिसिहिं पडिसदय निस्सीम ॥ २ ॥

अभिषेकः  
मेरुचालनं.

॥ १२० ॥

तथा—चलिरमंदरमारसंभगसिरनमिरभुयगाहिबह दूरमुक्क दुद्धरु धरायलु, विडुलंतकुलसेलगणु तुट्टमंथु डोलिओ विसंडुल।

उत्तिस्खलमयभरविदुर उद्वयसुंडादंड अनिवारण दिसिवारणवि गमणि पयट्ट पयंड ॥ ४ ॥

सुभियदारुणमच्छकच्छवयपुच्छच्छडताडणेण उच्छलंतकडोल—संकुलगयणंगणविगयसिहमुक्कमेरवियरंतमहिजल ।

अइवेगप्पवणप्पहय हल्लियसयलसमुह । नज्जइ जगबोलणं भणिय चाउदिसिहिं रउहु ॥ ५ ॥

सूरससहरतारयाणंपि विवरंमुहपट्टियइं तक्खणेण सबइं विमाणइं, भयभीएण सुरंगणेण अइजवेण उज्झियसगणइं ।

विमणंमणुसुरवहुनिवहु जाउ विसंडुलचेहु, मरणासंकिउ खयरजणु गिरिकंदरिहिं पइहु ॥ ६ ॥

एवं वियंभमाणे तिहुयणसंखोहे पंचनमोफारसुमरणपरायणे चारणमुणिगणे विविहाउहनिबहमणुसरंते जंगरक्ख-  
सुरसमूहे पयंडकोवुइमरभीमो धडियनिडालभिउडिमासुरो करकलियकुलिसो सुराहिवो भणिउमाढत्तो—अहो सो  
एस संतिकम्मसमारंभेऽवि वेयालसमुल्लासो भोयणपढमकवलकवलणेऽवि मच्छिवासन्निवाओ पुत्तिमाचंदपट्टमुग्गमेवि  
दाढाकडप्पदुप्पिच्छो विडप्पागमो जं सयलमंगलालयस्स अणप्पमाहप्पवलणिहांणस्स तित्थेसरस्सवि जंम्मणमहूसव-  
समए एरिसो विग्घो समुयट्ठिओ, केण पुण अकालकुबियकयंतसंगमसुएण देवेण दाणवेण य जक्खेण रक्खसेण  
नियमुयसामत्थवित्थारदंसणट्टयाए वा जिणमहिमावलोयणमच्छरेण वा भुवणसंखोहदंसणकोऊहलेण वा कओ हवेज्जत्ति  
जायसंसओ ओहिन्नाणं पउंजइ । तओ दिव्वनाणमुणियजिणचलणचंपणुकंपियमेरुवइयरो तक्खणसंहरियकोवुग्गमो

श्रीगुणचंद  
महावीरच०  
४ प्रस्तावः  
॥ १२१ ॥

मेरुचालन-  
मभिषेकश्च.

निंदियनियकुवियप्पो खामिऊण बहुप्पयारं भगवंतं जिणेसरं पाणिपरिगहियकलसे तियसे भणिउमाढत्तो-  
भो भो विबुहा!—

जह सिरिरिसहजिणिंदो ण्हविओ पुविं इहेव तियसेहिं । तह चरिमतित्थनाहंपि न्हवह मोत्तूण कुवियप्पं ॥ १ ॥  
एगसरूववलच्चिय निब्भंतं जेण सव्वजिणनाहा । तणुगुरुलहुयत्तं पुण न कारणं वीरिउल्लासे ॥ २ ॥  
एवं च सुरवइवयणाणंतरमेव समकालं निवडियं सयलकलसेहितो सारयससिमऊहजालं व गयणसुरसरिजलपडलं  
व तुसारहारधवलं जिणोवरि खीरोयहिजलं, एवं च पवट्टे जिणाभिसेगे—  
दुंदुहीपडहभंभाडुडुक्काउलं, वेणुवीणारबुम्मिस्सहयमदलं । झल्लरीकरडकंसालरववंधुरं, घोरगंभीरभेरीनिनायुद्धुरं ॥ १ ॥

काहलारावसंबद्धखरमुहिसरं पूरियासंखसंरबुत्थरवनिब्भरं ।  
पलयकाले व गज्जंतघणवंदयं, ताडियं सुरेहिं चाउविहाउज्जयं ॥ २ ॥  
हरिसभरनिब्भरुब्भिन्नरोमंचया, केवि संथुणाहिं जिणु तियस नचंतया ।  
अवरि वरसुरहिं मंदारकुसुमुकरं, मुयाहिं गंधवभसलावलीकच्चुरं ॥ ३ ॥  
केवि फोडिंति मल्लव तिवइं सुरा, सिंहनायं च मुंचंति हरिसुद्धुरा ।  
कुणहिं गलगज्जियं अवरि हयहेसियं, केवि य किर रासयं दिंति करणंचियं ॥ ४ ॥

॥ १२१ ॥

अत्रि हरिसेण विरइति गलदहरं, केवि मुट्टीहिं ताडिति विस्संभरं ।  
केइ कलसे य खीरोयजलपूरिण, तक्खणं निति तियसाण हत्थंतिणं ॥ ५ ॥  
इय जहिं सुरसंघेण निहणियविग्घेण वट्ठिज्जइ सवांयरेण ।  
तहिं जिणवरमज्जणि भवभयतज्जणि किं वट्ठिज्जइ मारिसिण ? ॥ ६ ॥

जिणाभिसेगे य वट्ठमाणे संघे सुरिंदा छत्तचामरधूयकडुच्छूयपुप्फगंधहत्थां पुरओ पमोयपुलइयंगं आणंदवियसि-  
यच्छा ठियां । अहं अशुयसुरेसरे जिणं ण्हविज्जणं विरए पाणयाइणो देविंदां नियनियपरिवारपरियरिया महाविम-  
येणं सोहम्माहियइं मोत्तूण तीसंपि कमेण जिणं अभिसिंचंति । तयणंतरं च ईसाणिंदो भयवंतं उच्छंगे धरितो सिंहा-  
सणे निसीयइ, सोहम्माहियइंवि चउदिसिं तित्थयरस्स चत्तारि धवलवसहे संखदलुज्जले रमणिज्जसरीरे विउवइ,  
तेसिं च अट्ठसिं गगेहिंतो अट्ठखीरोयसलिलधाराओ उट्ठं गयणंगणगामिणीओ पुणो अहोनिवडणेण एगीभूयाओ  
काऊण जिणुत्तमंगे संठवेइ, अत्तेहि य वडुएहिं खीरोयकलससहस्सेहिं अभिसिंचइ, एवं कमेण निवत्तिए मज्जण मह-  
सवे परमपमोयभरपुलइयंगो सोहम्मसुरनाहो सुकुमालगंधकासाईए जिणदेहं लूहिऊण गोसीसचंदणुम्मीसघुसिणेणं  
अंगमालिंपइ, सियसुरभिकुसुमेहिं पूयावित्थरं विरएइ, सवालंकारविभूसियं च करेइ, पुरओ य ससिकलाधवलेहिं  
अक्खेहिं दप्पणमहासणवट्ठमाणकलसमच्छसिरिवच्छसत्थियनंदावत्तलक्खणे अट्ठमंगलके समालिहइ, वउलतिलयकण-



श्रीगुणचंद  
महावीरच०  
४ प्रस्तावः

॥ १२२ ॥

वीरकुंदमल्लियासोयचूयमंजरिपारियायपमुहं पंचवणकुसुमनियरमाजाणुमेतं मुयइ, नाणाविहमणिभत्तिविचित्तदंडेण  
वइरामयकडुच्छुएणं पवरगंधाभिरामं धूवमुक्खिवइ, पज्जलंतदीवियाचकवालमणहरं आरत्तियमंगलपईवं च समुत्तारेइ,  
एवं च कयंमि सच्चकायवे हरिसुकरिसनमिरसिरनिवडियकुसुमचियमहीयलं कोमलभुयमुणालअंदोलणमणिकंकणरवा-  
उलं उब्भडकरणवेगारिखोलिरमुत्तावलिकलावयं तयणु सुरासुरेहिं सवायरेण जिणपुरओ पणचियं, नच्चिऊण भत्तिभर-  
निब्भरा भयवंतं थोउं एवमारद्धा—

जय भुवणत्तयवंदिय ! लीलाचलणग्गघालियगिरिंद ! । भवकूवमज्झनिवडंतजंतुनित्यारणसमत्थ ॥ १ ॥

परमेसर सरणागयपरूढदढवज्जपंजर जिणिंद । वम्महकुरंगकेसरि मच्छरतमपसरदिवसयर ! ॥ २ ॥

सच्चं चिय सिद्धत्थो कहं न सामिय ! जहत्थनामत्थो ? । चिंतामणिसारिच्छो जस्स सुओ तं विसालच्छो ॥ ३ ॥

अच्चंतमविरइपरायणंपि अइपुन्नवंतमप्पाणं । मण्णेमो जिण ! जं तुज्झ मज्जणे एवमुवयरिया ॥ ४ ॥

भइं भारहस्सेत्तस्स नाह ! तं जत्थ पाविओ जम्मं । धरणीवि वंदणिज्जा जा बहिही तुज्झ कमकमलं ॥ ५ ॥

जइ तुह पयसेवाए जिणिंद ! फलमत्थि ता सया कालं । एवंविहपरममहं अम्हे पेच्छंतया होमो ॥ ६ ॥

इय चउविहदेवनिकायसामिणो जिणवरं थुणेऊण नियनियठाणेषु गया मोत्तुं सोहम्मसुरनाहं, गए य सट्ठाणं  
देविंदे सोहम्माहिचई कयसव्वकायव्वो जिणिंदं करसंपुडेण गहिऊण अणेगदेवकोडाकोडिपरिवुडो गंतूण जिण-

देवकृतो  
जन्मा-  
भिपेकः।

॥ १२२ ॥

जम्मघरंमि पडिरुवं ओसोवणिं च अवणित्ता तिसलादेविसमीवे निसियावेइ, एगं च पवरं देवदूसजुयलं कुंडलजुयलं च ऊसीसंगमूलंमि ठवेइ, एगं च पंचवज्जियरयणविच्छित्तिमणहरं जच्चकंचणविणिम्मियं लंबंतमुत्ताहलावचूलयं लंबूसयं भगवओ अमिरमणनिमित्तं अवलोयंमि ओलंवेइ, जं अवलोयंतो जिणो सुहेण चक्खुक्खेवं करेइ, तओ सको वेसमणं आणवेइ—जहा भो! सिग्घमेव वत्तीसं हिरन्नकोडीओ वत्तीसं सुवन्नकोडीओ वत्तीसं नंदाइं वत्तीसं भद्दाइं अन्नाणि य विसिद्धवत्थूणि भगवओ जम्मणभवणे उवणमेहि, सोऽवि जंभगदेवेहिं सव्वं तहत्ति निव्वत्तेइ, पुणरवि देविंदो निय-  
तियसेहिंतो सव्वत्थ एव उग्घोसावेइ—भो भो भवणवइवाणमंतरजोइसियवेमाणिया देवा देवीओ व! सुणंतु भवंतो—जो किर तित्थयरस्स तित्थयरजणणीए वा असिवमणिद्धं काउं संपहारेही तस्स अवस्सं अज्जगमंजरिन्व उत्तिमंगं सहस्सहा तडित्ति फुट्ठिहित्ति, एवं च सव्वं काऊण विहिं भगवंतं पणमिऊण उप्पइओ नीलुप्पलसामलं गवणं पुरंदरो ॥

अह उग्गयंमि दिणयरे पगासीभूयासु सयलदिसासु वज्जिएसु गंभीरघोसेसु जयतूरेसु सुहपडिबुद्धा तिसला पेच्छइ सव्वालंकारविभूसियं पवरसुरहिपारियायमंजरीपरिमलमिलंतालिवलयसामलियसरीरं सुरहिगोसीसचंदणरस-  
कयंगरागं जिणेसरं, इओ य सिद्धत्थनरिंदो सहरिसपधाविण्ण चेडीजणेण साहियतिहुयणच्छेरयरुवसुयजम्ममहूसवो चेडीजणस्स अवणियदासत्तभावो आसत्तवेणिवंछियत्थसमत्थरयणरासिदाणजणियाणंदो भणइ, जह—भो पुरिसा!

भीगुणचंद  
महावीरच०  
४ प्रस्तावः

॥ १२३ ॥

गच्छह तुम्हे सव्वत्थ नयरे तियचउक्कचचरेसु कयवरावणयणपुव्वयं वारिवरिसपसमियरयमणहरेसु कुंकुमपिंजरियधर-  
णियलेसु कुणह पंचप्पयारपुप्फपुंजोवयारं, अगुरुतुरुक्ककुंदुरुक्कधूवधूमंधयारियदिसिमुहाओ पइट्टह ठाणे ठाणे कणग-  
धूवघडियाओ, पवरमणिमुत्ताजालरेहंतमज्झभागे नचंततरुणीचरणकिंकिणीकलरवाऊरियदिसिमुहे गायंतगायण-  
जणे ऊसियविविहवेजयंतीसहस्सोवसोहिए समंतओ समुत्तुंगथोरथंभावलीसुसिलिट्ठलट्ठाववद्धे मंचाइमंचे संचएह,  
पडिभवणदुवारं च विसिट्ठपइट्ठाणगपइट्ठिए सहस्सपत्तपउमपिहियाणणे कुसुममालुम्मालिए सरसचंदणपंकपंडुरि-  
ओदरे विमलसलिलपुत्रे पुत्रकुंभे निवेसह, सयलपएसेसु य कहंगतालायरनडपेच्छणयाइ पयट्ठावेह, नयरदुवारेसु य  
नवचंदणमालाउ बंधेह, जूयसहस्सं चक्कसहस्सं च उव्वभेह, उस्सुकं उक्करं अचाडभडपवेसं ववगयधरणिज्जं माणवु-  
ट्ठिजुत्तं विमुक्कचारगागारनिरुद्धावराहकारिनरनियरं पुरं च कारवेहत्ति, जं देवो आणवेइत्ति सविणयं पडिसुणि-  
ऊण वयणं गया पुरिसा, सविसेसो य साहिओ नरिंदाएसो, तओ—

हरिसपणच्चिरतरुणीकरंगुलीगलियमुहियाजालं । जालुव्वभडधयमहुसित्तसंतिहोमानलाउलियं ॥ १ ॥

आउलियचित्तमग्गणधणलाभनिमित्तविहियहलवोलं । हलवोलसवणधावियनरवइजणदिज्जमाणधणं ॥ २ ॥

धणवियरणसुण्णीकयनिहाणपक्खित्ततियसतवणिज्जं । तवणिज्जपुंजपिंजरचीणंसुयचिंधसयरम्मं ॥ ३ ॥

रम्ममहीयलविलिहियपसत्थंसत्थियसहस्ससोहंतं । सोहंतकंतपुरवरनरजणकीरंतमंगलं ॥ ४ ॥

श्रीसिद्धा-  
र्थकृतो-  
जन्मोत्सवः

॥ १२३ ॥

मंगलकरणवाउलपुरोहियांरद्धदेव्यांपूयं । पूयाबलिविक्खेवणपीणियनिस्सेसपक्खिगणं ॥ ५ ॥

गणणाइकंतसमुच्छलंतमहिदूररूढनिहिनिवहं । वहबंधविरत्तपसंतलोयपारंभियविलासं ॥ ६ ॥

ठासुलासिरकुलयेरिनारिपारद्धचचरीगीयं । गीयवियक्खणगायणमुस्सरसरपूरियदियंतं ॥ ७ ॥

इय कुंडगगामपुरं सबाहिरब्भंतरं समत्तेणं । तित्थाहिवजम्ममहूसवमि जायं सुरपुरं व ॥ ८ ॥

एवं च पुरमहूसवे पयट्टे समाणे सिद्धत्थनरिंदो ण्हाओ कयालंकारपरिग्गहो नियंसियमहंग्घपहाणवत्थो निसण्णो अ-  
त्थाणमंडये, एत्थंतरे समांगया मंतिसामंतसेट्ठिपमुहा विसिट्ठलोया, निवडियां चलणेसु, भणिउमाढत्ता य-देव ! विजण्णं  
घणागमेणं रज्जवित्थारेणं सरीरारोगत्तणेणं वद्धाविज्जह तुब्भे, जेसिं तिहुयणेक्कचूडामणी नियकुलनहयलमियंको एसो  
पुत्तो पसूओत्ति जंपिऊणं समप्पियाओ तेहिं पवरकरितुरयरयणरासीओ, राइणावि ते सम्माणिऊणं पुप्फवत्थगंधालं-  
काराइदाणेण विसज्जिया नियनियट्ठाणेसु, खणंतरेसु य दंसणूसुओ पत्थावमुवलब्भ पत्थिवो उट्ठिओ अत्थाणाओ, गओ  
य मणिकुट्टिमलिहिज्जमाणसुरंगरंगावलीसत्थियं दुवारदेसनिवेसियलोहरक्खं उब्भवियमहंतमुसलजूसरं विविहरक्खा-  
परिक्खेवसस्सिरीयं जिणजम्मणभवणं, दिट्ठो यं तत्थ रयणरासिच्च सरयदिणयरोच्च एगंट्ठियसच्चतेयपुंजोच्च समुज्जोइय-  
मंदिरब्भंतरो जिणवरो, तं च दट्ठूणं चित्तिउमाढत्तो-अहो पढमदिवसजायस्सवि अपुवा सरीरकंती अनणसरिसरु-  
वसंपया अविभावणिज्जं लायण्णं निम्मेरसुंदरं अमग्गं सोहग्गं, ता सबहा पुण्णपगरिसागरं मम कुलं जत्थ पसूयमेव-

श्रीगुणचंद  
महावीरच०  
४ प्रस्तावः

॥ १२४ ॥

विहं पुत्तरयणंति विभाविकुण भणिया तिसलादेवी—

पेच्छसु नियसुयपसरंतकंतिपञ्चभारविजियपहपडले । कज्जलसिहापदीवे परिगोविंतोव अत्ताणं ॥ १ ॥

पुवं बहुसोवि मए दिट्ठमिमं मंदिरं विसालच्छि ! । किं तु पमोयमियाणिं किंपि असरिच्छमावहइ ॥ २ ॥

संचुण्णिणयचामीयरचुण्णयसरिसेण कंतिनिवहेण । एगसरूवा कीरंति उभयगिहचित्तभित्तीओ ॥ ३ ॥

इय एवमाइकहाहिं नरिंदो देवी य विगमिकुण भगवओ पढमदेवसियं ठितिवडियं करिंति, तइयदिवसे य तरुणतरणिताराहिवविंवाइं दंसेंति, कमेण य जाए छट्ठवासरे रायकुलसंवड्डियाहिं अविणट्टलट्टपंचिंदियाहिं नीरोग-सरीराहिं जीवंतपाणनाहाहिं कुंकुमपंकालितवयणकमलाहिं कंठकंदलावलंबियसुरहिमालइमालाहिं कुलविलयाहिं अचं-तजायचित्तसंतोसाहिं जागरमहूसवं पयट्टेइ, आगए य एक्कारसदिवसे जहाभणियविहाणेण सुइजायकम्ममवणेंति, बारसदिवसंमि नाणाविहवंजणसमेयं बहुप्पगारखंडखज्जपरिपुन्नं विविहपाणयपरियरियं सुगंधगंधट्टोयणसूयसंपन्नं रसचइं निवत्तावेंति, तयणंतरं कारियणहाणविलेवणालंकाराणं नायखत्तियाणं पणयजणपुरप्पहाणलोगाणं परमायरेण भोयणं पणामेंति, खणंतरेण य आयन्ताणं सूइभूयाणं वीसत्थाणं सुहासणगयाणं तत्थ गंधमलालंकारेहिं सम्माणियाणं तेसिं पुरओ सिद्धत्थनराहिवो एवं वयासी—भो भो पहाणलोया ! पुवंपि मम एस संकप्पो समुप्पज्जित्था जहा—जहि-वसं एस कुमारो देवीए गच्छं संकंतो तद्विसाओवि करितुरयकोसकोट्टागाररज्जेहिं सुहिसयणपरियणेहिं परमं

कुलमर्यादा  
नामस्मा-  
पना च०

॥ १२४ ॥

बुद्धिमहमुवागओ, अओ मए एयस्स वद्धमाणोत्ति नामधेयं कायवन्ति, तस्मा इयाणिपि तुम्ह समक्खं एयमेव नामं  
हवउत्ति, तेहिं भणियं-देव ! जुत्तमेयं, गुणनिप्फन्ननामधेजे विज्जमाणंमि कीस न जहट्टियमभिहाणं कीरइत्ति?,  
एवं तेहिं जंपिए पइट्ठियं जयगुरुणो वद्धमाणोत्ति नामं, जाओ परमप्पमोओ, पुरंदरेणावि अयलो भयभेरवोवसग्गेहिं  
खंतिस्स मो य इतिकऊण वरं महावीरोत्ति नामधेयं से कयंति, इय निवत्तियाभिहाणो सुरसंकामियकामियपवर-  
रसाए निययंगुलीए पाणेण कयभोयणकायवो जयगुरू पंचहिं धावीहिं परियरिओ अंतंउरीजणेण सायरं चेव ला-  
लिज्जमाणो अम्मापियरोहिं बहुप्पयारं चरणचंकमणं काराविज्जमाणो चेडचडयरेणं पइक्खणमुल्लाविज्जमाणो सायरं  
देवदेवीविंदेण पज्जुवासिज्जमाणो निरंतरं गीएहिं गिज्जमाणो पाढेहिं पढिज्जमाणो चित्तेहिं उवल्लिहिज्जमाणो दंसणू-  
सुएहिं लोएहिं अहमहमिगाए पलोएज्जमाणो गिरिकंदरगउव कप्पपायवो वट्ठिउमारद्धोत्ति कमेण य पडिपुन्न-  
सरीरावयवो ताविच्छगुच्छसच्छहपरूढसिणिद्धमुद्धरूहसिहंडो विसुद्धपवुद्धबुद्धिपगरिसागिट्ठलट्ठभासाविसेसविसारओ  
पडिपुन्नसुयसायरपारगामी ओहिन्नाणमुणियचक्खुगोयराइकंतवत्थुवित्थारो अतुच्छसुइनेवत्थधरो सयललोयलोयणाणं-  
दज्जणणं देसूणट्ठवरिसपज्जायं कुमारत्तणमणुपत्तो समाणो भयवं बालभावसुलहत्तणओ कीडारईए अणेगेहिं समव-  
एहिं मंतिसामंतसेट्ठिसेणावइसुएहिं खेड्ढविहिवियक्खणेहिं समं पारद्धो रुक्खखेड्ढेण अभिरमिउं, तत्थ य एसा  
ववत्था-जो रुक्खेसु सिग्घं आरुहइ उत्तरइ य सो सेसाइं डिंभाइं पट्ठीए आरुहिंऊण वाहेइ, इओ य सोहम्मे

भीगुणचंद  
महावीरच०  
४ प्रस्तावः  
॥ १२५ ॥

देवलोए सोहम्माए सभाए अणेगदेवकोडिपरिवुडस्स सहस्सनयणस्स पुरओ जायंतेसु तियसेहिं समं विविहसमुलावेसु  
धीरत्तणगुणवन्नणपत्थावे भणियं पुरंदरेण—भो भो सुरा ! अपुवं किंपि भयवओ वद्धमाणसामिस्स बालत्तणमणुपत्तस्सवि  
धीरत्तणं सरीरपरक्कमो य, जं न तीरइ केणावि बलपगरिस्सकलिएण देवेण दाणवेण वा सयमेव पुरंदरेण वा भेसिउं,  
परक्कमेण वा पराजिणिउंति । एवं च निसामिऊण एगो सुरो अचंतकिलिट्ठचित्तत्तणओ अतुच्छमिच्छतुच्छाइय-  
विवेयत्तणओ य चिंतिउमारद्धो, कहं ?—

जह तह जंपियरम्मं सच्छंदुहामचिट्ठियसणाहं । मुक्काववायसंकं धन्ना पावंति सामित्तं ॥ १ ॥

किं संभविज्ज एयं जं बालंपिहु न खोभिउं सक्का । अविचिंतणिज्जमाहप्पसालिणो देवदणुवइणो ? ॥ २ ॥

अहवा हत्थट्ठियकंकणस्स किं दप्पणेण परिमिणणं ? । गंतूण सयं चिय तस्स धीरिमं लहु परिक्खामि ॥ ३ ॥

एवं संकप्पिऊण जत्थ सामी अभिरमइ तत्थ आगंतूण तरुवरस्स हिट्ठओ खोभणत्थं एगं महापमाणसरीरं अंज-  
णपुंजगवलगुलियापडलकसिणप्पभोलिसामलियवणनिगुंजं तंबचूडचूडाइरेगरत्तलोयणं विज्जुदंडचंचलललंतलोलजी-  
हाजुयलं उक्कडकुडिलवट्टुलकक्खडफडाडोवकरणदच्छं जुगक्खयखुभियसमीरघोरघोसं अणाकलियपयंडरोसवेगं  
तुरियगमणं संमुहमित्तं दिवमहाविसं सप्परूवं विउवइ, सामीवि तं तहारूवं लीलाए अवलोइऊण जुन्नरज्जुखंडं व  
वामहत्थेण उहं दूरे निच्छुभइ, ताहे देवो विचिंतेइ—एसो एत्थ न ताव छलिओ । अह पुणोऽवि सामी तिंदूसएण

शक्तिप्रशंसा  
सुरसर्पपरा-  
करणं.

॥ १२५ ॥

अभिरमइ, सो य देवो धिट्टिमंमवलंबिऊण आंगांमियंमवांयंमविभाऊण य वालयरूवं विउविऊण सामिणां सद्धि  
 रमिउमारदो, अह जिणेण वियंक्खणत्तणओ पराजिया सवेऽवि वालगा पट्टिए समारुहिऊण समाढत्ता वाहिउं,  
 अह वाहिणसुं सयलेसु तेसु समांगओ सुरकुमारस्संवि वारओ, पणामिया तेण सहरिसं पट्टी, आरूढो य तत्थ वद्ध-  
 माणंसामी, तओ सो देवो सामिभेसणद्धं तं पिसायरूवं विउवित्ता पवद्धिउमाढत्तो, केरिसं पुण तस्स रूवं ?—खरफ-  
 रुसा सूयरवालसन्निभा से केसा घडीसंठाणसंठियं उत्तिमंगं उट्टियाकमल्लखल्लयमज्झं निडालवद्धं कविलजडिललोमाओ  
 भंमुहाओ, मरुकूवयंगंभीरं फुरंतपिंगलपंभांजालं लोयणजुयलं, जमलचुल्लिमहल्लं चिचिडं च नासापुडं, रुंदगिरिकंदरा-  
 गारं कपोलमंडलं, घोडगपुच्छसच्छहाओ दाढियाओ, करहस्स व दूरपलंविं ओट्टजुयलं, कुंजरस्स व वाहिं निग्गया  
 कुडिलभीसणां दसणां, अनिलंदोलियपडायघ चंचला निसियकरवालदीहा जीहा, सुक्खाणुसरिसा कंधरा, कोट्टिगा-  
 णुरूवाओ दोवि वाहाओ, सुप्पचप्पडं पाणिसंपुडं, सिलापुत्तगोवमाओ करंगुलीओ, पुराणसिप्पिपुडरुक्खा अंगुलीणं  
 नहा, पयडनसाजालजडिलं पंसुयंतराले पसुत्तघोरंतविसहरं उरट्टिपुंजरं, अलिंजरागारं उयरं, मुट्टिगेज्झा ठाणट्टाणभग्गा  
 कडी, वालुंकीफलपलंविरा वसणा, करिवरंगप्परूढं मेढं, दीहवीभच्छाविवन्नरोमावलीपरिखित्तं तालतरुदीहरं जंघा-  
 जुगं, नीसाहपत्यंरविच्छिन्ना चलणा, कुंहालदारुणां चरणंगुलीणं नहा । अवि य—

विगरालविडंविषयवयणकंदरुगिरियजलणजालोहं । चलणतलपंहयभूयलचालियपासायसिहरगं ॥ १ ॥



श्रीगुणचंद्र  
महावीरच०  
४ प्रस्तावः

॥ १२६ ॥

उद्धपसारियदीहतरभुयग्गलाखलियसूररहपसरं । परिमुक्कमहंतट्टट्टहासपायडियदढदाढं ॥ २ ॥  
कंठपलंवरिपयतलविलग्गवीमच्छसरडवणमालं । नउलकयकण्णपूरं जन्नोइयकयमहासप्पं ॥ ३ ॥  
उक्कत्तियचित्तयचम्मनिवसणं रुहिरमंसलित्ततणुं । अइघोरजराजज्जरअयगरपरिवद्धखंधतलं ॥ ४ ॥  
पइसमयमुल्ललंतं नच्चंतं कहकहंति पहसंतं । उक्कट्ठिं च करित्तं भीसणसद्देण भासंतं ॥ ५ ॥  
इय तस्स भीसणं जिणवरेण दिट्ठं महापिसायस्स । पइखणविवट्टमाणं रूवमसिमेहतमसामं ॥ ६ ॥  
तओ मुणियकइयववियारेण जिणेण सव्वहा असंभंतेण सो पहओ हेलाए पट्टिवट्ठमि मुट्ठीए, करयलकुलिसजणि-  
यसरीराभिघाओव विरसमारसंतो झडत्ति पत्तो मडहत्तणं, निरुवक्कमकायत्तणओ चेव न सयसिक्करमुवगओ, नवरं  
निच्छियसुराहिवइवयणो जायपच्छायावो नियदुच्चरियचुन्नियंगो सव्वायरं पणमिऊण जिणं पढिउमाढत्तो—  
हा दुट्ठु दुट्ठु तइलोयनाह ! एयं मए समायरियं । सच्चंपि न सहहियं सहस्सनयणस्स जं वयणं ॥ १ ॥  
तस्सऽणुरूवं संपइ संपत्तोऽहं फलं इमं भीमं । अवगन्नियगुरुवयणाण अहव किर केत्तियं एयं ? ॥ २ ॥  
संसारमहाभयमवि जो तं विद्वसि देव ! लीलाए । अम्हारिसे भयकरे तुह तस्स हव्वेज्ज का गणणा ? ॥ ३ ॥  
तथा—चलणंगुलिचालियकणयसेल डोल्लियमहल्लमहिगोल । जस्स किर बाललीलाइयंपि चित्तं चमकेइ ॥ १ ॥  
तस्सविय तुज्झ तइलोकनाह ! जो विक्कमं न याणामि । सो नाममेत्तओ चिय विवुहोऽहं न उण किरियाए ॥ २ ॥

सुरपिशाच-  
रूपं  
मुष्टिघातः०

॥ १२६ ॥

एवंविहस्स दुब्बिणयविलसियं खमसु एकवारं मे । पयईएऽवि हु जं पणयवच्छला हुंति सप्पुरिसा ॥ ३ ॥  
इय खामित्ता भुवणेकबंधवं पणमिऊण सो तियसो । गयणयलं उप्पइओ चलंतमणिकुंडलाभरणो ॥ ४ ॥  
भयवंपि खणं एकं कीलित्ता ताहिं ताहिं कीलाहिं । चेडसुहडंगरक्खेहिं परिवुडो नियगिहंमि गओ ॥ ५ ॥  
अह समहिगऽद्ववच्छरपज्जाए जयगुरुंमि जायंमि । हरिसियमणो नरिंदो तिसलाए पुरो इमं भणइ ॥ ६ ॥  
देवि ! कुमारो संपइ गइणसमत्थो कलाकलावस्स । वट्टइ ता उवणिज्जउ लेहायरियस्स पढणत्थं ॥ ७ ॥  
इय भणिए देवीए जएकनाहो महाविभूर्इए । ण्हविओ पसत्थतित्थुत्थसलिलभरिएहिं कलसेहिं ॥ ८ ॥  
नासानीसासोज्झं चक्खुहरं हरिणलंछणच्छायं । परिहाविओ य पवरं सुकुमारं देवदूसजुयं ॥ ९ ॥  
मणिमउडकडयकुंडलतुडियपमोक्खेहिं भूसणेहिं च । सुरवरसमप्पिएहिं अलंकिओ तक्खणं चेव ॥ १० ॥  
सिद्धत्थनरिंदेणवि नीसेसकलाकलायकुसलमई । अज्झावगो महप्पा वाहरिओ निययभवणंमि ॥ ११ ॥  
एगं महप्पमाणं ठवियं सिंहासनं च तस्स कए । अन्नं च थेववित्थरमुवणीयं जयगुरुनिमित्तं ॥ १२ ॥  
अह जाव नोवणिज्जइ सामी अज्झावगस्स पढणत्थं । सक्कस्स ताव चलयं सिंघासनममलमणिरुइरं ॥ १३ ॥  
ता ओहिज्जाणेणं मुणिउं जयनाहपढणवुत्तंतं । चित्तेइ अहह मोहो कह विलसइ जणणिजणगाणं ॥ १४ ॥  
जं सयलसत्थपरमत्थजाणगं जयगुरुंमि पढणत्थं । अज्झावगस्स संपइ समप्पिउं अभिलसंतित्ति ॥ १५ ॥

श्रीगुणचंद  
महावीरच०  
४ प्रस्तावः

॥ १२७ ॥

सको इय चिंतंतो आगंतूणं महप्पमाणंमि । सिंहासणंमि ठविउं नाहं परमाएँ भत्तीए ॥ १६ ॥  
वंदित्ता जोडियपाणिसंपुडो सदसत्थपरमत्थं । आपुच्छिउं पवत्तो सामीऽविय वोत्तुमारद्धो ॥ १७ ॥  
सोऽवि उवज्झाओ परमं विस्सियसुवहंतो तं कहितं एगग्गचित्तो निसामेइ, जणणिजणगाइणो य विस्सियमणा  
जाया । अह सदसत्थपयत्थे कहिऊण ठिओ, ताहे सक्केण साहियं तेसिं—जह जाइसरणाणुगओ आगन्धवासाओऽवि  
नाणत्तयपरिग्गहिओ एस भयवं, पाणिपइट्ठियं लट्ठमणिं व सवं वत्थुं नियमईए सुणइ, ता किमेवं अणत्थओ संरंभो  
कओ ?, एवमायन्निऊण विस्सियमणा परं पमोयसुवगया जणणिजणगा, पुरंदरोऽवि जिणं नमिउं दिवं गओ, तेण पुण  
उवज्झाएण जे केऽवि पयत्था भयवओ वागरेंतस्स सम्ममवधारिया तयणुसारेण सुसिलिट्ठं विरइयं इंदवागरणंति । भय-  
वंपि निरुवसग्गं कमेण पत्तो तरुणत्तणं, तयणुभावेण य तस्स सुसिणिद्धसुहुमकसिणकुंचिरकेसपासेण विराइयं छत्ता-  
गारमुत्तिमंगं, सवणमूलावलंविणा नलिणेणं व नयणजुयलेणोवसोहियं वयणं, अचंतसस्सिरीएण रयणेणं व सिरिवच्छेण  
पसाहियं कणयसेलसिलापिडुलं वच्छत्थलं, गंभीरदक्खिणावत्ताए सप्पुरिसचित्तचित्तीएव नाभीए अलंकियं झसाणु-  
रुवमुयरं, हंसतणुरुहकोमलेहिं लोमेहिं करिकराणुरुवं मंडियं जंघाजुयलं, अंगुलीदलग्गविप्फुरंतनहावलीए चिंताम-  
णिपरंपराएव सोहियं जयपडागामगरमच्छाइलक्खणलंछियं चरणकमलं ।  
अन्नं च—भाविमपायमासंकिऊण मन्ने जिणस्स पढमंपि । हिययाओ नीहरिउं ठियं व केसेसु कुडिलत्तं ॥ १ ॥

लेखशाला  
यौवनं च

॥ १२७ ॥

रागोविदु धेवुप्पन्नपणयभावोऽवि भाविभयभीओ । वाढं कुणइ व वासं करचरणतलाधरतलेसु ॥ २ ॥

एवं च भयवंतं तरुणत्तणमुवगयं रूवविणिज्जियदेवदाणविंदसंदोहं नाऊण सेसमहीवईहिं नियनियधूयापाणि-  
ग्गहत्थं पेसिया वरगपुरिसा सिद्धत्थनरिंदसमीवे, विन्नत्तो य तेहिं राया, जहा-देव ! अम्हे वद्धमाणकुमाररूवाइरेगरं-  
जियमणेहिं नरिंदेहिं अप्पणप्पणधूयावरणत्थं तुम्ह सगासे पेसिया ता साहेह किमिह पच्चुत्तरं?, रत्ता जंपियं-सम्म-  
मालोचिऊण कहिस्सं, वचह ताव तुम्हे निययावासेसु, एवं भणिए अवक्कंता ते पुरिसा, नरिंदेणवि साहिओ एस  
वइयरो तिसलादेवीए, एयं च आयन्निऊण हरिसभरनिम्भराए जंपियं तीए-देव ! तुम्ह पुत्तपसाएण पावियाइं  
मए पावणिज्जाइं, अणुभूयाइं अणुभूयपुव्वसुहाइं, जइ पुण इण्हिं तस्स वीवाहमहूसवं पेच्छामि ता कयकिच्चा  
होमि, रत्ता वुत्तं-जइ एयं ता देवि ! वचसु कुमारसमीवं, पन्नवेसु य तं विवाहनिमित्तं, देवीए भणियं-महाराय !  
न जुज्जइ पढमं चिय तत्थ मह गंतुं, लज्जापहाणो हि कुमारजणो होइ, ता सिक्खविऊण पेसिज्जंतु तप्पणइणो, एवं  
वुत्ते रत्ता पेसिया कुमारसमीवे पाणिग्गहणपडिवज्जावणत्थं पणइणो, तेहि य गंतूण सविणयं जयगुरुणो साहिओ  
तदादेसो, तं सोच्चा भगवया भणियं-भो महाणुभाव ! किं न मुणह मम चित्तवित्तिं ? नोवलक्खह विसयविरागं ?  
न जाणह गिहवासपरिहरणाभिलासं ? जेणेवमुल्लवह पाणिग्गहणविसए, तेहिं भणियं-कुमार ! मुणेमो सधं, किंतु  
अणुवत्तणिज्जं अम्मतायाण वयणं अलंघणिज्जा नियपणइणो, न खलुदुल्लहो पच्छिमकाले गिहपरिचायभावो, न यावि

श्रीगुणचंद  
महावीरच०  
४ प्रस्तावः

॥ १२८ ॥

पुण्णमणोरहा पडिकूलिस्संति पुणो तुम्हाभिप्पेयं अम्मापिउणो, भगवया भणियं-पाणिग्गहणमंतरेणावि पुवं चिय  
अब्भुवगयं मए इमं-जं न जणणीजणगेसु जीवतेसु सवविरइं पडिवज्जिस्सामि, ता जइ एवं ठिए मइ संतोसमुव-  
हंति जणणिजणगा किमकल्लाणं हवेज्जा?, का वा पाणिग्गहस्स लट्ठया?, जेण पेच्छह पयडचिय विवाहसमए कलस-  
परंपराठवणमिसेण दंसिज्जइ उत्तरोत्तरदुहाण पावपवंधो, पज्जलंतजलणच्छलेण पयडिज्जइ महामोहवियंभणं, गयणय-  
लविलसंतधूमपडलनिभेण कहिज्जइ अत्तणो लहुयत्तणं, चउमंडलगावत्तणववएसेण परुविज्जइ चउगइयं संसारभमणं,  
घयमहुपमुहवत्थुहुणणकवडेण दाविज्जइ सयलगुणगणदहणं, तरुणीजणभणिज्जमाणमंगलछउ मेणरियंउगिरियंभाविज्जइ  
चाउहिसमजसो, कंठावलंबियकुसुममालामायाए परुविज्जइ समीववत्तिणी दुक्खदंदोली, चंदणरसंगरागमिसेण सूइज्जइ  
तक्खणं चिय कम्ममलावलेवो, कन्नगापाणिग्गहणकइयवेण दाविज्जइ अट्ठकम्ममहामोलभंडकिणणत्थं हत्थसन्नंति ।

किं बहुणा?-जं जं विवाहसमए विहिं पलोएमि सुहुमबुद्धीए । सो सो चिंतिज्जंतो रोमुद्धोसं जणइ मज्झं ॥ १ ॥

ता सुयह मोहपसरं अणुजाणह मं विणा विवाहेण । एवं चिय निवसंतं अम्मापिउनिबुइकएण ॥ २ ॥

एवं भणिए पडुणा तो ते जंपंति विणयपणयंगा । तुम्हारिसाण काउं एयं नो जुज्जइ कुमार! ॥ ३ ॥

पणइयणपत्थणाभंगभीरुणो जं सयावि सप्पुरिसा । नियकज्जपवित्तिपरंमुहा य पयईए जायंति ॥ ४ ॥

तहा-किं उसभजिणवरेणं पाणिग्गहणाइ नो कयं पुबिं? । किं वा न चक्किलच्छी परिभुत्ता संतिपमुहेहिं? ॥ ५ ॥

विवाहार  
मित्र-  
प्रार्थना.

॥ १२८ ॥

इव एवं जंपंतेसु तेसु कंचुइजणेण परियरिया । तिसलादेवी सयमेव आगया भंगवओ मूले ॥ ६ ॥

अहं सत्तट्ठ पयाइं अणुगंतुं संमुहं जिणो तीसे । आसणदाणप्पमुहं पडिवत्तिं कारवइ सबं ॥ ७ ॥

अण्णोण्णघडियंकरसंपुडं च देविं पडुअ भगवंतो । जंपइ अम्मो ! साहह आगमणं किंनिमित्तंति ॥ ८ ॥

देवीए जंपियं-पुत्त ! तुह दंसणाओऽवि किमन्नं निमित्तं ? जओ एत्तिण्णं वसइ जीवलोगो भरियं दिसावल्यं सुहावहा रायलच्छी संतोसमावहइ गेहं निवुइ उवजणइ पणइजणो विगयंधयारं तिहुयणं, ता किमवरं वरं साहेमि निमित्तंति, एवमाइन्निउण भगवया चित्तियं-अहो अणाइक्खणिज्जो कोऽवि जणणीजणस्सावचे सिणेहो, अतुलं किंपि वच्छलं, असरिसा कावि अवलोयणाभिरई, जं सया चक्खुगोयरगएवि मए अम्बा ईसिअहंसणेऽवि संपइ एवं संतप्पइत्ति विगप्पिऊण पुणो मणिया देवी-अम्मो ! तहावि साहेसु किंपि पओयणं ? तिसलाए भणियं-पुत्त ! जइ एवं ता पडिवज्जसु विवाहमहसवं, जओ एयनिमित्तं एसो पणइजणो अम्हेहिं तुज्झ पासे पेसिओ, तुह विवाहुकंठिओ खु नराहिवो नयरजणो य, समावि एत्तियमेव संपयं अपत्तपुडं सुहं, पडिपुत्ता सुहाणुभावेण सेसमणोरहत्ति, भगवयावि आगम्भकालाओऽवि मम एस पइन्नाविसेसो-जं अम्मापिऊणं अप्पत्तियकारिणी पवज्जावि न कायवत्ति चित्तिऊण निरभिलासेणवि अन्नुवगयं तयाइहं, परितुट्ठा य देवी समं परिजणेण, निवेइओ एस वइयरो नरिंदस्स ।

एत्थंतरे सिद्धत्तरायमुवट्ठिओ पडिहारो निवट्ठिऊण चलणेसु विन्नविउमाट्ठतो य-देव ! समरवीरामिहाणराइणो दूओ

श्रीगुणचंद  
महावीरच०  
४ प्रस्तावः  
॥ १२९ ॥

दुवारदेसे तुम्ह दंसणूसुओ चिट्ठइ, तत्थ को आएसो?, राइणा भणियं—लहुं पवेसेहि, जं देवो आणवेइत्ति भणिऊण  
पवेसिओ पडिहारेण, पणमिओ य तेण राया, उवविट्ठो य दिन्नासणो, पत्थावे य पुट्ठो नरिंदेण, जहा—भइ! किं आग-  
मणकारणं?, दूएण भणियं—देव! निसामेसु, अत्थि नियसोभापराजियकुवेरपुरे वसंतपुरनयरे समरंगणपरितोसिय-  
सुरउच्छरासत्थो जहत्थाभिहाणो समरवीरो नाम राया, तस्स य नियपाणनिविसेसा पउमावईए पणइणीए कुन्ठि-  
संभूया जसोयानाम कन्नगा, सा य कहं जसोयत्ति नाममणुपत्तत्ति निसामेह कारणं, किर इमीए जस्मसमए देवो  
समरवीरो रयणीए सुहपसुत्तो पभायसमए सुमिणं पासइ—जहाऽहं अंगरक्खिगापरिक्खित्तगत्तेहिं विविहपहरणकरेहिं  
सुहडेहिं परिकरिणहिं तरलतुरंगमेहिं गुडियाहिं गयघडाहिं नाणाविहपहरणजोहजुत्तेहिं पहाणरहवरेहिं परिवेढिओ  
सयंपि मत्तकुंजराधिरूढो उज्जाणमइगओ, तत्थ य ठियस्स सहसच्चिय पाउब्भूओ हलवोलो, अंतरंतरा नचंति  
केऽवि सुहडा केऽवि पलायंति केऽवि य महीयले धूलीधूसरा रूलंति पडंति विजयचिंधाईं विहडंति जयतूराईं,  
एवं च असमंजसं दट्ठूण मए इओ तओ डोलंतं गहियं नियच्छत्तं हत्थेण, पत्तो एगो महाविजयद्धओ, सोऽवि संठ-  
विओ सारिओ य, एवंविहं च सुविणं पासित्ता पडिबुद्धो संभंतचित्तो पभायसमए सुमिणपाढगे सद्दावेत्ता तेसिं  
सुमिणं परिकहेइ, तेहि य सिट्ठं—देव! पंचहिं कारणेहिं सुमिणोवलंभो हवइ, तंजहा—अणुभूएण दिट्ठेण चिंतिएण  
पयइवियारेण देवयावसेण वा, तत्थ न मुणिज्जइ तुम्हाणं एएहिंतो केणावि कारणेण सुमिणोवलंभो जाओत्ति, राइणा

त्रिशलांग-  
मनं यशो-  
दाभिधान-  
हेतुः.

॥ १२९ ॥

मणियं-एवमेयं, न सम्मं उवलम्भेमि कारणं, तेहिं वुत्तं-जइ एवं ता करेह सच्चं सुविणगं, जहा दिट्ठदिट्ठिइए सवसा-  
 मरिग काऊण गच्छह उज्जाणं, को दोसो?, न मुणिज्जइ कोऽवि परमत्थो, एवंपि कीरमाणे कयावि गुणो होज्जा,  
 साभिप्पाओ य किंपि एस डोलंतछत्तधरणविजयचिंधलाभोत्ति वुत्ते राइणा पडिवज्जिऊण तेसिं वयणं ताडाविया  
 सन्नाहमेरी, तीए सहायन्नणेण तक्खणादेव कयसव्वसंनाहो नरवइसमीवमुवगओ सामंतवग्गो परिचत्तसेसवावारो  
 पुरो ठिओ जोहसमूहो, पासमल्लीणा करितुरयाइणो, तओ चाउरंगवलकलिओ पहाणहत्थिकंधराधिरूढो नयरदूरव-  
 त्तिणं गओ नंदणुज्जाणं, तत्थ य रयणिदिट्ठसुमिणभीसणत्तणं चित्तंतस्स तक्खणफुरियवामनयणपिसुणियानिट्ठवड-  
 णस्स किंपि अरइविगारमणुसालीणस्स वज्झवित्तीए काणणमणुपेच्छंतस्स नरिंदस्स सचिय पुव्वदिणपेसियचारपुरिससू-  
 इयपत्थाओ चिरपरूढवेरसाहणगाढामरिसो अमुणियतहिवसनरवइवइयरो जुज्झसज्जो पच्चंतसामंतो दुज्जोहणाभि-  
 हाणो पहुत्तो उज्जाणसमीवं, दिन्नो परिवेढो, जाओ हलवोलो, लक्खियतदागमणो य निग्गओ उज्जाणवाहिं नरिंदो,  
 दिट्ठो य पडिरिउणा संगामसज्जो राया, तओ किं वियाणियं ममागमणमणेणंति खुभियचित्तेणवि दुज्जोहणेण पारद्धं  
 रत्ता सह पहरिउं । अह-

निसिथखग्गकप्पियपयंडं नरमुंडमंडियाभोगं । दट्ठोद्ववद्धमोग्गरनिप्पिट्ठुकिट्ठरहनिवहं ॥ १ ॥

कुंतग्गभिन्नकुंजरकुंभत्थलगलियमोत्तियसमूहं । तक्कालमिलियवेयालकिलिकिलारावभयजणगं ॥ २ ॥



श्रीगुणचंद  
महावीरचं  
४ प्रस्तावः

॥ १३० ॥

निवडंतछत्तधयचिंधनिचयसंछन्नमेइणीवट्टं । उत्तट्टसहत्थिविहम्ममाणनियपवरपरिवारं ॥ ३ ॥

करितुरयघायनिस्सरियरुहिरपूरिज्जमाणमहिगत्तं । रणतूरखुन्नचिरकबंधपेच्छणयभीसणयं ॥ ४ ॥

इय घोरसमरवावारमेकहेलाए काउमचिरेण । सिरिसमरवीररणा वट्ठो सो नागपासेण ॥ ५ ॥

भणिओ य सुमर रे इट्ठदेवयं एस वट्ठसि जमस्स । संपइ पाहुणगो तं दुच्चरियरहंमि आरूढो ॥ ६ ॥

दुज्जोहणेण भणियं भो नरवर ! कीस वाहरसि एवं ? । पारंभे चिय समरस्स सुमरणिज्जं मए सरियं ॥ ७ ॥

नियकुलकमाणुरूवं अणुचेट्ठसु संपयं विगयसंको । देहेण कयं देहोऽवि सहउ को एत्थ अणुतावो ? ॥ ८ ॥

एवं च आयन्निऊण पडिवन्नकरुणाभावेण समरवीररत्ना नीओ नीयमंदिरं, उच्छोडिया बंधा, काराविओ ण्हाणभो-  
यणाइयं, समप्पियाइं समरगहियाणि करितुरयाईणि, तेणावि अंगीकया सेवावित्ती, तओ जाओ राइणो परमसं-  
तोसो, पसरिओ चाउद्दिसिं जसोत्ति, भणियं च रत्ना--अहो मम इमीए कन्नगाए पसवकालेऽवि एरिसो जसो दिण्णो,  
तम्हा होउ एयाए जसोयत्ति जहत्थभिहाणंति वुत्ते महया रिद्धिसमुदणं कयं एवमेव से नामं ।

अह सा चंदलेहव वट्ठंती पत्ता कमेण जोवणं, अन्नया पुट्ठो राइणा नेमित्तिओ--को इमीए पाणिग्गाहो भविस्सइत्ति ?,  
तेणावि साहियं--देव ! सिरियच्छलंछियवच्छयलो सयलसुरासुरनमियकरकमलो अट्ठसहस्सलक्खणधरो पुरिसप्पवरो नि-  
च्छियं एयाए पई होइत्ति, एवं निसुणिए ठिओ नरिंदस्स हियए तुम्ह कुमारो, तओ आहूओ मेघनाओ नाम सेणावई

समरवीर-  
दुर्योधनयुद्धं

॥ १३० ॥

समप्पिया तस्स जसोयकन्नगा, दिन्नो सयंवरविवाहजोग्गो महंतो हयगयकणंगाइविच्छडो, भणिओ य जहा-भइ !  
गच्छसुं तुरियं, कारंवेसु पाणिग्गहणमहिमंति, तओ नरवइवयणाणंतरमेव चलिओ अक्खलियपयाणगेहिं एसो, अहं  
पुण एयकज्जनिवेयणत्थमेव पढमं चिय तुम्ह पासे पेसिओत्ति, ता देव ! एयं तं आगमणकारणं । रत्ता भणियं-भइ !  
सम्मं कयं, अणुरूवमेयं, पयट्टिज्जउ अकालपरिहीणं वंछियत्थो, दूएण जंपियं-देव ! कहं न पयट्टिज्जइ जेण विवाह-  
लग्गं पि आसन्नं वट्टइत्ति बुत्ते रत्ता सेसनरवइवरगपुरिसा सम्माणिकुण विसज्जिया नियनियंढाणेसु, अन्नदिवसे य  
समागया सा रायकन्नगा वद्धाविओ नरिंदो दवाविओ तीसे निवासनिमित्तं समुत्तुंगसत्तभूमिगो पासाओ पेसिया  
रसवई कारावियां अन्नावि तक्कालोचिया पडिवत्ती, पसत्थमुहुत्ते य कयपवरसिंगारो अणेगसामंतसुहडपरिबुडो आगओ  
मेहनाओ सेणावई, पणमिओ अणेण राया, पुच्छिओ य कुसलोदंतं, राइणाऽवि तस्स दवावियं आसणं तंवोलाइदाण-  
पुबयं च पुट्ठो समरवीरनरेसरसरीरकुसलवत्तं, सविणयं साहिया य तेण, अह विविहसंकहाहिं गमिऊण खणमेकं रत्ता  
अब्भणुत्ताओ समाणो उट्ठिओ मेहनाओ, गओ य निययावासे, समारद्धो विवाहोवक्कमो, वंधाविया मंचा, जहोचियं  
विरइयाइं आसणाइं, निरुविया विविहकम्मोसु किंकरा, परिकप्पियं वेइगाविमाणं । तं च केरिसं ?-

मरगयमणिचच्चिकिय सुवण्णवरकलसविरयणारम्मं । अइनिम्मलरंभागब्भखंभउद्धयविजयपडं ॥ १ ॥

परिसुककुसुमपुंजोवयारपरिमभिरभमररवमुहरं । निम्मलमुत्ताहलमरियचारुमणिकोट्टिमचउक्कं ॥ २ ॥

श्रीगुणचंद  
महावीरच०  
४ प्रस्तावः  
॥ १३१ ॥

चउदिसिविमुक्कदप्पणपडिबिंविक्कामिणीवयणकमलं । ठाणट्टाणनिवेसियवरमणिपडिहणियसंतमसं ॥ ३ ॥  
गरुडमणिपसरियकिरणपडलविच्छुरियमहियलाभोयं । नवगोमयरसलित्तं व रेहए वेइयाभवणं ॥ ४ ॥  
एवं च निवत्तिऊणं तक्कालोचियकायवं मेहनाहेण कहावियं सिद्धत्थरत्तो, जहा-समीवमागयं वट्टइ पसत्थं हत्थ-  
ग्गहणमुहुत्तं, ता कुमारं घेत्तूण सिग्घमागच्छहत्ति । राइणावि एवमायन्निऊण भणिया तिसला-देवि ! सिग्घं करेहि  
कुमारस्स पुंखगाई कायवं, आसत्तो वहइ समओत्ति, एवं सोचा देवीए परमायरेण विविहप्पयारेहिं मंगलसदपुरस्सरं  
पुंखिऊण सवोसहीहिं ण्हविओ कुमारो, नियंसाविओ महामोलं धवलदुगुल्लजुयलं, काराविओ सवं कायवविहिं,  
अविय-गोसीससुरभिचंदणविलेवणापंडुरो जिणो सहइ । सरयनिसायरजोण्हाए धवल्लिओ कंचणगिरिब ॥ १ ॥  
कसिणघणकेसपासो रेहइ सो कुसुमगुच्छसंछत्तो । पप्फुरियतारतारोवसोहिओ गयणभागोव ॥ २ ॥  
सट्टाणपिणद्धविचित्तरयणनवभूसणभहियसोहो । जंगमभावमुवगओ रोहणसेलोव पडिहाइ ॥ ३ ॥  
साभावियावि सोहा न तीरए जिणवरस्स साहेउं । किं पुण विसेसमंडणमंडियदेहस्स तत्थ खणे ? ॥ ४ ॥  
एवं च कयउचियकायवे कुमारे निवेइयं राइणो, तेणावि निउत्ता नियपुरिसा-अरे पयट्टेह नगरमहसवं मेलेह  
नायखत्तियवग्गं समप्पेह कुमारस्स पसाहियसरीरं जयकुंजरं जेण गम्मइ विवाहट्टाणंमि, जं देवो आणवेइत्ति भणि-  
ऊण गया पुरिसा, निवत्तिओ नरिंदाएसो, तओ धवलपसाहियकरिवरारूढो पवणपणचंतधयवडुग्घायसुंदररहवरा-

मेघनाद-  
सेनानी-  
विवाहः.

॥ १३१ ॥

रुद्रायलोयपरियरिओ मणहरनटोवयारकुसलनचंतावरोहसुंदरीवंदनिरुद्धरायमग्गो वज्जंतमंगलतूररवाऊरियसयलदि-  
सामुहो सिद्धत्यनराहिवेण जेट्ठभाउगनंदिवद्धणजुवराएण य अणुगम्ममाणो सिरिवद्धमाणकुमारो सायरमंवलोयण-  
विखत्तचित्तेण भवणमालातलसंठिएण पुरजणेण दंसिज्जंतो अंगुलिसहस्सेहिं पुज्जमाणो आसीसंसएहिं अग्घविज्ज-  
माणो अक्खयसम्मिस्सकुसुमवुट्ठिवरिसेहिं संपत्तो कमेण विवाहमंडवंति, अह मंडवदुवारेचिय पडिरुद्धो पडिहार-  
जणेण सामन्नलोओ, पविट्ठो पहाणलोएण समं अर्द्धिभत्तरंमि, चिलयाजणेण ओमिलणपुव्वगं झत्ति विविहं पसाहिया  
सा जसोयवररायकन्नावि, तथाहि—

रमणफलंगंमि तीसे आवद्धा पंचरायमणिकंची । अइविच्छिन्ने गयणंगणंमि हरिधणुहलेहव ॥ १ ॥

नयणेहिं कज्जलुम्मिस्सिरोहिं सइदीहरेहिं निद्धेहिं । पचक्खा सरयसरिध्व सहइ सा नीलनलिणेहिं ॥ २ ॥

कंठतलंमि य तीसे लोलंतो नवसरो वरो हारो । वयणिंदुविब्भमागयतारावलिलीलमुव्वहइ ॥ ३ ॥

तीसे जावयरसपंकपाडलं कोमलं चलणजुयलं । पल्लवजुयं व नज्जइ वम्महकंकिल्लासाहिस्स ॥ ४ ॥

भालतलंमि य तीसे लिहिओ गोरोयणाए वरतिलओ । तह दससु अंगुलीसु आविद्धं मुद्धियाजालं ॥ ५ ॥

इय सविसेसपसाहणपसरंतसरीरकंतिरमणिज्जं । मंजुमणिनेउरारवसवणागयहंसखलियगई ॥ ६ ॥

मणिकुट्टिमपडिविवियमुहकमला मत्तकुंजरगईए । चलिआ चेडीचकेण परिवुडा सा नरिंदमुया ॥ ७ ॥

श्रीगुणचंद  
महावीरच०  
४ अस्तावः

॥ १३२ ॥

पत्ता य तक्खणागयपुरोहियारद्धजलणकम्ममि । नववंदणमालामणहरंमि वरवेइगाभवणे ॥ ८ ॥

तत्तो पाणिग्गहणं पारद्धं गीयमंगलसणाहं । सयलतइलोकदावियपरमाणंदं महिद्धीए ॥ ९ ॥

एत्थंतरे उभयपक्खेहिवि काराविओ जणाणमुवयारो दावियाइं मिगनाभिपसुहसुरहिगंधविलेवणाइं सरभसरुंदंत-  
छप्पयपयनिवेसभज्जिराइं कुसुमदामाइं सुरहिगंधवंधुरा पडिवासा भूरिकप्पूरपारीपहाणाइं पूगीफलसणाहाइं नागवल्ली-  
दलाइं देवंगचीणद्धचीणदोगुल्लपट्टपमुहाइं पवरवत्थाइं केयूरकुंडलकिरीडतुडियकडयाइणो आभरणविसेसा सिंधुतुरु-  
क्कवल्लीयवज्जरकंबोजाइसुखेत्तजायाओ तुरयवंदुराओ मंदभहाइविसिद्धवंसप्पसूया महागयविसेसा, एत्थंतरे जलणे हुणि-  
ज्जमाणंमि महुघयाईहिं कन्नावराण वित्तं चउत्थमंडलगपरिभमणं, ताहे सेणावइणा आणंदुच्छलियवहलपुलएण कोडी-  
वत्तीसं पवररूवस्स कणगस्स कुंडलकडिसुत्तयमणिकिरीडपमुहं तमाभरणं कच्चोलसिप्पिथालाइयं च कलहोयमयभंडं  
अइदूरदेससंभूयचित्तचेलाइं भूरिभेयाइं कन्नाए पाणिविमोयणंमि दिन्नाइं कुमरस्स, सिद्धत्थनरिंदेणवि बहुगाए  
कणगवत्थलंकारा परितोसमुवहंतेण वियरिया भुवणदुलंभा ।

एवं च सुरासुरनरपरितोसकारए वित्ते विवाहमहूसवे कए भोयणाइसक्कारंमि सट्ठाणेसु पडिनियत्तंमि रायलोए  
नियनयरमुवगयंमि मेहनायसेणावइंमि ससहरकरगोरपासायसिहरसंठियस्स उचियसमए दिवविसयमणुभुंजमाणस्स  
पुन्नपगरिसुप्पज्जंतचित्तियत्थस्स देवगणोवणिज्जमाणपवरवत्थगंधमल्लविलेवणालंकारस्स ववगयरोगायंकस्स कयाइ

श्रीवीरस्य  
यशोदया  
विवाहः.

॥ १३२ ॥

सेवागतुंवरुसमारद्धकलरवपंचमुग्गारसवणेण कयाइवि सायरपणचिरसुरवहूपेच्छणयावलोयणेण कयाइ गंभीरंजण-  
विवायनिन्नयकरणेण कयाइ जणणिजणगसमीवगमणेण भगवओ वोलेति वासरा ।

अहं गएसु कित्तिएसुवि संवच्छरेसुवि आवन्नसत्ता जाया जसोया, कालक्कमेण य पसूया सुकुमारचरणकरयलं चारु-  
ख्वोवसोहंतसरीरावयवं तेयसिरिं व पचक्खं दारियं, कयं च समुचियसमंणं पियदंसणत्ति से नामं, सा य सायरमुव-  
लालिज्जमाणा पवड्डिउमारद्धत्ति । अहं भगवओवि वट्टमाणंमि अट्टावीसइमे वरिसे पालियनिकलंकपासजिणपणीय-  
धम्मा अम्मापियरो कुससंथारयमारुहित्ता कयभत्तपचक्खाणा अपच्छिमसंलेहणाद्भुसियसरीरा तइयभवे अवरवि-  
देहंमि अवस्सपावियवनिवुइणो कालं काऊण अचुयकप्पे देवत्तेण उववन्ना, ततो सोगाउरेण नंदिवद्धणपमुहेण  
रायलोएण कओ तेसिं सरीरसक्कारो, कयतक्कालोचियकायवे य सट्ठाणद्वियंमि तंमि अणिट्ठं दट्ठुं अपारंतोव पत्थिओ  
अत्यमणगिरिं दिणयरो, सउणिकोलाहलरवेण रोविउमारद्धव संझा, निस्सरंतभमररिंछोलिच्छलेण अंसुजालं व सुकं  
कमलायरोहिं, सदुक्खमहिलाजणमणुसासिउं व पयट्ठा रयणी, विरहानलसंतत्तगतं रायलोयं निवविउकामोव  
संमुग्गओ ताराहिवो, अहापभायाए रयणीए समुग्गयंमि दिणयरे अचंतदुस्सहसोगावेगविवससरीरं पिव विरह-  
विहुरंतोउरीपरिगयं नीसेससयणवग्गपरिवुडं नंदिवद्धणजुवरायं पेच्छिऊण भणियं भगवया-भो परिचयह सोयं,  
अणुचितह परमत्थं, निरत्थओ खु सोगो, जओ-अणिवारियसच्छंदसंचरणदुल्लिओ पंचाणणोव कयंतो सुमिणगं व

श्रीगुणचंद  
महावीरच०  
४ प्रस्तावः

॥ १३३ ॥

खणदिट्टनट्टं संजोगविलसियं माइंदजालरमियं पिव मुहुत्तमेत्तसुंदरं पेम्मं कोदंडलट्टिव गुणाणुगयावि कुडिला कज्ज-  
परिणई संझब्भरागोव अचिरावत्थाणं धणं महाभुयंगा इव दुन्निवारा विविहरोगायंका, ता सवहा नत्थि किंपि  
एत्थ संसारे सोयणिज्जं पडिवंधट्टाणं वा पवलं, एकं चिय अणुसरह विवेयं परिचयह भोगपिसायं कुणह कायव्वं,  
सवसाहारणो हि एस वइयरोत्ति । एयं ते निसामिऊण पयणुपेमाणुवंधा सिढिलियसोयावेया जायत्ति ।

अन्नदिवसे य जोइससत्थपरमत्थवियक्खणनिमित्तिगोवइट्टपसत्थमुहुत्तंमि पहाणलोगेण अणेगपयारेहिं भणिओऽवि  
जयगुरू जाव न पडिवज्जइ रज्जं ताव नंदिवद्धणो अभिसित्तो सिद्धत्थराइणो पए, पणमिओ नायस्वत्तियवग्गेणं  
बहु मन्निओ नयरकारणिएहिं परियरिओ सामंतेहिं पडिवण्णो सेवगजणेणं पूइओ पच्चंतराईहिं, एवं जाओ  
सो महाराओत्ति ।

अन्नया य तं सयणवग्गाणुगयं भयवं भणिउमाढत्तो-भो पडिपुन्ना मम संपयं पुवपडिवन्ना पइन्ना, कयं च सव  
करणिज्जं, ता सिढिलेह नेहगंठिं, होह धम्मसहाइणो, अणुमन्नेह मम सवविरइगहणत्थंति, अह वज्जासणिनिवडणदु-  
व्विसहं निसामिऊण वयणमेयं भणियं तेहिं-कुमारवर ! अज्जवि महारायसोगो तहट्टिओ चेव अम्हाणं नट्टसल्लं व  
विहवइ हिययं, किं पुण अकाले चिय तुम्हेहिं सह विओगो खयक्खारावसेगोव दुस्सहो?, अहो मंदभग्गसिर-  
सेहरा अम्हे जेसिं उत्तरोत्तरा निवडइ दुक्खदंदोलित्ति भणिऊण रोविउं पवत्ता, बहुप्पयारं च सासिया मइरवय-

श्रीसिद्धार्थ-  
त्रिशलयो-  
देवत्तम्.

॥ १३३ ॥

नेहिं भगवया, कहकहवि निरुद्धवाहप्पवाहा य तक्कालचउग्गुणीभूयं संताववेगं निरुंभिऊण भणिउमाढत्ता—अहो परमे-  
 सर! करुणापरो हवसु अम्ह जीवियवे, परिहरसु संपयं सबविरइंवंछं, एयंपि काऊण तुमए पाणिणो रक्खणिज्जा, ते  
 य जइ पढमंपि दुस्सहविओगकरवत्तभिज्जमाणहियया रक्खिज्जिस्संति ता किमजुत्तं होजा?, तुम्हेहिं रहिया नूणं  
 अवगयलोयणव्व अमुणियगम्मागम्मविभागा वइदेसिगा इव अणाहा खणमेत्तंपि न संधीरेमो अप्पाणंति, भगवया  
 भणियं—जइ एवं ता सम्ममालोचिऊण भणह—केत्तियकालेण तुम्हे ममं दिक्खागहणत्थमणुमन्निस्सह?, तेहिं  
 भणियं—संवच्छरदुगेणं अइगएणंति, भगवया जंपियं—एवं होउ, परं मम भोयणाइसु न तुम्हेहिं विसेसर्चिता कायवा,  
 तेहिं भणियं—एवं करिस्सामो, तओ तद्धिणाओ आरब्भ परिचत्तसवसावज्जवावारो सीओदगपरिवज्जणपरायणो  
 फासुयाहारभोई दुक्करवंभचेरपरिपालणपरो परिमुक्कण्हाणविलेवणपमुहसरीरसकारो फासुओदगेण कयहत्थपायपक्खा-  
 लणाइकायवो जिणिंदो ठिओ वरिसमेगं ॥ तर्हि च—

परिमुक्काभरणोऽविहु ण्हाणविलेवणविवज्जिओऽवि जिणो । जुगवुग्गयवारससूरतेयलच्छिं समुवहइ ॥ १ ॥

सयणोवरोहणेहेण धरियगिहसरिसवज्जवेसोऽवि । लक्खिज्जइ जयनाहो संजमरासिव पच्चक्खो ॥ २ ॥

सा कावि गिहगयस्सवि जिणस्स मज्झत्थया पवित्थरिया । जा निग्गहियमणाणवि मुणीण चित्तं चमक्केइ ॥ ३ ॥

अह वच्छरपज्जंते तिलोयचूडामणी महावीरो । वारिसियमहादाणं दाउं परिचिंतए जाव ॥ ४ ॥



श्रीगुणचंद  
महावीरच०  
४ प्रस्तावः

॥ १३४ ॥

सोहम्मदेवलोए सुहासणत्थस्स ताव सक्कस्स । रयणपहपसरपयडं झडत्ति सिंहासणं चलयं ॥ ६ ॥  
तच्चलणे ओहीए सो नाउं नाहमाणसविकप्पं । अइरभसभरवियंभियपुलउप्पीलंचियसरीरो ॥ ६ ॥  
सिंहासणाओ उट्टिय सत्तट्ट पयाइं संसुहं गंतुं । थोउं जएकनाहं चिंतेउमिमं समाढत्तो ॥ ७ ॥  
भयवं जिणवरवीरो आवरिसं दाणमीहए दाउं । तस्स य धणप्पयाणं जुज्जइ मह संपयं काउं ॥ ८ ॥  
इय चिंतिऊण जक्खं वेसमणं आणवेइ वज्जहरो । निक्खमणदाणजोग्गं खिव कणगं जिणगिहंमिति ॥ ९ ॥  
इमं च सोच्चा धरणिवट्टुचुंविणा मत्थएण पडिच्छिऊण सुरिंदसासणं कयकिच्चमप्पाणं मन्नंतो वेसमणो तिरि-  
यजंभगे देवे आणवेइ, तेऽवि तहत्ति विणएण पडिसुणित्ता जिणिंदमंदिरे तरुणतरणिसप्पगासं चामीयररासिं वरि-  
संति । तओ भयवं पइदियहं तियचउक्कचच्चरचउम्मुहमहापहपहेसु अन्नेसु य तहाविहट्टाणेसु बहूणं सणाहाण य  
अणाहाण य पंथियाण य करोडियाण य कप्पडियाण य वाहियाण य वइदेसियाण य रिणपीडियाण य दोगच्चसं-  
तावियाण य अन्नेसिंपि धणाभिलासीण अणिवारियप्पसरं वरवरियाओसणापुव्वयं कणगं सययं दवावेइ, तं च महया  
पवंधेण दिज्जमाणं अट्टलक्खाहिगएगहिरन्नकोडीमेत्तं एगदिणेणं निट्टविज्जइत्ति ।

अह मगहमसूरकलिंगवंगसोरट्टपमुहदेसेसु । अच्छिन्नसुवन्नमहापयाणओ पसरिया कित्ती ॥ १ ॥  
ताहे जंपंति जणा परोप्परं तेसु तेसु ठाणेसु । चल्लह लहु भयवंतं पेच्छामो तत्थ गंतूणं ॥ २ ॥

प्रतिज्ञा-  
पूर्तिः वार्षि-  
कदानम्०

॥ १३४ ॥

तवणिज्जपुंजलाभेण इह भवे विगयदुक्खमप्पाणं । कुणिमो परलोयंमि य तहंसणजणियपुत्तेण ॥ ३ ॥  
 परभवपरुद्धखरदुक्खनिवहसंतत्तसव्वगत्ताणं । अत्तो नत्थि उवाओत्ति अम्ह एसो हवउ सरणं ॥ ४ ॥  
 इय नेगेसुं मग्गणगणेसु इत्तेसु दूरदेसाओ । पूरियमणोरहेसुं अत्तेसु नियत्तमाणेसु ॥ ५ ॥  
 कुंडग्गामंमि पुरे रुंदासुवि तासु तासु रत्थासु । निहयनिदलियउरो दुक्खेण जणो परिब्भमइ ॥ ६ ॥  
 जत्थ निहाणे दिट्ठिं पम्हलधवलं परिक्खिचइ वीरो । दट्ठइ तत्थ हिरन्नं करुणारसमच्छरेणं व ॥ ७ ॥  
 अत्थिजणपरिबुडे जिणवरंमि गेहंगणे भमंतंमि । परिसकिरकप्पमहादुमव लक्खिज्जए पुहई ॥ ८ ॥  
 दाणे य जायणंमि य दायगतकुयजणेण सवत्थ । सरिसच्चिय उल्लावा वियंभिया देहि देहित्ति ॥ ९ ॥  
 एत्थ रयणुकर एसु ठवेह एत्थ य पवित्थरे वत्थे । पूरेह एत्थ तवणिज्जपुंजए मग्गणनिमित्तं ॥ १० ॥  
 इय दाणनिउत्तजणस्स पइदिणं किंकरे भणंतस्स । पुणरुत्तो वाचारो जाओ संवच्छरं जाव ॥ ११ ॥  
 अखलियपसरं सिरिजिणवरेण दिंतेण दुत्थियाण धणं । सेसाणवि पयडिज्जइ सिवपुरपंथो धुवं एस ॥ १२ ॥  
 सदावायनिवंधण धणेवि जो कुणइ मोहिओ मुच्छं । सो दुकरतवचरणे अत्ताणं कह व संठविही ? ॥ १३ ॥  
 ता जिणवराणुमाणेण सव्वविरइं समीहमाणेण । अत्तेणवि एवं चिय पयट्ठियच्चं सइ धणंमि ॥ १४ ॥  
 एवं च दाणे अणुदियहं पयट्ठमाणे नंदिवद्धणनरिंदो नियपुरिसे सदावेत्ता एवं आणवेइ-भो भद्दा ! एयस्स नय-

श्रीगुणचंद्र  
महावीरच०  
४ प्रस्तावः

॥ १३५ ॥

रस्स तेसु तेसु पएसेसु वहूओ महाणससालाओ काराविऊण विउलं असणपाणखाइमसाइमरूवं आहारं उवक्ख-  
डेह, तयणंतरं च जे जहागच्छंति खुहाभिभूया तण्हापरिसुसियकंठा पासंडत्था गिहत्था वा अन्ने वा तहारूवा  
तेसिं तहा आसत्थाणं सुहासणगयाणं हरिसुप्फुल्लोयणाणं तं चउव्विहंपि आहारं सव्वायरेण दवावेह, तहा ठाणे  
ठाणे मुंचह मंदभदाइजाइणो करिणो चउद्विसं संठवेह सूररहतुरयविन्भमे पवरतुरंगमे सवत्थ पयडह रहनिवहे  
पएसे पएसे मेल्लह पवरपट्टणुग्गए वत्थसमुदए दंसेह गामागराइणो संनिवेसे, एएहिंतो जो जं समीहेइ तस्स तं  
वियरहत्ति, जं देवो आणवेइत्ति भणिऊण निग्गया पुरिसा, समारद्धो सवत्थ नरिंदाएसाणुरूवो उवक्कमो । अह  
अनिवारियवेरिए समगणियरायरोरे अमंदाणंदसंदोहजणणे भगवओ पयट्ठे संवच्छरियमहादाणे एत्तियं अत्थो  
सव्वसंखाए गओ—

तिन्नेव य कोडिसया अट्ठासीयं च होंति कोडीओ । असियं च सयसहस्सा सव्वग्गेणं दविणसंखा ॥ १ ॥

इय मग्गणलोयं तप्पिऊण आवरिस कणगवरिसेण । पवज्जापडिवत्तिं कुणइ मणे जिणवरो वीरो ॥ २ ॥

अह बंभलोयकप्पे रिट्ठंमि विमाणपत्थडे विउले । दिवविमाणोवगया एए देवा महासोक्खा ॥ ३ ॥

सारस्सयमाइच्चा वण्ही वरुणा य गद्धतोया य । तुसिया अवावाहा अग्गिच्चा चेव रिट्ठा य ॥ ४ ॥

तक्खणविचलियसीहासणा य ओहीए नायनियकिच्चा । नियनियपरियणसद्धिया झडत्ति जिणपासमल्लीणा ॥ ५ ॥

विणयपणमंतमत्ययगलंतमंदारसुरदिकुसुमभरा । तत्थाहिं गिराहिं जिणं थोउं एवं समारद्धा ॥ ६ ॥  
 जयसि तुमं मयरद्वयसिंधुरस्वरनहरदारुणमइंद ! । चलणग्गचालियाचलसंखोभियसधरधरणियल ! ॥ ७ ॥  
 नियकजपरंमुहभुवणरक्खणक्खणिय ! परमकारुणिय । नायकुलकमलवणसंडचंडमार्यंड ! तुज्झ नमो ॥ ८ ॥  
 जह लोयालोयगयंपि नाह ! तं मुणसि वत्थुपरमत्थं । तह किं कयाइ जाणइ मंदमई मारिसो लोओ ? ॥ ९ ॥  
 अहया हेलुल्लासियकरपसरनिरुद्धतिमिरनियरस्स । सूरस्स पुरो खज्जोयगाण का होइ देहपहा ? ॥ १० ॥  
 तहवि य निययाहिगारं नाह ! कलिऊण नूणमम्हेहिं । सुमरणमेत्तनिमित्तेण तुह इमं सीसए किंपि (सामी) ॥ ११ ॥  
 पपजं पडियज्जसु भवरुयसंतत्तगत्तसत्ताणं । तित्थंकर ! तित्थमणत्थमंथणं लहु पयट्ठेसु ॥ १२ ॥  
 अइमूढकुतित्थियदुट्ठदेसणात्तिमिरनियरअंतरियं । पयडेसु मोक्खमग्गं निरुवमनाणप्पईवेण ॥ १३ ॥  
 अइभूरिविचित्ताइसयरयणकारुत्तवारिभरियाओ । वयणामयं पणिण्हउ लोओ तुह सायराउव ॥ १४ ॥  
 निस्सामन्नं सामन्नभावमायन्निऊण सयलजणो । रोमंचकंचुइल्लो आकप्पं तुह कहं कहउ ॥ १५ ॥  
 इय सविणयदेवगणोचइट्ठकायवदुगुणिउल्लासो । जाओ जएक्कचक्खू सविसेसं मोक्खसोक्खमई ॥ १६ ॥  
 एवं च विन्नविऊण सट्ठाणं गएसु लोगतियतियसेसु उट्ठिऊण भयवं सीहासणाओ पासवत्तिणा परियणेण अणु-  
 गम्ममाणो गओ नंदिवद्धणपमुहाणं नायखत्तियाणं समीवे, तेऽवि जिणमितं दट्ठूण सत्तट्ठ पयाइं गया सम्मुहं, कया

श्रीगुणचंद  
महावीरच०  
४ प्रस्तावः

॥ १३६ ॥

उचियपडिवत्ती, दवावियं महप्पमाणं सिंहासणं, निसन्नो जिणो, अणुरुवासणेसु य जहक्कमं उवविट्ठा नंदिवट्ठणाइणो ।  
तओ ते भगवया अमयविंदुसंदोहसुंदरीए सभावमहुराए अपुणरुत्ताए गंभीराए भारईए भणिया, जहा-भो देवाणु-  
प्पिया ! पडिपुत्तो तुम्हाणमवही, जाओ पत्थावो मम सव्विरइपडिवत्तीए, ता सहरिसं अणुमन्नह इयाणिं, सुयह  
पेमाणुबंधं, निट्ठुरं कुणह विओगकायरं नियमणंति, ते य एवमायन्निउण गाढमणुपरिपूरिज्जमाणगलसरणिणो कह-  
कहवि निरुद्धसोगावेगा अणवरयनिस्सरंतनयणंसुविंदुजालच्छलेण पणयप्पभारं व चिरं उग्गिरिऊण भणिउमाढत्ता  
-भयवं ! तुम्ह एवं भणंता वज्जमया धुवं अम्ह सवणा जं न संपत्ता बहिरत्तणं, वइरसारप्परमाणुविणिम्मियं हिययं  
जं न वच्चइ तडत्ति सयसिक्करत्तणं, निहक्खिन्नत्तणपरमसंदिरं व सरीरमिमं जमज्जवि न पवज्जइ रसायलगमणं, एवं  
ठिए य कहं पत्थुयत्थाणुमन्नणनिमित्तं पयट्ठउ वराइणी वाणी, जओ-को होही विसमकज्जोयहिनिवडिराण अम्ह  
हत्थावलंबो ? कहं वा ससुरासुरनरनरिंदसंदोहवंदणिज्जपायपंकेरुहेण तुमए विरहियं भुवणत्तयपयंडं सोहिस्सइ  
नायखत्तियकुलं ? अहो महामंदभागिणो अम्हे जेसिं करयलाओऽवि अवक्कमइ रयणंति, एवमाईणि कलुणवयणाणि  
भासिऊण निरभिलासा चेव निवडिऊण चलणेसु भगवओ विव्रत्तिं काउं पवत्ता—

जइवि जिणनाह ! तुम्हे पवज्जं काउमुज्जमह इण्हि । तहविहु अम्ह सुहट्ठा पडिवज्जह निक्खमणमहिमं ॥ १ ॥

तेसिं उवरोहेणं तओ जिणिंदो इमं पि पडिसुणइ । अब्भत्थणभंगपरंमुहाइं हिययाइं गरुयाणं ॥ २ ॥

गुरूणाम-  
नुज्ञा.

॥ १३६ ॥

अह नंदिवद्धनरिदेण भणिया नियपुरिसा-अरे सिग्घं महरिहं भगवओ अणुरूवं अभिसेओवंगरणं उवाह-  
 रेह, जं देवो भणइत्ति सम्मं पंडिसुणिऊण निग्गया पुरिसा, पउणीकया अट्ठोत्तरसहस्ससंखा अणेगे सुवन्नाइ-  
 कलसा, उवाहरियाइं समत्थपसत्थित्थसमुत्थाइं सलिलाइं, उवणीयाओ परमोसहीओ, पणामिया गोसीसचंद-  
 णाइविलेयणविसेसा, एत्थंतरे चलियासणा वत्तीसंपि पुरंदरा विम्बियमणा ओहिणाणसामत्थमुणियपरमत्था  
 तक्खणं महप्पमाणविमाणा रूढा वियसियसयवत्तविसाललोयणा अहचंदणाणुलित्तगत्ता नियंसियंसिलंधपुप्फसुह-  
 फरिसपवरदूसरयणा कुंदसंखदलदगरयधवलदंतपंतिरेहंतवयणा अंजणपुंजघणमसिणरुयगरमणिज्जकेसंपासा भइजो-  
 वणे वट्टमाणा मऊहपडलपल्लवियचूडामणिपसाहियमत्थया अणेगरूवाभरणभूसियसरीरा सोमचारूवा छत्तचिंघाइ-  
 विविहककुहधारिणो असंखदेवकोडिचडगरपरियरिया पडहमुइंगकाहलतिलिंमहुडक्काइतूररवभरियंवरा जिणिंदस्स  
 अंतियं समागया, तिपयाहिणादाणपुवगं च पणमिऊण पराए भत्तीए पट्टणो पायपंकयं कयत्थमप्पाणं मन्नंता  
 जिणचरणमुद्दाविन्नाससुंदरे निसन्ना भवणंगणे ।

अह अचुयामरिदेण हरिसुलसंतदेहेण भणिया नियनियदेवा-भो सिग्घमेव निवत्तह जिणस्स महावीरस्स जोग्गं  
 महंतं निक्खमणाभिसेयं, ते य एयमायन्निऊण कयपणामा अणेगकणयाइकलसे खीरोयसलिलपडिपुत्ते असंखपुप्फप-  
 डलाइं च अन्नं च तहप्पगारमभिसेयपाओग्गं पहाणवत्थुनिवहं अचुयसुराहिवस्स पणामेति, तओ अचुयतियसाहिवो

श्रीगुणचंद्र  
महावीरच०  
४ प्रस्तावः

॥ १३७ ॥

सयलनियदेवपरियरिओ तेहिं दिवेहिं कणयाइकुंमेहिं अट्टसहस्ससंखेहिं दिवोसहिसुगंधगंधुम्मिस्सेहिं मंदिरट्टियं  
भयवंतं हरिसवियसियवयणो अभिसिंचइ, एवं कमेण सेसावि सुराहिवइणो चंदसूरपज्जंता ण्हवंति जयगुरुं, अह तेसु  
मज्जणं काऊण सट्ठाणट्टिएसु नंदिवद्धणो राया कयमुहकोसविन्नासो परेणं विणएणं अचंतमप्पमत्तचित्तो तेहिं पुवो-  
वणीएहिं चामीयराइकलससहस्सेहिं गंधुद्धुरपवरतित्थजलभरिएहिं मज्जेइ जिणवरं, तहा वट्टमाणे य भगवओ मज्ज-  
णमहूसवे केइ सुरिंदा चालिंति मंदं मंदं चामीयरदंडुडामराओ चामराओ केवि धारिंति नियधवल्लिमाविजियसिय-  
सयवत्ताइं आयवत्ताइं केवि संमुहमभिट्ठाविंति पणट्ठखंपणं पवरदप्पणं केवि करयलेणुवहंति सुगंधखीरोयसलिलपुत्र-  
पिहाणपउमगंधुकुडे कुडे केवि उप्पाडेति डज्झंतागुरुघणसारसुरहिधूवधूमंधयारलंछियं पंचवन्नरयणधूवकडुच्छुयं केवि  
समुवहंति परिमलमिलंतालिसामलाओ दसद्धवन्नकुसुममालाओ, अन्ने देवा य देवीओ य भगवंतं अभिमुहट्टियाओ पज्जु-  
वासिंति । अह निवत्तियम्मि मज्जणे नंदिवद्धणो राया दोचंपि उत्तरावक्कमणं सीहासणं विरयावेइ, तत्थट्टियं च भयवंतं  
सेयापीयकलसेहिं ण्हवेइ, तयणंतरं च णं अलंकारियस्स पुवाभिमुहसीहासणसन्निसन्नस्स सामिणो सुरभिसुकुमालंगंध-  
कासाइल्लहियसरीरस्स गोसीससरसचंदणचच्चियंगस्स परिहियनिरुवहयफलिहुज्जलदिवदेवदूसजुयलस्स निवद्धपंचराय-  
रयणकडिसुत्तयस्स कणगसेलसिलाविच्छिन्नवच्छत्थलघोलंतविमलमुत्ताहलकलावस्स विचित्तमणिखंडमंडियकुंडलुज्जो-  
वियगंडयलस्स रयणुकडकिरीडविभूसियसिरस्स पंचवन्नपुष्पमालालंकियस्स पाक्खित्तसुगंधवरवासस्स भगवओ वट्टमा-

मस्त बंदिऊण चलणजुयलं सुरासुरिंदा पुणो पुणो घरणियलनामिउत्तिमंगा आसीसासएहिं थुणिउं पवत्ता, कहं ?—

विजयसु जएकबंधव । ससुरासुरतिहुयणेणवि अजेयं । अचंतमहळं मोहमल्लमचिरेण लीलाए ॥ १ ॥

मिच्छत्तिमिरमुच्छिदिऊण सन्नाणसूरकिरणोहिं । पयडेसु मुत्तिमग्गं विमग्गलग्गाण भवाण ॥ २ ॥

पालेसु समणधम्मं चिरकालं जाव निग्गयपयावो । अजियं जिणेसु मज्झे जियस्स निवससु तुमं नाह । ॥ ३ ॥

तुह अणवरयं गुणनिवहकित्तणारावओ विवुहलोगो । सबत्तो दिसिवलयं पकुणउ कोऊहलाउलियं ॥ ४ ॥

तुज्झ जसो कुसुओयरगोरो भुवणत्तएवि हिंडंतो । सबत्तो उग्गयचंदविंवसोहं समुवहउ ॥ ५ ॥

सिंहस्स व तुह अचंतविक्रमं पेच्छिऊण तरलच्छा । भीया कुत्तित्थियमिगा एत्तो दूरे पलायंतु ॥ ६ ॥

इय आसीवायपुरस्सराहिं थुणिउं गिराहिं भुवणगुरुं । नट्टविहिं च पयट्ठिय विरयंमि सुरिंदविंदमि ॥ ७ ॥

भावियजयगुरुविरहग्गिदूमिओ नंदिवद्धणो राया । वाहरिउं नियपुरिसे पयंपिउं एवमाढत्तो ॥ ८ ॥

भो भो देवाणुपिया । जगपहुणो निमित्तं विसिद्धवेइगापरिक्खत्तपरिसरं सरसचंदणुम्मिस्सघुसिणरसालिहिय-  
विविहसत्थियं थिरनिवेसियसपायपीढनानामणिमयसीहासणं रणंतकणयकिंकिणीमहुरनिनायमुहलियदियंतरं रंगंत-  
विविहचिंधसयसंपुन्नं पन्नासघणुहायामं पणुवीसघणुविच्छिन्नं छत्तीसघणुमुच्चिद्धं चंदप्पभनामधेयं सीयं उवट्टवेहत्ति ।  
तओ ते सामिवयणं निसामिऊण पहिट्टहियया तहत्ति सव्वं निवत्तंति ।



श्रीगुणचंद्र  
महावीरच०  
४ प्रस्तावः  
॥ १३८ ॥

एतथंतरे तियसाहिवेण हरिसुल्लसंतहियएण । पवरमणिखंडमंडियमहंतखंभावलीकलिया ॥ १ ॥  
 पंचविहरयणकिरणोहविहियदिसिदिसिसुरिंदकोदंडा । चंदप्पभाए तुल्ला कारविया नियसुरेहिंतो ॥ २ ॥  
 भुवणच्छेरयभूया सिविगा लवंतमोत्तिओऊला । नवरं इमावि तं चिय पढमं सिविगं अणुपविट्ठा ॥ ३ ॥ त्रिभिर्विशेषकम् ॥  
 अह भयवं केसालंकारेण वत्थालंकारेण आभरणांकारेण मल्लालंकारेणालंकिओ कयल्लट्टतवोकम्मो उट्टिऊण आस-  
 णाओ अणुप्पयाहिणीकुणंतो चंदप्पहं सीयमारुहित्ता पुव्वाभिमुहंमि सीहासणे निसीयइ, तओ भयवओ कुलमहरिया  
 णहाया सूइभूया गहियपवरनेवत्था हंसलक्खणं साडयं आदाय सामिस्स दाहिणे पासे भद्दासणंमि निसन्ना, एवं  
 अम्मधाईवि वामपासे संठिया, तहा सामिस्स पिट्ठओ एगा वरतरुणी विचित्तसिंगारागारभूयं महंतं विमल-  
 मुत्ताजाललवंतावचूलयं पुंडरीयदंडं छत्तं धरेमाणी ठिया, उभयपासेसु य दुवे वरविलासिणीओ धोयरुप्पपट्टधवलं  
 चामरजुयलं गहाय संठियाओ, उत्तरपुरत्थिमंमि य भागे एगा अच्चंतदरिसणिज्जा विलया निम्मलसलिलपडिपुत्रं  
 सुरकरिकररेहंतनालागारं रययभिंगारमुव्वहंती निसन्ना, एवं दाहिणपुरत्थिमेणं एगा वरसुंदरी विचित्तमणिकिरण-  
 जालं सुयंतं कणयदंडं तालवंटं करयलेण कलयंती दूरूढा, पिट्ठओ य भुवणनाहस्स भगवओ देविंदा हिमरययकुंदे-  
 दुप्पगासाइं वेरुलियमयदंडाइं अट्टसहस्सकंचणसलागाइं सव्वरयणामयाइं कुसुमदामदंतुराइं आयवत्ताइं धरिंति,  
 उभयपासेसु चंदप्पहसीयाइ सोहम्माहिवो ईसाणो य अमयहिमफेणुपुंजसन्निगासेहिं चामरेहिं भयवंतं वीयंति ।

एत्यंतरे नंदिवद्धणनरवइणो वयणेण पवररूवा निरुवहयंगा ण्हाया कयविलेवणा परिहियपवरवत्था सवालंकार-  
मणहरसरीरा विसिद्धवलसालिणो समवया पुरिसा समूससियरोमंचकंचुया कयसवकायवा नीसेसपुन्नपगरिसमप्पाणं  
मन्नमाणा सहस्ससंखा झडत्ति आगंतूण तं सीयमुक्खिवंति, अह वचंतीए तीए सोहम्माहिवई सुराहिवो दाहिणिल्ल-  
मुवरिल्लवाहं गिण्हइ, ईसाणोऽवि देविंदो उत्तरिल्लवाहं, चमरवल्लिणो य असुरिंदा दाहिणुत्तरसिविगाहेट्टिल्लवाहाओ  
समुवहंति, अवसेसा भवणवइवाणमंतरजोइसवेमाणिया यं जहारिहं सीयमुक्खिवंति । किं बहुणा ?—

पुधिं उक्खित्ता माणुसेहिं साहट्टरोमकूवेहिं । पच्छा वहंति सीयं असुरिंदसुरिंदनागिंदा ॥ १ ॥

गेहांओ नीहरंते जिणंमि चाउघिहेहिं देवेहिं । इंतेहि य जंतेहि य कहमिव उच्चासियं गयणं ? ॥ २ ॥

वणसंडोव कुसुमिओ पउमसरो वा जहा सरयकाले । सोहइ कुसुमभरेणं इय गयणयलं सुरगणेहिं ॥ ३ ॥

सिद्धत्थवणं व जहा असणवणं सणवणं असोगवणं । चूयवणं व कुसुमियं इय गयणयलं सुरगणेहिं ॥ ४ ॥

अयसिवणं व कुसुमियं कणियारवणं व चंपगवणं वा । तिलयवणं व कुसुमियं इय गयणयलं सुरगणेहिं ॥ ५ ॥

वरपडहभेरिल्लरिदुंदुभिसंखाइतूरनिग्घोसो । धरणियले गयणयले पयट्ठिओ देवमणुएहिं ॥ ६ ॥

एवं च भुवणबंधवस्स वचमाणस्स तप्पढमयाए सवयरणविणिम्मविया पुरओ अहाणुपुवीए सोत्थियाइणो  
अट्ठमंगलगा संपट्ठिया, तयणंतरं च पुन्नकलसभिंगारा दिवा सच्छत्तपडागा गयणतलचुंविणीओ पवणकंपमाणं-

श्रीगुणचंद  
महावीरच०  
४ प्रस्तावः

॥ १३९ ॥

चलाओ महावेजयंतियाओ संपट्टियाओ, तयणंतरं वेरुलियविमलदिप्पंतदंडं पलंवकोरिंटमालोवसोहियं चंदमंड-  
लाणुरूवं समूसियं दिवमायवत्तं, पवरसिंहासनं च समणिरयणपायवीढं मणिमयपाउयाजोगसंपजुत्तं बहुकिंकरनरपरि-  
ग्गहियं संपट्टियं, तयणंतरं च ललियपुलियलंघणजवणगईणं लोलंतलासगललामंवरभूसणाणं कणयमयमुहनिजोगजु-  
त्ताणं उज्जलगथासगमंडियकडीणं तरुणपुरिसपरिक्खित्ताणं अट्टसयं जचतुरगाणं अहाणुपुवीए संपट्टियं, तयणंतरं  
च सत्तंगपइट्टियाणं भद्जाइसमुब्भवाणं सबलक्खणोववेयाणं कंचणकोसीपविट्ठकलहोयधवलदंताणं कंचणमणि-  
तारगाभूसियाणं कुसलारोहसंपउत्ताणं अट्टसयं उत्तमकुंजराणं संपट्टियं, तयणंतरं च सल्लत्ताणं सज्झयाणं सघंटाणं  
सपडागाणं सतोरणवराणं सनंदिघोसाणं हिमवंतुग्गयतिणिसदारुनिम्मियाणं सुसिलिट्ठचक्रमंडलधुराणं जोत्तियपव-  
रतुरंगाणं रणज्झणंतकिंकिणीजालाणं वत्तीसतोणपरिमंडियाणं चावपमुहपहरणनिवहभरियाणं अट्टसयं रहाणं अहा-  
णुपुवीए संपट्टियं, तयणंतरं निविडपरियराणं करयलकलियविविहाउहाणं निययविक्कमोवहसियसेसभडाणं पुरिसा-  
णमट्टसयं संपट्टियं, तयणंतरं च अपरिगणियसंखं हयाणीयं गयाणीयं रहाणीयं पायत्ताणीयं च पहावियं, तयणंतरं  
च पंचवन्नकुंडभीसहस्सकलिओ वइरमयवट्टलट्टजट्टिपइट्टिओ विचित्तलत्ताइच्छत्तपरिक्खित्तो रंतंतभमरकुसुममाला-  
मंडिओ अनिलदोलिज्जमाणघंटियापडलमणहरारावपूरियनहविवरो जसपुंजोव मुत्तिमंतो मुत्तिमग्गोव पयडो नियगु-  
रुयत्तणेण गयणं व परिमिणंतो सायरसुरविसरसंपरिग्गहिओ जोयणसहस्सूसिओ महिंदज्झओ संपत्थिओ, तयणंतरं

निष्क्रमणो-  
त्सवः.

॥ १३९ ॥

च अन्ने य वहवे दंडिणो मुंडिणो सिंहंडिणो हासकरा खेडकरा चाडुकरा गायंता य वायंता य नचंता य रमंता य  
हसंता य जयजयसहं पउंजमाणा मंगलसहस्साइं कुणमाणा गुणगणं थुणमाणा संपत्थिया, तयणंतरं उग्गा भोगा  
रायन्ता सत्थिया सेट्ठिणो सत्यवाहा पुरिसनियरपरियरिया केइ पायविहारेणं केइ रहगया केइ तुरगाधिरूढा केइ कुंज-  
रपट्ठिसत्तिसत्ता केइ जाणजंपाणाइंगया सामिस्स पुरओ मग्गओ य संपट्ठिया, तयणंतरं अन्ने य वहवे देवा य  
देवीओ य सएहिं सएहिं विमाणेहिं सएहिं सएहिं चिंधेहिं सएहिं सएहिं परिवारेहिं समंतओ संपट्ठिया, नंदिवद्ध-  
णमहानरिंदोऽवि कयमज्जणो विहियसिंगारो गंधसिंधुरखंधगओ समूसियसियायवत्तो धुवंतधवलचामरो हयगयर-  
हओहसेणापरिकिन्नो पिट्ठओ भयवंतं अणुगंतुमारद्धो ।

एवं च नियनियट्ठाणगयसुरासुरनरनियराणुगम्ममाणो वद्धमाणो सत्तरयणिप्पमाणसरीरो समचउरंससंठाणसं-  
ठिओ वज्जरिसहनारायसंधयणो कमलुप्पलसुरहिनीसासो जल्लमलकलंकसेयरयदोसवज्जियतणू देहप्पभापब्भारभा-  
सुरियदिसिचक्कवालो भिंगनीलकज्जलभसलसामलपसत्थसुडुमनिवद्धनिउरंवनिचियकुंचियपयाहिणावत्तकेसो अद्धयं-  
दममनिडालवट्ठो पमाणजुत्तसुंदरसवणो चावदंडकुडिलभसुहो धवलपत्तलवियसियपुंडरियनयणो गरुडाययउज्जुतुं-  
गनासो विपक्काविंवाफलसंनिभाधरोट्ठो संखगोखीरमुत्तामणिधवलसुसिलिट्ठसमदंतपंती पीणमंसलकवोलजुयलो सज-  
लघणत्थणियदुंदुभिनिग्घोसगंभीरसरो दाहिणावत्तरेहावलयालंकियसुप्पमाणकंठकंदलो वणमहिससीहसहूलपडि-

पुन्नवद्वयं धो सुदुमलोमरेहंतमंसलपलंववाहुदंडो संजमलच्छिनिवाससुभगविसालवच्छत्यलो पवररोमराइरेहिरगंभी-  
रनाहिसोहियमज्झभागो वट्टाणुपुवोवचियचारुजंधो सुसिलिङ्गुगुणुंफो नगनगरमगरसागरचक्रंकुसमच्छाइलक्खण-  
लंछियचलणतलो परिचत्तपाणभोयणेषु पासायसिहरमारूढेषु चेलुक्खेवं करेतेसु पुरजणेषु कुसुमनियरं मुंचमाणेषु  
गयणट्टियतियसेसु सप्पणयपणचमाणासु विज्जाहरीसु मंगलमुहलेसु वारविलयासत्थेसु दिज्जमाणेषु सवकासुयदा-  
णेषु गोत्तमुक्कित्तमाणेषु देवचारणेषु कमेण संपत्तो नायसंडाभिहाणंसुववणंसि । तं च केरिसं ?—

पढमुम्मिल्लिरपल्लवसोहिल्लमहल्लपायवसमूहं । सवोउयकुसुमसमिद्धगंधवायंतमिउपवणं ॥ १ ॥

तरुणतरुसंडपत्तलसाहापडिरुद्धसूरकरपसरं । अचंतरम्मयागुणरंजियपरिभमियसुरखयरं ॥ २ ॥

दिसिमुहपवियंभियकुसुमपरिमलायट्टिया भमरनियरा । उज्जाणंतरविहरणपरंसुहा जत्थ कीलंति ॥ ३ ॥

जं जिणमितं नाऊण पवणडोलंतपल्लवकरोहिं । चिरकालदिट्ठपियमाणुसं व तं वाहरइ तुरियं ॥ ४ ॥

मयभरपरवससिहिकलरवेण जं सागयं व वागरइ । निवडंतकुसुमनियरुक्केण अग्धंव दावेइ ॥ ५ ॥

इय निययचंगिमाविजियनंदणुज्जाणरम्मयगुणस्स । जयनाहचलणपूयस्स तस्स का वण्णणा होउ ? ॥ ६ ॥

एवंविहंसि तत्थ आगंतूण सिवियाओ ओयरिऊण सामी असोगवरपायवस्स मूले सयमेव अलंकारकुसुमनिवहं  
ओमुयइ, सा य कुलमयहरिया हंसलक्खणेणं पवरसाडएणं तं पेच्छमाणी छिन्नमुत्ताकलावगलंतमुत्ताहलविब्भमाइं

अंसुयाइं विणिम्भुयमाणी सदुक्खं रोयमाणी मन्नुभरखलंतक्खराए गिराए भंयवंतं मणिउं पवत्ता—

कासवगोत्तुम्भूओऽसि पुत्त ! सिद्धत्थपत्थिवसुओऽसि । नायकुलनहयलामलसंरयरयणीमयंकोऽसि ॥ १ ॥

वासिद्वसगोत्तुम्भवतिसलादेवीए कुच्छिजाओऽसि । खत्तियजणतिलओऽसि य नवजोवणदिघदेहोऽसि ॥ २ ॥

गम्भायत्थाओचिय अइसुकुमालोऽसि सुंदरंगोऽसि । अप्पडिमरूवलायन्नकंतिपम्भारकलिओऽसि ॥ ३ ॥

तिहुयणचिक्खायजसोऽसि सयलविन्नाणनीइनिउणोऽसि । ता कहमिममइदुक्करतवकम्मं संपवज्जिहिसि ? ॥ ४ ॥

इह असिघारसरिच्छं महघयं वच्छ ! अणुचरेयघं । घोरोवसग्गवेयणनिवहाओ न भाइयघं च ॥ ५ ॥

सुदुंल्लतुच्छभोयणवित्ती निचं पि एत्थ कायघा । गामागराइसु तहा पडिवंधमई विमोत्तघा ॥ ६ ॥

इय वच्छ ! तुज्झ साहेमि केत्तियं मुणियसयलभावस्स । तह कहवि पयट्ठेज्जसु जह सिवसोक्खं लहुं लहसि ॥ ७ ॥

एत्थंतरंमि नीसेससयणवग्गेण परिगओ राया । आणंदामंदगलंतनयणवाहप्पवाहेण ॥ ८ ॥

अभियंदिऊण चरणे जिणिंदसिरिवद्धमाणसामिस्स । एगंतमवकंतो दुस्सहविरहग्गिसंततो ॥ ९ ॥

कुलमयहरियावयणं तहत्ति पडिसुणिय जिणवरो वीरो । सयमेव पंचमुट्ठियलोयं काउं समारद्धो ॥ १० ॥

ते य केसे सामिकरयलपल्हत्थिए सुरिंदो नियदेवदूसंचलेण ईसिविणमियसरीरो सम्मं पडिच्छइ, कमेण य निघत्ति-  
यंमि लोयकम्मे जिणं अणुन्नविऊण तं कुंतलकलावं मेहपडलं व सामलं दुज्जणहिययं व कुडिलं खीरोयसलिले पक्खिवइ,

श्रीगुणचंद  
महावीरच०  
४ प्रस्तावः

॥ १४१ ॥

श्रीवीरस्य  
दीक्षाक-  
ल्याणकम्.

॥ १४१ ॥

दिवतूरनिनायं मणुस्समंगलग्गारहलवोलं च निवारेइ, अह मग्गसिरकिण्हदसमीए पच्छिमण्हसमए हत्थुत्तरनक्खत्ते वट्ट-  
माणे सयमेव संबुद्धो भयवं नमोत्थु णं सिद्धाणंतिकट्टु करेमि सामाइयंसवं सावज्जं तिविहं तिविहेणं वोसिरामित्ति चारित्तं  
पडिवज्जए, एत्थ य पत्थावे अंवरत्तलट्ठिण्ण भूमितलग्गणय देवदेविविज्जाहरनरविसरेण विमुक्को भगवओ चाउद्दिसिंपि  
झंकारमुहलभसलविलुप्पमाणो सुगंधियसयलजीवलोओ पिंगलियगयणमंडलो पवरवासचुत्तो, वहलधूमसिहाजालुच्छा-  
इयदिसामुहो ठाणठाणेसु ठविओ उज्झंतागुरुकुरंगमयमीणुग्गारकप्पूरधूवघडियनिवहो, पहयाओ असंखसंखघोसु-  
म्मिस्सभंभासुइंगमदलकाहलातिलिमहुडुकढकाओ, कओ य निब्भरभरियमुवणंतरालो जयजयारवोत्ति ॥

अह चत्तवसणभूसणमल्लस्स पुरंदरेण जयगुरुणो । वामंसतले नसियं अदूसियं देववरदूसं ॥ १ ॥

नीसामन्ने सामन्नगुरुभरे तह जिणेण उक्खित्ते । काउं साहिज्जंपिव मणपज्जवणाणमुप्पण्णं ॥ २ ॥

ओलंबियभुयपरिहो वाढं निक्कसियमोहमाहप्पो । मेरुव निप्पकंपो काउस्सग्गे ठिओ भयवं ॥ ३ ॥

चउविहदेवनिकाओ नगरजणो नरवई य नमिऊण । जयनाहं भत्तीए नियनियठाणे पडिनियत्तो ॥ ४ ॥

इय उत्तमगुणगणवद्धमाणसिरिवद्धमाणचरियंमि । सग्गापवग्गसंगमलच्छीण निवासभवणंमि ॥ ५ ॥

गव्भावयारजम्मणदिक्खाकल्लाणकहणपडिवद्धो । संपत्तो पज्जंतं चउत्थओ एस पत्थावो ॥ ६ ॥

इइं सिरिगुणचंदसूरिरइए सिरिमहावीरचरिए गव्भावयारजम्मदिक्खाकल्लाणगमओ चउत्थो पत्थावो

भाविमणत्तयसत्तं पेहंताविडु सेवुद्धिविहवेण । धीरा सहसिमणिसं पत्थुयवत्थुं समत्थंति ॥ १ ॥

इति विभाविऊणं व भविस्सोवसग्गवग्गसंसग्गासंखुद्धमाणसो महावीरजिणवरो गंभीरिमाइगुणरयणागरो  
दुरुज्झियनीसेसवसणोवि वासवोवरोहधरिएक्कचारुवसणो मग्गणगणपूरिआसोऽवि निव्वाणकरो सुक्कतुरयचारोवि दूर-  
दमियदुट्ठिदियासो सकलत्तोऽवि परिचत्तपरिग्गहो परिहरियकरिवरोवि मत्तकुंजरगमणो भयवं आपुच्छिऊण अहास-  
त्तिहियं नायवग्गं नायसंडवणाओ निग्गओ, कमेण य अतुरियं जुगमित्तनिहितचक्खुपसरो मुहुत्तावसेसंमि वासरे  
कुम्मारगामं नाम संनिवेसं पाविओ, ठिओ य एगंते काउसग्गेणंति ।

इओ च सिद्धत्थरायवालवयस्सो कुंडगामपुरवत्थवो महाजूयवसणविणासियासेसतहाविहदधनिचओ भोगोव-  
भोगलालसो असंपज्जंतवंछियत्थो सोमो नाम वंभणो झीणविहवत्तणेण अचयंतो परिचियजणमज्झे निवसिऊण  
गिहे मोत्तूण वंभणिं गओ वइरागराइसु दवोवज्जणनिमित्तं, तत्थ य अइनिविडत्तणओ अंतराइयकम्मस्स अचंतपव-  
लत्तणओ असायवेयणिज्जस्स निप्फलत्तणओ पुरिसयारस्स अवस्सं भवियद्वयाए तहाविहभावस्स सुचिरं कालं परि-  
भमियस्सवि तेसु तेसु ठाणेषु न तस्स काणकवड्डयमेत्तावि संपत्ती जाया, समइक्कंताणि य आसापिसायनडियस्स  
वह्मं वच्छराइं, अण्णया य—

धवलवलायादीहरवयणो अह तरलियविज्जुलियनयणो । कलियसुररायचावो अंजणगिरिसिंगसारिच्छो ॥ २ ॥



परिमुक्कगजिघोरट्टहासहयविरहियहिययवावारो । वरिसायालो वेयालदारुणो झत्ति संपत्तो ॥ २ ॥  
तं च दट्टूण सो सुमरियनियकलत्तो तक्कालवियंभमाणनीलकंठरवसवणचउग्गुणीकयउकंठो दीहं नीससिऊण चलिओ  
अविलंबियपयाणगेहिं सनयराभिसुहं, अइदूरत्तणेणं मग्गस्स दुव्वलत्तणओ सरीरस्स असमत्थत्तणेणं सिग्घगमणस्स  
मासपंचमपज्जंते संपत्तो कुंडग्गामे नगरे, पविट्ठो नियगिहे, संभावियविट्ठत्तदवाए अब्भुट्ठिओ पणइणीए, दिण्णं  
आसणं, पक्खालिया चरणा, पुच्छिओ सरीरकोसलं, वाहियं सरीरं, दंसिओ पणयभावो, भोयणकाले य उवट्ठा-  
विया य कंठिगाइ हट्ठे विणिवट्ठिऊण विचित्ता रसवई, काराविओ भोयणं, तदुत्तरकालं ठिओ सयणिज्जे, वंभणीवि  
पहिट्ठहियया समीवमागया तस्स, आरद्धा य पुच्छिउं, जहा-अज्जपुत्त ! केसु केसु देसंतरेसु परिभमिओ एत्तियं  
कालं ? केत्तियं वा दविणजायमज्जियंति ? तेण भणियं-पिए ! केत्तिए साहेमि देसे ?, किं वा कहेमि दविण-  
ज्जणं ? तद्वाहि—

सिरिपवयवइरागरसमुदपरतीररोहणगिरीसु । रसकूविगासु विवरेसु भुयंगभीमेसु विविहेसु ॥ १ ॥  
भमिओ एत्तियकालं दवपिवासाए णेगठाणेसुं । विहिओ य खन्नवाओ धमिया य सुवण्णपाहाणा ॥ २ ॥  
अंजणसिद्धिनिमित्तं दिवोसहिणो निरुविया बहुसो । विहिया नरिंदसेवा वियाणिया मंततंताई ॥ ३ ॥  
असिचावकुंतचक्काइएसु सत्थेसु जणपसिद्धेसु । पक्को परिस्समोविहु किं किं अहवा मए न कयं ? ॥ ४ ॥

तहविहु पिए ! न जाया भोयणमेत्तावि मज्झ सामग्गी । तुह दंसणतण्हाए नियत्तिओ केवलं इण्हि ॥ ५ ॥

इमं च आयणिणऊण यज्जताडियव सुसियव सा माहणी कसिणवयणा कोवफुरंताहरा रत्तनयणा भणिउमाढत्ता-आ पाचिट्ठ ! अवलक्खणसिरसेहर ! वाहणसरिच्छ ! निब्भग्गनिडाल ! जह एवं ता कीस एत्तियं कालं कडुघोसेडीफलाइं वुक्कमाणो ठिओऽसि !, किं निरास ! तत्थ वसंतेण तुमए इमावि वत्ता न निसामिया ? जहा पोक्खलावट्ठगमेहोव अणवरयकणगधाराहिं सिद्धत्थनरिंदनंदणो संवच्छरं जाव वरवरियापुवगं वरिसिओत्ति, किन्न पेच्छसि पुरओ आज-म्मदारिदियावि रहतुरयवाहणा परिहियदिवाभरणा कारियउत्तुंगभवणा नियपणइणीपरिगया जिणप्पसाएण विल-संति ?, किं वा न दिट्ठा पडिपुण्णमणोरहा उवलद्धकणयरासिणो सगिहेसु पडिनियत्तंता देसंतरागयजणा ?, वंभ-णेण भणियं-पिए ! दूरदेसंतरनिवासत्तणेण नो सुणियमेयं मए, किं करेमि विपरंमुहो हयविही दीहकालमणुभ-वियवा विसमदसा, वंभणीए भणियं-अज्जवि लहुं गच्छसु तस्स सगासे, करुणापरो खु सो भयवं निच्छियं तुमए मग्गिज्जमाणो किंपि दाविस्सइत्ति, एवं निसामिऊण धाविओ महावेगेण जिणाभिमुहो वंभणो, आपुच्छंतो पत्तो कुमारगामं, दिट्ठो काउस्सग्गठिओ सुरवइनिहित्तसुगंधचुण्णपरिमलुम्मिलंतच्छप्पयच्छण्णदेहो भयवं जिणवरो, तिपया-हिणिकाऊण पणमिओ परमायरेणं, विण्णत्तो य जहा-देव ! निसामेसु मम वत्तं-

कंठभंतरपक्खलियजीहमफुडक्खराए वाणीए । को को न पत्थिओ नाह ! दाणविपरंमुहोवि जणो ? ॥ १ ॥

श्रीगुणचंद  
महावीरच०  
५ प्रस्तावः  
॥ १४३ ॥

कथं न वसिओ पहधूलिधूसरो देव ! पहियगेहेसुं । हयउयरपूरणट्टा किं वा न कयं कुकम्ममवि ? ॥ २ ॥  
दविणोवज्जणहेउं लहुं पविट्ठो कयंतवयणेवि । नेवत्थंपि नडेण व तं नत्थि मए न जं धरियं ॥ ३ ॥  
इय दूरदेसविहरणपरिसमुप्पन्नविविहारोगस्स । विगओ एत्तियमेत्तो कालो मम मंदपुन्नस्स ॥ ४ ॥  
संपइ पुण धरिणीए आगयमेत्तस्स साहियं एयं । जह संवच्छरसीमं दिन्नं तुमए महादाणं ॥ ५ ॥  
केसिंपि नगरपट्टणगामागरपवरदवभंडारा । अन्नेसिं मयजलगंधवंधुरा उद्धुरा करिणो ॥ ६ ॥  
अन्नेसिं पारसवच्चरउलवलहीयसंभवा तुरया । केसिंपि जचकंचणजडिया वरभूसणुग्घाया ॥ ७ ॥  
इय संकप्पियभूरिप्पभेयदाणेण कप्पतरुणव । निम्महिया नाह ! तए तण्हा मेहेण व जणाणं ॥ ८ ॥  
एकोच्चिय दुग्गयलोयतिलोयभूओ ठिओ अहं विहलो । पुवभवजणियदुविसहदुट्ठकम्माणुभावेणं ॥ ९ ॥  
करुणारसवरिसणसित्तदुक्खसंतत्तसवभुवणवण ! । ता पसिय पणयवच्छल ! पूरेसु मणोरहं मज्झ ॥ १० ॥  
तुज्झ पयकमलसेवावियंभियं सग्गमचपायाले । जं कीलंति जहिच्छं सुरवइनरनाहदणुवइणो ॥ ११ ॥  
सिद्धत्थरायनंदण ! तुमएऽविहु जइ कहंपि चत्तोऽहं । पायालनिवडियस्स वि नत्थि धुवं ता मम परित्ता (धरिती) १२  
एमाइ दीणयावसगलंतनयणंसुधोयवयणेणं । तह तेण विन्नविज्जइ जह भिज्जइ वीयरगोऽवि ॥ १३ ॥  
भगवयावि एवमायणिऊण समुच्छलियापरिकलियकारुन्नपुण्णचित्तेण भणियं—भो भो देवाणुप्पिय ! परिचत्ता-

सोम-  
विज्ञप्तिः

॥ १४३ ॥

सेससंगोऽहं संपयं, तुमं च अचंतदोगचभरविडुरियसरीरो, अओ जइवि असारिच्छमेयं तहावि गिण्हसु इमस्स देव-  
दूसस्स अद्धंति, जं सामि ! आणवेइत्ति भणिऊण हरिसवसुग्गयवहलपुलओ वंभणो वत्थस्स अद्धं गहिऊण कयप्प-  
णामो अणुचिंतंतो पुणो पुणो सामिस्स अपुच्चमु दारत्तणं गओ नियगेहं, दिट्ठो य वंभणीए, पुच्छिओ परमायरेणं,  
साहिओ तेण देवदूसद्धलाभो, जाओ वंभणीए परमसंतोसो ।

अन्नदिवसे य तेणवि समप्पियं तं दूसद्धं दसिगावंधणत्थं तुन्नागस्स, तेणवि तारिसमदिट्ठपुच्चं पेच्छिऊण  
पुच्छिओ सो वंभणो-भइ ! तुमए कहिं लद्धमेयं ?, न जेण एरिसदूसाइं महीयले दीसंति, वंभणेण भणियं-मुद्ध !  
भगवया दिण्णंति, तुण्णागेण भणियं-वीयंपि खंडमाणेहि, जेण उभयखंडमीलणेण तुण्णेमि एयं, पडिपुण्णं व दीणा-  
रलक्खमुलं पावेइ, अद्धेण य तुज्झ ममंपि दवं भविस्सइत्ति, वंभणेण भणियं-कहं पुण दुइज्जयं वत्थद्धं लभि-  
स्सामि ?, जिणसमायारवियक्खणेण भणियं तुन्नागेण-जया खाणुगाइफरिसेण सामिखंधेसाओ निवडइ  
तया गिण्हिज्जासि, एवं सोचा सो तल्लोभेण लग्गो भगवओ पिट्ठीए, जहा य तस्स तल्लाभो भविस्सइ  
तहा पुरओ भणिस्सामि ।

अह कुम्मारगामवहिया पडिवन्नपडिमस्स पलंविधुयस्स भगवओ महावीरस्स समीवे सयलदिणवाहपरिस्संतंते छुहा-  
भिहए चरमाणे वसहे भलाविऊण एगो अचंतपावसंगयसरीरो विणयणयविण्णाणजा(ना)णविवज्जिओ गोवालो गावी-

श्रीगुणचंद  
महावीरच०  
५ प्रस्तावः

॥ १४४ ॥

दुहणनिमित्तं गओ गाममज्झे, तत्थ द्वियस्स वावारंतरवावडणेण लग्गा सहती वेला, ते य वइल्लगा खणमेकं भगवओ समीवे चरिऊण खुहाभिहयसरीरा सणियं सणियं तिणभक्खणं कुणमाणा पविट्ठा अडविं, सो य गोवालो खणंतरेण आगओ भगवओ समीवे, वसहे अपेच्छंतो पुच्छिउमारद्धो-भो देवज्जया ! जे तुह मए भलाविया पुवं वसहा ते साहेसु कत्थ गयत्ति?, सामीवि असुणितोव तुण्हको ठिओ, तेणावि नायं-नूणमेसो महाणुभावो न जाणइत्ति, तओ गिरिकंदरेसु य नईसु य निज्जरेसु य महातरुगहणेसु य गामंतरालेसु य अन्नेसु य विविहप्पएसेसु य गोसामि-यभयभीओ विमणहुम्मणो तं मग्गणं काउमारद्धो, ते य वसहा सुचिरं सच्छंदप्पयारेण उवसंतखुहावेयणा पुणोवि समागया तत्थेव पएसे, भयवंतं दट्ठूण रोमंथता य ठियत्ति, सो य गोवालो अणुवलद्धगोणपउत्तिविसेसो चउपहर-रयणिजागरपरिमिलाणनयणो रेणुभरधूसरियसरीरो खाणुकंटगाइपरिवहिओ सुचिरं परिभमिऊण वलिओ तेणेव पएसेण, दिट्ठा य ते सामिणो समीवे सुहनिसन्ना नियवसहा, अह रोसारुणियच्छो फरुसगिराए भयवंतं तज्जिउमा-ढत्तो, कहं चिय?—

देवज्ज ! दुज्जणो इव दावेसि पसंतवत्यनेवत्थं । अन्धितरओ पुण चित्तकुडिलया एरिसी तुज्ज ॥ १ ॥  
जं गोविऊण हरणट्ठया तुमं मज्झ संतिए वसहे । नूणमियाणिं गच्छंतओऽसि जइ मं न पेच्छंतो ॥ २ ॥  
तावित्थ चंगिमा तुह वयस्स ! अरि भल्लिमा विवेयस्स । गोमट्ठत्तणमण्णं किंपिय दक्खिन्नभावस्स ॥ ३ ॥

वत्तार्धदानं  
गोपोपसर्गः

॥ १४४ ॥

मन्त्रे पलं वियमुओ निरुद्धनीसेसवज्झवावारो । तं जणमुसणनिमित्तं उवांयजाळं विचिंतेसि ॥ ४ ॥

इयं दुवयणेहिं तज्जिऊण सो दावणेण हणिउमणो गोवालो वेयालोव धाविओ भयवओऽभिमुहं, एत्थंतरे सोह-  
म्मसभासीहासणनिसण्णो सहस्सनयणो सामिस्स सुहविहारोवलंभनिमित्तं ओहिं पउंजइ पेच्छइ य भयवंतं पडुच  
वेगेण धायमाणं तं गोचयं, तओ तत्थद्विओऽवि तं थंभिऊण सको दिवाए देवगईए उइण्णो जिणसमीवे, तज्जि-  
उमारद्धो य तं गोवालंयं, जहा-रे दुरायार! पुरिसाहम! पसुनिच्चिमेस! नूणं एयाण वसभाण चेव पुण्णेहिं न  
भक्खेसि तुमं तिणाइं, जो एयं सिद्धत्थनरिंदनंदणं परिचत्तकरितुरयपाइक्कसंदणं संपयमेव गहियपच्चजं नियधम्मक-  
जसज्जं सममुणियतणमणिं वद्धमाणमहामुणिंपि न मुणेसित्ति, एवं निब्भच्छिऊण तं सको तिपयाहिणीकाऊण भय-  
वंतं वंदेइ, सिरनभियकरकमलो य विन्नवेइ-भयवं! तुम्ह दुवालस वरिसाणि जाव समणमेत्तेणवि दुक्खजणगा इयर-  
जणजीवियंतकरणखमा पवरसूराणवि लोमुद्धोसजणगा उग्गा उवसग्गवग्गा भविस्संति, ता कुणह पसायं, अणु-  
मन्नइ एत्तियं फालं मम, जेण समीवद्विओ वेयावचं भे करेमिति, एयं च आयत्तिऊणुस्सारियकाउसरगेण भणियं  
भयवया, जहा-भो भो देविंद!

तुह असरिसमत्तिमहाभरस्स जुज्जइ इमं न संदेहो । किं तु न भूयं एयं नो भवइ न भावि कइयावि ॥ १ ॥

जं तित्थयरा तुम्हारिसस्स निस्साए पुवकयकम्मं । खवइंसु खविस्संति य खवेति वा निच्छियं सकं ॥ २ ॥

अह परसामत्थेणवि जइ कम्मक्खउ घडेज्ज ता विहलो । सिरलोयवंभचेराइविविहतवचरणवावारो ॥ ३ ॥  
 अइसंकिलिद्धचित्तत्तणेण दढवद्धरसविवागाणं । सयमणुभवनं मोत्तुं कम्माणं ण णिज्जरणमत्थि ॥ ४ ॥  
 एगोच्चिय सुहमसुहं एस जिओ सहइ कम्मवसवत्ती । अवयारुवयारकरा तस्सेव पभावओ हुंति ॥ ५ ॥  
 ता जे पुवं सिद्धा जे सिज्झिस्संति जे य सिज्झंति । ते नियवीरियंकम्मक्खएण अन्नोऽत्थि नोवाओ ॥ ६ ॥  
 एवंविह विविहमहोवसग्गवग्गं वियाणिउं पुवं । पडिवन्नोऽहं संजममेत्तो का तेसु मम गणणा ? ॥ ७ ॥  
 इय सुरनाहं विविहोवउत्तिजुत्तीहिं बोहिउं भयवं । काउस्सग्गंमि ठिओ नूणं मियभासिणो गरुया ॥ ८ ॥  
 एत्थ य पत्थावे भयवओ चेव जणणिभगिणीए पुत्तो कयतहाविहघोरवालतवविसेससामत्थोवलद्धवंतरसुरभवो सि-  
 द्धत्थो नाम देवो समागओ तं पएसं, सो य भणिओ सुरिंदेण जहा-भो सिद्धत्थय ! एस भयवं तुह आसन्नसयणोत्ति  
 एगं कारणं, वीयं पुण ममाएसो, ता सबहा पासट्ठिओ सामिस्स मारणंतियमुवसग्गं पडिक्खलेज्जासित्ति, सोऽवि  
 एयमायन्निऊण देविंदसंभासणजायपरमतोसो तहत्ति पडिसुणइ, पुरंदरोऽवि सट्ठाणं गओ । अह जायंमि पभायसमए  
 भयवं चलिओ तओ ठाणाओ, कमेण य पत्तो कोल्लागसंनिवेसे, तत्थ य बहुलो नाम माहणो परिवसइ, तस्स य  
 गिहे महुसवो समारद्धो, निप्फाइया रसवई, जेमेइ सयलजणो, एत्थंतरे भयवं सुणियभिक्षासमओ अतुरियं  
 असंभंतो छट्ठपारणगे पविट्ठो भिक्षानिमित्तं गाममज्जे, उच्चनीयगिहेसु य परिभमंतो संपत्तो बहुलस्स मंदिरं, दिट्ठो

य जणेण अप्पडिमरूवो भयवं भयणंगणगओ, तं च दद्वूण चिंतिउमारद्धो-अहो इमस्स मंहासुणिणो सरीरलाव-  
 ण्णया अहो निरूवमरूवया अहो सयललक्खणपडिपुण्णया अहो पसंतायारत्तणं अहो सस्सिरीयत्तणं, निच्छियं न  
 होइ एसो सामन्नगुणो, ता धनोऽहं जस्स मम गिहमणुपत्तोत्ति परिभाविंती उच्छलियवहलपुलयजालो मुत्ताहलालं-  
 किजोय उट्ठिऊण परमायरेण घयमडुमिस्सं पायसं भगवओ पणामेइ, भयवंपि निच्छिइं चकंकुसलंछणलंछियं  
 पसारइ करकमलं ।

अह पाणिसंपुडे वंभणेण खित्तंमि पायसे पवरे । गयणयले सुरनिवहा ओयरिउं भत्तिभरभरिया ॥ १ ॥  
 वायंति केवि जयदुंदुहीओ अन्ने सुगंति कुसुमाइं । चेलुक्खेवं केवि य करंति अन्ने थुणंति जिणं ॥ २ ॥  
 गंभीरगुरुगिराए अहो सुदाणंति केइ घोसंति । अच्छिन्नकणयधारहिं हरिसिया केइ वरिसंति ॥ ३ ॥  
 सेसोऽवि गामलोओ तहाविहं पेच्छिऊण अच्छरियं । विस्सियहिययो सहसा जिणस्सगासं समल्लीणो ॥ ४ ॥  
 किं बहुणा ?—भयवं पायसलाभेण निवुओ माहणोऽवि कणगेण । विस्सियरसेण लोगो एवं जाओ महाणंदो ॥ ५ ॥  
 अह चम्मचक्खुहिं अपेहिज्जंतो पारिऊण भयवं अन्नत्थ विहरिओ । गामाणुगामेण परिभमंतस्स य सामिणो  
 पयजासमयसुरक्खित्तकुसुमवासचुन्नगंधवासियंमि सरीरे कयज्झंकाररवा निरंतरं परिमुक्कवणकुसुममयरंदा भमर-  
 नियरा पीडं उप्पायंति, चिरनिच्चूसेणेण य किंचि अपावमाणा रोसेण नहेहिं विंधंति मुहेहिं खाइंति, वसंतसमए



श्रीगुणचंद  
महावीरच०  
५ प्रस्तावः

॥ १४६ ॥

रोमकूवनिग्गयं सिणेहमापिवन्ति, सरीरमारूढा य समं विहरन्ति, गामतरुणायवि तेण गंधेण आयरसियचित्ता भणन्ति-भयवं! अम्हंपि देहि इमं गंधजुत्तिं, सुरभो तुज्झ सरीरगंधो, तहां नवनीलुप्पलपलाससरिच्छमच्छिजुयलं सुरभिनीसाससुभगं मुहकमलं रूवसंपयं च दट्ठूण मयरद्धयसरपहारजज्जरियहिययाओ गामतरुणीओ गामाणुगामं परियट्ठमाणस्स भगवओ निवासट्ठाणं पुच्छन्ति, बहुप्पयारं उवसग्गेति यत्ति । एवं पवज्जादिणाओ आरब्भ चत्तारि मासा समहिया जाव सुरनिहित्तवासपच्चइया दुट्ठभमराइणो उवसग्गा जायत्ति ।

अन्नया तेलोकतिलओ सयलगुणनिलओ सामी परियडंतो गओ मोरागसंनिवेसे, तत्थ दूइज्जंता नाम तावसरूव-धारिणो पासंडिणो परिवसन्ति, तेसिं च अहिवई जलणसम्भो नाम, सो य भित्तो सिद्धत्थरण्णोत्ति पुवनेहेण सामिं दट्ठूण सागयन्ति भणिऊण संमुहमुवट्ठिओ, भयवयावि पुवपओगेण चेव बाहा पसारिया, तओ कुलवइणा ससंभमं आपुच्छिऊण पुववत्तं भणिओ भयवं-कुमारवर! एत्थेव निवसह किंचिकालं, निप्पच्चवाओ एस आसमो, न य कोइ ज्ञाणविग्घकारी, वासारत्तस्सवि समुचिओत्ति, ता सबहा जइ संपयं न ठाउकामो तहांवि वासासु इहावसेज्जासित्ति बुत्ते सामी तवयणं पडिसुणिय तत्थेव एगराई बोलेइ । तयणंतरं च—

पणट्ठपेमबंधणो असंखदुक्खनासणो । पसंतचित्तसुंदरो सथेज्जजित्तमंदरो ॥ १ ॥

बहूवसग्गसंगओ गओ व मंदगामिओ । मिओव सुन्नसेवओ व(पि)उव रक्खणुज्जुओ ॥ २ ॥

पारणं  
तापसाश्रमे  
गमनं.

॥ १४६ ॥

मङ्गवसेडकम्बडे अणेगलोगसंकडे । सुंरिंदविंदवंदिओ परिन्भमेइ सामिओ ॥ ३ ॥

एवं च हिंदमाणस्स जयगुरुणो पजंतमणुपत्तो गिम्हसमओ, उवागओ वासारत्तो, तओ थणियसहं कुणमाणेसु राजलजलहरेसु मंदं मंदं निवडंतीसु चारिधारासु नियनियगेहमणुवचंतेसु पहियजणेसु माणससरं सरंतेसु रायहंसेसु गाभी पडिनियत्तिऊण समागओ तत्थेव मोरागसंनिवेसे, दिट्ठो कुलवई, समप्पिओ तेण पेससवस्समुवहंतेण संछन्नो गडो, गुत्थो तत्थ पलंघियमुओ काउस्सग्गेण भयवं, एवं वचंति वासरा ।

अइ वट्ठमाणंमि पढमपाउसारंभे निट्ठिएसु चिरं संचियवुसतणपलालपमुहचारिविसेसेसु अणुगंगमंतेसु अभिणवत-  
णार्इसु कत्थवि किंपि भक्खणिज्जं अपावमाणाइं गोरूवाइं छुहापरिगयाइं आगंतूण तेसु तावसगिहेसु छांयणतण-  
भक्खणत्थमळियंति, तावसावि निट्ठुरलट्ठिप्पहारेण ताणि कुट्ठिऊण निट्ठाडिंति, दुवारट्ठिया य निच्चंप्पि सघायरेण  
रक्खंति नियउडवए, गोरूवाणि तेहिं ताडियाणि इओ तओ परिन्भमिऊण अविज्जमाणरक्खणं भगवओ मढं  
उवइयंति, तावसावि नियगिहट्ठिया तं विलुप्पमाणं पेच्छिऊण भयवओ उवरि परिओसमुवहंति-अहो अम्हे निय-  
उडवए रक्खेमो, एस पुण समणो मणागंप्पि न रक्खेइ, तां किं करेमो?, कुलवइणा धरिओत्ति न किंपि पारिज्जइ  
पयपसं फरुसमुलविउंति, एवं च पइदिणं जायमाणे परूढगाढमच्छराणुवंधा एगया गया ते कुलवइसगासे, सोवा-  
लंभं च भणिउमाढत्ता, जहा-सामि ।

अहं गिहे तुम्हेहिं कोऽविहु मुको उ जो इमो समणो । सो अचंतं नियकज्जकरणपडिवद्धवावारो ॥ १ ॥

एयंपि नो वियाणइ गोरूवेहिं जहागिहं एयं । पइदिणमुवहविज्जइ रक्खइ न खणंतरं एगं ॥ २ ॥

किं आलस्सं अहवाऽणुकंपणं अहव होज्ज व उवेहा । निदक्खिण्णत्तं वा न याणिमो तस्सऽभिष्पायं ॥ ३ ॥

अहवा मुणित्ति गोरूववारणं नो करेति स महप्पा । गुरुदेवपूयणपरा अम्हे समणा न किं होमो? ॥ ४ ॥

हे कुलवइ ! जइ रुट्ठोसि अम्ह तं उडवयं हणिज्जंतं । एएणावि पओगेण वंछसे ता लहुं कहसु ॥ ५ ॥

जेण विमुंचामो तस्स संकहं को मए सह विरोहो? । रुट्ठोवि तोसणिज्जो जो किर को तेण सह माणो? ॥ ६ ॥

तुह चित्तवित्तिमवियाणिऊण णूणं मुहा कओ रोसो । तस्सोवरि अम्हेहिं का वा मूढाण होइ मई? ॥ ७ ॥

इय ईसाभरसम्मिस्सकोवदरफुरियअहरमुल्लविउं । दूइज्जंतगमुणिणो कुलवइपासाउ निक्खंता ॥ ८ ॥

ते य तहा गच्छमाणे दट्ठूण कुलवई सच्चायरेण वाहराविऊण भणिउमाढत्तो, जहा-भो महाणुभावा ! किमेवं परिकप्पह?, को मज्झ दोसो?, मए वयंससिद्धत्थरायपुत्तोत्ति कलिऊण एयस्स मुणिणो गउरवं कयं, किं मए एयं वियाणियं? जं एसो एवं नियगेहमुवेहिस्सइ, एवं ठिएवि तहा करिस्सं जहा न विणस्सइ तुम्ह आसमो, एत्तो मा वहिस्सह संतावं, मा चित्तिज्जह कुविगप्पजालं, तुम्हाणं अवरो को मम पिओत्ति?, एवमायन्निऊण जायसं-तोसा गया ते जहागयंति, कुलवईवि गओ जिणसगासे, दिट्ठो उडवओ निलुत्तपुंखपुडविडओव नाममेत्तावसेसो,

तं च पेच्छिऊण चित्तिं कुलवइणा-अहो सम्ममुवइद्वं तेहिं वरागेहिं, मए पुवं वियाणियं-मच्छरेण एए जंपंति,  
इयानि पुण एवदंसणे जहावद्वियं नायंति, एवं संकप्पिऊण भयवंतं भणिउमाढत्तो—

चउरासमगुरुणो तं मुजोऽसि सिद्धत्थमुवइस्स जओ । तइलोकपिहियकित्ती ता तं पइ किंपि जंपेमि ॥ १ ॥  
तुज्झ पिउणावि एयं आसमपयमायरेण निचंपि । रक्खियमिणिह पुत्तय ! पालेयवं हवइ तुमए ॥ २ ॥  
दुद्धाण ताढणं चियं तुम्ह वयं तेण मुक्कपरिसंको । कीस न गोरुवाइं तणभक्खणओ निवारेसि ? ॥ ३ ॥  
सउणीवि वच्छ ! नियनीडरक्खणं कुणइ सव्वजत्तेणं । भूभारधरणधीरो किं पुण तुम्हारिसो पुरिसो ? ॥ ४ ॥  
जम्हारिसजइजणरक्खणद्वया निच्छियं पयावइणा । तुम्हारिसा महायस ! निप्फाइज्जंति सप्पुरिसा ॥ ५ ॥  
अत्तह गोरुवेहि व दुट्ठेहिं धम्मपचणीएहिं । उवहम्मंता अम्हे कं सरणं किर पवज्जंता ? ॥ ६ ॥  
ता गिहनाहोष कुमार ! वससु तुह संतियं इमं सवं । पइं दिट्ठे पियमित्तं सिद्धत्थनिवं सरेमि अहं ॥ ७ ॥  
इय संघवणोवालंभणयसिक्खवणगम्भवयणेहिं । भणिऊण जिणं सो तावसाहिवो पडिगओ सगिहं ॥ ८ ॥  
अह तेसिं भयवं तों गुणिउं अप्पत्तियं महासत्तो । जयजीवहिएक्करओ चित्तेउमिमं समाढत्तो ॥ ९ ॥  
गज्झ निमित्तेण इमे पारित्ति अवोहिवीयमइभीमं । ता सव्वहा न जुत्तं एत्तोऽवत्थाणमिह काउं ॥ १० ॥  
इय भुवणगुरु संचित्तिऊण जाएऽवि वरिसवालंमि । ठाणाओ तओ चलिओ परपीडावज्जिणो गरुया ॥ ११ ॥

श्रीगुणचंद्र  
महावीरच०  
५ प्रस्तावः

॥ १४८ ॥

वर्षाकाले  
विहारः  
अभिग्रहाः

॥ १४८ ॥

एतौ चिय अन्नेहिंवि परपीडावज्जणंमि जइयवं । जहसंतीए एयं जम्हा सद्धम्मसारोत्ति ॥ १२ ॥  
एयं चेव भगवया वेरग्गकारणमुच्चहंतेण तिच्चा पंच अभिग्गहा गहिया, तंजहा-अचियत्तकारण उग्गहंमि न  
वसियवं, निच्चं उस्सग्गं करेयवं, एगदुवयणवज्जं सोणेण ठाइयवं, पाणिपत्ते भोत्तवं, एगे किर सूरिणो एवं भणंति,  
तं च किर कहं?-सपत्तो धम्मो पन्नवेयवोत्ति भगवया पढमपारणगे परपत्तंमि भुत्तं, तेण परं पाणिपत्तंमि जाव  
छउमत्थोत्ति, गिहत्थो य न अब्भुट्ठेयवोत्ति पंचमो, एवं च गहियपंचाभिग्गहो अद्धमासावसाणे तत्तो नीह-  
रित्ता अट्टियग्गामंमि वच्चइ, तस्स पुण अट्टियगामस्स पढमं वद्धमाणनाममासि, तं च किर कहं ववगयंति?  
निसामेह कारणं—

कोसंबीए नयरीए असंखदविणसंचओ धणो नाम सेट्ठी परिवसइ, तस्स अणेगोवजाइयसएहिं पसूओ धणदेवो  
नाम पुत्तो, अचंतं पाणप्पिओ वीसासट्ठाणं च, सो य अन्नया अणेगकुवियप्पदुट्ठसत्तभीसणं समुल्लसंतमयणकुसुमसरं  
रंगंततण्हामिगवण्हियापडलं दुवारपसरेंदियचोरभयावहं दुरुत्तारमूढयामहानिन्नगाविसमं अरन्नं व रउहं संपत्तो  
तारुणं, तवसेण य वसइ वेसागिहेसु रमइ जूयं पइदियहं विद्वइ अत्थसंचयं, कुणइ विविहे विलासे, उवचरेइ दुल्ल-  
लियगोट्ठिं, पोसेइ नडनाडइज्जगायणपमुहं अनिवद्धं जणं, नाऽवेक्खइ कुलमेरं न परिचितेइ सयणाववायंति, एवं  
च वचंतेसु य वासरेसु खीणेसु दवपडिपुण्णमहानिहाणेसु, सुत्तीभूएसु कोट्ठागारेसु चिंतियं धणसेट्ठिणा-अहो

अज्जपज्जयाइपुरिसपरंपरागयंपि अपरिकलियसंखंपि खयं व पत्तमियाणि मम धणं, ता न जुत्तं एत्तो पुत्तस्स उवेहणंति  
निच्छिऊण एंगंते भणिओ धणदेवो-पुत्त! तुम्हारिसाणं उवभोगाइनिमित्तमेव अत्थोवज्जणमम्हाणं, न एत्तो  
विसिट्ठं ठाणमत्थि, केवलं जराजज्जरियसरीरोऽहमियाणि असमत्थो चंकमणमेत्तेऽवि अखमो समहिगभासियवेवि  
अपरिहत्यो कलाकोसल्लेवि, ता वच्छ! तुमए एस सवो कुडुंवभारो धम्मववहारोय अणुचित्तिणिज्जो, सो य अत्थं  
विणा न तीरए सुहुत्तमवि सोढुं, अत्थोत्ति नाम पवरो पुरिसत्थो, तहाहि—

अत्थेण सुगुणमुणिजणखेत्तनिहित्तेण सुहफलोणमियं । निप्फाइज्जइ संद्धम्मसस्सयं विणु पयासेण ॥ १ ॥  
किं पुत्त! तए न सुयं जिणाण दिन्नाउ जेहिं भिक्खाओ । पढमाउ ते य तम्मिवि केऽवि जणा सिवपयं पत्ता ॥ २ ॥  
केई तइयभवेणं सुरवरसोक्खाइं भुंजिउं धीरा । सट्ठाणनिहित्ततहविहऽत्थसामत्थओ सिद्धा ॥ ३ ॥  
अत्थेणं चिय कोमुइमयंकतुल्लाणणाउ तरुणीओ । आवद्धपाणिसंपुडमाणाए लहुं पयट्ठंति ॥ ४ ॥  
निंदियकुलुब्भवोविहु सवलकलावज्जिओविहु धणेणं । पुरिसो गुरुव देवोव पुच्छणिज्जो हवइ लोए ॥ ५ ॥  
जे सूरा समरसिरे जे माणेणं गिरिंदसारिच्छा । जे भवकववंधेण जंति कित्तिं परं भुवणे ॥ ६ ॥  
जे रूवमरट्ठेणं मयरद्धयमवि हसंति किर पुरिसा । अत्थट्ठाण जणाणं तेवि हु सेवं पवज्जंति ॥ ७ ॥  
अच्छउ दूरे जन्नो नियगिहिणीऽविहु न जेण धणहीणं । आयरइ नरं पुत्तय! सयलोऽविहु लज्जए तेण ॥ ८ ॥

श्रीगुणचंद  
महावीरच०  
५ प्रस्तावः

॥ १४९ ॥

चिरसंथुयावि चिर(सह)कीलियावि निचं कओवयारावि । गोहचकारगंपिव मित्तावि सुयंति धणरहियं ॥ ९ ॥  
किं बहुणा दढदालिहदूमि(स)यं माणुसं विणासंतो । सवंकसो कयंतोवि पुत्त ! आलस्समुवहइ ॥ १० ॥  
इय सवगुणाहाणं सधणत्तं तदियरं च दोगच्चं । नियवुद्धीए नाउं पुत्तय ! उचियं समायरसु ॥ ११ ॥  
जइ ववसायं वंछसि काउं दविणज्जणत्थमिह भद् ! । ता एसो पत्थावो जावऽज्जवि अत्थि किंपि धणं ॥ १२ ॥  
सव विणासे जाए अग्गिपि समप्पिही न ते कोऽवि । किं पुण ववहारकए भंडोलं जीविगाजोग्गं ? ॥ १३ ॥  
एवं निसुणिऊण भणियं धणदेवेण-ताय ! जइ एवं ता किं तुमए उवेहिओऽहमेत्तियं कालं ? किं मए  
अवगणियं कयाइ तुम्ह वयणं ? दंसिया अणुचिया पडिवत्ती ? सुरुद्धताडणेणवि पासिओ विख्वो मुहरागो ?  
जं विणस्समाणेऽवि घरमारे ण सिक्खविओऽम्हि, अहवा अलं पुव्वगयवइयरसोयणेण, पसीयह मे, देह  
आएसं, दुद्धमहिलं आकरिसेमि दूरगयंपि लच्छि, नंदह तुव्भे वहुं कालं केत्तिमेत्तमेयंति, सेट्ठिणा भणियं-  
पुत्त ! किं न सुणेमि तुह कलाकोसलं, न जाणामि साभावियं भुयवलं ?, न लक्खेमि अंगीकयभरधुरधव-  
यस्सवि पुत्त ! किमसज्जं तुह परक्कमस्स ?, ता इयाणिपि कुणसु समुज्जमं पूरेसु पणइजणमणोरहे दलेसु दुज्जणदुद्ध-  
चित्तियं अब्भुद्धरेसु विहलियं जणं पयडेसु मयंकनिम्मलं नियकुलंति, धणदेवेण भणियं-ताय ! किं पुणरुत्तवयणवित्थ-

धनदत्तं  
प्रति पितृ-  
शिक्षा.

॥ १४९ ॥

रेणं ? पशुणीकरेसु सपडि सत्थं सच(मग्ग)संवाहगं च, इय भणिणं सेट्ठिणा नाऊण से निच्छयं वाहंराविया नियपुरिसा,  
भणिया य-अरे ! करेह संवलगाइसमेयं समग्गं मग्गसंवाहगं, संजत्तेह विविहमहामोल्लभंउपडिपुण्णं सगडसमूहं  
उत्तणेह धलिट्ठं लद्धरांधगोणगणं पपत्तेह कम्मकरजणं वाहरह पहरणत्थं गोइसत्थंति, जं सामी आणवेइत्ति पडिसु-  
णिऊण गया पुरिसा, अकालविलंबं समायरियं सपं, निवेश्यं च सेट्ठिणो, सो य धणदेवो ण्णाओ कयविलेवणो केस-  
पत्तसियकुसुमो परिद्धियपंडुरयत्थो पणयदेवगुरुचरणो आपुच्छियजणणिजणगसयणवग्गो गणिमधरिममेयपारिच्छे-  
ज्जपडिपुत्तपंचसयसगडीसत्थसमेथो सुमुपुत्ते पट्ठिओ पुरदेसंतरं, ताहे पेच्छंतो अपुप्पापुपसंनिवेशो किणंतो अन्नोन्न-  
भंडां, आपुच्छंतो देसंतरसमायारं, पिण्णासंतो विचित्तभासायिसेसे, देतो दीणकुट्ठिययाण दाणं अइमओ दीधम-  
त्ताणं, कमेण रणज्जणिरयसहकंठपलंबन्तपट्ठिगारापनिरुद्धावरसहजायारो अणेगसदाइजणययद्विगगंसियागणो पधुत्तो  
पत्तमांणगमासमीजं, तस्स य अन्तरायि समनिजुत्तगगंभीरखड्डयिसमप्पवेसा आनाभिगेत्तमुपुमपेलुगापल्लहत्थयिसा-  
ल्लपुलिणां महल्लचिक्खल्लाणुगिल्लुत्तल्लसल्लिला वेगपई नाग नई, तद्धिं च पपिद्धाओ समधीओ, ताओ पुण उभयपा-  
सावलंविणा जणेण सुसमणेणेण परिगपणणेण (परिगपणणेण) सारद्धिणा निगिण्ठत्तेण पसहनिवहं कोहालाइणा पशु-  
पिच्छंतेण चक्कमग्गेण कइकइयि कडेण पायियाओ अइमग्गं, अह विसमत्तणओ नदीए पुरपहशीणसागत्थत्तणओ  
वसभाणं अइभारित्तणओ संगडीणं चाडमासासिया सारद्धिणो अविगणिगकंससं(णं)पाइपाया निवडिमा मधीमले



श्रीगुणचंद  
महावीरच०  
५ प्रस्तावः

॥ १५० ॥

वलीवद्वा, वाढमुविग्गो धणदेवो, वाडलीहूओ परियणो, तत्थ य सत्थे एगो वसभो सयलगोमंडलप्पहाणो सप्पुरिसो  
इव लीलाए चिय समुद्धरियमहाभारो विसमप्पएसनित्थारणसमत्थो य अत्थि, सो य तहाविहविसमनिवडिएण  
सुमरिओ धणदेवेण पप्फुक्कारपुवयं च सक्कारिऊण जोत्तिओ सो सगडीए, तक्खणं अखेवेण य गओ सो निक्खवडसा-  
मत्थेण गहिऊण लीलाए भारियंपि तं नईए परकूलं, जहा सा एगा, एवं पंचसयाणिवि सगडीणं निवाहियाणि  
तेण विसमप्पएसोत्ति । अविय—

एगत्तो सो वसहो अन्नत्तो सयलगोणसंघाओ । उत्तारइ सगडीओ सव्भावस्सत्थि किमसज्झं ! ॥ १ ॥

अइदुद्धरभरपरिकट्टणेण तुट्ठं तडत्ति से हिययं । वयणुग्गीरियरुहिरो धसत्ति धरणीयले पडिओ ॥ २ ॥

तं च तारिसमवत्थंतरं पत्तमवल्लोइऊण धणदेवो परिसुक्कसेसकायवो सोयभरमुवहंतो वाहरावेइ विज्जे, कारवेइ  
चिगिच्छं, सयमेव समीवट्ठिओ बंधवं व मित्तं व पडिजागरेइ, अन्नदिवसेय भणिओ सो परियरेण जहा—सत्थवाह ! किमे-  
गगोणनिमित्तं उवेहिज्जंति निवकज्जाइं ? किं न सुणह तुब्भे सीयंति वणियपुत्ता ? विणस्संति कियाणगाइं ? वोलंति  
बहवे वासरा, समीवमणुसरइ वासारत्तोत्ति, धणदेवेण भणियं—एवमेयं, किं तु न सक्केमि एयं वरागं परममित्तं व  
सव्भावसारं मोत्तुं, परियरेण भणियं—तुब्भे जाणह जमेत्थोचियंति, तओ तप्परिहारकायरमणेणवि धणदेवेण सदा-  
विया वद्धमाणगगामप्पहाणा पुरिसा, सुहासणत्था तंवालाइदाणेण सम्माणिऊण सप्पणयं वसहस्स समक्खं

शकटपञ्च-  
शत्युत्तारः।

॥ १५० ॥

भणियं जहा-एसो मम पवरवसभो एरिसदुद्धत्थामभवत्थंतरं पत्तो ता तुम्हेहि एयस्स इमिणा खवगसएण ओसह-  
चरणाइचिंताए संमं वट्ठियवं, एसो तुम्ह नासगो इव समप्पिओ मए, न सबहा अन्नहा कायवंति निरुविऊण सो  
मयहत्तरजणे मोयाविऊण वसहस्स पुरओ वहुं चारिं पाणियं च ससिणेहं खामिऊण य तं जहाभिमयं गओ धणदे-  
वसत्थंवाहो। सो य वसभो गाढवेयणाभिभूओ जेढ्ढमासदिणयरनिदुरकरोलिकरालिओत्ति गिम्हुणहतत्तमहियलडज्झमा-  
णदेहो विरसमारसंतो दिणं गमेइ, तंपि से तिणाइयं अवरगोरूवेहिं भक्खिज्झइ, सोऽवि चारिवारिरहियत्तणेण गाढ-  
वाहिपीडियत्तणेण य सदीणं दिसाओ अवलोएमाणो तणसलिलहत्थे तं पएसं वोलंते जणे दट्ठूण चित्तेइ-नूणं मम  
निमित्तं एए इममुवाहरंतित्ति, लोगोऽवि तं अइकमित्ता नियनियकज्जेसु पयट्ठइ, एवं च सो वसभो पइदिणं तहा-  
दंसणविहलियासो, चम्मट्ठिपंजरावसेसो एवं सो परिकप्पेइ-अहो महापाविट्ठो वज्जगंठिनिदुरमाणसो निग्घिणो  
चंडालविसेसो असच्चसंधो कलिकालकलिलकलुसिओ एस गामजणो जेण मम एवं दुहियस्स अच्छउ दूरे करुणाए  
तण्णपूलगाइदाणं जं तइया धणदेवसत्थवाहेण ममं समक्खं जवसाइ जीवणमप्पियं तंपि गसिऊण ठिओत्ति। एवं  
च पइदिणं पओसमुवहंतो अकामतण्हाए अकामलुहाए अकामतिववेयणाए आउलीकयसरीरो महानगरदाहंमज्झ-  
पडिओ इव देहदाहाभिभूओ मरिऊण तंमि चेव गामे अग्गुज्जाणे सूलंपाणिनामो वाणमंतरो समुप्पन्नो, तहिं च उव-  
वण्णो समाणो तहाविहं देवरिद्धिं पेच्छिऊण विमरिसिउमारद्धो-अहो मए पुवभवे किं दाणं दिज्जं? किं वा तवं

तवियं? कस्स वा उवयारे ठियं? को वा धम्मो सम्ममाराहिओ? कत्थ वा सुतित्थे सरीरच्चाओ कओत्ति?, इह  
विमंसिऊण पउत्तो ओही, दिट्ठं च तं तहाविगरालरूवं वलीवद्दसरीरं, ताहे समुच्छलिओ से महाकोवानलो वियं-  
भिओ अविवेओ समुल्लसिओ अकज्जकरणपरिणामो, तयणंतरं पेच्छंतु दुरायारा नियपावपायवस्स फलंति विभाविं-  
तेणं तेण विउविया सयलगामवासिजणाण मारी, तप्पभावेण य अणवरयं मरिउमारद्धा उत्तिममज्झिमजहन्ना  
वहवे जणा, जायंति य पइदिणं अकंदियरवा । कहं चिय?—

हा नाह! पाणवल्लह! कत्थ गओ मज्झ देसु उल्लावं । हा हा कयंत! निक्खि! कह सहसा ववसिओ एवं? ॥१॥  
हा वच्छ! किमुच्छंगेऽवि तं गओ अइगओ सि पंचत्तं । मम मंदभाइणीए अहो किलेसो मुहा जाओ ॥ २ ॥  
हा जणणि! तहा कट्ठेण पालिउं मं निलक्खणमियाणिं । कह निरवराहएचिय न देसि तं मज्झ पडिवयणं? ॥३॥  
हा भाय! बंधुवच्छल! हा हा तं भइणि! निक्खवडपेम्मे । एकपए चिय चलियाइं कीस मुत्तूण मं दुहियं? ॥४॥  
हा वच्छे! बहुदविणवण्ण परिणाविया पयत्तेण । तहविहु इमं अवत्थं संपत्ता हा हयासोऽम्हि ॥ ५ ॥  
हा जक्खबंभहरिसूरबुद्धजिणखंदरुद्धपमुहसुरा । तह पूइयावि संपइ किमुवेक्खह तो कुणह रक्खं ॥ ६ ॥  
इय अणवरयं तियचच्चरेसु लोयस्स रोयमाणस्स । परिमुक्कावरकज्जस्स जंति दुक्खेण दिवसाइं ॥ ७ ॥  
एवं च जुगंतसमएव रोगेहि य छिद्दपवेसेहि य पियजणविरहदुक्खेहि य हिययसंघट्टेहि य मरमाणंमि अणेगलोगे

गुन्नीभवन्तेसु पवरमंदिरेसु बुच्छिज्जमाणेसु यं अइगरुयकुलेसु मडयकोडिसंकुलासु गामरत्यासु भयभीओ अवसेसो  
 जणो जीवियरक्खणनिमित्तं लिहावेइ रक्खावलयं पाणिपल्लवेसु बंधेइ दिवोसहीओ कुणइ महागहपूयं समायरइ  
 पियरपिंडप्पयाणं परावत्तेइ विविहमन्ते समीवट्ठियं घरइ दिवमणिगणं पयट्ठावेइ होमविहिं आपुच्छइ जाणयजोइ-  
 सिए समारंभइ गिहदेवयाणं ण्हवणवल्लिपूयामहसवं, अन्नं पि जं कोइ समाइसइ तं सवं तंहट्ठियं निवत्तेइ, तहवि  
 ओइण्णमहाजरोव पढमच्छुहाभिभूयपंचाणणोव निकाइयकम्मनिवहोव न मणागंपि सो सूलपाणिवंतरो उवंसमं  
 गच्छइत्ति । अह गामजणो अणियत्तगं दट्ठण मारिं घणकेणगसमिद्धां गोमहिसितुरगाइपरिकिन्नाइं गिहाइं मोत्तूण  
 जीवियट्ठयाइं नियनियकुडुंवाइं घेत्तूण अन्नन्नगामेसु गओ, तत्थवि गयं महांवेरिओव उवहवइं सो तंगामेवासिलोयं,  
 एगया य तेसिं चिंता जाया—न नज्जइ तत्थ अहेहिं देवो वा दाणवो वा खेत्तवालो वा जक्खो वा रक्खसो वा  
 विराहिओ होज्जा, तम्हा ताहिं चेव गंतूण पसाएमोत्ति संपंधारिऊण समागंयां तत्थेव गामे, उवट्ठाविया वल्लिकुसुम-  
 धूवाइसामग्गी, तयणंतरं ण्हाया पंडुरवत्थकयउत्तरासंगा लवंतविमुक्ककेसा सवसमुदाएणं तियचउक्कचचरेसु  
 पडिसडियभूयगिहेसु रुद्धंदावसहेसु उज्जाणेसु यं वलिं च कुसुमंपयरं च मुंचमाणा उहमुहा जोडियकरंजलिणो  
 एवं जंपिउं पउत्ता—

भो अंतरिक्खनिलया देवासुरजक्खरक्खकिंपुरिसा । दिवाइसयसमेया निसुणह विन्नत्तियं एयं ॥ १ ॥

श्रीगुणचंद  
महावीरच०  
५ प्रस्तावः

॥ १५२ ॥

इस्सरियमएणं वा अन्नाणेणं व अविणएणं वा । जं अवरद्धं तुम्हं तं सच्चं खमह अम्हाणं ॥ २ ॥  
पणएसु सदुच्चरिओहखामणाउज्जएसु सत्तेसु । जं तुम्हारिस देवा खमंति गरुयावराहंपि ॥ ३ ॥  
कोवस्स फलं दिट्ठं पेच्छामो संपयं पसायस्स । इति भणिए सो देवो गयणठिओ वुत्तुमारद्धो ॥ ४ ॥  
रे रे विणट्ठसीला ! धट्ठा निप्पिट्ठसिट्ठजणचिट्ठा । लोहमहागहनडिआ एत्तो मे खामणं कुणह ॥ ५ ॥  
तइया न सरह पावा वसहस्स लुहाइणा किलंतस्स । तणजलसमप्पणेणवि अणुकंपा जं न विहियत्ति ॥ ६ ॥  
नियसयणवग्गमरणे जाए संतावमुग्गमुव्वहह । वसहे तहा मयंमिवि न येवमेत्तोऽवि मे सोगो ॥ ७ ॥  
अलमहुणा भणिएणं वच्चह दूरेवि नत्थि मे मोक्खो । खलविसवेल्लिं आमूलओवि छिंदेमि दुहहेउं ॥ ८ ॥  
इय तच्चयणमायन्निऊण भयवसकंपंतसरीरा धूवकड्डुच्छुयहत्था सुरभिपुप्फपुंजोवयारं कुणमाणा जय जीवं नंदाइ-  
कोमलवयणेहिं थुणंता अट्ठंगं निवडिया महीए, भणिउमाठत्ता य-देव ! सच्चमेव अवरद्धमम्हेहिं, नत्थि तुम्ह एत्था-  
वराहो, तहावि पसीयह इयाणिं, आइसह इमस्स दोसस्स निग्घायणनिमित्तं पायच्छित्तं, 'अइकंतत्थमुमरणं विह-  
लं चिय विणट्ठकजंमि' किं बहुणा ?, खित्तं नियसिरं तुह चरणपुरओ, कुणसु जं किंपि कीरइ सरणागयाणंति भणि-  
ऊण अग्घदाणपुरस्सरं पुणो पडिया चरणेसु, एवं च निसामिऊण सूलपाणिवंतरो मणागं उवसंतचित्तो भणइ-जइ  
एवं ता एयाणि माणुसट्ठियाणि एगत्य पुंजीकाऊण उवरि पवरं कणंतकिंकिणीधयवडाडोवमणहरं देवहरयं विर-

एह, अब्भंतरे वलीवहाणुगयं जक्खपडिमं पइट्ठवेह, निचं वलिकुंसुमचणियं पयट्ठेह, एवं कुणमाणानं तुम्हांणं जीवियं देमि, न अन्नहत्ति, तओ जं देवो आणवेइत्ति तं तहत्ति विणएण सासणं सिरेण पडिच्छिऊण तेहिं गामस्स अदूरदेसे जहोवइट्ठं तहेव कारवियं तस्स मंदिरं, इंदसम्माभिहाणो य निरुविओ तत्थ देवचओ, आयेण तिसंझं कीरइ पेच्छणयंति । एवं च अणेगमाणुसट्ठिनिचयपूरियत्तणेण इंतजंतेहिं पहिएहिं अन्नगामजणपुच्छिज्जमाणेहिं तस्स अट्ठिगामोत्ति नामं कयं, पसिद्धिं च सबत्थ संपत्तं । एएण कारणेण अट्ठियग्गामं जायंति । तत्थ पुणवाणमंतरघरे जे तडियकप्पडियाइणो भग्गपरिस्समपीडिया परिवसंति रयणीए ते सूलपाणी पुट्ठीए आरुहिऊण चिरं तावं वाहेइ जाव न सक्केति पयमवि दाउं, पच्छा किलिकिलारावं कुणमाणो केइ तिंदूसगं व गयणे उल्लालिऊण अहो निवडंतेसु तिक्ख-खग्गेण छिंदइ केइ चरणेसु गहिऊण चत्थं व सिलायलंमि पच्छाडेइ केइ घटं व दुवारतोरणे पलंवेइ केइ खंडाखंडिं काऊण वलिं व सबदिसासु पक्खिवइ, एवंविहजायणाहिं पहियजणं विणासेइ, तब्भएण य गामलोगो दिवसे अ-च्छिऊण वियाले सगिहेसु वचइ, इंदसम्मदेवचगोऽवि धूवं पईवं पूयं च से काऊण दिवसओ चेव निक्खमइत्ति ।

एवं वचंतेसु वासरेसु भयवं महावीरसामी तावसासमाओ समागओ समाणो तं वंतरसुरं वोहिउकामो देवचगं भणइ-अहो एत्थ जक्खगिहे अम्हे निवसामो?, तेण भणियं-गामो जाणइ, तओ भगवया तत्थेव मिलिओ सयलो गामजणो अवत्थाणनिमित्तेणमापुच्छिओ, लोणेणवि अचंतसोभसस्सिरीयरूवं भयवंतं दट्ठूण भणियं-देवज्जग ! न सका

श्रीगुणचंद  
महावीरच०  
५ प्रस्तावः

॥ १५३ ॥

एत्थ वसिउं, एहि गाममज्झे, गिण्हाहि जहाभिरुइयं अम्ह गिहेसु वसहिं, भयवंपि अणिच्छमाणो भणइ-इत्थेव  
अणुजाणह, लोणेण भणियं-जइ एवं ता ठाहत्ति, ताहे गंतूण एगंमि कोणे पडिमं ठिओ सामी, सो य इंदसम्मो  
पच्छिमसेलसिहरं संपत्ते दिवसयरमंडले घूववेलं निम्मविऊण कप्पडियाइतडियवग्गं निस्सारित्ता भयवंतंपि  
भणइ-देवज्जगा ! तुब्भेवि नीहरह, मा इमिणा जक्खेण मारिज्जिहिह, सामीवि असुणमाणोव तुसिणीए य गमेइ,  
पुणो पुणो इय भणंते य देवचगे सो वंतरसुरो चिंतेइ-अहो कोऽवि एस देवचएणं गामजणेण य भणिज्जमाणोवि  
न गओ एत्तो ठाणाओ, ता पेच्छिही जमज्ज करिस्सामि, वहूणं दिवसाणं दिट्ठियाखेलणगमुवागयंति । एत्थंतरे अत्य-  
मिओ दिणयरो समागया संज्ञा, सट्ठाणं गओ देवचगो, काउस्सग्गे ठिओ भुवणबंधवो ।

ताहे काउस्सग्गे ठियस्स सो भेसणट्ठया गुरुणो । जुगविगमघोरघणघोसविब्भमं भेसियजणोहं ॥ १ ॥

अट्ठट्ठहासमसमं चाउदिसिपसरियं महाभीमं । उच्छलियवहलपडिसदनायविप्फारियं कुणइ ॥ २ ॥

गामलोओऽवि तं सद्दं सोऊण भयसंभंतो परोप्परं भणइ-अहो एसो देवज्जगो महाणुभावो जक्खेण मारिज्जइत्ति,  
तत्थ य उप्पलो नाम परिवायगो पासजिणतित्थपुव्वपडिवन्नसामन्नो भोमुप्पायसुमिणंतलिकखअंगसरलक्खणवंजणरूव-  
अट्ठंगमहानिमित्तसत्थपरमत्थवियाणगो लोगाओ एरिसो तारिसो देवज्जगो जक्खेण मारिज्जिहत्ति निसुणिऊण मा  
तित्थंकरो महावीरो पडिवन्नदिकखो होज्जत्ति संकियमणो वंतरगिहे य तब्भएण गंतुमचाइंतो अद्विइं काउमारद्धो ।

भगवदा-  
गमनं.

॥ १५३ ॥

सो य सूलपाणी जाहे अट्टहाससंदेण भयवं न भीजो ताहे पिसायरुवं विउवइ, तं च केरिसं ?—

अइकविलयूलं विरफेसोहच्छन्नंगयणयलं मज्झं । अविपकसुकुंतुं वयसरिच्छं वीभच्छवयणिलं ॥ १ ॥

दिसिकुंजरकुंसागारदूरनिकसियकलुसदसणंगं । चिविडग्गघोरघोणानिलकंपियकविलमुहलोमं ॥ २ ॥

संविरयलिचम्मोणद्धमडहवं च्छत्यलद्विसंधायं । पिट्ठावलग्गालिंजरकप्परसमजरदं जठरतलं ॥ ३ ॥

तालतरुजुयलदीहरनिम्मंसण्हारुनद्धजंघजुयं । ठाणट्ठाणोलंबियपलंवतंडवियं फणसप्पं ॥ ४ ॥

अइवेगमुक्ककमभरयरहरियससेलमेइणीवट्ठं । कक्खंत रालनिग्गहियमडयपिसायासणाभिरयं ॥ ५ ॥

अइकुडिलकत्तिउकत्तियंगिनिस्सरियरुहिरपाणपरं । उच्चवियपयंडभुयं पावसमूहं व पच्चक्खं ॥ ६ ॥

इय एयं विहरुवं पिसायमवि पासिऊण जयनाहो । मसगं व अंगणितो धम्मज्झाणं विचितेइ ॥ ७ ॥

ताहे स सूलपाणी उवउत्तो पेहए जिणवरिंदं । मेरुव निप्पकंपं निच्चयचित्तं पवरसत्तं ॥ ८ ॥

तयणंतं च पुणरवि भेसणकज्जेण सो महापावो । निसियग्गकुंतं भीसणउग्गविसुग्गाढदांढालं ॥ ९ ॥

अविकलियरोसवसनिस्सरंत विसमिस्सजलणजालोहं । पप्फुरियफारफुंकारवायभजंतं तरुनियरं ॥ १० ॥

वियडुब्भडचडुलफणाकडप्पपडिरुद्धदिसिमुहाभोगं । सिरियणकिरणसंचयदावियगुरुवणदवासंकं ॥ ११ ॥

कलिकालपढमभित्तं व तिबदुरिओहभूरिरासिं व । जमपासंपि व सक्खा महिमहिलावेणिदंडं व ॥ १२ ॥



श्रीगुणचंद  
महावीरच०  
५ प्रस्तावः

॥ १५४ ॥

संस्पं विउच्चइ महं तो सो सामिं निएण देहेण । आगंतूणावेढइ वाढं थंमं व रज्जूए ॥ १३ ॥ पंचहिं कुलयं ।  
पुच्छच्छडाए ताडइ सच्छंदं दसइ तिकखदसणेहिं । कंठस्स पीडणेणं कुणइ निरुस्सासयं सहसा ॥ १४ ॥  
अह अट्टहासभीसणपिसायनागोवसग्गकरणेवि । अविचलचित्तं मुणिऊण जयगुरुं गाढकुवियमणो ॥ १५ ॥  
सो सवं सचरिं जाव अचंतरउइं दुरहियासं सत्तविहं वेयणं भगवओ करेइ, तंजहा—सीसवेयणं सवणवेयणं नयणवेयणं  
दसणवेयणं नहवेयणं नासावेयणं पिट्ठिवंसवेयणं, एयाणं वेयणाणं एक्केकावि समत्था पागयनरस्स जीवियं ववक्कमिउं, किं  
पुण सत्त एयाओ एगकालपाउच्चभूयाओ अणाइक्खणिज्जरूवाओत्ति?, भयवं पुण ताओ सम्ममहियासेइ, सो य वाणमंतरो  
जाहे न पारेइ भयवंतं भेसिउं वा खोभिउं वा ताहे वाढपरिस्सममुवगओ अहो निष्फलो मम वाचारोत्ति कयचित्तसं-  
तावो धीरिमारंजियहियओ य भयवंतं पायवडिओ सवायरेण भणइ—भयवं! खमह मम अवराहं, अयाणमाणेण तुम्ह  
सामत्थं सुचिरं मए अवरद्धंति, एत्थंतरे नियकज्जकरणवावडचित्तो तक्खणसुमरियसुरवइजिणभलावणावयणो सो सि-  
द्धत्थदेवो दट्ठूण भयवओ तिबोवसग्गं धाविओ वेगेणं, पत्तो तं पएसं, भणिउमारद्धो य—अरे रे सूलपाणिवंतराहमा!  
अचंतदुट्ठलक्खणा दोगच्चमच्चुपत्थगा विसुद्धबुद्धिवज्जिया न जाणसि खलियारंतो इमं सिद्धत्थरायपुत्तं भयवंतं चरि-  
मतित्थयरंति?, जइ रे दुरायार! एयं वइयरं सको कहवि जाणंतो ता को जाणइ तं किंपि पावितोत्ति?, सो य एव-  
मायन्निऊण वाढं भयभीओ चउग्गुणं पुणो पुणो जिणं खामेइ, सिद्धत्थो य तस्स धम्मदेसणं काउमाढत्तो जहा-

वीयरागो देवबुद्धीए गहियवो, साहुणो य गुरुबुद्धीए परिभावियवा, तत्तत्थसद्वहनं कायवं, सबपाणीणं पीडा परि-  
वज्जियवा, पुव्वदुच्चरियाइं भुज्जो भुज्जो गरहणिज्जाइं, जओ एकसिं कयाणंपि तिक्खपओसेण पावाणं कोडाकोडाइरूवो  
दुहविवागो हवइत्ति, सूलपाणीवि एवमायन्निऊण अणेगलोगक्खयसुमरणउप्पन्नातुच्छपच्छायावो जायसंमत्तो अचंत-  
भवविरत्तचित्तो असेसदोसपसमणट्ठा तिहुयणपहुणो पुरओ गीयनट्टमहिमं काउं पयत्तो, गामवासिलोगोऽवि गीया-  
इसहं सोचा चित्तेइ-अहो तं देवज्जयं जक्खो मारित्ता इयाणिं परितुट्ठो सच्छंदमेवं कीलइत्ति, भयवंपि चत्तारिं रयणि-  
जामे देसूणे परिताविओ समाणो पभायकाले सुहुत्तमेत्तं निदापमायसुवगओ संतो इमाइं दस महासुमिणाइं पस्सइ,  
कहं १, जहा किर मए तालपिसाओ उट्ठं बहुमाणो निहओ १ पंडुरो(सउणो)चित्तकोइलगो य दुवे पज्जुवासमाणा  
दिट्ठा २-३ सुरहिकुसुमगंधुदुरं दामदुगं ४ गोवगो य पज्जुवासणापरो ५ पउमसरो विबुद्धपंकओ अवलोइओ ६  
कलोलमालाउलो सायरो समुत्तिण्णो भुयार्हि ७ पइण्णरस्सिमंडलं चक्खुगोयरसुवगयं दिणयरविंव ८ नियंतेहिं  
माणुसुत्तरगिरी परिवेडिओ ९ मंदरसिहरं चारुढोत्ति १०, एवं एए दस सुमिणे पासित्ता पडिबुद्धो सामी । एत्थंतरे  
समुग्गओ सूरु, समागओ धूवकुसुमक्खयहट्थो सयलगामजणो उप्पलनेमित्तिगो य, ते य दिवगंधच्चुण्णपुप्फवासेहिं  
समच्चियं अक्खयसरीरं सामिं पेच्छिऊण उक्कुट्ठिसीहनायं करेमाणा चरणेसु पडिया, परोप्परं भणिउमेवं पवत्ता  
य-अहो देवज्जगेणं जक्खो उवसामिओ, तेणेसा पूया कयत्ति, उप्पलोवि परियाणिऊण भयवंतं पडिट्ठो, वंदिऊण

श्रीगुणचंद  
महावीरच०  
५ प्रस्तावः

॥ १५५ ॥

चलणजुयलंतिणं निसन्नो, अहं भगवओ काउस्सग्गावसाणंमि पुणरवि नमंसिऊण अट्ठंगनिमित्तसामत्थओ मुणियसु-  
मिणाइवइयरो भणिउमारद्धो-सामि! तुब्भेहिं अंतिमराईए दस सुमिणा दिट्ठा, तेसिं इमं फलं-जो किर तालपि-  
साओ महादेहो निहओ तमचिरेण मोहणियकम्मं उम्मूलेहिसि, जो य सियसउणो तं सुक्कज्झाणं झियाइहिसि, जो  
विचित्तो कोइल्लो तं दुवालसंगं पण्णवेहिसि, गोवग्गेण य जं तुमं परियरिओ तं ते चउविहसमणसमणीपमुहो चउ-  
विहो संघो भविस्सइत्ति, पउमसरा य चउविहो य देवनिकाओ तुमं पज्जुवासेही, जं च सायरमुत्तिण्णो तं संसारमुत्त-  
रिहिसि, जो य सूरुओ अवलोइओ तमचिरेण केवलनाणं उप्पज्झिही, जं च उदराउ निस्सरिऊण अन्तेहिं माणुसुत्तरगिरी  
वेढिओ तं ते निम्मलजसकित्तिपयावा सयलतिहुयणे अनिवारियपसरा परिभमिस्संति, जं च मंदरसिरमारूढो तं  
सीहासणत्थो सदेवमणुयासुराए परिसाए धम्मं पन्नविहिसि, जं च दामदुगं तस्स फलं न याणामि, सामिणा  
भणियं-हे उप्पल! जं तुमं न याणेसि तमहं कहेमि, जं इमं दामदुगं तमहं दुविहं सागारमनागारियं धम्मं पन्नवेहा-  
मिति, एवं निसामिऊण हरिसुल्लसियपुलयजालो उप्पलो नमंसिऊण जयगुरुं जहागयं पडिनियत्तोत्ति। भयवंपि धम्म-  
ज्झाणपरायणो कालं गमेइ।

अहं अद्धमासखमणेहिं जयगुरुवि गमिऊण चउमासं। विविहाभिग्गहनिरओ अट्ठियगामाओ निक्खंतो ॥१॥  
ताहे स सुलपाणी जक्खो अणुगच्छिऊण भयवंतं। पयकमलनिलीणसिरो भत्तीए भणिउमाढत्तो ॥ २ ॥

भगव-  
त्स्वमाः

॥ १५५ ॥

नाह ! तुह तिष्ठउवसगकरणओ नत्थि मम समो पावो । जं एत्थ तुमं बुच्छो तेण कयत्थोऽवि नेवत्थि ॥ ३ ॥  
 जाणामि सामि ! मम बोहणद्वया तं समोसढो एत्थ । न हुं सूणासालाए कोवि निवासं जओ कुणइ ॥ ४ ॥  
 बहुजीवविणासणजणियपावपडलेण पीडिओ संतो । नो पेच्छंतो दुक्खं किमहं जइ तं न इंतोऽसि ? ॥ ५ ॥  
 ता तुमए विय भवकूवयाओ हत्थावलंबदाणेण । उत्तारियमिह जयगुरु ! नियसोक्खपरंमुहमणेण ॥ ६ ॥  
 इय सुलपाणिजक्खो संयविउं जिणवरं पयत्तेण । दुस्सहविओगमल्लीए सल्लिओ पडिनियत्तोत्ति ॥ ७ ॥  
 पवज्जागहणाओ पढमं संवच्छरं जहावित्तं । सिद्धं जइकगुरुणो इण्हि बीयं निसामेह ॥ ८ ॥

अह शुणिकुण वलियंमि जक्खे भयवं गामाणुगामं विहरमाणो गओ मोरागसन्निवेशे, तत्थं य वाहिरुज्जाणे थीप-  
 सुपंडगाइदोसरहिए पएसे ठिओ पडिमाए, तर्हि च गामे अच्छंदगा नाम पासंडत्थां परिवसंति, तेसिं च एगो  
 अच्छंदगो लोगाणं मंततंतभूइकरणेहिं जीवइ, सो य सिद्धत्थवंतरो भयवंतंमि पडिमापडिवन्नंमि कलहकेलिपियत्त-  
 णेण विणोयमपावमाणो नाहस्स पूयमपेच्छमाणो य अधिइं करेइ, अन्नदिवसे य सो भयवओ सरीरे संकंतो तेण-  
 तेणं वोर्लितं एगं गामगोहं सदित्ता कीलानिमित्तं एवं जंपइ-भो भइ ! तुमं कंगुकूरं सोवीरेण सह अज्ज पजिमिओ,  
 संपयं च वसहरक्खणद्वयां चलिओ, इत्तेण य मग्गे सुयंगमो दिट्ठो, सुमिणगंमि परुत्तो य ता रे संभवइ सव्वमेयं ?  
 गामगोहेण भणियं-भयवं ! अवितहमेयंति भणिए सिद्धत्थेण अन्नंपि से वहुं समाइट्ठं, सो परितुट्ठो परमच्छेरयंति

श्रीगुणचंद  
महावीरच०  
५ प्रस्तावः

॥ १५६ ॥

मण्णमाणो गंतूण गाममज्झे नियसयणवग्गस्स पुरओ एवं परिकहेइ, अह कोऽवि देवज्जओ गामवाहिं ठिओ तीया-  
णागयवट्टमाणाइं जाणइ, पूरिया मम तेण बहवे पच्चया, एवं च आयत्तिऊण गाढकोऊहलाउलिज्जमाणमाणसो  
गामजणो कुसुमक्खयहत्यो गओ भयवओ समीवं, संभासिओ तेण जिणतणुसंकंतेण सिद्धत्थेण, जहा भो तुम्हे मम  
अइसयपेच्छणत्थं एत्थ संपत्ता, गामजणेण भणियं-सामि ! एवंति । तदणंतरं—

जं पुव्वकालवित्तं जं च सुयं जं च दिट्ठमित्तेहिं । जं भासियं परोप्परमह जं रयणीए अणुभूयं ॥ १ ॥

जं इट्ठाणिट्ठविओगजोगसुहदुक्खलामलोभाइं । अज्जवि भविस्सविसयं तंपि हु सो साहए तेसिं ॥ २ ॥

ते य तहाविहं कोउगं दट्ठूण सवायरेण वंदंति पूयंति महिमं च करेंति, एवं च प्रइदिणं इंतजंतेसु गामिल्लएसु  
पवित्थरिओ सिद्धत्थस्स परमो आणंदो । अन्नया य लोगो भणइ-भयवं !, एत्थं अन्नोवि अच्छंदओ नाम जाणओ  
परिवसइ, सिद्धत्थो भणइ-सो वराओ न किंचि जाणइ, ताहे लोगो गंतूण तस्स पुरओ साहेइ, जहा देवज्जगो  
भणइ-तुमं न किंपि जाणसि, सो य तं सोचा अहंकारमुव्वहंतो अप्पाणं ठाविउकामो भणइ-एह तुम्ह समक्खं अव-  
णेमि जेण तस्स परित्राणाभिमाणं, दुक्करं खलु अम्हारिसस्स पुरओ अत्तणो पयासणं, सुकरा तुम्हारिसस्स पुरओ  
गामिल्लयाण मज्झे विविहसमुल्लावत्ति, एवं च नियवियक्खणत्तं पयडंतो ईसामहल्लसल्लखिल्लियहिययो सकोउहल्लेण  
लोगेण परियरिओ गओ सो तत्थ जत्थ जणसमूहोवासिज्जमाणपायपंकओ भयवं काउस्सगे चिट्ठइत्ति । तयणंतरं च

अच्छन्द-  
कवृत्तं.

॥ १५६ ॥

करंगुलीहि उभयपज्जंतेसु तणयं घेत्तूण भयवओ संमुहं ठिओ पुच्छिउमारद्धो-भो देवज्जयं ! इमं तणं किं छिज्जिही नयंति ?, तस्स एस अभिप्पाओ-जइ किर देवज्जो भणिही-छिज्जिही तो न छिंदिस्सं, अह अन्नहा तो छिंदिस्सामि । एवं च विगप्पमाणंमि तंमि सिद्धत्थेण भणियं-न छिज्जिही, सो एवं सोचा समारद्धो छिंदिउं ।

एत्थंतरंमि सफो सुहासणत्थो इमं विचिंतेइ । गांमागरेसु भयवं ! कह विहरइ संपयं वीरो ? ॥ १ ॥

दिघोवओगविभवेण वइयरं तं तओ मुणइ सघं । पेच्छइ य तं पुरत्थं तणभंगसमुज्जयं समणं ॥ २ ॥

अइह महापाओ कह जिणंपि मिच्छं समीहए काउं ? । इय चिंतिऊण मेळइ महल्ल धारुक्कडं कुलिसं ॥ ३ ॥

तं मणसमाणवेगं आगंतुं करजुगंगुलीवलयं । छिंदेइ तस्स सहसा अछिज्जमाणंमि तंमि तिणे ॥ ४ ॥

अह सो अच्छंदगो कुलिसघायनिवडियासु दससुवि करंगुलीसु जायवेलक्खभाओ सयलगामजणेण धिकारिज्जमाणो गओ तप्पएसाओ, ताहे सिद्धत्थो तस्सोवरि वाढं पओसंमावन्नो तं गामजणं भणइ-अरे रे दुरायारो महाचोरो एसो, लोएण वुत्तं-भयवं ! कस्स एएण चोरियं ?, सिद्धत्थेण भणियं-निसामेह, अत्थि एत्थ वीरघोसो नाम कम्ममारओ, सोऽविय निसामिऊण नियनामं लोयमज्झयाराओ आगंतूण निवडिओ चलणेसु, भणिउं पवत्तो यं-भयवं ! तुम्हेहिं जो समुक्कित्तिओ सो अहं, साहेह किं कीरउत्ति, सिद्धत्थेण भणियं-भइ ! तुह अमुगंमि काले दसपलियं वट्ठगं नट्ठपुवं ?, तेण भणियं-आमं, सिद्धत्थेण वुत्तं-तं एएण पासंडियाहमेण हरियं, वीरघोसेण भणियं-कत्थ

श्रीगुणचंद  
महावीरच०  
५ प्रस्तावः

॥ १५७ ॥

तं पुण पाविस्सं?, सिद्धत्थेण भणियं-एयस्स चेव पुरोहडे महिसिंदुनामस्स पायवस्स पुरत्थिमेणं हत्थमेत्तं गंतूण  
भूमिनिहितं उक्खणिऊण गिण्हसुत्ति वुत्ते सो कम्ममारओ लोणेण समं गओ जहोवइट्ठपएसे, आगरिसिऊण गहियं  
वट्ठयं, हलवोलं कुणंतो य जणो पडिनियत्तो जिणस्स अंतिए । तयणंतरं च पुणो सिद्धत्थेण भणियं-अन्नंपि सुणेह,  
अत्थि किमिह इंदसम्मो नाम गाहावई?, जणेण भणियं-अत्थि, एत्थंतरे सो इंदसम्मो निययनाममुक्कित्तिज्जमाणं  
सोऊण सयमेव उवट्ठिओ भणइ-आणवेह सो अहंति, सिद्धत्थेण भणियं-अत्थि भद! तुज्झ पुव्वकाले ऊरणगो  
पणट्ठो?, तेण भणियं-अत्थि, सिद्धत्थेण भणियं-अरे एएण अच्छंदएण सो हणिऊण खाइओ, अट्ठियाणि से उकु-  
रुडियाए वदरीए दाहिणे पासे उज्झियाणि अज्जवि चिट्ठंति, जइ कोऊहलं ता अज्जवि गंतूण पेच्छहत्ति वुत्ते वेगेण  
धाविया तदभिमुहं, अट्ठियाणि पलोइयाणि, कलकलं करंता आगया जिणसगासे, पुणरवि सिद्धत्थेण भणियं-एयं  
दुइज्जं दुच्चरियं, अन्नंपि तइज्जं अत्थि, परं नाहं कहिस्सं, ते य एयमायन्निऊण गाढं निब्बंधं काऊण पुच्छिउ-  
मारद्धा, कहं?—

देव! पसीय महापहु पुणोवि अण्णं न पसिणइस्सामो । अट्ठोवइट्ठमेकं एयं अम्हं निवेएसु ॥ १ ॥

जह जह न साहइ खुरो तह तह पुच्छंति आउला धणियं । सच्चं जायं एयं जमद्धकहियं हरइ हिययं ॥ २ ॥

एवं निब्बंधपरेसु तेसु सिद्धत्थेण भणियं-अरे मा तरलायह, अम्ह अभासणिज्जमेयं, जइ अवस्सं सोयच्चं ता

अच्छन्दक-  
पापण्डि-  
वृत्तम्.

॥ १५७ ॥

गंतूणं पुच्छह एयस्स चेव भज्जं, सा तुम्ह साहिस्सइत्ति, एयमायन्निऊण पधाविया तग्गिहाभिमुहं, इंओ य—सा अच्छं-  
 दयस्स भज्जा तदिवसं तेण पिट्टिया, वाढं पओसमावन्ना चित्तेइ—सोहणं जायं जं तस्स अंगुलीओ छिन्नाओ जणेण  
 धिक्कारिओ य, तहा इयानिं जइ गामो एइ ता सव्वं दुस्सीलयं पयडेमिच्छि विगप्पंतीए संपत्तो गेहंगणे गामजणो,  
 पुच्छिउं पवत्तो य, सा भणइ—मा इमस्स कम्मचंडालस्स नामंपि गिण्हह, जओ एस नियमगिणीए सहोयराए  
 सद्धिं विसए अणुभुंजइ, ममं निच्छइत्ति, एवमायण्णिऊण ते उक्किट्ठीसिहनायं कुणंता नियनियगिहेसु गया पण्णवेंत्ति-  
 जहा एरिसो तारिसो सो महापायोत्ति, एवं सो अच्छंदओ जणेण अवमाणिज्जमाणो कयवंभणहओ इव अपेच्छिज्ज-  
 माणो दुक्खभिक्खकवलंपि अपावमाणो एगया गंतूण जिणनाहं सकरुणं जोडिय करसंपुडं च भणिउमाढत्तो—

देवज्जय ! वज्जेसुं निवासमिह तं महाणुभावोऽस्ति । ठाणंतरेवि तुज्झं पूयामहिमं जणो काही ॥ १ ॥

अन्नत्थ गओऽहं पुण कित्तिमकणगं व नेव अग्घामि । सदरीए चिय गोमाउयस्स सूरत्तणं सहई ॥ २ ॥

तुह पुरओ जो विहिओ दुव्विणओ देव ! मूढहियएणं । सो मं दढकुवियकयंतदंडघाओव दुक्खवइ ॥ ३ ॥

एवं भणमाणे अच्छंदगे अचियत्तोग्गहोत्तिकलिऊण सव्वस्सापत्ति(पीत्ति)परिहारपरायणो भयवं नीहरिऊण मोराग-  
 सन्निवेसाओ उत्तरवाचालाभिमुहं पत्थिओ, अह मग्गे वच्चमाणस्स दक्खिणवाचालसन्निवेसं समइकंतस्स उत्तरवाचा-  
 लसंनिवेसं च अपावमाणस्स अंतरा सुवण्णकूलाभिहाणाए महानईए पुलिणं वोळित्तस्स भगवओ महावीरस्स खंधाव-



श्रीगुणचंद  
महावीरच०  
५ प्रस्तावः

॥ १५८ ॥

लंवि वत्थखंडं कंहंपि पवणकंपिज्जमाणं कंटए विलगिऊण निवडियं, सामीवि थेवं भूमिभागं गंतूण अत्थंडिले पडियं  
होज्जत्ति मणागमेत्तं वलियकंधरो तमवलोइऊण जहाभिमयं गंतुं पवत्तो । सो य पिउवयंसो पुवभणियवंभणो चिर-  
कालेण तं निवडियं वत्थखंडं पहिट्ठचित्तो गिण्हिऊण भयवंतं च वंदित्ता कुंडग्गामनयरमुवगंतूण पुवभणियतुन्ना-  
गस्स समप्पेइ । तुन्नागोऽवि अइनिउणं तुन्निऊण एगरूवं विरएइ । तओ सो वंभणो देवदूसं आदाय गओ नंदिवद्धण-  
नराहिवस्स समीचे, पणामियं तं वत्थं, राइणावि कोऊहलमुवहंतेण सुचिरं पलोइऊण भणियं—भह ! एवंविहं पवर-  
वत्थं कत्थ तए पावियं?, वंभणेण भणियं—देव ! महई एयस्स कहा, राइणावि भणियं—वीसत्थो सम्मं साहसु, तओ

जह दालिहोवहओ सुचिरं देसंतरेसु भमिऊण । नियमंदिरमणुपत्तो गिहिणीए तज्जिओ पुवं ॥ १ ॥

जह जिणनाहो करुणक्खरेहिं गंतूण भूरि विन्नविओ । अणुकंपाए तेणं जह दिन्नं देवदूसद्धं ॥ २ ॥

जह तुन्नाएण पुणो दूइज्जवत्थद्वलाभकजेण । जयगुरुणोच्चिय पासे सिक्खविउं पेसिओ सहसा ॥ ३ ॥

जह संवच्छरमेगं पुट्ठिमि ठिओ पुरागराईसु । सिस्सो इव परिभमिओ जयपहुणो विहरमाणस्स ॥ ४ ॥

जह वा सुवण्णकूलानईए कंटग्गलगवत्थद्धं । चइऊण गए नाहे तयं च गहिऊण चलिओ य ॥ ५ ॥

जह तुन्नागेण तयं दुखंडसंसीवणेण मेलवियं । तह सयलं नरवइणो निवेइयं तेण सविसेसं ॥ ६ ॥

एवं च निसामिऊण तुट्ठो नंदिवद्धणनरिंदो दीणारलक्खमेगं वत्थस्स मुल्लं दाविऊण सवहुमाणं सक्कारिऊण

नृपसंसदि  
विप्रोक्तं  
भगवद्भूतम्.

॥ १५८ ॥

भणइ-अहो भइ ! कहं भयवं विहरइत्ति, वंभणेण भणियं-देव ! सुणेह, सो जएकनाहो कयाइ फुट्टट्टहासजणियसं-  
तासेसु भूयभवणेसु गोदुहियाए दुद्धरं नियमविसेसमालंविऊण नासग्गसंगिचक्खुविकंखेवो मंदरोव थिमिओं ज्ञाणं  
झियाइ, कयाइ करालवेयालमालाउलासु पयंडपडियनरमुंडमंडलीसु सुसाणभूमीसु वीरासणं संठिओ निरुद्धउ-  
स्साससमीरपसरो सूरविंवनिहियनयणो मज्झंदिणंमि आयावेइ, कयाइ गुरुभारकंतनरोव ईसिअवणयकाएण पलं-  
वियभुयदंडो गामवहिया काउस्सग्गेण चिट्ठइ, कयाइ निकारणकुवियपिसायविहियतिवोवसग्गं सोक्खपरंपरं पिव  
सम्ममहियासेइ, कयाइ छट्ठममद्धमासाइतवविसेससुसियसरीरो पंतकुलपरिभमणलडुंछतुच्छासाराहार गहेण  
पाणवित्तिं निवत्तेइ ।

कइयावि हीणरूवेहिं दुट्ठसीलेहिं कीडमेत्तेहिं । पागयनरेहिं विहियं विसहइ सो तिबमुवसग्गं ॥ १ ॥  
सा आवयावि मण्णे निसुणिज्जइ जा जएकदेवस्स । दइयव दुत्तिवारा नेव समीवं समल्लियइ ॥ २ ॥  
एवं किर तस्स महायसस्स उत्थरइ दुत्थिमा भीमा । कइयावि तियसनिवहा पूयामहिमं पकुवंति ॥ ३ ॥  
इय नरवर ! तच्चरियं न मारिसो किंपि साहिउं तरइ । तारिसजणचरियाइं मुणंति जइ तारिसा चेवं ॥ ४ ॥  
एवं निसामिऊण राया सपरिसाजणो दीहरमुक्कनिस्सासो अच्छिन्ननिवडंतवाहापवाहाउलवयणकमलो सोगं  
काउमारद्धो । वंभणोऽवि गओ सगिहं । समप्पियं तुन्नागस्स मोल्लऽद्धं, सेसदवेण विविहं विलसंतो कालं बोलेइत्ति ।

इओ य-वद्धमाणसामी उत्तरवाचालसन्निवेशे गंतुकामो कुडिलपहपरिहारेण उज्जुयमग्गाणुलग्गकणगखलाभि-  
हाणासममज्जेण पट्ठिओ संतो निवारिओ गोवालेहिं, जहा-भयवं! एत्थ आसमे दिट्ठीविसो सप्पो अभिह्वेइ ता  
सा एएण पहेण वच्चह, सामीवि जाणइ, जहा-सो भविओ संवुज्झिहिति निवारिज्जमाणोऽवि गोवेहिं परकज्जकरणर-  
सियत्तणेण गओ कणगखलं नाम आसमपयं, जं च केरिसं?—

कप्पूरतमाललवंगतिणिससाहारपमुहतलुच्छन्नं । अइसुत्तयवासंतियकयलीहरनिवहरमणिज्जं ॥ १ ॥

सावसजणनिम्मियहोमहुयवहुच्छलियधूममलिणाओ । तेल्लोला इव रेहंति जत्थ साहीण साहाओ ॥ २ ॥

पवणपकंपियपलवकरोहिं जं वारइव जिणमितं । दिट्ठीविससप्पभयं कहइ व सउणाण सहेणं ॥ ३ ॥

एवंविहंमि तत्थ आसमपए आगंतूण ठिओ जक्खभवणमंडवियाए सामी काउस्सग्गेण चंडकोसियसप्पं पडि-  
बोहणत्थंति । को पुण एस सप्पो पुवभवे आसित्ति?, निसामेह—

अत्थि अणेगधणधण्णकणगससिद्धजणपरिच्छन्नो अदिट्ठपरचकोवह्वो समुदोव बहुवाणिओववेओ महासरोव वि-  
चित्तचित्तपत्तपउमाहिट्ठिओ रासिसमुदओव मेसविसमिहुणकन्नासमेओ गयणाओगोव सुरलोमगुरुवुहलोगाहिट्ठिओ  
कोसिज्जो नाम सन्निवेशो । तत्थ असेसदेसभासाविसेसवियक्खणो नाणविन्नाणकोऊहलविहिविहण्णू छंदलक्खणजो-  
इससत्थपरमत्थकुसलो छक्कम्मकरणनिरयचित्तो गोभदो णाम माहणो परिवसइ,

नियवुद्धिविणयविविहोवयारओ जेण सयलगामजणो । विहिओ पहिद्वहियओ एगं लच्छिं विमोत्तूणं ॥ १ ॥  
अहवा न सो कोऽवि गुणो जो तस्स न विज्जए दियवरस्स । तं नत्थि किंतु जं भुंजिएहिं दिवसं स वोलेइ ॥ २ ॥  
एवं च धणविरहेवि सो अविचलचित्तत्तणेण मणागंपि दीणत्तमदंसितो नियनियपरिग्गहत्तणेण चेव संतोसमुव-  
हंतो चिंतेइ-अहो महाणुभावा ! इमे धणिणो जे इमीए सिरीए परिग्गहिया पीडिज्जंति दाइएहिं विलुप्पिज्जंति  
नराहिवेहिं अभिभविज्जंति तक्करनियरोहिं मग्गिज्जंति मग्गणगणेहिं अणुहवंति विविहावयाओ, पयमेत्तंपि न परि-  
भमंति सच्छंदयाए, तुच्छऽपत्थभोइणोवि अभिलसिज्जंति वाहीए, अहं पुण एत्तो एगस्सवि अणत्थस्स न गोयरमु-  
वगओत्ति, एवं तस्स परिभावंतस्स वचंति वासरा । अन्नया य सो सिवभद्दाभिहाणाए निययपणइणीए भणिओ,  
जहा-अज्जउत्त ! आपन्नसत्ता वहामि अहमियाणिं, पसवसमए विसेसेण मह ओसहाइणा कज्जं भविस्सइ, तो कीस  
तुमं न किंपि पुरिसयारमवलंवेसि ? न वा दवोवज्जणोवायं विगप्पेसि ?, न हि अणागयत्थचिंतापरंमुहा सलहि-  
ज्जंति पुरिसत्ति, सो एवमायन्निज्जण तक्खणविसुमरियपुव्वविवेओ जलहिद्व मेहोदएणं कुवियंप्पकल्लोलमालाउलो परि-  
भाविउमारद्धो-किं एत्तो ववसायं करेमि ? कं वा जणं अणुसरामि ? को वा इमस्स कज्जस्स होज्ज साहेज्जदायगो ?  
कत्थ व गयस्स एयं सिज्जोज्ज ? को इमस्स हेउत्ति, इय किंकायवयवाउलत्तजलहिंमि सो बुडो, ताहे सिवभद्दाए  
भणिओ सो-कीस वाउलो होसि ?, केत्तियमेत्तं एयं तुह विमलकलाकलावस्स ?, जइ कमविहु धणवंतं गंतुं मग्गेसि

सोऽवि ध्रुवमेयं कज्जं पसाहइस्सइ, दुलहो तुम्हारिसो अतिही, गोभदेण भणियं—पिए! साहेसु परपत्थणं सोत्तूण  
अन्नमुवायं, पत्थणा हि नाम नरस्स जणेइ मरणसमयनिविसेसत्तणं, तहाहि—जायणापयट्टस्स सन्निवायाभिभूयव  
पक्खलइ वाणी विगलंति विच्छायछायाओ अच्छीओ विगयसोहं हवइ वयणकमलं कंपंति अंगाइं पयट्टंति दीह-  
दीहा उस्सासा संखुब्भइ हिययंति । अविय—

तावच्चिय कुमुयसयंकनिम्मला विप्फुरंति गुणनिवहा । जाव परपत्थणाकलुसपंकलेवं न पावेंति ॥ १ ॥

तावच्चिय पूइज्जइ गुरुत्तबुद्धीए परमभत्तीए । जावऽत्थित्तं सत्तुत्तणं व पयडेइ न पुरिसो ॥ २ ॥

तावच्चिय सुहिसयणत्तणाइं दंसंति निच्छियं लोया । देहित्ति दुट्ठमक्खरजुयलं जा नेव जंपेइ ॥ ३ ॥

देहित्ति जंपिरेणं माणविमुक्केण विणयहीणेणं । धम्मत्थवज्जिएण य जाएणवि को गुणो तेण ? ॥ ४ ॥

ता अन्नमुवायंतरमहुणा मम दुक्करं पि किंपि पिए ! । साहेसु पत्थणंपिहु मरमाणोवि हु न काहामि ॥ ५ ॥

इय सा तन्निच्छियमुवलब्भ खणमेगं चिंतिऊण भणिउमारद्धा—अज्जउत्त ! जइ एवं ता अत्थि अन्नो उवाओ,

परं बहुसरीरायाससज्जो अचिरकालसाहणिज्जो य, जइ भणह ता निवेएमि, गोभदेण भणियं—पिए! को दोसो ?, निवे-  
एहि, तीए भणियं—सुणेसु, अत्थि पुवदेसे असंखदेवउलमालालंकिया वाणारसी नाम नयरी, तीसे समीवे फुरंतफा-  
रभंगुरतरंगाविद्धविसुद्धसलिला हंसचक्कवायमिहुणोवसोहिया अणवरयवहंतमहासलिलप्पवाहपूरियरयणागरा गंगा नाम

महानई, तीसे तडमि बहवे दूरदेसंतरागयराईसरसेट्टिसेणावइदंडनाहप्पमुहा जणां केइ परलोगत्थिणो केइ  
कित्तिजसत्थिणो केइ अणत्थपडिघायत्थिणो केइ पियरत्तप्पणत्थिणो अणवरयं कारावित्ति महाहोमं पाडित्ति  
पिंडं दित्ति सुवन्नदाणं सकारित्ति उद्धूलियचलणे माहणेत्ति, अओ अज्जउत्त ! जइ तुमंपि तत्थ वचसि ता उवत्थाण-  
मेत्तेण पत्थणाविरहेऽवि पावेसि कणगदक्खिणं, थेवमेत्तकालेण य पडिनियत्तिहिसि, इमं निसामिऊण भणियं गोभदे-  
ण-पिए ! मुद्धाऽसि तुमं, सवणरमणीया खलु दूरदेसवत्ता, सिवभहाए भणियं-अज्जउत्त ! तहावि भवणनिविट्ठस्स का  
तुज्झ फज्जनिप्फत्ती ? गोभदेण भणियं-किमजुत्तं ? एवंपि होउ, कुणसु संवलं जेण वच्चाभि, तओ तीए कयं से नि-  
मित्तं पाहेज्जं, अन्नदिवसे संवलगहत्यो पयट्ठो सो वाणारसीसंमुहो, कमेण वचंतेण दिट्ठो निहुरसरीरसंठाणो नियंसि-  
यवत्थजुयलो निराभरणोवि अहिगंसरीरप्पभाए उवसोहंतो वज्झागारेणविलक्खिज्जमाणातिसओ पंवरपाउगाधिरूढो  
रत्तिविरहिओ वम्महोघ पच्चक्खो सलीलं असंभंतो पहे वचंतो एगो सिद्धपुरिसो, तं च संभमभरियाहिं अच्छीहिं जाव  
पेच्छइ ताव संभासिओ अणेण-भो गोभद ! समागओऽसि ? किं संपयं तुमं वाणारसिं गंतुमिच्छसित्ति वुत्ते सवि-  
म्हयं गोभदो चित्तिउमारद्धो-अहो कहं अदिट्ठं असुयं मं पच्चभिजाणइ ? कह वा मम गिहिणीए य एगंतजायं इमं  
गमणवइयरं उवलक्खेइ ? सव्वहा न एस सामन्नो हवइत्ति, तहा जो एत्तियं मुणइ सो अन्नंपि मुणिस्सइ, ता देवयं  
व उवचरेमि एयं, जइ पुण एत्तोच्चिय निप्फत्ती होज्जत्ति विभावित्तो जोडिय करसंपुडं तं भणिउमाढत्तो-अज्ज !

श्रीगुणचंद  
महावीरच०  
५ प्रस्तावः  
॥ १६१ ॥

एवमेयं, सस्मं तुब्भोहिं वियाणियं, तेण भणियं—भद्! एहि समं चिय, जेण तहिं वच्चाओ, पडिवन्नं गोभदेण, गंतुं पयट्ठा, खणंतरे जाए भोयणसमए गोभदेण भणियं—अज्ज! पविसह गाममज्जे, करेमि भोयणोवक्कमं, अइकालो वट्ठइत्ति, विज्जासिद्धेण भणियं—सोम! किमत्थं पविट्ठोहिं कायवं?, एहि अज्जवि जाममेत्तो वासरो कोमला सूरकि- रणा थेवमग्गं अइक्कंता य, गोभदेण भणियं—जं तुब्भे वियाणह, तओ पुणो पयट्ठा गंतुं, मज्झंदिणसमए य संपत्ता बहलतरुसंडसंछण्णं उज्जाणं, दिट्ठा य तत्थ अच्चसलिलपडिहत्था कमलकेरवकल्हारपरागपिंजरहंसोवसोहियतीर- देसा एगा महासरसी, पविट्ठा तत्थ, कयं मज्जणं, विहिया मुहसुद्धी, पयट्ठो य गोभदो देवयाणुसरणं काउं, इय- रोऽवि ठिओ समाहीए ।

एत्थंतरंमि बहुभक्खभोयणा रसवई गुणसमिद्धा । बहुवंजणपडिपुण्णा मंतपभावेण अवयरिया ॥ १ ॥  
कच्चोलथालदवीसिप्पिसणाहो उवक्खरो सव्वो । सुविणीयपरियणेणप्पिओव पुरओ ठिओ तस्स ॥ २ ॥

एरिसं च परमब्भुयभूयं वइयरमवलोइऊण विम्भिओ गोभदो, भणिओ य विज्जासिद्धेण—गोभद्! पगुणो भव, कुणसु भोयणंति, जमज्जो आणवेइत्ति पडिवज्जिऊण तव्वयणं उवविट्ठो सो भोयणकरणत्थं, विज्जासिद्धोऽवि परिवे- सिउमारद्धो, कमेण य निवत्तियभोयणंमि गोभदे सयमुवविट्ठो विज्जासिद्धो, गोभदेणवि कओ से परिवेसणाइवा- वारो । एवं च निवत्तियंमि भोयणे विज्जासिद्धविमुक्केकहुंकाराणंतरमेव अइंसणमुवगया थालाइसमेया रसवई, खण-

विद्यासिद्ध  
संसर्गः  
भोजनं  
शय्यादि च

॥ १६१ ॥

मेतं च वीसमिऊण माहवीलयाहरे निरुद्धिगंगहियया विविहकहाओ कहेमाणा संपट्टिया गंतुं, गच्छंताण य  
जाए रयणिसमए गोभदेण भणियं—अज्ज ! कलयंठकंठसच्छहा समुच्छलइ तिमिररिंछोली न लक्खिज्जंति  
संपयं निण्णुण्णया महिमग्गा निहावसविसंतुलाइं घुम्मंति लोयणाइं पयत्तसंचालियावि न चलंति चलणा,  
ता गच्छह गामे, कुणह वीसामंति, विज्जासिद्धेण भणियं—सोम ! सिग्घगईए एहि मुहुत्तमेत्तं, किं गामपवे-  
सणकज्जं, गोभदेण भणियं—एवं हवउत्ति । ताहे जाममेत्तं अद्धाणमइलंधिऊण ठिया एगत्थ पएसे । तयणंतरं च  
विज्जासिद्धो आवद्धपउमासणो निरुद्धसमीरप्पयारो ज्ञाणं काउमारद्धो, अह—

कणगकलसकलियं रणंतमणिकिंकिणीनिवहरम्मं । सुसिलिट्ठलट्ठधिरथोरथंभसोहंतवरसालं ॥ १ ॥

सुविभत्तचित्तेरहंतवेइगावलयलीढपेरंतं । वज्झपएसनिवेसियमहल्लपल्लंकसोहिलं ॥ २ ॥

गयणाओ अहापवरं विमाणमेगं समोयरेऊणं । विज्जासिद्धस्स पुरो लहुं निविट्ठं धरणिवट्ठे ॥ ३ ॥

अह तत्तो नीहरिऊण दिप्पंतमणिमउडलंकियसिरा विमलकुंडलकंतिविच्छुरियगंडयला पवरमुत्तासरिविराइय-  
सिरोहरा हारलयाच्छाइयथणकलसा पंचरायमणिकंकणमंडियकोमलवाहुलया रोमावलीसणाहमुट्ठिगेज्झमज्झभाग-  
देसा रसणादामसंगयनियंवफलया नियंसियपंचवन्नदिवदुसा झंकारमणहरमणिनेउराणुगयचलणा हरियंदणरसवि-  
च्छुरियसरीरा अप्पडिमरूवा एगाए समाणरूवजोवणाइगुणालंकियाए विलयाए अणुगम्ममाणा समागया विला-



श्रीगुणचंद  
महावीरच०  
५ प्रस्तावः

॥ १६२ ॥

सिणी, जोडियकरसंपुडा य विज्जासिद्धं भणिउमारद्धा, जहा-भो महायस ! उवसंहरेसु संपयं मंतसुमरणं अलंकरेसु  
विमाणमेयंति निसामिऊण उट्टिओ विज्जासिद्धो, पविट्टो विमाणव्भंतरे निसन्नो सेज्जाए, उवणीयाणि य तस्स  
तंवोलवीडगाणि, ताहे वाहरिओ विज्जासिद्धेण गोभदो, तंवोलदाणपुव्वगं च विसज्जिओ निदाकरणाय, दूरे ठाऊण  
य तदीयमाहप्पविम्भियमणो पसुत्तो एसो, विज्जासिद्धोवि ताहिं रमणीहिं समं विविहसंकहाहिं गमिऊण खणमेकं  
जेट्टाए अणुचरिं जुवइं भणइ-भदे ! तुमं इमस्स गोभदस्स माहणस्स भज्जाभावदंसणेण अत्ताणं पवित्तं करेसु, तीए  
वुत्तं-एवं करेमि, अह जायंमि विजणे विज्जासिद्धो पारद्धो इयरीए समं भोगे उवभुंजिउं, सावि तदुवरोहेण गया  
गोभदसमीवे, पवोहिऊण सिट्ठो विज्जासिद्धाएसो, तेण य कुसलमइत्तणेण नाऊण कज्जपरमत्थं भणिया सा,  
जहा-मयच्छि ! भगिणी तुमं मे होसि, ता अलं एत्थ पत्थुयत्थवित्थरेणं, जहाभिप्पेयं समायरसु, अकज्जपवित्तीएवि  
जओ न एयस्स हयजीवित्थस्स कोऽवि समुप्पज्जइ गुणो, अविय—

अइघोरमारुयाहयनलिणीदललग्गसलिलवचवलं । जीयं सुपालियंपिहु न चिरावत्थाणमणुहवइ ॥ १ ॥  
विविहोवभोगविसयाणुकूलयालालियंपि बहुकालं । परिसडियविंटफलमिव विगलइ गत्तंपि अचिरेण ॥ २ ॥  
सुव्वंति य नरएसुं धम्मविरुद्धत्थकरणसत्ताणं । सत्ताणं तिक्खदुक्खेसाइं तेण कुणिमो कहमकज्जं ? ३ ॥  
सकलत्तसंगईविहु उउकालाओ परेण पडिसिद्धा । किं पुण पररमणीजणविसयपसंगो समयसत्थे ॥ ४ ॥

युवतियु-  
ग्मागमः  
गोभद्रस्य  
शीलं.

॥ १६२ ॥

नियजीवस्सवि उम्मग्गगामिणो जइ करेमि न निरोहं । तां कह अन्ने अणयारचारिणो नणु निरुंभिस्सं? ॥ ५ ॥  
 इय गोभदेण तहा कहंपि संभासिया सवेरग्गं । नियभायनिधिसेसो जह जाओ तीए पडिवंधो ॥ ६ ॥  
 खणमेत्तं च विगमिऊण भणियं तीए—अहो महाणुभाव! सुंदरो तुहाभिप्पाओ, एयं चिय सप्पुरिसलक्खणं,  
 एयं चिय धम्मसच्चस्सं, एत्तो सयलकल्लाणोवलंभो, इमाओ असेसदुस्सज्झविज्जासिद्धीओ हवन्ति, एयं खु सुरासुरा-  
 णवि दुरणुचरं, एयाणुगओ य नरो न रोगसोगदुक्खेहिं वाहिज्जइ, ता पत्तं तुमए जम्मजीवियफलं जस्सेरिसो  
 दुक्करपरित्थीसेवापरिहरणपरिणामो, एयं च कुणमाणेण तए अहंपि निओइया सच्चकामुयसिद्धिभाभेणंति, गोभदेण  
 भणियं—कहं चिय मए निओइया सच्चकामुयसिद्धीए?, तीए भणियं—महायस! भायनिधिसेसोत्तिकाऊण साहि-  
 ज्जइ तुज्झ एस वइयरो, निसामेहि, गोभदेण भणियं—एसो निसामेमि, तीए कहियं—

अत्थि सयलतइलोयंविक्खायं अणेगअच्चब्भुयभूयाइसयजणियजणविहयं आगरो विज्जारयणाणं कुलभवणं तं-  
 तप्पओगाणं ठाणं खुडसिद्धीणं जालंधरं नाम पुरवरं, जत्थ—

आगट्ठिवसीकरणप्पओगअद्दिस्सकरणकुसलाओ । नहगमणदूरदंसणपमोक्खलद्धीसमिद्धाओ ॥ १ ॥

हुंकारमेत्तपडिभिन्नसत्तुसंदोहतुट्ठहिययाओ । निरुवमरूवनिरक्खियवंमहमहिलाभिमाणाओ ॥ २ ॥

अट्ठप्पयारअणिमाइसिद्धिसंबंधसस्सिरीयाओ । निवसन्ति जोगिणीओ देवाणवि वंदणिज्जाओ ॥ ३ ॥

श्रीगुणचंद्र  
महावीरच०  
५ प्रस्तावः।

॥ १६३ ॥

इयरजणा दुविणयं जं नो दंसंति तं किमच्छरियं? । तासिं महावलाणं संकइ कुविओ कयंतोऽवि ॥ ४ ॥

सुखयरजक्खरक्खसमडप्परप्फंसणावि नूण जरा । निच्चावट्टियजोवणगुणाण जासिं न संकमइ ॥ ५ ॥

चिरदूरकालवोलीणभूवईणं समग्गचरियाइं । अज्जवि जाओ पयडंति सेललिहियप्पसत्थिव ॥ ६ ॥

इय तारिसपयडपभावजोगिणीचक्कवालकलियस्स । नयरस्स तस्स भण केण वन्नणा तीरण काउं? ॥ ७ ॥

तत्थ य अहं चंदलेहाभिहाणा जोगिणी परिवसामि, एसावि विज्जासिद्धसमीववत्तिणी मम जेट्ठा भइणी पसा-  
हियपवरविज्जा अचंतदरिसणिज्जा जोगिणीपीठस्स चउत्थट्ठाणपूयणिज्जा चंदकंतानामा, गोभइेण भणियं-भइणि ।  
को एस विज्जासिद्धो?, किंनामो?, कहं वा एरिसमाहप्पो?, किं वा एस तुह जेट्ठभइणीए एयं उवचरइत्ति, कहेसु  
वाढं कोऊहलाऊलं मे हिययं, चंदलेहाए भणियं-कहेमि, एसो हि कामरूपाभिहाणजोगिणीपरिवेडियस्स डमरसी-  
हस्स पुत्तो ईसाणचंदो नाम, एएण य पुरा अणेगप्पयाराओ साहिऊण विज्जाओ अखलियपसरं सयलकामियसिद्धिं  
समीहमाणेण कच्चाइणीए भगवईए पुरओ कओ अट्ठोत्तरविल्लक्खेण होमो, तित्थियमित्तेणवि जाव न परितुट्ठा  
भगवई ताव आकट्ठिऊण खग्गधेणुं समारद्धो नियकंधरं छिंदिउं,

नियजीवियनिरवेक्खो, कंठद्धं जा न छिंदए एसो । ताव सहसत्ति कत्तोवि आगया देवि रुइाणी ॥ १ ॥

अहह महाकट्टमिमं कीस तुमं पुत्त! ववसिओ भीमं? । इय जंपिरीए तीए कराओ लुरिया लहुं हरिया ॥ २ ॥

तादे इमेण भणियं देवि । पसीयसु ममेत्ति एणावि । पडिवज्जसु सिरकमलेण पुयणं होउ सीसेण ॥ ३ ॥  
 देवीए तओ भणियं पुत्तय ! तुह साहसेण तुट्ठमिह । वरसु वरं एत्ताहे पज्जत्तं देहपीडाए ॥ ४ ॥  
 तजो एएण भणियं-सामिणि ! जइ सच्चं चिय तुट्ठासि ता जं तुमए पुत्तत्ति अहं वागरिओ एसो चिय मम वरो,  
 एत्तो य पुत्तपुट्ठीए मम पेच्छेज्जासित्ति भणियावसाणे दाऊण सवसमीहियत्थकरं रक्खावलयं पडिवज्जिऊण तवयणं  
 अहंगणमुत्तगया कयायणी, एसोऽवि पावियतिलोयरज्जं पिव अत्ताणं मन्नमाणो रक्खावलयमुवहंतो सगधं अक्खलि-  
 यगमणो सपत्थ पियंभिउमाढत्तो । अविय—

न गणइ नरवइवरगं नय भीमभएवि उवहइ कंपं । सच्छंदलीलगमणो जमंपि उवहसइ सवलेणं ॥ १ ॥  
 अंतरेसु निवसइ उवभुंजइ कुलगयावि विलयाओ । आगरिसइ दूरगयंपि वत्थु वरमन्तसत्तीए ॥ २ ॥  
 जप्पभिइं चिय कयाइणीए एयस्स वाडुमूलंमि । वद्धं रक्खावलयं तत्तो चिय चिंतियं लहइ ॥ ३ ॥  
 अह अन्नया कयाई हिंडंतो एस महियलं सयलं । संपत्तो जालंधरपुरंमि रामाभिरामंमि ॥ ४ ॥  
 दिट्ठा य जोगिणीजणमज्झगया विहियपवरसिंगारा । अह तत्थ चंदकंता एसा मम जेट्ठिया भयणी ॥ ५ ॥  
 ताहे दृढेण वररुवजोयणाइसयरंजिओ एसो । कुणइ पसंगमिमीए सद्धिं सद्धम्मनिरवेक्खो ॥ ६ ॥  
 दाऊण कइवय दिणे सच्छंदं विविहदिवकीलार्हि । अणवट्ठियमणपसरो अमुणिज्जंतो चिणिक्खंतो ॥ ७ ॥

श्रीगुणचंद  
महावीरच०  
५ प्रस्तावः

॥ १६८ ॥

कहं पुण चिंतियमेत्तसमत्थवत्थुलाभेऽवि संपयं तुह एरिसं अचित्तिणिज्जं विसममावडियं?, विज्जासिद्धेण भणियं-देवया-  
दिन्नरक्खावलयविरहो एत्थ कारणं, परं भद! तुमए नित्थारिओऽहं इमाओ आवयाओ, साहु साहु तुह वियक्खणत्त-  
णस्स, एरिसमवत्थंतरनिवडियस्स न तहा जाया मह देहपीडा जहा तुह अदंसणेणं, मत्ते इह भवे चिय पसन्ना भा-  
गिरही देवी जीए तुमं अणुवचरियपरूढपणओ मित्तो पणामिओ, ता वाढं पसन्नं मे मणो, वरेसु जहा पियंति भणिए  
गोभदेण भणियं-अज्ज! देवो वऽण्णो जाणइ कोवि अणुवचरियपरूढपणओ कस्सवि मित्तो पणामिओ, विज्जासिद्धेण  
भणियं-अलं इमीए संकहाए, वरेहि जहिच्छियं वरं, गोभदेण भणियं-महापसाओ, पत्थावे वरिस्सामि, एत्थंतरे डम-  
डमिरडमरुयनिनायभरियभुयणंतराला वराभरणकिरणविच्छुरियंनहंगणा दिवविमाणारूढा पविट्ठा चंदलेहा य चंद-  
कंता य, तओ गोभदेण भणियं-विज्जासिद्ध! कहमिण्ह तुमं एयासु वट्ठिस्ससि?, विज्जासिद्धेण भणियं-जहा सत्तुसु  
वट्ठिज्जइ, गोभदेण भणियं-अज्ज! मामेवं जंपसु, जओ विसवलिव वट्ठंती वेरपरंपरा न कोयल्लमावहइ, विज्जासिद्धेण  
भणियं-ता किं कीरइ?, विवक्खाभिभवेणेव अत्तणो अवत्थाणंति, नहि निसासंतमसमखंडिऊण पभवइ मायंडमंडलं,  
नेव य पंकत्तणमपावेऊण धूलिपडलं चिरावत्थाणं वंधेइ सलिलं, गोभदेण भणियं-अत्थि चिय एस ववहारो, परं सम  
वयणोवरोहेण ताव उदासीणेण होयवं तुमए, विज्जासिद्धेण भणियं-जं तुमं जाणासि, एवं बुत्ते जणेण अमुणिज्जंतो  
तत्तो सो नीहरिऊण पट्ठिओ तंमंदिराभिमुहं, इंतो य दिट्ठो चंदलेहाए, रयणियरप्पगासदिट्ठरूवाणुमाणेण य

विद्या-  
सिद्धस्य  
स्वास्थ्यं  
मेलय.

॥ १६८ ॥

जायपञ्चभिन्नाणाए तीए गाढमालिंगिऊण सुहासणत्थो हरिसुल्लसियंलोयणाए पुच्छिओ-अज्ज ! कत्तो कहं वा समा-  
 गओऽसित्ति?, तेणावि से साहिओ सामन्नेण वुत्तंतो, चंदलेहाए भणियं-सुट्ठु कयं तुमए जमेत्थ पत्थावे समाग-  
 ओऽसि, जओ अरुह पडिपुत्ता इयाणिं सर्वे मणोरहा, गोभदेण भणियं-कहं चिय?, तीए भणियं-जं तइया तुमए  
 मम वंभचेरखंडणा रक्खिया तेण सत्तरत्तपज्जंते सम्ममाराहिज्जमाणां सिद्धा भगवई सयंपभाभिहाणा विज्जा, सो य  
 दुट्ठविज्जासिद्धो ईसाणचंदो सधकासुयरक्खावल्लयविहूणो जण्डुकन्नाजलमंज्जंगओ झसोव विवसो पाविओ, गोभ-  
 देण भणियं-कहमियाणिं सो संठविओ?, तीए भणियं-जहा दुट्ठकरिवरो, तेण भणियं-किमित्थं पुण तहा धरि-  
 ज्जइ?, तीए भणियं-कसिणचउहसीए चंडिगाए वलिविहाणत्थं, गोभदेण भणियं-जइ एवं ता दंसेसु तं थेवदिणपरि-  
 चियत्तणेण तेण समं मे किंपि वत्तवमत्थि, तीए भणियं-को दोसो?, एहि जेण दंसेमि, तओ पट्टियाइं गंतुं, जाव  
 य केत्तियमेत्तमंतरमुवगया चंदलेहा ताव दिट्ठो विज्जासिद्धो वाहुवद्धरक्खावल्लओ वियलियनियलवंधणो महाकोव-  
 फुरंताहरो पायडियनिडालभिउडिभासुरोत्ति, तं च दट्ठूण चित्तिंयमेयाए-अहो कहं रक्खावल्ललाभो इमस्स रक्ख-  
 सस्स?, कहं वा नियडच्छेओ संपत्तो?, अहो अवितकियं केरेसमावडियंति?, जायभयावि आगारसंवरणं काऊण तेण  
 समेया समीवमुवगया एयस्स, तेणवि इतिं दट्ठूण ईसि पच्छादयकोवचिरागेण संभासिया, जहा मदे! उवविस,  
 तओ आसणनिसन्नाए चंदलेहाए पुणो कइयवेण उट्ठमवल्लोऊण भणियमणेण-अहो कहं पुवपरिचिओ गोभहो

श्रीगुणचंद  
महावीरच०  
५ प्रस्तावः

॥ १६९ ॥

दीसइ?, इओ एहि भइ!, किं तुमं पि अहमिव एयाए छलणगोयरमुवगओत्ति जेण वाणारसीविमुक्कोवि एत्थ पेच्छि-  
जसि?, गोभहेण चिंतियं-अहो गाढो अमरिसो, ता तहा करेमि जहा अवरोप्परं पणयभावो हवइ एसिं, अणु-  
चिया हिओवेहा विसिट्ठपुरिसाणंति, इइ संचिंतिऊण आवद्धकरंजली सो भणिउमाढत्तो—

हे भइणि चंदलेहे! हे विज्जासिद्ध! गुणगणसमिद्ध-जइविहु कुसलत्तणओ तुम्हाण न किंपि वत्तवं ॥ १ ॥

तहविहु असरिसपेमप्पबंधसंवंधतरलियमणोऽहं । दियभावभूरिजंपिरसभावओ किंपि साहेमि ॥ २ ॥

जो तुम्ह परोप्परमेस रोसलेसो कहं पि संभूओ । सो मोत्तवो होइत्ति परमवेरिध दुहदायी ॥ ३ ॥

जेणानलुव पढमं नियठाणं दहइ एस वहुंतो । ता अवगासोऽवि कहं दायवो होइ एयस्स? ॥ ४ ॥

अह वेरिसु दोसकरणत्तणेण कोवो समुलसइ तुम्ह । कोवेच्चिय किं कोवं न कुणह दुक्खेक्कहेउंमि? ॥ ५ ॥

न चलइ गरुयाण मणो अवराहपए अईव गरुएवि । जह जलहरेण खुब्भुइ गिरिसरिया तह न नइनाहो ॥ ६ ॥

तथा-अवयारे अवयारो जं कीरइ एस नीयववहारो । उवयारकारगच्चिय गरुया अवयारिणि जणेऽवि ॥ ७ ॥

इहरा विसेसलंभो उत्तमनीयाण कह णु जाएज्जा! । न हि एगरुववत्थुंमि होइ विविहाभिहाणाइं ॥ ८ ॥

अलमेत्तो भणिणं तुम्हं जइ मम गिरंमि पडिवंधो । जइ उत्तमगुणमग्गेण विहरिउं विज्जए विच्छा ॥ ९ ॥

जइ ससहरजोणहासत्थहं च किंतिं सया समभिलसह । पुवाणुसयं मोत्तुं परोप्परं कुणह ता पणयं ॥ १० ॥ जुम्मं ।

विद्या-  
सिद्धादीनां  
परस्परं  
मेलकः

॥ १६९ ॥

अण्णं च-हे विज्जासिद्ध ! पओसमुवहंतो कहं न लज्जिहिसि ? । इत्थीसु तिहुयणंमिवि अवज्झसब्भावसिद्धासु ॥ ११

इतिहासपुराणपमोक्खसत्यविक्खायमवि इमं तुज्झ । पम्हुट्टंकीस ? महाणुभाव ! कुसलावि मुज्झंति ? ॥ १२ ॥

जायन्निऊण . एवं विज्जासिद्धेण जायलज्जेण । भणियं आएसं मे देहि लहुं जमिह कायवं ॥ १३ ॥

उप्पहपवन्नमारिसजणवोहणकारणेण निम्मविथा । वेयत्थमहानिहिणो तुम्मे नूणं पयावइणा ॥ १४ ॥

एवं सोऊण गोभदेण भणियं-साहु साहु विज्जासिद्ध ! को अत्तो एवं वियाणेइ वोत्तुं ? , अहवा-को सिसिरइ नि-  
सिनाहमंडलं ? , को वा चित्तेइ सिहिसिहंडाइ ? । देहसहसमुग्गओ चेव विणओ तुम्हारिसजणाणं ॥ १ ॥ उट्टेसु  
संपयं कुणसु चंदलेहाए पणामं, चंदलेहे ! तुमंपि विमुक्कमच्छरं परिचत्तपुद्वाणुसयं नियसु इमं सयणनिविसेसं,  
विहेसु इमेण समं पणयभावं, इय भणियावसाणे निवडिओ चंदलेहाए चलणेसु विज्जासिद्धो, भणिउमारद्धो  
य-सुयणु ! तारुन्नमएण वा विज्जावलावलेवेण वा अविवेयसुलभदुविणएण वा मए जमवरद्धं तं तुमए मरिसियवंति,  
चंदलेहाए भणियं-विज्जासिद्ध ! अलं खामणेणं, सवहा मंदभागिणी अहं जा येवमेत्तावराहेवि एवंविहमणत्थं  
काउं ववसिया ।

एत्थंतरंमि कइवयचेडीचक्केण परिवुडा इत्ति । विम्हयनिब्भरहियया समागया चंदकंतावि ॥ १ ॥

ताहे गोभदेणं विज्जासिद्धो पयंपिओ एवं । जीए कए वइरमिमं तहि(तुह)ट्टिया सा इमा सुयणु ॥ २ ॥



श्रीगुणचंद  
महावीरच०  
५ प्रस्तावः

॥ १७० ॥

ता परिमुक्तामरिसं सविसेसं कुणसु खामणमिमीए । रोसावेसो थेवोऽवि होइ अग्गिब दुहहेऊ ॥ ३ ॥  
इयं भणिए भइणीसिद्धसंधिसंघडणतुट्टहिययाए । तीए विज्जासिद्धेण खामणा सायरं विहिया ॥ ४ ॥  
एवं च पणट्ठकोवाणुबंधाणं एगजणणीजणियाणं व जायदढपेमाणं तेसिं परोप्परं जंपिराणं महाणसिणीए आगं-  
तूण विन्नत्ता चंदकंता-देवि ! कुणह पसायं, एह गेहम्मि, निप्फन्ना रसवई, मज्झंदिणमणुपत्तो य भयवं भुवणचक्खू  
दिणयरोत्ति, एवं च निसामिऊण चंदकंताए भणियं-हे चंदलेहे ! भोयणत्थमुवनिमंतेसु पाहुणगे अइकालो वट्टइत्ति,  
तओ चंदलेहाए उट्टविओ विज्जासिद्धो गोभदो य, गया भोयणमंडवं, कयं समगं चिय विविहविच्छित्तिप्पहाणं  
भोयणं, तदुत्तरं च दवावियाइं कप्पूरधूलिधूसरपूगीफलदलसणाहाइं तंबोलवीडयाइं, एत्थंतरे विज्जासिद्धेण सिरंमि  
करकमलं कट्टु भणिओ गोभदो, जहा-पुव्वपडिवन्नं गिणहसु वरं, नियत्तिउकामोऽहमियाणिं, गोभदेण भणियं—

जइ सच्चं चिय तुट्टो वियरेसु तुमं वरं महाभाग ! । ता तं एयाहिं समं (पे)म्मं सययं वहेज्जासि ॥ १ ॥  
एवं कयंमि तुमए विहियं चिय मज्झ चिंतियमसेसं । परचित्ततोसदाणाओ दाणमन्नं पि किं अत्थि ? ॥ २ ॥  
किर सिविवलिहरिचंदप्पमोक्खविस्संभराहिवा पुव्वं । नियजीवियदाणेणवि अकरेसु जणाणमुवयारं ॥ ३ ॥  
खणनस्सरस्स दुहनिवहभाइणो जीवियस्स फलमेयं । जं उवयारो कीरइ दुहसंतत्ताण सत्ताणं ॥ ४ ॥  
विज्जासिद्धेण तओ भणियं भो कीस वाहरसि एयं ? । तुम्हारिसाणवि पुरो किमन्नहा हुंति उल्लावा ? ॥ ५ ॥

परस्परं  
क्षामणं  
प्रीतिश्च ।

॥ १७० ॥

निहाधुम्मिरनयणावि सज्जणा जं वयंति किर वयणं । नियजीवियवणवि तं तह अहियं समत्थंति ॥ ६ ॥

मिच्छाकारिं मिच्छा व भासिणं मं धुवं सुणेऊण । कच्चाइणीवि देवी लज्जइ किं पुण परो लोगो ? ॥ ७ ॥

ता-गोभइ ! परिचयसुं एत्थ मम संतियं अविस्सासं । अन्नं मग्गेसु वरं मा कीरउ मे पणयभंगो ॥ ८ ॥

एयमायन्निऊण गोभदेण भणियं-जइ एवं ता परिहरेसु परमहिलापसंगं, एसो हि कारणं वेरपरंपराए कुलभ-  
वणं अणत्थसत्थाणं वत्तणी नरयनगरस्स वंधवो दुव्विणयस्स ठाणं परिभवस्स आगरो अकित्तीए मसिकुचओ निय-  
कुलस्स निलओ पावपडलस्स मूलंकसो गुणकलावस्स जणगो उत्तरोत्तराधम्मपरिणईए, एत्तोच्चिय भुयणपयडावि  
वेरिभुयदंडकंडचंडिभखंडणेक्कसुंडावि असेसविज्जाइसयसालिणोऽवि पाविया लंकाहिवइपभिइणो विणासं, एत्तो चिय  
अविगणियतणनिविसेसनियजीवियवा अमुणियजुत्ताजुत्तकायवा तिकखदुक्खलक्खंपि अभिकंखंति पाणिणोत्ति, ता  
मूसगोघ मज्जारस्स घयकुंभोव दुयवइस्स पयंगोघ पईवस्स सारंगो इव पंचाणणस्स सुहाभिलासी दूरमवक्कमइ कुसलो  
परदारस्सत्ति निसामिऊण समुप्पण्णगाढपच्छायावो वेरग्गमग्गाणुलग्गचित्तो विज्जासिद्धो भणिउमाढत्तो-गोभइ !  
साहु समुवइट्ठं साहु समुवइट्ठं समुद्धरिओऽहं तुमए अपारपावपारावाराओ, होउ संपयं सदारपरिभोगं मोत्तूणाऽऽमर-  
णंतं निवित्ती मम सेसमहिलापसंगस्सत्ति, गोभदेण भणियं-अज्ज ! जाओ इयाणिं मम वंछियत्थलाभो, एत्तो सुम-  
रिज्जासि मं सुहिसयणाइकहंतरेसुत्ति । एवं वुत्ते विज्जासिद्धो जोडियपाणिपल्लवो पणामं काऊण संवेसिं सिणेहवस-

श्रीगुणचंद  
महावीरच०  
५ प्रस्तावः

॥ १७१ ॥

संदंतवाहफुरंतनयणो सायरमवलोइज्जमाणो चंदकंतापमुहेहिं अदंसणमुवगओत्ति । चक्खुपहमइकंतेऽवि तंमि खणं  
विरहवेयणासुन्नत्तणमणुभविऊण भणियं गोभदेण-अहो से वयणविन्नासो अहो पावपरिहारो अहो भीरुत्तणं अहो  
विणीयया अहो सुगुणज्जणसमुज्जमो अहो असरिसदक्खिणत्तणंति, चंदलेहाए भणियं-तुहाणुभावो खलु एसो,  
न हि नरिंदसामत्थमंतरेण भुयगफणाफलमइकमिउमभिसकइ साल्लो, न तिकखंकुसकरारोहणं विणा पहे पयट्ठइ  
मत्तदोघट्ठोत्ति, एवं च विविहसंकहाहिं ठाऊण कइवय दिणे अन्नदियहे य भणियं गोभदेण, जहा-वहूइं दिणाइं  
मम गिहनिग्गयस्स ता अणुजाणह मं गमणत्थं, न जाणिज्जइ कहंपितुम्ह भाउज्जाया संपयमावण्णसत्ता निवसइत्ति,  
एवमायण्णिऊण चंदलेहाए पुणोवि कइवय वासराणि धरिऊण अन्नसमाए य पभूयरयणदाणपुव्वगं सम्माणिऊण  
विसज्जिओ गोभदो सट्ठाणं पत्तो कहाणगविसेसेणं निययगामं ।

अह जाव पिययमादंसणूसुओ निययगेहाभिमुहं वचइ ताव दूराओ चिय दिट्ठं भग्गदुवारदेसं रेणुपडलसंछन्नं  
दरीपसुत्तसाणधुरधुरियघोरघोसभीसणं अणेगकोलविलाउलं सुसाणं व भयावहं तं गिहं, तारितं च दट्ठूण खुभिय-  
हियएण पुच्छिया सहेज्जिया, तीएवि चिरकालागयं दट्ठूण तं जायपण्याए आहूओ सगिहे, दावियं आसणं, कयं  
चरणसोयणं, भणियं च-गोभद ! करेसु ताव भोयणंति, तेणावि तहाविहगेहदंसणजायसरीरदाहेण आपुट्ठा पुणोवि  
एसा सघरखुत्तंतं, तीएऽवि अणिट्ठं भोयणावसाणे सीसइत्ति लोयवायं परिभाविंतीए भणियं-पियहरं गया तुह

प्रतिज्ञा.  
विद्यासिद्ध

॥ १७१ ॥

परिणी, सेसं पुणो कहिस्सामि विहेसु ताव भोयणं, तओ आउलहिययएणावि तदणुवित्तीए कयमणेणाहारग्गहणं,  
तयणंतरं आयंतस्स सुहासणगयस्स निवेइयमणाए-गोभइ ! तुह गयस्स कइवयदिवसावसाणे विओगदुक्खेण वा  
तहाविहयादिवसेण वा परिकिसियसरीराए सिवभहाए अयंडेचिय समुप्पन्ना गाढं सूलवेयणा, आउलियं सरीरं,  
ओसहेदिवि न जाओ विसेसो, गया य मुहुत्तमेत्तेण पंचत्तंति, एयं च सो आयन्निऊण विओगवज्जज्जरियहियओ  
खणंतरमुच्छिओ इव विगमिऊण मुक्कपोक्कारकरुणसहं रोइउं पवत्तो, समासासिओ पासवत्तिणा जणेण, कयाइं मय-  
लोइयकिचाइं, फालेण य जाओ अप्पसोगो । अन्नया य भणिओ लोगेहिं, जहा-गोभइ ! कीरउ कलत्तसंगहो, विमु-  
चउ सोगो, एसचिय गई संसारविलसियाणं, तेण भणियं-भो दूरमसरिसमेयं, तहाहि—

पढमं दवोवज्जणकएण देसंतरं गओऽहमहो । चिरकालकिलेसवसा तल्लाभे नियगिहं पत्तो ॥ १ ॥

फिर भुंजिस्सामि अहं इण्हि नियपणइणीए परियरिओ । पंचविहविसयसोक्खं निरवेक्खो सेसकज्जेसु ॥ २ ॥

भवियघयावसेणं अक्काले चिय दिवं गया सावि । एवं ठियंमि अन्ना परिणिज्जइ केण कज्जेण ? ॥ ३ ॥

जह सा मरणं पत्ता अहुणुवूढावि तह जइ मरेज्जा । ता होज्ज निप्फलचिय पुणोऽवि सव्वेऽवि आरंभा ॥ ४ ॥

नियजीवियस्सवि कहं विस्सासो वुज्झए सयन्नेण ? । आगयगयाइं जं किर कुणइ व मुहमारुयमिसेण ॥ ५ ॥

संघडणविहडणापडुपरकमे निकिवे कयंतंमि । सच्छंदं वियरंते कत्थ व जाएज्ज थिरवुद्धी ? ॥ ६ ॥

श्रीगुणचंद  
महावीरच०  
५ प्रस्तावः

॥ १७२ ॥

दइयाधणपरियणसंगमेसु जइ सरिसवोवमं सोक्खं । पाविज्ज विण्णओगे नियमा मेखुवमं दुक्खं ॥ ७ ॥  
इय पज्जत्तं मह घरणिविसयतण्हाए बहुकिलेसाए । एत्तियमेत्तंमि वाए विसयासा हीलणाठाणं ॥ ८ ॥  
एवं तन्निच्छयं मुणिऊण तुसिणीए ठिओ जणो, सो य धम्मकजेसु उज्जओ जाओ, अन्नदियहे समोसरिओ  
तत्थ पंचसयमुणिपरिवुडो छत्तीसगुणरयणरयणायरो नीसेसपाणिगणरक्खणपरो सुगहियनामो धम्मघोससूरी, गया  
तस्स वंदणत्थं बहुवे जणा, गोभदोऽवि भवविरत्तमणो जाणिऊण तदागमणं पत्तो सूरिसमीवे, पहिट्ठचित्तो य पण-  
मिऊण से पायपंकयं गुरुणा दिन्नासीसो उवविट्ठो भूमिवट्ठे, सूरिणावि पारद्धा धम्मदेसणा, जहा—

जीववहालिययज्जणमदत्तधणगहणमेहुणनिवित्ती । जो य परिग्गहचाओ एयं धम्मस्स सघस्सं ॥ १ ॥  
जीववहे आसत्ता सत्ता अट्ठप्पयारमवि कम्मं । वंधंति जंति नरए पावंति य तिकखदुक्खाइं ॥ २ ॥  
तत्तो उवट्ठित्ता तिरिक्खजोणीसु लक्खमेयासु । उववज्जंति वराया नियदुचरिएण बहुकालं ॥ ३ ॥  
जे उ नियजीवियसमं सम्मं रक्खंति सघपाणिगणं । ते सयललोयलोयणससहरतुल्ला हवंति जणा ॥ ४ ॥  
दीहाऊउववेया वरख्खा दिवदेवसोक्खाइं । अणुभुंजिऊण नूणं कमेण मोक्खंमि वचंति ॥ ५ ॥  
भूयत्थनिण्हयकरं पाणिविणासेककारणं घोरं । जं वयणं तं सघंपि वज्जणिज्जं सुवुद्धीहिं ॥ ६ ॥  
इह लोए चिय जीहानिकंतणं निंदणं च लोयाओ । पावंति वितहभासणपरायणा परमवे य दुहं ॥ ७ ॥

गोभद्रस्य  
प्रियामरणं  
वैराग्यं.

॥ १७२ ॥

एत्तो विरत्तचित्ता कुडिलत्तणवज्जिया मियाभासी । जे ते अवजसपंकेण नेव छिप्पंति कइयावि ॥ ८ ॥  
 पडिबुद्धकमलपरिमलसममुहनिस्साससुरहियदियंता । पूइज्जंति जणेण य आएज्जगिरा य जायंति ॥ ९ ॥  
 जो परधणं विलुंपइ सो झंपइ सुगइगिहकवाडाइं । निविडाइं कम्मनिगडाइं कुणइ तुच्छेहियसुहत्थं ॥ १० ॥  
 एत्तो चिय दोगच्चं पइजम्मं उवचिणेइ मूढप्पा । सुयदइयाविरहुच्चभवदुहं च पावेइ दुविसहं ॥ ११ ॥  
 जे पुण संतोसपरा तणंपि गिण्हंति नेव य अदिन्नं । ते देवाणवि पुज्जा हवंति किं पुण मणुस्साणं ? ॥ १२ ॥  
 वहुंति धणविलासा निवडंति न आवयाउ कइयावि । पुज्जंति य निविग्घं मणोरहा तेसि नीसेसा ॥ १३ ॥  
 जे अणिगिहियप्पाणो इहभवसुहलेसमेत्तपडिवद्धा । दासव कामलुद्धा मुद्धा जुवईण वट्टंति ॥ १४ ॥  
 नरवइसेवणसंगामकरणपमुहाइं विविहवसणाइं । मेहुणसन्नाभिरया असइं पि लहंति ते पुरिसा ॥ १५ ॥  
 कामविवरंसुहा पुणं नरसुरजणपूयणिज्जकमकमला । देहुच्चभवमविणस्सरपरमाणंदं सइ चरंति ॥ १६ ॥  
 पडिपुण्णवंभपालणपवित्तगत्ताण पुरिससीहाण । सुमरणमेत्तेणं चिय विज्जा मंता य सिज्जंति ॥ १७ ॥  
 जे न परिग्गहविरइं कुणंति पावेसु संपयट्टंति । वंधंति कोसियारोव अप्पयं ते सकिरियाए ॥ १८ ॥  
 पइदियहलाभवसवहुमाणगुरुलोभदूमियसरीरा । सवत्थ ममत्तपरिग्गहेण सुचिरं किलिस्संति ॥ १९ ॥  
 अपरिग्गहा उण नरा ससरीरेऽविहु ममत्तपडिवंधं । न कुणंति वत्थपत्ताइएसु सेसेसु का गणणा ? ॥ २० ॥

श्रीगुणचंद  
महावीरच०  
५ प्रस्तावः  
॥ १७३ ॥

एतो चिय तिवयरोवसग्गवग्गेऽवि ते ण ज्ञाणाओ । मंदरगिरिव विचलंति मोक्खसोक्खं च साहंति ॥ २१ ॥  
 इय भो देवाणुपिया ! अविरयविरयाण दोसगुणसहियं । कहियं तुम्हाण मए सुद्धं सद्धम्मसवस्सं ॥ २२ ॥  
 चिंतामणिव दुलहं संसारमहोयहिंमि भमिराणं । जीवाण नूणमेयं सकम्मगुरुभारपिहियाणं ॥ २३ ॥  
 एयंमि उ संपत्ते तं न जए जं न पावियं होइ । ता एयंमि पयत्तो कायवो कुसलबुद्धीहिं ॥ २४ ॥  
 एयं च निरइयारं न साहुदिकखं विणा घडइ जम्हा । पडिवज्जह पवज्जं तम्हा दुहसेलवज्जसमं ॥ २५ ॥  
 एवं च गुरुणा उवइट्ठे सद्धम्ममग्गे पडिबुद्धा वहवे पाणिणो पलीणा मिच्छत्तवासणा जाओ केसिंचि सवविरइ-  
 परिणामो अन्नेसिं समुप्पन्ना देसविरइबुद्धित्ति, एत्थंतरे संसारासारयं परिभावेत्तो तक्कालतिववेरग्गसमुग्गयपवज्जाप-  
 रिणामो गोभदो गुरुसमीवं गंतूणं विन्नविउमारद्धो-भयवं ! अमयं व परिणयं मम तुम्ह वयणं समुल्लसिओ विवेओ  
 तुट्ठा गेहवासणा, ता तुब्भेहिं निज्जामगेहिं पवज्जाजाणवत्तमारुहिऊण भवोदहिं लंघिउमिच्छामि, गुरुणा भणियं-  
 भइ ! जुत्तमेयं तुम्हारिसाणं, तओ सूरिं पणमिऊण गओ गेहे, रयणविक्रओवलद्धद्वेण दिन्नं दीणाणाहाईणं महा-  
 दाणं, अह पसत्थे तिहिमुहुत्ते सूरिसमीवे गहिया पवज्जा, जाओ महातवस्सी, पालेइ निरयारं समणधम्मं अहि-  
 यासेइ सम्मं परीसहे पउंजइ वालगिलाणाईणं विणयं भावेइ भावणाजालं पढेइ समयसत्थं परिचिंतेइ तब्भावत्थं  
 कुणइ अपुवापुवतवचरणं, एवं च विसुज्झमाणस्स तस्स वोळिंति वासरा, अन्नया य गुरुमापुच्छित्ता समारद्धाईं तेण

धर्मघोष-  
देशना  
गोभद्र-  
दीक्षा च.

॥ १७३ ॥

मासक्खमणाइं,परिसुसियं च से सरीरं, तहावि वालाईण कज्जेसु अणिगूहियसामत्थो सवत्थ पयट्ठइत्ति । अन्नसमए य  
 सो खमगो गओ खुडुगेण समं वासियभत्तस्स, तेण य पहे गच्छमाणेण जुगमेत्तनिहित्तचक्खुपसरेणवि कहवि दिव्वजो-  
 गवसा चंपिया चलणेसु मंडुकिया, विवन्ना य सा, पट्ठिट्ठिएण य भणिओ सो खुडुएण—जहा खमग ! तुमए एसा विरा-  
 हिया, ता सम्मं निरुवेहि, सोऽवि एवमायन्निऊण ईसिसमुप्पन्नरोसावेसो असूयाए इयरजणचरणचंपणपणट्ठजीवाओ  
 मंडुकलियाओ दांसितो भणइ—अरे दुट्ठसिक्ख ! इमावि मए मारिया ? इमावि मए मारिया ? इमावि मए मारियत्ति,  
 खुडुगेण नायं—होउ ताव, वियाले सयमेव गुरुपुरओ आलोइस्सइत्ति, एवं च पत्थुयकज्जं काऊण पडिनियत्ता दोवि  
 निययासमं, कमेण य जाओ संझासमओ, आरद्धं आवस्सयं, गुरुपुरओ य खमयरिसी आलोइत्ता देवसियं उवविट्ठो,  
 नयरं मा विस्सुमरियं होहित्ति चिंतयंतेण खुडुएण कहिओ मंडुकियावइयरो खमगस्स, एत्थंतरे निट्ठुरविगिट्ठुतवचरण-  
 संतत्तत्तणेणं सरीरस्स माहणजम्मसुलभत्तणेणं तहाविहतिवकोवुब्भवस्स पणट्ठो से विवेओ, समुद्धाइओ महंया  
 वेगेणं खुडुगताडणनिमित्तं, अंतरा य आगच्छमाणो निट्ठुरथंभसिरावडणघाइयमम्मपएसो तहाविहकलुसाभिप्पाय-  
 विराहियसामन्नो कालं काऊण उववन्नो जोइसियदेवेसु, कोहदूसियस्स एवंविहा चिडंवणा, जेण—

छट्ठमाइदुकरविगिट्ठुतवभेयसेवणुब्भूयं । गुरुवालसिक्खगेलणपंडियविणओवणीयंपि ॥ १ ॥

दसविहजइजणकिरियापरिपालणपोसियंपि सुहपुत्तं । खणमेत्तेणवि तेणं तणं च कोहग्गिणा दहं ॥ २ ॥ जुम्मं ।



श्रीगुणचंद  
महावीरच०  
५ प्रस्तावः

॥ १७४ ॥

एत्तोच्चिय पसमविवज्जियाण सत्ता निरत्थिया किरिया । उक्किट्तवोऽविहु होइ केवलं भुक्खमारो सो ॥ ३ ॥  
जह पवयाण मेरु नईण गंगा मियाण पंचमुहो । पक्खीण जहा गरुडो सेसाही सयलभुयगाण ॥ ४ ॥  
जह साहूण जिणिंदो मणीण चिंतामणी तहा पसमो । सारो समत्थधम्मस्स तेण एत्थेव जइयवं ॥ ५ ॥ जुम्मं ।  
अलं पसंगेणं । सो खमगजिओ जोइसदेवेसु अहाउयं पालिऊण चुओ समाणो कणगखले आसमए पंचतावस-  
सयाहिवइस्स कुलवइणो गिहिणीए उववन्नो दारगत्तणेणं, जाओ य उच्चियसमए, कयं से कोसिओत्ति नामं, सो य  
सभावेणं चंडरोसो, थेवावराहेऽवि सेसतावसकुमारे कुट्टेति, ते य तेण ताडिज्जमाणा नियनियपिऊणं साहेति, तेहि  
य केण कुट्टियत्ति पुच्छिज्जमाणा निवेइंति कोसिएणं, तत्थ अन्नेऽवि तावसकुमारगा कोसियाभिहाणा अत्थि अओ  
न सुणिज्जइ केणावित्ति तवसेसोवलंभनिमित्तं तप्पभिइं ठावियं चंडकोसिओत्ति नामं, तद्धिणाओ आरब्भ पावियं  
च पसिद्धिं, एवं सो चंडकोसिओ जाओत्ति । अन्नया य कुलवई पंचत्तमुवगओ, पच्छा सो सेसतावसेहिं कुलवइए  
निवेसिओ समाणो तत्थ वणसंडे अचंतं अज्झोववणो, अणवरयं अपुव्वापुवपायवसेयणपालणपरो कालं गमेइ, सेस-  
तावसे य पुप्फफलाइं तहिं गेणहंते पयत्तेण निवारेइ, ते य तत्थ कुसुममेत्तंपि अपावमाणा गुरुम्मिं व गुरुपुत्तगंमि  
पवट्टियवंति सुमरिऊण तवयणमविकूलंता दिसोदिसिं गया, जोऽवि गोवालगाई तत्थ फलाइनिमित्तमेइ तंपि  
हंतूण सो निद्धाडेइ, जाया य समीवगामनगरेसु पसिद्धी जहा चंडकोसिओ उववणं अवलोइउंपि न देइ । अन्नया य

मण्डूकी-  
विराधना  
ज्योतिष्क-  
ता तापसः

॥ १७४ ॥

सो निसियधारं परं सुं घेत्तूण वड्ढकरणनिमित्तं कंठिगाणयणाय गओ दूरवणसंडे, इओ य आसमपयासन्नं सेयविया-  
 पुरिक्त्तवेहिं रायपुत्तेहिं फलगहणनिवारणाकुविएहिं मुणियतग्गमणवुत्तंतेहिं पुवामरिसेण आगंतूण ओक्खया तरु-  
 पोयगा छिंदिया सरलतरुणतरुवरा पाडियाइं फलाइं हयमहिओ कओ से उडवओ भग्गा कलसगा फोडिया कमं-  
 डलू खंडिया दक्खामंडवा पणासियाइं कयलीहराइं, अन्नं पि जहासत्तीए उवद्विउमारद्धत्ति, एत्थंतरे दिट्ठतहाविहा-  
 समभंगवइयरेहिं गोवालगेहिं गंतूण सिट्ठं चंडकोसियस्स, जहा-तुह उववणं कुमारेहिं हणिज्जइत्ति, सो एवमायन्नि-  
 ऊण कोवेण जलणोघ धगधगन्तो परसुमुग्गीरिऊण धाविओ पवणवेगेण तदभिमुहं, दिट्ठो य एंतो कुमारेहिं, ते य  
 मुणी अवज्झोत्ति चिंतिऊण पलाणा नियनयराभिमुहं, चंडकोसिओऽवि तयणुमग्गलग्गो वाहरइ—

रे खत्तियाहमा ! मज्झ उववणं छिंदिऊणवि परोक्खं । इण्हं नियजणणीए किं पुण उयरंमि पविसिहिह ? ॥ १ ॥

मा वेगेण पलायह वट्ठह सवडंमुहा खणं एकं । तालफलाणिव सीसे जेण कुहाडेण पाडेमि ॥ २ ॥

एमाइ असब्भे गालिगवभवयणे समुल्लवेंतो सो । तह कहवि कोववसवियललोयणो धाविओ तुरियं ॥ ३ ॥

जह खाणुखलणनिवडणअट्ठट्ठियपरसुच्छिन्नसीसस्स । अवमाणदंसणाउव तस्स लहु अइगयं जीयं ॥ ४ ॥

जह अट्ठज्झाणगओ मरिउं सो तम्मि चेव वणसंडे । मुच्छावसेण जाओ भीमो दिट्ठीविसो सप्पो ॥ ५ ॥

ते य तावसा तम्मरणवइयर निसामिऊण समागया तंमि वणसंडे ठाउमारद्धा य, अन्नया य पुवसिणेहाणुवन्धस-

श्रीगुणचंद  
महावीरच०  
५ प्रस्तावः  
॥ १७५ ॥

मुप्पन्नवणरक्खणपरिणामेण इओ तओ परिब्भमंतेण दिट्ठा ते दिट्ठीविससप्पेण, तओ सरोससूरविंवावलोयणुग्गि-  
रियजलणजालाकलावेण निदुद्धा अभिमुहट्ठिया अणेण, अदहुंगा य पलाणा दिसोदिसिं, एवं च तिसंझं सो वणसंडं  
तिपयाहिणीकाऊण जं सउणगमवि पासइ तंपि दहेइ, अन्नेऽवि तम्मग्गेण वोलेमाणे तडियक्कप्पडियपमुहे पंथिगे  
विद्वेइ, अह तब्भएण अवहो जा जाओ सो मग्गो, एसा चंडकोसियसप्पस्स उप्पत्ती ।

अह तेण सप्पेण उववणंतरे परिब्भमंतेण दिट्ठो जक्खमंडवियाए पडिमं ठिओ वद्धमाणजिणवरो, तं च दट्ठूण  
समुच्छलियकोवानलो अहो मम सामत्थं एस न मुणइत्ति विगप्पिऊण तरणिमंडलावलोयणचउगुणीभूयविणिस्सरंत-  
विसुम्मिस्सदुस्सहसिहिसिहाभासुरच्छिविच्छोहो निद्वहिउकामो भयवन्तं पेच्छिउमारद्धो—

अह जयगुरुणो देहे दिट्ठी दिट्ठीविसस्स पडिफलिया । पिऊससीयले साऽणुभावओ इत्ति विज्झाया ॥ १ ॥

असमत्था निद्वहिउं जाया जिणनाहलोममित्तंपि । ताहे पडिहयसत्ती तंडवियपयंडफणवित्ती ॥ २ ॥

गरलकणुकरसम्मिस्सगरुयपम्मुक्कफारफुंकारो । वेगेणं डसिउमणो पहाविओ जिणवराभिमुहं ॥ ३ ॥

तओ तिव्वविसुब्भडाहिं दाढाहिं जिणं डसिऊण पच्छाहुत्तं अवक्कमेइ, मा उग्गविसविहयजीवियवो ममोवरि  
एस निवडिहित्ति, भयवंतं च तहट्ठियं चेव दट्ठूण पुणो पुणो तिन्नि वारे जाव डसित्ता अमरिसेणं पलोयंतो अच्छइ,  
तहावत्थाणे य जिणसोमविंवावलोयणोवसंतदुट्ठदिट्ठिविसविगारो सो करुणाए भणिओ भयवया—उवसम भो

तापसमरणं  
चण्डकौ-  
शिकसर्प-  
दंशः

॥ १७५ ॥

चंडकोसिया !, उवसम महाणुभाव !, किन्न सरसि सयं चिय अणुभूयं तं वइयरं ? ।

पुवभवे जं समणो कोवविराहियसमग्गसामन्नो । कुच्छियजोइसदेवत्तलच्छिमणुपाविओ मरिउं ॥ १ ॥

तत्तो इह वणसंडे तावसपुत्तो य जं तुमं जाओ । तत्तोऽविय तिघविसो इण्हिं सप्पत्तणं पत्तो ॥ २ ॥

ता भइ ! एत्तोऽवि मुंच कोवं, एसो हि विग्घभूओ परमसुहसंपयाणं पडिखलणमल्लो कल्लाणवल्लीणं महापडिवक्खो पयरवियेयस्स जलणो कुसलाणुट्ठाणवणसंडस्स जणओ दुग्गदुग्गइपडणस्सत्ति, सब्बहा अलमेत्तो कोवाणुबंधेणंति, इमं च सोद्या भुयगस्स पुद्वाणुभूयसरणवसेण ईहाचूहमग्गणगवेसणं करेमाणस्स जायं जाइसरणं, दिट्ठं च पुद्वाणु-  
ट्ठियं तवचरणं सामण्णपरिपालणं तघिराहणोवलद्धजोइसियसुरजम्मं च, अह उम्मीलियविवेओ समुल्लसियधम्मपरि-  
णामो जायपावदुगुंछो आयाहिणपयाहिणापुव्वगं परमभत्तीए भयवंतं भुवणगुरुं वंदिऊण अणसणं पडिवज्जइ, भय-  
वंपि मुणइ जहा एस पडिबुद्धो कयाणसणो य, तहावि तअणुकंपाए तत्थेव काउस्सग्गओ परिवालेइत्ति, चंडको-  
सिजोऽवि मा कहवि रोसवसेण नयणग्गिणा पाणविणासो होज्जत्ति परिभाविऊण विलनिहित्तुंडो पयडियसेससरीरो  
परमवेरग्गावडियमई चित्तेइ—

कह गुणरयणोयहिणा गुरुणा सह संगमो पुरा जाओ ? । कह पव्वज्जारयणं अपत्तपुव्वं मए पत्तं ? ॥ १ ॥

कह वा पीऊसंपिव असेसदोसग्गिविज्झवणदक्खं ? । सम्ममहीयं सुत्तं विचित्तनयभंगदुव्विगमं ? ॥ २ ॥

श्रीगुणचंद  
महावीरच०  
५ प्रस्तावः

॥ १७६ ॥

कह वा मासकखमणाइ दुकरं तह चिरं तवो चरियं ? । कह दुद्धरं पि चरियं अकलंकं वंमचेरं पि ? ॥ ३ ॥  
खणमेत्ततिवकोवप्पभावओ कह इमं समग्गं पि । विफलत्तणमणुपत्तं ? हा मुद्धो मंदभागोऽहं ॥ ४ ॥  
इण्हिं तु पयइभीसणभुयंगभावं गओ हयासोऽहं । मुणिधम्मस्स अजोग्गो कमुवायं संपवज्जामि ? ॥ ५ ॥  
हा पाव जीव ! तइया जह सिरलोयाइ विविहदुक्खाइं । सहियाइं तहा खुडुगवयणं पि य कीस नो सहियं ? ॥ ६ ॥  
किं मूढ ! नियसिरंमी एवं पज्जालिओ तए जलणो ? । सुहकामिणा हणिज्जइ अप्पा किं अप्पणो चेव ? ॥ ७ ॥  
इय उत्तरोत्तरपवडुमाणवेरग्गमग्गमणुलग्गो । सप्पो झंपियदप्पो संलीणंगो मओच्च ठिओ ॥ ८ ॥

अह भयवंतं समीवमुवगयं पेच्छिऊण गोवालादयो तरुवरतिरोहियसरीरा तहा निचलस्सवि भुयंगमस्स उवरिं  
अविस्ससेमाणा चेयणापरिक्खणनिमित्तं पाहाणखंडे खिवंति, तेहिं ताडिज्जमाणोऽवि जाव न मणागं पि विचलइ  
एसो ताव समीवमागच्छन्ति, कट्टेण य घट्टेति, तहावि अप्फंदमाणे तंमि सेसलोयस्स साहेति, जहा—दिट्ठीवि-  
ससप्पो देवज्जएणं उवसामिओ, न संपयं डहइत्ति, ताहे लोगो आगंतुं सामिं वंदित्ता तं पि वंदइ महिमं च करेइ,  
अन्नाओवि गोउलियविलयाओ घयमहियाविकिण्णत्थं तेणंतेण वचमाणीओ तं सप्पं तुप्पेण मक्खंति, घयगंधेण य  
(अहि)सरंततिक्खतुंडपिवीलिगापडलखज्जमाणदेहुप्पण्णतिववेयणं सम्ममहियासमाणो अद्वमासियाए संलेहणाए  
कालं काऊण सहस्सारे देवलोए देवो अट्टारससागरोवमो उववण्णोत्ति ।

सर्पस्य वो-  
धोऽनशनं  
देवत्वं च.

॥ १७६ ॥

इय सुहपरंपराए निजुंजिऊण चंडकोसियं परमेसरो तिहुयणेकदिणयरो वीरो तत्तो निक्खमिऊण उत्तरचावा-  
लसन्निवेसं गओ, तत्थ पक्खंक्खमणपारणए पविट्ठो गोयरचरियाए, कमेण पत्तो नागसेणगाहावइस्स मंदिरं,  
तहिं च तदिणे दुवांसवरिसाओ पुत्तो समांगओत्तिकाऊण पयट्ठो महुसवो, जेमियो नियगजणो, सो य निय-  
गजणो सामिणो रुवसंपयाए आणंदमुवहंतो परमण्णेणं भयवंतं पडिलाभेइ, एत्थंतरे अहो दाणं अहो दाणंति  
याहरमाणेहिं चेलुक्खेयं करेतेहिं कणगवुट्ठिं मुयमाणेहिं चउविहत्तूरनियरं वायंतेहिं गंधोदयं वरिसंतेहिं दसद्धवन्नं  
कुसुमपयरं कीरंतेहिं नचंमाणेहिं गायमाणेहिं तिवइं अप्फालेतेहिं सहरिसं थुणंतेहिं असुरसुरखयरनिवहेहिं भरिय-  
मम्बरविवरंति, जयगुरुवि पारिऊण सेयवियं नयरिं गओ, तत्थ य नमंतसामंतमउलिमंडलीमंडियपायपीढो सम्महं-  
सणमुणियजहट्टियजिणोवइट्ठजीवाइतत्तप्पवंचो पएसी नाम नराहिवो परमसमणोवासओ, सो य भयवंतं आगयं  
मुणिऊण चाउरंगसेणापरिवारिओ सयलनयरजणसमेओ निग्गओ चंदणवडियाए, दिट्ठो सामी, तिपयाहिणीकाऊण  
य वंदिओ परमायरेणं, थोउं पयत्तो, कहं?—

जय भुवणेकनिसायरं! सायरसुररायनमियकमकमल! । मलविरहिय! हियकारय! रयतमभरहरणदिवसयर! ॥ १ ॥  
करुणारसनिवावियभवगिम्हुत्तत्तसत्ततरुनिवह! । जिणनाह! तुमं पुंवज्जिएहिं पुण्णेहिं दिट्ठोऽसि ॥ २ ॥  
तं चिय दिणं पसत्थं सोचिय समओ समत्थसुहहेऊ । जत्थ भुवणेकवंधव! तुह सुहकमलं पलोएमो ॥ ३ ॥

श्रीगुणचंद  
महावीरच०  
५ प्रस्तावः

॥ १७७ ॥

प्रदेशिकृतो  
महिमा.

॥ १७७ ॥

अइनिस्सारस्तवि जीवियस्स पत्तं मए फलं अज्ज । जं तुम्ह चरणफरिसणपवित्तिं उत्तमंगं मे ॥ ४ ॥  
इय जिणनाहं थोउं बहुप्पयारं पराएँ भत्तीए । रायां पुरजणसहिओ जहागयं पडिनियत्तोत्ति ॥ ५ ॥  
भयवंपि सुरहिपुरनयराभिमुहं वच्चइ, तत्थ य अंतरा पएसिनरवइसमीवमागच्छमाणा पंचहिं रहेहिं निज्जगा  
रायाणो भयवंतं दट्ठूण पूयं सक्कारं सवायरेण कुणंति, सामीऽवि नियप्पभावप्पवोहियसत्तसंघाओ बहुविहउग्गतव-  
विसेसपणस्समाणासेसनिविडकम्मंसो विसुद्धसीलसुरभिसरीरो सुरभिपुरं अइकमिऊण संपत्तो जलहिपवाहाणुकारि-  
वारिपसरं सयलसरियापवरं गंगामहानइं, अविय—

पवणुच्छालियजलकणसेयवससिणिद्धतीरतरुसंडं । अन्नोन्नप्फिडणविफुट्टलोलकल्लोरवमुहलं ॥ १ ॥  
पप्फुरियफाराडिंडीरपिंडपंडुरियतारतीरंतं । जिणदंसणतोसवसा तक्खणविहियट्टहासं च ॥ २ ॥  
वणकुंजरकुलमज्जणविदलियसिप्पिउडमोत्तियसमिद्धं । वियरंतहंससारसरहंगरवमणहरदियंतं ॥ ३ ॥  
मज्जिरविलयाजणथोरथणहराघायभंगुरतरंगं । रंगंतमच्छकच्छवमयरोरगभीसणावत्तं ॥ ४ ॥  
इय एरिसं सुरसरिं सरणागयवच्छलो जिणो जाव पेच्छइ कमलदलच्छो परतीरगमाभिलासेण ताव सुसिलिद्धनिट्ठुर-  
विसिट्ठतरुकट्टफलगनिम्मविया परतीरगमणत्थं नाविएण पगुणीकया नावा, तहिं च समारूढो परतीरगामी  
जणो, भयवंपि आरुहिऊणं ठिओ तीसे एगदेसे, एवं च निलीणंमि जणे पयाहिया नावा, ऊसिओ सियवडा

चालियाइं अवलगाइं पयट्टा महावेगेण गंतुं नावा, एत्थंतरे तडट्टिएण वासियं कोसिएणं, तं च निसामिऊण भणियं  
सेमिळामिहाणनेमित्तिएणं—अहो इमो महासउणो इमं वाहरइ, जहा—तुम्हे इह मारणंतियं आवइं पाउणिस्सह,  
केवलमेयस्स महारिसिस्स पभावेण अक्खयसरीरा नित्थरिस्सहत्ति, एवं निसुणिऊण विम्बिया नावाजणा जाव  
अवरोप्परं विविहं संलवन्ति ताव पत्ता अगाहसलिलमज्झयारदेसं नावा,

एत्थावसरंमि जिणं नावारूढं पलोइउं पावो । संभरियपुव्वेरो नागसुदाढो विचित्तेइ ॥ १ ॥

एसो सो जेण पुरा तिविडुचक्कित्तणमुवगएणं । गिरिकंदरमल्लीणो सीहत्ते वट्टमाणोऽहं ॥ २ ॥

सच्छंदविविहकीलाविणोयलीलाविलासदुल्ललिओ । परिजुन्नपडोघ दुहा विफालिओ पाणिणा घेत्तुं ॥ ३ ॥

एयस्स किमवरद्धं तइया विजणे वणे वसंतेणं ? । जेण तहा निहओऽहं अनिमित्तियसत्तुणा इमिणा ? ॥ ४ ॥

ता मज्झ पुन्नपगरिसवसेण जायं समीहियं अज्ज । जं एस वेरिओ चक्खुगोयरं सयमिहावडिओ ॥ ५ ॥

जीयस्स एत्तियं चिय पसंसणिज्जं जए सुपुरिसाणं । उवयारे उवयारो जं किज्जइ वेरिए वेरं ॥ ६ ॥

जासन्नमुवगयंपि हु मरणं मम चित्तनिधुइं जणइ । जं पुव्ववइरसाहणमुवट्ठियं एत्थ पत्थावे ॥ ७ ॥

इय असरिसनिच्चामरिसपगरिसायंवअच्छिच्छोहो । सो चित्तिउं सुदाढो वेगेण जिणंतियं पत्तो ॥ ८ ॥

अह अंतलिक्खमुवागएण किलकिलारावं कुणमाणेणं तेण अरे रे कत्थ वच्चिहत्ति भणिऊण विउट्ठिओ संवत्तगम-



श्रीगुणचंद  
महावीरच०  
५ प्रस्तावः

॥ १७८ ॥

हापवणो, तेण पहणिज्जमाणे उम्मूलिया तरुणो टलटलिया कुलसेला थरहरियं धरणिवट्टं दूरमुच्छलियं गंगासलिलं  
विसंतुला डोलिया नावा भग्गो तडत्ति कूवयखंभो जज्जरिओ सियवडो वामूढो कन्नधारो मरणभयभीओ इट्ठदेव-  
ए सुमरिउं लग्गो नावाजणो, अवि य—

संचलियमच्छकच्छवजलकरिकरघायजज्जरतरंगे । तारापहमोगाढे सलिलुप्पीले महापवले ॥ १ ॥

पवयमहोलकलोलपेल्लणुवेल्लिरी सफरिगव । बोलेउं आढत्ता ताहे नावा सुदाढेण ॥ २ ॥

एत्थंतरे कंवलसंबलाभिहाणा दो नागकुमारदेवा तक्खणचलियासणा परमत्थजाणणट्ठा जाव ओहिं पउंजंति ताव  
पासंति भयवंतं नावारूढं सुदाढेण जले बोलिउमाढत्तंति, तं च पासित्ता अलाहि सेसकज्जेहिं, सामिं ताव मोया-  
वेमोत्ति चिंतिऊण वेगेण समागया तंपएसं, आवडिओ य एगो नागकुमारो सुदाढेण सह जुज्झिउं, बीएणवि वियड-  
पाणिसंपुडेणुप्पाडिऊण नावा नइपरिसरंमि पमुक्का ।

अह सो सुदाढनागो महिड्ढिओ जइवि तहवि खीणवलो । आसन्नमरणनिम्भरणरणगुच्छायउच्छाहो ॥ १ ॥

अप्पट्ठिएहिवि तया कंवलसंबलभिहाणदेवेहिं । अहिणवदेवत्तणदिवसत्तिणा निज्जिओ झत्ति ॥ २ ॥

उद्धियदाढे नागेव निविसे निम्मिए सुदाढंमि । नागकुमारा ताहे वंदित्तु जिणं विणयपणया ॥ ३ ॥

मुंचंति पुप्फपयरं सुरहिं गंधोदयं च वरिसंति । गायंति भत्तिभरनिस्सरंतरोमंचकंचुइया ॥ ४ ॥

सुदंष्ट्रदेवो-  
पसर्गः

॥ १७८ ॥

एवं च अवलोइऊण जायपरमविम्हओ नावाजणो चित्तेइ-अहो कोइ एस महापुरिसो माणुसवेसोवि अमाणु-  
साणुरूपभाओ, जओ एयप्पभाओ अम्हे समुत्तिन्ना आवयामहन्नवाओ, ता जुज्जइ एस महप्पा पणमिउंति  
विभाविऊण निवडिओ तिहुयणगुरुणो चलणकमलंमि, कंवलसंवलावि जिणं पणमिऊण गया जहागयं ।

अह के पुण कंवलसंवला पुवभवे हुंतत्ति सुणेह मूलुप्पत्तिं-अत्थि सयलमहियलविकखाया समुत्तुंगपसत्थसुपास-  
तित्थयरथूभसोहिया मडुरा नाम नयरी, तत्थ य अहिगयजीवाजीववियारो नियसुद्धबुद्धिपगरिसोवलद्धपुन्नपाओ  
आसवसंवरपमोक्खतत्तवियारविक्खणो पंचाणुव्याइसावगधम्मपरिपालणवद्धलक्खो जिणिंदसमयाणुरागरंजिय-  
हियओ आगरो पसमाइगुणरयणाणं निवासट्ठाणं गंभीरिमाए संकेयभूमी करुणाए वल्लहो धम्मियजणाणं बहुमओ  
नरवइस्स सबत्थ पावियसाहुवाओ जिणदासो नाम सावओ, साहुदासी नामेण से भारिया, ताणि य दोन्निवि अचंत-  
धम्मकरणलालसाइं अणवरयगुरूवएसपालणपरायणाइं फासुयएसणिएहिं असणपाणखाइमसाइमेहिं सुणिजणं  
पडिलाभेमाणाइं कालं वोळंति । अन्नं च—

संसारवत्तविचिन्तणत्थ(प्प)भीयाइं जइवि अचत्थं । जइवि य गिहवाससमुत्थदोसपरिसंकिमणाइं ॥ १ ॥

तहविहु गिहंमि अन्नोन्नगाढपेमाणुबंधभावेणं । समणत्तणं पवज्जिउकामांइंवि ताइं निवसंति ॥ २ ॥

तेहि य अन्नया सुगुरुपायमूले सुणिऊण तिरियाइअसंजयपाणिपरिगंहतिवपाओवलेवासंमंजस्सं गहियं गोमहि-

श्रीगुणचंद्र  
महावीरच०  
५ प्रस्तावः

॥ १७९ ॥

सिचउप्पयाण पच्चक्खाणं, अन्नं य अंगी कया बहवे अभिग्गहविसेसा, अह धेणूणमभावे साहुदासी साविगा दिवसे दिवसे गोरसं आभीरिहत्थाओ गिण्हइ, अन्नदियहे य तीए आभीरी भणिया, जहा-भहे! तुमं पइदियहं मम घरे महियं घेत्तूण आगच्छेज्जाहि, अहं जेतियं तुमं आणेसि तेत्तियं गिण्हस्सामि, अन्नत्थ मा वच्चिहिसि, पडिवन्नं च इमं तीए, एवं च पइदिणदंसणेणं निक्कवडकयविक्रयकरणेण य समुप्पन्नो तासिं परोप्परं सिणेहाणुबंधो, अंतरंतरा य साविगा से गंधपुडिगाइदाणेण उवयारं करेइ, इयरीवि सविसेसं दुद्धं दहिं पणामेइ, अन्नया य आभीरीए कन्नगा-विवाहो पारद्धो, तओ सा जिणदासं साहुदासिं च सपणयं भणिउमारद्धा—

जइवि न आसणदाणेऽवि तुम्ह सामत्थमत्थि मे किंपि । तहवि सिणेहवसेणं किमवि अहं विन्नविउकामा ॥ १ ॥

किर गुरुमणोरहेहिं सुहिसयणविसिट्ठगोट्टिकज्जेण । अम्हारिसेण जायइ सुचिरेण महुसवारंभो ॥ २ ॥

तुम्हारिसाण पुण पुव्वजम्मसुविट्ठत्तपुन्नविभवाणं । पइदियहमूसवच्चिय लीलाए संपयट्ठंति ॥ ३ ॥

एयं च उल्लवन्ती सा भणिया सेट्ठिणा—भहे! फुडक्खरेहिं भणसु जमिह पओयणं?, तीए भणियं—अम्ह घरे विवाहो पारद्धो, अओ तुम्हेहिं तत्थ भोयणं कायवं, सेट्ठिणा भणियं—को दोसो?, कीरइ, केवलं बहुगेहवावारवा-वडत्तणेणं न पारेमो सुहुत्तमेत्तपि गिहं परिचइउं, अओ न कायवो तुमए चित्तसंतावो न वोढवो अब्भत्थणाभंग-समुब्भवो अवमाणो न गणियवं निहक्खिन्नत्तणं न मोत्तवो मणागंपि पुव्वपणओ, न हि निक्कवडसिणेहाणुबंधो सम-

मथुरायां  
जिनदासः  
साधुदासी  
च०

॥ १७९ ॥

वेकसइ बज्झोवयारं, ता गच्छ नियगेहे कुणसु समीहियपओयणंति पन्नविंजणं समप्पियाइं धूयणं वसणाइं पणांमि-  
याइं तदुचियाइं वत्थाभरणाइं दिन्नाइं कुंकुमाइविलेवणाइंति, सावि ताणि गहिज्जण परमहरिसमुवहंतीं गया  
सगिहं, कओ विवाहो, मिलिया सुहिसयणवंधवा, जाया महई सोहा, पसंसियाइं ताइं इयरजणेणं, जहां-सुंदरो  
विवाहमहसवो एएहिं कओत्ति, ताणि य पसंसं निसामिज्जण चिन्तंति-अहो परमोवयारकारी महाणुभावो सेट्ठी  
जेण अम्ह विवाहे पवरोवगरणदानेणं एवं सोभा निवत्तिया, ता कहमैयस्स पच्चुवयारे वट्टिस्सामोत्ति संपेहिज्जण  
उवचियसरीरे अतुच्छपुच्छोवसोहिंए सुप्पमाणकुडिलचारुसिंगे सरयससहरकिरणसरिसवण्णे समाणदेहपरिमंडले  
अघंतसुंदरगोरे कंचलसंचलाभिहाणे तिवारिसिंए गोवग्गपहाणे जुवाणवसहपोयगे गहिज्जण गयाइं ताइं सेट्ठीभवणे,  
पणामिया य ते सेट्ठीणो, चउप्पयपरिग्गहकयपच्चक्ख्वाणेण निवारिया ते सेट्ठीणा, तहावि अमुणियपरमत्थाणि भव-  
गंगणे ते वंधिज्जण गयाइं ताइं नियगेहे, तेण सावएण चिंतियं-अहो संकडमेवमावडियं, जओ-जइ मुच्चंति एए  
वराया ता लोगो हलाइसु वाहेइ तहाविहहीणसमायारो वा कोइ विहवेइ, अह एत्थेव धरिज्जंति ता निरुवयारि-  
त्तणेण दुरणुपालणिज्जा हवंतिंति खणं विगप्पिज्जण जिणवरवयणायत्तणसमुप्पन्नकरुणापूरपूरियहियएणं संगोविया  
सेट्ठीणा, पइदिणं दावेइ किंणिज्जण य तेसिं फासुगचारिं, पणामेइ वंत्थगलियं सलिलं, एवं पइदिणं उदंते चट्टइ,  
सो य सावगो अट्टमिचाउदसीसु आहारपोसहं सरीरसक्कारपोसहं वंभचेरेपोसहं अवाधारपोसहं च पडिपुन्नं काज्जणं

श्रीगुणचंद  
महावीरच०  
५ प्रस्तावः

॥ १८० ॥

सामाइयपडिवन्नो समणसमो अइयारपंकपरिक्खणपरो धम्मसत्थपोत्थयं वाएइ, नियपरियणो य पंजलिउडो चित्त-  
लिहिओव निसामेइ, तेऽवि कंबलसंबला अहाभइयाए तहाविहमोहणिज्जकम्मलाघवेण य थिरीकयसवणउडा  
अवक्खित्तचित्ता सन्नित्तणेण सुणियजुत्ताजुत्ता सम्मं सुणंति, जायभवभवभया य जद्विवसं सावगो उववासं कुणइ  
तद्विवसं तेऽवि चारिं पाणियं च परिचयंति, पुणो पुणो दिज्जमाणंपि न गिण्हंतित्ति ।

अह तेसु तिरियजोणीसमुब्भवेसुवि तवं करेतेसु । सगुणत्ति पक्खवायं वहमाणो चित्तए सेट्ठी ॥ १ ॥

एत्तियकालं अणुकंपणट्ठया दिन्नमेसिमसणाई । साहम्मिगबुद्धीए एत्तो सवं करिस्सामि ॥ २ ॥

साहम्मियवच्छलं जेण जिणिंदेहिं भुवणपणएहिं । सम्मत्तसुद्धिहेउं निदिट्ठं धम्मियजणस्स ॥ ३ ॥

अप्पुवो कोइ धुवं अहो पभावो जिणिंदवयणस्स । जं निसुणिऊण तिरियावि जंति वेरग्गमग्गंमि ॥ ४ ॥

इयं चित्तिऊण सविसेसमायरं तेसिं दंसए सेट्ठी । भवेसु पक्खवायं वहंति जं वीयरगाऽवि ॥ ५ ॥

एवं च उचियकायवपरायणस्स सम्ममुवसंतचित्तस्स सरंति वासरा, अन्नया य तीए नयरीए भंडीरजक्खस्स  
जणेण जत्ता पत्थुया, तत्थ य विविहतुरगाइवाहणाधिरूढो निग्गंतूण सयलपुरलोओ तस्स पुरओ वाहं करेइ ।

इओ य-जिणदाससेट्ठिणो पियमित्तो अचंतकोऊहलिओ जक्खजत्ताए वाहियालिं काउमणो सेट्ठिं अणापुच्छि-  
ऊण पणयभावेण कंबलसंबले गंतीए जोत्तिऊण गओ जक्खपुरओ, वाहिया महतीवेलं, ते य अचंतदरिसणिज्जायारत्तणेण

आभीरा-  
पित्तौ कम्ब-  
लशम्बल  
वृषौ.

॥ १८० ॥

अन्नपणयिणा जणेण वाहिज्जमाणा आरावेहनिस्सरंतरुहिरधारापरिगया कोमलदेहा अदिट्ठतहाविहवेयणा तुट्ठ-  
हियया नित्थामा जाया, तहाविहे य ते सेट्ठीगेहे वंधित्ता मित्तो पडिगओ, सेट्ठीवि भोयणसमए जाव जवसाइ  
घेत्तूणं एइ ताव पेच्छइ एए कंपंतदेहे निस्सहगलंतनयणे वणमुहनीहरंतसोणिए दोवि गोणए, एवंविहे य दट्ठूण रुट्ठो  
पुच्छइ—अहो केण दुरायारेण इमे वराया इमं अवत्थसुवणीया?, निवेइयं च से जहावित्तं परियणेणं, तदायन्नणेण  
य समुप्पन्नो महंतो चित्तसंतावो, कंबलसंबलावि दट्ठघायजजरियसरीरा अणसणं काउमणा सायरं पुरओ उवणी-  
यंपि चारिपाणियं न गेण्हंति, जाव य पुणो पुणो गवत्ताइयं दिज्जमाणं नेच्छंति ताव सेट्ठिणा मुणिऊण तदभिप्पायं  
दिन्नमेतेसिं भत्तपच्चक्खाणं, पडिवन्नं च साभिलासं एएहिं,

ताहे कारुन्नेणं विमुक्कनीसेसगेहवावारो । सुसिणिद्धबंधवाण व तेसिं पासे ठिओ सेट्ठी ॥ १ ॥  
भणइ जहा रोसमहो मणागमेत्तंपि मा वहेज्जाह । जं निदएण तेणं दुत्थावत्थं इमं नीया ॥ २ ॥  
संसारपवत्ताणं जंतूणं जेण कित्तिंयं एयं? । न हु नामेगंतसुहो जणंमि जाओ जणो कोई ॥ ३ ॥  
दट्ठवज्जपंजरोदरगयंपि सेलाइदुग्गलीणंपि । पुव्वकयमसुभकम्मं जीवं संकमइ कुवियं व ॥ ४ ॥  
विद्वइ तयणु चिवसं सुवहुं अइविरसमारसंतं च । कूडपडियं व चडयं बहुप्पयारं तडफडंतं ॥ ५ ॥  
ता भो महाणुभावा । सम्मं अहियासणं विमोत्तूण । अन्नो निज्जरणविही न विज्जए पुव्वपावस्स ॥ ६ ॥

श्रीगुणचंद  
महावीरच०  
५ प्रस्तावः  
॥ १८१ ॥

उवचियपुत्रा तुम्हे सफलत्तणमुवगयं च भे जीर्यं । जं दुक्खविमोक्खखमा पत्ता जिणधम्मसामग्गी ॥ ७ ॥

इय एवमाइवयणेहि पसमसारेहिं अमयसरिसेहिं । संठविया सुहमग्गे ते वसहा सेट्ठिणा सम्मं ॥ ८ ॥

एवं च विसुज्झमाणज्झवसाणा सरीरेवेयणं सहमाणा सेट्ठिभणिज्जमाणं पंचनमोकारं पडियच्छमाणा कालं काऊण

नागकुमारेसु देवेसु उववण्णा, ते इमे कंवलसंवलत्ति ॥

इओ य-भयवं महावीरो नावुत्तिन्नो संतो जलतीरंभि इरियावहियं पडिक्कमिय सुरसरियापरिसरे ईसिजलोलसु-  
हुमवालुगोवरि मंदं मंदं पयाइं निसिंतो थूणागसंनिवेसे गंतुं पयत्तो, नवरि सामिणो पडिफलंतचक्ककमलकुलिसं-  
कुसकलसपासायपमुहपहाणलक्खणंकियं पयपंतिं नइपुलिणे पलोइऊण पूसो नाम सामुदलक्खणवियक्खणो  
चिंतिउमारद्धो-अहो आजम्मकालाओऽवि अदिट्ठपुवा अचंतमच्छरियभूया कस्सइ महाणुभावस्स लक्खंडमहिमंड-  
लोवभोगिणो चक्किणोव पवरलंछणा पयपद्धई एत्थ दीसइ, जइ पुण कहंपि कोइ अपत्तरज्जो वा देसदंसणकोऊहली  
वा तहाविहविसमदसावडिओ वा चक्कवट्ठी एवं भमेज्जा, पेच्छामि तं महापुरिसं, जइ पुण एयावत्थंमि इमंमि  
सेविज्जमाणंमि मम समीहियत्थसिद्धी जाएज्जत्ति परिभाविऊण तुरियगइए जाव कइवयपयंतरमुवगओ ताव दिट्ठो  
अणेण थूणागसन्निवेसस्स वहिया बहलपल्लवालंकियकंकलितरुणो हेट्ठओ पडिभासंठिओ जिणो, दट्ठूण य परमे-  
सरस्स सिरिवच्छलंछियं वच्छयलं दाहिणावत्तगंभीरं नाभिमंडलं वालप्पवालपाडलं व करकमलं चिंतियमणेणं-न

कंवलशम्भ-  
लयोर्देवत्वं  
पुण्यसमा-  
धानं च.

॥ १८१ ॥

केवलं एयस्स चरणजुयले लक्खणं, सरीरं पि नियनियविभागाणुरुल्लक्खणाणुगयं उवलक्खिज्जइ, ता कंह एवं-  
विहा समत्थपसत्थलक्खणसंपया?, कंह परिजुन्नवत्थमेत्तं पि से न संपज्जइ? कंह वा समग्गभरहरज्जसिरिसूयण-  
परा तारिसा सामुद्दसत्थवयणवित्रासा?, कंह असंपज्जंतलुक्खभिक्षाहारकिसमेयस्सं सरीरं?, अहो दूरं पच्चक्खेण  
विरुद्धं लक्खणसत्थं ।

चिरकालं सेसकलाकलावमपि उज्झिऊण जत्तेणं । सामुद्दसत्थमेयं अघमिचारंति पढिओऽहं ॥ १ ॥

इण्हि तु एत्थ समणे निवसणे चक्खुगोयरं पत्ते । लक्खणसत्थमसेसं नूणं दूरं विसंवइयं ॥ २ ॥

हा हा धिरत्थु मज्झं परिस्समो जेण हरिणयोयव । माइणिण्यासमेणं लक्खणसत्थेण नढिओऽहं ॥ ३ ॥

मुट्ठीहिं हयं गयणं नवणीयत्थं विरोलियं सलिलं । अघडंतत्थनिवद्धं जं एयं अहिगयं सत्थं ॥ ४ ॥

केलिप्पिण्ण नत्ते संघडियमिमं पयारणपरेण । धुत्तकयं पिव कवं कालेणं होइ सिद्धंतो ॥ ५ ॥

अलमेत्तो एएणं पलालक्प्पेण दुट्ठसत्थेणं । इय तक्किऊण पूसो परमविसायं गओ सहसा ॥ ६ ॥

एत्थंतरंमि सक्को सुहासणत्थो पउंजए ओहिं । कह भयवं भवमहणो विहरइ परमेसरो वीरो?, ॥ ७ ॥

थूणागसन्निवेसे पेच्छइ पढिमट्ठियं जिणवरिंदं । नेमित्थियं च पूसं दुसंतं अत्तणो सत्थं ॥ ८ ॥

तो सिग्घं वियडकिरीडकोडिमणिकिरणविच्छुरियगयणो तियसेसो जिणकमकमलवंदणत्थं लहुं एइ, जहा-



श्रीगुणचंद  
महावीरच०  
५ प्रस्तावः

॥ १८२ ॥

भणियविहिणा य नमंसिऊण सामिं महुरवयणेणं पूसं भणइ-भइ ! किमेवं दूसेसि लक्खणसत्थं, नहु मिच्छा-  
भासिणो महाणुभावा सत्थयारा, किं तुमए न सुओ एस ससुरासुरखयरनरनरेसरसिरपणयचलणो सिद्धत्थनरिंदनं-  
दणो तिहुयणविकखायकित्ती धम्मवरचाउरंतचक्कवट्ठी खलमहिलंव रायलच्छिं छड्डिऊण एवं विहरइ । अन्नं च—

एसो सो जस्सेसरियकोडिलेसंपि न घडइ समग्गो । पायालसग्गनरखेत्तजायलोगो सुतुंगोऽवि ॥ १ ॥

एसो चिय भवभयभीमकूवमज्जंतसत्तउद्धरणो । वद्धंतुब्भडकलिकालदलणदक्खो इमो चेव ॥ २ ॥

एसो चिय सिवमंदिरकवाडपुडविहडणेक्कतल्लिच्छो । संजमलच्छिनिवेसियविसालवच्छत्थलो एस ॥ ३ ॥

एसो चिय करुणाजलनिवावियमच्छरग्गितत्तजणो । अण्णडिमनाणदंसणपमोक्खगुणगणनिही एस ॥ ४ ॥

पच्चाइऊण एवं पूसं तिविहेण वयणनिवहेण । पणमियजिणवरचरणो सहस्सनयणो गओ सग्गं ॥ ५ ॥

इय घोरपरीसहवेरिसमरविद्धंसणेक्कवीरस्स । वीरस्स भुवणपहुणो चरियंमि सुहोहभरियंमि ॥ ६ ॥

सुरसूलपाणिकोसियमहाहिपडिबोहणत्थसंवद्धो । पंचमओ पत्थावो समत्थिओ वित्थरेणेसो ॥ ७ ॥

इइ सिरिगुणचंदसूरिरइए महावीरचरिए सूलपाणिचंडकोसिअपबोहणो नाम पंचमो पत्थावो ।

इन्द्रागमनं  
प्रस्तावोप-  
संहारश्च.

॥ १८२ ॥

## अथ षष्ठः प्रस्तावः

पुवज्जियावज्जचिणासणत्थं, एगागिणा वीरजिणेसरेण । तित्तिक्खिया जे उवसग्गवग्गा, निदंसिया ते सयला कमेण ॥१॥  
एत्तो य गोसालयदुव्विणेयजुत्तस्स तस्सेव महापडुस्स । होहिंति जे ते उ निदंसइस्सं, एग्गच्चित्ता निसुणेह तुब्भे ॥२॥

अह पुव्वोवइट्ठथूणागसन्निवेसाओ निक्खमिऊण गामाणुगामेण परिभमंतो ठाणे ठाणे सुरविसरेण  
पूइज्जमाणो अभणमाणोवि नियमाहप्पेण पाणिगणं पडिवोहिंतो पत्तो काणणुज्जाणदीहियारमणिज्जं रायगिहं  
नयरं, तस्स य अदूरदेसे समुत्तुंगपासायसहस्ससमद्धासिओ नालंदो नाम संनिवेसो, तत्थ धणकणगसमिद्धो  
अज्जुणो नाम तंतुवाओ परिवसइ, तस्स य अणेगे कम्मकरा विसालसालासु संठिया विसिट्ठपट्टदूसाइं वुणंति, भय-  
पंपि वासारत्तं काउकामो अज्जुणं अणुजाणाविऊण एगंतभूयाए तसपाणविरहियाए सुन्नसालाए मासखमणं पढम-  
गुवसंपज्जित्ता विहरइ । इओ य गोसालो नाम मंखलिमंखस्स पुत्तो चित्तफलगोवजीवी एगागी परिभमंतो तत्थेव  
सालाए ठिओ जत्थ भयवं पलंविमभुओ चिट्ठइत्ति । जहिं च एयस्स उप्पत्ती तं पच्छा भणिणही, पढमं ताव जस्स  
सगासाओ मंखलीमंखो जाओ तद्वा कहिज्जइ ।

उत्तरावहविसए अत्थि सिलिंधो नाम संनिवेसो, तत्थ केसवो नाम गामरक्खगो, तस्स पाणप्पियाए विणीयाए

श्रीगुणचंद  
महावीरच०  
६ प्रस्तावः

॥ १८३ ॥

सिवाभिहाणाए भारियाए कुच्छिसि संभूओ मंखो नाम पुत्तो, सो य कमेण जोवणमुवगओ, अन्नया सो पिउणा सह सरोवरं गओ, जलमज्जनं च काऊण तडे निवन्नो पेच्छइ चक्कायमिहुणं अन्नोन्ननिम्भरपेसाणुरागरंजियहियं विविहकीलाविसेसे कुणमाणं, कहं चिय?—

चंचपुडच्छिन्नवनलिणिनाललवसंविभागफुडपणयं । सूरत्थमणासंकाकयनिविडपरोप्परसिलेसं ॥ १ ॥

जलपडिविवियनियरुवपेक्खणुप्पन्नविरहपरिसंकं । अन्नोन्नविहियनिकवडचाडुवक्खित्तमणपसरं ॥ २ ॥

एरिसं च तं नाऊणं मंदं मंदं परिसप्पिणा कयंतेणेव अमुणियागमणेण पारद्धिण आयन्नंतमाकट्टिऊण खित्तो तदभिमुहो सिलीमुहो, अह दिवसंजोगेण लग्गो चक्कायस्स, मम्मिओ य सो तेण घाएणं, जावऽज्जवि न वावज्जइ ताव तं तहाविहं पेच्छिऊण खणं रुणुञ्जुणिऊण य सकरुणं विवन्ना चक्काई, इयरोऽवि मुहुत्तमेत्तं जीविऊण पंचत्त-मुवगओत्ति । एवं च तच्चइयरभवलोइऊण मंखो मुच्छानिमीलियच्छो निवडिओ धरणिमंडले, दिट्ठो य केसवेण अहो किमेवमतक्कियमावडियंति विम्हियमणेण, समासासिओ सिसिरोवयारेहिं, खणंतरेण उवलद्धचेयणो पुच्छिओ य— पुत्त ! किं समीरखोभो ? उय पवलपित्तदोसो ? अहवा नित्यामत्तणं ? अन्नो वा कोइ हेऊ ? जेणेवं निस्सहंगो चिरं मो-हमुवगओऽसि ? साहेसु परमत्थं, तेणावि पिउवयणमायन्निऊण विमुक्कदीहुस्सासेण भणियं—ताय ! एवंविहं चक्काय-मिहुणं नियच्छिऊण मए पुवजाई सरिया, किर अहं पुवभवे माणससरोवरे एवं चिय चक्कायमिहुणत्तणेण वट्ठंतो पुल्लि-

मंखोत्पत्तिः

॥ १८३ ॥

दमुक्कमग्गणाभिहओ तक्खणविरहफुट्टहिययां चक्काईए अणुगओ मओऽम्हि, मरिऊण संपयं तुह पुत्तत्तणेण उववन्नो,  
इण्हि च चिरपणइणीए तीसे चक्काईए विरहं सोढुं न पारेमि, केसवेण भणियं—वच्छ ! अलं समइकंतदुक्खसुमरणेणं,  
एसो चिय सहाओ एयस्स दढकयंतस्स जं न सहइ दहुं चिरकालं पियसंपओगसुहियं कमवि जणं, अवि य—

देवाविय नियपणइणीविरहुब्भवदुक्खदहणरंतत्ता । मत्तव मुच्छिया इव कहकहवि गमंति नियजीयं ॥ १ ॥

तुम्हारिसाण पुत्तय ! केत्तियमेत्तं इमं अओ दुक्खं । जेसिं चम्मोणद्धं देहं सद्यावयासज्जं ॥ २ ॥

ता विरम पुब्भवसुमरणाउ वट्टेसु वट्टमाणेणं । तीयाणागयचित्तणवसेण सीयइ सरीरंपि ॥ ३ ॥

तेणं चिय संसारो नूणमसारो इमो दढं जाओ । जं जम्ममरणजरोगसोगपमुहाइं दुक्खाइं ॥ ४ ॥

इय पन्नविउं यिविहप्पयारहेऊहिं केसवेणं सो । नीओ कहमवि गेहे विरहमहावेयणाभिहओ ॥ ५ ॥

तत्थ गओऽवि सो पमुक्कपाणभोयणो सुन्नमणो धरणिनिसियलोयणो महाजोगिच्च निरुद्धवाचारंतरपरिचित्तणो  
तणंपि य नियजीवियंपि गणेमाणो अच्छइ, एयावत्थं च तं पासिऊण जायचित्तपरितावेण सयणवग्गेण मा छलणा-  
विगारो कोऽवि होज्जत्ति संकियमणेण सद्यायरेण बाहराविया तंतमंतवाइणो, दंसिओ तेसिं, कया य उवयारा, न  
जाओ मणागंपि विसेसो, अन्नया य देसंतराओ आगओ एगो थेरपुरिसो, ठिओ एयस्स चेव गिहे, दिट्ठो अणेण मंखो,  
पुट्ठो य पासवत्ती केसवो, जहा—भइ ! किं कारणं जं एसो जुवावि रोगाइणा निरुवहओवि ससल्लो इव लक्खिज्जइ ?

श्रीगुणचंद  
महावीरच०  
६ प्रस्तावः

॥ १८४ ॥

केसवेणवि साहिओ दोसुब्भवो, तेण भणियं—कयं किंपि तुमए एवंविहदोसस्स पडिविहाणं ? केसवेण भणियं—दंसिओ  
एसो पवरमंततंताइजाणगाणं, थेरेण जंपियं—निरत्थओ सवोवक्कमो, पेमगहस्स किं करिंति ते वरागा ? तहाहि—  
उग्गविससप्पसंभूयवेयणोवसमकरणदक्खावि । पंचाणणहुट्टकरिंदरक्खसीधंभणपरावि ॥ १ ॥  
भूयससुत्थोवद्वविणासकुसलावि परमविज्जावि । पेमपरवसहिययं पगुणं काउं न पारिंति ॥ २ ॥  
केसवेण भणियं—किं पुण एत्तो कायधं ? तेण भणियं—जइ मं पुच्छसि ता जावज्जवि दसमिदसं न पावइ एस  
ताव आलिहावेसु चित्तफलहगे पुव्ववइयरं, जहा—पुलिंदेण चक्काओ सरेण पहओ, जहा तंमि जीवंते चेव तप्पणइणी  
मयत्ति, एवं च काराविऊण चित्तफलगहत्थं एयं परिब्भमावेसु गामनगराइसु, मा एवं कए कहवि विहिव-  
सेण पुव्वभवभज्जावि पावियमहिलाभावा फलगलिहियचक्कायमिहुणवइयरावलोयणजायजाईसरणा इमिणा सद्धिं  
संघडेज्जा, सुव्वंति य पुराणागमेसु एरिसवुत्तंता, एवं च कए एसोऽवि आसाभुयग्गलाखलियजीओ कइवय-  
दिणाणि जीवेज्जा, एवमायन्निऊण केसवेण साहु साहु तुह बुद्धीए, को जाणइ परिणयमइणो पुरिसे मोत्तूण एवं-  
विहविसमत्थनिन्नयं ? ति अभिणंदिऊण तवयणं निवेइयं मंखस्स, तेणावि भणियं—ताय ! किमजुत्तं ? सिग्घमुवट्ठ-  
वेह चित्तफलं, एसो चेव हवउ कुवियप्पकल्लोलमालाउलस्स चित्तस्सुवक्खेवो, तओ केसवेण सुणिऊण तदभिप्पायं  
आलिहावियं जहावट्ठियचक्कायमिहुणरूवाणुगयं चित्तफलं, समप्पियं च मंखस्स, दिन्नं संवलं, तयणंतरं च सो

चित्रपट्ट-  
कार्पणं.

॥ १८४ ॥

चित्तफलगत्यो सहाइणा एगेण अणुगम्ममाणो नयरपुरखेडकच्चडमडं वपमुहेसु सन्निवेसेसु आसापिसायनडिओ  
निविस्सामं परिब्भमइ ।

दंसेइ पइगिहं चिय समूसियं तं च तियचउकेसु । चउमुहमहापहेसु य पवासभादेउलेसुं पि ॥ १ ॥

ताहे रहंगमिहुणं तहासरुयं निरुविऊण जणो । कोऊहलेण पुच्छइ साहेइ य सो जहावित्तं ॥ २ ॥

अणवरयंपि सवित्थरमसमत्थो नियकहं च सो कहिउं । संखेवत्थनिवद्धं साहइ दुवईए नियवत्तं ॥ ३ ॥

जहा-माणससरोवरंमि अवरोप्परपोढपेमाणुरंजियं, नयणनिमेसमेत्तविरहदूभिज्जंतदेहयं । लुद्धयमुक्कनिसियसर-  
विहुरियमह पंचत्तमुवगयं, संपइ संपओगमभिवंचइ एयं चक्कमिहुणयं ॥ ४ ॥ इमं च निसामिऊण केई पइसंति  
केई अवहीरंति केइ अणुकंपंति, सोऽवि अविलक्खचित्तो सकज्जपसाहणेकनिरओ परियडंतो चंपं नयरिं गओ, तत्थ  
य निट्ठियं पुष्पाणियं संवलं, तओ अन्नं जीवणोवायमपेच्छंतो तं चेव चित्तफलं पासंडं ओड्डिऊण गायणाइं गाय-  
माणो भिक्खं भमिउं पवत्तो, अविय—

अइतिक्खलुहाभिहयस्स पिययमाजोगऊपुयमणस्स । एक्काविय से किरिया उभयत्थपसाहिया जाया ॥ १ ॥

इओ य-तत्थेव पुरे वत्थवो मंखली नाम गिहवई, सुभदा य से भज्जा, सो य अपरिहत्थो चाणिज्जकलासु अकु-  
सलो नरिंदसेवाए असमत्थो करिसणसमए अलसो कट्ठकिरियाए अवियक्खणो वावारंतरेसु, केवलं भोयणमेत्त-  
पडिवद्धो कहां सुहेण निव्वाहो होज्जत्ति अणवरयं उवायंतरं विचिंतंतो पेच्छइ मंखं चित्तपट्टपयडणपडियकणभिक्षा-

श्रीगुणचंद  
महावीरच०  
६ प्रस्तावः

॥ १८५ ॥

मंखलिनो  
मंखत्वं  
गोशालो-  
त्पत्तिश्च.

॥ १८५ ॥

वित्तीए पइदिणं सुहेण निवहंतं, तं च दट्ठण चिंतियमणेण-अहो एयस्स इमा अणुवरोहिणी वित्ती अचोरहरणिज्जं  
भंडोलं निचंदुहा कामधेणू असलिला सस्सनिप्फत्ती अपरिकिलेसो महानिही, ता जीविओऽस्मि चिरकालाओ जं  
पाविओ एस परमोवाओत्ति विगप्पिऊण गओ मंखस्स समीवं, पडिवन्ना तस्स सेवा, सिक्खियाइं गायणाइं, अह  
तंमि पुवभवभज्जाविरहवज्जज्जरियहिययंमि पंचत्तमुवगए सुणियतत्तं व अप्पाणं मन्नंतो महया वित्थरेण चित्तफल-  
गमवरमालिहाविऊण समागओ निययमंदिरं, भणिया नियगेहिणी-पिए ! पाडेसु संपयं छुहासिरे वज्जासणिं पगुणा  
भवाहि य विहारजत्ताए, तीए वुत्तं एसा पगुणाऽहं, वच्चसु जत्थ भे रोयइ, तओ चित्तफलं घेत्तुं तीए समेओ  
नीहरिओ सो नयरीओ, तवित्तीए परिब्भमिउमारद्धो य देसंतरेसु, तवासिलोगोऽवि पुव्वदिट्ठनाएण तमागयं  
पेच्छिऊण मंखो आगओत्ति वाहरइ, एवं मंखली मंखोवइट्ठपासंडसंवद्धेण मंखो जाओत्ति । अन्नया य सो परिब्भ-  
मंतो पत्तो सरवणसन्निवेसे, ठिओ गोवहुलमाहणस्स गोसालाए, तत्थ निवसमाणस्स पसूया सुभदा, जाओ से  
दारगो, कयं उचियसमए गुणनिप्फन्नं गोसालोत्ति नामं, संवद्धिओ कमेणं, अइकंतो वालत्तणं, सो य दुट्ठसीलो  
सभावेणं, कुणइ विविहाणत्थे सभावेण, न वट्ठइ आणानिद्देसे, सिक्खविज्जमाणो पवहइ पओसं । अवि य-

सम्माणदाणपगुणीकओवि उज्जुत्तणं खणं धरइ । सुणपुच्छंपिव पच्छा कुडिलत्तं झत्ति दंसेइ ॥ १ ॥

अत्थक्कजंपिरं मम्मवेहणं कूडकवडपडिवद्धं । वेयालं पिव तं पेच्छिऊण को को न संकेइ ? ॥ २ ॥

पाय ! नवमासमेत्तं गन्धे वूढोवि पालिओवि वहुं । सयवारंपि य भणिओ वट्टसि नो वयणमेत्तेऽवि ॥ ३ ॥  
 इय जणणीए एसो वुत्तो पचुत्तरं इमं भणइ । अम्मो ! ममोदरे विससु जेण दुगुणं तुमं धरिमो ॥ ४ ॥  
 जत्थ दिवसंमि कलहं पिउणावि समं पउंजइ न एसो । भोयणरुईवि पावस्स तस्स जायइ न तत्थ फुडं ॥ ५ ॥  
 नीसेसदोसनिवहेण निम्मिओ निच्छियं पयावइणा । जं तारिसो न दीसइ अन्नो सवमिवि जयंमि ॥ ६ ॥  
 तह कहवि तेण नियदुट्ठिमाइ लोगो परंमुहो विहिओ । जह दुस्सीलजणाणं सो पढमनिदंसणं पत्तो ॥ ७ ॥  
 इय विसतरुष दिट्ठीविसोव पढमुग्गमेवि वट्टंतो । दंसणमेत्तेणं चिय भयावहो सो जणे जाओ ॥ ८ ॥  
 अन्नया य सो पिउणा समं वाढं कलहिज्जण तारिसयं चिय चित्तफलं आलिहावेत्ता एकल्लो भमंतो उवागओ  
 तत्थेय सालाए जत्थ भयवं ठिओत्ति । एसा गोसालगस्स उप्पत्ती ॥

अह सामी पढमं मासकखमणं काळण पारणगदिणे पविट्ठो भिक्खट्ठा, गोयरचरियाए पत्तो विजयाभिहाणस्स  
 सेट्ठिस्स मंदिरं, दिट्ठो य तेण भयवं, तओ परमहरिसवसविसप्पमाणसमुच्चरोमंचमुवहंतेण पाराविओ भूरिभंक्खवं-  
 जणसनिद्धाए भोयणविहीए, पाउब्भूयाणि नहयले गंभीरभेरीभंकारुम्मिस्सचउविहत्तूरसणाहाइं सिंदूरपूरारुणचा-  
 मीयरघारापज्जवसाणाइं पंच दिवाइं, वियंभिओ तियचउक्कचचरपहेसु विविहो साहुवाओ, निसामिओ गोसालेण  
 एस वुत्तंतो, तओ चिंतियमणेण-अहो न सामन्नमाहप्पो एस देवज्जो, ता परिचइज्जण चित्तपट्ठिगापासंडं पडिव-



श्रीगुणचंद  
महावीरचं  
६ प्रस्तावः

॥ १८६ ॥

जामि एयस्स सीसत्तणं, न कयाइ निप्फला हवइ रथणायरसेवा, एवं विगप्पमाणस्स भयवं पारिऊण पत्तो तमेव  
तंतुवायसालं, ठिओ काउस्सग्गेणं, गोसालोऽवि सामिणो अट्ठंगं निवडिऊण चलणेसु विन्नवेइ—

एरिसमाहणं तुह देवज्जय ! नो भए पुरा नायं । कुसलोऽवि मुणइ नग्घं अहवा थवियाण रथणाणं ॥ १ ॥

नियजणगच्चाओऽविहु वंछियसुहअत्थसाहगो जाओ । अणुकूले वा दइवे अनओऽवि नयत्तणमुवेइ ॥ २ ॥

हवउ बहुजंपिएणं पडिवज्जिस्सामि तुम्ह सीसत्तं । अब्भुवगमेसु सामिय ! पत्तो एको तुमं सरणं ॥ ३ ॥

सामीवि इमं सुणित्तावि विहिषडिसेहे अकुणमाणो तुसिणिक्को ठिओ, इयरोऽवि निययाभिप्पाएण पडिवन्न-  
सिस्सभावो भिक्खाए पाणवित्तिं काऊण भगवओ समीवं न सुयइ, अह वीयमासखमणपारणए आणंदनामस्स  
गिहवइस्स घरे गोयरचरियाए पविट्ठो भयवं, पडिलाभिओ य खज्जगविहीए, तइए य मासखमणपारणए सुनंदस्स  
मंदिरे सच्चकामगुणिएणंति । एत्तो चउत्थमासखमणमुवसंपज्जित्ताणं विहरइ, गोसालोऽवि बहुदिवससेवासंभाविय-  
पणयभावो कत्तियपुत्तिमादिवसे संपत्ते पुच्छइ—भयवं ! एरिसियंमि वारिसियमहूसवे किमहमज्ज भत्तं लभिस्सामि ?,  
एत्थंतरे जिणवरतणुसंलीणेण भणियं सिद्धत्थवंतरेण—भइ ! अज्ज तुमं पाविहिसि अंविलेण समं कोद्वकूरं, कूड-  
रूवगं च दक्खिणाएत्ति, सो एवं निसामिऊण सूरुग्गमाए आरब्भ सच्चायरेण उच्चावएसु गिहेसु परिभमिउमा-  
रद्धो, जत्थ जत्थ वच्चइ तत्थ तत्थ आरनालकलवियं कोद्वकूरमेव लब्भइ, अह जायंमि अवरणहसमए छुहा-

गोशाल-  
कस्य  
प्रव्रज्या.

॥ १८६ ॥

पियासाभिहो जाहे अन्नं किंपि न पावेइ ताहे एगेण कम्मारेण गेहे णेरुण जेमाविओ अंविलोलियं कोद्वकूरं,  
उवणीओ य से भोयणावसाणे रूयगो, गहिओ य तेण, नवरं वीहीए दंसिओ, कूडगो य जाओ, तओ सो 'जेण  
जहा भवियवं, न तं हवइ अन्नह'त्ति नियइवायं गिण्हइ, भयवंपि तंमि चिय कत्तियपुणिणमादिणे निक्खमिऊण नालं-  
दाओ गओ कोलागसन्निवेसं, तत्थ य चहुलो नाम माहणो तद्धिणं दियवरे परमायरेणं भुंजावेइ, तस्स य गिहे  
चउत्थमासखमणपारणगं काउकामो सामी पविट्ठो भिक्खं, दिट्ठो अणेण, तओ परमत्तेण घयमहुसणाहेण पडिला-  
भिओ, वियंभियाइं पंच दिवाइं । इओ य—

कूडगरूययहत्यो लज्जाए मंदमंदसंचरणो । जाए वियालसमए गोसालो एइ सालाए ॥ १ ॥

जिणनाहमपेच्छंतो संभंतो पुच्छई समीवगयं । लोयं जिणप्पउत्तिं पुणरुत्तं सव्वजत्तेणं ॥ २ ॥

जाय न कोइ निवेयइ सवाहिरम्भंतरं समंतेणं । नालंदं तावेसो हिंडइ सामिं निहालंतो ॥ ३ ॥

न य कत्थवि उवलद्धो तग्गमणविही तओ स चित्तेइ । पडिकूलो मज्झ विही पुणोवि विहिउऽहि एगागी ॥ ४ ॥

एवं च सुचिरं परिश्रूरिऊण परिचत्तचित्तफलपमुहोवगरणो विमुक्कनियंसणो सउत्तरोट्ठं सिरं खउराविऊण नीह-  
रिओ तंतुवायसालाओ, तुरियं वचंतो य पत्तो कोलागे, तत्थ य वहिया जणो अण्णमण्णं एवं जंपेइ-अहो धण्णो  
कयउण्णो उवलद्धजम्मजीवियफलो माहणो जस्स घरंमि तहाविहमहामुणिदाणवसेण निवडिया कणगवुट्ठी, तिय-

श्रीगुणचंद्र  
महावीरच०  
६ प्रस्तावः

॥ १८७ ॥

सेहिं उग्घुट्टं अहो दाणं, जाओ जयंमि निम्मलो साहुवाओ, गोसालोऽवि एयभट्टं जणंतियाओ सोचा हट्टतुडो  
एवं विचिंतेइ—जारिसं महामुणिं एए वयंति तारिसप्पभावो सोच्चिय मम धम्मायरिओ महावीरो, जेण नखलु अत्थि  
अन्नस्स कस्सइ तहारूवस्स समणस्स वा माहणस्स वा एवंविहा इट्ठीसकारपरक्कमत्ति निच्छिऊण कोल्लागसंनि-  
वेसंमि स वाहिरब्भंतरं सुनिउणदिट्ठीए जाव पलोएइ ताव दिट्ठो भयवं काउस्सग्गमुवगओ, तं च पेच्छिऊण हरिस-  
वसूससियरोमकूवो वियसियवयणो पावियचिंतारयणं व अप्पाणं मन्नंतो तिवखुत्तो आयाहिणपयाहिणं काऊण  
निवडिओ भयवओ चरणेसु, भालतले घडियपाणिसंपुडो य एवं भणिउं पवत्तो—

असरिसगुणगणरयणायरो तुमं तिहुयणस्स पुज्जो य । विहलियजणसाहारो य जेण ता विण्णवेमि इमं ॥ १ ॥

पुव्वं वत्थाइपरिग्गहेण जोग्गो न आसि दिक्खाए । संपइ पुण परिचत्तंमि तंमि जाओ अहं जोग्गो ॥ २ ॥

ता तेलोक्कदिवायर ! पडिवज्जसु जेण संपइ भवामि । तुह सिस्सो जा जीवं एत्तो तं चेव धम्मगुरू ॥ ३ ॥

तुह थेवमेत्तविरहेवि नाह ! हिययं कहंपि फुट्टंतं । पुणरुत्तसंगमसमीहणेण कट्टेण संधरियं ॥ ४ ॥

जाणामि वीयरामे कीरंतो नेव निव्वहइ नेहो । पेमगहिलं सचित्तं किंतु न पारेमि पडिखलिउं ॥ ५ ॥

अन्नं च—अच्छउ दूरे सेसं वियसियनवनलिणमणहरच्छीए । जं पेच्छसि तं तेणवि मुणेवि अब्भुवगओऽहंति ॥ ६ ॥

इय सविणयं सपणयं अणमाणे तंमि तिहुयणेक्कपहू । उज्झियपेमवियारोवि तस्स वयणं पडिस्सुणइ ॥ ७ ॥

कोल्लाके  
गोशालक-  
मीलनं.

॥ १८७ ॥

जाणंताविहु अइदुट्ठसीलयं भाविरं अणंत्यं च । गरुया पणएसु तहावि हुंति न परंमुहा कहवि ॥ ८ ॥  
एवं च सामी तेण पडिवण्णसिस्संभावेण समेओ सुवन्नखले सन्निवेसे वचइ, तस्संतरे गोवाले बहुखीरं गहाय  
गहतीए थालीए अखंडफुडिएहिं नवएहिं सालितंदुलेहिं पायसमुवक्खडेंते पेच्छिऊण गोसालो भणइ-भयवं ! दढं  
लुहाभिभूओऽम्हि, ता एहं एत्थ पायसं परिभुंजामो, अह सिद्धत्थेण चिरकाललद्धावगासेण भणियं-भइ ! मा  
तम्मसु, एसा थाली अद्धसिद्धा चेव विहडीहि, ताहे सो नियदुट्ठसीलयाए तं वयणं वितहं काउमणो गंतूण ते गोवे  
भणइ-अरे एस देवज्जगो तीयाणागयजाणओ एवं कहेइ, जहा-एस पायसथाली अद्धसिद्धा चेव विवज्जिही, ता  
पयत्तेण संठवेह, एवं च निसामिऊण ते भयभीया वंसदलेहिं तं पिढरं गाढं वेढिऊण रंधिउमारद्धा, अह पउरतं-  
दुलपक्खेवविहसिया निमेसमेत्तेण फुट्टा थाली, पच्छा गोवेहिं जं जहा पावियं तीसे पायसालिद्धं कप्परं तं तहा  
घेत्तूण परिमुत्तं, गोसालोऽवि कंदुकविरालोव पेच्छमाणो विलक्खो चेव ठिओ सुट्ठयरं च नियइयायं पडिवन्नो,  
अह सामी वंभणगामं गओ, तत्थ य गामे दोन्नि पाडगा, तेसु दो भायरो नंदउवणंदनामाणो सामित्तं कुणंति,  
भुवणगुरूवि छट्ठपारणगंमि पविट्ठो नंदपाडयंमि, दिट्ठो नंदेण, पडिलाभिओ दहिमिस्सेण वासियकूरेण, गोसा-  
लोऽवि गओ इयरपाडयं, उच्चुंगपासायमवलोइऊण पविट्ठो उवनंदस्स मंदिरे, भणिया उवनंदेण कम्मयरी, जहा-  
देहि एयस्स भिक्खंति, उवणीओ अणाए वासियकूरो गोसालयस्स, सो य तं अणिच्छंतो उवणंदं एवं निब्भच्छेइ-

श्रीगुणचंद  
महावीरच०  
६ प्रस्तावः

॥ १८८ ॥

गासुकोडं गिणहह नरनाहस्स व न देह किंपि करं । विविहे कुणह विलासे अक्खलियं पावमायरह ॥ १ ॥  
अम्हारिसाण सुणिपुंगवाण गेहंगणमुवगयाणं । वासियभत्तं दाविंतया कहं नेव लजेह ? ॥ २ ॥  
एवं च आयन्निऊण रुद्धेण उवणंदेण भणिया दासी-भदे ! एयस्स चेव समणस्स सीसंमि पक्खिवसु भत्तमेयंति,  
खित्तं च तीए, तओ गोसालो बाढमुवूढाभिमाणो दट्ठोद्विभित्तिभासुरो अन्नं किंपि तस्स अणत्थं काउमसमत्थो  
गेहदुवारे ठाऊण भणइ-जइ मम धम्मायरियस्स अत्थि तवो वा तेओ वा ता एयस्स मणुयाहमस्स भवणं उज्झ-  
उत्ति, अह अहासन्निहिण्हिं वाणमंतरेहिं भगवओ पक्खवायमुवहंतोहिं विउव्विओ हुयवहो, दहं से मंदिरं ।  
तयणंतरं च भयवं चंपानयरिं गओ, तत्थ य तइयं वासारत्तं ठाइ, दोमासिएण य खमणेण तवोकम्ममुवसंपज्जइ,  
विविहाणि य उकुडुयासणार्हणि करेइ, चरिमदुमासियपज्जवसाणे य बाहिं पारेत्ता गोसालेण समेओ कालायं नाम  
सन्निवेसं वचइ, तहिं च एगंतभूए तसपाणरहिए सुन्नागारे निसासमयंमि पडिमं पडिवज्जइ, गोसालोऽवि चवल-  
त्तणेण निरोहमसहमाणो गेहदुवारदेसे निलुको अच्छइ, एत्थंतरे सीहो नाम गामाहिवपुत्तो विज्जुमईनामाए दासीए  
समेओ भोगत्थी तं चेव सुन्नघरं पविट्ठो, तेण य महया सद्देण भन्नइ-अहो जइ कोइ एत्थ समणो वा वंभणो वा  
पहिओ वा वसिओ ता सो साहेउ जेण अम्हे अन्नत्थ वचामो, इमं च सुणिऊण सामी ताव पडिमापडिवन्नत्तणेण  
तुण्हिको जावेइ, इयरो पुण कवडेण न देइ पडिवयणं, ताणि य अणुवलद्धपडिवयणाणि निस्संकं सुरयविणोएण

सुवर्णखल-  
मार्गः उप-  
नन्दगृह-  
दाहः का-  
लाकगमः.

॥ १८८ ॥

स्यं अञ्छिता नीहरिउमारद्धानि, एत्थंतरे दुवारदेसंतरट्टिएण गोसालेण गच्छंती छित्ता विज्जुमई, तओ तीए  
भणियं-अज्जउत्त ! अहं पुट्ठा केणावि, एयं च निसामिऊण सीहेण वलित्ता गहिओ वाहाए गोसालगो, भणिओ  
य-अरे कइयवेण अम्हे अणायारमायरमाणानि पाससि, पुच्छिओऽवि न साहेसि जहा अहमिह निवसामित्ति निब्भ-  
च्छिऊण जहिच्छं पिट्ठिओ लट्ठीए, गओ य सट्ठाणं, तओ-गोसालो भणइ जिणं-तुम्ह समक्खंपि एक्कओ अहयं ।  
एयं निट्ठुरघाएहिं कुट्ठिओ कारणेण विणा ॥ १ ॥ न मणागंपि हु तुम्हे निवारणं कुणह तरस पावस्स । मम घाय-  
णुज्जुयस्सवि जुज्जइ गरुयाण किमुवेहां ? ॥ २ ॥

अह जिणतणुमलीणो सिद्धत्थो वागरेइ गोसालं । रे दुट्ठसील ! जइ तं सचं चिय सुहसमायारो ॥ ३ ॥  
ता किं अनिमित्तं चिय तं महिलं छिवसि पाव ! गच्छंति । जह अम्हे संलीणा तह ठासि न गेहमज्झगओ ॥ ४ ॥  
तुह पक्खं कुणमाणा अम्हेवि तुमं व नणु हणिज्जामो । दुट्ठोवट्ठंभपरा होंति सदोसा अदोसावि ॥ ५ ॥  
एत्थंतरंमि सामी निक्खमिउं यत्तकालगामंमि । पुव्वविहाणेणं चिय सुन्नघरे संठिओ पडिमं ॥ ६ ॥  
अह तत्थवि रयणीए गामउडसुओ उ खंदओ नाम । नियमज्जालज्जाए एइ समेओ सदासीए ॥ ७ ॥  
दंतलियानामाए ताहे पुवं व पुच्छइ इमोऽवि । गोसालोऽवि निलुक्को भएण गेहेक्कदेसंमि ॥ ८ ॥  
विजणंति मन्नमाणो तत्तो तीए समं जहिच्छाए । उवभुंजिऊण भोगे सो निस्सरिउं समारद्धो ॥ ९ ॥

श्रीगुणचंद  
महावीरच०  
६ प्रस्तावः

॥ १८९ ॥

तेसिं मिहो कहल्लावसवणसंवड्डमाणपरितोसो । कहकहकहत्ति पहसइ गोसालो अह पिसाओव ॥ १० ॥  
सोचा पहसियसइं खंदो कोवेण जट्टिमुट्ठीहिं । हणिऊण तं विमुंचइ ताहे सो एइ जिणमूले ॥ ११ ॥  
भणइ य सोवालंभं नायगधम्मो किमेस संभवइ? । पेच्छंताणवि तुम्हं जं एवमहं हणिज्जामि ॥ १२ ॥  
रक्खाकएण तुम्हे ओलग्गिजइ सया पयत्तेणं । जइ पुण सावि न विज्जइ निरत्थिया ता थुवं सेवा ॥ १३ ॥  
अज्जवि सद्दोसाणवि पडुणो नियसेवगाण परिताणं । सद्वायरेण कुवन्ति किं पुणो नीइनिरयाणं? ॥ १४ ॥  
सिद्धत्थेणं भणियं केत्तियमित्तो इमो विणिग्घाओ? । अज्जवि मुहस्स दोसेण नत्थि तं जं न पाविहिसि ॥ १५ ॥  
तओ सामी कुमारसंनिवेशं गओ, तत्थ य चंपगरमणिज्जाभिहाणे उज्जाणे पलंविभुओ ठिओ काउस्सग्गेण, ताहिं  
च सन्निवेशे अपरिमियधणधन्नसमिद्धो अचंतसुरापाणप्पिओ कुवणयनाम कुंभकारो परिवसइ, तस्स आवणंमि पास-  
जिणसिस्सा संसमयपरसमयत्थपरिन्नाणनिउणा भवोयहिनिवडंतपाणिगणसमुद्धरणसमत्था लत्तीसगुणरयणनिहिणो  
जहोवइट्ठपगिट्ठजइकिरियापरूवणापरायणा अणेगदेसंतरागयविणेयभमरलिहिज्जमाणसुयमयरंदा मुणिचंदा नाम  
सूरिणो निवसंति, ते य वाढं बुद्धभावमुवगया एवं विचिंतंति—  
सवणणुजिणपणीओ धम्मो सवत्थं वित्थरं नीओ । मिच्छत्तवसपसुत्ता सत्ता पडिवोहिया बहुसो ॥ १ ॥  
सुत्तत्थेहिं सिस्सा संपइ निप्फाइया जहासत्तिं । परिवालिओ चिरं तह सवालबुद्धाउलो गच्छो ॥ २ ॥

पत्रालक  
गमः कुमा-  
रसंनिवेशे-  
मुनिचन्द्राः

॥ १८९ ॥

ता एतो जुत्तं मे वित्तेसपरिकम्मणं सरीरस्स । काउं जहसत्तीए सवत्थवि उज्जमेयघं ॥ ३ ॥

इय चित्तिऊण सपए निवेसिओ तेण वद्धणो नाम । सिस्सो पडिखवगुणो विहियां से तह गणाणुजां ॥ ४ ॥

भणिओ य वच्छ । गच्छो जहा मए पालिओ पयत्तेण । तुमएवि तहा एसो पालेयवो सयांकालं ॥ ५ ॥

सिद्धंतदेसणावि यं अविगणियपरिस्समेण कायघा । सिस्साणं एवं चियं रिणमोक्खो कम्मविगमो य ॥ ६ ॥

एतोऽवि भइ ! भइं नूणं भुवणत्तएवि नो अत्थि । तो सुहसीलो होउं सुहाए मा हारिसिं एयं ॥ ७ ॥

नो मुणिणो ! तुम्हेहिं पयट्ठियं इमस्स वक्कमि । निब्भच्छिहिवि वहुं कमकमलं नेवं मोत्तघं ॥ ८ ॥

जं किंपि मए पुघं तुम्हे सम्मं गुणेषु नो ठवियां । अपए वा सिक्खविया तं सवं मरिसणिज्जं मे ॥ ९ ॥

इय मुणिचंदमुणिंदा तफालोचियविहिं विहेऊण । पारंभंति सुधीरा दुक्करजिणकप्पपरिकम्मं ॥

अज्जपा य ते महाणुभावा भावियदुवालसविहभावणा पंचणहं तुलणाणं तवसत्तसुत्तएगत्तवलसरूवाणं मज्झया-  
राओ वीयाए सत्ततुलणाए अट्ठाणं भावेमाणा विहरंति । इओ य-गोसालो मज्झंदिणसमए भगवंतं भणइ-एहि  
पत्थावो वट्ठइ, पविसामो गाममज्झे भिक्खानिमित्तं, सिद्धत्थेण भणियं-पज्जत्तं अम्ह अट्ठणेणं, तओ गोसालो  
पविट्ठो भोयणत्थं गामे, दिट्ठा य अणेण इओ तओ परिभमंतेण ते पासनाहसिस्सा विचित्तपडपाउरणा पत्तपमुहो-  
यगरणकलिया यत्ति, ते य पेच्छिऊण गोसालेण पुच्छिया-के तुम्हे?, तेहिं भणियं-समणां निग्गंथा, सठकमठवि-



श्रीगुणचंद  
महावीरच०  
६ प्रस्तावः

॥ १९० ॥

णिम्मियमहामेहवारिधारोवसग्गावलोयणाउलफणिरायफणाफलगविरइयातुच्छत्तस्स पासनाहस्स सिस्सा, इति  
सोचा सो सिरं धुणंतो भणइ-अहो अहो निग्गंथा दुक्करकारया तुम्हे जे एत्तियमेत्तंपि मंथमुवहंता  
अत्तणो निग्गंथत्तणं ठावेह, अहो पच्चक्खमुसावाइत्तणं अहो निन्निमित्तमत्तुकोसो तुम्हाणं, सवहा निग्गंथाणं मज्झे  
न केवि तुम्हे, मम धम्मायरिओ चेव दूरुज्झियवत्थाइपरिग्गहो दुक्करतवचरणनिरओ महप्पा जहत्यनिग्गंथो भन्नइ,  
तेहि य जिणनाहं अयाणमाणेहिं उलुंठयाए भासंतं पेच्छिऊण भणियं-भद! जारिसओ तुमं तं मन्ने धम्मायरि-  
ओऽवि तारिसो चेव, जओ-जाणिज्जइ पुत्तविसरिसचेट्ठाए जणणीए सीलसंपया, कंतिगुणेणवि मुणिज्जइ रयणस्स  
आगरस्स सुद्धी, ता अलं वन्नणाएत्ति वुत्ते रुट्ठो गोसालो भणइ-जइ मम धम्मगुरुणो तवो वा तेओ वा अत्थि ता  
एएसिं धम्मायरियदूसगाणं पडिस्सओ डज्झइत्ति, तो तेहिं भणियं-न अम्हे तुम्ह वयणेणं डज्झामो, तो विलक्खो  
सो गंतूण सामिं भणइ-भयवं! अज्ज मए सारंभा सपरिग्गहा निग्गंथा दिट्ठा एवमाइ जाव पडिस्सओ न दट्ठोत्ति  
किमिह कारणं?, सिद्धत्थेण भणियं-ते पासावचेज्जा थेरा साहुणो, न तेसिं पडिस्सओ तुह वयणेण डज्झइत्ति । एत्थं-  
तरे जाया रयणी, कज्जलभसलसामलाइं पसरियाइं दिसिमुहेसु तिमिरपडलाइं, इओ य ते मुणिचंदसूरिणो चउक्कंमि  
तद्दिणे रयणीए एगागिणो उस्सग्गेण ठिया, सोऽवि कूवणयकुंभकारो सेणिभत्तंमि निच्चरमइरापाणपरवसो विसंठु-  
लघुलंतचलणो सभवणाभिमुहमइंतो पेच्छइ बाहिंमि काउस्सग्गपडिवन्ने ते सूरिणो, तओ चोरो एसोत्ति जायकुवि-

मुनिचन्द्रा-  
चार्यशिष्यै-  
रुद्धापः.

॥ १९० ॥

यप्पेण तेण निविडकरसंपुडेण पीडियं तेसिं गलयं, निरुद्धो उरसासेपसरो, तहवि अविचलियचित्ता सुभज्झाणे वट्ठंता  
 तक्खणमेव कम्मलाघवयाए समुप्पन्नोहिनाणा कालं काऊण देवलोयं गया, तेसिं च अहासन्निहियसुरेहिं कुसुमवरि-  
 सपुवयं कया महिमा । इओ य गोसालो ते देवे विज्जुपुंजभासुरसरीरे उप्पयंते निवयंते य साहुनिवाससमीवे पेच्छिऊण  
 सामिस्स साहेइ-भयवं ! तेसिं तुम्ह पडिणीयाण पडिस्सओ डज्झइ, सिद्धत्थो भणइ-भइ ! मा एवमासंकेहि, तेसिं  
 आयरिया देवलोगमुवगया, अओ देवा महिमं करेंति, ताहे सो कोऊहलेण गओ तं पएसं, देवावि पूयं काऊण सट्ठाणं  
 पडिनियत्ता, अह तत्थ गंधोदकं पुप्फवासं च दट्ठूण दुगुणजायहरिसो पडिस्सए गंतूण सज्झायझाणविणयकरणपरिस्संते  
 निम्भरं पसुत्ते तेसिं सिस्से उट्ठविऊण वागरेइ-अरे दुट्ठसिस्सा ! तुम्हे मुंडियसिरा चेव हिंडह, जहिच्छं भिक्खं  
 परिमुंजिऊण सव्वं रत्तिं सुयह, एत्तियंपि न मुणह-जहा सूरिणो महाणुभावा पंचत्तमुवगया, अहो तुम्हं गुरुसु  
 पडियंधो, एवमाइ कलकलं करेंतंमि उट्ठिया साहुणो, णवरं तवयणासंकिया सहसा गया ते सूरिसमीवे जाव  
 पेच्छंति कालगयमायरियं, तओ सुचिरं अद्धिइं काउमारद्धा । कंहं ?-

तह पालियावि तह प्राडियावि तह गुणगणेषु ठवियावि । तह सिक्खवियावि दढं हा हा अकयन्तुया अम्हे ॥ १ ॥  
 किं दुक्करतवचरणेण अम्ह किं वावि कुसलवोहेणं । किं चिर गुरुकुलसंवाससेवणाएवि विहलाए ॥ २ ॥  
 जं असरिससंजमरयणरोहणं नियगुरुं पि कालगयं । पच्चक्खधम्मरासिंपि नेव मुणिमो पमाएणं ॥ ३ ॥

श्रीगुणचंद  
महावीरच०  
६ प्रस्तावः

॥ १९१ ॥

इय ते नियदुच्चरियं पुणो पुणो चेव जंपिरे समणे । गोसालो निम्भच्छिय बहुसो सामिं समल्लीणो ॥ ४ ॥  
तओ सामी चोरागसन्निवेशं गओ, तत्थ य तद्विवसं परचकभयमुवट्ठियं, तन्भाएण य खंडरक्खा तियचउकसुन्न-  
मढसभादेउलकाणणुज्जाणेषु अन्नेसु य तहाविहठाणेषु अपुवपुरिसं चारियसंकाए निभालेमाणा पेच्छंति भयवंतं  
एगंमि वणनिगुंजे फासुगविजणरूवे गोसालएण परिवुडं काउस्सग्गेण संठियंति, तं च पिच्छिऊण 'भीओ भयाइं  
पांसइ' ति जायसंका चिंतिउमारद्धा-अहो एरिसंमि एगंतदेसे एएसिं अवत्थाणं न कोसल्लमावहइ, तहाहि-जइ  
इमे निहोसा ता किं पयडे चिय नो गाममज्झे वुत्था?, अओ निच्छयं चारोवलंभत्थं परचकसंतिया केइ आगयत्ति  
निच्छिऊण पुट्ठो तेहिं सामी गोसालगो य, अहो के तुब्भे? किं निमित्तं वा एत्थावत्थाणंतिवुत्ते भयवं मोणेण  
चिट्ठइ, गोसालोऽवि तयणुवित्तीए तहेव जावेइ, जाव य पुणो पुणो वागरिज्जमाणाऽवि न देति पयुत्तरं ताव निम्भंतं  
चारगा एएत्ति कलिऊण तेहिं नीया कूवतडे, पारद्धा य वरत्ताए वंधिऊण तत्थ पक्खिविडं, नवरं पढमं गोसालं पक्खि-  
वन्ति, पच्छा तं उत्तारिऊण भयवंतं वोळित्ति, एवं च उच्चोलणनिवोलणे कुणमाणाण सोमाजवंतीनामाओ पासजिणति-  
त्थपडिवन्नसामनुप्पन्नपरीसहपराइयाओ जीविगानिमित्तधरियपरिवायगनेवत्थाओ पुवभणियस्स उप्पलनेमित्तियस्स  
भगिणीओ निसुणियएवंविहवइयराउ मा भयवं चरिमत्तित्थयरो गहियदिकखो एस होज्जत्ति जायसंसयाउ जाव  
तत्थ पएसे आगच्छंति ताव पेच्छंति भयवंतं तहा वाहिज्जमाणंति, तओ ताहिं भणियं-अरे रे दुरायारा! नूनं विण-

आचार्य-  
स्यावधिः  
कालश्च  
चोराके  
सोमाज-  
वन्त्यौ

॥ १९१ ॥

स्तिउकामा तुम्हे जे इमस्स सिद्धत्थनरवईसुयस्स सुरविसरपणयचलणस्स एवं उवसंगं करेहं, एयं च निंसाभि-  
 ऊण भयभीएहिं सवहुमाणं खामिऊण मुक्को खंडरक्खेहिं जयगुरु, तं च ताओ वंदिऊण भावसारं गयाओ सट्ठा-  
 णंमि । सामीवि तत्थेव कइवय दिणाइं परिपालिऊण गोसालेण समेओ नीसेसनयरमंडलमंडणाए पिट्ठिचंपापुरीए  
 गंतूण चउत्थं वासारत्तं उवसंपज्जइ, वीरासणलगंडासणाइनिसेज्जाहिं निरंतरं जावेइ चाउम्मासियं च महाखमणं  
 करेइ, तस्स पज्जंतदिणंमि य अन्नत्थपारणयं काऊण कयंगलसन्निवेसंमि वच्चइ, तत्थ य दरिद्वेरा नाम पासंडत्था  
 सारंभा समहिला सपरिग्गहा सपुत्तनत्तुगाइसयणा परिवसंति, तेसिं च गेहपाडगस्स मज्झे सकुलंक्कमागयदेवया-  
 समद्धासियब्भंतरं विउलपट्टसालपरिक्खेवमणहरं समुत्तुंगसिहरोवसोहिअं देवउलमत्थि, तस्स एगंतकोणे समा-  
 गंतूण सामी ठिओ थडिमाए, तद्विसं च मंदमंदनिवडंतजलतुसारवायं निरारियंतसिसिरमारुयं निवडइ महंतं  
 सीयं, तेसिं च पासंडत्थाणं तंमि दिणे जाओ महुसवो, तंमि दिणे देवउले मिलिऊण सडिंभा सदारा भत्तीए गायंति  
 यं नचंति य, तेऽवि तहारूवे दट्ठूण अविगणियभाविभओ गोसालो सोवहासं भणिउमाढत्तो—

जत्थ गिहिणीसु पेमं ज्ञाणज्झयणेहिं सह महाचेरं । सुरयपवंचपरूवणपरायणाइं च सत्थाइं ॥ १ ॥

जीवदयानांमंपिवि न मुणिज्जइ जत्थ नूण सुमिणेऽवि । निब्भरमइरापाणंमि निचसो उज्जमो जत्थ ॥ २ ॥

गाइज्जइ नच्चिज्जइ सविलासं नियकुडुंवसहिएहिं । को होज्ज नाम एसोऽवि कोऽवि पासंडपरमत्थो ? ॥ ३ ॥

श्रीगुणचंद  
महावीरच०  
६ प्रस्तावः

॥ १९२ ॥

ते एवं फरुसक्खरं तं जंपमाणं पेच्छिऊण समुप्पन्नरोसा भणंति-अरे बाहिं निच्छुभह एयं दुट्ठमुहं, न कज्जमेएण इहट्ठिएणं, एवं कहिए कंठे घेत्तूण इयरोहिं निस्सारिओ देवउलस्स बाहिंमि गोसालो, तहिं च हिमतुसारसंवलि-यानिलेण अब्भाहओ समाणो निविडवाहुवल्लरीसंछाइयवच्छत्थलो कंपंतकाओ दंतवीणावायणं कुणमाणो समुद्ध-सियरोमकूवो अच्छिउं पवत्तो, तारिसं च तं दट्ठूण जायाणुकंपेहिं अइनीओ सो अन्नेहिं देवउलमज्झे, खणमेत्तं च जायसीयावगमो नियदुट्ठसीलयं पडिक्खलिउमपारयंतो पुणोऽवि वागरेइ-‘जत्थ गिहिणीसु पेम’मिचाइ, तओ पुणोऽवि नीणिओ पवेसिओ य जाव तिन्नि वारे, चउत्थवाराए भवणमज्झपविट्ठो गोसालो भणइ—

दूरे अच्छउ नियमयविगप्पियं जं न लब्भए वोत्तुं । सम्भूयंपि न पावेमि भासिउं किं करेमि अहं ? ॥ १ ॥

नमिमो तिसंज्जमेयं ठाणं न जहिं सदुच्चरीयस्स । रूसिज्जइ थेवंपिहु जइ पर फुडवाइणो चेव ॥ २ ॥

एवं च निसामिऊण परिणयबुद्धीहिं भणिया-एस इमस्स देवज्जगस्स कोऽवि पीढियावाहगो वा छत्तधारगो वा पडिचारगो वा होही, ता किं अरे एएण ?, तुण्हक्का अच्छह, नियनियकज्जाइं करेह, जइ सोढुं न तरेह ता सबत्तूराइं वाएह, जहा से सदो न सुणिज्जइ, तहेव विहियं तेहिं, अह जायंमि पभायसमए समुग्गए दिणयरे पच्चक्खी-भूयंमि जीवनियरे तओ ठाणाओ पडिमं उवसंहरिऊण सामी सावत्थिं नयरिं गओ, ठिओ तीसे बाहिं पडिमाए, इओ य भोयणसमए गोसालो पुच्छइ-भयवं ! तुब्भे भिक्खवुं अईयह ?, सिद्धत्थो भणइ-अज्ज अम्ह उववासो, सो पुच्छइ-

कृतांगले  
दरिद्रस्थ-  
विराः.

॥ १९२ ॥

भयवं ! अज्ज किमाहारं भुंजिस्सामि ?; सिद्धत्थो भणइ-अज्ज तुमए माणुसमंसं खाइयवं, सो भणइ-अज्ज मए तं भोत्तवं जत्थ इयरमंससंभवोऽवि नत्थि, किमंग पुण माणुसमंसस्स ?; एवं निच्छयं काऊण सवत्थ हिंडिउमारद्धो ।

इओ य-तत्थेव नयरीए पियदत्तो नाम गाहावई, तस्स सिरिभद्दा नाम भारिया, सा य मरंतविद्यायणी, पुत्तभंड-जीवणनिमित्तं उवयरेइ मंतवाइणो पुच्छेइ संवच्छरिए सविसेसं पूएइ देवयाओ तहवि न जाओ कोइ विसेसो, तंमि य समए वेलामासे वट्टमाणे देसंतरागयं पसिद्धं सिवदत्तनामधेयं नेमित्तियं पुच्छइ-कह मम पया जीविस्सइत्ति ?; तेण भणियं-जइ जायमेत्तं मयल्लयं वालं ससोणियमंसं पीसिऊण दुद्धयक्खेवपुवयं पायसविहाणेण रंधिऊण घयम-हूहिं सुसंभियं काऊण सुतवस्सिणो उद्धूलियचरणस्स सवहुमाणं भोयणत्थं पणामसि ताधे पया थिरा होइत्ति, केवलं तंमि कयभोयणे सट्ठाणमुवगए गेहस्स अन्नओमुहं दारं करेज्जासि, मा सो कहंपि मुणित्ता भोयणसरूवं गेहं देहेज्जत्ति, पडिवन्नं च सयलं तीए, तम्मि य दिणे पसूया सा मएल्लयदारयं, तओ जहाभणियविहाणेण पायसं काऊण दुवारदेसे ठिया अत्तिहिं निहालेइ ।

एत्थंतरे गोसालो अणेगमंदिरपरिचागं कुणमाणो समागओ तं पएसं, दिट्ठो अणाए, सायरं उवणिमंतिओ य समाणो पविट्ठो तंमि गेहे, दिन्नमासणमिमीए, उवविट्ठो एसो, ठावियं से पुरओ भायणं, परिवेसियं च घयमहुस-णाहं पुवसंसिद्धं पायसभत्तं, कहं एत्थ मंससंभवोत्ति सबुद्धीए निच्छिऊण संतोसमुवहंतेण भुत्तमणेणं, भुंजिऊण

श्रीगुणचंद  
महावीरच०  
६ प्रस्तावः

॥ १९३ ॥

गओ भगवओ मूलं, ईसिं विहसियं काऊण भणिउं पवत्तो-भयवं ! तुमए चिरं नेमित्तिगतणं कयं, नवरि अज्ज विह-  
डियं, सिद्धत्थेण भणियं-भइ ! मा ऊसुगो होसु, अवितहमम्ह वयणं, जइ पुण न सहहेसि ता उव्वमेसु जेण  
पच्चक्खं हवइ, तओ अंगुलिं गलए दाऊण वमियमणेण, दिट्ठा कुवियंमि पायसे मंसकेसाइसुहुमावयवा, तहंसणे य  
रुद्धो सो तं घरं मग्गिउमारद्धो तं पुण तेहिं घरं तव्वभएण चेव अन्नओमुहं कयं, सो य तंमि पएसे पुणो पुणो  
हिंडमाणो जाव न लहइ ताव भणइ-जइ मम धम्मगुरुणो तवतेयप्पभावो अत्थि ता उज्झउ इमो पएसो, जिण-  
माहप्पमवितहं कुणमाणेहिं अहासन्निहियवाणमंतरेहिं निहद्धो सबो सो पएसो, भयवंपि कइवय दिणाइं विगमि-  
ऊण गंतुं पयट्ठो, संपत्तो हलहुयाभिहाणंमि गामे ।

तस्स वहिया अणेगसाहप्पसाहाभिरामो वहलपत्तपडलपडिखलियतरणिमंडलपभापसरो महाखंधो हलिहगो नाम  
तरुवरो, तस्स हेट्ठओ ठिओ भयवं काउस्सग्गेणं, इओ य सावत्थिं नयरिं गंतुकामो रयणिंमि आवासिओ तत्थेव  
सत्थो, सो य सीयपीडिओ संतो पज्जालिऊण जलणं सुचिरं तप्पिऊण य पभायसमए उट्ठित्ता गओ, जलणोऽवि  
जणेण अविज्झविओ निहहंतो कमेण पत्तो जिणंतियं, गोसालेण भणियं-भयवं ! नासह एस डुयवहो एइ,  
इय निसुणिएऽवि सामी अविचलचित्तो तहेव जावेइ । अह पसरिएण सहसा पयकमलं झामियं सिहिणा ॥ १ ॥  
गोसीसचंदणंपिव तुसारवरिसं व सिसिरसलिलं व । परिभाविंतो तिब्बं सिहिदाहं सहइ जिणनाहो ॥ २ ॥

गोशाल-  
कस्य मांस-  
भक्षणं  
हरिद्रे  
पाददाहः

॥ १९३ ॥

गोसालोऽवि तहाविहमसमंजसमिक्खिऊण भयभीओ । अइदूरमवकंतो नियजीवियरक्खणट्टाए ॥ ३ ॥  
अह उवसंतंमि जलणंमि सामी मंगलाभिहाणे गामे गओ, तहिं च वासुदेवमंदिरे ठिओ पडिमाए, गोसालोवि  
निलुक्को एगत्य पएसे, केवलं केलिकलहाइविणोयाभावेण वाढं दुक्खमणुहवंतो फालचुक्को मक्कडो दिसीओ अवलो-  
एइ, एतयंतरे कीलानिमित्तमागयाइं तं पएसं गामचेडरूवाइं, तओ ताइं पेच्छिऊण उवलदूरयणनिहाणं व पच्चुजी-  
वियं व मण्णमाणो विडंविचयणकंदरो दूरं निलालियलोलजीहो पसारियवीभच्छच्छिजुयलो धाविओ वेगेण भय-  
जणणनिमित्तं तेसिमभिमुहं ॥

अह तं भीसणरूवं दट्ठणमतक्कियं समुहमितं । गामाभिमुहं भयओ चेडाइं लहु पधावंति ॥ १ ॥  
धावंताणं ताणं पक्खलणवसेण केसिमवि जंधा । भज्जइ अत्तेसिं पुण फुट्ठइ सीसं टलइ चलणो ॥ २ ॥  
इयरेसिं पुण वियलंति देहनद्धाइं भूसणाइंपि । केसिं चिय वत्थाइं निवडंति तदा भयवसेण ॥ ३ ॥  
अह तारिसमसमंजसमम्मापियरो पलोइऊणेसिं । रोसेण दोसमूलं गोसालं संपवज्जंति ॥ ४ ॥  
रे पाव पिसाय किमम्हं चेडरूवाइं तमिह भाएसि । इय तज्जिऊण तेहिं कुट्ठिज्जइ सो दढं विचसो ॥ ५ ॥  
ताहे तं हम्मंतं दहुं वारिंति गामजणवुद्धा । देवज्जगस्स एसो खु नूणं सिस्सो अओ मुयहा ॥ ६ ॥  
कहमवि तेहि विमुक्को गोसालो वागेरइ जिणनाहं । किं मइ हणिज्जमाणे तुम्हाणं जुज्जइ उवेहा ॥ ७ ॥



श्रीगुणचंद  
महावीरच०  
६ प्रस्तावः  
॥ १९४ ॥

एत्तियदिणाइं समसोक्खदोक्खसहणेवि नेव पडिवंधो । किं उप्पन्नो तुम्हं ? अहो सिलानिहुरं हिययं ॥ ८ ॥  
सिद्धत्थेणं भणियं-किं रूससि निन्निमित्तमम्हाणं ? । अप्पाणमप्पणच्चिय दोसकरं भो निरुंभेसु ॥ ९ ॥  
अह उस्सग्गं पाराविऊण सामी तओऽवि निक्खमिउं । आवत्तनामगामे वलदेवगिहे ठिओ पडिमं ॥ १० ॥  
तत्थवि कलहिकरुई गोसालो दारिएक्कवयणेण । पुद्वाणत्थं विसमरिऊण डिंभाइं भेसेइ ॥ ११ ॥  
रुयमाणाइं ताइं गंतुं मायापिऊण साहिति । तेहि पुणोवि हणिज्जइ गोसालो पुद्वाणाएणं ॥ १२ ॥  
गामपहाणजणेणं भणियं किं हम्मए मुहा एसो ? । एयमनिवारयंतस्स होइ दोसो गुरुस्स इमो ॥ १३ ॥  
इय कहिए झत्ति जएक्कचक्खुणो सम्मुहं च ते लोया । उग्गीरियदढदंडा उवट्ठिया ताडणट्ठाए ॥ १४ ॥  
एत्थंतरंमि जिणपक्खवाइणा वंतरेण सा पडिमा । लोआण भेसणत्थं नंगलहत्था समुट्ठविया ॥ १५ ॥  
ताहे अदिट्ठपुव्वं पडिमाचलणं पलोइउं झत्ति । भयभीया ते सामिं भूरिपयारेहिं खामिति ॥ १६ ॥  
खामिऊण विमुक्को जयगुरु चोरायसन्निवेसं गओ, तत्थ पच्छन्नपएसे पडिमं पडिवन्नो, गोसालोऽवि छुहाए  
परिकिलंतो पुच्छइ-भयवं ! अज्ज चरियवं न वा ?, सिद्धत्थो वागरेइ-अंतरं अम्हं, तओ गोसालो पविट्ठो गाममज्जे  
तहिं च गोट्ठीभोयणकएण बहुभक्खभोयणजायं उवक्खडिज्जइ, सो य अत्थिरत्तणेणं केवलं देसकालो भविस्सइत्ति  
जाणणट्ठा निहुओ होऊण पुणो पुणो तयभिमुहमवलोयइ, तत्थ य गामे तद्वियहं महंतं चोरभयं, ताहे गामवासिणो

मंगलावर्त्त-  
ग्रामयोः  
गोशाल-  
कीयं डिंम-  
भापनं

॥ १९४ ॥

जणा जाणंति-एस पुणो पुणो पलोएइ, मन्ने चारो चारिओ वा हवेंजा, ता जइ पुण कहंपि एत्तो पुवमोसोवलद्धी जाइज्जत्ति विगप्पिऊण गहिओ तेहिं निस्सट्ठं हणिउमारद्धो, य, पुच्छिंज्जमाणो जाव न किंपि जंपेइ ताव मुक्को कुट्टिऊण, तओ सो विलक्खो चित्तेइ-अच्छउ दूरे भोयणसंपत्ती, सरीरस्सवि जं न चुक्को तमच्छरियं वट्टइ, अहो निक्कारणदुज्जणाण मील्लो, अहवा किमेएण?, जइ अत्थि मम पडुणो पभावो ता उज्झउ एएसिं पावाणं मंडवोत्ति भणिए निद्वो जिणाणुरागिणा वाणमंतरेण, जिणिंदो पहाविओ कलंबुयाभिहाणसन्निवेसाभिमुहं, तत्थ य दो पचन्तिया भायरो मेहो कालहत्थी य, सामित्तं कुणंति य, तम्मि पत्थावे कालहत्थी भडचडयरपरियरिओ करयलकलियविहपहरणो चोराणुमग्गल्लो जाव केत्तियंपि भूभागं गच्छइ ताव पेच्छइ समुहमित्तं जिणं गोसालयं च, ते य दट्ठण भणइ-के तुम्हे?, सामी तुसिणीए जावेइ, गोसालोऽवि केलिपियत्तणेण मोणमवलंविऊण ठिओ, तओ सो रुद्धो निस्सट्ठं हणिऊण भयवंतं गोसालगं च वंधिऊण महल्लगस्स भाउणो मेहस्स पेसेइ, सो य भयवंतं तहारुवं दट्ठण समुट्ठिओ वंधणावणयणपुवयं पूएइ खामेइ-थ, तेण किर सामी कुंडग्गामे नयरे सिद्धत्थनरवइणो समीवमुवगएण दिट्ठो आसि, अह तेण मुक्को समाणो भयवं ओहीए इमं आभोएइ-अज्जवि वहुं कम्मं निज्जरियव्वं, तं च सहायविरहेण निज्जरित्तं न सक्किज्जइ, तां अत्थारियादिट्ठंतो एत्थ जुत्तो, सो य एवं—

जह फलभरविणमंतग्गसंस्ससभारपूरियं छेत्तं । दट्ठण तस्स सामी सिग्घं गहणं समीहंतो ॥ १ ॥

एगागि चिय लुणितं अपारयंतो परंपि बहुलोगं । समुच्चियमुलपयाणेण सस्सलुणणे पयट्टेइ ॥ २ ॥  
तह मज्झवि चिरभवसंभवस्स कम्मस्स निज्जरणिमित्तं । जुज्जइ अणज्जजणसंगएसु देसेसु विहरेउं ॥ ३ ॥  
जं तत्थ अणज्जजणो निक्कारणकोवसंगओ धणियं । उवसग्गणेण काही साहेज्जं कम्मनिज्जरणे ॥ ४ ॥  
इय चिंतिऊण नाहो लाढाविसए मिलेच्छजणकिन्ने । गोसालेण समेओ अह निज्जाओ विजियमोहो ॥ ५ ॥  
अह तत्थ गयं नाहं हेरियबुद्धीए केइ पाविट्ठा । निट्ठुरमुट्ठिपहारेहिं विह्वंति निरणुकंपा ॥ ६ ॥  
अन्ने असम्भवयणेहिं तज्जणं हीलणं च कुवंति । अइचंडतुंडसाणेहि पेसणेणं वहंति परे ॥ ७ ॥  
वंतरसुरऽसुरवइजक्खरक्खसपमुहंमि देवसंघाए । बहुमाणपरेऽवि जिणो एगागी सहइ उवसग्गे ॥ ८ ॥  
धम्मायरिओ एसोत्ति मज्झ हिययंमि निहियपडिवंधो । पट्ठि ठिउ गोसालोऽवि सामिणो दुक्खमणुहवइ ॥ ९ ॥  
अह तत्थ भूरितरकम्मनिज्जरं पाविऊण जिणनाहो । आरियखेत्ताभिमुहं आगच्छइ पुन्नवंछोव ॥ १० ॥  
आरियखेत्ताभिमुहंमि तस्स भयवओ पुन्नकलसाभिहाणगामसन्निहिंमि वट्टमाणस्स दोन्नि चोरा लाढाविसयमुस-  
णट्ठा नीहरंता अवसउणोत्तिकाऊण जमजीहासन्निहं खग्गं उग्गिरिऊण धाविया संमुहं, एत्थंतरे पुरंदरो कहिं  
जिणो वसइत्ति जाणणट्ठं जाव ओहिं पउंजेइ ताव पेच्छइ थेवेणासंपत्ते आयड्डियकरवाले चोरे वहनिमित्तं  
जिणस्स उवट्ठिए, अह जायतिवकोवावेगेण तेण तहट्ठिएणेव समुत्तुंगगिरिसिहरदलणदुल्लिएण निहया कुलिसेणं,

चौराके  
गोशालः  
कालमेघ-  
मीलनं  
अनार्येषु  
विहारः.

सामीवि गामाणुगामं विहरमाणो गओ भदिलनयरिं, तत्थ य वासारत्तो पंचमो समुवागओ, तो भयवं विचित्तास-  
 णाइं कुणमाणो चाउम्मासियं खमणमुवसंपज्जइ, कमेण समइक्कंते वासारत्ते वाहिं पारित्ता विहरमाणो पत्तो कय-  
 लिसमागमे गामे, तत्थ य तद्विसमत्थारियाभत्तं जहिच्छं भोयणं पहियकप्पडियाईण विपणामिज्जइ, गोसालोऽवि तं  
 दद्वूण पविट्ठो, सामिं भणइ-एह एत्थ जामो, सिद्धत्थो भणइ-अज्ज अंतरं अम्हाणं, एवं निसामिय गओ गोसालो  
 अत्थारियाभत्तट्ठाणे, उवविट्ठो भोयणत्थं, परिवेसिउमारद्धं जणेण, सो य बहुयासित्तणेण न पावइ कहिंपि तित्तिं,  
 ततो गामजणेण महल्लं भायणं दहिकल्लवियकूरस्स भरिऊण समप्पियं एयस्स, सोऽवि समग्गमवि तं भोत्तुमपारयंतो  
 भणइ-एत्तियं न नित्थरिही, तओ पाव ! दुक्कालकवल्लिओव नियभोयणमाणंपि न याणसित्तिं भणिऊण रोसेण  
 खित्तं तं भायणं से मत्थयंमि जणेण, पच्छा उयरं परामुसंतो गओ सो जहागयं ।

पुणोवि जंवूसंडं गाममुवागयस्स जयपहुणो तहेव सो अत्थारियाभत्तमल्लीणो खीरं कूरं च जेमिओ तहेव पज्जंते  
 जणेण धरिसिओ य, अह सामी अहाणुपुवीए विहरमाणो तंवायनामसन्निवेसं गओ, तस्स बहिया ठिओ पडिमाए,  
 तत्थ य गामे बहुस्सुया बहुपरिवारा पासजिणसंताणवत्तिणो नंदिसेणा नाम थेरा गच्छचित्तं मोत्तूण मुणिचंद-  
 सूरिणोव जिणकप्पपरिकम्मं करेति, गोसालो य पविट्ठो गाममज्झे, ते समणे सवत्थकंवल्लोवगरणे दद्वूण पुव-  
 साहूणं पिव म्मिसं काऊण सामिस्स सयासमेइ, ते य नंदिसेणा थेरा तीए चेव रयणीए चउक्के काउस्सग्गेण निचला

श्रीगुणचंद  
महावीरच०  
६ प्रस्तावः

॥ १९६ ॥

संठिया, पच्छा आरक्खियपुत्तेण इओ तओ परिभमंतेण चोरोत्ति कलिऊण महल्लभल्लएण आहया, तव्वेलं चिय समुप्पण्णोहिनाणा मरिउं दिवमुवगया, अहा सन्निहियदेवनिवहेहि य तेसिं महिमं कीरमाणिं पासित्ता तं पएसं गओ गोसालो, दिट्ठा य कालगया थेरा, तओ सुहपसुत्ता पडिस्सए गंतूण पडिवोहिया तेसिं सिस्सा, निब्भच्छिऊण साहिओ थेरमरणवइयरो, गओ य सट्ठाणं, जयगुरुवि कुवियसन्निवेसमेइ, तत्थवि चारियत्तिकाऊण गहिओ दंडवासिएहिं, बंधणताडणपसुहकयत्थणाहिं पीडिउमारद्धो य ।

अह जिणनाहे तेहिं वहिज्जमाणे जणे समुल्लावो । जाओ जह देवज्जो अप्पडिमो रूवलच्छीए ॥ १ ॥

कह चारिओत्ति गहिओ किं सोऽवि करेज्ज एरिसं कम्मं । अहवा विचित्तरूवा कम्मगई किं न संभवइ ? ॥ २ ॥

तहविहु इमं सुणिज्जइ जत्थागिति तत्थ निवसइ गुणोहो । ता नूण मूढयाए एए एयं कयत्थंति ॥ ३ ॥

भोगोवभोगहेउं साहूवि विरूवमत्थमायरइ । जो वत्थंपि न वंछइ स चारियत्तं कहं काही ? ॥ ४ ॥

इय लोयपवायं निसुणिऊण विजया तहा पगम्भा य । पासजिणसिस्सिणीओ तक्कालविमुक्कदिव्खाओ ॥ ५ ॥

निवाहत्थं परिवाइयाए वेसं समुवहंतीओ । मा वीरजिणो होहित्ति संसएणाउलमणाउ ॥ ६ ॥

गच्छंति तहिं दट्ठूण जिणवरं आयरेण वंदंति । पच्छाऽऽरक्खिगपुरिसे तज्जंति सुनिट्ठुरगिराए ॥ ७ ॥

रे रे किं न हयासा ! सिद्धत्थनरिंदनंदणं एयं । धम्मवरचक्कवट्ठिं मुंचह ? सिग्घं च खामेह ॥ ८ ॥

वधोद्यत-  
चौरघातः  
जंबूखंडे  
नन्दिपेणाः  
कूपिकासं-  
निवेशे ग्रहः

॥ १९६ ॥

जइ रे वइयरमेयं सुणइ सुरिंदो कहंपि ता नूणं । तुम्हे सरजरट्टे किणासगेहंमि पेसेइ ॥ ९ ॥  
इय भणिण भयभीया भयवंतं ते णमंति विणयनया । खामेति सदुचरियं निडालतलघडियकरकमला ॥ १० ॥  
अह तेहिं परिमुक्को भयवं वेसालिनयरिमणुसरिउं । चलिओ गच्छंतस्स य जाया विचे दुवे मग्गा ॥ ११ ॥  
अह लाढाइसु देसेसु विविहतिघोवसग्गवग्गेणं । पडिभग्गो गोसालो सामिं विन्नविउमाढत्तो ॥ १२ ॥  
एकं पेच्छंतोऽविहु हणिज्जमाणं ममं न रक्खेसि । अन्नं तुहोवसग्गेण एइ मज्झंपि उवसग्गो ॥ १३ ॥  
अवरं पढमं लोगो मं चेव हणइ पच्छओ तुम्हे । भोयणवित्तीवि महाकिलेसओ पइदिणं होइ ॥ १४ ॥  
माणावमाणसमचित्तवित्तिणो सुण्णसेवणपरस्स । नायगधम्मोऽवि न तुज्झ कोऽवि पेच्छिज्जइ समीवे ॥ १५ ॥  
जेण-जो सेवगंमि सुहिण नो सुहिओ दुक्खिए य नो दुहिओ । सोक्खाभिकंखिणा नणु सेविज्जइ सोऽवि किं सामी? ॥ १६ ॥  
तम्हा अज्जवि चिरजीवियत्थिणो सोक्खकंखिरमणस्स । एत्तो तुह सेवाए देवज्जय ! मज्झ पज्जत्तं ॥ १७ ॥  
इय कहिए सिद्धत्थो वागरइ करेसु जं तुहावडइ । अम्हाण एरिसच्चिय ववहरणा किमिह तुह भणिमो ? ॥ १८ ॥  
एवं जाए परोप्परुल्लावे सामी वेसालीमग्गेण लग्गो, इयरोऽवि भगवओ निवट्ठिऊण रायगिहमग्गेण पट्ठिओ,  
अंतरा य करिहरिहरिणविरुयवग्घपमुहसत्तसंकुले गयणतलावलंविदीहरतरुभीसणे निवडिओ महारण्णे, तत्थ य  
चोरवइणा एगंमि महातरुसिहरे पहियजणावलोयणनिमित्तं आरोहिओ नियपुरिसो, तेण य दिट्ठो सो सच्छं-

श्रीगुणचंद  
महावीरच०  
६ प्रस्तावः

॥ १९७ ॥

दलीलाए आगच्छमाणो, दडूण य साहियं चोरवइणो, जहा-एगो नग्गसमणो एइ, तेण भणियं-न हरियवमत्थित्ति एस न भाइ, अन्नहा कहं एत्थ अमाणुसाए अडवीए पविसेज्जा?, अहवा एस कोइ दुरायारो अम्हाणं एवंविह-रुवपडिवण्णो मण्णे परिभवं उप्पाएइ, ता एउ अक्खलियगईए जेण अवणेमो से दुव्विणयं, एवं च जंपंताणं समीवमागओ गोसालो, तओ तेहिं दूराओ चिय साहिलासं-एहि माउलग! सागयं तुहत्ति भणिऊण गहिओ करेण, उड्ढाविओ पट्ठिं, मरणभयविहुरेण य उड्डिया अणेणं, तओ चोराहिवइणा पंचसयचोरसमेएण आरुहिऊण जहकमं वाहिओ सुचिरवेलं, छुहातण्हापरिस्समभिहओ जया कट्ठगयजीओ जाओ ताहे मोत्तूण जहाभिमयं गया तक्करा, गोसालोऽवि बाढं सुट्ठियसरीरो मोग्गरपहारजज्जरिउव कुलिसताडिउव विगयचेयण्णो तरुसंडछायाए मुहुत्तमेत्तं विगमिऊण सिसिरमारुएण उवलद्धचेयणो सोगं करेउमारद्धो, कहं?—

हा दुट्ठु दुट्ठु विहियं हियत्थिणा नट्ठुबुद्धिणा उ मए । जं सो सामी मुक्को अचिंतमाहप्पपडिहत्थो ॥ १ ॥

निदोसंमिवि नाहे कुवियप्पेहिं मए हयासेण । जा किर कया अवण्णा सा संपइ निवडिया सीसे ॥ २ ॥

तस्स पभावेण पुरा अणेगठाणेसु दुट्ठसीलोऽवि । निधूढोऽहं संपइ तविरहे नत्थि मे जीयं ॥ ३ ॥

अहवा-सहसच्चिय सम्ममच्चिंतित्तिऊण कीरंति जाइं कज्जाइं । अप्पत्थभोयणं पिव ताइं विरामे दुहावेंति ॥ ४ ॥

मण्णे इमिणच्चिय कइयवेण मं छलिउमिच्छइ कयंतो । कहमन्नहा कुबुद्धी हवेज्ज एयारिसी मज्झ ॥ ५ ॥

गोशालस्य  
पृथग्भवनं  
चौरोप-  
सर्गश्च.

॥ १९७ ॥

ता किं एत्तो सरणं सरेमि ? किं वा गइं पवज्जामि ? । कस्स व पुरओ दुक्खं निवेइउं होमि निचिंतो ? ॥ ६ ॥

अहवा कयं विगप्पेहिं नत्थि मम तिहुयणेऽवि साहारो । तं चेव धम्मसूरिं मोचुं ता तं निहालेमि ॥ ७ ॥

इय निच्छिऊण कहमवि संसारं पिव सुभीसणमरणं । लंघित्ता गामाइसु हिंडइ सामिं निरूविंतो ॥ ८ ॥

इओ य-भयवं महावीरो अहाणुपुब्बीए परियडंतो पत्तो विसालसालवलयपरिवेढियाए मयणुम्मत्तरामाभिरामाए वेसालीए नयरीए, तत्थ य बहूणं कम्माराणं साहारणाए सालाए अहासन्निहियजणं अणुजाणावित्ता ठिओ पडि-  
माए, अन्नया य एगो कम्मारगो रोगपीडिओ संतो छट्ठमि मासे पगुणसरीरो जाओ समाणो पसत्थे तिहिमुहुत्ते मंगलत्तरपुरस्सरं चंदणुकिन्नदेहो हरहासकासकुसुमपंडुरदुकूलनिवसणो सिरे निसियदोवक्खयसरिसवो सयणजणेण अणुगम्ममाणो तमेव कम्मारसालमागओ, पेच्छइ पुरट्ठियं उद्धट्ठाणं पडिवन्नं विगयवत्थं जिणवरं, तं च दट्ठूण वियं-  
भियपलयकोवानलो पढमं चिय अमंगलरूवो नग्गओ दिट्ठो, ता अमंगलं एयस्स चेव उवणेमिति चिंतिऊण लोह-  
घणं घेत्तुं धाविओ सामिवहणत्थं, एत्थंतरे सुराहिवइणा कहं नाहो विहरइत्ति जाणणनिमित्तं पउत्तो ओही, दिट्ठो एयरूवो वइयरो, तओ नयणनिमेसमेत्तेण आगओ चलंतमणिकुंडलो आखंडलो तं पएसं, नियसत्तीए य निवाडिओ घायगस्स चेव सिरंमि सो घणो, तग्घायाभिहओ य पत्तो पंचत्तमेसो, तओ हरी तिपयाहिणादाणपुब्बयं पणमि-  
ऊण जयगुरुं भणिउमाढत्तो—



श्रीगुणचंद  
महावीरच०  
६ प्रस्तावः

॥ १९८ ॥

निरुवमकलाणकलावकारणं लोयलोयणाणंदं । तं पेच्छिऊण सामिय! कहमिव पावा पउस्संति? ॥ १ ॥  
तिकरणसुद्धीएविहु जणरक्खं जो समीहए काउं । तस्स तुहोवरि दुट्ठा कह वा बुद्धी पयट्ठेज्जा? ॥ २ ॥  
किं अमयंपिव विसनिव्विसेसबुद्धीए कोऽवि बोहेज्जा । अहवा विमूढहिययाण होइ एसेव नूण मई ॥ ३ ॥  
धुवमम्हाणं देवत्तदिव्वमाहप्पसंपया विहला । जा तुम्हावइविणिवारणेण नो होइ सकयत्था ॥ ४ ॥  
निच्छउ सा पडुभत्तीवि कह व लक्खिज्जए सयण्णेहिं । जाव न निच्चं पासट्ठिएहिं सेविज्जसे तंसि ॥ ५ ॥  
इय सुरनाहो सुचिरं उवसग्गकरं जणं सभत्तिं च । दूसित्ता सुदुहत्तो नमिउं अहंसणं पत्तो ॥ ६ ॥  
सामीवि विहरमाणो गामागरसन्निवेशमागओ, तम्मि य विभेलगो नाम जक्खो, सो य पुव्वभवफासियसम्मत्त-  
वसेण समुप्पण्णपरमपमोओ भयवओ पडिमापवण्णस्स अहिणवपारियायमंजरीपरिमलुम्मिलंतफुलंधयधुसराहिं  
हरियंदणरसुम्मिस्सद्युसिणघणसारविलेवणेण य पूयं परमायरेणं निवत्तेइ, अह पुण को एस विभेलगजक्खो पुव्वभवे  
आसि?, भण्णइ—

मगहाविसए सिरिपुरे नयरे महासेणो नाम नरवई, तस्स सिरी नाम भज्जा, तीसे य असेसविन्नाणकलाकलाव-  
कुसलो सुरसेणो नाम पुत्तो, सो य संपत्तजोवणोऽवि न खिवइ चक्खुं पवररूवासुवि रमणीसु, वहुं भणिज्जमा-  
णोऽवि न पडिवज्जइ पाणिग्गहणं, किं तु मुणिवरोव संहरियवियारो चित्तपत्तच्छेयाइविणोदेहिं कालं वोलेइ, रायावि

वैशाल्यां  
कर्मकारोप-  
सर्गः विभे-  
लकपूर्व-  
भवः

॥ १९८ ॥

एरिसं तं पेच्छिऊणमचंतमाउलमाणसो अणेगेसिं मंततंताइजाणगाणं एयवइयरं परिकहेइ, ते य करेंति विविहे उवाए,  
न यं जायइ कहिंपि कुमारस्स भावपरावत्ती ।

अह अवरासरंमी वाहिं नगरस्स करिवारूढो । सह परियणेण राया नीहरिओ रायवाडीए ॥ १ ॥

विविहपएसेसु खणं परिभमिउं वाहिउं च करितुरगे । पच्छाहुत्तं इंतो पेच्छइ नयरीजणं सयलं ॥ २ ॥

रहतुरगजाणसिविगापयप्पयारेण सिग्घवेगेण । कयसुंदरनेवत्थं वचंतं काणणाभिमुहं ॥ ३ ॥

तं पेच्छिऊण रण्णा पयंपियं रे किमेस.पउरजणो । परिमुक्कावरकज्जो वचइ एगेण मग्गेण ? ॥ ४ ॥

नो अज्ज जेण कस्सवि मइसवो देवयाविसेसस्स । नडपेच्छणयाईयं कोउगमवि दीसइ न किंपि ॥ ५ ॥

अह परियणेण भणियं तुब्भे नो मुणह देव । किं एयं । जं एत्थ समोसरिओ सूरी सूरप्पहो नाम ? ॥ ६ ॥

जो तीयाणागयवत्थुविसयसंदेहतिमिरहरणेणं । पुहईए पत्तकित्ती जहत्थनामेण परमग्घा ॥ ७ ॥

जस्स पयपउमधूलीफासेणविवि विहरोगकलियावि । जायंति तक्खणं चिय मयरद्धयसन्निभा पुरिसा ॥ ८ ॥

जस्सेस दंसणेणवि समत्थतित्थोहपूयसलिलं व । विद्धंसियपावरयं पाणिगणो गणइ अप्पाणं ॥ ९ ॥

जे पिउणोऽवि पणामं कुवंति न दुव्वहेण गवेण । जस्संहिनक्खकिरणा ताणवि सिरसेहरीभूया ॥ १० ॥

सूरिस्स तस्स पयवंदणत्थमेसो पुरीजणो जाइ । तुम्हंपि देव ! जुत्तं पयपंकयदंसणमिमस्स ॥ ११ ॥

श्रीगुणचंद  
महावीरच०  
६ प्रस्तावः  
॥ १९९ ॥

एवं सोचा विम्हवियमाणसो तक्खणेण नरनाहो । उज्जाणस्साभिमुहं वचइ कोऊहलाउलिओ ॥ १२ ॥  
ता दूराओचिय करिवराउ ओयरिय परमभत्तीए । वंदित्ता सुणिनाहं निसीयए धरणिवट्ठंमि ॥ १३ ॥  
सूरीवि जोग्गयं से पलोइउं दिवनाणनयणेण । गंभीराए गिराए एवं भणिउं समाढत्तो ॥ १४ ॥  
भो नरवर ! संसारे पढमं चिय दुल्लहो मणुयलंभो । तत्थवि य निरुवयरिया कुलरूवारोग्गसामग्गी ॥ १५ ॥  
तीएवि पवरकरितुरयजोहरहनिवहभूरिभंडारं । भयवसनमंतसामंतयंडलं नरवइत्तंपि ॥ १६ ॥  
तत्थवि सत्थत्थवियक्खणेहिं अचंतभवविरत्तेहिं । कुसलेहिं समं गोट्ठी दुल्लंभा थेवमेत्तंपि ॥ १७ ॥  
एयं च तए सयलं संपत्तं पुन्नपगरिसवसेणं । ता एत्तो सविसेसं पाणवहाईण वेरमणे ॥ १८ ॥  
नयसेवणंमि सुगुणज्जणंमि करुणाय दुत्थियजणाणं । धम्मत्थविरुद्धविवज्जणे य परलोयचिंताए ॥ १९ ॥  
भंगुरभवभावविभावणंमि वेसइयसुहविरागंमि । तुम्हारिसेण नरवर ! पयट्ठियवं मणो निचं ॥ २० ॥  
इय गुरुणा उवइट्ठे नरनाहो पुरजणो य हिट्ठमणो । सवं तहत्ति पडिसुणिय पट्ठिओ नियगिहाभिमुहं ॥ २१ ॥  
नवरं भूमीनाहो गंतुं थोवंतरं पडिनियत्तो । पुवभणियस्स पुत्तस्स वइयरं पुच्छिउं सहसा ॥ २२ ॥  
ता एगंते ठाउं वंदिय सूरिं पयंपए एवं । भयवं ! अगोयरं नत्थि किंपि तुह नाणपसरस्स ॥ २३ ॥  
ता कहसु मज्झ पुत्तो भणिज्जमाणोवि विविहहेऊहिं । किं कारणं न वंछइ सोउं परिणयणनामंपि ? ॥ २४ ॥

वीभेलक-  
पूर्वभवाः  
सूरसेन-  
चरित्रं.

॥ १९९ ॥

किं भवभण अहवा भूयपिसायाइछलणदोसेण । घाउविवज्जासेण व कूरग्गहपीडणेणं वा ? ॥ २५ ॥  
 गुरुणा भणियं नरवर ! मा संकसु कारणाइं एयाइं । ददपुव्वभवावज्जियमेगं कम्मं विमोत्तूण ॥ २६ ॥  
 संजोगविओगुप्पायपलयसुहदुक्खपमुहकिरियासु । सद्वावत्थासुंपिय पभवइ कम्मं चिय जणस्स ॥ २७ ॥  
 रण्णा भणियं भयवं ! किं पुण एएण पुव्वजम्मंमि । पकयं कम्मं ? साहह महंतमिह कोउगं मज्झ ॥ २८ ॥  
 सरिणा पयंपियं—महाराय ! एस तुज्झ पुत्तो पुव्वभवे संखपुरंमि नयरे रूवलायन्नसोहग्गाइगुणसंगओ चारुदत्तो नाम  
 वणियसुओ आसि, तेणवि एगया निकारणकुवियाए भज्जाए दुव्वयणेहिं तज्जिएण सरोसं पयंपियं—आ पावे ! तहा काहं  
 जहा सदुक्खं जीवसि, तीए बुत्तं—जं तुह पिउणो पडिहाइ तं करेज्जासि, तओ सो एगेण नम्मसच्चिवेण सद्धिं कन्नगंतर-  
 परिणयणत्थं पयट्ठो गंतुं दक्खिणदिसाए, अविलंबियपयाणएहिं वचंतो पवररामारयणनिहाणभूयाए पत्तो कंची-  
 पुरीए, तहिं च पविसमाणेण दिट्ठाइं परोप्परं कीलंताइं डिंभाइं, तेसिं च एगेण डिंभेण सुरहिमालइमाला अन्नस्स  
 डिंमस्स कंठे पक्खिविउमारद्धा अन्नस्स निवडिया, तं च दट्ठूण चिंतियं चारुदत्तेण—अहो सोहणो सउणो, परं दूर-  
 यगमो, जओ एसा कुसुममाला अन्नत्थ पक्खिविउमारद्धा अन्नत्थ निवडिया, अहवा किमणेण ?, चिंतियत्थसं-  
 पत्तीए सयं चेव होही एयावगमोत्ति विभाविऊण पविट्ठो सयणवग्गगेहंमि, कओ तेण ण्हाणविलेवणभोयणप्पया-  
 णप्पमुहो से य वाचारो, ठिओ य कइवय वासराइं, पत्थावे य सयणवग्गस्स सिट्ठमणेण निययप्पओयणं, पडि-

श्रीगुणचंद  
महावीरच०  
६ प्रस्तावः

॥ २०० ॥

सिद्धो य बहुप्पयारं तेण एसो । इओ य तत्थेव पुरे गंगदत्तसेट्ठिणो कन्नगा अप्पडिमरूवजोवणाइगुणकलावकलिया  
कणगवईसहीजणपरिवुडा उज्जाणंमि कुसुमावचयं कुणंती सिरिदत्ताभिहाणं वणियजुवाणमवलोइऊण मयणुम्मु-  
कसरविसरपहारजज्जरियसरीरा कहकहवि पडिनियत्तिऊण सगेहे निसट्ठं निवडिया सुहसेज्जाए, वाउलत्तं च से मुणि-  
ऊण मेलिओ गेहजणो, पुट्ठा सरीरवत्ता, अलद्धपडिवयणेण य तेण कओ तक्कालोचिओ विही, सो य जुयाणो तहं-  
सणमेत्तेणवि हरियहियओ तक्कालवियंभमाणमयणजलणजालाकलावकवलियसरीरो कहिंपि रइं अपावमाणो तमेव  
कुवलयदलदीहरच्छिं चिंतंतो अच्छिउं पवत्तो, नवरं पुच्छिओ एसो एगाए पच्चाइगाए-वच्छ ! किमेवं सुन्नचक्खुक्खेवो  
लक्खिज्जसित्ति, तेण भणियं-भयवइ ! किं कहेमि ?, अवलाएवि हुंतीए विसट्ठकंदोददीहरच्छीए । हरियहिययरुस वट्ठइ  
विहलं चिय मज्झ पुरिसत्तं ॥१॥ एत्तियमेत्तेणं चिय न ठिया सा छणमयंकविंवमुही । अवहरिउमिच्छइ धुवं संपइ मह  
जीवियवंपि ॥२॥ ता एव ठिए भयवइ ! तमुवायं किंपि लहु विचिंतेसु । पसमियमणपरितावो जेणेस जणो सुहं वसइ ॥३॥  
पच्चाइगाए जंपियं-पुत्त ! फुडक्खरं साहेसु, तओ तेण कहिओ कणगवईदंसणवुत्तंतो, तीए भणियं-पुत्त ! वीसत्थो  
होहि, तहा करेमि जहा तीए सह निरंतरं संपओगसुहमणुहवसि, तेण वुत्तं-जइ परं तुह पसाएणंति, भणियावसाणे  
गया सा गंगदत्तसिट्ठिणो गिहे, दिट्ठा य सदुक्खेण परियणेण संवाहिज्जमाणसरीरा कणगवई, भणियं चउणाए—  
भो ! किं कारणं सरीरे विडुयत्तणमिमीए ?, परियणेण भणियं-भयवइ ! न मुणेमो, तीए वुत्तं-जइ एवं ता अवसरह,

सूरसेन-  
चारुदत्त-  
कनकवती-  
भवः.

॥ २०० ॥

खणमेकं कुणह विजणं, न होइ सामन्नो एस दोसो, उवेहिज्जंतो जीवियंपि हरेज्जा, एवमायन्निऊण दिन्नं से परि-  
यणेण आसणं, विजणं च कयं, तओ तीए सुचिरं अडुवियइइं पल्लविऊण महया वित्थरेण कओ मुद्दाविन्नासो,  
पारद्धं मंतसुमरणं, कुसुमक्खयखेवेण य पूइयं जोगिणीचकं, मुक्को हुंकारो, अचंतसमीवे य ठाऊण महामंतोव सिद्धो  
तस्स वणियस्स वुत्तंतो, कणगवईवि झत्ति तं निसामिऊण पच्चुजीवियंव हरिसभरमुच्चहंती भणिउं पवत्ता-भयवइ!  
एत्तो तुमं चेव पमाणं, तो तहा कहंपि कुणसु जह निरंतरो तेण सह संजोगो जायइ, तीए वुत्तं-एवं करेमि, अह  
दिन्नतंवाला उट्टिया एसा, सिद्धो य एस वइयरो तस्स जुवाणस्स, तेणावि पवरवत्थाईहिं उवचरिया एसा, अवर-  
वासेर य तेसिं सिद्धमेयाए, जहा-अज्ज रयणीए जामदुगंमि अइकंतंमि सोहणो मुहुत्तो ता तुभेहिवि भगवओ कुसु-  
माउहस्स भवणे गंतवं, विवाहो कायवोत्ति, पडिवन्नं च तेहिं । इओ य सो चारुदत्तो सयणजणेण दारपरिग्गहाओ  
पडिसिद्धो समाणो असिद्धकज्जोत्ति सोगमुच्चहंतो तेण सहाइणा समं नीहरिऊण रयणीए सयणघराओ पसुत्तो तंमि  
चेव कुसुमाउहमंदिरंमि, खणं च समागयनिहो पडिवुद्धो समाणो जाव कुसुममालानिमित्तनिष्फलत्तणपमुहं पुव्व-  
इयरं विचितंतो अच्छइ ताव गिहजणेण अविद्याणिज्जंती अविमुणियरयणिविभागा अपत्तेऽवि मज्झरत्ते परिणयणाणु-  
रूवोवगरणहत्थाए पच्चाइगाए अणुगया मंदमंदमुक्कचलणा समागया कणगवई, विरइया कुसुमाउहस्स पूया, पच्चा-  
इगाएवि भवणम्भंतरं करेण परामुसंतीए पत्तो चारुदत्तो, पुव्वभणियवणियसंकियाए सवणमूले ठाऊण भणिओ-अहो

श्रीगुणचंद  
महावीरच०  
६ प्रस्तावः

॥ २०१ ॥

किमेवं विलंबेसि?, अवक्रमइ एस पसंत्यहत्थलग्गमुहुत्तो, एयं च सोचा चारुदत्तेण चिंतियं-मन्ने एसा वराई  
पुवदिन्नसंकेयपुरिसवुद्धीए मं समुलवइ, ता जावऽज्जवि सो न आगच्छइ ताव करेमि कुसुममालासउणं जहत्ययंति  
चिंतिऊण झडत्ति उट्ठिओ एसो, नीओ तीए कुसुमाउहस्स पुरओ, पाडिओ तचरणेसु, गहाविओ कणगव-  
ईए सभावपाडलं पाणिपलवं, कओ संखेवेण सेसोऽवि तक्कालोचियविही, इय वित्ते विवाहे पणमिऊण कणगवईए  
विसज्जिया सट्ठाणं पवाइगा, भणिओ य चारुत्तो-अज्जउत्त! उत्तमाणं एसो नो सम्मओ ववहारो, ता कइवय  
वासराइं जुज्जइ अन्नत्थ निवसिउं, पडिवन्नं चारुदत्तेण, निहरियाइं कुसुमाउहस्स मंदिराओ, नवरं चारुदत्तेण मयण-  
पायपडणकइयवेण पडिनियत्तिऊण तं नम्मसचिवं निम्भरपसुत्तं पवोहिऊण सिट्ठो परिणयणवुत्तंतो, तेण भणियं-  
चारुदत्त! जइ एवं ता वच्चसु अलक्खियसरूवो चिय तीए सह तुमं, अहं पुण खणंतरं एत्थेव पडिवालिकुण आगमि-  
स्सामि, एवं भणिए चारुदत्तो तवयणं पडिवज्जिय तीए समं सभयं नयरहुत्तं गंतुं पवत्तो। इओ य समइकंते रयणीए  
जामदुगे पत्थावं मुणिऊण सो वणियजुवाणो विवाहसामग्गिं घेत्तूण समागओ तंमि कुसुमाउहमंदिरे, मंदगिराए  
भणिउं पवत्तो य-भो कणगवइ! एहि संपयं आगओऽहं वट्ठामित्ति, सो य नम्मसचिवो केलीकिलत्तणेण इत्थी-  
भासाए निहुयं पडिवयणं दाऊण ठिओ तदभिमुहो, तेणावि रभसभरवक्खित्तचित्तत्तणेण अविभाविऊण परमत्थं खित्ता  
से कंठमि कुसुममाला, कंकणबंधपुरस्सरं च कओ पाणिग्गहो, एत्थंतरे य कहकहत्ति पहसंतेण भणियं तेण-भो

सूरसेन-  
चारुदत्त-  
कनकवती-  
भवः।

॥ २०१ ॥

भो महाणुभाव ! किं अत्थि एस ववहारो तुह नयरीए जं पुरिसो पुरिसेण परिणिज्झइ, सब्बहा असुयमदिट्ठं च चो-  
ज्जमिणंति जंपिऊण पलाणो वेगेणं, इयरोऽवि विलक्खमाणो एवं परिभाविउमाढत्तो—

हे हियय ! हयास तुमं एवंविहवंचणाएँ जोग्गंसि । जं कूडकवडभरियासु पावग ! रमणीसु पत्तियसि ॥ १ ॥

किं एत्तियंपि न मुणसि जं एयाओ विचित्तसीलाओ । नियकुसलयाए सहसा सुरगुरुमवि विप्पयारेंति ॥ २ ॥

तया-एगेण समं पणयप्पहाणवयणेहिं बहुप्पयंपंति । साणंदचक्खुविक्खेवमेत्तओ अक्खिवंति परं ॥ ३ ॥

अत्रेण समं कीलंति निब्भरं हरियहिययमविरामं । अवरस्स य संकेयं लीलाए चिय पयच्छंति ॥ ४ ॥

इय मूढ ! हियय ! मा तम्म निप्फलं मुणिय वत्थुपरमत्थं । अभिरमसु जहादिट्ठेसु संपयं निययकज्जेसु ॥ ५ ॥

एवं अत्ताणं संठविऊणागओ जहागयं । सो य नम्मसचिवो समुग्गच्छंतंमि तरणिमंडले मिलिओ चारुदत्तस्स,  
तेणावि से वाहुंमि कंकणं वद्धमवलोइऊण जंपियं-अरे णवपरिणीओघ लक्खिज्जसि, ता दंसेहि निययभज्जं, ईसिं  
पहसिऊण भणियं तेण-पियमित्त ! तुह पसाएण अहं सयं चिय भज्जा वट्टामि, चारुदत्तेण कहियं-कहं चिय ? तओ  
तेण सिट्ठो सबो पुच्चुत्तंतो, इमं च सोच्चा मुणियजहट्ठियवइयरा परिचित्तलज्जं हसिउं पवत्ता कणगवई, दिट्ठरूवाइ-  
सया य अणुरत्ता चारुदत्तंमि ।

अह परोप्पररूढगाढपेम्माणि ताणि पत्ताणि संखपुरं, पविट्ठाणि य निययगिहं, सुहसागरावगाढाणि य वोलेत्ति



श्रीगुणचंद  
महावीरच०  
६ प्रस्तावः

॥ २०२ ॥

कालं, सा य पुत्रभज्जा असमंजसाइं पलवंती निद्धाडाविया कणगवईए, तप्पचइयं च वद्धं भोगंतराइयं कम्ममणाए । काल-  
कमेण य मरिऊण उववन्ना सा तिरिएसु, चारुदत्तोऽवि तप्परिणयणोवट्ठियवणियविसंवायणपरिणामज्जियनिविडभोगं-  
तरायपाहिज्जो कालं काऊण पत्तो तिरियत्तणं । एवं च सुचिरं तीए विप्पउत्तो संसारं परियट्ठिऊण सुचरियसुहकम्म-  
वसेण भो महाराय ! तुह मंदिरंमि जाओ पुत्तत्तणेणं, सावसेसभोगंतरायकम्मवसओ य पुत्रभवभज्जमपेच्छंतो न वंछइ  
अन्नं परिणेतुं, एवं सूरिणा कहिए सूरसेणकुमारवुत्तंते राया विम्हियमणो गओ नयरिं । सूरीवि अन्नत्थ विहरिओ ।

सा य कणगवई चिरभवभमणेण जायकम्मलाघवा कुसुमत्थलनयरे जियसत्तुरन्नो उववन्ना धूयत्तणेणं, उचिय-  
समए कयं रयणावलित्ति नामं, सा य संपन्नजोवणावि तेण पुत्रभवपियवरूढपणयवसेण सुरूवंपि रायसुयनिवहमण-  
भिलसंती कालं वोलेइ । अन्नया य तं सूरसेणकुमारं रामापरंमुहं सोचा नियधूयं च पुरिसपउसिणिं मुणिऊण चिंतियं  
रन्ना-जइ पुण एयाणं परोप्परं विहिणा संजोगो काउं वंछिओ वट्ठइ ता दंसावेमि एयाण परोप्परं पडिरूवाइं, एवंपि  
कयाइ समीहियसिद्धी जाएज्जत्ति विभाविऊण लिहाविया रयणावलीरूवाणुगा चित्तपट्ठिया, समप्पिया य दूतस्स,  
भणिओ य एसो-अरे वच्चसु तुमं महासेणरण्णो समीवे, कहेसु य जहा-अहं जियसत्तुरण्णा तुह सुयस्स निय-  
धूयादाणत्थं पेसिओऽम्हिति, पत्थावे य चित्तवट्ठियं दंसिऊण कुमारपडिरूवं च गहाय एज्जाहिति, गओ य एसो,  
दिट्ठो राया, पत्थावे य कहियं पओयणं, राइणावि भणियं-भो मुणियं मए एयं, केवलं दूरट्ठियाए रायसुयाए रूव-

सूरसेन-  
रत्नावली  
जन्मादि.

॥ २०२ ॥

मपेच्छमाणो कहमिहट्टिओ कुमारो तीए पणयमुव्वहेज्जा ?, सा वा अविण्णायकुमारसरूवा सहसच्चिय परिणाविया पच्छा कहं न संतप्पेज्जा ?, ता न जुत्तमेयं । जेण—

मुनिरुविऊण कीरंति जाइं कज्जाइं निउणवुद्धीए । दिवाओ विहडियाणिवि न ताइं लोए हसिज्जंति ॥ १ ॥

एवं भणिए रत्ना तेण उवणीया चित्तफलहिगा, राइणावि समप्पाविया सा कुमारस्स, सो य पुव्वभवपेम्मवसेण तदवलोयणे समुप्पण्णहरिसो चिरलद्धावसरकुसुमसररोसनिस्सट्ठाकुंठदुस्सहविसिहकीलिओव निचलसरीरो परिचत्त-वाचारंतरो थुलमुत्ताहलविब्भमसेयविंदुजालभासुरियभालवट्ठो जाओत्ति, तं च तहाविहं दट्ठूण मुणियमणोगयभा-वेण पासट्टियजणेण सिट्ठं नरनाहस्स, समुप्पण्णो से परिओसो, कहियं चऽणेण दूयस्स—अरे जाओ तीसे उवरि कुमारस्स पडिवंधो, नवरं रायसुया एयंमि केरिसित्ति मुणियधमियाणि । जओ—

एगंमि नेहनिब्भरमणंमि अन्नंमि नेहरहियंमि । थीपुरिसाणं भोगा विडंवणामेत्तया होंति ॥ १ ॥

अणुवक्खरियं अकुडिलं परोप्परं लिद्धपेच्छणविमुक्कं । उभओ चिय जं तुल्लं पेम्मं सलहिज्जइ जयंमि ॥ २ ॥

दूएण भणियं—देव ! सच्चमेयं, ता समप्पेह मम कुमारस्स पडिरूवयं रायसुयाए उवदंसणत्थं, राइणा कहियं—जुत्तमेयं, तओ चित्तफलगे आलिहाविऊण कुमाररूवं गओ दूओ, पत्तो कालक्कमेण जियसत्तुनरिंदसमीवं, पण-मियपायवीढो उवविट्ठो सन्निहियधरणिवट्ठे, पुट्ठो राइणा, जहावुत्तं सिट्ठं च अणेण, तदवसाणे य आकट्ठिऊण दंसिया

श्रीगुणचंद  
महावीरच०  
६ प्रस्तावः

॥ २०३ ॥

विरहा-  
वस्था.

॥ २०३ ॥

चित्तपट्टिगा, अवलोइया य सायरं रत्ना, चिरं निवन्निऊण पेसिया रयणावलीए, सावि तेण पुवभवपरूढपेम्मवसेण  
तं पलोइऊण मयणभल्लिसल्लियहियया समुच्छलियसेयविंदुपिसुणियविथारावि कुमारीजणोचियं लज्जं पमोत्तुमपार-  
यंती नियगविगारगोवणत्थं आवद्धकवडभिउडिभीसणं वयणं काऊण भणिउमारद्धा-अहो केणोवणीया एसा चित्त-  
पट्टिगा?, चेडीहिं भणियं-सामिणि! ताएण, ( तीए भणियं-किमट्टं?, चेडीहिं ) भणियं-तुम्ह दंसणनिमित्तं, तीए  
भणियं-किं ममं दंसियाए?, काऽहमेत्थ?, गुरुजणायत्तो कण्णगालोगो हवइ, सच्छंदचारित्तणं तु परमं कुलदूसणं,  
ता अलमेयाए इति भणिऊण पविट्ठा भवणम्भंतरे, निसण्णा सुहसेज्जाए, तग्गया य चिरकाललद्धावसरेणं व सवंगं  
गहिया रणरणएणं, धाईएव्व अणुसरिया उकंठाए, चित्तालिहियकुमारावलोयणविरामपरिकोचिएणं व वाढमालीढा  
परितावेण, तओ तत्थट्ठाउमपारयंती कइवयपहाणचेडीपरिवुडा गया पमयवणं, तहिं च अणवरयवहंतजलजंतगंभीरघो-  
सघणविम्भमुम्भंतपहिट्ठनीलकंठमणहरारावाडंवरेसु सुरहिमालइकमलपरिमलसुंदरदियंतरेसु वुच्छा खणमेकं कयलील-  
याहरेसु, भणिया य चेडीओ-हलाओ! वाहरेह सरसनलिणनालाइं विरएह सेज्जं, वाढं दुस्सहा अज्ज मज्झंदिणदिणयरते-  
यत्तच्छी, जं भट्टिदारिया आणवेइत्ति भणिऊण समासण्णसरसीओ आणीयाइं नलिणीनालाइं कया सेज्जा निवन्ना रयणा-  
वली, समारद्धो अन्नेहिं विमलयरसघणसारपमुहेहिं वत्थूहिं सिसिरोवयारो, न य मणागंपि जाया से संतावहाणी। अवि य-  
जुह जह कीरइ तीसे सीयलवत्थूहिं तणुपडीयारो। तह तह मयणहुयासो हवइ हयासो सहस्सगुणो ॥ १ ॥

किं च—उवत्तइ परियत्तइ दीहं नीससइ जंपइ न किंपि । थोयजलमज्झलीणां मीणव नरेसरस्सं सुया ॥ २ ॥

एवंविहं च उद्धितं देहदाहं पलोइऊण पुच्छिया चेडीहिं—सामिणि ! किं कारणं जमेवं अज्ज वाढं वांडलसरीरा उवळक्खिजसि ? किमपत्थभोयणवियारो उयाहु पित्तदोसो अन्नं वा कारणंतरं ? सबहा कहेउ भगवती, जेण सा-  
द्विज्जइ पेज्जस्स, कीरइ समुचियभेसहाइसामग्गी, अणुवेहणिज्जा खलु रोगा सत्तुणो य, रयणावलीए भणियं—न मुणेमि  
किंपि संपइ विसेसकारणं, चेडीहिं भणियं—सामिणि ! जप्पभिइं तुमए सा चित्तपट्टिगा पलोइया तवेलंचिय जाओ  
कित्तियओवि सरीरस्स अन्नहा भावो इइ अम्हे वित्थेमो, निच्छियं पुण सरीरधारणं तुमं जाणेसि । तओ लक्खिय-  
मेयाहिंति विगप्पिऊण भणियमणाए—हला ! तुम्हे जाणह, तओ ताहिं चित्तियं—जाव अज्जवि विरहेण न वाढं  
वाहिज्जइ इमा ताव निवेएमो रत्तो, जेण विसमा कज्जगई निट्टुरा सरा कुसुमाउहस्स सिरीसकुसुमकोमला सरीर-  
सिरी इमीए, न जाणिज्जइ किंपि हवइत्ति निच्छिऊण कहाविओ एस वइयरो राइणो, तेणावि आहूया रयणावली,  
सपणयं भणिया य—पुत्ति ! सूरसेणकुमारेण तुमं परिणाविउमम्हे वंछामो, जुत्तमेयं ? तीए भणियं—ताओ जाणइ,  
तओ लक्खिऊण तदभिप्पायं राइणा भणिया नियपहाणपुरिसा—अरे गच्छह महासेणनरवइणो सयासे, आणेह  
सूरसेणकुमारं, जेण विवाहो लहुं कीरइ, जं देवो आणवेइत्ति भणिऊण निग्गया पहाणपुरिसा, गंतुमारद्धा, कमेण  
य पत्ता सिरिपुरं, दिट्ठो राया, निवेइयं पओयणं, नरिंदेणवि पवरमंतिसामंतचाउरंगसेणाणुगओ रयणावलीविवाहनि-

श्रीगुणचंद  
महावीरच०  
६ प्रस्तावः

॥ २०४ ॥

मित्तं पेसिओ सूरसेणकुमारो, अविलंबियपयाणगेहिं पत्तो सिरिथलनयरसमीवं, निवेइयं जियसत्तुनरिंदेस्स कुमारागमणं,  
परितुट्ठो एसो, दावियं पियनिवेयगाण पारिओसियं, समाइट्ठा य अणेण नियपुरिसा—अरे मोयावेह बंधणवद्धं जणं  
दवावेह अविसेसेण महादाणं सोहावेह रायमग्गे कारावेह हट्ठसोहाओ पयट्ठेह महुसवं सज्जेह मंगलतूरं वायावेह  
हरिसुक्करिसकारेण जमलसंखे, ठोवेह करणुगं जेण निगच्छामो कुमाराभिमुहं, संपाडियं इमं रायसासणं पुरिसेहिं,  
निग्गओ राया, दिट्ठो यऽणेण लच्छीसमागमसमूसुओ चेव महुमहणो कुमारो सूरसेणो, दूराच्चिय पणमिओ कुमारेणं,  
गाढमालिंगिऊण अभिनंदिओ राइणा, पवेसिओ महाविभूर्इए पुरं, दिट्ठो उच्चियठाणे जन्नावासओ, अन्नंपि संपा-  
डियं तक्कालोच्चियं कायवं, कमेण समागओ विवाहदिवसो, तओ कयमज्जणो गहियसुंदराभरणो पवरचारुवारणाधिरूढो  
संखकाहलागम्भगंभीरतूरनिग्घोसपूरियदिसामंडलो गहियकणयदंडधयवडुग्घायनरनिवहाणुगओ मंगलपहाणगायं-  
तगायणसणाहपेच्छणयसंकुलो पइन्नवरवासधूलिधूसरियमणहरुत्तालनचंतवेसविलओ कुमारो सूरसेणोचि विवाहसं-  
डवमागओ, कयं से सासुयाए उच्चियकरणिज्जं, पेसिओ कोउयहरयं, दिट्ठा अणेण पसाहिया विविहवन्नएहिं विभू-  
सियंगमंगा पवररयणालंकारोहिं नियंसिया निम्मलखोमज्जुयलयंति चच्चिया हरिचंदणेणं पडिनद्धा सुरहिसियकुसुमदा-  
मेहिं, तं च दट्ठूण पुवभवदढपेम्मदोसेण सहसा विग्रंभिओ कुमारस्स अणोरपारो पेमपसरो, चिंतियं चऽणेण-अहो नि-  
रुवमा रूवसंपया अहो अखंडियपसरं सरीरलावण्णं, असारेवि संसारे एरिसाइं कण्णगारयणाइं दीसंतित्ति पमोयमुव-

द्वयो-  
विवाहः.

॥ २०४ ॥

हंतो काराविओ पुंखणगाइकिचं, सविसेसं, च पूइया देवगुरुणो, पारद्धो परमविभूइए हत्थग्गहो, जाओ राइणो परि-  
तोसो, सम्माणिया सामंता, कयत्थीकया तक्कुवजणा, अभिनंदिया नायरया, भमियाइं चत्तारिवि मंडलाइं, वित्तो  
विवाहमहसवो, अनन्नसरिसं च रयणावलीए सह विसयसुहमणुहवंतस्सं समइकंता कइवि वासरा । अन्नदियहे य  
नरवइमापुच्छिऊण तीए समेओ निययनयराभिमुहं गंतुं पयट्ठो कुमारो, वचंतस्स य अंतरा समागओ वसंतसमओ ।  
सो य पुण केरिसो?—उहामरामाजणमणवियंभंतपंचवाणो मडुरपरहुयरववित्तासियपहियहियओ कुसुममयरंदविंदु-  
पाणपरवससिलीमुहझंकारमुहरो पप्फुलसहयाररेणुधूलीधूसरियसयलदिसामंडलो कुरवयकुसुमामोयहरियमडुरिय-  
गणो सेवणसुहपसुरिहम्मंतपामरो जणचचरीतूरमडुरनिग्घोसो तरुसंडमंडवावद्धहिंडोल्याउलो वीयरगोव अइमुत्त-  
याणुगओ लच्छीनाहोव छप्पयरिंछोलिसामलच्छाओ माणससरोव पाडलापसूयसुंदरो तरुणीजणोव ससिणिद्धलोद्ध-  
तिलयपसाहिओ सुमुणिगणुव असोगाणुगओ, अवि य—

गिम्हुणहतावियाइं पल्लपंकुल्लियंगमंगाइं । गिरिकूडा इव नज्जंति जत्थ वणमहिसजूहाइं ॥ १ ॥

कुडयसिलिंधसिरीसाइविविहतरुकुसुमगंधरमणिज्जो । छज्जइ गंधियहट्ठो व जत्थ वरकाणणाभोगो ॥ २ ॥

रेहंति कुसुमसंचयसमोत्थया जत्थ किंसुयसमूहा । तक्कालपहियपप्फुट्टहिययरुहिरोवलित्तव ॥ ३ ॥

जत्थ य परहूयकलरवगीयनिनायं रणंतअलितूरं । पवणेरियतरुपलववाहुलयं नचइव वणं ॥ ४ ॥

श्रीगुणचंद  
महावीरच०  
६ प्रस्तावः

॥ २०५ ॥

जम्मि य पियंति तरुणा दइयामुहकमललद्धसुहवासं । मइरं मयरद्वयजीवणेकपरमोसहिरसं व ॥ ५ ॥  
वेइलमउलदसणा कुवलयनयणा मरालरवसदा । उग्गायइव जहियं उउलच्छी कमलवयणेण ॥ ६ ॥  
सुमरियपणइणिवग्गं पहियसमूहं विलुत्तचेयन्नं । वउलाण कुणइ गंधो विसपुप्फाणं व पसरंतो ॥ ७ ॥  
जम्मि य उच्चा तरुणो वियसियसियकुसुमगुच्छसंछन्नो । तारानियराउलगयणदेसलच्छि विडंबंति ॥ ८ ॥  
एवं गुणाभिरामे य पत्ते वसंतसमए सो सूरसेणकुमारो तक्कालदेसंतरागयवणियजणोवणीयपवरतुरंगमाभिरूढो  
विसेसुज्जलनेवत्थेण परिगओ जणेण पयट्ठो काणणसिरिं पेच्छिउं; गच्छंतस्स य विवसीभूओ तुरंगमो विवरीयसिक्ख-  
त्तणेण य जहा जहा वेगपडिखलणत्थं रज्जुमायड्ढइ कुमारो तहा तहा अपत्थसेवाए उइन्नरोगोव वेगेण सो गंतुमा-  
रद्धो; दूरपरिमुक्कपरियणो य दुक्कयकम्मुणव निवाडिओ कुमारो एगागी महाडवीए घोडएण; परिस्समकिलंतो य  
मओ एसो, कुमारोवि तण्हाभिभूयो इओ तओ सलिलमन्नेसिउं पवत्तो, अइगंभीरयाए अडवीए कहिंचि तमपाव-  
माणो निसन्नो सिसिरतरुच्छायाए, चिंतिउमारद्धो य-अहो कुडिला कज्जपरिणई अहो सच्छंदाभिरई दुल्लिओ दइवो,  
जं सब्बहा अपरिचिंतियंपि कज्जं एवमुवदंसेइ, अहवा किमणेण? सत्तधणो चेव सप्पुरिसजणो होहिति, एवं च  
विगप्पमाणो जाव खणंतरं विगमेइ ताव समागओ एगो पुलिंदगो गहियकोदंडो करकलियवाणो तं पएसं; सपणयं  
पुच्छिओ य अणेणं; जहा-भइ! को एसप्पएसो? कत्थ वा सलिललाभोत्ति? तेण भणियं-कायंवरीए महाडवीए

सूरसेना-  
पहारः.

॥ २०५ ॥

मञ्जुदेसो एस, सलिलं पुण एत्तो वणसंडाओ केत्तिएणवि भूमागेणं वट्टइ, केवलं दुट्ठसत्ताउलत्तणेणं न सुहगेज्झं, भो  
महाणुभाव ! जइ पियासिओ ता एहि जेण सयमेव दंसेमि; एवमायत्तिकुण पडिवन्नं कुमारेणं; पयट्ठो य तयभिसुहं,  
तओ पुलिंदगेण चडावियचावगुणारोवियारोवेण देसिज्जमाणमग्गो पत्तो सरोवरं, कयं जलावगाहणं, अवणीया  
तण्हा, अहो णिकारणेवयारी एसोत्ति चित्तिं कुमारेण दिन्नं से नामंकिंयं सुदारयणं, परिहियं च अणेण अंगु-  
लीए, नीओ य तेण नियगुहाए, काराविओ कयलीफलाइणा पाणंवित्तिं, अह परिणयंमि वासरे कुमारेणं भणिओ  
पुलिंदगो-अहो वाढं कोऊहलं मे बहुअच्छरियनिलयभूयां य एसा संभाविज्जइ महाडवी, अहो दंसेसुं किंपि अच्छ-  
रियनिलयंभूयं इमीए पएसंतरं, पुलिंदगेण भणियं-जइ एवं तां एहि दंसेमि, तओ गया एगं वणगहणंतरं, तं च  
केरिसं ?-एगत्य रत्तचंदणालिहियमंडलगं निहित्तरत्तकणवीरकुसुमदामदंतुरं अन्नत्थ मंतवाइजणहुणिज्जमाणगुग्गुलु-  
लिकागंधुदुयाभिरामं एगत्य मिलियधाउवाइनिवहधमिज्जंतधाउपाहाणं अन्नत्थ विविहोसहीरससाहिज्जमाणभूइयं  
एगत्य पडमासणनिविट्ठजोगिज्जणपारद्धमणपरिकम्मणं, एवंविहं च तं दट्ठुणं जायपरमविम्हएण पुच्छिओ सो कुमा-  
रेण-भइ ! किं नाम एयस्स पएसस्स ? तेण भणियं-सिद्धिखेत्तंति, कुमारेणं चित्तिं-अहो नामेणवि सुणिज्जइ एयस्स  
महिमासारो, ता निच्छियं तं नत्थि अच्छरियं जमिह न होही, अहो एयं सट्ठाणे पेसिऊण असंभंतो पलोएमि  
निदुयदिट्ठीएत्ति विगप्पिऊण भणिओ अणेण पुलिंदो, जहा-भइ ! गच्छसु तुमं गुहाए, अहंपि खणमेकं परिभमिऊण



विगयकोऊहलो पडिनियत्तिस्सामि, तेण भणियं—अज्ज ! न जुज्जइ निसाए एत्थ निमेसंपि वसिउं, जओ इह पाउब्भ-  
वंति पिसाया मिलंति वेयालवंदाइं समुच्छलंति घोरफेकारसदा जायंति छिद्दपवेसा, अओ अलमत्थावत्थाणणे, कुमा-  
रेण भणियं—जइ एवं ता तुमं इहेव निलुक्को पडिवाडेसु खणंतरं जाव अहं संखेवेण पेक्खिउमागच्छामि, तेण भणियं—जं  
भे रोयइत्ति, परं सिग्घं एज्जाहि जेण समइकंता जाममेत्ता रयणी, एवंति पडिवज्जिऊण कुमारो अइगओ वणगहणब्भं-  
तरं, पज्जलंतदिवोसहीपहापसारेण य इओ तओ पलोयंतो पत्तो दूरविभागं, अह एगत्थ माहवीलयाहरे जालाउलं  
पज्जलंतं जलणकुंडं पेच्छिऊण सकारणमेयंति जायबुद्धी पहाविओ वेगेण तयभिमुहं, जाव केत्तियंपि भूभागं वचइ  
ताव निसुणइ साहगविहिवुक्कमंतसाहगं पडुच सकोवं चेडयसुरं समुल्लवंतं, कहं तं?—

रे सुद्ध ! मरिउकामोऽसि नूण जं मंतसाहणं कुणसि । अविगप्पिऊण पुवं सबुद्धिविभवस्स माहणं ॥ १ ॥

किं कोऽवि तए दिट्ठो निसुओ वा साहगो महियलंमि । जो साहणंमि चुक्को मुक्को हि मए जमेणं व ॥ २ ॥

जह इयरदेवमंताण सुमरणं कुणसि तं जहिच्छाए । तह मज्झवि कुणमाणो न भवसि तं निच्छियं एत्तो ॥ ३ ॥

कयमणपरिकम्मेहिं मुणिनाहेहिवि दुसाहणिज्जोऽहं । पायडियकूडकवडो न चेडओ किं सुओ तुमए ? ॥ ४ ॥

इमं च भणिज्जमाणं कुमारेण निसुणिऊण चिंतियं—नूणं कोइ महाणुभावो साहणविहिपरिभट्ठो एस चेडएण  
निब्भच्छिऊण हणिज्जइ [लग्गो], ता जुत्तं मम एयपरित्ताणंति विगप्पिऊण दाहिणकरेण नीलमणिच्छायं छुरियं

धरंतो धाविओ तम्मग्गेण, दिट्ठो यऽणेण तव्वेलं चिय भो भो सुरासुरा परित्तायह परित्तायहत्ति भणमाणो  
चलणेसु घेत्तूण चेडगेण उप्पाडिओ सिलायले पच्छाडणनिमित्तं विज्जासाहंगो, तओ देवेषु सत्थं न कमइत्ति चिं-  
तिऊण मुक्कपहरणो निवडिओ कुमारो चेडयसुरस्स चलणेसु, विण्णविउमाढत्तो-देव ! पसीयह पसीयह, परिचयह  
कोवं, मम जीविण रक्खह एयं, को तुम्ह इमिणा सह कोवो ?, न हि सुकुद्धोऽवि पंचाणणो पहरइ गोमाउयंमि,  
किं तुम्हेवि अहमजणोचियं कम्मं काउमरिहह ?, इमं च सोचा ईसिं जायपसमो चेडगो समुल्लविउमारद्धो-भो  
कुमार ! अविलंघणिज्जोऽसि तुमं, तहावि निसुणेसु एयावराहं, इमिणा हि मम मंताराहणपरेणावि न संमं वट्टिज्जइ,  
कुमारेण भणियं-महावराहकारीवि ममं जीवियमोलेण मोत्तवो, मा कुणसु विहलं देवदंसणप्पवायं, चेडगेण भणियं-  
सुयणु ! किं तुमए निरवराहेण विणासिएण ?, एसो चेव विणासणिज्जो आसि, परं तुह महाणुभावयाहयहियएण  
पसाउत्तिकाऊण एस परिचत्तोत्ति भणिऊण अक्खयसरीरं चेव मंतसाहगं मोत्तूण अहंसणमुवगओ चेडओ, सोऽवि  
मरणभयागयसुच्छाभिभूयचेयण्णो अहसन्निहियमंतसाहणत्योवणीयहरिचंदणरसेण समासासिओ कुमारेण, मुहुत्त-  
मेत्तेणं य उवलद्धचेयणो पञ्चुजीवियं व अप्पाणं परिकप्पितो मंदमंदमवलोइउं पयत्तो, खणंतरे य समुल्लविओ कुमा-  
रेण-भइ ! निब्भओ निरुद्धिग्गो अच्छसु, दूरमवकंतो तुह कयंतो, कहेसु परमत्थं, को तुमं ? किं नामधेओ ? कुओ  
वा आगओ ? किमियं सुहपसुत्तकेसरिकंडूयणं विणासपज्जवंसाणं मंतसाहणं समारद्धं ? कहां वा विहडियं ?, जीव-

श्रीगुणचंद  
महावीरच०  
६ प्रस्तावः

॥ २०७ ॥

दाइत्ति पेममुव्वहंतेण भणियमणेण—

सुंदर ! विज्जाहरो कणयचूडयनामोऽहं गयणवल्लहपुराओ चेडगसाहणं काउमिहागहो म्हि, मंतं च परावत्तयंतस्स मे कहवि भवियवयावसेण सुप्पणिहियस्सवि विसंखुलियमेकमक्खरं, एत्तियमेत्तावराहसंभवेऽवि परिकुविण्णं उप्पाडिओ सिलायले निवाडणत्थमणेणं, तक्कालं भयविहुरेण य न सरियाणि तणुरक्खामंतक्खराणि, तयणंतरं च न मुणेमि किंपि जायं, एत्तियमेत्तं ईसिं जाणामि जं तुमए भणियं-मम जीवियमोल्लेणऽवि मोत्तवो एसत्ति, कुमारेण भणियं-भद ! के अम्हे ?, नियसुकियदुक्कियाणि चेव सबत्थ सुहदुक्खेसु पभवन्ति जीवाण, कणयचूडेण भणियं-को सहहेज्ज अहिसमाणरूवाइं सुकयदुक्कयाइं । तुमए सजीयदाणेण रक्खमाणेण मह जीयं ॥ १ ॥

कहमिव बहुरयणा नो वसुंधरा ? जत्थं तुम्ह सारिच्छा । परहियकरणेक्कपरा अज्जवि दीसन्ति सप्पुरिसा ॥ २ ॥

जाय चिय नीसेसावि मज्झ नूणं समीहिया सिद्धी । दुल्लंभदंसणो दिट्ठिगोयरं जं गओ तंसि ॥ ३ ॥

अन्नं च-तुह सच्चरिएणवि नामगोत्तमुक्कित्तियं जइवि भुवणे । तहवि सविसेसजाणणकएण तम्मइ महं हिययं ॥ ४ ॥

तओ कुमारेण मुणिऊण तदभिप्पायं साहिओ दुट्ठतुरगावहरणपज्जवसाणो सवो नियवइयरो, विज्जाहरेण भणियं-कुमार ! किमिह मे जीवियप्पयाणत्थमेव तुम्ह आगमणं ?, किं वा कारणं पि आसि ?, कुमारेण भणियं-कोऊहलेण, न पुण अन्नं कारणंतरं, विज्जाहरेण भणियं-जइ एवं ता कुणह ममाणुग्गहन्ति एह वेयइपवयं, पेच्छइ तत्थ अणे-

उपकार-  
कीर्तनं.

॥ २०७ ॥

गच्छरियाहं, अणुगिण्हह नियदंसणदाणेण मम कुडुंबयंति, अचंतकोऊहलावलोयणसयण्हेण पडिवत्तं च कुमारेण ।  
तयणंतरं सो कुमारं घेत्तूण उप्पइओ तिमिरुप्पीलसामलं गयणयलं, निमेसमेत्तेण पत्तो वेयड्ढगिरिं, पविट्ठो सभवणं,  
कया कुमारस्स महई भोयणाइपडिवत्ती ॥ सो य पुल्लिंदगो तत्थ जाममेत्तं पडिवालिकुण जाव कुमारो नागओ  
ताव वणनिगुंजेसु सुचिरं पलोइकुण दुहत्तो सगुहाए गओ ॥ कुमारोऽवि कणगचूडेण समेओ वेयड्ढगिरिपरिसरेसु  
सुरहिपारियायतरुमंजरीगंधुदुरेसु विसमगिरितडनिवडंतनिज्झरशंकारमणहरेसु सविलासकिन्नरभिडुणसंगीयसइसुंदरे-  
सु निकुंजदेसोवसोहिएसु विहरिउमारद्धो, अह परिन्भमंतेण कोऊहलवियसियच्छिणा कुमारेण दिट्ठो एगतथ  
सिलायले एकचलणावट्ठंभनियमियसयलंगभारो उट्ठसमुक्खित्तोभयभुयाजुयलो ज्ञाणवसनिसियनिचलपयंडमायंडमं-  
डलुम्सुहलोयणप्पसरो निप्पकंपत्तणतुलियकुलाचलो पडिमासंठिओ एगो चारणसमणो, तं च दट्ठूण अंतो वियंभि-  
यउड्ढामहरिसवसपयट्ठंतपुलयपडलेण कुमारेण भणियो कणगचूडो-भइ! एहि एयस्स महामुणिस्स वंदणेण पक्ख-  
लियकलिमलं अत्ताणं करेमोत्ति, विज्जाहरेण संलत्तं-एवं होउ, तओ गया मुणिसमीवे, पणमिओ सविणयं, मुणिणावि  
जोग्गयं नाऊण पारियं काउस्सग्गं, उवविट्ठो समुचियट्ठाणे, अज्जवि मूलगुणट्ठाणवत्तिणो एए इति परिभाविऊण  
भणिया साहुणा-भो महाणुभावा! एयस्स निस्सारसंसारस्स सारमेत्तियं जं वीयरगेहिं करुणापरियरियंतकरणेहिं  
देसिओ सवजत्तेण कीरइ धम्मो, तस्स पुण मूलं अहिंसा, सा य मज्जमंसनिसिभत्तपरिहारेण जहुत्ता संभवइ, तत्थ

मज्जं ताव विसिद्धजणपेयवज्झं, अमेज्झरसंपि व परिहरणिज्जं दूरओ, न मणसावि तप्पिवासा कायवा, एयं हि पिज्जमाणं निट्ठावेइ दविणं अवणेइ विसिद्धत्तणं जणेइ उम्मायं संपाडेइ विहलत्तणं दावेइ कज्जहाणिं पयडेइ अत्त-  
मम्माणि लज्जावेइ मित्ताइं कलुसेइ बुद्धिपसरं विनडेइ कुलजाइओ भंजावेइ निम्मलं सीलं उप्पाएइ वेरपरंपराओ भंसेइ धम्मकम्माओ संजोएइ अकुलीणजणमेत्तीए अभिगमावेइ अगम्माणि भक्खावेइ अभक्खाणि उवहसा-  
वेइ गुरुजणं मइलावेइ सयणवग्गं बोलावेइ अवोल्लणिज्जाणि, तहा इमं हि मज्जपाणं मूलं असुइत्तणस्स अवगासो वेरियाणं पडिवोहो कोहाइणं संकेयट्ठाणं पराभवाणं अट्ठाणीमंडवो अणत्थाणं । अविद्य-

पचक्खंपि य दावेइ कलुसभावं जमेत्थ जंतूणं । मज्जस्स तस्स का होज्ज चंगिमा पावमूलस्स ? ॥ १ ॥

वरमुग्गतालपुडभक्खणेण अत्ता विणासमुवणीओ । मा मज्जपाणवत्थाए थेवमित्तंपि संठविओ ॥ २ ॥

एत्तो चिय लोइयसाहुणोऽवि मइरं मुयंति दूरेण । वेयपुराणेसुंपिवि निसिद्धमेअं जओ भणियं ॥ ३ ॥

गौडी पैट्ठी तथा भाध्वी, विज्ञेया त्रिविधा सुरा । यथैवैका तथा सर्वा, न पातव्या द्विजोत्तमैः ॥ ४ ॥

नारीपुरुषयोर्हन्ता, कन्यादूषकमद्यपौ । एते पातकिनस्तूक्ताः, पञ्चमस्तैः सहाचरन् ॥ ५ ॥

तथा-सुरां पीत्वा तु यो मोहादग्निवर्णां सुरां पिबेत् । तथा सकाये निर्दग्धे, मुच्यते किल्बिषात्ततः ॥ ६ ॥

यस्य कायगतं ब्रह्म, मद्येन प्लाव्यते सकृत् । तस्य व्यपैति ब्राह्मण्यं, शूद्रत्वं च नियच्छति ॥ ७ ॥

इय भो देवाणुपिया ! मज्जं पाउं न जुज्झइ कयावि । सग्गापवग्गसंगमसुहत्थिणो सब्बकालं पि ॥ ८ ॥

जहा य किर विसिद्धानं मज्जमपेज्जं एवं मंसमवि अभक्खणिज्जं । एयं हि—

अवचंओ सुहज्झाणस्स पयरिसो अट्ठरुद्धानं उवसंहारो संपाइमसत्ताणं उप्पत्तिपयं किमियाणं आयंतियजीवा-  
(ववा)ओ सच्चावत्थासु हेऊ विसेसरसगिद्धीए कारणं पारद्विकम्मस्स निमित्तं महारोगायंकाणं वीभच्छं पेच्छगच्छीणं  
पउणपयवी दुग्गईए जलंजलिदाणं सुहाणुबंधसुहाणुभावस्स, ता को नाम सयन्नो एवंविहदोसनिहाणमिणं मणसावि  
समभिलसेज्जा ?, अवि य—

धम्मे सलाहणिज्जं परपीडावज्जणं पयत्तेणं । तं पुण मंसासीणं न घडइ गयणारविंदव ॥ १ ॥

मंसमसारयस्स सरीरयस्स परिपोसणत्थिणो मणुया । भुंजंति परभवेसुं तिक्खदुक्खाइं अगणिंता ॥ २ ॥

को नाम किर सयन्नो मोहोत्तियतुच्छसोक्खकज्जेण । अस्संखभवपरंपरदुहरिंछोलिं पवट्ठेजा ॥ ३ ॥

लोइयसत्थेवि इमं बहुप्पयारेण भणिइनिवहेण । पयडं चिय पडिसिद्धं अचिरुद्धं जेण भणियमिणं ॥ ४ ॥

हिंसाप्रवर्धकं मांसं, अधर्मस्य च वर्धनम् । दुःखस्योत्पादकं मांसं, तस्मान्मांसं न भक्षयेत् ॥ ५ ॥

स्वमांसं परमांसेन, यो वर्धयितुमिच्छति । उद्विशं लभते चासं, यत्र तत्रोपजायते ॥ ६ ॥

दीक्षितो ब्रह्मचारी वा, यो हि मांसं प्रभक्षयेत् । व्यक्तं स नरकं गच्छेदधर्मः पापपौरुषः ॥ ७ ॥

श्रीगुणचंद  
महावीरच०  
६ प्रस्तावः

॥ २०९ ॥

आकाशगामिनो विप्राः, पतिता मांसभक्षणात् । विप्राणां पतनं दृष्ट्वा, तस्मान्मांसं न भक्षयेत् ॥ ८ ॥  
शुक्रशोणितसंभूतं, यो मांसं खादते नरः । जलेन कुरुते शौचं, हसंते तं हि देवताः ॥ ९ ॥  
श्रूयन्ते यानि तीर्थानि, त्रिषु लोकेषु भारत ! । तेषु प्राप्नोति स स्नानं, यो मांसं नैव भक्षयेत् ॥ १० ॥  
नाग्निना न च सूर्येण, न जलेनापि मानव ! । मांसस्य भक्षणे शुद्धिः, एष धर्मो युधिष्ठिर ! ॥ ११ ॥  
किं लिङ्गवेषग्रहणैः ? किं शिरस्तुंडमुण्डनैः ? । यदि खादन्ति मासानि, सर्वमेव निरर्थकम् ॥ १२ ॥  
यथा वनगजः स्नातो, निर्मले सलिलार्णवे । रजसा गुण्डते गात्रं, तद्वन्मांसस्य भक्षणम् ॥ १३ ॥  
प्रभासं पुष्करं गङ्गा, कुरुक्षेत्रं सरस्वती । देविका चन्द्रभागा च, सिन्धुश्चैव महानदी ॥ १४ ॥  
मलया यमुना चैव, नैमिषं च गया तथा । सरयू कौशिकं चैव, लौहित्यं च महानदम् ॥ १५ ॥  
एतैस्तीर्थैर्महर्द्धिक्यैः, कुर्याच्चैवामिषेचनम् । अभक्षणं च मांसस्य, न च तुल्यं युधिष्ठिर ! ॥ १६ ॥  
यो दद्यात्काञ्चनं मेरुं, कृत्स्नां चैव वसुन्धराम् । अभक्षणं च मांसस्य, न च तुल्यं युधिष्ठिर ! ॥ १७ ॥  
हिरण्यदानं गोदानं भूमिदानं तथैव च अभ० ॥ १८ ॥ कपिलानां सहस्रं तु मासे मांसं गवां ददे । अभ० ॥ १९ ॥  
इयं लोइयसत्येसुवि परिहरणिज्जत्तणेण निदिट्ठं । मंसं महाविसंपिव किं पुण लोउत्तरे समए ? ॥ २० ॥  
जह मज्जमंसविरई बहुदोसत्तेण होइ कायवा । तह रयणिभोयणंपिवि परिहरणिज्जं सयन्नोहिं ॥ २१ ॥

मद्यमांस-  
निशाभो-  
जनदोषाः

॥ २०९ ॥

जइविहु फासुगमजं कुंभूपणगा तहावि दुप्पेस्सा । पच्चक्खनाणिणोवि हु राईभत्तं परिहरंति ॥ २२ ॥

जइविहु पीयीलिगाई दीसंति पईयजोइउज्जोए । तहवि खलु अणाइजं मूलवयविराहणा जेण ॥ २३ ॥

इय भो देवाणुपिया ! संसारतरुस्स रुंदकंदसमं । मज्जं मंसं निसिभोयणं च नाउं परिचयह ॥ २४ ॥

किं वा मूढा अच्छह नो पेच्छह छिड्डपाणिपुडपडियं । सलिलंपिव विगलंतं पइसमयं चेव नियजीयं ॥ २५ ॥

केत्तियमेत्तं एयं ? अज्जवि संसारचारगविरत्ता । रज्जंपि विवज्जित्ता पव्वज्जं संपव्वज्जंति ॥ २६ ॥

एयं च मुणिणा कहिए कणगचूडो समुट्टिऊण परमं भवविरागमुव्वहंतो निवडिओ मुणिचलणेषु, भणिउमाढत्तो य-  
भयवं । जाय कुमारं संठायेमि ताव तुम्ह समीवे पव्वजापडिवत्तीए करेमि सफलं नियजीवियं, मुणिणा भणियं-एसो  
पिय परिच्छेओ भवपासस्स, अओ जुज्जइ तुम्हारिसाण काउमेयं । एत्थंतरे कुमारोऽवि जायसंवेगो पणामं काऊण  
मणइ-भयवं । ममंपि मज्जमंसनिसिभत्ताणं आमरणंतं देह पच्चक्खाणं, साहुणावि नाऊण जोग्गयं दिन्नं से पच्च-  
क्खाणं, तओ गुरुं वंदिऊण गया सगिहं, पवराभरणाइदाणेण सम्माणिऊण भणिओ कुमारो कणयचूडेण, जहा-  
कुमार ! भवविरत्तोऽमिह, संपयं दिक्खागहणेण विगयपावं अत्ताणं करिस्सामि, अओ तुमं साहेसु जं मए कायवं,  
कुमारेण भणियं-किमहं साहेमि ?, दुप्परिहारो तुमं, केवलं चिरकालविमुक्को गुरुजणो मम दंसणूसुओ कहंपि वट्ट-



श्रीगुणचंद  
महावीरच०  
६ प्रस्तावः

॥ २१० ॥

इत्ति वाढं परितप्पइ सणो, कणयचूडेण भणियं—जइ एवं ता वचामो तत्थ, पडिवन्नं कुमारेण, तओ विमाणमारु-  
हिऊण दोवि गंतुं पयट्ठा ।

इओ य तं सेन्नं दुट्ठतुरगावहरियं कुमारं सुचिरं अरन्ने पलोइऊण कहवि अपत्तवत्तं निराणंदं निरुच्छाहं गयं  
सिरिपुरं नयरं, निवेइया नरवइस्स कुमारवत्ता, तओ राया अवहरियसवस्सो इव संतावमुव्वहंतो परिचत्तपाणभो-  
यणो चाउरंगिणीए सेणाए अणुगम्ममाणो अंतउरेण दुस्सहदुक्खकंतहिययाए रयणावलीए य समेओ निग्गओ  
नयराओ कुमारन्नेसणनिमित्तं, पत्तो य कमेण तं चेव कायंबरीए मज्झदेसं, पेसिया कुमारावलोयणत्थं सवत्थ  
पुरिसा, समारद्धा य निरुविउं, अन्नया इओ तओ परिममंतेहिं दिट्ठो सो पुलिंदगो, पलोइयं च से अंगुलीए कुमा-  
रनामंकियं सुदारयणं, तं च दट्ठूण जइ पुण अणेण विणासिओ होज्ज कुमारोत्ति कुविकप्पकलुसियहियएहिं उव-  
णीओ सो नराहिवस्स, तेणावि अणाउलहियएण पुच्छिओ एसो—अहो मुद्ध! मह अवितहं साहेसु कत्तो एस सुदा-  
रयणलाभो? कत्थ वा कुमारोत्ति भणिए सो पुलिंदगो अदिट्ठपुवं हरिकरिरहभडुब्भडं रायलच्छि पेच्छिऊण जाय-  
संखोभो अड्ढविअड्ढं खलंतक्खरं कुमारवत्तं कहिउमारद्धो, तओ राइणा भणियं—अरे अवरोप्परविरोहिणा वयणसं-  
गहिवस्स फणारयणं केणावि घेतुं पारिज्जइ?, एवं ठिएवि पंचरत्तं जाव सुसंगोवियं करेह एयं, ण सुणिज्जइ कोऽवि

वैराग्यं  
कुमारा-  
न्वेषणा च

॥ २१० ॥

परमत्तो, गंभीराइं विहिचिलसियाइंति भणिए पुरिसेहिं निगडिओ पुलिंदो, राया हि संदेहदोलाहिरूढो अंसुजल-  
 पुन्नलोयणो मन्नुभरं रोविउं पवत्तो, अह पसरिया कुमारपंचत्तगमणवत्ता खंधावारे, दूमिया सामंता, विच्छायत्तं  
 पत्तो पायक्कजणो, विमणदुम्मणीभूया मंतिणो, हाहारवगम्भं रोविउमारद्धमंतेउरं, चिरं अक्कंदिऊण सोगभरभारियंगी  
 निस्सट्ठं निवडिया धरणिघट्टे रयणावली, समासासिया कहकहवि चेडीचक्कवालेण, एत्थंतरे जाया रयणी, अंजण-  
 गिरिविम्भमाइं वियंभियाइं तिमिरपडलाइं, एवं च कमेण पत्ते मज्झरत्तसमए रयणावलीए भणिया निययधावी-  
 अम्मो ! किं एत्तिएवि गए धरियघं नियजीवियं मए सहिअवा हीणजणप्फेसणा दट्ठवाइं पियगेहे सामलाइं सयणाण  
 वयणाइं मुणियवाइं अकारणकुचियखलदुव्वयणाइं, ता सावियासि तं मए नियजीविण, मा अन्नहा काहिसि, होसु  
 संपयं सहायणी, पज्जत्तं पेमुम्भवसुहेण जस्स एरिसा गई ॥ अविय—

किं पागत रुस्स फलं उवभुंजंतं जणेइ पज्जंते । दुक्खं पियजोगो पुण पढमारंभेऽवि विइवइ ॥ १ ॥

फरिक्कन्नविज्जुसुरचावचावलेणं विणिम्मियं मन्ने । पियजणसंगमसोक्खं नूणं विहिणा हयासेण ॥ २ ॥

तेणेव पंडिया परिहरंति पेम्मं अहिं विलगयं व । जाणंति जेण पियविप्पओगविसवेगमाहप्पं ॥ ३ ॥

अंधाईए भणियं—पुत्ति ! कस्स कज्जस्स ममं सहायणीं पत्थेसि ?, तीए भणियं—अम्मो ! दुस्सहविरहदुयासण-  
 परितावियस्स नियजीवियस्स परिचागक्कएणं, धावीए भणियं—वच्छे ! मा ऊसुगा होसु, अज्जवि न मुणिज्जइ

कोऽवि निच्छओ, पच्छावि सुलभो चेव मरणाभिलासो, तओ रयणावलीए सुणिऊण तीसे निसेहपरं वयणं कंयं मोणं, खणंतरेण य दिट्ठिं से वंचिऊण परियणेण असुणिज्जमाणा निग्गया आवासाओ, पविट्ठा दूरदेसपरिसंठियंमि वणनिगुंजे, जोडियपाणिसंपुडा य भणिउं पवत्ता—

भो काणणदेवीओ ! वयणं मे सुणह मंदपुत्राए । को अन्नो इह ठाणे ? साहिज्जइ जरुस नियकज्जं ॥ १ ॥

एसाऽहं दुहहेउं विरुवलक्खणचएण निम्मविया । परिणयणुत्तरकालंपि जीए जाओ इमो विरहो ॥ २ ॥

एत्तो तुज्झ समक्खं अत्ताणं तरुवरंमि लंवित्ता । मोएमि अजसकालुस्सकलुसिएणं किमेएण ! ॥ ३ ॥

सिरिपुररायतणुब्भव ! तुमंपि दूरट्ठिओऽवि लक्खिज्जा । जह तीए वराईए मम विरहे उज्झिओ अप्पा ॥ ४ ॥

इय भणिऊण संजमिओ केसपासो निविडमापीडिया नियंसणगंठी उत्तरिल्लवत्थेण रइओ तरुसाहाए पासओ आवद्धो नियकंधराए, सुको अप्पा, एत्थंतरे सेज्जाए तमपेच्छमाणी अणुमग्गेण धाविया अंवधाई, पत्ता कम्मधम्म-संजोएण तं पएसं, चंदजोणहाए य लंवमाणा दिट्ठा रयणावली, तओ हाहारवं कुणमाणी तक्कालिययं पडियारं काउमस-मत्था लग्गा वाहरिउं—भो भो सुरविंतरखयरा ! परित्तायह परित्तायह, इमंमि इत्थीरयणंमि देह पाणभिव्खं, छिन्नह पासगं, मा अंगीकरेह उवेहाजणियं पावपंकंति । इओ य कणगचूडो सुरसेणकुमारो य पत्ता तं पएसं, सुणिया एसा उग्घोसणा, तओ गयणाओ ओयरिऊण छिन्नो से पासओ संवाहियं अंगं, पुच्छिया य अणेहिं-सुयणु ! को

एरिसदुरज्जवसायस्स कारणं जाओ?, रयणावलीए चिरं निस्ससिऊण भणियं—दुक्कियकम्माइं, कुमारेण भणियं—त-  
हावि विसेसेण साहेसु, जइ एवं ता सुरसेणकुमारस्स महासेणतणयस्स विरहोत्ति, तओ पच्चभिन्नाया कुमारेण,  
भणिया य—जइ एवं ता पज्जत्तं एत्तो दुरज्जवसाणेणंति बुत्ते जायपच्चभिन्नाणा लज्जावसनिमिलंतलोयणा तुण्हक्का  
ठिया रयणावली, मुणियपरमत्थाए ‘सागयं सागयं चिरागयकुमारस्स’त्ति जंपियं धावीए, निवेइओ नरिंदस्सागमण-  
युत्तंतो य । एत्थंतरे विन्नत्तं विज्जाहरेण—कुमार! पडिपुन्नमणोरहा तुब्भे, ता अणुजाणह ममं सट्ठाणगमणाय संपयं,  
अह तच्चिओगकायरमणेण कहकहवि विसज्जिओ सो कुमारेण, गयमेत्तेण य तेण पडिवन्ना भावसारं चारणमुणिस-  
मीये पच्चज्जा । कुमारोऽवि रयणावलीए समेओ गओ खंधावारं, मिलिओ राइणो, सिट्ठो नियबुत्तंतो, जायं वद्धावणयं,  
मुक्को सम्माणिऊण सो पुलिंदगो, पडिनियत्तो य राया सनयराभिमुहं, पत्तो य कालक्कमेणं, समप्पिओ कुमारस्स  
सुंदरो पासाओ, तत्थ ठिओ य गमेइ वासरे विविहकीलार्हिं । अन्नया य सो पंचत्तमुवागओ महसेणराया, कयाइं  
कुमारेण मयगकिचाइं, पडिवण्णं च रज्जं, परिवालेइ रायनीतीए पुहइं । अन्नया य सो कणयचूडो सुमुणियमुणिधम्मो  
अहिगयसुत्तत्थो विहरमाणो समागओ बाहिरुज्जाणे, विन्नायतदागमणो वंदणत्थमागओ सुरसेणनरिंदो, वंदिओ  
अणेण परमभत्तीए, दिन्नासीसो य निविट्ठो गुरुपायमूले, कहिओ साहुणा जिणप्पणीयधम्मो, पडिबुद्धा वहवे  
पाणिणो, धम्मकहावसाणे य मुणिणा पुच्छिओ राया-सम्मं निव्वहंति चिरगहिया मज्जमंसनिसिभोयणवेरमणरूवा

श्रीगुणचंद  
महावीरच०  
६ प्रस्तावः

॥ २१२ ॥

अभिग्गहत्ति, रायणा भणियं-वाढं निव्वहंति, तओ पुणो समणेण भणिओ राया, जहा-पडिवज्जसु असेसदोसरहियं  
जिणनाहं देवबुद्धीए, अंगीकरेसु सम्मत्तं, परिचयसु कुवासणासमुत्थं मिच्छत्तं, एत्तियमेत्तेणवि कएण परमत्थेण कयं  
चिय परभवहियं, रायणा भणियं-एवमेवं, पडिवन्नो मए एत्तो जिणधम्मो, जाया तुम्हाणुभावेण मम मिच्छत्तचा-  
यबुद्धी, सबहा कयत्थीकओ तुम्हेहिंति अभिनंदिऊण य गओ जहागयं, सुणीवि कप्पसमत्तीए विहरिओ अन्नत्थ ।  
अन्नया राया तहाविहसमुप्पन्नसरीरवेयणो अविमुद्धज्जवसाणवसदूसियसम्मत्तो कालं काऊण उववन्नो जक्खत्तणेण ।  
एसा विभेलगजक्खस्स मूलुप्पत्ती ॥

अह महावीरजिणवरो तस्स विभेलगजक्खस्स उज्जाणाओ निक्खमित्ता सालिसीसयनामस्स गामस्स बाहिरु-  
ज्जाणे संठिओ पडिमाए, तम्मि य समए माहमासो वट्ठइ, तत्थ कडपूयणा नाम वाणमंतरी, सा य सामिस्स तिवि-  
हुभवे वट्ठमाणस्स विजयवई नाम अंतेउरिया आसि, तथा य न सम्मं पडियरियत्ति परं पओसमुव्वहंती मया समाणी  
संसारपरिभमणवससमासाइयमाणुसत्ता वालतवायारेण पावियवंतरीभवा पडिमोवगयस्स जिणस्स पुव्ववेरेण तेयम-  
सहमाणा तावसीरुवं विउव्वइ, तओ वक्कलनियंसणा लंवंतगुरुजडाभारहिमसीयलसलिलेण सबं सरीरं उल्लिऊण  
सामिस्स उवरिं ठिया, अंगाणि धुणिउं पयत्ता, तयणंतरं च—

हिमकणनिवहुम्मिस्सा अइसिसिरसमीरणेण परिगहिथा । लग्गंति जिणंगे सलिलविंदुणो वाणनिवहव ॥ १ ॥

कटपूतनो-  
पसर्गः ।

॥ २१२ ॥

पइसमयं विहडियजडंकडप्पवक्कलगलंतजलकणिया । अंतो विसंति तणुणो जयगुरुणो दुस्सहा धणियं ॥ २ ॥

पयईए धिय माहुब्भवस्स सीयस्स दुस्सहं रूवं । किं पुण परोट्टदुचेट्टवंतरीसत्तिपग्गहियं ॥ ३ ॥

पागयनरस्स तारिससीउब्भववेयणाविणिहयस्स । फुट्टइ देहं निरुवक्कमाउयत्ता ण उण पडुणो ॥ ४ ॥

इय चउजामं रयणिं जिणस्स सीओवसग्गसहिरस्स । सविसेसं संलग्गं धम्मज्झाणं भवुम्महणं ॥ ५ ॥

तथो तदहियासणेण जायंमि विसेसकम्मक्खए वियंभियं ओहिनाणं, सबं च लोगं पासिउमारद्धो, पुवं पुण गम्भसंभवाओ आरब्भ सुरभवकालमित्तो ओही आसि, एकारस य अंगाणि सुयसंपयं होत्था, अह कडपूयणा निप्प-  
कंपं भयवंतं वियाणिऊण रयणिविरामंमि पराजिया समाणा उवसंता कयपच्छावाया य भत्तीए पूयं काऊण गया  
सट्ठाणं । सामीवि तत्तो निक्खमित्ता भदियं नाम नयरिं छट्ठं वासावासं काउमुवागओ, गोसालगोऽवि मिलिओ छट्ठ-  
मासाओ, सामिं दट्ठूण जायहरिसो नमिऊण पायपंकयं पमोयमुवगओ समाणो पुवपवाहेण पज्जुवासिउं पवत्तो,  
सामीवि तत्थ विचित्ताभिग्गहसणाहं चाउम्मासखमणं काऊण वासारत्तपज्जंते वाहिं पारेत्ता गोसालेण समेओ  
मगहाविसए अट्ठ मासे उउवद्धे निरुवसग्गं विहरइ ।

सत्तमं च वासारत्तं काउकामो आलहियं नाम नयरिं एइ । तत्थवि चाउम्मासखमणाणंतरं वाहिं पारेत्ता कंडा-  
गनामसन्निवेसमुवागच्छइ, तर्हि च उचुंगसिहरस्स महुमहणभवणस्स समुचिए एगदेसे ठिओ काउस्सग्गेण सामी,

श्रीगुणचंद  
महावीरच०  
६ प्रस्तावः

॥ २१३ ॥

गोसालोऽवि जीयरक्खं व जिणनाहमाहणमुवहंतो चिरकालं संलीणयापीडिओ अविगणियपडिभओ दूरपरिचत्तल-  
ज्जावलोवो भंडोव महुमहपडिमासुहे अहिट्ठाणं दाऊण ठिओ । एत्थंतरे पुण्णपडलगहत्यो धूवकडुच्छुयसमेओ  
समागओ देवच्चगो, दूराउ चिय तहट्ठियं दट्ठूण गोसालयं सविम्हयं चित्तिवमणेण—

वोलिणो बहुकालो देवमिमं मज्झ पूयमाणस्स । न य दिट्ठो कोइ मए कुणमाणो एरिसं भत्तिं ॥ १ ॥  
ता किं होज्ज पिसाओ कोऽवि इमो अहव गहपरिग्गहिओ । धाउविवज्जासवसेण किं नु एवं ठिओ कोऽवि ? ॥ २ ॥  
इय भावेंतो जाहे भवणब्भंतरमुवेइ ताहे सो । समणोत्ति नग्गभावेण लक्खिओ तेण छेएण ॥ ३ ॥  
परिचित्तिं चऽणेणं जइ दंडमहं इमस्स काहामि । तो जाणिस्सइ लोगो जह दुट्ठो धम्मिओ एस ॥ ४ ॥  
तम्हा गामस्स परिकहेमि सोऽविय सयंपि दट्ठूण । एयस्सुचियं काही किं मम इमिणा अणत्थेण ? ॥ ५ ॥  
इय चित्तिऊण सिट्ठं जणस्स तेणावि तत्थ गंतूण । तह चेव ठिओ दिट्ठो गोसालो वासुदेवपुरो ॥ ६ ॥  
कुविण जट्ठिसुट्ठीहिं कुट्ठिओ गहिलओत्ति काऊण । मुक्को चिरेण कहवि हु जणेण सो जजरसरीरो ॥ ७ ॥  
मुक्कमि तंमि सामी महणनामंमि सन्निवेसंमि । गंतुं बलदेवगिहे फासुयदेसे ठिओ पडिमं ॥ ८ ॥  
दुस्सिक्खयत्तणेणं गोसालो पुण मुगुंदपडिमाए । लिंगं दाऊण मुहे अपमत्तो अच्छइ मुणिव ॥ ९ ॥  
तत्थवि पुवपवाहेण गामलोगेण जायकोवेणं । सुचिरं निस्सट्ठं ताडिऊण तो तंमि परिचत्ते ॥ १० ॥

गोशालक-  
चेष्टा.

॥ २१३ ॥

पदु सालगाभिहाणे गामे तत्तो विणिक्खमेऊणं । सालिवणंमि जिणिंदो धम्मज्झाणं समारुहइ ॥ ११ ॥  
 सालज्जानामेणं पंतरदेवी अकारणं कुविया । कुणइ विविहोवसग्गे तत्थेव ठियस्स जयगुरुणो ॥ १२ ॥  
 सयमेव परिस्संता जाहे उवसग्गणेण सा पावा । ताहे पूयं काउं जहागयं पडिनियत्तत्ति ॥ १३ ॥  
 उवसग्गकारगघिय परिस्सममुघहंति चोज्जमिणं । कीरंति जस्स सो पुण कत्थवि नो गणइ जयनाहो ॥ १४ ॥  
 अह भुयणतिलयभूए सुविभत्तचउक्कचचरावसहे । लोहग्गलंमि नयरे सामी पत्तो विहरमाणो ॥ १५ ॥  
 तत्थ य राया दरियारिसूरनिइलणदंतिरासिसिहो । जियसत्तू नामेणं भुवणपसिद्धो समिद्धो य ॥ १६ ॥  
 तइया तस्स विरोहो जाओ पचंतराइणा सद्धिं । ताहे अपुघपुरिसो पेहिज्जइ चारपुरिसेहिं ॥ १७ ॥  
 दिट्ठो य तेहिं सामिय पुट्ठोऽपि न देइ जाव पडिवयणं । रिउहेरिउत्ति कलिऊण ताव गहिओ विमूढेहिं ॥ १८ ॥  
 अत्थाणमंडवत्थस्स राइणो तक्खणं समुवणीओ । अह पुघविणिहिट्ठो उप्पलगो पेच्छिउं सामीं ॥ १९ ॥  
 हरिमुक्करिससमुट्ठियरोमंचो वंदिऊण भत्तीए । भणइ नरिंदं एसो न होइ भो चारिओ किं तु ॥ २० ॥  
 सो एस जेण तइया आवरिसं कणगवारिधाराहिं । निववियमत्थि जायगकुटुंबमिच्छाइरित्ताहिं ॥ २१ ॥  
 सिरिधम्मचक्कट्ठी सिद्धत्थमहानरिंदकुलकेऊ । पवज्जं पडिवन्नो सयमेव जिणो महावीरो ॥ २२ ॥  
 किं वा मुरस्खयरनरिंदविंदवंदिज्जमाणचरणस्स । एयस्स पुरा तुमए निसामिया नेव कित्तीवि ॥ २३ ॥



जइ मम वकं नो सहहेह ता उयह निउणदिट्ठीए । एयस्स चक्कगयकुलिसकलसकमलंकिए पाणी ॥ २४ ॥  
 इय लद्धनिच्छएणं जियसत्तुनराहिवेण सविसेसं । सक्कारिऊण सुक्को गोसालेणं सह जिणिंदो ॥ २५ ॥  
 तओ पुरिमतालंसि नयरे गओ भयवं, ठिओ काउस्सग्गेणं, तत्थ य नयरे धणउच्च समिद्धिसंगओ तोणीरुव  
 मग्गणगणसाहारो मुणिव उभयलोगहियपवित्तिपरो पयइसरलो पयइपियंवओ पयइदक्खिन्नो निम्मलगुणहरिण-  
 वग्गुरासमो वग्गुरो नाम सेट्ठी, निरुवचरियपेमभायणं भदा नाम से भारिया, सा य वंझा, बहूण देवयाणं उवाइय-  
 सयाणि विविहोसहसयपाणाणि य पुत्तयनिमित्तेण काऊण परिस्संतत्ति । अन्नया सेट्ठिणा सह सिविगासमारूढा  
 सयणजणेण परियरिया विविहभक्खभोयणसमिद्धरसवइसणाहसूयारसमेया महया विच्छहेणं निग्गया उज्जाणजत्ताए,  
 पत्ता नाणाविहविहगकुलकलरवमणहरं विचित्ततरुवरसुरहिकुसुमपरिमलसुंदरं सगडमुहाभिहाणं उज्जाणं, तहिं च  
 सुचिरं सरोवरे जलकीलं काऊण पुप्फावचयं कुणमाणो वग्गुरो भदा य पेच्छंति जुणं खडहडियसिहरदेसं विह-  
 डियनिविडसिलासंचयं विणट्ठनट्ठलट्ठयंभसालानिवेसं देवकुलं, तं च पेच्छिऊणं पविट्ठाइं कोऊहलेण अब्भंतरे,  
 दिट्ठा य तत्थ सरयससिमुत्तिव अचंतपसंतसरीरा निराभरणावि भुवणमहग्घरयणभूसियव सस्सिसरीया चिंतामणिव  
 दंसणमेत्तमुणिज्जंतपरममाहप्पाइसया फलिणीदलसामलच्छाया सिरिमल्लिजिणनाहपडिमा, तं च दट्ठूण वियंभिओ  
 तेसिं भावाइसओ, जाओ य एस अभिप्पाओ-जहा नूणं इमीए पडिमाए जारिसा कलाणुगया रूवलच्छी तारि-

सीए ण हवइ एसा सामन्ना, ता फलियवमियाणिं अम्ह मणोरहपायवेणंति चिंतिऊण एवं थोउमारद्धाई—

अज्जं विहडियनिविडदुहनिगड पविहाडिय [अज्ज परपचरसुगइ] मंदिरदुवाराइं ।

अज्जं चिय करकमलि लीण, सुहाइं संसारसाराइं ॥ १ ॥

अज्जं चिय तिहुयणसिरीहिं, अम्हि पलोइय नाह । जं तुह लोयणपहि गयउ, नासियदोसपवाह ॥ २ ॥

अहह अम्हेहिं तिक्खदुक्खोहसिहितत्तगत्तिहिं, कह नाह ! तुम्ह पयमंडवंतरि ।

नहनिवहनिम्मलरयणकिरणजालसंछाइयंवरि ॥ ३ ॥

संपइ लड्डु निवासु फुड्डुमरुपहिएहिं व देव ! जं तुह दिट्ठं सुहकमलु, खालियकम्मवलेव ॥ ४ ॥

एवं च भत्तिसाराहिं सुसिलिट्ठाहिं मणाणंददायिणीहिं गिराहिं हरिसुप्फुल्लोयणाहिं थोऊण पुणो पुणो नि-  
डालतडताडियधरणिवट्ठाइं भणिउमाढत्ताइं—देव ! जइ एत्तो अम्ह दारगो वा दारिगा वा तुम्ह पसाएण होज्जा  
ता इमं तुह भवणं कणथकलसकलियसिहरं थूरथंभाभिरामविसालसालापरिक्खित्तं कविसीसयसओवसोहियं पवर-  
पागारसंपरिग्गहियं सुसिलिट्ठावियसालभंजियासुंदरगोयराणुगयं कारवेमो, सयावि तुम्ह भत्तिपरायणाणि य  
होमो, अणवरयं पूयामहिमं च विरएमोत्ति भणिऊण उज्जाणकीलं काऊण गयाणि सगिहं । अह तेसिं भत्तिपगरि-  
सागरिसियहिययाए अहासन्निहियवाणमंतरीए देवयाए अणुभावेण आहूओ भद्दाए सेट्ठिणीए गम्भो, समुप्पन्नो

श्रीगुणचंद  
महावीरच०  
६ प्रस्तावः

॥ २१५ ॥

सेट्टिस्स पच्चओ, तओ तहिणाओ आरब्भ समारंभियं जिणमंदिरे कम्मंतरं, कओ अकालखेवेण जिन्नुद्वारो, तिसंझं च सुरहिपंचवन्नकुसुमेहिं निम्मवेइ पूयं, पयट्ठावेइ वरविलासिणीनट्टविहिं, वायावेइ मंजुगुंजंतसुरयसणाहं चउच्चिहा-  
उज्जं, एवं च कुणमाणस्स वच्चंति वासरा ।

अन्नया य जिणवंदणवडियाए अणिययविहारेण परियडमाणा समागया सूरसेणा नाम सूरिणो, ठिया य सूरि-  
समुचियपएसे, सुत्तपोरिसीपज्जंते य गया मल्लिजिणाययणं, वंदिया देवा, उवविट्ठा उचियट्ठाणे, काउमारद्धा य  
भवसत्ताण धम्मदेसणा । एत्थंतरे पूयासामग्गिसणाहो समागओ वग्गुरसेट्ठी, जिणपूयं वंदणं च काऊण अल्लीणो  
सूरिसयासे, पणमियं चउणेण से पायपंकयं, दिन्नासीसो य आसीणो महीयले, गुरुणावि तज्जोग्गयाणुसारेण पारद्धा  
धम्मदेसणा । कहं चिय ?—

जिणनाहभुवणकरणं तप्पडिमापूयणं तिसंझं च । दाणंमि य पडिवंधो तिन्निवि पुत्तेहिं लब्भंति ॥ १ ॥

नीसेससोक्खतरुवीयमूलमुद्दामदुग्गइकवाडं । कारिंति मंदिरं जिणवरस्स धन्ना सविभवेणं ॥ २ ॥

तुहिणगिरिसिंगसिंगारहारि जे निम्मवंचति जिणभवनं । ते कह न लीलाएच्चिय चिंतियमत्थं पसाहितिं ॥ ३ ॥

सामन्नेणवि जिणगेहकारणे को मिणिज्ज पुन्नभरं ? । को पुण तम्मिं विहिणा जिन्नंमि समुद्धरिज्जंते ॥ ४ ॥

ता भो महायस ! तए नियमा सम्मं समायरियमेयं । सभुयज्जियदवेणं जिन्नुद्वारो जमेस कओ ॥ ५ ॥

वग्गुर-  
श्रेष्ठिवृत्तं.

॥ २१५ ॥

एयंमि अकीरंते तित्थुच्छेओ जिणे अभत्ती य । साहूणमणागमणं भवाणमवोहिलाभो य ॥ ६ ॥  
 काराविण्ण इमंमी भवजलनिहितरणजाणवत्तंमि । अचंतसंतकंता कारेअवा जिणप्पडिमा ॥ ७ ॥  
 तीसे तिसंझमपमत्तमाणसेहिं परेण जत्तेणं । पूया य विरइयवा सा पुण अट्ठपयारेवं ॥ ८ ॥  
 वासकुसुमक्खणं धूवपईवेहिं वारिपत्तेहिं । फलभोयणभेएहि य जणनयणाणंदजणगेहिं ॥ ९ ॥  
 इय अट्ठविहा पूया कीरंती भत्तीए जिणिंदाणं । तं नत्थि नूण कल्लाणमेत्थ जं नो पणामेइ ॥ १० ॥  
 तथाहि-हरियंदणघणसारुब्भवेहिं गंधेहिं सुरहिगंधेहिं । सवण्णुसिरे निहिण्णहिं होंति भवा सुरहिदेहा ॥ ११ ॥  
 नवमालइकमलकयंवमल्लियापमुहकुसुमदामाहिं । विरयंता जिणपूय धरंति भवा सिवसुहं च ॥ १२ ॥  
 नहरइजलपडिहत्थे जिणपयच्छेत्ते जमक्खया खित्ता । पसवंति दिव्वसुहसस्ससंपयं तं किमच्छरियं ॥ १३ ॥  
 घणसारागुरुधूवो जयगुरुपुरओ जणेण डज्झंतो । उच्छलियधूमपडलच्छलेण अवणेइ पावं च ॥ १४ ॥  
 जे दीवं देंति जिणिंदमंदिरे सुंदराय भत्तीए । ते तिहुयणभुवणब्भंतरेक्कदीवत्तणमुविंति ॥ १५ ॥  
 तिहुअणपहुणो पुरओ ठवेंति जं वारिपुत्तपत्ताइं । तं नूणं पुव्वजियदुहाण सलिलं पयच्छंति ॥ १६ ॥  
 परिपागवससमुग्गयविसिट्ठगंधेहिं तरुवरफलेहिं । जिणपूयं कुणमाणा लहंति मणवंछियफलाइं ॥ १७ ॥  
 वहुभक्खयंजणाउलओयणचरुपागपमुहवत्थूहिं । यन्ना विरइंति वल्लिं सुहनिहिउक्खणणहेउत्ति ॥ १८ ॥

श्रीगुणचंद  
महावीरच०  
६ प्रस्तावः

॥ २१६ ॥

अहवा किमितिणं ? जं किंचिवि अत्थि वत्थु सुपसत्थं । तित्थेसराण तं तं विणिओगे निति कयपुत्रा ॥ १९ ॥  
दाणमवि सुगइसंगमनियाणमनियाणमेव दिज्जंतं । पुत्राणुवंधिरूवं कल्लाणपरंपरं जणइ ॥ २० ॥  
तं पुण तिविहं भणियं अभयपयाणं च नाणदाणं च । धम्मपवत्ताणं पुण तइयमुवट्ठंभदाणं च ॥ २१ ॥  
तत्थाभयप्पयाणं लोइयलो गुत्तरेसुवि पसिद्धं । सत्थावत्थासुंणिवि अनिसिद्धं सिद्धिरसियाणं ॥ २२ ॥  
करिसणमिव कणरहियं नरनाहंपिव विवेयपरिहीणं । एयविउत्तं धम्मं न कयाइ बुहा पसंसंति ॥ २३ ॥  
जं पुण नाणपयाणं दीवोव पयासयं तमत्थाणं । अवजलहिपडियजंतूण तारणे दढतरंडसमं ॥ २४ ॥  
उम्मग्गपयट्ठाणं व विसममिच्छत्तभीमरत्तंमि । सम्मग्गदेसयं सिवपुरीए वरसत्थवाहोव ॥ २५ ॥  
तइयं पुण भेसहवत्थपत्तकंवल्लगपमुहदवेहिं । साहूण धम्मनिरयाण होइ उवट्ठंभकरणेण ॥ २६ ॥  
जं ते महाणुभावा कह दूरविमुक्कसवसावज्जा । सकंति तवं काउं आहारार्इण विरहंमि ? ॥ २७ ॥  
एत्तियमेत्तेणं चिय गिहिणो लंघंति गुरुभवसमुदं । उवयारे जं असणाइएहिं वट्ठंति साहूणं ॥ २८ ॥  
धणसत्थाहिवसेयंसमूलदेवाइणो य जयपयडा । दिट्ठंता निदिट्ठा इत्थं सिद्धंतसुपसिद्धा ॥ २९ ॥  
इय भो देवाणुपिया ! तिन्नि पयत्था मए तुह पसत्था । परिकहिया एएसिं पढमो तुमए सयं विहिओ ॥ ३० ॥  
अन्ने पुण सावगधम्मकुसलबुद्धीहिं जंति काउं जे । सद्धाणनाणसारं ता गिहिधम्मं पवज्जेसु ॥ ३१ ॥

वग्गुर-  
श्रेष्ठवृत्तं.

॥ २१६ ॥

इय गुरुणा निदंसिए वत्थुपरमत्थे जायपवरविवेगो पणमिऊण गुरुणो पयपंकयं सेट्ठी वागरिउं पवत्तो-भयवं !  
सुहु वोहिओऽहं तुम्हेहिं, उवदंसेह मे सावगधम्मं, सिक्खवेह जुत्ताजुत्तं, तओ सूरिणा भेयप्पभेयसाहासहस्ससं-  
कुलो सुहफलोहकलिओ कहिओ वित्थरेण गिहिधम्मकप्पहुमो, पडिवन्नो य भावसारमणेण । तप्पभिइं च अट्ठप्प-  
यारजिणपूयारओ मुणिदाणसमुज्जयचित्तो सावगत्तं पालेइ । पसूए पुत्ते सविसेसं धम्मपरिवत्तो जाओत्ति ।

अन्नया सो पंडुरपरिहियपडो कुसुमाइसमग्गसामग्गीसणाहो सयलपरियणसमेओ पयट्ठो मल्लिजिणपडिमापूय-  
णत्थं, इओ य तघेलं भयवंतं महावीरं नगरस्स सगडमुहुज्जाणस्स य अंतरा पडिमं पडिवन्नं ओहीए आभोइत्ता ईसाण-  
सुरनाहो अणेगसुरकोडिपरिवुडो पंचरायरयणविणिम्मियविमाणारूढो आगंतूण तिकखुत्तो आयाहिणपयाहिणपुरस्सरं  
सहरिसं वंदिऊण अन्नोन्नघडियपाणिसंपुडो भयवओ चरियं गायमाणो सामिणो वयणंभि दिन्नदिट्ठी पज्जुवासमाणो  
चिट्ठइ, वग्गुरसेट्ठीवि भयवंतमइकमित्ता चलिओ मल्लिजिणाययणाभिमुहं, तं च वच्चंतं ईसाणिंदो पासित्ता भणइ-  
भो वग्गुर ! दूरयरदेवा सचोवाया हवंति(त्ति) सचो कओ तुमए लोयप्पवाओ, जं पच्चक्खं तित्थगरं मोचूण पडिमं  
अचिउं वच्चसि, किं न मुणसि जं एस विसमभवावत्तनिवडंतभुवणत्तयसमुद्धरणधीरो सिरिमहावीरो सयमेव इह चिट्ठ-  
इत्ति !, तओ सेट्ठी एवं निसामिऊण जायअतुच्छपच्छायावो मिच्छामिदुक्कडंति भणिऊण तिपयाहिणादाणपुवं जिणं  
वंदइ महिमं च करेइ, सुचिरं च पज्जुवासिऊण जहागयं पडिनियत्ते सुरिंदे मल्लिजिणभुवणंभि वच्चइ ।

श्रीगुणचंद  
महावीरच०  
६ प्रस्तावः

॥ २१७ ॥

जयगुरुवि तत्तो निक्खमित्ता पट्ठिओ तुन्नागसन्निवेसाभिमुहं तस्स य अंतरा तक्कालपरिणिघाणि बह्वराणि स-  
पडिजुत्तमिति, ताणि पुण दोणिवि टप्परकन्नपुडाणि मज्जराणुरूवनयणाणि अइलं वमोद्वपोद्वानि दीहरकंधराणि  
कसिणकुसंठाणसरीराणि अहरसीमासमइकंतदीहरदंताणि, गोसालो पेच्छिऊण जायपरितोसो सहासं भणइ-अहो  
भमिओऽहि पउरजणवएसु नियधम्मगुरुपसाएण, एत्तियकालं परियडंतेण एरिसो संजोगो न कत्थवि पलोइओ ।  
ता नूनं—

तत्तिलो विहिराया जणेऽइदूरेवि जो जहिं वसइ । जं जस्स होइ सरिसं तं तस्स दुइजयं देइ ॥ १ ॥

एवं च पुणो पुणो पुरा ठाऊण समुल्लविंतो जाव न कहंपि विरमइ ताव तेहिं वाढं पिट्ठिऊण वद्धो पक्खित्तो  
य वंसीकुडंगे, तत्थ य उत्ताणो निवडिओ अच्छइ, महया सहेण य वाहरइ, जहा-सामि ! कीस मं उवेक्खह ?,  
एसोऽहं एत्थ वंसकुडंगे निवडिओ बट्टामि, सबहा मोअह इमाओ वसणाओत्ति पुणो पुणो उल्लवंतं तं सो सि-  
द्धत्थो पडिभणइ-भइ ! सयं कडं सयं चेव भुंजाहि, किं मुहा परितप्पसि ?, सामीवि अदूरदेसं गंतूण करुणाए चिर-  
समसुहदुक्खसहणपक्खवाएण तं पडिवालिउमारद्धो, एत्थंतरे तेहिं नायं, जहा-एस कोइ दुट्ठसीलो एयस्स देवज्ज-  
गस्स पीढियावाहगो छत्तधारगो वा होही, तेण एस एयं पडिवालेमाणो निचलो अच्छइ, ता न जुत्तं एयस्स  
धरणंति चिंतिऊण मुक्को गोसालो, मिलिए य तंमि गंतुं पवत्तो जयगुरु । कमेण य पत्तो गोभूमिमि, तत्थ य

भगवतो  
वग्गुरकृता  
पूजा दन्तु-  
रहासेन  
गर्ताक्षेपः  
गोशालस्य.

॥ २१७ ॥

मुलमचरणपाणियत्तणेण गावीओ चरंति, तेण सा गोभूमी वुच्चइ । तत्थ य कलहपियत्तणेण गोसालो गोवालए  
 भणइ-अरे मिलिच्छा ! जुगुच्छणिज्जरूवा ! एस मग्गो कहिं वच्चइ ?, गोवेहिं भणियं-अरे पासंडिया ! कीस अम्हे  
 निकारणं अफोसेसि ?, सो भणइ-दासीपुत्ता ! पसुयपुत्ता ! जइ न मरिसिहिह ता सुट्ठअरं अक्कोसिस्सामि, किं  
 अलियमेयं ?, मिच्छजाइया एरिसगा चेव तुम्मे, किं जहट्ठियंपि न भणिस्सामि ?, को मे तुम्ह पडिभओत्ति,  
 तओ तेहिं समुप्पन्नगाढकोवेहिं मिलित्ता पणिहमुट्ठिलेद्धहिं विद्वित्ता वद्धो वंसीगहणे य पक्खित्तो, तत्थवि पुव्वनाएण  
 करुणाए पहियजणेण विमोइयंमि गोसाले तिहुअणगुरू रायगिहे नयरे अट्ठमवासारत्तं काउमुवसंपज्जइ, विचित्ताभि-  
 गहसणाहं च चाउम्मासखमणं आरंभेइ । तस्स पज्जंते बहिया आहारग्गहणं कुणइ ।

तओ अणिज्जरियं अज्जवि वहुं कम्मं अच्छइत्ति चिंतिऊण पुणोऽवि सामी अत्थारियादिट्ठंतं परिभाविंतो कम्मनिज्ज-  
 रणनिमित्तं अचंतपावजणसंगएसु लाढावज्जभूमिसुद्धभूमिनामेसु मिलिच्छदेसेसु गोसालेण समेओ विहरिओ । तत्थ य  
 ते अणारिया कयाइ असुणियधम्मक्खरा निरणुकंपा लोहियपाणिणो परमाहम्मियासुरसरूवा भयवंतं विहरमाणं  
 पासित्ता हीलंति निंदंति तहाविहप्पयारेहिं विद्वित्ति, साणादओ य दुट्ठसत्ते सामिस्स अभिमुहं मुयंति । अवि य-  
 जह पविरेयणतणुतयतच्छणखारोवलेवपामोक्खं । किच्छविगिच्छं विज्जं कुणंतमभिणंदए रोगी ॥ १ ॥  
 तह जयनाहोवि समग्गमुग्गउवसग्गकारयं लोयं । उवयारिवंधुवुद्धीए वंधुरं पेहइ पहिट्ठो ॥ २ ॥



जेण दरंगुट्टविकिट्टमेरुविस्संडुलं धरावट्ठं । हलहलियसत्तकुलसेलसायरं विरइयं सिंसुणा ॥ ३ ॥  
 सोवि कह अतुलबलसारविक्रमो निक्खिवेण कस्मेण । कीडप्पायकयावयमहह सहाविज्जइ जिणिंदो ? ॥ ४ ॥ जुम्मं ।  
 किंच-जो हरिणा सिद्धत्थो आवयविणिवारणट्टया मुक्को । गोसालगपचुत्तरवेलाए वियंभई सोवि ॥ ५ ॥  
 अन्नं च-जइ किर तिलोयरंगे अतुल्लमल्लोऽवि जिणवरो वीरो । एवंविहावयाओ विसहइ सुपसंतचित्तेण ॥ ६ ॥  
 ता कीस थेवमित्तावयारकरणुज्जएऽवि लोयंमि । मुणियजहट्टियभावा वहंति रोसं महामुणिणो ? ॥ ७ ॥ जुम्मं ।  
 अहवा चुन्निज्जइ थेवघायमेत्तेवि सक्करालेहू । निदुरकालायसघडियदुवणघाएहिं नवि वइरं ॥ ८ ॥  
 अह तिहुयणेकनाहो अणज्जभूमीसु तासु हिंडंतो । पत्ते वासारत्ते नवमेऽनवमासयविहाणे ॥ ९ ॥  
 वसहिं च अलभमाणो सुन्नागारेसु रुक्खमूलेसु । धम्मज्झाणाभिरओ वरिसायालं अइक्कमइ ॥ १० ॥ जुम्मं ।  
 वित्ते य तम्मि सामी सिद्धत्थपुरमागओ, तत्तोऽवि कुम्मारगामं संपट्ठिओ, तस्स य अंतरा तिलछित्तसमीवेण  
 वोलेमाणो पुच्छिओ गोसालगेण सामी-एस तिलत्थंवो किं निप्फज्जिही नवत्ति?, तओ तहाभवियवयावसेण  
 सयमेव भणियं जिणेण-भइ! निप्फज्जिही, परं सत्तवि पुप्फजीवा उद्दाएत्ता एयस्स चेव तिलत्थंवस्स एगाए तिल-  
 संगलिगाए सत्त तिला समुवज्जिस्संति, एयं च असइहमाणेण अणज्जेण तेण अवक्कमित्ता मूलावणद्धभूमिलेट्टुसणाहो  
 समुप्पाडिओ सो तिलत्थंभो, एगंते उज्झिओ य, एत्थंतरे अहासंनिहियदेवेहिं भयवओ वयणमवितहं कुणमाणोहिं

विउधिया घणावली, जायं सलिलवरिसं, समासासिओ तिलथंवओ, तेण पएसेण वेगेण आगच्छमाणीए गावीए खुरेण  
चंपिय मूलविभागो पविट्टो जलसेयसुकुमारे धरणिवट्टे, जाओ दढपइट्टाणो, कमेण परूढाईं मूलाईं, उम्मीलियाईं  
कंदलाईं, पयट्टो फुल्लिउंति । भयवं पुण कुम्मारगामनगरं संपत्तो, तस्स चाहिं सूरमंडलस्सुवरिं निहियदिट्ठी उद्धी-  
कयभुयपरिहो दीहरजडाकडप्पो पयइविणीओ पयइपसमपरो पयइदयादक्खिण्णाणुगओ समारद्धसद्धम्मज्झाणवि-  
हाणो वेसियायणो नाम लोइयतवस्सी मज्झंदिणंसमयंसि आयावेइ । तस्स य उप्पत्ती भन्नइ—

मगहाविसए धणधन्नसमिद्धलोयकलिए गोव्वरगामे आभीरलोयाणं अहिवई गोसंखीनाम कुडुंविओ, वैधुमई  
नाम से भज्जा, सा य अवियाउरी, ताणि य परोप्परं दढसिणेहाणुरायाणि विसयसुहमणुहवंताणि कालं वोलेति, इओ  
य तस्स गामस्स अदूरे खेडयं नाम संनिवेशो, तत्थ य अविगप्पिया सन्नद्धवद्धकवया पउरपहरणसणाहा मिलेच्छाण  
धाडी पडिया, तीए य सो गामो निवाडियारक्खिगजणो लुंदिअधणधन्नकंसदूसो विणिहयपहरणहत्यसुहडसत्थो  
फओ, तओ वंदिग्गहेण लोगं गहिऊण पट्टिया सट्टाणं, एगा य गामइत्थिया तवेले पसूया पइंमि मारिए करक-  
लियवाल्या सुरूवत्तिकाऊण चालिया चोरोहिं, सा य चेडवावडकरत्तणेण न पारेइ सिग्घगईए समागंतुं, तओ तेहिं  
सरोसं भणिया—भदे ! परिचयसु सुयं जइ चिरजीवियत्थिणी, इमं च सुणिऊण अइगरुययाए मरणभयस्स परिचत्तो  
तीए सुओ तरुच्छागाए, गया य चोरोहिं समं, सो य गोसंखिओ गोरूवाइं घेत्तूण पहायसमए समागओ तं पएसं,

श्रीगुणचंद  
महावीरच०  
६ प्रस्तावः

॥ २१९ ॥

दिट्ठो य सो रुक्खच्छायाए पडिपुन्नसवंगोवंगो सस्सिरीओ अक्खयसरीरो बालओ, गहिओ य तेणं, पणामिओ  
नियभज्जाए, भणिया य एसा-पिए! एस तुह अपुत्ताए पुत्तो होही, सम्मं रक्खिज्जाहि, गोसे य पगासियं जहा मम  
महिला गूढगम्भा आसि, सा य संपयं पसूया, दारगो से जाओ, एयस्स चेव अत्थस्स निच्छयनिमित्तं छगलकं वा-  
वाइत्ता लोहियगंधो कओ, सा य सूइयनेवत्थेण ठाविया, वद्धावणयं च विहियं, सम्माणिओ सयणवग्गो, पसारिया  
लोयम्मि वत्ता, निवत्तियाइं छट्ठीजागरणचंदसूरदंसणियमुहाइं किच्चाइं, समुचियसमए ठवियं वेसियायणोत्ति नामं,  
कालकमेण य पत्तो जुवणं, सावि से जणणी चंपाए नयरीए नेऊण चोरोहिं विक्रयनिमित्तं ओड्डिया रायमग्गे, सुरू-  
वत्तिकाऊण गहिया थेरीए वेसाए, सिक्खाविया गणियाण वेज्जं । अविय—  
सुरविलयन्महियविसिट्ठरुवसोहग्गपवरलायन्ना । सुरयण्पवंचकुसला वियक्खणा गेयनट्ठेसु ॥ १ ॥  
उवयारभणियपरिचत्तबोहसमयाणुरुवचेट्ठासु । पत्तट्ठा सा जाया लद्धपसिद्धी य नयरीए ॥ २ ॥  
दंसणमेत्तेणं चिय जणस्स पुवं जणेइ विक्खेवं । किं पुण उब्भडसिंगारसारनेवत्थरुइरा सा ? ॥ ३ ॥  
इओ य सो वेसियायणो अत्थोवज्जणनिमित्तं करेइ विविहवाणिज्जाइं, अन्नया य घयस्स सगडिं भरिऊण वयं-  
सएहिं समेओ गओ चंपानयरिं, तम्मि य समए समारद्धो पुरे महुसवो, पवराभरणरुइरदेहा नियंसियपहाणपट्टणु-  
ग्गयचीरंसुयाइवत्था जहिच्छं तियचउक्कचचरेसु रामाजणेण परिगया विलसंति नायरा, ते य दट्ठण चिंतियमणेण-

तिलस्तम्बः  
वैश्यायना-  
धिकारः

॥ २१९ ॥

अहो एए एवं विटसंति, अहंपि न कीस रमेमि ? , ममावि अत्थि केत्तियमेत्तावि अत्थसंपया, किं वा हमीए रक्खि-  
नाए ? , धम्मट्ठाणदाणमोगोवभोगफलं हि पसंसिज्जइ धणं । जेण भणियं—

ज्ञानं भोगो नाशस्त्रो गतयो भवन्ति वित्तस्य । यो न ददाति न मुक्ते तस्य तृतीया गतिर्भवति ॥ १ ॥

देवात्कृपमपि जाते सति विभवे यस्य नैव भोगेच्छा । दाने च न प्रवृत्तिः स भवति धनपालको मूर्खः ॥ २ ॥

इति परिभाविऊण कओ अणेण सिंगारो, परिहियाइं पहाणवत्थाइं, गओ पेच्छणगे, दिट्ठा य वेसाजणमज्झ-  
गया सयिय पुपमाया , जाओ तीए उवरिमणुरागो, वियंभिओ से पंचवाणोऽवि सहस्सवाणोव मयरद्धओ, सम-  
णियं तंघोलदाणपुपगं से गहणगं, रयणिसमए घणसारुम्मिस्सचंदणरसविलित्तगतो केसपासविणिम्मियकुसुमदामो  
गदियतंघोलपीडओ पयट्ठो तीसे गिहाभिमुहं, एत्थंतरे तत्स कुलदेवया चिंतेइ—अहो अमुणमाणो परमत्थं अकज्जमा-  
गरिउं लग्गो एस वरागो, ता संवोहेमिच्छि विभाविऊण अंतरा सवच्छगाविरूवं विउवित्ता ठिया, वेसियायणस्सवि-  
सिग्गं गच्छमाणस्स लित्तो अमेज्जेण चलणो, जाया से आसंका जहा असुइत्ति, तओ अन्नं विसोहगं किंपि अपाव-  
माणेण तेण तीसे चेव गावीए सन्निहंमि निविट्ठस्स वच्छस्स पट्टीए पारद्धं चलणलूहणं,

तयणंतरं स वच्छो माणुसभासाए पडिभणइ गाविं । अम्मो ! पेच्छसु एयं विगयासंकं ममंगंमि ॥ १ ॥

मिज्झविलित्तं चलणं लूहन्तं चत्तधम्मववहारं । किं कोइ कुणइ कइयावि सुरहिसुए एरिसं हीलं ? ॥ २ ॥ जुम्मं ।

श्रीगुणचंद  
महावीरच०  
६ प्रस्तावः

॥ २२० ॥

गावी वागरइ तओ पुत्तय ! मा वहसु अद्धिं किंपि । अइधम्मववहारा वाहिरो वट्टए एसो ॥ ३ ॥  
वच्छेण भणियम्ममे ! कहमेवं ? , पुत्त ! कित्तिं कहिमो ? । नियजणणीएवि समं जो वासं वंछइ अणज्जो ॥ ४ ॥  
ता वच्छ ! सहसु सवं तं धन्नो एत्तिण्ण जं मुक्को । उज्झियनियमज्जाया किमकज्जं जं न कुवंति ? ॥ ५ ॥  
तावच्चिय तत्तरुई तावच्चिय धम्मकम्मपडिवंधो । लोयाववायभीरुत्तणं च तावेव विप्फुरइ ॥ ६ ॥  
तावज्जवि न विणस्सइ लज्जा जणणी गुणाण सयलाणं । अह साविकहवि नट्टा ता नट्टा कुसलचेट्टावि ॥ ७ ॥ जुम्मं ।  
इय सुरहिं साभिप्पायवयणसंदोहमुल्लवेमाणिं वच्छस्स पुरो दट्ठुं सो सहसा संकिओ हियए, चित्तिउमारद्धो य-  
अहो पढमं ताव इमंपि महअच्छरियं जं तिरिच्छजोणिया होऊण माणुसियाए भासाए संलवइ, तत्थवि नियमाया-  
भिगमलक्खणं दूसणं मे दंसेइ, कहमेवं संभवइ ? , कत्थमम माया ? कत्थ अहं ? कहं संवासो ? , सवं अच्चंतमघडंत-  
मेयं, अहवा होयवमेत्थ कारणेणं, चित्तरुवाइं विहिणो विलसियाइं, संभवइ सवं, अओ पुच्छिस्सामि तं चेव  
वेसाविलयं उट्ठाणवडियंतिभाविऊण गओ तीसे घरं, अम्भुट्ठिओ अणाए दावियं आसणं पक्खालिया चरणा ठियाइं  
खणंतरं अवरोप्परुल्लावेण, अह पत्थावमुवलम्भ पुच्छिया सा अणेण-भइ ! साहेसु कत्थ तुम्ह उप्पत्ती ? , तीए  
सहासं भणियं-जत्थ एत्तियजणस्स, तेण भणियं-अलाहि परिहासेण, अहं सकज्जं पुच्छामि, तीए भणियं-मुद्धो-  
ऽसि तुमं, जेण-

मातुः संग-  
मः गोव-  
त्सोच्छापः.

॥ २२० ॥

नरह नरिंदह रिसिकुलह वरकामिणिकमलाहिं । अचुग्गमणु न पुच्छियइ कओ कुसलत्तणु ताह ? ॥ १ ॥

पंकात्तामरसं शशाङ्कमुदधेरिन्दीवरं गोमयात्, काष्ठादग्निरहेः फणादपि मणिर्गोपित्ततो रोचना ।

कौशेयं कृमितः सुवर्णमुपलाहूर्वापि गोलोमतः, प्राकाश्यं खगुणोदयेन गुणिनो गच्छन्ति किं जन्मना ? ॥ २ ॥

अओ किं तुह एणंति भणिऊण हावभावरूवं महिलाविब्भमं दंसिउमारद्धा, ताहे तेण भणियं-अन्नंपि एत्तियं मोलं दलयिस्सामि साहेहि मे सन्भावं, अइगरुयसवहसावियाऽसि तं, मा अलियमुल्लविस्ससित्ति भणिए जहा-  
वित्तं मूलाओ आरब्भ सव्वं सिट्ठमेयाए, तहावित्तंतनिसामणेण य जाया से आसंका, जइ पुण एयाए जो तरुच्छा-  
याए छट्ठिओ सो अहं चेव होज्जा, एवं च सुरहिवयणंपि घडेज्जा, इमं च परिभाविऊण दुगुणमत्थपयाणं काऊण  
पडिनियत्तो जाव तत्थप्पएसे सवच्छं सुरभिं निज्झाएइ ताव न किंपि पेच्छइ, तओ नायमणेणं-नूणं अहं केणइ  
देवयाविसेसेण इयवइयरेण अकज्जमायरंतो नियत्तिओऽहि । अह सगाडिं घेत्तूण गओ नियगामं, उचियपत्थावे  
अम्मापियरो उट्ठाणपारियावणियं अत्तणो पुच्छिउमारद्धो, ताणि य कहेंति-पुत्त ! अह कुच्छिसंभूओऽसि तुमं,  
मा अन्नहा विकप्पेसु, को पराडिंभरूवाइं परिपालेइ ? तओ सो गाढनिव्वंधेण ताव अणसिओ ठिओ जाव से तेहिं  
कहियं, जाओ तस्स जणणित्ति निच्छओ, गयो य चंपानयरिं, साहिओ तीसे गणियाए वुत्तंतो, जहाऽहं  
सो तुह पुत्तो जो तरुमूले उज्झिओत्ति । तओ सा एवमायन्निऊण सुमरियपुच्चवइयरा विरहदुक्खेण अकज्जपवित्ति-

श्रीगुणचंद  
महावीरच०  
६ प्रस्तावः

॥ २२१ ॥

पारंभसमुल्लवियसवियारवयणविलिएण वाढमब्भाहयां समाणा उत्तरिजेण वयणकमलमवगुंठिऊण दीहरुम्मुकपो-  
कारं रोइऊण विलविउं पवत्ता । कहं चिय ?—

हा पाव दइव निग्घिण निल्लजाणज्ज ! मुक्कमज्जाय ! । किं अन्नो तुह नाही विडंवणाडंवरपवंचे ? ॥ १ ॥

जं कुलविलयामलिणत्तकारिणा उभयलोगदुट्टेण । वेसाभावे विणिम्मियऽम्हि सुकुलप्पसूयावि ॥ २ ॥

तत्थवि न ठिओ तं एत्तिएण घडिअम्हि नियसुएणावि । हा हा गरुयमकज्जं सत्थेसुवि सुम्मइ न एवं ॥ ३ ॥

जइ पुवं चिय पावेहिं तेहिं चोरेहिं विणिहया हुंता । ता किं असच्चमविगोवणिज्जमिममज्ज पेच्छेज्जा ? ॥ ४ ॥

किं कूवयपक्खेवेण अहव उल्लंवणेण साहेमि । सासनिरोहेणं वा लहुं समुज्झामि अत्ताणं ॥ ५ ॥

एवं चिय मेरुगिरिंदविब्भमाओ इमाओ दुक्खाओ । पावाए मज्झ नूणं होही संपइ परित्ताणं ॥ ६ ॥

इय दुस्सहदुहकरवत्तगाढफालिज्जमाणहियया सा । अइसुचिरं विलवित्ता निमीलियच्छी गया मुच्छं ॥ ७ ॥

तारिसं च दट्टूण वेसियायणेण सित्ता सीयलसलिलेण वीजिया दुगुलंचलेण संवाहिया पासवत्तिणा चेडीजणेण,  
कह कहवि लद्धचेयणा संभासिया अणेण—अम्मो ! कीस तावसंभारमुवहसि ?, को एत्थ तुज्झावराहो ?, एसो  
चिय सच्छंदाणिवद्धघडणविहडणरसिगो दइवो एत्थावरज्झइ जो विविहसंविहाणगनेवत्थेहिं नडं व विवसं माणुसं  
विनडेइ, अचंतविरुद्धमवि वत्थुं कारवेइ, अगम्मेणवि सह संगमं संपाडेइ, ता उज्झसु संतावं पडिवज्जसु धीरत्तणं

वैश्यायन-  
मातुर्वैश्या-  
तो मोक्षः

॥ २२१ ॥

दोगुं निवडियसहा, तीए मणियं-पुत्त ! वाढं असहणिज्जमगोवणिज्जं च इममावडियं, इमं च संभरंती वज्जगंठिनि-  
दुरहियत्तणेण चेव जीवामि, न पुण अन्नं किंपि दुज्जम्मजायाए मज्झ जीवियकारणं, संपयं पुण वच्छ ! वंछामि  
अतुच्छवच्छसाहासमुलंघणाइणा सकुलकलंकभूयं जीवियं परिचइउं, अओ अणुमत्तेसु मं, तुमं चेव इयाणिं पुच्छणिज्जो,  
तेण मणियं-अम्मो ! अलं दूरज्जवसाएण, इओ मए वेसाहत्थाओ मोइया समाणी तवनियमेहिं अत्ताणं अत्ताणं  
साहेज्जासि, अपत्तकालजीवियववरोवणं हि दुसियं समयसत्थेसुत्ति संठविऊण बहुदधदाणपुव्वगं मोइया सा वेसासया-  
साजो, नीया सग्गामे दावियं जीवणं ठाविया धम्ममग्गंमि, अन्नया इममेव वेरग्गमुव्वहंतो सो चित्तिउं पवत्तो, जहा-

तिघाववायजलवाहदुलंघणिज्जं, दोगच्चमच्चुमयरज्जसभीममज्झं ।  
संसारसायरमिमं परियाणइत्ता, सत्ता सुहेण निवसंति कहं व गेहे ? ॥ १ ॥  
जे इत्तियंमि न मुणंति किमज्ज होही, सोक्खं व दुक्खमुचियं व तहेयरं वा ।  
संसेवणिज्जमिममन्नयरं च मोहमाहप्पझंपियपहाणविवेयनेत्ता ॥ २ ॥ जुम्मं ।

किंच-कालंमि. तंमि बहुला जइ नो कहेज्जा, संभोगदुव्विलसियं जणणीगयं मे ।  
ता तारिसं दढमकज्जगहं करेत्ता, तिघानलेणवि लभिज्ज न नूण सुद्धिं ॥ ३ ॥  
एवंविहाण विविहाण विडंवणाणं, भोगाभिलासमहमेकमवेमि मूलं ।



श्रीगुणचंद  
महावीरच०  
६ प्रस्तावः

॥ २२२ ॥

ता होउ संपइ इमेण दुगुंछिएणं, सच्चोवहाविरहियं पकरेमि धम्मं ॥ ४ ॥

इति निच्छिऊण बहुप्पयारेहिं गोसंखियं जणणिं च पडिवज्जाविऊण पाणामाए पवज्जाए पवइओ एसो, करेइ विविहे तवोविसेसे, अब्भसेइ निययधम्मसत्थाइं, रक्खेइ पाणिणो, पज्जुवासेइ गुरुणो, लद्धट्ठो य जाओ निययधम्ममग्गंमि । अन्नया सो विहरंतो कुम्मारगामवाहिं ठिओ आयावेइ, एसा वेसियायणस्स उप्पत्ती ॥

तस्स य जडाजूडाओ दिणद्धदिणमणिकिरणपरितत्ता निवडंति धरणीअले जूयानियरा, सो य जीवाणुकंपयाए निवडियमेत्ताओ करेण गिण्हऊण खिवइ जडामउडे, इओ य तेणंतेणं भगवया समं गच्छंतो गोसालो तं दइण अणत्थसीलयाए ओसरित्ता महया सद्देण वागरेइ—भो भो किं भवं मुणी मुणिओ उयाहु जूयासेजायरो?, इत्थी पुरिसो वा?, न मुणिज्जसि सम्मं, अहो ते गंभीररूवत्तणं, एवं च भणिए खमासीलयाए जाव वेसियायणो न किंपि जंपेइ ताव दुव्विणयरसिगत्तणेण तिन्नि वाराओ पुणो पुणो पुच्छिओ गोसालगेण ।

अह तस्स पसमसीलत्तणुणोऽविहु दुट्ठवयणमहियस्स । अइघट्टचंदणस्सव वियंभिओ तिक्कोहग्गी ॥ १ ॥

तो तेणुब्भडजालाकलावपसरप्परुद्धगयणयला । गोसालगदहणत्थं तेउल्लेसा विणिस्सिट्ठा ॥ २ ॥

एत्थंतरे जिणेणं तीसे विज्झवणपचला झत्ति । गोसालगरक्खक्खा सीयल्लेसा पडिविमुक्का ॥ ३ ॥

श्यायनस्य  
प्रव्रज्या  
गोसाल-  
हास्यं तेजो-  
निवारणं.

॥ २२२ ॥

जह तीणें तेउलेसा बाहिरओ वेढिया समंतेण । सिग्घं चिय विज्झाया हिमवुट्ठीएव जलणकणा ॥ ४ ॥

ताहे तिलोफपहुणो अण्णणुरूयं वियाणित्तं रिद्धिं । सो खामित्तं पवत्तो इमाहि वग्गुहिं विणयणओ ॥ ५ ॥

भयवं । न नायमेवं जह सिस्सो तुम्ह एस दुस्सीलो । इण्हिं चिय मुणियमिमं ता इण्हिं खमह अवराहं ॥ ६ ॥

इमं च जंपमाणं वेसियायणं दद्वूण गोसालगेण भणियं-भयवं । किमेस जूयासेज्जायरो उम्मत्तोव पलवइ?, भय-  
वया भणियं-भइ । जया तुमए मम पासाओ ओसरित्ता एसो एवं भणिओ, जहा-किं तुमं मुणिमुणिओ इचाइं,  
तया पढमवेलाए सहित्ता ठिओ, पुणो पुणो तुमए भणिओ समाणो तुज्झ दहणट्ठयाए उग्गं महापमाणं सलिला-  
इसिसिरवत्थुणावि अप्पडिहयसामत्थं तेउलेसं निसिरइ, सा य जावज्जवि तुह देहदेसं ईसि न पावइ ताव मए तप्प-  
डिघायनिमित्तमंतरा ताराहिवहिमसिसिरा सीयलेसा पक्खित्ता, तप्पभावेण य तुह सरीरं तहट्ठियं दद्वूण उवसंह-  
यकोवचियारो ममं पढुच एवं भणित्तं पवत्तो-भयवं । न मुणिओ तुज्झ एस सिस्सो, ता मरसियवो मम दुव्विण-  
उत्ति । इमं च आयत्तिऊण गोसालगो भयसंभंतो-भयवंतं भत्तीए पणमिऊण भणइ-कहं नं भंते । तेउलेसालद्धी  
द्वेज्जा?, भयवया वुत्तं-जे णं गोसालया । छट्ठंछट्ठेणं निरंतरेणं तवोकम्मेणं आयावेइ, पारणगदिवसे य सनहाए  
खुवत्तकुम्मासमुट्ठीए एगेण य सलिलचुलुगेणं जावेइ जाव छम्मासां, तस्स विउला तेउलेसा संपज्जइत्ति । इमं च  
तपिहाणं सम्ममवधारियं गोसालगेणं ।

श्रीगुणचंद  
महावीरच०  
६ प्रस्तावः

॥ २२३ ॥

अन्नया य सामी कुमारगामनयराओ सिद्धत्थपुरंमि संपट्ठिओ, संपत्तो य पुव्वभणियतिलथंवपएसं, तओ पुच्छिओ गोसालगेण भयवं-सो तिलथंवो मन्ने न निप्फन्नो होज्जा?, भगवया भणियं-भद्द! मा एवं उल्लवेसु, निप्फन्नो चेव सो अमुगप्पएसो वट्ठइत्ति वुत्ते गोसालो भयवओ वयणमसद्धंतो गंतूण तस्स एगंते निहितस्स तिल-थंवस्स तिलसंगलियं हत्थेण फोडित्ता तिले पत्तेयं गणमाणो भणइ-नूणं सव्वजीवा एवं परियट्ठिऊण भुज्जो भुज्जो तत्थेव नियसरीरगे उववज्जंतित्ति चादं पउट्ठपरिहारं नियइवायं च सम्ममवलंवेइ । अन्नया य सो तेउलेसासाहणत्थं भयवंतं विमुत्तूण गओ सावत्थिं नयरिं, ठिओ कुंभकारसालाए, कयं छम्मासियमुग्गं तवकम्मं, सिद्धा तेउलेसा, विन्नासिया कूवतडट्ठियाए दासीए सरीरदहणेणं, तओ जायनिच्छओ पमुइयमाणसो अणवरयकोऊहलावलोयणस-यण्हो गामागराईसु परिभमिउमारद्धो ।

अह अन्नया कयाई अट्ठंगनिमित्तसत्थपत्तट्ठा । पासजिणनाहसिस्सा सिढिलियसद्धम्मवावारा ॥ १ ॥  
कोऊहलेण गामागरेसु उस्सिखलं परिभमंता । गोसालगस्स मिलिया जाओ य परोप्परुल्लावो ॥ २ ॥  
सिद्धं च तेहिं गोसालगस्स सनिमित्तसत्थलवमेत्तं । तेणावि सो वियंभइ जणस्स तीयाति सार्हितो ॥ ३ ॥  
पयइइ चिय उट्ठमरसीलयं तस्स को तरइ कहिउं? । पाउब्भूयाइसयस्स किं पुणो पावनिरयस्स? ॥ ४ ॥  
भयवंपि तेण रहिओ हरिणंको इव विडप्पपम्मुक्को । अब्भहियसस्सिसरीओ विहरइ वसुहं विगयमोहो ॥ ५ ॥

गोशालते-  
जोलेश्या.

॥ २२३ ॥

इय निरुपमसंजगभूरिभारधरणेकधीरधवलस्त । वीरस्त भुवणगुरुणो चरिए तइलोकवित्थरिए ॥ ६ ॥  
महुणत्थसत्थसालयगोसालयदुघिणेयपडिचद्धो । वित्थरओ पत्थावो समत्थिओ छट्ठओ एस ॥ ७ ॥ जुम्मं ।  
इति गोसालदुघिणयपडिचद्धो छट्ठो पत्थावो सम्मत्तो ॥  
॥ इति पष्ठः प्रस्तावः ॥

अथ सप्तमः प्रस्तावः

गोसालएण सहियस्त सामिणो संसिया उ उवसग्गा । एगागिणो उ एत्तो जह जाया ते तह कहेमि ॥ १ ॥  
अह पलयपयंडानलाणुरुवधम्मज्झाणनिज्झोसियासुहमलोवलेवो दाहोत्तिण्णजचकंचणच्छाएण पभापसरेण समु-  
ग्गमंतदिणयरनियराउलं दिसियक्कवालं कुणंतो सो महावीरजिणवरो कमेण विहरमाणो वेसालिं नयरिं संपत्तो,  
तत्थ य अहिगयजिणभणियजीवाजीवाइनवपयत्थो विविहाभिग्गहग्गहणनिग्गहियाविरइभावो भवभयारद्धसुविसु-  
द्धाणुपयाइसावगधम्मो सिद्धत्थनरवइवालमित्तो संखो नाम गणराया, सो य भयवंतं पच्चभिजाणिऊण पराए  
मत्तीए महया रिद्धिसमुदएण सक्कारेइ, अह कइवयदिणावसाणे सामी वाणियगामे पट्ठिओ, तस्त य अंतरा रंगं-  
तभंगुरतरंगा महाजलुप्पीलपूरियपुलिणा महिलाहियं व दुग्गेज्झमज्झा रणभूमिच्च कच्छवयमयरहिया गंडईया नाम

महानई, तं च सामी नावाए समुत्तिन्नो समाणो वेलुयापुलिणंसि सुल्लनिमित्तं वरिओ नाविगेहिं, एत्थ य पत्थावे दिणद्धसमओ वट्टइ, खरं तावंति वेलुयं सूरस्स करपहकरा, तीए य संतप्पइ कमलकोमलं चलणतलं जिणस्स । इओ य तस्सेव संखस्स गणराइणो भाइणिज्जो चित्तो नाम द्वयकज्जेण पचंतराइणो समीवे गंतूण नावाकडएण पडिनियत्तो पेच्छइ य तहट्ठियं सामिं, तओ ते दुव्वयणेहिं बहु तज्जित्ता सोयावेइ, महिमं च से करेइ । अह—

सुसमाहियमणपसरो संरक्खंतो चराचरं लोयं । विविहपडिमाविसेसे पइदियहं चेव फासंतो ॥ १ ॥

कत्थइ निंदिज्जंतो उस्सिखलखलजणेण कुविणं । कत्थइ थुणिज्जमाणो नमंतसामंततियसेहिं ॥ २ ॥

कत्थइ पागयजीवियविणासखमतिकखआवयकंतो । कत्थइ अणुकूलजणोह्विहियपूयामहामहिमो ॥ ३ ॥

उभयत्थवि धम्मतुलं व चित्तवित्तिं समं चिय धरंतो । विविहाउ भावणाओ भावितो भमइ वसुहाए ॥ ४ ॥

तस्स य भगवओ अणेगतवोविहाणनिरयस्स न मणागंपि कंपिज्जइ मणो पढमुम्मिल्लमाणसारसहयारमंजरी-  
पुंजपरिमलमिलंतभमिरभमरभमरोलिरोलरमणीएण पल्लविलकंकिलिसरलसल्लईपमुहदुमसंडेण कन्नाडचेडीनिडाल-  
विलुलंतोलयवल्लरीचलणलंपडदाहिणानिलाडंवरिल्लेण पवरनेवत्थकुरंगनिज्जिज्जंतचचरीरवुद्दीरिउद्दाममयरद्धएण महु-  
समएण १ न य पयंडमायंडमंडलुलसियपवलकिरणजालकरालियभुवणंतरालेण तण्हभिभूयवप्पीहगनिवहघोरसर-  
संछाइयावरसदंतरेण खरसमीरसमुद्धुयदुहफरिससकरुकरुवक्कमणदुग्गमेण निदाहकालेण २ न य घोरघोसघणाघण-

गयघडाडोवडरियपथियसत्थेण विप्फुरंतविज्जुपुंजुप्पिच्छपउत्थकामिणीहिययदारिणा पहिड्ढनीलकंठकोलाहलिल्लेण  
 पाउसकालेणं ३ न य विसट्ठकंदोट्टकमलकल्हारपरागधूसरियरायहंसेण परिपक्कसस्ससंपयाभिरामधरणीमंडलेण गइंद-  
 दाणगंधसरिच्छातुच्छसत्तच्छयपुप्फगुच्छुच्छलंतामोयवासियदियंतरालेण सरयकालेण ४ न य फुल्लंतफलिणीमंजरीपुंज-  
 पिंजरियवणविभागेण पहिड्ढपामरारद्धवणमलणुत्तालकंकेल्लिकलकललक्खिज्जमाणगामसंनिविसेण हेमंतागमेण ५ न य  
 हिमनुसारसंमिलियसिसिरसमीरपकंपंतपहियमुक्कसिक्कारकेउणा ठाणठाणपज्जालियग्गिट्टियपासपासुत्तपावासुयनिवहेण  
 परिफुट्टकुसुमट्टहासहसिरुज्जाणाभोगेण सिसिरसमएणंति ६ ।

इय धम्मज्झाणनिवेसगाढवक्खित्तचित्तपसरस्स । छप्पिवि उउणो पडुणो भीयच्च कुणंति न वियारं ॥ १ ॥

एवं च विहरमाणो वाणियगामं नगरमुवागओ, ठिओ य तस्स वहियाविभागे काउसग्गेणं । तत्थ य नयरे  
 आणंदो नाम सावओ, सो य छट्ठंछट्ठेणं निरंतरेणं तवोविसेसेण आयावेइ, तस्स य तवप्पभावेणं ओहिन्नाणं  
 समुप्पन्नं, तयणुभावेण य सो पडिमापडिवन्नं जयगुरुं दट्ठूण अच्चंतभत्तिभरनिब्भरंगो गओ सामिसमीवं, जहा-  
 विहिं वंदित्ता भणिउमाढत्तो य-भयवं ! चिरमहियासिया दुस्सहपरीसहा तुमए, अहो तुम्ह वज्जसारसरीरत्तणं अहो  
 निप्पकंपत्तणं, पत्तं च इमस्स किलेसस्स तुम्हेहिं फलं, जओ कइवयवरिसेहिं केवलणाणमुप्पज्जिहित्ति भणिऊण गओ  
 सगिहं । सामीवि तत्तो निक्खमित्ता सावत्थीनयरीए विचित्ततवकम्मसणाहं दसमवासारत्तं अइवाहिऊण नयरीय

श्रीगुणचंद  
महावीरच०  
७ प्रस्तावः

॥ २२५ ॥

वाहिंमि कयपारणगो साणुलद्धियनामंमि य गामे वच्चइ । तत्थ य भदं पडिमं ठाइ, तहिं च अणसिओ पढमं पुवा-  
भिमुहो एगपोग्गलणिसियदिट्ठी दिवसमसेसमच्छिऊण रयणिंमि दाहिणाभिमुहो ठाइ, तओ अचरेण दिवसं उत्तरेण  
रत्तिं, एवं छट्ठतवोकम्मेण इमं भदपडिमं सम्ममणुपालिऊण सामी अपारिउं चेव महाभदं ठाइ, तीए य पुवाए दिसाए  
अहोरत्तं, एवं चउसुवि दिसासु चत्तारि अहोरत्ताइं, पलंवियभुयपरिहो उस्सग्गेण ठाऊण दसमेण इमं समत्थेइ ।  
पुणो अकयपारणगो सबओभदं पडिमसुवसंपज्जइ, एईएवि पुवाइयासु तमापज्जवसाणासु दससुवि दिसासु उस्सग्गेण  
अच्छइ, नवरं उट्ठदिसाए जाइं उट्ठलोइयाणि दवाणि ताणि ज्ञायइ, अहोदिसाएवि हिट्ठिल्लाणित्ति । एवं एयं वावीस-  
इमेण पज्जंतमुवाणेइ । समत्थियासु य इमासु तिसुवि पडिमासु दठं परिसंतो भयवं, जाए य पारणगसमए पविट्ठो  
आणंदगाहावइस्स गेहे, तवेलं च बहुलियाभिहाणाए दासीए भंडयाणि खणीकरंतीए दिट्ठो जयगुरू, अह तप्प-  
एसं संपत्तस्स तइलोकदिवायरस्स वासियभत्तं पणामियमणाए, सामिणाऽवि असंभंतेण जोग्गंति कलिऊण पसा-  
रियं सभावसोणिमासुभगं पाणिसंपुडं, परमसद्धाविसेसमुवहंतीए दिन्नमेयाए, एत्थंतरे दुक्करतवचरणपज्जवसाणजाय-  
जिणपारणयपहिट्ठहयहियएहिं सुरासुरकिन्नरनिवहेहिं पूरियमंवरतलं, मुक्का य पंचरायकुसुमसमूहसणाहा अद्धतेरस-  
कोडिमेत्ता कणयवुट्ठी, ताडियाइं चउविहत्तूराइं, जाओ य जणाण परितोसो, सा य बहुलिया दासी ण्हाविया  
नरवइलत्तच्छायाए, अवणीयं से दासित्तणं ।

ऋतुपट्टेना-  
नभिभवः  
भद्रादिप्र-  
तिमाः.

॥ २२५ ॥

इय एत्येव भवंमिवि विसिद्धमत्तीएँ पत्तदाणेणं । पाविज्जइ घणरिद्धी समुद्धुरा किं पुणऽण्णभवे ? ॥ १ ॥

एत्तोपिय रुंदोविहु भवन्नवो गोपयं व लीलाए । दुक्करतवविरहेणवि लंघिज्जइ पुन्नवंतेहिं ॥ २ ॥

लब्भइ तिलोयलच्छी लब्भइ सवंपि कामियं सोक्खं । एकं चिय नवि लब्भइ सुपत्तदाणं जयपहाणं ॥ ३ ॥

नाणंपि तपोवि हवेज्ज निप्फलं कहवि दिव्वजोएणं । दिन्नं सुपत्तदाणं वभिचरइ न नूण कइयावि ॥ ४ ॥

इय जाणिऊण कलाणकोसकलणेक्कपचले दाणे । न करेज्जा नणु जत्तं को अत्तसुहं समीहंतो ? ॥ ५ ॥

अह जयगुरु तत्थ पारिएण वहिया विहरिउमारद्धो । अन्नया य गामाणुगामेण गओ बहुमेच्छजणसंकुलाए  
दढभूमीए, तत्थ य पेढालाभिहाणस्स गामस्स वहिया पेढालुज्जाणे पोलासचेइए अट्टमेणं तवोकम्मेणं अपाणएणं  
ईसिं ओणयकाओ अचित्तलुक्खपोगलनिवेसियानिमेसनयणो गुत्तसविंदियगामो सुप्पनिहियगतो अहोपलंविद्य-  
मुयदंडो सुसिलिट्ठसंठवियनिचलचलणो दुरणुचरं कायरनरुद्धोसकरं एगराइयं महापडिममारभेइ । एत्थंतरे  
सोहम्माए सभाए नाणामणिरयणभासुरकिरणपज्जलंतमहंतसिंहासणमुहासीणो अणेगसुरसुरंगणाकोडाकोडिसंवुडो  
किरीडाइवराभरणपहाविच्छुरियदेहो पुरंदरो तहा पडिमापडिवन्नं जयनाहमोहिए पलोइऊण तक्खणविमुक्का-  
सणो अयंतभत्तिभरनिंभरंगो पुणरुत्तनिडालताडियमहीवट्ठो पणमिऊण आणंदसंदोहसंदिरीए सब्भूयत्थगुणगणु-  
न्भासणसमत्थाए परमपक्खवायसुंदराए गिराए सुचिरं संथुणिऊण य निस्सामन्नं सामिणो असामन्नगुणपब्भारं हि-



श्रीगुणचंद  
महावीरच०  
७ प्रस्तावः

॥ २२६ ॥

ययंमि धरिउमपारयंतोव थुणिउं पवत्तो-भो मो तियसा ! एस भगवं महावीरो पंचसमिओ तिगुत्तो अकोहो अमाणो  
अमाओ अलोभो अणासवो अममो अकिंचणो संखोव निरंगणो जच्चकंचणं व जायरुवो जीवोव अप्पडिहयगमणो  
गयणंपिव निरालंबणो समीरणोव अप्पडिवद्धो सायरसलिलं व सुद्धहियओ पुक्खरपत्तं व निरुवलेवो कुम्भुव  
सुगुत्तिदिओ खग्गविसाणं व एगो विहगोव विप्पसुक्को भारुंडपक्खिव अप्पमत्तो मंदरो इव निप्पकंपो सागरो  
इव गंभीरो चंदो इव सोमलेसो दिवायरोव दित्ततेओ कुंजरो इव सोंडिरो पंचाणणोव दुद्धरिसो वसभोव  
जायथामो वसुंधरव सव्वासाविसहो घयमहुसित्तो हुवासणोव तेयसा जलंतोत्ति, तहा एयस्स भगवओ न कत्थइ  
पडिवंधो समुप्पज्जइ, सो य चउव्विहो, तंजहा-दवओ खेत्तओ कालओ भावओ य, तत्थ दवओ माया मे पिया मे  
भाया मे सुहिसयणसंगंथसंथुया मे सच्चित्ताचित्तमीसाणि य दव्वाणि मे, एवं न ममीकारो जाएजा, खेत्तओ य-  
गामे वा नगरे वा रत्ने वा खेत्ते वा खले वा घरे वा अन्नत्थ वा तहप्पगारे पडिवंधो न हविज्जा, कालओ य-  
समए वा आवलियाए वा आणपाणए वा खणे वा मुहुत्ते वा दिवसाइए वा न ममत्तं जाएजा, भावओ य-कोहे  
वा माणे वा मायाए वा लोभे वा पेजे वा दोसे वा कलहे वा अब्भक्खाणे वा पेसुत्ते वा परपरिवाए वा अरइ-  
रइए वा मायामोसे वा मिच्छादंसणसल्ले वा न ममत्तं उप्पज्जेज्जत्ति । तहा एसो भगवं वासारत्तवज्जं अट्ठगिम्हहे-  
मंतियमासेसु गामे एगराइए नगरे पंचराइए ववगयहाससोगभओ निरहंकरो निग्गंथो वासीचंदणकप्पो समत-

पेढालग्रामे  
श्रीवीरका-  
योत्सर्गः.

॥ २२६ ॥

णमणिलेट्टुकंचणो समसुहदुक्खो इहलोयपरलोयअप्पडिवद्धो जीवियमरणेसु निरवकंखी पुव्वज्जियकम्मसंघनिग्घाय-  
णट्ठाए अब्भुट्ठिओ विहरइ । किं च—

एयं महाणुभावं नियधीरिमतुलियतिहुयणजणोहं । नो धम्मज्झाणाओ खमंति संखोहिउं केई ॥ १ ॥

देविंदा तियसा वा जक्खा रक्खा व खयरवग्गा वा । भूया महोरगा वा अणप्पमाहप्पजुत्तावि ॥ २ ॥

अवि चालिज्जइ मेरू पल्हत्थिज्जइ महीवि पायाले । ससिसूरविमाणाणिवि वलिणा केणवि दलिज्जंति ॥ ३ ॥

अवि सोसिज्जंति महण्णवावि बहुमीणमगरभीमावि । न य भगवं चालिज्जइ ज्ञाणाओ तिहुयणेणावि ॥ ४ ॥

इय सोच्चा जायपयंडकोवदट्ठोद्वभीमभिउडिमुहो । दोसाण संगमो इव संगमओ नाम गिच्चाणो ॥ ५ ॥

सुरवइसमाणविभवो तक्कालविमुक्कलज्जमज्जाओ । ववगयविवेयभावो सया अभवो भणइ सकं ॥ ६ ॥

सामि ! किमेवं भण्णह निग्गुणमवि समणयं सुरसहाए । अहवा सच्छंदाविय सोहंति पट्ठण उल्लावा ॥ ७ ॥

सच्चं चिय सुविसुद्धा जइ होज्ज इमस्स कावि चंगिमया । गिहपालणं विमोचुं ता किं पासंड मंडेज्जा ? ॥ ८ ॥

गिहवासाओवि न धम्मकम्ममन्नं वयंति किर कुसला । कीवत्तणेण चत्ते य तंमि किं संसणिज्जमिह ? ॥ ९ ॥

वागरियं जं च तए ज्ञाणाओ एस सुरवरोहिंणि । नो तीरइ चालेउं तंपि न वोचुं खमं तुज्झ ॥ १० ॥

जे लीलाए चिय पाणिपल्लवे संठवंति भूवीढं । गुरुसिहरभरकंतं गोलं व तुलंति मेरुंपि ॥ ११ ॥

श्रीगुणचंद  
महावीरच०  
७ प्रस्तावः

॥ २२७ ॥

वायामेत्तेणवि तिहुयणंपि कुविया खिवंति जमवयणे । निवडियगुणाण सुराण ताण को वहउ समसीसिं ? ॥ १२ ॥  
जइ सदहेसि एयं ता अच्छउ खोभिएण किं इमिणा ? । अह नो ता पेच्छ जहा भग्गपइण्णं नियत्तेमि ॥ १३ ॥  
इय भणिए पुरंदरो विचिंतेइ-अहो महापावपडलविलुत्तविवेओ सवहा एस, अओ जइ एत्थ पत्थावे निवा-  
रिज्जइ ता निच्छियं इमं परिकप्पेज्जा-सुरवइसामत्थेण एस भगवं तवोकम्ममविचलचित्तो कुणइ, न उण सत्ति-  
एत्ति परिभाविऊण ठिओ मोणेणं । संगमयसुरोऽवि अतुच्छमच्छरमुव्वहंतो निवारिज्जमाणोऽवि नियपहाणपरियणेण  
केत्तियमेत्तो एस ? अज्जेव खोभेमि इमंति पइण्णं काऊण नीहरिओ अत्थाणीमंडवाओ, गओ भगवओ समीवं, तओ  
दंसणवसुप्पन्नगाढकोवेण विउंविओ पलयकालोव पवलो धूलिनिवहो, तेण य चलणजुयलाओ आरब्भ जाव अ-  
च्छीणि सवणा य ताव पच्छाइओ, सामी जाओ निरुस्सासो, नवरि तिलतुसत्तिभागमेत्तंपि न चलिओ ज्ञाणाओ,  
अचलियचित्तं च नाऊण कओ अणेण कुलिसकढिणचंडतुंडभीमो पिवीलियासमूहो, सो य लद्धावयासो दुज्जणोव  
जिणं विइविउं पवत्तो, किंतु निब्भग्गजणमणोरहोव जाओ निप्फलो, तओ दुन्निवारे सूइतिक्खमुहे उइंसे पेसेइ,  
तेहिवि अखोभिज्जमाणे भुयणवंधवे घइलाओ चंडमुहमंडलाओ निवत्तेइ, ताहिवि खजमाणसरीरे निप्पकंपे जयनाहे  
निम्मिया पिंगलसरीररुइणो अतुच्छपुच्छविसालिद्धकढिणकंटया विच्छुया, तेसुवि जहासत्तिकयप्पहारपडिहयसामत्थेसु  
पसरंतमच्छरेणं विउंविआ दाढाकडप्पकराला नउला, तेहिंपि अभिभवियं भयवओ सरीरं, न उण ईसिंपि सत्तं,

शक्रप्रशंसा  
संगम-  
प्रतिज्ञा.

॥ २२७ ॥

अह सविसेसवियंभियकोवप्पसरेण तेण तियसेण । मुक्का फुरंतफणरयणभासुरा दुस्सहा भुयगा ॥ १ ॥

चंदणतरुणोघ तणू जिणस्स आवेढियं दढं तेहिं । अइतिक्खदीहदंतग्गदसणतंडवियतुंडेहिं ॥ २ ॥

न मणागंपि विचलियं तिलोयनाहं पलोइउं तियसो । ताहे मूसगनिवहं निवत्तइ दिवसत्तीए ॥ ३ ॥

पुणरवि पयंडदोघट्टघट्टयं तक्खणं पयट्टेइ । उल्लालियसुंडादंडभीसणं सेलतुंगतणुं ॥ ४ ॥

तेणवि विविहकयत्थणविसेससंपीडिएवि देहंमि । धम्मज्झाणाउ जिणो न चालिओ बालमेत्तंपि ॥ ५ ॥

एवं चिय करणीहिवि पिसायनिवहेहिं एवमेव जिणो । खोभेउं पारद्धो तेणं सुरकुलकलंकणं ॥ ६ ॥

अचलंतंमि जिणिंदे करालदंतग्गविसिहभीममुहो । सज्जिज्जइ सहूलो तेण लहुं जिणवरस्सुवरिं ॥ ७ ॥

अइतिक्खनक्खदाढाहिं पीडिउं सोवि जयगुरुं वाढं । विज्झाओ इत्ति पउससमयदुग्गयपईवोव ॥ ८ ॥

इय खलियारणनिवहे पागयजणजीवियंतकरणखमे । पक्खएवि जिणं दट्टुं सुनिचलं दूमिओ देवो ॥ ९ ॥

तओ जहावट्टियरुवं सिद्धत्थरायं तिसलादेविं च विउवइ, ताणि य कलुणाइं विलवंति, भणंति य-पुत्त ! किं तए दुक्करमिममारद्धं ?, उज्झाहि पवज्जं आगंतूण परिपालेह अम्हे, तुह विरहे वञ्छ ! असरणाणि अत्ताणाणि य जायाणित्ति, एएणवि जा न सक्को खोभिउं ताव खंधावारं विउवइ, सो य पेरेत्तेसु आवासिओ जिणस्स, तत्थ सूयारो पत्थरे अलभमाणो जिणचलणोवरि पिढरं ठविऊण हेट्ठा वज्जानलजालणेण रंधिउं पयत्तो, अह तक्कालसवि-

श्रीगुणचंद  
महावीरच०  
७ प्रस्तावः

॥ २२८ ॥

सेससमुच्छलियधम्मज्झाणजलुप्पीलकलोलविज्झाविएव निष्फलत्तणं पाविए तंमि पक्कणं निम्मवेइ, सो य अणेगाइं  
सउणिपंजरगाणि जयगुरुणो सवणे भुयदंडेसु खंधतलंमि जंघाजुयले य ओलंवेइ, तेहिंतो य नीहरिऊण पक्खिणो  
नहसिहाहिं तिक्खग्गचंचुप्पहारेहि य विद्वंति जिणसरीरं, तहावि अखुभिए जयनाहे पइसमयवट्ठंतकोवेणं उप्पा-  
इओ जुगखयसमएव सकरुकरकलुसो खरानिलो, तेणावि समहियं सामिस्स पज्जालिओ कम्मतणगहणम्मि झा-  
णानलो, न उण चित्तसंखोभोत्ति, पच्छा कलंकलियावायं विरएइ, तेणवि चक्काविद्धोव सलिलावत्तनिवडिओव भा-  
मिओ जिणो देहमेत्तेण, न उण चित्तासएणं ।

इय एवंविहतिवोवसग्गकरणेऽवि निच्चलं नाहं । आभोगिऊण चिंतइ संगमओ जायगुरुकोवो ॥ १ ॥

वज्जसरीरो एसो खलीकओऽविहु बहुप्पयारेहिं । नो तीरइ खोभेउं किं काउं जुज्जइ इयाणिं ? ॥ २ ॥

जइ एयमुज्झिऊणं सुरालयं जामि भग्गसपइन्नो । ता सुरवइपमुहेहिं आजीवमहं हसिज्जामि ॥ ३ ॥

किंच-निययस्सवि हिययस्सा नत्थि एवं कयंमि परितोसो । पारद्धवत्थुनिच्चाहणंमि पुरिसाण पुरिसवयं ॥ ४ ॥

अहवा होउ विगोवण निहणं एयं नएमि कूडमुणिं । एयस्स विणासंमी ज्ञाणंमि विणस्सिही नूणं ॥ ५ ॥

एवंपि य निच्चाहियगरुयपइण्णाभरो भविस्सामि । सुरवइपमुहाणमहं अहीलणिज्जो य तियसाणं ॥ ६ ॥

इय निच्छिऊण पज्जलियजलणजालाकलावसंचलियं । विज्जुलयाउलयसमयमेहचंदं व दुप्पेच्छं ॥ ७ ॥

संगमकृता  
उपसर्गः

॥ २२८ ॥

कालायसभारसहस्सकोडिघडणुचभडं महाचकं । जंबुदीवसमुगयवयणं पिहाणं व घेत्तूण ॥ ८ ॥

उत्पइओ संगमओ दूरं गयणं गणं गुणविमुक्को । थालकरो तइलोकं भोत्तुं छुहिओ कयंतोव ॥ ९ ॥

तो तं सुमेरुचुत्तणयं यडमाहप्पपायडं चकं । मुक्कं सव्वससत्तीए तेण जयवंधुणो उवरिं ॥ १० ॥

तेणावि जिणिंदतणू तडत्ति संताडिया गुरुभरेणं । आकरनहं निमग्गा महीए दढवज्जसंकुव ॥ ११ ॥

तत्थवि छजीवहियं झायंतं जिणवरं मुणेऊणं । वेलक्खमुवगओ सो चिंतइ तियसाहमो एवं ॥ १२ ॥

लल्लफक्कपहओवि नेय पंचत्तमेइ जो एस । सो सत्थस्साविसओ ता संपइ किं करेमि अहं ? ॥ १३ ॥

एवंविहोवसग्गा दिट्ठावि हरंति जीयमियराणं । किं पुणं संरीरगोयरमुवागया दुस्सहा नूणं ? ॥ १४ ॥

इइ विगण्णिकुणं एगूणवीसइमोवसग्गपज्जंते जइ पुण अणुकूलयाए खोभिज्जइत्ति जायविच्चमेण संगमएण  
विणिम्मियं नाणामणिकिरणचिचइयं पवरं विमाणं, तंमि समारूढो दिट्ठाभरणपहाविच्छुरियसंरीरो नियंसिय-  
विमलदुगुल्लो दिव्वं सामाणियदेविहिं दंसेमाणो मडुरोहिं वयणेहिं भयवंतं भणिउं पवत्तो—भो महारिसि ! तुट्ठोस्सि  
तुइ सत्तेण तवेण खमाए वल्लेणं पारद्धवत्थुनिवहणेणं जीवियनिरवेक्खत्तणेणं पाणिगणरक्खणुज्जयमणेण य, ता अलाहि  
एत्तो तयकिलेसाणुभावणेणं, जइ भणसि ता पवरसुररमणीजणाभिरामं अणवरयपयट्ठविसट्ठनट्ठं विचित्तसत्तिजुत्ता-  
मरकीरमाणच्छुरियं इमिणच्चियं संरीरेणं तुमं नएमि तियं सालयं, अहवा उत्तरोत्तरभयपरंपरापरुद्धजुराइदोसं-

श्रीगुणचंद  
महावीरच०  
७ प्रस्तावः

॥ २२९ ॥

निवहरहियं एंगतियसुहसणाहं पणामेमि सिद्धिनिवासं, अहवा इहेव धरामंडले मंडलाहिवसहस्ससविणयाणुस-  
रिज्जमाणसासणं पउरकरितुरयरहजोहकोससंभियमेगच्छत्तं संपाडेमि नरिंदत्तणं, वरेसु एणहिं किंपि जं भे रोयइ,  
उज्झसु संखोहं परिचयसु कुवियप्पंति भणिएवि जाव भयवं पलंविमभुओ एगग्गचित्तो धम्मज्झाणपडिवत्तो न  
किंचि जंपइ ताव संगमएण अलद्धपडिवयणेण चिंतियं, जहा-दुविलंघं मयरद्धयरायसासणं, महामुणीणवि कुणइ  
चित्तसंखोहं, ता तस्स सवस्सभूयाओ पेसेमि दिवकामिणीओ, जइ पुण ताहिं हीरिज्जा एयस्स मणंति कलिऊण  
कओ समकालं सवेसिं उऊण समवाओ, तप्पभाविण य फुल्लिया सहयारा पल्लविया कंकिलिणो जायं दुद्धिणं  
पयट्ठो मलयमारुओ उच्छलिओ परहूयारावो मउरिया नीवा पणचिया वरहिणो वियंभिओ य कमलपरिमलो  
जायाइं कासकुसुमपंडुराइं दिसिसुहाइं, मुक्का भगवओ पेरंतेसु दसद्धवत्ता कुसुमवट्ठी, तयणंतरं च विसज्जि-  
याओ विविहसरमंडलपहाणगेयकुसलाओ करणप्पवंचमणहरनट्टविहिवियक्खणाओ वीणावेणुप्पमुहाउज्जसंजुयाओ  
पवरालंकारधारिणीओ तियसविलासिणीओ, संपत्ताओ य जयगुरुसमीवं, सविलासं वियंभिउं पवत्ताओ य,  
कहं चिय ?—

उब्भडसिंगारसनादेहलायन्नजलपवाहेण । सरियव वणाभोगं लीलाए पूरयंतीओ ॥ १ ॥

पम्हलविसालदीहरतरलच्छिच्छोहचक्रवालेणं । दिसिदिसिविसट्टकंदोट्टपयरसंकं कुणंतीओ ॥ २ ॥

चक्रमोचनं  
अनुकूलो-  
पसर्गः,

॥ २२९ ॥

कामोयि कुणंति नमंतसीसनिवडंतकुसुमदामाओ । जिणसंगमसोकखुकंखिरीउ बाढं पयावणइं ॥ ३ ॥  
 काओऽविदु गलियंसुयसंजमणमिसेण पायडिंति पुरो । जयगुरुणो पीवरकणयकलसपरिरेहिणं सिहिणं ॥ ४ ॥  
 मिच्छदियं कारुणियत्तणं तुमं उवहेसि हे सुहय ! । मयणसरजज्जरंगंपि जं न रक्खेसि जुवइजणं ॥ ५ ॥  
 मुंच कढिणत्तणं देहि नाह ! पडिवयणमम्ह दुहियाणं । पेम्मपरायत्तमणं सप्पुरिसा नावहीरंति ॥ ६ ॥  
 तुइ दंसणमेत्तेणवि दसमदसं पाविउव एस जणो । एत्तोऽवि मा उवेहसु एवं तज्जंति काओऽवि ॥ ७ ॥  
 इय सविलासं सुरकामिणीहिं पायडियवहुवियाराहिं । न मणागंपि विचलियं चित्तं ज्ञाणाओ जगगुरुणो ॥ ८ ॥  
 जइ उग्गयंमि सूर अखुभियहियं पलोइउं नाहं । संगमओ हयसत्ती चिंतिउमेवं समाढत्तो ॥ ९ ॥  
 अणुकूलुपसग्गेहिवि न चलइ एसो मुणी महासत्तो । ता किं एत्तो मोत्तुं एयं वच्चामि सुरलोए ? ॥ १० ॥  
 अहया न जुज्जइ इमं काउं मे दीहरेण कालेण । उवसग्गियस्स जइ पुण इमस्स चित्तं पकंपेज्जा ॥ ११ ॥  
 इय कलुसासयगोयरगण तइलोकवंधुणो धणियं । उवसग्गं गामेविहू विहरं परिचत्तभत्तस्स ॥ १२ ॥  
 वालुयपंथ सुभूमे सुछेत्त मलयंमि हत्थिसीसंमि । ओसलिमोसलितोसलिपमुहेसुं संनिवेसेसुं ॥ १३ ॥  
 ते केवि तेण तियसाहमेण विहरंतयस्स उवसग्गा । विहिया अइदुविसहा जे कहिउंपि हु न तीरंति ॥ १४ ॥  
 एएणं चिय ते कारणेण चरिए न एत्थ वित्थरिया । सिद्धंताओ कुसलेहिं किंतु सयमेव नायवा ॥ १५ ॥



श्रीगुणचंद  
महावीरच०  
७ प्रस्तावः

॥ २३० ॥

एवं तदुवसग्गवग्गावि अविचलचित्तो गामाईणं वहिया बहुकालं गमिऊण सामी छम्मासियं पारणयं काउकामो  
समागओ वयगामे गोउलंभि, तत्थ य तद्विसं ऊसवविसेसो, सवत्थ पायसं उवक्खडिज्जइ, तिहुयणेकनाहोऽवि अण-  
वरयमुवसग्गवग्गं कुणमाणस्स संगमयामरस्स जाया छम्मासा नेव उवसग्गेइ संपयं, जइ पुण परिस्संतो सट्ठाणं  
गओ होज्जा, इय विगप्पिऊण पविट्ठो भिक्खानिमित्तं, संगमएणवि तत्थ पत्थावे जहिं जहिं गिहे भयवं वच्चइ  
तहिं तहिं समारंभिया अणेसणा, सामिणाऽवि पउत्तो ओही, सुणिओ य एसो, तयणंतरमद्धाहिं डिओ चेव  
नियत्तिऊण ठिओ पडिमाए, संगमएणावि आभोइओ भयवं,—किं भग्गपरिणामो नवत्ति?, जाव पेच्छइ ताव छज्जीव-  
हियमेव परिचितियंतं जिणवरं, ताहे संखुट्ठो चिंतेइ—जो छहिं मासेहिं भूरिप्पयारोवसग्गेहिं अणवरयं कीरमाणे-  
हिवि न चलिओ सो दीहेणावि कालेण न सक्को चालिउं, निरत्थओ मज्झ उवक्कमो, दीहकालं चुक्कोऽम्हि सुर-  
विलासाणं, अहो नियसामत्थमचिंतिऊण कहं मए अप्पा विनडिओ? । इय बहुप्पयारोहिं नियचिट्ठियं दूसिऊण  
निवडिओ भगवओ चलणेसु, भणिउमाढत्तो य—भयवं! भग्गपइन्नोऽहं, तुच्चे पुण समत्तपइन्ना, अवितहं भणियं  
महाणुभावेण सभागएण सुरवइणा, केवलं दुट्ठु कयं मए जं न तइया सहहियं ।

अलमेत्तो भणिएणं खमेसु मे पुव्वदुक्कडं कम्मं । उवसंतोऽहं संपइ तुह उवसग्गं न काहामि ॥ १ ॥  
ता वच्चसु निस्संकं गामागरपमुहविविहठाणेसु । पविससु भिक्खनिमित्तं किलिस्ससे किं छुहाभिहओ? ॥ २ ॥

अप्सरउप-  
सर्गः व्रज-  
ग्रामेऽप्य-  
शुद्धिः ।

॥ २३० ॥

एतयंतरंमि भणियं जिणेण संगमय ! मुंच मम तत्ति । पत्थावे चिय अम्हे सकज्जकिरियासु वट्टेमो ॥ ३ ॥

इय सोउं जिणनाहं पणमिय परमायरेण संगमओ । अइपावभरकंतोवि पट्टिओ सुरपुराभिमुहं ॥ ४ ॥

इओ य-सोहम्मे देवलोए तंकाळं सवे देवा देवीओ य उच्चिग्गा निराणंदा निरुच्छाहा अच्छंति, सकोऽविय मुक्कविलेयणालंकारो समुज्झियपेच्छणयाइविलासो परिचितेइ—अहो एत्तियमेत्तस्स भगवओ अणत्थसत्थस्स अहं मूलकारणं जाओ, जओ मम पसंसाकुविएण इमिणा सुराहमेण इमं महापावं ववसियंति, एतयंतरे सयलंतइलोयजी-परासिविणासजणियपावपंकविलित्तोव नीसेसावजसपंसुपडलविलुत्तगतोव अकल्लाणावलीकलिओव पणट्ठपुवकंति-पम्भारो पडिभग्गपइत्ताविसेसुम्मिलंतलज्जाभरसंकुचियलोयणो संपत्तो सोहम्मसभाए संगमयाहमो । तं च दट्ठूण पुरंदरो ठिओ परंमुहो, भणिउमारद्धो य—

भो भो सुरा ! निसामह मम वयणं एस संगमयदेवो । चंडालो इव तुम्हं दट्ठुं पि न जुज्जइ कयावि ॥ १ ॥

एएण पावमइणा चिरमवरद्धं निराणुकंपेण । जं अम्ह पूयणिज्जो कयत्थिओ तिहुयणेक्कपहू ॥ २ ॥

जइ ताव इमस्स नत्थि पडिम्भयं भीमगुरुभवार्हितो । ता किं ममवि न भीओ ववसंतो दढमकज्जमिमं ॥ ३ ॥

जह जयगुरुणा निचलसामाइयगुरुभरो समुक्खित्तो । तह किं मएवि जं एस मज्झ संकंपि नो कुणइ ॥ ४ ॥

एएण जिणिंदऽवमाणणेण जणिओ पयंडपावभरो । तुम्हे पुण इत्थ ठिया पाविहिह इमस्स संगेण ॥ ५ ॥

श्रीगुणचंद  
महावीरच०  
७ प्रस्तावः

॥ २३१ ॥

किमहमिमं निग्गहिउं सक्को नेवोवसग्गकालंमि ? । किंतु मुणिस्सइ एसो हरिस्स निस्साए तवइ जिणो ॥ ६ ॥  
पज्जत्तं एत्तो जंपिण्ण निविसयमाणवेह इमं । वरि सुन्न चिय साला मा भरिया चोरवग्गेण ॥ ७ ॥  
इय सुरनाहेण सरोसभासिणा चलणकोडिणा विवसो । निच्छूढो संगमओ एगागी सुरपुरीहिंतो ॥ ८ ॥

एवंविहं च माणमलणं पेच्छिऊण चिंतियं संगमएण—अहो एयाइं ताइं असमिक्खियकयाइं पायडीहवंति संपइ  
दुव्विलसियाइं, इय झूरिऊण सो जाणएण विमाणेण पट्ठिओ मंदिराभिमुहं, तओ अक्कोसिज्जमाणो सुरविलयाहिं  
हीलिज्जमाणो नियपरिवारेण पेळ्ळिज्जमाणो सक्कसुहडेहिं उवेहिज्जमाणो सामाणियदेवेहिं नीहरिऊण सुरपुरीओ  
ठिओ मंदरचूलियाए, तस्स य सागरोवमं सेसमाउयंति । इओ य—से अग्गमहिसीहिं विन्नविओ पुरंदरो—जइ सामि !  
तुम्ह आएसो हवइ ता अम्हे पियमणुसरामो, तओ विसज्जियाओ य इंदेण, सेसो पुण परिवारो पडिसिद्धोत्ति ।

इओ य—भयवं वद्धमाणसामी जायंमि निरुवसग्गे तत्थेव गामे वीयदिवसे पविट्ठो गोयरचरियाए, हिंडंतो य  
समागओ वच्छंवालयेरीगिहे, तओ तीए भत्तिभरनिस्सरंतपयडपुलयपडलाए वासियपायसभत्तेण पडिलाभिओ  
छमासस्स निरसणो भयवं । एत्थंतरे चिरकालजायजिणपारणगदंसणपरितुट्ठेहिं अहासन्निहियसुरनिवहेहिं पहयाइं  
तूराइं मुक्का कणगवुट्ठी परिखित्तो कुसुमनियरो वरिसियं गंधोदयं अहो दाणमहो दाणंति उग्घोसणा कया, तत्थेव  
ताव जाया अदरिदा थेरी । अह सामी निववियसरीरो गओ आलभियाभिहाणं नयरिं, तत्थवि पडिमापडिवन्नस्स

संगमकस्य-  
निर्विषय-  
तादेशः.

॥ २३१ ॥

भक्तिनिम्बरो हरीनाम विज्जुकुमारिंदो तिपयाहिणापुव्वगं निवडिऊण चलणेसु संथवं काजं पवत्तो । कहं?—

जय निजियदुज्जयकुसुमवाण !, अविणस्सरपावियसुहनिहाण ! ।

उवसग्गवेरसमरेक्कधीर !, तुह सच्चं नाउँ जिणिंद वीर ! ॥ १ ॥

संसारजलहिनिवडंतसत्त !, पइं एक्किं रक्खियवहुदुहत्त ।

तुह सुमरणमित्तेवि पावरासि, नासइं तिमिरं पिव रविपयासि ॥ २ ॥

तुह दंसणमेत्तेऽवि जे न बुद्ध, ते तिकखदुक्खलक्खेहिं रुद्ध ।

तुह चलणकमलमुइं कियस्स, भइइं होंति धरणीयलस्स ॥ ३ ॥

स कयत्थ जाय हरिहरिणपमुह, भुवणेसर ! ते तेरिच्छनिवह ।

गिरिकंदरपडिमासंपवन्नु, तुहं दिट्ठु जेहिं जिण ! कणयवन्नु ॥ ४ ॥

तावचिय घोरभवाडवीए, निवडंति जीवा दुहसंकडाए । जावऽज्जवि तुम्ह पयारविंद-सेवं कुणंति नो जिणवरिंद ! ॥ ५ ॥

हिमवंतपमुहकुलपवएसु, खीरोयहिचेइरसायलेसु । गायंति किंति तुह भुवणनाह !, किन्नरसमूह दइयासणाह ॥ ६ ॥

तुह एकह कह वित्यारु पत्त, नीसेसकहंतर जणिहिं चत्त । उइयंमि अहव रविमंडलंमि, खज्जोय न सोहइं नहयलंमि ॥ ७ ॥

इय विज्जुकुमारिंदो थोउं कहिउं च केवलुप्पत्ती । पचासन्नं पच्छा नियमवणं अइगओ नमिउं ॥ ८ ॥

सामीवि सेयवियानयरिमुवगओ, तत्थवि हरिस्सहो नाम भवणाहिर्वई देवो एइ वंदइ य पियं च पुच्छइ, जहा-  
भयवं ! नित्थिन्ना वहुवसग्गा, थेवमियाणि सोढवं, केवलनाणं च लहुं उप्पज्जिहित्ति भणिऊण जहागयं पडिनियत्तो ।  
तिहुयणपह्वि तत्तो विहरिऊण सावत्थीए नयरीए परिसरे पलंवियभुयदंडो ठिओ काउस्सग्गेणं, तम्मि य दिणे  
लोगो सिंगारियसरीरो गहियसुरहिकुसुमदामो विविहविलेवणभरियकचोलयसणाहो खंदपडिमाए पूयणत्थं भयवंतं  
अइक्कमिऊण गंतुं पयट्ठो । सा य खंदपडिमा तवेलं ण्हविया विलित्ता य जावऽज्जवि न समारोविज्जइ रहवरे ताव  
कहं महावीरो विहरइत्ति परिन्नाणनिमित्तं पउत्तो ओही सुराहिवेण, दिट्ठो सो पुरजणो भयवंतं मोत्तूण खंदप-  
डिमाए पूयामहिमं कुणमाणो, तयणंतरं ओयरिओ सुरलोयाओ, अणुपविट्ठो य खंदपडिमं, ताहे पुरंदराहिट्ठिया  
चलिया भयवओऽभिमुहं खंदपडिमा, तं च सयमेव चलंतिं दट्ठूण तुट्ठो लोगो-अहो देवो ! सयमेव रहं आरुहइत्ति,  
खंदपडिमावि रहं मोत्तूण गया भगवओ समीवं, तिपयाहिणदाणपुव्वयं च पडिया पाएसु, भूमितलनिविट्ठा य  
पज्जुवासिउमारद्धा, लोगोऽवि तहाविहमच्छरियं पेच्छिऊण विम्हिया चिंतंति-अहो वंदियवंदणिज्जो एस कोइ  
महप्पा निप्पडिमप्पभावसंगओ य ता सवहा न जुत्तमायरियमहेहिं जं इममइक्कमिऊण गयत्ति अत्ताणं निंदंतेहिं  
सामिणो कया सव्वायरेण महिमा, अह जाए पत्थावे जयगुरू तओ पएसओ निक्खमिऊण गओ कोसंबिं नयरिं,  
तत्थ य उस्सग्गमुवगयस्स जयगुरूणो जोइसचक्काहिवइणो सूरससहरा सविमाणा वंदणत्थं ओयरिया वसुंधरापीठं,

विद्युत्कुमा-  
रेन्द्रस्तुतिः  
स्कन्दप्रति-  
माकृता  
उपासना.

गाढविम्हयक्खित्तनरनियरपलोइज्जमाणा यत्तिपयाहिणापुव्वयं पणमिऊण तइलोक्केकलमलं जयवंधवं, निसन्ना जहो-  
इयद्वाणेषु, पुच्छिया सुहविहारवत्ता, खणमेकं च ते जिणरूवंदंसणसुहमणुहविऊण जहागयं पडिनियत्ता ।

अह जयनाहो गामाणुगामयं विहरिऊण भूवीढं । वाणारसीएँ पत्तो तत्थ य महिओ सुरिंदेण ॥ १ ॥  
पुणरवि रायगिहंमि य फुरंतमणिरयणमंडियसिरेण । ईसाणतियसवइणा थुयमहिओ पुच्छिओ य पियं ॥ २ ॥

महिलानयरीएवि हु पत्तिवजणगेण परमभत्तीए । धरणिंदेण य नागाहिवेण हिट्ठेण पणिवइओ ॥ ३ ॥  
गामागराइसु चिरं विहरिय पत्तंमि वरिसयालंमि । एकारसमे सामी वेसालीएँ पुरीएँ गओ ॥ ४ ॥

तसपाणवीयरहिए थीपसुपंडगविज्जिए ठाणे । चाउम्मासियखमणं पडिवज्जित्ता ठिओ पडिमं ॥ ५ ॥  
भूयाणंदो य तहिं भुयगवई भगवओ भवभएण । भत्तिभरनिब्भरंगो पूयामहिमं पयंटेइ ॥ ६ ॥

अह तत्थेव पुरीए सावगधम्मंमि वद्धपडिवंधो । दक्खिन्नदयापसमाइपवरगुणरयणरयणनिही ॥ ७ ॥  
नामेण जुन्नसेट्ठी सुसावगो वसइ विस्सुयजसोहो । अन्नो मिच्छादिट्ठी अहिणवसेट्ठित्ति नामेण ॥ ८ ॥

एगम्मि वासरंमी कज्जवसा नयरि वाहि नीहरिओ । सो जुन्नसेट्ठी सहो परमवियहो गुणहो य ॥ ९ ॥  
पेच्छइ कंचणसच्छहसरीरकरपसरभरियनहविवरं । नीसेसलक्खणधरं उस्सग्गठियं महावीरं ॥ १० ॥

तं पेच्छिऊण निच्छउमजायसवण्णुनिच्छओ सहसा । हरिसुच्छलंतरोमंचकंचुओ वंदिउं सामिं ॥ ११ ॥

श्रीगुणचंद  
महावीरच०  
७ प्रस्तावः

॥ २३२ ॥

सामीवि सेयवियानयरिमुवगओ, तत्थवि हरिस्सहो नाम भवणाहिवई देवो एइ वंदइ य पियं च पुच्छइ, जहा-  
भयवं ! नित्थिन्ना बह्वसग्गा, थेवमियाणि सोढवं, केवलनाणं च लहुं उप्पज्जिहित्ति भणिऊण जहागयं पडिनियत्तो ।  
तिहुयणपह्ववि तत्तो विहरिऊण सावत्थीए नयरीए परिसरे पलंवियभुयदंडो ठिओ काउस्सग्गेणं, तम्मि य दिणे  
लोगो सिंगारियसरीरो गहियसुरहिकुसुमदामो विविहविलेवणभरियकचोलयसणाहो खंदपडिमाए पूयणत्थं भयवंतं  
अइक्कमिऊण गंतुं पयट्ठो । सा य खंदपडिमा तवेलं ण्हविया विलित्ता य जावऽज्जवि न समारोविज्जइ रहवरे ताव  
कहं महावीरो विहरइत्ति परिन्नाणनिमित्तं पउत्तो ओही सुराहिवेण, दिट्ठो सो पुरजणो भयवंतं मोत्तूण खंदप-  
डिमाए पूयामहिमं कुणमाणो, तयणंतरं ओयरिओ सुरलोयाओ, अणुपविट्ठो य खंदपडिमं, ताहे पुरंदराहिट्ठिया  
चलिया भयवओऽभिमुहं खंदपडिमा, तं च सयमेव चलंतिं दट्ठूण तुट्ठो लोगो-अहो देवो ! सयमेव रहं आरुहइत्ति,  
खंदपडिमावि रहं मोत्तूण गया भगवओ समीवं, तिपयाहिणदाणपुव्वयं च पडिया पाएसु, भूमितलनिविट्ठा य  
पज्जुवासिउमारद्धा, लोगोऽवि तहाविहमच्छरियं पेच्छिऊण विम्हिया चिंतंति-अहो वंदियवंदणिज्जो एस कोइ  
महप्पा निप्पडिमप्पभावसंगओ य ता सवहा न जुत्तमायरियमहेहिं जं इममइक्कमिऊण गयत्ति अत्ताणं निंदंतेहिं  
सामिणो कया सवायरेण महिमा, अह जाए पत्थावे जयगुरू तओ पएसओ निक्खमिऊण गओ कोसंविं नयरिं,  
तत्थ य उस्सग्गमुवगयस्स जयगुरूणो जोइसचक्काहिवइणो सूरससहरा सविमाणां वंदणत्थं ओयरिया वसुंधरापीठं,

विद्युत्कुमा-  
रेन्द्रस्तुतिः  
स्कन्दप्रति-  
माकृता  
उपासना.

॥ २३२ ॥

गाढविम्हयक्खित्तनरनियरपलोइज्जमाणा य त्तिपयाहिणापुच्चयं पणमिऊण तइलोक्केल्लमल्लं जयवंधवं, निसन्ना जहो-  
इयद्वाणेसु, पुच्छिया सुहविहारवत्ता, खणमेकं च ते जिणरूवदंसणसुहमणुहविऊण जहागयं पडिनियत्ता ।

अह जयनाहो गामाणुगामयं विहरिऊण भूवीढं । वाणारसीए पत्तो तत्थ य महिओ सुरिदेण ॥ १ ॥

पुणरवि रायगिहंमि य फुरंतमणिरयणमंडियसिरेण । ईसाणतियसवइणा शुयमहिओ पुच्छिओ य पियं ॥ २ ॥

महिलानयरीएवि हु पत्थिवजणगेण परमभत्तीए । धरणिंदेण य नागाहिवेण हिट्ठेण पणिवइओ ॥ ३ ॥

गामागराइसु चिरं विहरिय पत्तंमि वरिसयालंमि । एकारसमे सामी वेसालीए पुरीए गओ ॥ ४ ॥

तसपाणवीयरहिए धीपसुपंडगविज्जिए ठाणे । चाउम्मासियखमणं पडिवज्जित्ता ठिओ पडिमं ॥ ५ ॥

भूयाणंदो य तहिं भुयगवई भगवओ भवभएण । भत्तिभरनिम्भरंगो पूयामहिमं पयट्ठेइ ॥ ६ ॥

अह तत्थेव पुरीए सावगधम्मंमि वद्धपडिवंधो । दक्खिन्नदयापसमाइपवरगुणरयणरयणनिही ॥ ७ ॥

नामेण जुन्नसेट्ठी सुसावगो वसइ विस्सुयजसोहो । अन्नो मिच्छादिट्ठी अहिणवसेट्ठित्ति नामेण ॥ ८ ॥

एगम्मि वासरंमी कज्जवसा नयरि वाहि नीहरिओ । सो जुन्नसेट्ठी सहो परमवियहो गुणहो य ॥ ९ ॥

पेच्छइ कंचणसच्छहसरीरकरपसरभरियनहविवरं । नीसेसलक्खणधरं उस्सग्गठियं महावीरं ॥ १० ॥

तं पेच्छिऊण निच्छउमजायसवण्णुनिच्छओ सहसा । हरिसुच्छलंतरोमंचकंचुओ वंदिउं सामिं ॥ ११ ॥



श्रीगुणचंद  
महावीरच०  
७ प्रस्तावः

॥ २३३ ॥

सो चिंतितं पवत्तो भिक्खाकालेऽवि नीइ जन्न पहू । पडिमोवगओ चिट्ठइ तं अज्जुववासिओ मन्ने ॥ १२ ॥  
जइ कलंमि य कल्लाणवल्लिकंदो करिज्ज पारणयं । एसो भयवं मह मंदिरंमि ता सुंदरं होइ ॥ १३ ॥  
इय चिंतंतो पइवासरंमि सो पज्जुवासए सामिं । ता जाव चउम्मासक्खमणं पज्जंतमणुपत्तं ॥ १४ ॥  
तो वीयवासरे आगयंमि सुणिऊण पारणगसमयं । सामिं निमंतइत्ता तुरियं गेहं गओ सेट्ठी ॥ १५ ॥  
पगुणीकयाइं तेण य सनिमित्तं पुवकालसिद्धाइं । फासुयएसणियाइं भत्तीए पवरभोज्जाइं ॥ १६ ॥  
एयाइं अज्ज जयवंधवस्स दाहामऽहंति कयबुद्धी । अणिमिसवियसियनयणो जयगुरुमग्गं पलोयुंतो ॥ १७ ॥  
धन्नो कयपुन्नोऽहं सुलद्धनरजम्मजीवियफलो य । होहामि अज्ज नूणं तिहुअणपहुणो पयाणेण ॥ १८ ॥  
चिरभवपरंपरज्जियनिविडासुहकम्मनिगडजडिअस्स । संपज्जइ जइ परमज्जमेव मोक्खो धुवं मज्झ ॥ १९ ॥  
इय चिंतंतो सुविसुज्झमाणलेसो स जायए जाव । ताव पविट्ठो सामिय अहिणवसेट्ठिस्स गेहंमि ॥ २० ॥  
अच्चंतविभववित्थरदप्पगव्वेण सेट्ठिणा तेण । भणिया दासी भद्दे ! समणं दाउं विसज्जेहि ॥ २१ ॥  
तीएविहु तवयणाणुरोहओ चट्ठुएण कुम्मासा । उवणीया दाणत्थं पहुणावि पसारिओ पाणी ॥ २२ ॥  
खित्ता य तीए तयणंतरं च देवेहिं दुंदुही पहया । परिमुक्का वसुहारा चेलुक्खेवो कओ झत्ति ॥ २३ ॥  
घुट्टं च अहोदाणं महया सद्देण पंचवन्नाणं । बुद्धी विहिया कुसुमाण सुरहिगंधुद्धुराणं च ॥ २४ ॥

जीर्णश्रेष्ठि-  
भावना  
नवश्रेष्ठिगृहे  
पारणं.

॥ २३३ ॥

मिलिओ य नयरलोगो रायाविय चिन्हिओ गिहं पत्तो । वित्तंतमिमं पुढो य तेहिं सेट्टी पहिद्वेहिं ॥ २५ ॥  
तेणावि कयडसीलत्तणेण काउं वहुं फडाडोवं । सिद्धं जहा महप्पा एसो परमन्नपाणेहिं ॥ २६ ॥  
सयमेव मए पाराविओत्ति अचंतभत्तिजुत्तेण । एत्तो चिय तियसेहिं घुट्टमहो दाणमेयंति ॥ २७ ॥  
सोगा एयं लोगो रायाविय गाढहरिसपडिहत्थो । तग्गुणगहणं काउं जहागयं पडिनियत्तोत्ति ॥ २८ ॥  
सो पुण पुराणसेट्टी अचंतविसुज्झमाणसुहभावो । दुंदुहिसहं सोचा झडत्ति सोगाउलसरीरो ॥ २९ ॥  
पडिचित्तिउं पवत्तो हाहाऽहं मंदभग्गजणजणगो । जणिओ विहिणा नूणं जस्स घरं लंघिउं नाहो ॥ ३० ॥  
अन्नत्थ पारिओ अज्ज सायरं उवनिमंतिओऽवि मए । अहवा निप्पुन्नाणं न घरे चिंतामणी एइ ॥ ३१ ॥ जुम्मं ।  
अह भयवं पारित्ता गामागरसुंदरं धरावीढं । विहरइ हरियत्तमभरो सूरु इव भवकमलाण ॥ ३२ ॥  
अन्नंमि य पत्थावे समोसढो तत्थ पासजिणसिस्सो । सूरी केवलनाणप्पईवपायडियपरमत्थो ॥ ३३ ॥  
नाउं समोसढं तं नयरिजणो नरवई य हिट्टमणो । वंदणवडियाएँ लहुं समागओ तस्स पासंमि ॥ ३४ ॥  
वंदित्ता भत्तीए उचियट्ठाणंमि सन्निसन्नो य । सुचिरं धम्मं सोउं पुच्छिउमेवं समाढत्तो ॥ ३५ ॥  
भयवं ! एत्थ पुरीए अणेगजणसंकुलाए को धन्नो ? । लहुईकयसंसारो य ? कहसु अइकोउगं मज्झ ॥ ३६ ॥  
तो केवलिणा भणियं अइधन्नो एत्थ जुन्नसेट्ठित्ति । रत्ता वुत्तं किं नणु सामी पाराविओ तेण ? ॥ ३७ ॥

किं वा अद्वत्तेरसुवन्नकोडिप्पमाणवसुहारा । तस्मंदिरंमि पडिया ? अइधन्नो जेण सो जाओ ॥ ३८ ॥  
तो केवल्लिणा भणियं भावेणं तेण तिहुयणेक्कपहू । पाराविओ चिय तहा दाणत्थं कयपयत्तेण ॥ ३९ ॥  
वसुहाराविहु परमत्थओ परं तस्स मंदिरे पडिया । जं सग्गमोक्खसोक्खाण भायणं सो इहं जाओ ॥ ४० ॥

किंच-जइ खणमेत्तं नो दुंदुहीएँ सइं तथा सुणितो सो । खवगस्सेणिं आरुहिय केवलं ता लहु लहंतो ॥ ४१ ॥  
पत्तपहाणत्तणओ कणगं मोत्तूण तेण उ न अन्नं । भाववियलत्तणेण फलमहिणवसेट्ठिणा लद्धं ॥ ४२ ॥  
इय भो देवाणुपिया ! चरणं दाणं च देवपूया य । कासकुसुमं व विहलं सवं चिय भावपरिहीणं ॥ ४३ ॥

एवं केवल्लिणा पन्नत्ते जहागयं गओ सभाजणोत्ति । अलं वित्थरेणं, पत्थुयं भन्नइ-सो महावीरजिणो कमेण  
विहरमाणो गओ सुसुमारपुरं, तत्थ य असोगसंडंमि उज्जाणे असोगपावयस्स हेट्ठओ पुढविसिलापट्टए कयअट्टम-  
भत्तस्स एगराइयं पडिमं पडिवन्नस्स एगपुग्गलनिवेशियानिमेसनयणस्स ईसिपब्भारगयदेहस्स भयवओ चमरो  
नाम असुरिंदो पुरंदरभयविहुरो संखमीणुप्पलोवसोहियं महागउव कमजुयलसरोवरतरुमल्लीणो, अह को एस च-  
मरो ? कहं पुरंदराहितो भयं ? को वा पुवभवे आसित्ति ?, निसामेह

अत्थि गइंदकुलकवल्लिज्जंतमहल्लसल्लईपल्लवो नियसिहरतुंगिमाखलियरविरहपयारो पवरकाणणाभोगभूसियदिसि-  
निवहो विज्झो नाम गिरिवरो, तस्स पायमूले विभेलो नाम सन्निवेशो, तंमि य दयादक्खिन्नसवसोयाइगुणोववेओ

अपरिमियदवसंचओ पूरणो नाम गाहावई परिवसइ, सो य सम्मओ सयणवग्गस्सं वल्लहो नरिंदस्स चक्खुभूओ  
पयइवग्गस्स हिययनिविसेसो धम्मियलोयस्स उभयलोयाविरुद्धेणं ववहारेणं कालं वोलेइ । अत्रया य पच्छिमरयणी-  
समयंमि सुहसिज्जागयस्स निहाविगमुम्मिल्लमाणनयणनलिणस्स जाया से चिंता, जहा—

पुव्वमवे नूण मए दाणं दिन्नं तवं च आयरियं । तस्स पभावेणेसा मणवंछियकज्जनिप्फत्ती ॥ १ ॥

तहाहि—नरवइसम्माणेणं धणेण धन्नेण कोसविभवेण । पुत्ताइपरियणेण य पइदियहमहं पवहामि ॥ २ ॥

पडिक्कलोवि हु लोगो दंसणमेत्तेऽवि होइ अणुकूलो । अनिवारियपसराविहु निवडंति न आवया मज्झ ॥ ३ ॥

ता जावऽज्जवि पुव्वज्जियस्स कम्मस्स कुसलरूवस्स । विज्जइ थेवोऽवि लवो जावऽज्जवि उज्जमो अत्थि ॥ ४ ॥

जाव जणे सम्माणो जाव य रोगादओ न दूमिंति । जाव न विहडइ सरयन्भविन्भमा निच्छियं लच्छी ॥ ५ ॥

जाव न जज्जरइ जरा जाव न जायइ पिण्ण सह विरहो । आणानिहेसम्मि य जावज्जवि वट्टइ कुडुंबं ॥ ६ ॥

ताव पुणोवि हु धम्मं परभवसुहसाहगं उवचिणेमि । नहु कारणविरहेणं कज्जं उप्पज्जति कयावि ॥ ७ ॥

धम्मपभावो एसो जं किर साहारणेऽवि मणुयत्ते । एगे करेति रज्जं अत्रे ते चेव सेवन्ति ॥ ८ ॥

तस्सा सूरम्मि समुग्गयंमि भुंजाविउं सयणवग्गं । ठविउं च गिहे पुत्तं तावसदिक्खं पवज्जामि ॥ ९ ॥

इयं चिंतियंतस्स उग्गओ दिवायरो, तओ निमंतिओ सयणवग्गो काराविओ परमविच्छेदं भोयणं संमाणिओ

श्रीगुणचंद  
महावीरच०  
७ प्रस्तावः  
॥ २३५ ॥

तंवोलाइदाणेण, जोडियकरसंपुडेण भणियमणेण-भो भो सयणा ! निसुणह मह वयणं, एसोऽहं विरत्तो विसयाणं  
पडिनियत्तो गेहवावाराणं पणट्टसिणेहो पियपणइणीपुत्तमित्तपमुहपरियणे, अओ अणुमन्नेह मं दाणिं दाणामाए पवज्जाए  
पज्जज्जमणुगिणिहउं, चिरं एत्थ वुत्थेण य मए जन्न भे सम्मं वट्ठियं तमियाणिं खमणिज्जं, जहा य समोवरि पुवं पक्ख-  
वायमुवहंता एवं मम पुत्तस्स संपयं वहेज्जह, इइ सम्पणयं भणिऊण ठविओ नियपए पुत्तो, समप्पिओ से गेहपरियरो,  
साहियाइं निहाणाइं भलाविओ सयणजणो, अन्नंपि कयं तक्कालोचियं कायवं । अह सोहणतिहिमुदुत्ते विसंव गेहवासं  
परिचइऊण चउप्पुडं दारुमयं भायणं गहाय दाणामाए पवज्जाए पवइओ पूरणो । तं चेव दिवसमारब्भ छट्ठंछट्ठेणं अणि-  
क्खित्तणं तवोविसेसेणं आयावणाभूमीगओ अत्ताणं सोसेइ । पारणगदिवसे य तं चउप्पुडं भायणं गहाय उचावएसु  
गेहेसु मज्झंदिणसमए भिक्खं परिभमित्ता जं पढमपुडए पडइ तं पहियाणं अणाहाणं च देइ, जं दोचे तं कागसुणग-  
पमुहाणं, जं च तचे तं मच्छमगराईणं जलचरजीवाणं पणामेइ, जं च चउत्थपुडए पडइ तं अप्पणा अरत्तदुडो आहारेइ ।

एवंविहदुक्करतवविहाणनिरयस्स निच्चमवि तस्स । न तहा पावविणासो जायइ सन्नाणहीणस्स ॥ १ ॥

जह थेवतवेऽवि जिणिंदमग्गमणुलग्गयस्स साहुस्स । कालायसंपि अहवा रसाणुविद्धं हवइ हेमं ॥ २ ॥

अह तेण दुरणुचरेण चालतवेण अब्भाहओ सो पूरणो लुक्खो अट्ठिचम्ममेत्तगतो चिंतेइ-खीणोऽहमियाणिं, ता-  
जावऽज्जवि अत्थि किंपि पुरिसक्कारपरक्कमविसेसो ताव सयमेव तहाविहभूविभागे गंतूण अणसणं करेमिति विभा-

विकृण चउप्पुडयपमुहउवगरणमेगंते परिचइऊण विभेलगसन्निसेसस्स ईसाणदिसिविभागे गंतूण भत्तं पच्चक्खाइ ॥  
एत्थंतरे चमरचंचा रायहाणी अणिंदा याचि होत्था, सोऽवि पूरणो चालत्तवस्सी बहुपडिपुत्ताइं दुवालस चासाइं  
परियायं पाउणित्ता मासियाए संलेहणाए अप्पाणं झोसिऊणं मओ समानो तीए चमरचंचाए रायहाणीए चमरिंद-  
त्ताए उवचन्नो, तयणंतंरं पंचविहाए पज्जत्तीए पज्जत्तिभावं गओ समानो विविहमणिरयणनियरकिरणविच्छुरियाइं विय-  
सियसरसकुसुमपयरपरिरेहिराइं सविलासधावंतसुरकामिणीललियकरयलुत्तालचालियचामराइं नियभवणंतराइं इओ  
तओ आमोएमाणो वीसंसाए जाव उहुं पलोयइ ताव पेच्छइ सोहम्मदेवलोए सयलदेवरिद्धिसंभारसुंदरिल्ले महमहंतव-  
णसारसंवलियकालागरुवहलधूमपडलिह्ले दुवारदेसनिवेसियवियसियसहसपत्तपिहाणपुन्नकलसे निम्मलमणिभित्तिजो-  
ण्हापणासियसंतमसे रणिरकणयकिंकिणीजालाउलउप्पंतधयवडाडोए ठाणद्धाणपलंवंतमुक्कमुत्ताहलकलावे विवि-  
हमणिरयणविणिम्मवियवरवेइयावेडियपेरंतविभागे सोहम्मवडिंसयविमाणे सोहम्माए सभाए सक्कंसि सीहासणंसि  
निसन्नं चउरासीए सामाणियसहस्सेहिं अन्नाहि य अणेगाहिं देवकोडाकोडीहिं पंजलिउडाहिं पज्जुवासिज्जमाणं  
पहयपडुपडहमुखपमुहतूरनिनायसंवलियतंतीतलतालाणुगयसंगीयपमोवभरनचमाणविलासिणीपलोयणपरं असंभा-  
वणिज्जसुहसंभारमणुभवमाणं सयमेव वज्जपाणिं पुरंदरं, तं च दट्ठूण सामरिसं चिंतियमणेणं—अहो को एस अप-  
त्थियपत्थओ दुरंतपन्तलक्खणो लज्जामजायपरिवज्जिओ सुरकुलकलंकभूओ अपत्तकाले चिय कालवयणं पविसिउ-

श्रीगुणचंद  
महावीरच०  
७ प्रस्तावः  
॥ २३६ ॥

कामो? जो ममावि असुरराइणो सीसोवरि वट्टमाणो दिवाइं भोगाइं भुंजमाणो अणाउलं विलसइत्ति, एवं संपे-  
हिता सामाणियपरिसोववन्नए देवे संसयसएसु आपुच्छणोचिए सदावित्ता भणिउं पवत्तो-भो भो देवाणुपिया!  
को एस दुरप्पा मम सिरोवरि वट्टइत्ति?, ते य सिरसावत्तं करयलपरिगगहियं मत्थए अंजलिं कट्टु विजएणं वट्टा-  
विऊण य सविणयं जंपिउमारट्टा-भो भो देवाणुपिया! एस सुरिंदो सोहम्माहिवई महप्पा महाजुई अपरिभविय-  
सासणो सयमेव विहरइ । तओ तवयणसवणानंतरसमुप्पन्नामरिसवियंभंतभिउडिविकरालवयणो भणिउं पवत्तो—  
भो भो बुहा! किमेवं अट्टिपरकमा मम पुरोवि । कइवयसुरपरियरियं एयं तुम्हे पसंसेह? ॥ १ ॥  
जइ उच्चट्टाणठिओ किमेत्तिएणवि गुरुत्तणमिमस्स? । न हु वरइ तरुसिरत्थो कवोडओ नीलकंठसिरिं ॥ २ ॥  
अहवा तोलिज्जंते तुलाए वत्थुंमि जं हवइ सारं । तं हेट्टच्चिय ठायइ इयरं पुण वट्टई उवरिं ॥ ३ ॥  
एत्तो य लहू एसो अरिट्ठवसएण पाविओ सग्गं । जह कोइ लहइ रज्जं मायंगकुलप्पसूओऽवि ॥ ४ ॥  
भो भो सुचिरं इमिणा सूरविहीणे रणेव सुरलोए । काउरिसेण व सुरसुंदरीहिं सद्धिं सुहं वुत्थं ॥ ५ ॥  
संपइ पुण अवणिज्जइ इमस्स चिररूढदप्पमाहप्पं । दुट्ठा उवेहियवा न हुंति रोगव कुसलाणं ॥ ६ ॥  
तत्थ-जो ववसायं न कुणइ सकमागयसामिभावपरितुट्ठो । स सिरीएवि हु मुच्चइ सो काउरिसोत्ति कलिऊणं ॥ ७ ॥  
इय होउ अज्ज सुरलोयसामिणो माणदलणमलिणत्तं । सहसच्चिय कीरंतं पयडं बलसालिणावि मए ॥ ८ ॥

चमरेन्द्र-  
तपोत्पत्तिः  
सौधर्मेन्द्रं  
प्रति कोपः

॥ २३६ ॥

एवं च चमरासुरिदंस्त अपरिभावियनियभुयवलमाहृषदण्जं पियं परिभाविऊण पयंपियं सामाणियसुरेहिं-देव ! एसो हि परभवोवज्जियविसिद्धपुत्रपगरिससमासाइयपवरलोयरायलच्छिविच्छडो पुरंदरो, तुमं पुण उज्जमववसायवलाइ-गुणगणपरिगओऽवि भवणवासीण अम्हारिसाणं सामी, ता नाह ! भुयसु मच्छरं, उवभुंजेषु तुमं सकमावज्जियं सामि-त्तणं, एसो पुण सुरपुरसंपयं, निरत्थओ एत्थ परोप्परं विरोहो, किं कज्जं संसयतुलावलंविण्ण नियमाहृषेणं ? निउण-बुद्धीए परिचित्तउ सामी । अपरिभावियकयाणं कज्जाणं उवभुज्जंतविसतरुफलाणं व पज्जंतविरसत्तणं, नहु एकासिंपि माणखंडणासमुब्भूओ अवजसपंसू सुकयसहस्सवारिधारावरिसणेणवि पसमिउं तीरइ, ता सामी ! सयमेव मुणइ जमेत्थ जुत्तं, को अम्ह तुमाहितो विवेयभावो ? ॥

इमं च निसामिऊण गरुयामरिसवसविसप्पंतभिउडिभीमभालयलो चमरासुरिंदो समुल्लविउमारद्धो-भो भो सामाणिया ! सुरा निरत्थयं समुबहह परियायपरिणयविवेयविरहियं थविरत्तणं, जेण एवंविहसपहुपराभवपिसुण-वयणनिवहमुल्लवंताण दूरमवक्तंत तुम्ह गरुयत्तणं, गुणा हु गोरवमुवजणिंति, एत्तो धियलहुओऽवि परियाएणं गुणा-हियत्तेण गुरुव घेप्पइ जणेणं, कहमण्णहा अणुमेत्तोऽवि सुचित्तसुंदरयामहग्घाविओ सिरम्मि निहिप्पइ सरिसवो ?, अहवा किमेएण ?, अदिट्ठमहपरक्कमणं तुम्हाणं को दोसो ?, ता साहेह किं हेलाकरयलतालणुडुप्पयंतनिवडंतंहे गंदुएहिं व कीलेमि कुलाचलेहिं उयाहु गयणंगणविसप्पमाणकलोलपेल्लणुल्लूरियतारयविमाणमालं निरुंभेमि पवल-पवणपक्खुभियजलहिजलवेलं ?, अहवा पयंडभुयदंडचंडिमावसपरियत्तियं एगत्तीकरेमि भुवणत्तयं, इइ बहुप्पयारा-



भीगुणचंद  
महावीरच०  
७ प्रस्तावः

॥ २३७ ॥

मरिसभरचित्तवयणाडंवराऊरियभयणभंतुरुच्छलंतपडिसद्वयच्छलेण अणुमन्निउव निग्गओ सकेण सह जुज्झिउं  
सो भयभीयाए सामाणियसभाए, अह ईसिजायविवेगेण पुणो चित्तिं चमरेण—एए मम सामाणियसभावत्तिणो  
असुरा वाढं भायंति पुरंदरस्स, ता सम्मं न मुणिज्जइ कज्जगई, जइ पुण तत्तो हवेज्ज गंजणा अओ तदभिहम्ममा-  
णेण को मए सरणं पवज्जणिज्जोत्ति परिभाविऊण पउत्तो ओही, दिट्ठो य भयवं महावीरो सुसुमारपुरपरिसरतरुसंडे  
पडिमापडिवन्नो, तं च दट्ठूण समुट्ठिओ सयणिज्जाओ, नियंसियं देवदूसं, गओ नाणाविहवयरमयपहरणपडिहत्थाए  
चोप्पालगनामाए पहरणसालाए, कयंतभुयदंडविब्भमं गहियं महप्पमाणं परिहरयणं, तयणंतरं साहिलासं नयणंजलीहिं  
पिज्जमाणो असुरतरुणीहिं किंकायवयावामूढेहिं निरिक्खिज्जमाणो अंगरक्खेहिं दुव्विणीओत्ति उवेहिज्जमाणो  
सामाणियासुरेहिं किंपि भविस्सइ इह इति संसइज्जमाणो भवणवइवग्गेण निग्गओ चंमरचंचारायहाणीओ, वेगेण  
य गच्छंतो संपत्तो भयवओ महावीरस्स समीवं, तिपयाहिणीकाऊण वंदिओ परमभत्तीए, पवत्तो विन्नवेउं, जहा-  
नाह ! तुह पायपंकयाणुभावेण दुल्लहावि पुज्जंति मणोरहा, अओ इच्छामि तुह निस्साए पुरंदरं हयपरक्कमं परिमुक्कप-  
हुत्तणाभिराममियाणिं काउंति भणिऊण अवक्कंतो उत्तरपुरच्छिमंमि दिसिविभागे, समारद्धो वेउव्वियसमुग्घाओ,  
विउव्वियं चेगं महंतं घोरायारं जोयणलक्खप्पमाणमेत्तं सरीरं । तं च केरिसं ?—

उत्तुंगघोरसीसग्गभागघोलंतकुंतलकलावं । अंजणगिरिसिहरं पिव नवमेहसमूहपरियरियं ॥ १ ॥

सामानिक-  
देवोपदेशः  
गमनाय  
वैक्रियं.

॥ २३७ ॥

अशपोरयणकंदरफुरंतदाडाकडप्पदुप्पेच्छं । वयणुच्छलंतपज्जलियजलणजालाकलाविलं ॥ २ ॥

रिसिचक्रमुकउम्मडमुयदंडकंततारयाचक्रं । उरपंजरुंदत्तणपच्छाइयसूरकरपसरं ॥ ३ ॥

गंगीरनाभिमंडलपमुत्तफणिमुक्कफारफुकारं । उद्दामदीहजंधाभरभज्जिरचलणतलदेसं ॥ ४ ॥

कयलिउमणं व ससुरासुरं पि तेलोकमेकहेलाए । भीमाणवि भयजणगं गयणयले पसरियं श्रुति ॥ ५ ॥

एवंविहेण य सरीरेण पहाविओ तुरियतुरियं सुराहिवइसंमुहं, तओ वेगवसवियम्भमाणमुहसमीरपवलत्तणपलट्ठित्थि-  
यसयडंमुहावडंतसुरविमाणो लीलासमुल्लासियचलणकोडिताडियसमुत्तुंगसेलटालियगंडपाहाणपहयभूमिवट्ठो अंजणपुं-  
जमेहसंदोहकलयंठभमरनियरसरिसेण देहपहापसरेण लवणजलहिवेलाजलुप्पीलेणेव पूरयंतो गयणंतरं सरीरगरुयत्तणेण  
भरितोप तिरियलोयं अणवरयगलगज्जिरवकरणेण फोडयंतोव वंभंडभंडोदरं कत्थइ जलवुट्ठिं सुयमाणो कत्थइ रेणुकेरं  
किरंतो कत्थइ तिमिरनियरं निसिरंतो कत्थइ विज्जुपुंजमुग्गिरंतो वाणमंतरदेवे भएण छिन्नधन्नं व कंपयंतो जोइसिय-  
तियसे यित्तासितो फलिहरयणमंवरतले वियट्ठमाणो निमेसमेत्तेण विलंधियसूरसत्तिनक्खत्तमंडलो पत्तो सुरपुरं ।

अह तारिसविगरालरूवावलोयणेण विम्बिया सुरसमूहा, हा किमेयंति समुल्लवंतीउ भयवसविसंडुलगलियनीवी-  
वंधणाओ(जाया)धंभियव विहाविया सुहडसत्था जीवियनिरवेक्खावि संखुद्धा अंगरक्खा चालव विचलत्तणमुवगया  
लोयपाला, किंकायवयाविमूढा जाया सामाणियदेवा, अचंतं चमकिया तायत्तीसा विसरसमारसंतो य नट्ठो एरावणो,

श्रीगुणचंद  
महावीरच०  
७ प्रस्तावः

॥ २३८ ॥

चमरिंदो पुण एगं चरणं पडमवरवेइयाए अवरं च सुहम्माए सभाए ठविऊण फलिहरयणेणं महया संरंभेण तिवखुत्तो  
इंदकीलं ताडिऊण सरोसं एवं भणिउं पडत्तो-भो भो तियसाहम ! कहिं सो सगिहसच्छंदलीलाविलासलालसो  
असमिक्खियवत्थुसमत्थणवियक्खणो नियसोंडीरिमावगन्नियसेससुहडलोगो अदिट्टकुसलमेत्तसंभावियसमग्गवेरिव-  
ग्गविजओ पुरंदरो ? कहिं वा अलियवियद्धिमावगणियजुत्ताजुत्तसमायारो सकज्जपसाहणामेत्तपयासियसामिसेवा-  
पराओ ताओ चउरासीइं सामाणियसाहस्सीओ ? कत्थ वा निप्फलकलियविविहपयंडपहरणाडंवरओ चत्तारि ताओ  
चउरासीओ आयरक्खदेवसाहस्सीओ ? कहिं वा उत्तुंगगिरिसिहरदलणदुल्ललियं तमियाणिं कुलिसं ? , कत्थ वा ताओ  
अप्पडिमरूवलायन्नमणहराओ अणेगाओ अच्छरकोडीओ ? अरेरे मा कज्जविणासंमि भणिस्सह जहा चमरचंचा-  
राइणा अमुणियपयप्पयारेण छलेण विणिहया अम्हे, एसोऽहं संपयं तुब्भे अणाहे जरतरुं निम्मूलमुम्मूलेमि सक-  
रालेहुं व फलिहरयणेण चूरेमि, किं बहुणा ? , जुगवमेव सरणविरहिण कीणासवयणकुहरे पक्खियामि, कुणह जमिह  
कायवं सरेह सरणिज्जं मग्गह सजीवियसंरक्खणोवायं, अहवा दूरुन्नामियउत्तिमंगादंसियसब्भावसारा समप्पह  
सुरलोयसिरिं, किं निरत्थयमुवहह पुरंदरपक्खवायं ? , पयडोच्चिय एस ववहारो-जं चिरकालपरिपालियावि कुलंगणा  
कालंतरेऽवि नूणमणुसरइ पाणनाहं । अन्नं च—

अववइणव पुरंदर ! मह विरहे जं तए इमा भुत्ता । विणयपणयस्स तं पुण तुह सवमहं खमिस्सामि ॥ १ ॥

शकेन्द्रा-  
दीनां  
तिरस्कारः

॥ २३८ ॥

सुमिणेवि अदिट्ठभया नियनियभवणोदरेसु यं निलुक्का । विलसंतुं सुरसमूहां मम पयपणइप्पसाएणं ॥ २ ॥

अणुरूपपइसमागमपमोयभरनिस्सरंतपुलइल्ला । सुरपुरलच्छी वञ्छत्थलंमि कीलउ जहिञ्छं मे ॥ ३ ॥

अहवा किमिच्छिणं ?-मम बाहुपंजरंतरमल्लीणं तिहुअणंपि नीसेसं । आचंदकालियं वसउ मुक्कपरचक्कभयसंकं ॥ ४ ॥

इय ताव कुण पणामं सुरिंद ! नो जाव उत्तिमंगंमि । मोडियमउडकडप्पं निवडइ निविडं फलिहरयणं ॥ ५ ॥

असमिक्खियनियभुयविक्रमो तुमं जुज्झुउं मए सद्धिं । रंभातिलुत्तमाईण कीस वेहवमुवणेसि ? ॥ ६ ॥

पढमं चिय कीरंते नयंमि नो दित्ति दूसनं कुसला । कहविहु कज्जविणासे पञ्चायावोऽवि नो होइ ॥ ७ ॥

एवं च असमंजसपलाविणं चमरमसुरिंदं निसामिऊण हेलए तिक्ककोवभरउक्कुट्ठभिउडिभंगुरियभुमयभीसणपलो-  
यणेण भणियं पुरंदरेण-रे रे दुरायारसिरसेहर दूरपरिमुक्कमेर चमरासुराहम दुट्ठचिट्ठिमामित्तवित्तासियतियससत्थ !  
पत्थेसि नूणमियाणिमपत्थणिज्जं ?, कहमन्नहा तुहेहागमणविसओ संभविज्जा ?, ता रे वारणोव ससरीरसंभवेण दसणा-  
इणा सुरहिक्क केसकलावेण सारंगोव कत्थूरिगाए चंदणतरुव सोरब्भेण भुयंगमोव फणारयणेण एस तुमं नियदप्पेण  
पणामिज्जसि विणासगोअरंति भणिऊण सिंहासणगणं चिय सुरिंदेण सुमरियं वज्जं, तं च सुमरणानंतरमेव उक्का-  
सहस्साइं विणिम्मुयंतं जालाकलावं निसिरंतं जलणकणकोडीओ विक्खिरमाणं फुल्लिंगमालासहस्सोहिं चक्खुवि-  
क्खेवमुप्पाएमाणं असेसहुयवहनिवहनिम्मियं व सयलसूरकरनियरविरइयं व समग्गतेयलच्छिविच्छइसंपिंडणुप्पाइयं

श्रीगुणचंद  
महावीरच०  
७ प्रस्तावः

॥ २३९ ॥

व ठियं करयले पुरंदरस्स, मुकं च तेण, तं च तहाविहमदिट्ठपुवं वेगेणागच्छमाणं पेच्छिऊण संभग्गसमरमच्छरुच्छाहो  
सुमरियसामाणियासुरसिक्खावयणो वयणविणिस्सरंतदीहनिस्सासो पुत्तेहिं जइ परं पावेमि रसायलंति कयसंकप्पो  
संभमुप्पिच्छतरलतारयच्छिविच्छोहसंवलयनहंगणाभोगो कहिंपि अत्ताणं गोविउमपारयंतो भयवसपकंपमाणपाणिसं-  
पुडपडियं फलिहरयणंपि अविगणंतो अविमुणियतक्कालोचियकायवो अलाहि सेसोवाएहिं, परं तिहुयणपहुणो पाय-  
पंकयमियाणिं सरणंति सुमरिऊण उड्डुचरणो अहोसिरो वेगगमणसमुप्पन्नपरिस्समनिस्सरंतकक्खासेयसलिलोव उ-  
किट्ठाए चवलाए [दीहाईए] गईए जिणाभिमुहं पलाइउं पवत्तो, अविय—

निदलियदप्पविभवत्तणेण जायं न केवलं तस्स । लहुयत्तं देहेणवि वेगेण पलायमाणस्स ॥ १ ॥

एसो सो किं वच्चइ जेण तहा जंपियं हरिसमक्खं । पहसिजंतो इय दिन्नहत्थतालेहिं तियसेहिं ॥ २ ॥

तह कहवि देहपब्भारभरियभुवणोदरोऽवि चमरिंदो । तवेलं लहु जाओ जह न मुणिज्जइ पयंगोव ॥ ३ ॥

तं च कुलिसं सुरवइपयत्तपक्खित्तं जलणजालाकलावाउलियदिसामंडलं कवलयंतं व एकहेलाए सयलमाखंडल-  
पडिवक्खं जावऽज्जवि थेवमेत्तेण न पावइ सिरमंडलं ताव भयगग्गरसरो-भयवं ! तुमभियाणिं सरणंति जंपमाणो  
पविट्ठो जयगुरुणो उस्सग्गट्ठियस्स चरणकमलंतरे चमरो एत्थंतरे सहस्सनयणस्स जाओ चित्तसंकप्पो—अहो न खलु  
दणुवइणो अप्पणो सामत्थेण सोहम्मकप्पं जाव संभवइ आगमणं, केवलं भगवंतं तित्थयरं अरिहंतवेइयं वा भावि-

चमरेन्द्रे  
वज्रमोचनं.

॥ २३९ ॥

अप्पं मुसमणं वा निस्साए काऊण इहागओ हविज्जा, ता वाढं अजुत्तं परभवदुहावहं एवमावडिहित्तिचित्तिऊण  
पउत्तो ओही, दिट्ठो य भयवओ पायपंकयमणुसरमाणो कुंथुव सुहुमदेहो चमरासुरिंदो, तं च दट्ठूण सहसच्चिय  
जायचित्तचमकारो हाहा हओ म्हि मंदभग्गोत्ति वाहरमाणो अचंतसिग्घाए गईए वज्जमग्गेण पहाविओ पुरंदरो,  
जाय य जिणुत्तमंगंमि चउरंगुलमपत्तं जायं वज्जं ताव तक्खणमेव पडिसंहरियमणेण, नवरं अइसिग्घगमणवसेण  
करयलसमीरणेण तरलिया जयगुरुणो कुंचिरा अग्गकेसा, तओ पुणो पुणो सदुच्चरियं निंदमाणेण तिपयाहिणी-  
काऊण वंदिओ सामी परमभत्तीए, खामिउमारद्धो य—

देव! पसीयह न मए वियाणियं तुम्ह चरणनिस्साए । जं एसो चमरिंदो समागओ मं पराभविउं ॥ १ ॥

इण्हि चिय विन्नायं करयलपल्हत्थियंमि कुलिसंमि । ता पणयवच्छल ! लहुं अवरहमिमं खमसु मज्झ ॥ २ ॥

न पुणोवि भुवणवंधव ! संसारपरंपरापरमवीयं । एवंविहं अकिच्चं कइयावि अहं करिस्सामि ॥ ३ ॥

इति सविणयं खामिऊण जयगुरुं सक्को उत्तरपुरच्छिमदिसिविभागंमि ठाऊण वामेण चरणेण तिक्खुत्तो भूमि-  
तलमवदालिऊण दणुनाहं भणिउं पवत्तो—भो भो असुराहिव ! सुंदरं तुमए कयं जमसेसजयजंतुसंरक्खणेकदिक्खि-  
यस्स पडुणो पयपंकयंतरे तिरोहिओऽसि, एवं च कुणमाणेण तए दढमावज्जियं मम हिययं, अवणीओ पुववेरा-  
णुवंधो, जणिओ आमरणंतं अवभिचरियपणयभावो, ता विहरसु जहिच्छाए, भगवओ पहावेण नत्थि तुह ममा-

श्रीगुणचंद  
महावीरच०  
७ प्रस्तावः

॥ २४० ॥

हिंतो भयंति आसासिऊण जहागयं पडिनियत्तो तियसाहिवो ।

चमरोऽवि हरिसुक्करिसवियसंतवयणकमलो भगवओ पायकप्पपायवप्पभावपरिगगहिओ निरुवसग्गं नीहरिऊण  
जहाचिहिं भयवंतं पणमिऊण थुणिउमाढत्तो—

सयलजयजीवबंधव ! ज्ञाणानलदड्ढकम्मवणगहण ! । तिव्वपरीसहसहणेक्कधीर ! जय जय महावीर ! ॥ १ ॥

सिद्धिवहुवद्धपडिवंध ! वुट्टसद्धम्मबंधुरनिहाण ! । चामीयरसरिससरीरकंतिविच्छुरियदिसिनिवह ! ॥ २ ॥

नाह ! तुह पायछायालीणं नो भवभयंपि अक्कमइ । किं पुण सहावभंगुरगिरिदलणुइंतुरं कुलिसं ? ॥ ३ ॥

जत्थ तुह नाह ! सरणं उवेइ ससुरासुरंपि तइलोकं । पायतले तत्थ ठियस्स कह णु वयणिज्जया मज्झ ? ॥ ४ ॥

पत्तच्चिय सुरपुरसंपयावि परमत्थओ मए देव ! । अब्भुदयमूलवीयं जं पत्तं तुम्ह पयकमलं ॥ ५ ॥

लब्भंति सामि ! जइ मग्गियाइं निरवग्गहाइं भत्तीए । पइजम्मं चिय ता तुम्ह चलणवासं लभेज्जमहं ॥ ६ ॥

इय चमरिंदो सव्भावसारवयणेहिं संथुणिय वीरं । नित्थरियगरुयहरिभयमहन्नवो अइगओ सपुरिं ॥ ७ ॥

जयगुरूवि पभायसमए एगराइयं महापडिमं पडिसंहरिऊण निक्खंतो सुंसुमारपुराओ, कमेण य पत्तो भोगपुरं नयरं,  
तत्थ य महिंदो नाम खत्तिओ अकारणसमुप्पन्नतिव्वकोवाणुबंधो भयवंतं दट्ठूण खज्जूरितरुलट्ठिसुग्गीरिऊण धाविओ  
वेगेण हणणनिमित्तं, एत्थंतरे चिरदंसणपाउब्भूयभत्तिपब्भारो समागओ तं पएसं सणंकुमारसुराहिवो, दिट्ठो य

वीरशरणं  
चमरमुक्तिः  
चमरकृता  
वीरस्तुतिः.

॥ २४० ॥

सो तहाविहवेगेण जिणाभिमुहं इंतो, तओ तं निवारिऊण सुरिंदेण पणमिओ जयगुरू, पुच्छिया परीसहपराजय-  
पहाणसरीरवत्ता, गओ य जहाभिमयं ।-भयवंपि वद्धमाणो पलीणमाणो सुरिंदकयमाणो । तत्तो विनिक्खमित्ता  
नंदिग्गामं समणुपत्तो ॥१॥ नंदीनामेण तहिं पिउमित्तेणं थुओ य महिओ य । तत्तो य नीहरित्ता समागओ मिंढय-  
ग्गामं ॥२॥ तत्थ य गोवो कोवेण धाविओ वालरज्जुयं धेत्तुं । जयगुरूणो हणणत्थं, सो य निसिद्धो सुरिंदेण ॥३॥

अह भयवं गामाणुगामगमणेण पत्तो निरंतरधवलहरमालालंकियं सुविभत्ततियचउक्कचचररेहिरं कोसंविपुरिं,  
तत्थ य भूपालणगुणनाडीनिविडनिवद्धविपक्खरायलच्छिकरंणुगो सयाणिओ नाम नराहिवो, तस्स य चेडगमहा-  
नरिंददुहिया अहिगयधम्मपरमत्था तित्थयरपायपंकयपूयणपरायणा मिगावई नाम भारिया, सुणियनिसेसरायं-  
तरचारो सुद्धुमबुद्धिविभवपरिवालियरज्जभारो सुगुत्तो य अमचो, तस्स य सयावि जिणधम्माणुरागसंभिन्नसत्तसरी-  
रधाऊ नंदा नाम भज्जा, सा य सावियत्ति काऊण मिगावईए देवीए सद्धिं वयंसियाभावं दंसेइ, अन्नो य सयलदरिसणभि-  
प्पायपरूवणानिरओ नरिंदसम्मओ तच्चावाई नाम धम्मपाढओ, तहा तत्थेव नयरीए विवणिजणचक्खुभूओ धणावहो  
नाम सेट्ठी, मूला य से भारिया, एयाणि नियनियकुसलाणुट्ठाणसंगयाणि वसंति, तत्थ य भयवया पोसवहुल-  
पाडिवए एवंविहो दुरणुचरो अभिग्गहो पडिवन्नो, जहा-जइ कालायसनियलवद्धचलणा अवणीयसिरोरुहा सोय-  
भरावरुद्धकंठगग्गरगिरं रुयमाणी रायकन्नगावि होऊण परगिहे पेसत्तणं पवन्ना तिन्नि दिणाइं अणसिया घरब्भंतर-



निहितेकचलणा वीयचलणलंधियघरदुवारदेसा पडिनियत्तेसु सयलभिक्खायरेसु सुप्पेण कुम्मासे पणामेइ ता परमहं पारेमिति कयनिच्छओ पुरजणेण अणुवलक्खिज्जमाणाभिग्गहविसेसो वावीसपरीसहसहणट्ठाए असंपज्जंत- जहिद्वियभोयणोऽवि पइदिवसं उच्चावएसु मंदिरेसु पयत्तो परिभमिउं जयगुरू । पुरजणोऽवि भयवंतं अगहियभि- क्खं अणुदिणं गेहंगणाओ चेव नियत्तमाणं पेच्छिऊण अचंतसोगसंभारतरलियमाणसो किंकायवयावामूढो चिंति- उमारद्धो, कहं?—

किं दुहनिबंधणेणं धणेण? किं तेण मणुयभावेण? । भोगोवभोगलीलाए ताए किं वा दुहफलाए? ॥ १ ॥  
जइ एवंविहमुणिपुंगवस्स गेहंगणं उवगयस्स । पाणन्नपयाणेणवि उवयारे नेव वट्ठामो ॥ २ ॥ जुम्मं ॥  
कह वा कम्मजलाउलमणेगदुहमयरभीसणावत्तं । संसारसायरमिमं दाणेण विणा तरिस्सामो? ॥ ३ ॥  
अहवा धन्नाण गिहे पविसइ एवंविहं सुमुणिरयणं । भिक्खापरिग्गहेण य अइधन्नाणं जणइ हरिसं ॥ ४ ॥  
जइ एकं चिय वेलं कहमवि पडिलाभिओ हवइ एसो । ता पाणिपल्लवे संवसंति सुरमोक्खसोक्खाइं ॥ ५ ॥  
इय जह जह जिणनाहो भूरिपयारेहिं दिज्जमाणंपि । भिक्खं नो अभिकंखइ तह तह खिज्जइ पुरीलोगो ॥ ६ ॥  
एवं च चत्तारि मासे कोसंबीए हिंडमाणो भयवं अन्नया पविट्ठो सुगुत्तमंतिणो भवणं, दूराओ चिय दिट्ठो सुनं- दाए, पच्चभिन्नाओ य जहा सो एस भयवं महावीरसामिति, तओ अणाइक्खणिज्जं पमोयपब्भारमुव्वहंती उट्ठिया

झडत्ति आसणाओ, नीणिया परमायरेण भिक्खा, भयवंपि निग्गओ गेहाओ, सुनंदावि अद्धिइं काउमारद्धा, ताहे दासीहिं भणियं-सामिणि ! एस देवज्जओ न मुणिज्जइ केणइ कारणेणं दिणे दिणे अगहियभिक्खो तक्खणे पडि-  
नियत्तइ, एवं भणिए तीए नायं, जहा-नूणं कोइ अभिग्गहविसेसो, तेण तंमि असंपज्जमाणे अकयकज्जो चेव निज्जाइ जिणिंदो, इमं च से चिंतयंतीए जाओ बाढं चित्तसंतावो पम्हुट्ठा गेहवावारा विमुमरिओ सरीरसिंगारो पल्हत्थियं  
करकिसलए गंडयलं, एत्थंतरे समागओ सुगुत्तामच्चो, पलोइया य एसा तेण, तओ पुच्छिया, जहा-कमलमुहि !  
कीस निक्कारणं रणरणयमुच्चहंतिच्च लक्खिज्जसि ?, न ताव सुमरेमि मणागंपि अत्तणो अवराहं, मइ अविणयपरि-  
हारपरायणे परयणोऽवि न संभाविज्जइ तुह पडिकूलकारित्ति, तीए भणियं-पाणनाह ! अलमलियसंभावणाहिं,  
नत्थि येवमेत्तोऽवि कस्सइ अवराहो, केवलं जस्सप्पभावेण लीलाए लंघिज्जइ दुग्गमोचि भवन्नवो मणोरहागोयरंपि  
पाविज्जइ अपुणागमं सिवपयं अइदूरुल्लसिओऽवि विद्विज्जइ अकल्लाणकोसो तस्स भयवओ भुवणनाहस्स वद्धमा-  
णसामिणो बह्वइं वासराइं अणसियस्स, न मुणिज्जइ कोइ अभिग्गहविसेसो अणेण गहिओत्ति, अओ किं तुम्ह  
बुद्धीविभवेण ? किं वा अमच्चत्तणेणं ? जइ एवं अभिग्गहं न जाणहत्ति, अमचेण भणियं-पिए ! परिचयसु संतावं,  
कल्ले तहा करेमि जहा एस अभिग्गहो मुणिज्जइ, इय एयाए कहाए वट्टमाणीए विजया नाम पडिहारी मिगावईए  
देवीए संतिया, सा केणइ कारणेण आगया, तमुल्लावं सोऊण मिगावईए सच्चं परिकहेइ, इमं च सोचा मिगावईवि

श्रीगुणचंद  
महावीरच०  
७ प्रस्तावः  
॥ २४२ ॥

महादुक्खेण अभिभूया, सोगाउरा जाया, राया य तं पएसमणुपत्तो पुच्छइ-देवी ! किं विमणदुम्मणा लक्खिज्जसि ?, तीए भणियं-देव ! किं परिकहेमि ?, तुम्हे दुग्गदुग्गइगमणमूलेण इमिणा रज्जभरेण पच्छाइयविवेया एत्तिवंपि न सुणह, जहा कत्थ सामी विहरइ ?, कहां वा भिक्खं परिभमइत्ति, वहुं निव्वभच्छिऊण साहिओ अभिग्गहवइयरो, राइणा भणियं-देवि ! वीसत्था होहि, कळे सव्वपयारेहिं जाणामि परमत्थंति भणिऊण उवविट्ठो अत्थाणमंडवंमि, वाहराविओ सुगुत्तामच्चो, समागओ एसो, तओ पणमिऊण राइणो पायपीठं उवविट्ठो जहोचियासणे, भणिओ राइणा-अहो अमच्च ! किं जुत्तमेयं तुज्झ जं भयवंतं इह विहरमाणंपि न जाणसि ?, अहो ते पमत्तया अहो ते सद्धम्मपरंमुहया, अज्ज किर सामिस्स चउत्थो मासो निरसणस्स अविन्नायाभिग्गहविसेसस्स वट्ठइत्ति, सुगुत्तेण भणियं-देव ! अवरारकज्जंतराऊरियघरवासवासंगित्तणेण न किंपि सुणियं, इयाणिं पुण जं देवो आणवेइ तं संपाडेमित्ति भणिए रत्ता सदाविओ तच्चावाई धम्मसत्थपाठगो, पुच्छिओ य एसो-जहा भइ ! तुह धम्मसत्थेसु सव्वपासंडाणं आयारा निरुविज्जंति, ता साहेहि को भगवया अभिग्गहविसेसो पडिवन्नोत्ति ?, तुमंपि अमच्च ! बुद्धिबलिओ, अओ वीमंसेसु को एत्थ उवाओ ?, खणंतरं च वीमंसिऊण तोहिं भणियं-देव ! वहवे दव्वखेत्तकालभावभेयभिन्ना अभिग्गहविसेसा सत्त पिंडेसणाओ सत्त य पाणेसणाओ हवंति, अओ न नज्जइ कोऽवि अभिप्पाओत्ति । तओ रत्ता सव्वत्थ नयरीए काराविया उग्घोसणा, जहा-भयवओ भिक्खं भमंतस्स अणेगप्पगारेहिं भिक्खा नीणि-

अमात्या-  
दिचिन्ता  
अभिग्रहो-  
द्वोषणा.

॥ २४२ ॥

यद्यत्ति, इमं च निसामिऊण परलोयसुहकंखिणा विचित्तनेवत्थधारिणा अप्पमत्तचित्तेण नयरजणेण पइण्णामंदरस्स गोयरचरियं पविट्ठस्स भयवओ पइदिणं पणामिज्जइ अणेगप्पयारेहिं भिक्खा, न य धिप्पइ सामिणा, एवं च कहिंपि असंपज्जमाणजहासमीहियपिंडविसुद्धीवि अमिलाणसरीरलायनो अदीणमणो य ठिओ तीए चेव पुरीए भयवं ।  
एयं ताव एव ।

इओ य-सयाणियस्स रत्तो चारपुरिसेहिं आगंतूण कहियं जहा-देव ! तुम्ह पुव्वेरी दहिवाहणो राया संपयं थोयपरिवारो पमत्तो य वट्ठइ, अओ जइ पंचरत्तमेत्तेण देवो तत्थ वचंइ ता निच्छियं समीहियत्थसिद्धी जायइत्ति-  
पभणिए राइणा दवाविया सन्नाहभेरी, संवूढा सुहडा संखुद्धा सामंता, चलिओ राया महासामग्गीए, आरूढो य नावासु, तओ अणुकूलयाए पवणस्स दक्खत्तणेणं कन्नधारजणस्स एगरयणिमेत्तेण अचिंतियागमणो संपत्तो चंपा-  
पुरीं, असंखुद्धा चेव वेढिया एसा, दहिवाहणोऽवि सामग्गिं विणा जुज्झिउमपारयंतो किमेत्थ पत्थावे कायव्वंति वाउलमणो भणिओ मंतिजणेण-सामि ! कीस मुज्झह, सच्चहा एत्थावसरे पलायणमेव जुत्तं ।

यतः-त्यजेदेकं कुलस्थार्यं, ग्रामस्थार्यं कुलं त्यजेत् । ग्रामं जनपदस्थार्यं, आत्मार्थं पृथिवीं त्यजेत् ॥ १ ॥

प्रस्तावसदृशं वाक्यं, सद्भावसदृशं प्रियम् । आत्मशक्तिसमं कोपं, यो जानाति स पण्डितः ॥ २ ॥

विक्रमावर्जिताः सद्यः, संपद्यन्ते पुनः श्रियः । जीवितव्यमवक्रान्तं, तेन देहेन दुर्लभम् ॥ ३ ॥

श्रीगुणचंद  
महावीरच०  
७ प्रस्तावः  
॥ २४३ ॥

सर्वेषामेव वस्तूनां, जीवितव्यमनुत्तमम् । तदर्थं राज्यलक्ष्म्याद्यास्तचेत् नष्टं वृथा परम् ॥ ४ ॥  
एवं तेहिं भणिओ सरीरमेत्तेण पलाणो दहिवाहणो, सयाणियरन्नावि घोसावियं नियखंधावारे, जहा—भो भो ! दंड-  
नाहसुहडपमुहां चमूचरा ! गेणहेज्जह जहिच्छाए एत्थ नयरीए जं जस्स रोयइ, मा ममाहितो मणागंपि संकेज्जहत्ति,  
एवं जग्गहे घुट्टे पयट्ठो रायलोगो भग्गो पागारो विहाडियाइं गोपुरकवाडाइं लुंदिउमारद्धं असेसंपि नयरं, तहाविहे  
य असमंजसे वट्ठमाणे दहिवाहणस्स रत्तो अग्गमहिसी धारिणी नाम देवी वसुमईए दुहियाए समं इओ तओ पलाय-  
माणी पत्ता एगेण सेवगपुरिसेण, रायावि संपाइयसमीहियपओयणो पडिनि यत्तो नियनयरिहुत्तं, सो य सेवगो  
धारिणीदेवीए रूवेण लायन्नेण सोहग्गेण य अवहरियहियओ पहे वचंतो जणाणं पुरो भणइ—एसा मम पत्ती होही,  
एयं च कन्नगं विकिणिस्संति, एयं च से उल्लावं सुणिऊण भयभीया धारिणी चिंतिउं पवत्ता—

कह ससहरकरधवले कुलंमि नीसेसभुवणपयडंमि । जाया मह उप्पत्ती चेडयनरनाहगेहंमि ? ॥ १ ॥  
कह वा नमंतसामंतमउलिलीढग्गपायवीढेण । दहिवाहणेण रत्ता ठवियाऽहं पणइणिपयंमि ? ॥ २ ॥  
कह वा जिणिंदवयणारविंदसंभूयसमयसवणुत्था । मम सययं वसइ मणे अकज्जविवरंमुहा बुद्धी ? ॥ ३ ॥  
कह एस हीणसत्तोवि सुक्कमेरं ममं समुद्दिस्स । वागरइ जहा महिलं अहमेयं किल करिस्सामि ? ॥ ४ ॥  
ता पावजीव ! अज्जवि अस्सुयपुवं इमंमि सुणिऊण । किं निहरेसि न निहज्ज ! गंजणं सहसि सीलस्स ॥ ५ ॥  
हरहासहंसधवलं सीलं मयलंति नो सुकुलजाया । करिकन्नतालचंचलजीवियकज्जेण कइयावि ॥ ६ ॥

चम्पाभंगो  
धारणी-  
मरणं चन्द-  
नाविक्रयः.

॥ २४३ ॥

कह नापिडु मम दुदिया एसा उच्छंगसंगसंभूया । परहत्थगया धरिही नियजीयं विरहसंतता ॥ ७ ॥

इय एवंविहसंकप्पकप्पणुप्पन्नतिषडुक्खाए । निम्भच्छियं व जीयं नीहरियं से उरो भेतुं ॥ ८ ॥

तीसे य अपत्तकालमरणं अवलोइऊण चित्तियं तेण सेवगपुरिसेण, अहो दुट्ठं मए भणियं—महिला होहिति, एसा हि गहाणुभाया कस्सइ पुरिसोत्तमस्स भज्जा संभाविज्जइ, अओ चिय मम दुद्वयणायन्नणेण संखुहियहियया मया, ता किमित्तय अइकंतत्थसोयणेण?, एयं कन्नगं इयाणिं न किंपि भणिस्सामि, मा एसावि मरिहिति । ताहे महुरवय-  
णेहिं जणुअत्तमाणा आणीया कोसंवीं नयरिं, विक्कयनिमित्तं च उड्डिया रायमग्गे, अह धम्मकम्मसंजोएण तप्पएस-  
जाइणा दिट्ठा सा धणावहसेट्ठिणा, चित्तियं चऽणेण-अहो एरिसाए आगिईए न होइ एसा सामन्नजणदुहिया, जओ  
अणलंकियावि जलहिवेलच्च वहइ किंपि अपुवं लावन्नं, किससरीरावि मयलंछणलेहच्च पायडइ कंतिपडलं, ता  
जुज्जइ एसा मम बहुदद्वदाणेण गिण्हित्तए, मा हीणजणहत्थगया पाविही वराई अणत्थपरंपरं, एयसंगोवणेण य  
जइ पुण इमीए सयणवग्गेण ममं समागमो होज्जत्ति कलिऊण जेत्तियं सो मोलं भणइ तत्तियं दाऊण गहिया,  
नीया सगिहे, पुच्छिया यं-पुत्ति! कस्स तं धूया? को वा सयणवग्गो?, तओ उत्तमरायकुलपसूयत्तणेण सयं नियव-  
इयरं कहिउमपारयंती ठिया एसा मोणेणं, पच्छा सैट्ठिणा धूयत्ति पडिवन्ना, समप्पिया मूलाभिहाणाए सैट्ठिणीए,  
संलत्ता य एसा-जहा पिए! धूया इमा तुह मए दिन्ना, ता गोरवेणं संरक्खेज्जासि, एवं च जहा निययघरे तहा

सा तत्थ सुहेण संवसइ, ताए य सो सेट्ठी सपरियणो लोगो य सीलेण विणएण वयणकोसल्लेण य वाढं रंजिय-  
हियओ समानो चंदणसिसिरसहावत्तणओ पुवाभिहाणमवणेऊण चंदणत्ति वीयं नामं ठवेइ, एवं सा चंदणत्ति परि-  
यणेण वाहरिज्जंती वड्ढिउमारद्धा, गच्छंतेसु य दिणेषु वियंभिओ से ईसि जुवणारंभो, तवसेण य समुल्लसिओ  
सविसेसं लायन्नपगरिसो, विजियकुवलयविब्भमं वित्थरियं नयणजुयलं, अलिकुलकज्जलकसिणो दीहत्तणं पत्तो केस-  
पासो । अविय—

रूवपरिवज्जिओऽविहु जुवणसमयंमि हवइ सस्सिरीओ । किं पुण सभावओ चिय सुकुमारा सा नरिंदसुया ? ॥ १ ॥

तीसे य पइदिणं वड्ढमाणिं रूवसंपयं पलोयंती मूला सेट्ठिणी वाढं मच्छरमावहइ, परिचितेइ य, जहा—को एयं  
सहहिज्जा जन्न इमं सेट्ठी परिणेऊण घरसामिणी करेज्जा?, ता सवहा मम विणासाय होअवमेयाए, अओ जइ  
किंचि छिद्दं पावेमि ता एयं ववरोएमि । अन्नया य सो धणावहसेट्ठी गिम्हुणहकिलंतदेहो विवणिपहाओ आगओ  
नियमंदिरं, तम्मि य पत्थावे परियणाओ नत्थि कोऽवि जो चलणपक्खालणं करेइ, ताहे अइविणीयत्तणेण चंदणा  
समुट्ठिया पाणियं गहाय पायसोहणत्थं, निवारिज्जमाणावि सेट्ठिणा जणगोत्ति कलिऊण पयट्ठा धोविउं, अह नीस-  
हत्तणओ कुमारभावस्स सिढिलियबंधणो होऊण निवडिओ भूमियले दीहो से कुंतलकलावो, मा चिक्खल्ले पडि-  
हिति करकलियलीलालट्ठीए समुक्खित्तो निवियारमणेण सेट्ठिणा, वद्धो य । एत्थंतरे अणवरयछिद्दपेच्छणपराए

जो लोयणंतरगयाए दिट्ठमिमं पावाए अणत्थमूलाए मूलाए, ताहे ईसाभरवित्थरंतदढकोवपाडलच्छीए इत्थीसभा-  
गओ गिय अचंतं तुच्छहिययाए चित्थियमेयाए इमं-जं पुर्विं तक्कियं मए आसि तमियाणिं पयउत्तगमणुभवइ विगप्प-  
परिहीणं, कहमन्नहा जणगत्तं वायामेत्तेण जंपिऊण पुरा सेट्ठी इमीए दइओव केसपासंवि संजमइ, ता जावज्जवि लज्जं  
समुज्झिऊणं न पणइणिपयंमि ठवेइ सेट्ठी एयं ताव उवायं करेमि अहं, इय सुविमुद्धंवि जणं विवरीयं नियमईए  
कलिऊण मूला मूलाउ चिय उद्धरिउं चंदणं महइ । अह पक्खालियचलणे खणं कयवीसामे वाहिं नीहरियंमि  
धणायहे ईसायमुप्पन्नमच्छराए सेट्ठिभज्जाए वाहराविऊण ण्हावियं मुंडावियं चंदणाए सीसं, वहुं ताडिऊण लोहसं-  
फलाए चरणे निगडिऊण य पक्खित्ता एसा दूरयरमंदिरंमि, दिन्नं निविडकवाडसंपुडं, भणिओ य परियणो-जो  
सेट्ठिणो इमं वइयरं साहिस्सइ तस्सवि एस चेव दंडो मए कायवो, अओ वाढमापुच्छमाणेऽवि सेट्ठिंमि न कहे-  
यपमेयंति पुणो पुणो पन्नविऊण गया सगिहं । विगालसमए य समागओ धणावहो, कहिं चंदणत्ति पुच्छिओ  
परियणो?, मूलाभएण न सिट्ठं केणावि, तेण नायं-पासायतले कीलंती भविस्सइ, एवं रयणीएवि पुच्छिया, तत्थवि  
तेण नायं-जहा पमुत्तत्ति, नवरं वीयदिवसेऽवि न दिट्ठा, तइयदिणे य अचंतमाउलचित्तस्स आपुच्छमाणस्सवि पुणो  
पुणो जाय न कोइ साहेइ ताव जाया से आसंका-गा केणइ विणिहया होज्जत्ति, समुप्पन्नगाढकोवो भणिउं पवत्तो-  
अरे रे साहेइ अचितहं तीसे पउत्तिं, अहवा मे सहत्थेण मारइस्सं, जओ एरिसमुपउत्तडंभाडंवरेण न मुणिज्जइ तुम्ह



श्रीगुणचंद  
महावीरच०  
७ प्रस्तावः

॥ २४५ ॥

कुसलत्तणंति भणिए चिंतियमेकाए थेरदासीए, जहा जीवियहि बहुकालं सयमेव, पच्चासन्नमियाणिं मरणं, एत्तो-  
ऽवि किं करिस्सइ मे मूला?, ता साहेमि चंदणं, जीवउ मम जीविएणवि सा वराई, परजीवरक्खणं हि महापुत्रं  
वुच्चइ समयसत्थेसुत्ति चिंतिऊण सिट्ठो सेट्ठिणो परमत्थो । दंसियं च तं गिहं जत्थ सा अवरुद्धा अच्छइत्ति, तओ  
गंतूण उग्घाडियं तं गिहं सेट्ठिणा, पलोइया य सिरोऽवणीयकेसपञ्चभारा छुहाकिलामियसरीरा मत्तमायंगचलणमलिय-  
कमलमालव विमिलाणदेहच्छवी चंदणा, तं च दट्ठूण गलंतवाहप्पवाहाउललोयणो-पुत्ति! वीसत्था होहिति समा-  
सासिऊण गओ महाणससालाए, निरुवियाई भोयणभंडाई, कूराइयं च विसिट्ठं भोयणमपेच्छमाणेण कुम्मासे चिय  
सुप्पकोणे घेत्तूण समप्पिया चंदणाए, भणिया य-पुत्ति! जाव अहं तुह नियलभंजणनिमित्तं आणेमि लोहयारं ताव  
भंजसु तुमं एयंति भणिऊण गओ सेट्ठी, सावि सुप्पप्पणामिए दट्ठूण कुम्मासे करिणिव जूहपञ्चट्ठा नियकुलं संभ-  
रिऊण सोइउं पवत्ता । कहं?—

जइ ताव दइव! तुमए नरवइगेहे अहं विणिम्मविया । ता कीस एरिसावयमहणवे दुत्तरे खित्ता? ॥ १ ॥

सा रायसिरी सो जणणिजणगसञ्भावनिम्भरो नेहो । कह सवंपि पणट्ठं गंधवपुरव वैगेण? ॥ २ ॥

खणमुल्लसंति उट्ठं खणेण निवडंति हेट्ठओ सहसा । खरपवणुदुयधयवडसमाई ही विहिविलसियाई ॥ ३ ॥

इय दुवहसौगभरावरुद्धकंठक्खलंतवयणा सा । निवडंतसलिलवाहप्पवाहधोयाणणा वाला ॥ ४ ॥

चन्दनाया  
निरोधः श्रे-  
ष्ठिज्ञानं कु-  
ल्मापदानं  
शोकः.

॥ २४५ ॥

तण्हाळुहाकिलासियकबोलमह पाणिपल्लवे ठविउं । त्रयणं खणंतरं रोत्रिकुण दीहं च वीससिउं ॥ ५ ॥

ते सुप्पकोणनिसिए कुम्मासे मुणिमणं व नित्रेहे । गिण्हइ भोयणहेउं किमभवखं छुहकिलंताणं ? ॥ ६ ॥

अह चित्तियमेयाए जइ एज्ज इमंमि कोइ पत्थावे । अतिही ता से दाउं जुज्जइ मह भोयणं काउं ॥ ७ ॥

इति परिभाविऊण पलोइयं दुवाराभिमुहं, एत्थंतरे चुन्नियचामीयररेणुसुंदरेण कायकंतिपडलेण पूरयंतोव गयण-  
यलंगणं उवसंतकंतदिट्ठिप्पहापीऊसवरिसेण निव्वंतोव दुहसंतत्तपाणिगणं नगनगरसिरिवच्छमच्छसोवत्थियलंछिएण  
चलणजुपलेण विचित्तचित्तंकिंयं व कुणमाणो महीयलं सुहकम्मनिचओव पचक्खो अहाणुपुवीए विहरमाणो  
समागओ तं पएसं भयवं महावीरजिणवरो, तयणंतरं अप्पडिमरूवं भयवंतं दट्ठूण अचंतमसारं कुम्मासभोयणं च  
निरिक्खिऊण दूरमजुत्तमेयं इमस्स महामुणिस्सत्ति विभावमाणीए सोगभरगग्गरगिराए गलंतवाहप्पवाहाउललो-  
यणाए भणियमणाए-भयवं ! जइवि अणुचियमेयं तहावि सस अधन्नाए अणुग्गहट्ठं गिण्हइ कुम्मासभोयणंति,  
भयवयावि धीरहियएण निरुविऊण समग्गाभिग्गहविसुद्धिं पसारियं पाणिपत्तं, तीएवि निविडनिगडजडियं कह-  
कहवि दुवारस्स वाहिरुद्देसंमि काऊण चलणमेक्कमवरं च भवणव्भंतरंमि सुप्पेण पणामिया कुम्मासा, अह जयगुरुग-  
रूयाभिग्गहपूरणपरितुट्ठा गयणयलमवयरिया चउविहा देवनिवहा पहया दुंदुही पडिया य पारियायमंजरीसणाहा  
भणिरभमरोलिसंवलिया कुसुमवुट्ठी वरिसियं गंधोदयं त्रिवडिया अद्धत्तेरसकोडिमेत्ता सुवण्णरासी मंदंदोलियविलया

श्रीगुणचंद  
महावीरच०  
७ प्रस्तावः

॥ २४६ ॥

य वल्लरीकला पवाइओ सुरभिसमीरणो विद्यंभिओ भवणभंतरे जयजयारवो । अविय—

दिसिदिसिमिलंतहरिसियनायरजणजणियवहलहलवोलं । नचंततरुणिसत्थं वज्जंताउज्जसंधायं ॥ १ ॥

पइखणपहिट्टसुरगणतिवइप्फोडणनिनायभरियनहं । मंगलमुहलसुरंगणसमूहसंसोभियदियंतं ॥ २ ॥

इय जयपहुपारणगे न केवलं हरिसियं तमेव पुरं । सविसेसरंजियमणा जाया पायालसग्गावि ॥ ३ ॥

एवंविहे य परमपमोयसंभारे समुप्पन्ने सुणियजयगुरुपारणगवुत्तंतो समागओ करेणुगाखंधाधिरूढो पहाणपुरजणा-  
णुगओ अंतोउरसमेओ सयाणियनरनाहो, अमच्चोऽवि भज्जासहिओ संपत्तो सेट्ठिमंदिरं, पेंखोलिरतारहाररेहंतवि-  
च्छिन्नवच्छत्थलो माणिकमउडदिप्पंतउत्तिमंगो कडयतुडियथंभियवाहुपरिहो पुरंदरो य, तीसे य चंदणाए देवयाणु-  
भावेण पुवंपिव नीहरिओ पवरचिहुरभारो नियलाणिवि जच्चकंचणमयाणि नेउराणि जायाणि, अत्तेहि य हारद्धहारक-  
डिसुत्तयकडयकुंडलतिलयपमुहरयणाभरणेहिं अलंकियमसेसं सरीरं । एत्थंतरे संपुलो नाम दहिवाहणरत्तो कंचुइज्जो  
सयाणियरत्ता पुवं वंधिऊण जो आणिओ आसि सो तक्खणं चिय वसुमइं दट्टण जायपच्चभिन्नाणो सुमरियपुवसुच-  
रिओ तीसे पाएसु निवडिऊण मुक्कपोक्कारं रोविउमारद्धो, मडुरवयणेहिं आसासिऊण कोऊहलेण पुच्छिओ राइणा-  
भद! केण कारणेण एयाए पायपंकए निवडिऊण सहसच्चिय अचंतसोगनिभरं परुत्तोऽसि?, तेण जंपियं —देव! चंपा-  
पुरीपरमेसरदहिवाहणरायग्गमहिसीए धारिणीदेवीए असेससीमंतिणीतिलयभूया धूया एसा, कहं तारिसविभवसमुदयं

श्रीवीरपा-  
रणं राजा-  
गमः निग-  
डादीनां  
नूपुरादि.

॥ २४६ ॥

पाविऊण इयाणिं नियजणणिजणगरहिया परगिहे वसइत्ति एएण कारणेणं, राइणा भणियं-भइ! मा सोएसु  
 असोयणिज्जा हि एसा जीए तिहुयणेकदिवायरो भवगत्तपडंतजणलग्गणेक्खंभो भयवं सहत्थेण पडिलाभिओ ।  
 मिगावईए भणियं-जइ एसा धारिणीदुहिया ता मम भगिणीधूया हवइत्ति । एत्थं पत्थावे थुवमाणो सुरवइपमुहेहिं  
 सामी पंचदिणोणळम्मासतवपज्जंतकयपारणगो नीहरिओ धणावहमंदिराओ, अह अञ्चुक्कडयाए लोभस्स अववाय-  
 निरवेक्खत्तणओ पडुभावस्स सयाणियराया तं सुवण्णवुट्ठिं गहिउमारद्धो, तओ पुरंदरेण मुणिऊण से चित्तवित्तिं  
 भणियं-भो भो महाराय! न एत्थ सामिकोडुंबियभावो, किंतु जस्स कस्सइ सहत्थेण एसा कन्नगा इमं वियरइ  
 तस्सेव हवइ, एवं च भणिए पुच्छिया रत्ता चंदणा-पुत्ति! कस्सेयं दिज्जइ?, तीए भणियं-किमिह पुच्छणिज्जं?,  
 एयस्स चेव निक्कारणवच्छलस्स जीवियदाइणो मम पिउणो धणावहसेट्ठिणो पणामहत्ति, ताहे सेट्ठिणा संगोविया  
 वसुहारा, पुणोऽवि सक्केण भणिओ राया-एसा चरिमसरीरा भोगोवभोगपिवासापरंमुही महाणुभावां भयवओ वद्धमा-  
 णस्स समुप्पन्नकेवलालोयस्स पढमा अज्जाणं संजमुज्जोगपवित्तिणी सिस्सिणी भविस्सइ, अओ सम्मं रक्खेज्जासि इति  
 भणिऊण अहंसणमुवगओ तियसाहिवो । राइणावि कन्नंतेउरे सबहुमाणं संगोविया चंदणा । तयणंतरं च अंसारयं  
 संसारस्स तरलतरंगभंगुरत्तणं संजोगस्स कुसग्गयजललवचंचलत्तणं जीवियवस्स पज्जंतविरसत्तणं विसयपडिवंधस्स  
 परिभावयंती सा गमेइ कालं, इमे य मणोरहे करेइ, जहा-

श्रीगुणचंद  
महावीरच०  
७ प्रस्तावः

॥ २४७ ॥

भगवइ पुरंदरदिसे ! जणिहिसि तं वासरं तुमं कइया ? । जत्थ सहत्थेण जिणो उत्तारेही भवाओ ममं ॥ १ ॥  
कइया ससुरासुरजीवलोयमज्झट्टियस्स जयगुरुणो । वयणामयं पिविस्सामि सवणपुडण्हिं अविरामं ॥ २ ॥  
कइया निस्सेयससोक्खमूलहेऊ खणो भविस्सइ सो । देहंमिवि निरवेक्खा निस्संगा जत्थ विहरिस्सं ॥ ३ ॥  
कइया उग्गमउप्पायणेसणादोसलेसपरिहीणं । पिंडं अत्तेसंती भमिहं उच्चावयगिहेसु ॥ ४ ॥  
इय पवरमणोरहकप्पणाहिं तीसे दिणाइं वोलंति । भावेण सबविरइं फासंतीए ससत्तीए ॥ ५ ॥  
मूलावि सेट्ठिणी मुणियवित्तंतेण बहुप्पयारोहिं निंदिया नयरीजणेण ।

जयगुरुवि पुरागराइसु परिभमंतो गओ सुमंगलाभिहाणगामे, तत्थ सणंकुमारसुरिंदो भत्तीए तिपयाहिणी-  
काऊण भगवंतं वंदइ पियं च पुच्छइ, अह खणमेकं पज्जुवासिऊण सट्ठाणे पडिनियत्ते सुरिंदे सामी सुछेत्तसंनिवेसंमि  
वच्चइ । तत्तोवि माहिंदकप्पाहिवइणा हरिसुकरिसेणं वंदिओ समाणो विनिक्खमिऊण पालयं नाम गामं पट्ठिओ,  
ताहिं च धाहिलो नाम वाणिओ देसजत्ताए पयट्ठो सामिं संमुहमितं दट्ठूण अमंगलंतिकाऊण रोसवसायंविच्छो  
नीलपहापडलपल्लवियगयणमंडलं करवालमायट्ठिऊणं एयस्स चैव समणगस्स मत्थाए अवसउणं निवाडेमिति पहाविओ  
वहत्यं वेगेण, एत्थंतरे सुमरियसुरिंदाएसेण पुवभणियसिद्धत्यवंतरेण छिन्नमेयस्स सहत्थेण सीसं, तंमि य विणिहए  
अहासुहं विहरमाणो जयगुरु पत्तो चंपानयरीए, ठिओ साइदिन्नमाहणस्स अग्गिहोत्तवसहीए एगदेसंमि, जाओ य

वनावहाय  
वसुधारा-  
धनदानं  
चन्दना-  
सनोरथाः  
धाहिल-  
वधश्च.

॥ २४७ ॥

दुवालसमो वासारत्तो, अह चाउम्मासखमणपडिवन्नस्स सामिणो माणिभदुपुन्नभदनामाणो वाणमंतरसुरिंदां भत्ति-  
भरमुव्वहंता रयणीए समागंतूण चत्तारिवि मासे जाव पूयं करेति, ते य दद्रूण विस्सियमणो साइदत्तमाहणो विचिं-  
तेइ-किं एस देवज्जगो जाणइ किंपि? जं देवा एयमणवरयं पूयंति पज्जुवासिंति य, तओ परिकखानिमित्तं  
जंपियमणेण—

भयवं! एत्थ सरीरे करसिरपमुहंगसंगए अप्पा । को भण्णइत्ति? तत्तो भवोत्ति जिणेण से कहियं ॥ १ ॥  
जो अहमेवं मन्नइ, केरिसओ सो? अईव सुहुमोत्ति । सुहुमंपि किं भणिज्जइ?, इंदियगेज्झं न जं होइ ॥ २ ॥  
एत्तो चिय सहानिलगंधाईया, लहंति न क्याइ । अत्तववएसमेए, जं गेज्झा गाहगो अप्पा ॥ ३ ॥  
इय एवमाइपसिणप्पवंचपरमत्थवित्थरे कहिए । विप्पो उवसंतमणो जयगुरुणो कुणइ बहुमाणं ॥ ४ ॥  
अह पज्जंतमुवगए वासारत्ते जिणेसरो वीरो । कम्ममहिमहणसीरो जंभियगामंमि संपत्तो ॥ ५ ॥  
तत्थ सुरिंदो वंदित्तु सायरं दंसिऊण नट्टविहिं । कइवयवासरमज्झे नाणुप्पत्तिं परिकहेइ ॥ ६ ॥  
तत्तो मिंदियगामे पुव्वुवयारं सरित्तु चमरिंदो । नमिऊण चलणजुयलं जहागयं पडिनियत्तोत्ति ॥ ७ ॥  
इय अणवरयसुरविसरथुणिज्जमाणचरणो दुस्सहपरीसहमहोयहिदरतीरपत्तो आणुपुव्वीए परिब्भममाणो संपत्तो  
उम्मासिगामं, ठिओ य तस्स वाहिभागंमि असेससत्तोवरोहरहियंमि पलंचियभुओ काउस्सग्गेणं । एत्थंतरे तिवि-

श्रीगुणचंद  
महावीरच०  
७ प्रस्तावः  
॥ २४८ ॥

दुभयतत्ततउयरसाउरियसवणवेयणाभिहयसेजावालपचइयं समुद्दिन्नं अचंतमसुहं भगवओ वेयणीयं कम्मं, सो य  
सेजावालजीवो तत्थेव गामे गोवत्तणेण वट्टमाणो वसहे भगवओ उस्सग्गट्टियस्स समीवे मोत्तूण गोदोहणाइकजे  
पविट्ठो गाममज्झे, ते य वसहा निरंकुसं संचरमाणा पविट्ठा अडविंमि, इओ य खणंतरेण समागओ गोवो, समाउल-  
हियओ गोणे अपेच्छमाणो पुच्छइ-भो भो देवज्जग ! मम संतिआ एवंविहरूवा गोणगा तुमए दिट्ठपुवा न वत्ति,  
पुणो पुणो सवायरेणवि भणिज्जमाणेणावि जाहे जयगुरुणा न किंपि जंपियं ताहे पलयकालानलवियंभमाणकोवदसण-  
दट्ठोदुडेण भणियमणेण-भो मम सवायरेण समुल्लवित्तस्स पत्थरघडियहिययस्स व तुज्झ न मणागंपि पडिवयण-  
दाणमेत्तेऽवि अणुरोहो समुप्पण्णो, अह वहिरोत्ति न निसामेसि मे वयणं, एवं ता किं निरत्थएण तुह कन्नछिहुवइ-  
णेणंति भणिऊण अइकूरज्झवसाणसंगएण खित्ताओ सामिणो वामेयरसवणविचरेसु काससलागाओ, पत्थरेण दढं ताव  
समाहयाओ जाव परोप्परं मिलियाओ, ताहे मा कोइ उक्खणिहित्ति पचंतभागे मोडिऊण अवकंतो गोवाहमो, सामी-  
वि पणट्टमायामिच्छत्ताइसल्लोऽवि सवणविचरंतरुच्छूढगाढसल्लो अचंतधिईवलिओऽवि दूसहवेयणावसकिसीभूयसरीरो  
मणागंपि धम्मज्झाणाओ अविचलियमाणसो तत्तो निक्खमिऊण गओ मज्झिमपायासन्निवेसं, तत्थ य पारणगदि-  
यहे पविट्ठो सिद्धत्थवणियस्स गेहं, तओ तेण हरिसुच्छलंतपुलयजालेण वंदिऊण पडिलाभिओ भयवं, एत्थावसरंमि  
य तहिं चेव पुवागएण जिणं दट्ठूण भणियं खरगाभिहाणेण वेज्जणे-अहो भयवओ सबलक्खणसंपुन्नं सरीरं, केवलं

खातिदत्त-  
प्रश्नाः क-  
र्णशलाको-  
पसर्गः.

॥ २४८ ॥

पमिलाणलायन्नत्तणेण मुणिज्जइ ससल्लं, इमं च निसुणिऊण असगजिणपक्खवायकलिण ससंभमं भणियं सिद्ध-  
त्थेण—भो विज्ज! जइ एवं ता निउणं निरुवेहि, कहिं ससल्लो एस जयगुरु?, एवं बुत्ते वेज्जेण अइसुप्पणिहिण  
सणियं सणियं पलोयमाणेण जिणतणुं दिट्ठं कन्नविवरंतरनिहितं काससलियाजुयलं, दंसियं च सिद्धवणिणो, तं च  
तारिसमवलोइऊण जंपियं सिद्धत्थेण—अहो कस्सइ पावकारिणो अचंतनिकरुणं विलसियं, जं एवंविहं कम्ममायरं-  
तेण न गणिओ दोग्गइनिवडणतिकखासंखदुक्खागमो न पेहियं आकालियमजसं न चिंतियं धम्मविरुद्धं, अहवा  
किमेण दुट्ठचेट्ठियविकत्थणेण?, भो वेज्ज! साहेसु को संपयं उवाओ जेण एयं सल्लमवणिज्जइ? । अन्नं च—

सल्लेण जएक्कपहुस्स कन्नविवरंतरं उवगएण । अणवरयं मह हिययं भिज्जइ एत्तो महाभाग! ॥ १ ॥

अलियं उल्लवइ जणो जस्स वणो वेयणा हवइ तस्स । जं सामिणा ससल्लेण दुक्खिओऽहं दढं जाओ ॥ २ ॥

परमत्थेण इमो चियं जीयं माया पिया य सयणो य । नाहो सरणं ताणं ता एत्तो किं परं परमं? ॥ ३ ॥

इय एयस्स निमित्ते धणं च धन्नं च दवनिचयं च । मम जीवियंपि चइऊण कुणसु भो सल्लउद्धरणं ॥ ४ ॥

उद्धरिए एयंमि तु तुमए भवभीमकूवगार्हितो । उद्धरिओ परमत्थेण विज्ज! निस्संसयं अप्पा ॥ ५ ॥

नीसेसगुणनिहाणे इमंमि उवजुंजिऊण नियविज्जं । आसंसारं सुंदर! आसीसाभायणं होसु ॥ ६ ॥

इयरंमिवि उवयारो कीरंतो जणइ निम्मलं कित्तिं । किं पुण तइलोकदिवायरंमि सिरिवीयरागंमि ? ॥ ७ ॥



श्रीगुणचंद  
महावीरच०  
७ प्रस्तावः  
॥ २४९ ॥

इय सञ्भावुञ्चडवयणसवणपरिवद्धमाणेपरितोसो । सामिचिकिच्छाकरणंमि उज्जुओ भणइ सो विज्जो ॥ ८ ॥  
सिद्धत्थ ! अलमेत्थ पत्थणाए, तहा करेमि जहा लहुं अवहरामि भयवओ सल्लं, केवलं निप्पडिकम्मो एस नाभि-  
लसइ चिगिच्छं न बहु मन्नइ सरीरसकारं नाभिनंदइ ओसहाइविहाणं, एवं च ठिए कहं कायवो सल्लसमुद्धरणोव-  
कमो?, सिद्धत्थेण भणियं-पज्जत्तं वाउलत्तणेणं, जहा तुमं भणिहिसि तहा करिस्सामित्ति अन्नोऽन्नं जंपिराणं  
निग्गओ भुवणगुरू, ठिओ वाहिरुज्जाणे, सिद्धत्थेणावि नियपुरिसेहिंतो सवत्थवि अन्नेसाविओ सामी, दिट्ठो य  
गामवाहिरुज्जाणे, तओ विज्जेण समेओ तदुवदिट्ठदिट्ठोसहसामग्गिसणाहो तत्थेव गओ सिद्धत्थो, तयणंतरं च वेज्जेण  
तेल्लदोणीए निवेसाविओ सामी, पच्छा कयकरणेहिं चउव्विहविस्सामणावियक्खणेहिं पुरिसेहिं महाविओ, तओ सिद्धि-  
लीभूएसु संधिवंधणेसु वाढं निजंतिऊण संडासएण अइच्छेययाए लहुमाकट्ठिउमारद्धो कन्नेहिंतो सरुहिरं सल्लजुयलं,  
अह नीहरिज्जमाणे सल्ले सा कावि वेयणा जाया । जीए मंदरधीरोऽवि कंप्पिओ झत्ति जयनाहो ॥ १ ॥ सुक्को य  
घोरघणघोसविब्भमो जिणवरेण आरावो । कुलिसाहय(सुर)गिरिसिंदलणजाओव्व अइभीमो ॥ २ ॥ जिणमाहप्पेण  
परं तडत्ति फुट्ठां समंतओ न मही । अन्नह चलणंगुलिचालियाचले केत्तियं एयं?, ॥ ३ ॥

एवमुप्पाडियंमि सल्ले संरोहणोसहीरसनिसेगपक्खेवेण पगुणीकयंमि सवणजुयले सविणयं वंदिऊण य जयनाहं  
वेज्जवणिणो परमसंतोसमुव्वहंता सग्गापवग्गसोक्खसिरिं भमरिं करकमलनिलीणं मन्नंता गया सगिहं । परमोवगा-

सिद्धार्थ-  
खरकाभ्यां  
शल्य-  
कर्षणं.

॥ २४९ ॥

रित्ति पूइओ यत्थकणगाइदाणेण विज्जो सिद्धत्थेण । एवं ते दोन्निऽवि आसयविसुद्धीए तिवमवि वेयणं भयवओ  
उदीरयंता सुरलोयलच्छिभायणं जाया । गोवालो पुण अइसंकिलिद्धयाए सत्तमनरयपुढवि दुहनिवहभायणं पत्तो ।  
तं च उज्जाणं महाभेरवंति पसिद्धिं गयं, देवउलं च तत्थ लोणेण कयं ।

एवंविहाययाणं हवंति जयभायणं जिणिंदावि । ता थोवायंकेऽविहु कींस जणो वहइ संतावं ? ॥ १ ॥

जइ एफसिंपि कयदुक्कयस्स एवंविहो दुहविवागो । ता असमंजसकिचेसुं पइदिणं कह जणो रमइ ? ॥ २ ॥

अतुलियवलकलिणवि जिणेण तिघावयं सहंतेण । सहणे चिय कम्मविणिज्जरत्ति पडिवज्जइ जणेण ॥ ३ ॥

एवं च भगवओ वद्धमाणसामिस्स परीसहाणं जहन्नगाणं मज्झे उवरि कडपूयणासीयं मज्झिमगाण य काल-  
चक्कं उफोसगाण य इमं चेव सल्लुद्धरणंति । एवं गोवालेण मूलाओ आरद्धा उवसग्गा गोवालेण चेव निट्ठियत्ति ।  
एवं ता उवसग्गाण संकलणा भणिया ।

इयाणिं सयलंपि तवोविहाणं जं जहा भगवया समायरियं तं तहा संकलिऊण भणिज्जइ—

नयं किर चाउम्मासे छकिर दोमासीए उवासी य । वारस य मांसियाइं वावत्तरि अद्धमासाइं ॥ १ ॥

एगं किर छम्मासं दो किर तेमासिए उवासी य । अट्ठाइज्जा य दुवे दो चेव दिवहुमासाइं ॥ २ ॥

महं च महाभहं पडिमं तत्तो य सवओभहं । दो चत्तारि दसेव य दिवसे ठासीय अणुवद्धं ॥ ३ ॥

वीरतपः  
केवलं च.

॥ २५० ॥

गोयरमभिग्गहजुयं खवणं छम्मासियं च कासी य । पंचदिवसेहिं ऊणं कोसंबीए वरपुरीए ॥ ४ ॥  
दस दो य किर महप्पा ठाइ मुणी एगराइयं पडिमं । अट्टमभत्तेण जई एकेकं चरिमराईयं ॥ ५ ॥  
दो चेव य छट्ठसए अउणातीसे उवासिया भयवं । न कयाइ निच्चभत्तं चउत्थभत्तं च से आसि ॥ ६ ॥  
वारस वरिसे अहिए छट्ठं भत्तं जहन्नयं आसि । सव्वं च तवोकम्मं अपाणियं आसि वीरस्स ॥ ७ ॥  
तिन्नि सए दिवसाणं अउणापण्णे उ पारणाकालो । उकुड्डयनिसज्जाणं ठियपडिमाणं सए बहुए ॥ ८ ॥

इय एत्तियमेत्तं पवज्जादिणाउ आरब्भ सव्वग्गेण छउमत्थकालियाए भगवया तवचरणमायरियंति ॥ संपयं पारद्धं  
भणिज्जइ—अह मज्झिमपावासन्निवेसाओ दुस्सहपरीसहनिसासंतमसं हणिऊण जिणदिवायरो समुम्मिलंतसमहि-  
गाभिरामदेहप्पहापडलपयासियदिसामुहो नीहरिऊण अणिययविहारेण विहरंतो संपत्तो समुत्तुंगपायारपरिचुंवियंवरं  
नाणाविहवणसंडमंडियदियंतरं जंभियगामं नाम नयरं, तस्स य वहिया विभागे वीयावत्तचेइयस्स अदूरे अणे-  
यतरुवरसुरहिकुसुमामोयमत्तमहुयरञ्जंकारमणहरपरिसराए उज्जुवालियानईए तीरंभि उत्तरिल्ले कूले सामागामिहाण-  
गाहावइस्स छेत्तंमि समुम्मिलियपढमपल्लवपसाहियस्स सुपुरिसस्स व सउणगणसेवियस्स सुरपुरस्स व सुमणसाभि-  
रामस्स महानरिंदस्स पत्तनियरपरियारियस्स व सालमहापायवस्स हिट्ठओ द्वियस्स भुवणबंधवस्स छट्ठेणं भत्तेणं  
अपाणएणं आयावेमाणस्स गोदोहियासणं निसन्नस्स अणुत्तरेहिं नाणदंसणचरित्तेहिं अणुत्तरेहिं आलयविहारमद्वज्ज-

श्रीगुणचंद  
महावीरच०  
७ प्रस्तावः

॥ २५० ॥

वेहिं अणुत्तरोहिं लांघवंसंतिगुत्तिमुत्तिसचमुचरिएहिं अप्पाणं भावेमाणस्स सद्दुग्गमाससमहिगेसु दुवांलंससंवच्छरेसु  
समइकंतेसु वइसाहसुद्धदसमीए सुवयाभिहाणंमि दिणंमि विजए मुहुत्ते हत्थुत्तरानक्खत्तंमि चंदेण जोगमुवागयंमि  
सुकज्झाणानलनिद्वुषणघायकम्मिधणस्स पुहत्तवियकं सवियारमेगत्तवियक्कमवियारं च झाइऊण उवरयस्स सुहम-  
किरियानिवट्ठिं वोच्छिन्नकिरियमप्पडिवाइं च सुकज्झाणचरिमभेयदुग्गमसंपत्तस्स अणंतमणुत्तरं निवाधायं निरावरणं  
पडिपुन्नं सयललोयालोयपयासयं केवलवरनाणदंसणं समुप्पन्नंति ॥

तयणंतरं च दुक्करतवचरणफलंमि केवलालोए । जाए सूरें पिव पयडिज्जइ तिहुअणं पडुणा ॥ १ ॥

अह वत्तीस सुरिंदा तक्खणचलियासणा लहुं पत्ता । विरयंति समोसरणं पायारतिएण परियरियं ॥ २ ॥

सुविभत्तचारुगोउरपोक्खरिणीपवलधयवडाइन्नं । सिंहासणं च मणिकणयनियरनिम्मवियहरिचावं ॥ ३ ॥

ताहे तिलोयनाहो थुवंतो देवनरनरिंदेहिं । सिंहासणे निसीयइ तित्थपणामं पकाऊण ॥ ४ ॥

जइविहु एरिसनाणेण जिणवरो मुणइ जोगगयारहियं । कप्पोत्ति तहवि साहइ खणमेत्तं धम्मपरमत्थं ॥ ५ ॥

इय निरुवक्कमविक्रमनिरक्खियब्भंतरारिविसरस्स । वीरस्स भुवणपडुणो चरिए सूरें व विप्फुरिए ॥ ६ ॥

संगमयाइपरीसहसहणऽज्जियनाणलाभसंवद्धो । संखेवेण समत्तो सत्तमओ एत्थ पत्थावो ॥ ७ ॥

इइ सिरिमहावीरचरिए परीसहसहणकेवलुवज्जणो सत्तमो पत्थावो ॥

श्रीगुणचंद  
महावीरचं  
८ प्रस्तावः

॥ २५१ ॥

अथाष्टमः प्रस्तावः

एवं केवललाभो भणिओ भुवणिकभाणुणो एत्तो । एकारसवि गणहरा जह से जाया तहा सुणसु ॥ १ ॥  
अह निम्महियनीसेसमोहमहिमो सो महावीरजिणवरो तहाविहोवयारविरहियं परिसं नाऊण परोवयारकर-  
णिकतल्लिच्छो छिन्नपेम्मबंधणोऽवि धम्मदेसणाईहिं तित्थयरनामगोयं कम्मं वेइज्जइत्ति परिभाविंतो असंखेज्जाहिं  
देवकोडीहिं परिवुडो सुरविरइएसु नवसु कणयकमलेसु नवणीयसुहफरिसेसु चलणजुयलं निवेसमाणो दिसामुहवि-  
सारिणा देवजणुज्जोएण पडिहयंधयारे निसासमएवि दिवसेव समुवलक्खिज्जमाणपयडपयत्थसत्थो तित्थनाहो  
दुवालसजोयणंतरियाए मज्झिमानयरीए गंतुं पवत्तो, तओ जाव सामी न पावइ मज्झिमापुरीं ताव तीसे अदूरदेसे  
संठियंमि महासेणवणंमि उज्जाणे देवेहिं समोसरणविरयणा काउमारद्धा, कहं चिय ?—

आजोयणपरिमंडलभूभागं विगयकयवरुग्घायं । हरियंदणसुरहिरसच्छट्ठाहिं पडिहणियरयनियरं ॥ १ ॥  
पंचविहरयणनिच्चिवरविरइयातुच्छपीठियाबंधं । हरिसुलसंतरोमंचकंचुया निम्मविंति सुरा ॥ २ ॥  
वेमाणियदेवेहिवि विरइज्जइ पंचरायरयणमओ । सालो विसालगोउरकविसीसयसुंदरो झत्ति ॥ ३ ॥  
तत्तो बाहिं पसरंतकिरणपञ्चारभरियनहविवरो । जोइसिएहिं ठविज्जइ सुवणणपागारपरिवेढो ॥ ४ ॥  
तयणंतरं च दगरयधवलपहाहसियसारयमयंको । भुवणवईहिं कीरइ निम्मलकलहोयपागारो ॥ ५ ॥

मध्यमा-  
पापायां स-  
मवसरणं,

॥ २५१ ॥

पवरमणिरयणरुइरं वंतरदेवेहिं सालमज्झंमि । सिंहासणं ठविज्जइ सपायपीढं सुरमणिज्जं ॥ ६ ॥  
 तत्सोयरिं विउच्चइ सको उम्मिल्लपल्लवसिरिल्लं । जिणदेहाउ दुवालसगुणियं कंकेलिपवरतरुं ॥ ७ ॥  
 ईसाणसुरिंदो निम्मवेइ लवंतमोत्तियसरीयं । छणमयलंछणधवलं फलिहदंडं च छत्ततिगं ॥ ८ ॥  
 हेट्टामुहठियविंटा रुंदंतुद्दामसहुयरसणाहा । आज्ञाणु कुसुमवुट्ठी निवडइ गयणाओ वरगंधा ॥ ९ ॥  
 सघरयणामयाइं विचित्तरइयसकचावाइं । रेहंति तोरणाइं नववंदणमालकलियाइं ॥ १० ॥  
 मंदरमहियमहोयहिरवगंभीराइं तियसनिवहेण । दिसि दिसि पहयाइं चउघिहाइं तूराइं दिघाइं ॥ ११ ॥  
 पवणुदुयखीरोयहिमहल्लकल्लोलविब्भमेहिं नहं । छाइज्जइ धयनिवहेहिं वेजयंतीसएहिं च ॥ १२ ॥  
 मयरंदुद्दामसहस्सपत्तकीलंतहंसमिहुणाओ । पडिगोउरं वराओ पोक्खरिणीओ य कीरंति ॥ १३ ॥  
 मिच्छत्तसत्तुविकखोभदक्खमक्खंडभाणुविंवसमं । जंतूण य कमलोवरि ठाविज्जइ धम्मवरचक्कं ॥ १४ ॥  
 देवच्छंदयपमुहं अन्नपि जमेत्थ होइ कायघं । वंतरसुरेहिं कीरइ पहिट्ठहियएहिं तं सघं ॥ १५ ॥  
 इय नियनियअहिगाराणुरूवओ विरइयंमि ओसरणे । जिणरविभीयव निसा निन्नट्टा तक्खणं चेव ॥ १६ ॥  
 एत्थंतरे सायरसुरखयरनमंसिज्जमाणो माणाइरित्तगुणरयणावासो वासवनिदंसिज्जमाणमग्गो मग्गाणुलग्गभव-  
 जणजणियपरितोसो तोसरोसपरिवज्जियगत्तो गत्तसमभवपडंतजणसमुद्धरणपरो परमकरुणरसनिववियज्जयजणदुहज-

श्रीगुणचंद  
महावीरच०  
८ प्रस्तावः

॥ २५२ ॥

लणो दुरियगिरिदलणो जयगुरुपुवदुवारेण पविट्टो समोसरणभूमिं, तओ सीहासणं पयाहिणीकाऊण ममावि पूयणिज्जं  
तित्थंति दंसंतो कयकिचोऽवि नमो तित्थस्सत्ति भणन्तो निसण्णो पुवाभिमुहो सीहासणे, तयणंतरं च सेसतिदिसि  
सिंहासणेसु सुरेहिं रइयाइं जिणपडिरूवाइं, ताणिऽवि भगवओ माहप्पेण तयणुरूवाइं चेव सोहिउं पवत्ताइं, अह  
एगरूवोऽवि सयलजंतुसंताणनित्थारणत्थं व चउरूवधरो जाओ जयगुरू, तयणंतरं च सयलतरणिमंडलसारपरमा-  
णुनियरविणिम्मियं व सरीरपरिक्खेवमणहरं समुग्गयं भामंडलं, ठिया य भगवओ उभयपासेसु पंचवण्णरयणविणि-  
म्मियदंडुब्भडाओ तुसारगोखीरधाराओव गोराओ चामराओ करकमलेण कलिऊण दाहिणुत्तरभवणवइणो चमरव-  
लिनामाणो असुराहिवा, अह—

गायंति केऽवि नचंति केऽवि फोडिंति केऽवि तिवइंपि । पकरेंति संथवं केऽवि भयवओ भत्तिए तियसा ॥ १ ॥

मेलंति सुरहिमंदारकुसुममयरंदविंदुसंवलयं । जिणपय पुरओ केऽविहु पंचविहं जलरुहसमूहं ॥ २ ॥

भवणवइवाणमंतरजोइसवेमाणिएहिं देवेहिं । पूरिज्जइ नहविवरं विमाणमालासहस्सेहिं ॥ ३ ॥

पंचप्पयारमणिरयणघडियसुंदरविमाणपडिहत्थं । उव्वहइ गयणविवरं पप्फुल्लियकमलसंडसिरिं ॥ ४ ॥

हरिहरिणसप्पसिहिनउलससगमज्जारमूसगाईया । अन्नोऽन्नमुक्कवेरा ओसरणमहिं समल्लीणा ॥ ५ ॥

बहुपुवभवपरंपरसमुवज्जियकम्मसत्तुभीयाणं । ओसरणं सरणंपिव रेहइ नीसेससत्ताणं ॥ ६ ॥

समवसर-  
णरचना.

॥ २५२ ॥

एतदंतरे तिपयाहिणीकाऊण नमंतसिरिमउडमाणिककिरणविच्छुरियपायपीढा सुरासुरिंदा पणमिऊण जिणं निय-  
नियठाणेषु निसन्ना, अह सहस्सनयणेण निसिद्धंमि कोलाहले निम्मलदसणमऊहजालपक्खालियाए इव निम्मलाए  
एगाएचि अणेगजणसंसयवुच्छेयसमत्थाए सुरनरसवरतिरियसाहारणाए सजलजलहरनिग्घोसगंभीराए आजोअणमि-  
त्तखेत्तपडिप्फलणपच्चलाए अमयवुट्ठीए इव निववियअसेसभवसत्तसंतावाए वाणीए पवत्तो जिणनाहो धम्मदेसणं  
काउं । कहं ?—

जह पाणवहाइसमुत्थपायनिवहेण भारिया जीवा । अयगोलगव भवसायरंमि मज्जंति वेगेण ॥ १ ॥

जह नाणदंसणचरित्तसेवणाहिं लहुं विसुज्झंति । पावंति य सोक्खपरंपराउ सग्गापवग्गेसु ॥ २ ॥

जह मिच्छत्तच्छाइयविवेयनयणा मुणंति न कयावि । नीसेसदोसरहियं देवं सुगुरुं च धम्मपरं (यं) ॥ ३ ॥

जह गिहकज्जासत्ता अवितत्ता कामभोगसोक्खेहिं । मणुअत्तं लद्धुं पि दु मुद्धा थोवेण हारंति ॥ ४ ॥

जह तप्पमायपरयाए भूरिसो ताणसरणपरिहीणा । पावंति दहणभेयणपमुहाइं दुहाइं नरएसु ॥ ५ ॥

जह पंचमहवयकवयगूढदेहा दलंति लीलाए । अब्भितरारिवग्गं अजेयममरासुरेहिंपि ॥ ६ ॥

जह सत्तुमित्तमणिलेद्धुसोक्खदुक्खेसु तुल्लचित्ताण । अमराहितोऽवि सुहं पाउब्भूएइ चहुययरं ॥ ७ ॥

तह जयगुरुणा नरतिरियदेवजणसंकुलाए परिसाए । हरिसभरनिब्भराए धम्मो सिद्धो जयवरिद्धो ॥ ८ ॥



श्रीगुणचंद्र  
महावीरच०  
८ प्रस्तावः

॥ २५३ ॥

अह पत्थरटंकुकीरियव दढवज्जलेवघडियव । जिणवयणामयपाणेण सा सहा निच्चलां जाया ॥ ९ ॥  
किंच-अनिमेसच्छीहिं मुहं जिणस्स पेच्छंतया विरायंति । देवत्तलच्छिवरिअव तक्खणं तिरियनरनिवहा ॥ १० ॥  
इओ य-तीसे नयरीए अचंतधणकणसमिद्धो छक्कम्मकरणपरो नियदरिसणपरुवियधम्मनिच्चलचित्तो सोमिलिज्जो  
नाम माहणो, तेण सग्गत्थिणा समारद्धो नयरीए वाहिंसि जन्नो, समाहूया दूरदिसाहिंतो बहुसिस्ससयपरिवारा असे-  
सविज्जाठाणपारगा चउव्वेयसुत्तत्थविसारया नियनियपन्नावलेवोवहसियसुरगुरुणो इंदभूइपमुहा एकारस अज्झावगा,  
मीलियाइं घयमहुजवपमुहाइं जागोवगरणाइं, पगुणीकयाओ दक्खिणानिमित्तं पवरपट्टणुग्गयचेलकणगाइरासीओ,  
भत्तीए कोउगेण उवरोहेण य समागओ बहुजणवओ, समारद्धो हुयवहे अणवरयमंतुच्चारपुव्वयं जन्नोवगरणपक्खेवो ।  
एत्थंतरे गयणयलमइवयंताइं सुरवहूसणाहाइं देवविंदाइं अवलोइऊण परितुट्ठो पेच्छगजणो, जंपेइ य-सुहु लट्ठं जट्ठं  
जन्निएहिं, जं सयमेव विग्गहवंतो तियसा परितुट्ठा इहइं अवयरंतित्ति, अह चंडालनिलयं व जन्नवाडयं परिह-  
रिऊण समोसरणसंसुहं गंतुं पयट्ठेसु तेसु वियंभियो लोयप्पवाओ, जहा-सव्वन्नू तीयाणागयवत्थुजाणगो लोणुत्तरि-  
स्सरियरुवसामत्थजसाइगुणावासो एत्थ समोसट्ठो, तस्स पूयणत्थं एस नयरजणो विमाणारूढा तियसा य गच्छंतित्ति,  
अह सव्वन्नूत्ति गिरं सोउं उप्पन्नगाढपरिकोवो । नियलोयाणं पुरओ इंदभूई इमं भणइ ॥ १ ॥  
मोत्तूण ममं लोगा तस्स समीवंमि कीस वचंति ? । किं कोऽवि ममावि पुरो सव्वन्नू अत्थि एत्थ जए ? ॥ २ ॥

जिनस्य  
देशना  
देवागमे  
गणधरा-  
णामीष्याः

॥ २५३ ॥

गच्छंतु व मुखजणा देवा कहऽणेण विम्हयं नीया ? । पूयंति संशुणंति य जेणं सवण्णुबुद्धीए ॥ ३ ॥

अहवा जारिसओ सो सवण्णू तारिसा सुरा तेऽवि । अणुसरिसो संजोगो गामनडाणं व मुख्खाणं ॥ ४ ॥

किं वा इमिणा बहुजंपिएण ? अज्जवि असिद्धकज्जंमि । सयमेव तत्थ गंतूण हेउजुत्तीहिं तं समणं ॥ ५ ॥

काउं हयप्पयावं पुरओ देवाण दाणवाणं च । नासेमि अहमसेसं खणेण सवण्णुवायं से ॥ ६ ॥ जुम्मं ।

इय साहंकारं जंपिऊण पंचहिं सएहिं सिस्साणं । परियरिओ सो पत्तो जयगुरुणो पायमूलंमि ॥ ७ ॥

तयणु-ससहरकासकुसुमोहहिमपंडुरलत्ततियनिहयतरणिकरनियरूपसरह, पमिलंतसायरनरखयरसुरिंदसंदोहवंदह ।

पेच्छिवि जयनाहह महिम इंदभूइ मणंमि, किं एयंति चमक्खियओ तक्खणि ओसरणंमि ॥ ८ ॥

एत्थंतरंमि भुवणेकभाणुणा जिणवरेण संलत्तो । भो इंदभूइ ! गोयम सागयमिइ महुववाणीए ॥ ९ ॥

ताहे चित्तियमिमिणा नामंपिहु मे वियाणए एसो । भुवणेऽवि पायडजसं अहवा को मं न याणेइ ? ॥ १० ॥

जइ हिययगोयरं मे संसय मण्णेज्ज अहव छिंदेज्जा । ता होज्ज विम्हओ मे इय चित्तंतो पुणो भणिओ ॥ ११ ॥

किं मण्णे अत्थि जीओ उयाहु नत्थित्ति संसओ तुज्झ । सुंदर ! परिचयसु इमं संदेहं माणपडिसिद्धं ॥ १२ ॥

अत्थि जिओ निब्भंतं इमेहिं सो लक्खणेहिं मुणियवो । चित्तंचेयणसण्णाविण्णाणाईहिं पयडेहिं ॥ १३ ॥

जइ पुण न होज्ज जीवो अवट्ठिओ सुकयदुक्कयाहारो । ता जागदाणनाणोवहाणपमुहं मुहा सव्वं ॥ १४ ॥

श्रीगुणचंद  
महावीरच०  
८ प्रस्तावः

॥ २५४ ॥

इय जयगुरुणो वयणं सोउं परिभाविउं च मइपुवं । मिच्छत्तेण समं चिय उज्झइ तं संसयं झत्ति ॥ १५ ॥  
अह ववगयकुविगप्पो दप्पं सप्पं व उज्झिउं दूरे । संसारविरत्तमणो निवडइ चलणेषु जगगुरुणो ॥ १६ ॥  
भणइ य भयवं ! नियदिक्खदाणओ मज्झणुग्गहं कुणसु । इय वुत्ते नियहत्थेण दिक्खिओ एस जयगुरुणा ॥ १६ ॥ १ ॥  
तं पवइयं सोउं अग्निभूर्इवि चिंतइ एयं । वच्चांमि तमाणेमी पराजिणेऊण सव्वण्णुं ॥ १७ ॥  
मण्णे छलाइणच्चिय छलिओ माइंदजालिएणं व । समणेण तेण तुम्हा उवेक्खणिज्जो न सो होइ ॥ १८ ॥  
संसयमेगंपि समं जइ पुण छिंदेज्ज होमि ता सिस्सो । तस्सत्ति जंपमाणो सोवि गओ जिणवरसमीवं ॥ १९ ॥  
हे अग्निभूर्इ ! कम्मं अत्थी नत्थित्ति संसओ तुज्झ । वाढमजुत्तो एसो विज्जइ जं कम्ममिह पयडं ॥ २० ॥  
कहमण्णहा समेऽवि हु करसिरपमुहंगदेहसंवंधे । एक्के भवंति सुहिणो अण्णे पुण दुक्खिया निचं ॥ २१ ॥  
धारियधवलायवत्ता विलासिणीविहुयचामरा एगे । भडचडगरपरियरिया वच्चंति करेणुगारूढा ॥ २२ ॥  
अण्णेऽणुवाहण चिय पए पए भयवसेण कंपंता । एगागिणो वरागा कहकहवि पंहमि गच्छंति ॥ २३ ॥  
एगे लीलाए चिय पूरंति मणोरहे बहुजणाणं । नियउयरंपिऽवि अन्ने भरंति भिक्खाए भसणेण ॥ २४ ॥  
ससहरमुहीहिं विंवाहरीहिं पप्फुल्लकुवलयच्छीहिं । एगे विलसंति विलासिणीहिं सद्धिं सभवणेषु ॥ २५ ॥  
मकडमुहीहिं मिरियत्थणीहिं अइलंबमोदुपोट्टाहिं । पच्चक्खरक्खसीहिं व अन्ने गिहिणीहिं सह ठंति ॥ २६ ॥

श्रीमतो  
गातमस्य  
अग्निभूतेश्च  
प्रतिबोधः

॥ २५४ ॥

तुलंमिचि संवंधे समेऽवि कालाइयंमि एगस्स । संपज्जइ बहुलाभो मूलंमि पणस्सइ परस्स ॥ २७ ॥  
इय एवंविहकज्जाण कारणं कम्ममेव नायधं । निकारणाइं जायंति जेण न विचित्तकज्जाइं ॥ २८ ॥  
एवं वुत्ते निच्छिन्नसंसओ पंचसिस्ससयसहिओ । भववेरग्गमुवगओ पडिवज्जइ सोऽवि पवज्जं ॥ २९ ॥ २ ॥  
अह वाउभूइनामो सहोयरो तेसिमेव लहुयवरो । पम्मुक्कमच्छरो भत्तिनिब्भरुब्भिन्नरोमंचो ॥ ३० ॥  
कह तेऽवि तेण विजियत्ति विस्सयं परममुच्चहंतो य । एइ जिणसन्निगासं संसयवोच्छेयमिच्छंतो ॥ ३१ ॥  
अह सो जएक्कगुरुणा पयंपिओ भइ ! कीस वहसि तुमं । तज्जीवं तस्सरीरंति संसयं जुत्तिपडिसिद्धं ? ॥ ३२ ॥  
जेण सरीरजियाणं एगंतेगत्तकप्पणे जीवो । नो होज्ज देहनासे घडभंगे तस्सरूवं व ॥ ३३ ॥  
देहे य विजमाणे जीएण विवज्जिएवि जाएज्जा । चित्ताइया धम्मा न य ते तच्चिरहओ दिट्ठा ॥ ३४ ॥  
तस्सा भिन्नाभिन्नो विन्नाणघणो सरीरओ जीवो । अन्नोचिय मुणिगघो एवं भणियंमि पडिवुद्धो ॥ ३५ ॥  
पंचहिं सिस्ससएहिं सहिओ सोऽवि हु जिणस्स पासंमि । निच्छिन्नपेमबंधो मुंचइ घरवासवासंगं ॥ ३६ ॥ ३ ॥  
अह इमे तिन्निवि गहियपवज्जे निसामिऊण दुरुम्मुक्कमच्छरो गच्छामि संसयं च पुच्छामि न सामन्नरूवो सो भय-  
यंति बहुमाणमुच्चहंतो वियत्तो नाम अज्झावगो गओ जिणसमीवं, वागरिओ य भयवया, जहा-भइ ! वियत्त ! तुह पंच-  
भूयसत्ताविसओ संसओ, सो य न जुत्तो, जओ पच्चक्खदिस्समाणा(भू)जलणजलानिलाइणो भूया कहं अवलविउं

श्रीगुणचंद  
महावीरच०  
८ प्रस्तावः

॥ २५५ ॥

तीरंति?, जं च वेए भणियं-‘सुविणोवमा सवे भावा’ इचाइ, तंपि खणविलाससीलयं सवभावाणं पडुच्च, न उण सवहा  
भूयाभावसाहगत्तणेणंति बुत्ते वियत्तो संसाराणुबंधेण समं चइऊण कुविगप्पं पंचहिं छत्तसएहिं अणुगम्ममाणो  
पवन्नो संजमुज्जोयं ४॥ तंमि य पवज्जं पवन्ने सुहम्मो नाम अज्झावगो विरुद्धवेयपयनिबंधणं संसयं पुच्छिउकामो  
संपत्तो जिणंतियं, सो य भयवंतं सिंहासणगयं पुवपवयसिंगाधिरूढं दिवायरं व पलोइऊण परमं पमोयपन्भारमणु-  
भवंतो संलत्तो जिणेण-अहो सुहम्म! तुमं इमं संसयं वहसि-जो इह भवे पुरिसो पसू वा सो परभवेऽवि पुरिसत्तं  
पसुत्तं वा लहइ, इमं च न जुत्तं, जओ जो इह जम्मे सभावेण मइवज्जवाइगुणजुओ मणूसो सो मणुयाउयं कम्मं  
बंधिऊण भवंतरे पुरिसत्तणं पाउणइ, पसूऽवि मायाइदोसजुत्तो पुणोऽवि पसुत्तणं पडिवज्जइ, न उण निच्छएण,  
जेण कम्मसवपेक्खा जीवाण गइरागइत्ति, न य कारणाणुरूवं कज्जंति सवत्थ वित्त्यारिउं पारीयइ, विलक्खणरूवाओ  
सिंगाइकारणाओऽवि सराईणमुप्पत्तिदंसणाओ, एवं च निसामिऊण वोच्छिन्नसंसओ पंचसयविणेयपरिवुडो सुहम्मो  
भयवओ सिस्सो जाओत्ति ५॥ अह तंमि पवइए मंडियनामो अज्झावगो पुवकमेण पत्तो समोसरणं, वागरिओ य  
भगवया-हंत वंधमोक्खविसयं संदेहं तुमं कुणसि, नणु न जुत्तमेयं, जओ वंधमोक्खा सुपसिद्धा चेव । कहं?—  
मिच्छत्तपमायकसायदुट्टजोगाइकारणेहिं दढं । जीवस्स कम्मबंधो जायइ अइभीसणो तत्तो ॥ १ ॥  
अणुहवइ रज्जनहुव सवया नरयतिरियठाणेसु । किन्विसदेवनरेसु य दुक्खाइं परमतिकखाइं ॥ २ ॥

तृतीयचतु-  
र्थपंचमग-  
णधराणां।

॥ २५५ ॥

मोक्षो पुण निम्मलनाणचरणसद्धानपरमहेऊहिं । कम्माण जो विओगो सो नेओ सिवसुहृत्फलओ ॥ ३ ॥  
 नणु कहमणाइनियकम्मजोगओ तेसि होज्ज उ पिदुत्तं । भण्णइ जह जलणेणं कंचणउवलाण अन्नोऽन्नं ॥ ४ ॥  
 एवं जियकम्माणयि विसिद्धनाणाइकारणेहिंतो । होइ विवेगो तत्तो मोक्खो सिद्धो सयं चेव ॥ ५ ॥  
 एवं च पलीणंमि संसयतमंमि नमिऊण जयगुरुणो चलणुप्पलं अद्भुट्टसिस्ससयपरिवारो मंडिओ अणगारगग्गम-  
 णुल्लगोत्ति ६ ॥ अह मोरिओऽवि अप्पडिममाहप्पं सामिं नाऊण समागओ समोसरणं, भणिओ य भगवया—भइ!  
 तुमं देवाभावविसयं संदेहमुच्चहसि, तं च इयाणिं परिचयसु, जओ पच्चक्खदिस्समाणंमि अत्थंमि किं अणुमाणस्वे-  
 षणाहिं?, एए देवा विमलमणिकुंडलपहापडलपल्लवियगंडलेहा नियंसियदिदंमुया सरीरकंतिसमुज्जोइयदिसिनिवहा  
 महासोक्खा अपरिभूयसासणा मुणिणोव नभोगमणा इह चेव संपयं वट्ठंति, अओ अणुचिया एयाण विसण, अभा-  
 वकप्पणा, जं च सेसकालं न दीसंति तत्थ लोयगंधस्स अच्चंतमसुभत्तणओ पेच्छयणावलोयणाइसु य निचमभिव-  
 त्तचित्तत्तणेण न कहंपि आगंतुमुच्छंति, जिणमज्जणाइसु पुणो भत्तिभरायद्विया आगच्छंति य । एवं मुणिण वत्थुत्तत्ते  
 मोरिएण अद्भुट्टसिस्ससयपरियररण अम्भुवगया भावसारं जिणपव्वज्जत्ति ७ ॥ अह अकंपिओऽवि कोऊहलाउल्लिय-  
 चित्तो संसयमवणेउकामो संपत्तो भववओ समीवं, सागयभणणपुच्चयं च संभासिओ जयगुरुणा—अहो अकंपिय ! तुमं  
 एवं मत्तेसि, जहा—देवा चंदसूरतारयपमुहा ताव पच्चक्खदंसणेण नज्जंति, नारया पुण सुमिणेऽवि अदिस्समाणा नूणं न

श्रीगुणचंद  
महावीरच०  
८ प्रस्तावः

॥ २५६ ॥

संतित्ति, अणुचियं इमं, जओ ते नारया कम्मपरतंतत्तणेण इहागंतुमसमत्था, तुम्हारिसावि तत्थ गंतूणमक्खमा, ता कहमुवलंभो जाएज्जा?, खाइगनाणोववेयाणं पुण वीयरगाण पच्चक्खा चेव, न य खाइगनाणोववेया असेसपयत्थसत्थ-वेइणो न संतित्ति वोत्तवं, मए चिय वभिचारसभंवाओत्ति, एवं छिन्नंमि संसए तिहिं खंडियसएहिं समं अकंपिओ अणगारियं पडिवन्नोत्ति ८ ॥

एत्थावसरंमि अयलभाया नाम अज्झावगो सुणियजिणमाहप्पो मणोगयवियप्पनिब्भंजणत्थं गओ जयगुरुसमीवं, भणिओ य सामिणा, जहा-भो अयल! पुन्नपावाइं अत्थि नत्थित्ति संसयं तुममुव्वहसि, अजुत्तिसंगयं चेयं, सुहा-सुहफलजणगत्तणेण पुव्वभणियकम्मपक्खनाएण चेव पुन्नपावाणवि पसाहणाउत्ति भणिए जायजहावट्ठियविवेओ तिहिं खंडियसएहिं समेओ चारगंव भववासं उज्झिऊण समणो जाओत्ति ९॥ तयणंतरं च तं पव्वइयं सोऊण जिणं-तियं पाउब्भूओ मेअज्जो नाम अज्झावगो, सोऽवि संलत्तो तिहुयणेक्कचक्खुणा महावीरेण, जहा-सुंदर! तुमंपि इमं विगप्पेसि-भूयसमुदायधम्मत्तणेण चेयणारूवस्स जीवस्स कहं भवंतरगमणं घडेज्जा?, भूयववगमे चेयणारूवजीवस्सवि विगमाउत्ति, नणु अघडमाणमेयं, पुढवाइंण भूयाण एगत्थ मीलणेऽवि चेयणाणुवलंभाओ, तम्हा तवइरित्ता चेव चेयणा जीवधम्मरूवा अब्भुवगंतवा, तदब्भुवगमे य जीवस्स निरुवचरिओ परभवगमो सिद्धो चेव, जाइसरणाइहिं परभवसाहणाओ य, एवं कहिए निच्छिन्नसंसओ मेयज्जो तिसयसिस्सपरियरिओ भयवओ समीवे पव्वइओ १० ॥

पष्ठादीनां  
दशमा-  
न्तानां.

॥ २५६ ॥

अह दससुवि तेसु पवजं पडियन्नेसु पभासो सकोऊहलं तिहिं सएहिं खंडियाणं परिबुडो दूरमुक्कपंडिचाभिमाणो  
 पंजलिउडो भुवणच्छेरयकारयविचित्तातिसयसमेयं सामिं दट्टूण हरिसुप्फुल्ललोयणो संसयं पुच्छिउकामोऽवि संखो-  
 भेण वोत्तुमपारयंतो भणिओ पारगएण—अहो पहास ! निवाणमत्थि नत्थित्ति संदेहदोलमालंवेसि तुमं, नणु उज्झ-  
 सु सवहा एयं, जओ अइसयनाणिपचक्खत्तणेण सयलकम्मकलंकपमुक्कजीवावत्थाणट्ठाणं निवाणं चउग्गइयसंसा-  
 रायासविलक्खणरूवं निरुवचरियं अत्थि, सुद्धपयकि(वच्च)त्तणाओ जीवोव, तं च बुहेहिं सदहियवं, जं पुण  
 अविज्जमाणं तं सुद्धपयवच्चंपि न होइ, जहा आगासकुसुमंति भणिए पणट्टसंसओ जयगुरुं पणमिऊण सपरिवारो  
 पभासोऽवि समणो जाओत्ति ११ ॥ एवं च—

वोच्छिन्नपेम्मवंचणा पणट्टकम्मसंधणा, विसिट्टजाइसंभवा पसिट्टगोत्तउब्भवा ।

पहाणरूवसालिणो विसुद्धकित्तिधारिणो, अचिन्तसत्तिसंजुया असेससत्थपारया ॥ १ ॥

पयंडकामखंडणा पहीणदोसभंडणा, सुरासुरिंदवंदिया समग्गलद्धिनंदिया ।

जिणिंदधम्मसंगया विमुक्कसच्चसंगया, गुणावलीहिं सोहिया न कामिणीहिं मोहिया ॥ २ ॥

इय इंदभूइपमुहा मुणिणो एकारसावि तवेळं । दिसिदंतिणोव रेहंति सिस्सकरिकलहपरियरिया ॥ ३ ॥

किं वा वन्निज्जइ तेसि जेसि सयमेव भुवणनाहस्स । कप्पतरुक्सिलयसमो हत्थो सीसंमि संठाइ ॥ ४ ॥



श्रीगुणचंद  
महावीरच०  
८ प्रस्तावः

॥ २५७ ॥

इओ य-जा पुवभणिया दहिवाहणरायसुया चंदणाभिहाणा कन्नगा पढमसिस्सिणी भयवओ भविस्सइत्ति सक्केण संगोवाविया आसि सा तक्कालं सयाणियरायमंदिरे निवसंती गयणंगणे अणवरयं सुरविमाणाइं इंताइं गच्छंताणि य पलोइऊण निच्छियजिणकेवलनाणसमुप्पाया पवज्जागहणुक्कंखिरी अहासन्निहियदेवयाए करयलेण कलिऊण समो-सरणसुवणीया समाणी परमं पमोयसंभारमुव्वहंती तिपयाहिणादाणपुव्वगं वंदिऊण जिणसुवट्ठिया पवज्जागहणत्थं ।

एत्थंतरे अन्नाओवि राईसरतलवरसेट्ठिसेणावइमंतिसामंतकन्नगाओ जिणवइवयणायन्नणजायभववेरग्गाओ सबवि-रइगहणत्थं तदंतियं पाउब्भूयाओ । तओ भगवया चंदणं पुरओ काऊण सहत्थेण दिक्खियाओ, पवज्जासमुज्जम-उसमत्था य बहवे जणा ठाविया सावयधम्ममे, एवं एत्थ समोसरणे जाओ भगवओ चउच्चिहो संघो ॥ जायंमि य गुणरयणरयणागरंमि संघे भगवया इंदभूइपमुहाणं पहासपज्जवसाणाणं एक्कारसण्हंमि तेसिं सयलभुवणगयत्थसत्थ-संगहधम्मयाइं 'उप्पन्नेइ वा विगएइ वा खुवेइ व'त्ति कहियाइं तिस्सि पयाइं, तेहि य पुवभवच्चमत्थसमत्थपरमत्थ-सत्थवित्थारवियक्खणत्तणेण तक्कालुप्पन्नपन्नाइसयमुव्वहंतेहिं तयणुसारेण विरइयाइं दुवालस अंगाइं, तहा विरयमा-णाणं च सत्तण्हं गणहराणं जायाओ विभिन्नाओ वायणाओ, येअज्जपभासाणं अयलभाइअकंपियाण य परोप्परं समाओ चेव, एवं च निवत्तिए सुत्तविरयणे इंदभूइपमुहाणं गणहरपयंमि ठावणनिमित्तमुवट्ठिए सयमेव भुवणवंधवे अवसरंति कलिऊण पवरगंधवंधुरवासुम्मिस्सत्तुण्णभरियं रयणत्थालं गहिऊण सुरनियरपरियरिओ सुरिंदो पाउ-

प्रभासस्य-  
बोधः स-  
र्वेषां दीक्षा  
चन्दनना-  
लादीनां च.

॥ २५७ ॥

भूओ जिणंतियं, ताहे सामी सीहासणाओ उट्टिता पडिपुण्णं मुट्ठिं चुण्णाणं गिण्हइ, तयंंतरं गोयमसामिप्पंसुहा  
 एकारसवि गणहरा ईसिओणया परिवाडीए ठायंति, निरुद्धेहिं तियसेहिं तूररवे जयगुरू गुणेहिं पज्जवेहि य मए  
 तुह तित्थमणुण्णायंति भणमाणो पढमं चिय सहत्थेण गोयमसामिणो सीसदेसंमि चुण्णाणि पक्खिवइ, एवं चिय  
 जहक्कमेण सेसगणहराणंपि, देवावि गयणयलमोगाढा आणंदवियसियच्छा गंधंधीकयमुद्धकुलंधुयमुहुलंधियमुहलं  
 पुप्फवासं चुण्णवासं च निसिरंति, गणं पुण चिरजीवित्तिकलिऊण सुहम्मसामीं पंचमगणहरं धुरे ठवेत्ताभयवं अणुजाणइ ।  
 चंदणंपि अज्जाणं संजमुज्जोगघडणत्थं ठावेइ पवत्तिणीपए । एवं एकारसहिं गणहरोहिं अणेगेहिं साहूहिं साहुणीहि  
 य परियरिओ जंबुदीपोघ दीवंतरेहिं सुमेरुघ कुलाचलेहिं ससिब तारानिवहेहिं सामी सोहिउं पवत्तो । अवि य-  
 एगाणिणोवि भुवणेक्कवंधुणो को मिणेज्ज माहप्पं ? । किं पुण गोयमपमुहेहिं गणहरोहिं परिगयस्स ॥ १ ॥

अह कइवय दिवसाइं भवसत्तजणं पडिवोहिऊण तत्तो निक्खंतो जयगुरू । तो आगासगएणं लंवंतमोत्तियंजाल-  
 विराइएणं छत्तेणं आगासगयाइं कुमुयमयंकमऊहमणहराहिं चामराहिं गयणयलावलंविणा समणिपायपीढेण सीहा-  
 सणेणं रणज्झणिरकिंकिणीकुलकलकलमुहलेण अगेगकुडुभियाभिरामेण पुरोगामिणा माहिंदज्झएण य विरायंतो  
 सायरं अणुगच्छंतीसु सुरासुरकोडीसु अणुकूलंतेसु वायंतंतेसु सुरहिसमीरणेसु भत्तीएव नमंतंतेसु मग्गतरुवरेसु सुणिय-  
 वियारेसु खलेसु व हेट्ठओमुहं ठायंतंतेसु कंटगेसु मणोरमेसु सव्वेसु उउसु निययमाहप्पेण तिलोयरज्जसिरिं एगत्य मि-

श्रीगुणचंद  
महावीरच०  
८ प्रस्तावः

॥ २५८ ॥

लियमुवदंसयंतो दुब्भिव्वमारिडमराइं उवसामितो ठाणठाणेसु समोसरणमहिमं पडिच्छमाणो परप्पवाए सुत्रीकुण-  
माणो जेवाणमग्गं पयासयंतो विरइप्पयाणेण भवसत्तजणमणुगिण्हंतो पुरगामखेडकव्वडाइसु विहरमाणो कमेण  
संपत्तो पुव्वभणियं माहणकुंडग्गामं नयरं ।

तहिं च नयरदूरवत्तिमि नाणाविहतलयासंकुलंमि बहुसालयनामंमि चेइयंमि विरइयं परमविच्छित्तिसणाहं  
सुरोहिं समोसरणं, रयणपागारव्वंतरे पइट्ठियं पुव्वाभिमुहं समणिपायपीढं सीहासणं, निसन्नो तत्थ जएक्कचूडामणी  
महावीरो, पायपीढपचासन्ने य निलीणो भयवं गोयमसामी, नियनियठाणेसु निविट्ठो देवनरतिरियनिवहो ।  
एत्थंतरे वित्थरिया माहणकुंडग्गामे नयरे पसिद्धी, जहा-बहुसालगचेइयंमि भयवं महावीरो समोसढोत्ति, एयं  
च निसामिऊण पुव्वभणिओ उसभदत्तमाहणो परमपमोयभरनिभरभरियमाणसो देवाणंदं माहणीं भणिउमाढत्तो,  
जहा-तइलोकतिलयभूओ भूयत्थकहापरुवणसमत्थो । सुंदरि ! सिरिवीरजिणो सयमेव समोसढो वाहिं ॥ १ ॥

निरुवमकल्लाणकलावकारणं तस्स दंसणंपि पिए ! । किं पुण अभिगमवंदणपयसेवापमुहपडिवत्ती ? ॥ २ ॥

ता वच्चाओ तदंसणेण कुणिमो सजीवियं सफलं । तीए वुत्तं पिययम ! किमजुत्तं ? एह वच्चाओ ॥ ३ ॥

सा किर जइविसंचिय गब्भाओ अवहडो जएक्कगुरु । तत्तो चिय अचत्थं समुवहित्था महासोगं ॥ ४ ॥

अह तदब्भुवगमं नाऊण उसभदत्तेण आहुया कोडुंवियपुरिसा, भणिया य-ओ ! सिग्घमेव वररयणमयकिंकिणी-

गणधर-  
पदवी सूत्र-  
रचना ब्रा-  
ह्मणकुण्डे  
गमनं.

॥ २५८ ॥

जालमंडियमज्झभागेहिं कंचणनत्थापग्गहिण्हिं नीलुप्पलविरइयसेहरेहिं उल्लिहियसिंगेहिं लट्ठपुट्टसरीरेहिं पवरगो-  
णज्जुवाणएहिं संगयं संजत्तेह संदणं जेण गंतूण वंदामो जयगुरुं, जं सामी आणवेइत्ति भणिऊण निग्गया कुडुंविंयां  
पुरिसा, पग्गुणीकओ रहवरो, समुवणीओ उसहदत्तस्स, तओ देवाणंदाए समेओ तमारुहिऊण पुरिसपरिवारपरिय-  
रिओ पयट्ठो जिणाभिमुहं, पत्तो कमेण बहुसालयसमीवं, छत्ताइच्छत्तपमुहाइसयदंसणेण य रहाओ पच्चोरुहिऊण  
पंचविहेणं अभिगमेणं पविट्ठो समोसरणे, तिपयाहिणादाणपुव्वयं च पणमिऊण जिणं पहिट्ठमणो निविट्ठो भूमिपट्ठे ।  
देवाणंदाऽवि भगवंतं पणमिऊण सविणयं उसहदत्तं माहणं पुरओ काऊण उद्धट्ठाणट्ठिया चेव सुस्सूसमाणी  
भालत्तलारोवियपाणिसंपुडा पज्जुवासिउमारद्धा, नवरं जंसमयं चेव तीसे भयवं चक्खुगोयरमुवगओ तंसमयं चिय  
वियसियवयणकमला हरिसुप्फुल्ललोयणसंदमाणाणंदसलिला जलहरधारापहयकयंवकुसुमंपिव समूससियरोमकूवा  
धणमुहनिस्सरंतखीरधारा य जायत्ति, तं च तहाविहं पेच्छिऊण समुप्पन्नसंसओ गोयमसामी जयगुरुं पणमिऊण  
पुच्छिउं पवत्तो-भयवं ! किं कारणं देवाणंदा अणिमिसाए दिट्ठीए तुम्ह वयणं पेहमाणा नियसुयदंसणाणुरूवा  
पेमपब्भारगव्भयमवत्थं पत्तत्ति ? भगवया भणियं-भो गोयम ! देवाणंदा ममं जणणी, अहण्णं देवाणंदाए कुच्छिसं-  
भवो पुत्तो, जओ सुरभवचवणाओ आरव्व वायासी दिणाइं इमीए गव्वंमि वुत्थो, अओ चिय पुव्वसिणेहाणुरागेण  
एसा अमुणियपरमत्थावि एवंविहं संभममावन्ना ।

श्रीगुणचंद  
महावीरच०  
८ प्रस्तावः

॥ २५९ ॥

इय सोऊण जिणिंदस्स भासियं उच्छलंतरोमंचा । देवाणंदाए समं झडत्ति जाओ उसभदत्तो ॥ १ ॥  
परिसाजणोऽवि सवो विम्हयमचंतमुवगओ सहसा । अस्सुयपुवे सुणिए को वा नो विम्हयं वहइ ? ॥ २ ॥  
तओ उसभदत्तो देवाणंदा य समुप्पन्नगाढयरहरिसपगरिसाइं पुणोऽवि निवडियाइं जयगुरुणो चलणेसु, भयव-  
यावि 'दुप्पडियारा अम्मापियरो'त्ति सेसलोयस्स उवदंसणत्थं च पारद्धा देसणा । कहं चिय ?  
भो भो देवाणुपिया ! अणाइरूवंमि एत्थ संसारे । को फिर कस्स न जाओ मायापिइपुत्तभावेहिं ? ॥ १ ॥  
कस्सवि न वा विओगे अणवरयगलंतनयणसलिलेण । पइसमयमुक्कपोकं हाहारवगन्धिभणं रुत्तं ? ॥ २ ॥  
चोदसरज्जुपमाणे लोगे नो कत्थ वावि वुत्थमहो ? । अणवरयमावयाणं काण व नो भायणं जाओ ? ॥ ३ ॥  
कस्स व आणानिदेसवत्तिणा दासनिविसेसेण । नो वट्ठियं दुहट्ठेण पाणिलोएण एएण ? ॥ ४ ॥  
एवंविहदुहनिवहेक्ककारणे कह भवे महाभीमे । खणमेत्तंपि विजायइ निवासवुद्धी सुवुद्धीणं ? ॥ ५ ॥  
एत्तो चिय सासयसोवखकंखिणो लक्खिखउं भवसरूवं । तणमिव रज्जाइ समुज्झिऊण पवज्जमल्लीणा ॥ ६ ॥  
ता जाव पुन्नपब्भारपावणिज्जा इमा हु सामग्गी । तुब्भेवि ताव गिण्हह निस्सेयससाहगं धम्मं ॥ ७ ॥  
इय जगगुरुणा कहिए तेसिं आणंदसंदिरच्छीणं । केवलमणुभवगम्मो कोइ पमोओ समुप्पन्नो ॥ ८ ॥  
तओ उसभदत्तो देवाणंदाए समेओ हट्ठलुट्ठो उट्ठिऊण सामिं तिवखुत्तो वंदिऊण करयलकमलकोससेहरं सिरं

देवानन्दा-  
ऊपभदत्त-  
धर्मश्रवणं.

॥ २५९ ॥

दूरं उन्नामिऊण भणिउं पवत्तो-भयवं ! अवितहमेयं जं तुब्भे वयह, ता अणुगिण्हह अग्गे सदिकखापयाणेणं, विर-  
त्तमिण्हिं गेहवासाओ माणसं, भगवया भणियं-जुत्तमेयं भवारिसाणंपि, तओ कयकिचमप्पाणं मन्नंताइं उत्तर-  
पुरत्थिमदिसिसमुज्झियभूसणकुसुमदामाइं निवत्तियपंचमुट्ठियलोयकम्माइं ताइं तिपयाहिणादाणपुरस्सरं परमेसरं  
वंदित्ता भणिउं पवत्ताइं-भयवं ! जरामरणरोगसोगविप्पओगजलणजालाकलावकवलियाओ अग्गे एत्तो भवजरकुडी-  
राओ नित्तारेसु सहत्येण तुमं, तुह पयसरणमल्लीणो खु एसो जणो, इय भणिए भुवणगुरुणा सयमेव तेसिं दिन्ना  
दिक्खा, कहिओ साहुसमायारो परूविओ आवस्सयविही, एवं तक्कालोचियं सघं विहिं देसिऊण भयवं अज्जचंद-  
णाए पघत्तिणीए देवाणंदं सिस्सिणित्ताए पणामेइ, उसभदत्तं च थेराणं समप्पेइ, अह ताइं निकलंकसमणधम्मपरि-  
पालणवद्धलक्खाइं अपुद्वापुद्गतवचरणपरायणाइं अहिण्णकारसअंगाइं पज्जंतसमयसमाराहियसंलेहणाइं निव्वाणमहा-  
संदिरारोहहेऊभूयं निस्सेणिंपिव खवगसेणिं आरुहिऊण पत्ताइं दोन्निवि सिवपयंमि ।

भयवंपि यद्धमाणो परिअरिओ गोयमाइसमणेहिं । हिययाहितोवि तमं अवाणिंतो भवसत्ताणं ॥ १ ॥

गामागरनगराइसु विहरंतो सिवपयं पयासिंतो । खत्तियकुंडग्गामे नयरम्मि कमेण संपत्तो ॥ २ ॥

तत्थ य सुरेहिं रइयं चीतरुपायारगोयरसणाहं । ऊसियसियधयनिवहं जणसुहकरणं समोसरणं ॥ ३ ॥

वत्तीसंपि सुरिंदा जिणसुहकमलावलोयणसतण्हा । विविहविमाणारूढा ओअरिया सुरपुरीहितो ॥ ४ ॥

श्रीगुणचंद  
महावीरच०  
८ प्रस्तावः

॥ २६० ॥

अह पुवदुवारेणं पविसित्ता सुरगणेण थुवंतो । सिंहासणे निसन्नो पुवाभिसुहो जिणवरिंदो ॥ ५ ॥  
एक्कारसवि गणहरा केवलमणपज्जवोहिनाणी य । चउदसदसपुवीविउच्चिइहीपत्ता य मुणिवसभा ॥ ६ ॥  
उद्धट्ठिया उ वेमाणियाण देवीओ तहय समणीओ । ठायंति जिणं नमिउं दाहिणपुवंमि दिसिभाए ॥ ७ ॥  
अह दाहिणदारेणं पविसित्ता विणयपणयदेहाओ । भवणवइवाणमंतरजोइसदेवाण देवीओ ॥ ८ ॥  
काउं पयाहिणं भुवणवंधुणो धम्मसवणलोभेण । निसियंति पहिट्ठाओ दाहिणपच्चत्थिमविभागे ॥ ९ ॥  
तत्तो पच्छिमदारेण पविसिउं पवरभूसणसणाहा । भवणवइवाणमंतरजोइसिया हरिसपणयसिरा ॥ १० ॥  
विहिणा जिणं नमंसिय गणहरकेवलपमोक्खमुणिणो य । निविसंति जिणाभिसुहा उत्तरपच्चत्थिमदिसाए ॥ ११ ॥  
उत्तरदिसिदारेणं तत्तो पविसित्तु दिवरूवधरा । वेमाणियसुरवग्गा नरा य नारीजणा य तहा ॥ १२ ॥  
पम्मुक्कपरोप्परवेरमच्छरा धम्मसवणतल्लिच्छा । उत्तरपुरत्थिसंमि य ठायंति दिसाविभागंमि ॥ १३ ॥  
न कुणंति हासखेड्डाई नेव चक्खुं खिवंति अन्नत्थ । चित्तलिहियच्च सवे जिणिंदवयणं पलोयंति ॥ १४ ॥  
तयणंतरं च बीए पायारब्भंतरे तिरियवग्गो । हयमहिससीहपमुहो उज्झियवेरो सुहं वसइ ॥ १५ ॥ कहां चिय ?—  
दिणयरकरसंतत्तं भुयंगमं छाये सिहंडेहिं । तंडविण्हिं सिंहंडी करुणाए विमुक्ककुविगप्पे ॥ १६ ॥  
कंडूयइ दसणकोडीए कुंजरो केसरिस्स मुहभागं । धावारइ सीही हरिणसावयं दढ्ढुहाभिहयं ॥ १७ ॥

क्षत्रियकुंडे  
समव-  
सरणं.

॥ २६० ॥

मज्जारोऽवि हु ससिरंमि मूसगं ठवइ गाढपणएण । वणसेरिहोऽवि तुरयं रसणाए दढं परामुसइ ॥ १८ ॥  
 इय जत्थ निधिवेयावि पाणिणो तत्थ तियसनरनिवहा । उज्झंति मच्छरं जं परोप्परं तं किमच्छरियं ? ॥ १९ ॥  
 तइए पायारब्भंतरंमि देवाण विविहरूवाइं । विजयपडायापयडाइं संनिसीयंति जाणाइं ॥ २० ॥  
 एत्थंतरंमि भुवणेक्कभाणुणा कलियसयलभावेण । वयणकिरणेहिं मिच्छत्ततिमिरमवहरिउमारद्धं ॥ २१ ॥

इओ य पुद्यमेव जिणविहारनिवेयणवाचारियपुरिसेहिं सामिसमागमेण वद्धाविओ नंदिवद्धणनराहिवो, हरिसभर-  
 निस्सरंतरोमंचेण य तेण दवावियं तेसिं चित्तियाइरित्तं पारिओसियं, भणिओ य संनिहियकिंकरवग्गो-अरे! सिग्घं  
 संजत्तेह जयकुंजरं पगुणीकरेह तुरंगघट्टाइं पयट्टावेह नयरसोहं उब्भवेह सवविजयचिंधाइं आइक्खह आघोसणा-  
 पुद्ययं नयरीजणस्स जहा सिग्घं पाउब्भवह कयमज्जणविलेवणा. नियविभवाणुरूवजाणंजंपाणारूढा नरिंदसमीवं  
 जेण वंदिज्जइ महावीरोत्ति भणिए जं देवो आणवेइत्ति पडिवज्जिऊण संपाडियं नरिंदसासणं, समुवणीओ जयकुं-  
 जरो, समारूढो य नरिंदो, पुरजणेण परियरिओ पयट्टो भयवओ अभिमुहं, तओ छत्ताइच्छत्ते पेच्छिऊण पमुक्कराय-  
 चिंधो परेणं विणएणं जयगुरुं विन्नवेउं पवत्तो । कहं ?—

गयणंगणं व ससहरविवज्जियं नाह ! एत्तियं कालं । नयरमिमं तुह विरहे पणट्टसोभं दढं जायं ॥ १ ॥

अहमवि तुहऽणुवित्तीए नूण चत्तो न रायलच्छीए । अन्नह तुमए रहियस्स नाह ! का जोगगया मज्झ ! ॥ २ ॥



श्रीगुणचंद  
महावीरच०  
८ प्रस्तावः

॥ २६१ ॥

तुह सचरियाणं कित्तणेण पइदियहमेव पुणरुत्तं । साहारो मह जाओ जीयस्सवि निस्सरंतस्स ॥ ३ ॥  
ता अज्जं चिय सुदिणं अज्जं चिय वंछियाइं जायाइं । चिरकालाओवि जएक्कनाह ! जमिहागओ तंसि ॥ ४ ॥  
इय सव्भावुव्भडपेम्मगव्भवयणाइं जंपिउं राया । सट्ठाणंमि निविट्ठो ठविउं दिट्ठिं जिणमुहंमि ॥ ५ ॥  
इओ य तत्थेव नयरे भयवओ भाइणिज्जो ख्वलायण्णसाली जमाली नाम कुमारो परिवसइ, सो य वद्धमाणंमि  
पव्वज्जं पडिवत्ते नंदिवद्धणनरिंदेण भगवओ पुत्तिं पियदंसणाभिहाणं परिणाविओ समानो केलाससेलसिहरसमुत्तुंग-  
धवलहरमारूढो वज्जंतेहिं चउविहाउज्जेहिं वरतरुणीसंपउत्तेहिं वत्तीसइवद्धेहिं नाडएहिं उवगिज्जमाणो उवन-  
च्चिज्जमाणो य पाउसवासारत्तसरयहेमंतवसंतगिरुहपज्जवसाणे छचेव उउणो जहाविभवेणं माणयंतो पंचविहे पवरे  
माणुस्सए कामभोगे पचणुव्भवमाणो सिंगाडगतियचउक्कचचरेसु जिणगमणसवणहलफलियं परिचत्तवाचारंतरं हल-  
वोलाउलियदियंतरं जणसमूहं एगमग्गाणुलग्गं अवलोइऊण सविम्हयं नियपरियणमापुच्छइ—अरे किमज्ज एत्थ  
नयरे इंदमहो वा खंदमहो वा मुगुंदमहो वा नागमहो वा जक्खमहो वा चेइयमहो वा ? जं एस पुरजणो एवमे-  
गाभिमुहो गच्छइ, परियणेण भणियं—कुमार ! नो अज्ज इंदसंदाईणं ऊसवविसेसो, किंतु भयवं महावीरो तुम्ह  
माउलगो समणसंघपरिवुडो वाहिं समोसढो, तस्स वंदणवडियाए एस जणो वचइ, एवं च निसाभिऊण हरिस-  
वससमूससियरोमकूवो कयमज्जणविलेवणालंकारपरिग्गहो सकोरिंटमलदामेणं छत्तेणं धरिज्जमाणेणं नाणाविहपहरण-

नन्दिवर्धन-  
कृतास्तुतिः  
जमालेरा-  
गमनं च.

॥ २६१ ॥

करपुरिसपरिखित्तो पवररहनिसन्नो गओ समोसरणं, दूराओ चिय ओयरिओ रहाओ, परमाथरेण वंदिओ जिणो,  
तओ अणिमिसाए दिट्ठीए सामिमुहमवलोयमाणो पज्जुवासिउमारद्धो । भगवयावि पयट्ठाविया धम्मदेसणा ।  
कहं चिय ?—

करयलपरिगलियजलं व गलइ पइसमयमेव जीयमिमं । वाहिजरायंकाविय देहं दूमंति निचंपि ॥ १ ॥  
अइवहुकिलेससमुवज्जियावि विज्जुव चंचला लच्छी । पियपुत्तसयणजोगोऽवि भंगुरो जलतरंगोव ॥ २ ॥  
विसयपिवासा पिसाइयव दुन्निग्गहा तह कहंपि । वामोहइ जह थेवंपि नेव संभवइ वेरग्गं ॥ ३ ॥  
अवरावरगिहवावारविरयणावाउलो सयावि जणो । कीणासमुहं वचइ अणुवज्जियधम्मपाहिजो ॥ ४ ॥  
एसो चिय मुद्धजणस्स विब्भमो सबहाऽविय अजुत्तो । जं पज्जंते धम्मं भोत्तुं भोगे चरिस्सामो ॥ ५ ॥  
जं थेरत्ते पत्ते हयंमि सव्विंदियप्पयारंमि । अच्छउ दूरे करणं दुलहं धम्मस्स सवणंपि ॥ ६ ॥  
किं बहुणा भणिणं?, जो वालत्तेऽवि नायरइ धम्मं । संगामसमयहयसिक्खगोव सो सोअइ विरामे ॥ ७ ॥  
इय जयगुरुणा नीसेससत्तसाहारणाए वाणीए । मोक्खसुहमूलवीयं कहियं सद्धम्मसवस्सं ॥ ८ ॥  
इमं च अवक्खित्तचित्तो सवणंजलीहिं पाऊण जमालिकुमारो हिययंतो समुलसंतवेरग्गवासणो भयवंतं पणि-  
वइऊण भालयलनिचलनिवेसियपाणिपंकयकोसं भणिउं पवत्तो—

श्रीगुणचंद  
महावीरच०  
८ प्रस्तावः

॥ २६२ ॥

भयवं ! तुमए जह मज्झ देसिओ मोकखसोकखदाणखमो । धम्मो तह नो केणवि अन्नेणं निउणमइणावि ? ॥ १ ॥  
मन्ने पुवभवेसुं वाढं समुवज्जियं मए पुत्रं । तेण जयनाह ! तुमए सद्धिं मह दंसणं जायं ॥ २ ॥  
ता जाव अम्मापियरो पुच्छामि ताव तुब्भं समीवे सफलीकरेमि पव्वजापरिग्गहेण नियजीवियं, भयवयावि  
भणियं—बहुविग्घाइं धम्मकज्जाइं मा पडिवंधं कुणसुत्ति, तओ जमाली कुमारो जयगुरुं वंदिऊण संदणारूढो गओ  
सगिहं, पत्थावेण य अम्मापिऊण पाए पणमिऊण भणिउमारद्धो—हंहो अम्मताया ! अज्ज मए भयवओ महावीरस्स  
अंतिए धम्मो निसामिओ, सो य अमयंपिव अभिरुइओत्ति, अम्मापिऊहिं भणियं—धन्नो कयलकखणो उवलद्ध-  
जम्मजीवियफलोऽसि तुमं, नहु अकयपुत्राण कइयावि सवणगोयरमुवगच्छइ जिणिंदवयणं, जमालिणा संलत्तं-  
अम्मताया ! तदायन्नणाणंतरमेव संसारभउविग्गो भीओऽहं जम्मणमरणाणं ता इच्छामि तुब्भेहिं समणुण्णाओ  
समाणो समणभावं पडिवज्जिउं । इमं च अस्सुयपुवं निसामिऊण जमालिस्स जणणी तक्खणुप्पन्नसंताववसविस-  
प्पमाणसेयसलिला सोगभरवेविरंगी पयंडमायंगकराहयकुमुयं व मिलाणलायन्नं वयणमुवहंती तक्खणकिसीभूय-  
बाहुवल्लरीगलंतकणयवलया धरणिवट्टपच्चट्टउत्तरिल्ला विकिण्णकेसहत्था सिढिलसंधिवंधणा मुच्छावसनट्टचेयणा  
धसत्ति कोट्टिमतलंमि निवडिया, अहं ससंभमपधाविण्ण परियणेण निम्मलसलिलसीयरसंवलिण्ण तालियंटव-  
णेण आसासिया समाणी सुचिरं विलविऊण विमुक्कदीहनीसासा जमालिं भणिउं पवत्ता—अहो वच्छ ! अम्हाणं तुमं

जमालेवो-  
धः मातु-  
मृच्छी.

॥ २६२ ॥

चेव एगो पुत्तो संमओ पिओ हियनदंणो रयणकरंडगसमाणो ओवइयसमुवलद्धो, ता नो खलु वच्छ! अम्हे इच्छामो तुम्ह खणमेत्तमवि विओगं, किमंग पवज्जाणुमन्नं?, अओ अच्छसु ताव जाव अम्हे जीवामो, कालगएहिं पुण परिणयवओ वड्हियकुलसंतई निविन्नकामभोगो पवज्जेज्जासि, जमालिणा भणियं—अम्मा! एत्थ खलु माणुसए भवे अणेगसारीरमाणसरोगसोगजरामरणपमुहोवद्वसंपगाढे असासए जलवुब्बुयसमाणे सरयगिरिसिहरसरंतसरिया-तरंगभंगुरे को एवं जाणइ—के पुविं मरणधम्माणो के वा पच्छा मरणधम्माणोत्ति, किं च—

जइ नाम सुणिज्ज इमंपि कोइ ता किं न होज्ज पज्जत्तं? । किं तु अयंडेवि अखंडियागमो पडइ जमदंडो ॥ १ ॥  
किंतु—कस्स न हरंति हिययं विसया? नो कस्स वल्लहा सुयणा? । किंतु खरपवणपहयं किसलयमिव भंगुरं जीयं ॥ २ ॥

एत्तो चिय दुज्जणमाणसं व मोत्तूण रजरट्ठाइं । धीरा दुरणुचरंपि इ संजमसग्गं समणुलगा ॥ ३ ॥  
ता मोहपसरमुच्छिदिऊण गयमो(अणुमण्ण)धम्मकरणत्थं । किं वल्लहं निरुंभइ कोवि इ जलणाउले गेहे? ॥ ४ ॥  
एवं च भणिए अम्मापिऊहिं कहियं—पुत्त! इमं तुह सरीरं विसिट्ठलक्खणवंजणगुणोववेयं उत्तमवलवीरियसत्त-  
जुत्तं उदग्गसोहग्गसंगयं समग्गरोगरहियं निरुवहयलट्ठपंचिंदियं पढमजोवणगुणाणुगयं, अओ कहं दुरणुचरं संजमं काउं पारिही?, जेण—

मत्तकरिरायदढचलणचंपणं सहइ नेव कमलवणं । उवरमसु पुत्त! दुकरसंजमकरणाउ तेण तुमं ॥ १ ॥

श्रीगुणचंद  
महावीरच०  
८ प्रस्तावः

॥ २६३ ॥

जमालिणा भणियं—अम्मो ! माणुसगं सरीरं अणेगरोगसोगसंगयं अट्टिसंचयसमुट्ठियं ण्हारुसिराजालसंपिणद्धं  
अकुट्टिमट्ठियाभायणं व थेवेणवि विद्धंसणसीलं असुइयं रुहिरमंसवसमेयसुक्काइकलुसपडिपुत्तं सवोचद्वसज्झं अव-  
स्समुज्झणिजंति । अविय—

निस्सारस्सवि एयस्स सारया एत्तिएण निवडिया । जं उवयारे वट्ठइ मोक्खत्थं उज्जमंताणं ॥ १ ॥

जइ ण्हाणविलेवणभूसणेहिं कीरइ इमस्स नो चेद्धा । ता वासरससहरमंडलं सोहं न उवहइ ॥ २ ॥

तओ पुणोऽवि भणियं जणणीए—पुत्त ! इमाओ समुन्नयरायकुलसंभवाओ सयलकलाकुसलाओ रुवलायन्नमण-  
हरंगीओ जलहिवेलाओ व सकुलालंकरणाओ सुमुणिमालाओ इव मुत्ताहारपरिग्गहाओ मयगलावलीओ इव लीला-  
लसगामिणीओ पीणघणयणविणमियमुट्ठिगेज्झमज्झाओ मणोणुकूलवत्तिणीओ सवंगसुंदरंगीओ पियदंसणापमुहाओ  
अट्ठ पिययुग्माओ अपत्तकालेच्चिय परिचइऊणमचंतमजुत्तं तुह तवोकम्ममारंभिउं, तम्हा एयाहिं सद्धिं ताव भुंजाहि  
माणुस्सए कामभोए, परिणयवओ य एयाहिं चेव समं पवज्जं आयरेजासि ।

जमालिणा कहियं—अम्मो ! एए माणुस्सया कामभोगा उचारपासवणवंतपूयसुकसोणियसमुब्भवा मयकलेवर-  
निस्सरंतविस्सगंधा असुहउस्सासुवेयजणगा वीभच्छा तुच्छकालिया बहुकिलेससज्झा य अतुहजणजणियचित्तप-  
रितोसा साहुगरहणिज्जा अणंतचाउरंतसंसारवद्धणा करयलकलियद्धदहकट्टं व अमुचमाणा असंखतिकखदुक्खाणुवं-

दीक्षायाम-  
विलंबः मा-  
नुष्या नित्य-  
ता विषय-  
निन्दा.

॥ २६३ ॥

धिणो मुगङ्गमणविग्घकारिणो क्हं कुसलाण खणमेत्तंपि उवभोत्तुं जुत्ता हवन्ति ? । अविय—

को णाम जीवियत्थी तालउडविसं कयावि भुंजेज्जा ? । उग्गाढदाढकेसरिमुहकंदरमहव घट्टेज्जा ? ॥ १ ॥  
जालाकलावभीसणयज्जानलमज्झमहव पविसेज्जा । निसियग्गखग्गधारासु वावि को वा परिभमेज्जा ? ॥ २ ॥

अहवा सघंपि इमं करेज्ज कोऽवि हु सुराइसामत्था ।

विसए पुण परिभोत्तुं खेमेण न कोइ (खणमवि न सुहेण ) निवसेज्जा ? ॥ ३ ॥

जइ कहवि अयाणंता मूढा विसएसु संपयट्ठन्ति । ता किं मुणियजिणेसरवयणाणवि वट्ठितं जुत्तं ? ॥ ४ ॥

इमं च निसामिक्खण पुणोऽवि भणियं जणणीए—वच्छ ! इमं अज्जयपज्जयपिउपज्जायागयं वहुं हिरण्णं रययं कंसं  
दूसं निहिनिवहं अलं सत्त पुरिसे जाव पकामं दाउं पकामं परिभोत्तुं ता जहेच्छं विलससु कइवय वासराइन्ति,  
जमालिणा भणियं—अम्मो ! सुवहुंपि दविणजायं अग्गिसाहियं चोरसाहियं दाइयसाहियं अधुवं असासयं असेसाण-  
त्थसत्थनिवंधणं, अओ को एत्थ पडिवंधो ?, एवं च अणेगप्पयारेहिं अणुकूलेहिं वयणेहिं जाव पन्नविज्जमाणोऽवि  
जमाली न किंपि पडिवज्जइ ताव पुणोऽवि संजमभयकरोहिं वयणेहिं अम्मापिउणो पयंपंति—वच्छ ! दुरणुचरं निग्गंधं  
पावयणं, जओ एत्थ लोहमया जवा चावेयवा गंगामहानईए पडिसोएण गंतवं महासमुदो भुयाहिं तरियवो असि-  
धारं वयं अणुचरियधं, न य वच्छ ! एत्थ समणाणं कप्पइ आहाकम्मियं वा उद्देसियं वा मिस्सजायं वा कीयगड-

श्रीगुणचंद  
महावीरच०  
८ प्रस्तावः

॥ २६४ ॥

पसुहं वा दुब्भक्खभत्तं वा गिलाणभत्तं वा वहलियाभत्तं वा सेज्जायरपिंडं वा कंदमूलफलवीयहरियभोयणं वा  
परिभोत्तुं, तुमं च वच्छ! सुहलालिओ न समत्थो सीयवायायवखुहापिवासापसुहदुस्सहवावीसपरीसहसहणं सुहुत्त-  
मवि काउं, ता अलाहि पुणरुत्तवायावित्थरेणं, जमालिणा भणियं—अम्मताया! इमं निग्गंथं पावयणं कीवाणं कायराणं  
काउरिसाणं इहलोयपडिवद्धाणं परलोयपरंसुहाणं विसयतिसियाणं दुरणुचरं, नो सप्पुरिसाणं पडिवन्नभरधरण-  
धवलाणं नियसरीरजीवियनिरवेक्खाणंति, एवं च अणुकूलेहिं पडिकूलेहि य वयणेहिं भणिओ समाणो जाव  
जमाली न परिचयइ पवज्जाभिलासं ताव अकामएहिं चेव अणुमन्निओ जणणिजणगेहिं। तयणंतरं आहूया निययपु-  
रिसा भणिया य, जहा—सिग्घमेव खत्तियकुडग्गामं नयरं सवाहिरवभंतरं सम्मज्जिओवलित्तं अवणियतणकयवरं  
विसोहियरायमग्गं कारावेह, जमालिकुमारस्स य जोग्गं सहरिहं निक्खमणभिसेयं निवत्तेह, ते य सविणयं पडिसु-  
णित्ता नीहरिया भवणाओ संपाडियं रायसासणं, तयणंतरं च पुरत्थाभिमुहम्मि सीहासणे उववेसिऊण जमालि-  
कुमारो मणिकणगरययपुढविमएहिं अट्ठोत्तरसयसंखेहिं अणेगेहिं कलसेहिं गंधुद्धुरपवरसलिलभरिएहिं ण्हाविओ।  
अम्मापिऊहिं निवत्तियंमि य अभिसेगे भणिओ—वच्छ! किमियाणिं तुह बहुमयं पियं पयच्छामो?, जमालिणा  
भणियं—अम्मताया! इच्छामि इयाणिं कुत्तियावणाओ रयहरणं पडिग्गहं च उवणिज्जमाणं तहा कासवं च वाहरि-  
ज्जमाणं, एवं च निसामिऊण जमालिपिऊणा भणिया पुरिसा—अरे सिरिधराओ तिन्नि दविणसयसहस्साइं घेत्तूण

अर्थविपाकः  
संयमसुक-  
रतादीक्षा-  
नुमतिः.

॥ २६४ ॥

कुत्तियावणाओ रयहरणं पडिग्गहं च एगमेगलक्खेण आणेह, एगलक्खप्पयाणेण कासवगं च सदावेह, एवमाणत्ते  
निग्गया पुरिसा रयहरणं पडिग्गहं कासवगं च घेत्तूण पडिनिवत्ता, सो य कासवो जमालिपियरं पणमिऊण एवं  
भणिउं पवत्तो-देव ! संदिसह जं मए करणिज्जं, तेण जंपियं-भइ ! जमालिस्स कुमारस्स परेणं जत्तेणं चउरंगुलवज्जे  
निक्खमणपाओग्गे अग्गकेसे कप्पेहि, तओ सो कासवओ सुरभिगंधोदएण करचलणे पक्खालिऊण अट्टगुणाए  
पोत्तीए वयणं संजमिऊण जहुत्तेण विहिणा केसे कप्पिउमारद्धो, जणणीवि से अणवरयं कज्जलमलिणाइं अंसु-  
याइं मुयंती भुयगनिम्मोयनिम्मलेण उत्तरिज्जेण केसकलावं पडिच्छइ, तयणंतरं च सुरभिवारिणा पक्खालिऊण  
हरियंदसविलेवणपुप्फेहिं अचेइ, पंडुरवत्थंमि वंधिऊण रयणकरंडगंमि पक्खिवइ, सोगभरगग्गरंगिरं च रुयमाणी  
एवं भणइ-एत्तो मए मंदपुण्णाए जण्णेसु ऊसवेसु य वट्ठीसु य इमेहिं पुत्तो जमाली सुमरणिज्जोत्ति, एवं च अभि-  
क्खणं जंपमाणी तं रयणकरंडगं नियसयणिज्जस्स ऊसीसगमूले ठवेइ, अह निवत्तियमज्जणमहूसवो परिहियामल-  
दुगुलो हेममयमउडमणिकणयकडयकुंडलालंकियसरीरो वच्छत्थलरिंखोलिंतविमलमुत्ताकलावसोहिल्लो विविहाभरण-  
पहाभरविच्छुरियनहंगणाभोगो तक्कालमिलियविलयासमूहकीरंतमंगलायारो दाणाणंदियमग्गणगिज्जंतुहामगुणनि-  
वहो खंभसयसंनिविट्ठं समीरंयुयधवलधयवडसणाहं सुविचित्तचित्तरम्मं. अणेगजणजणियपरितोसं सुइनेवत्थधराणं  
छेयाणं पवरनरज्जुवाणाणं सहस्सेणं उक्खित्तं श्रद्धत्ति सिवियं समारूढो, रयहरणपडिग्गहधारिणीए दाहिणदिसिं



श्रीगुणचंद  
महावीरच०  
८ प्रस्तावः

॥ २६५ ॥

निलीणाए धावीए परियरिओ, अन्नाहि य पवररमणीहिं धरियधवलायवत्तो चलंतससिकंतचामरावयवो दिट्ठिपह-  
पइट्ठावियमणिमयअट्ठमंगलओ करितुरयरहवरारूढसयणवग्गेण अणुगमिज्जंतो वज्जंतोउज्जसमुच्छलंतरवभरियनह-  
विवरो पासायतलट्ठियपउरलोयनिवहेण संथुणिज्जंतो झडत्ति जमालिकुमारो तयणु पयट्ठो जिणाभिमुहं ।

अह जमालिस्स भारिया पियदंसणा तहाविहवइयरमुवलब्भ जायभववेरग्गा पवज्जं पडिवज्जिउकामा तहेव  
पट्ठिया, कमेण य पत्ताइं ताइं जिणंतियं, तओ पंचरायसुयसयपरिवारो जमालिकुमारो पडिवन्नो जिणिंददेसियं  
समणधम्मं, पियदंसणावि नरिंददुहिया सहस्सेण परिवुडा पवहुमाणसंवेगा सुमणी जायत्ति ।

अह जमाली सामाइयमाइयाइं एक्कारस अंगाइं ससुत्ताइं सअत्थाइं अहिज्जइ, बहूहिं चउत्थलट्ठमपमुहेहिं अण-  
वरयं विचित्तेहिं तवोकम्मेहिं अप्पाणं भावितो भगवया सद्धिं पुरागराइसु विहरइ, पियदंसणावि चंदणाए पव-  
त्तिणीए समं परियडइ ।

अह अन्नया कयाई जमाली भयवंतं महावीरजिणवरं वंदित्ता विन्नविउमारद्धो-भयवं! वंछामि अहं तुब्भेहिं  
अब्भणुन्नाओ समाणो अनिययविहारेहिं पंचहिं समणसएहिं सद्धिं विहरिउंति, सामीवि विमलकेवलालोयावलो-  
इयसयलजियलोयभूयभाविवट्ठमाणकालकलावलंबिसुहासुहपरिणामविसेसो भाविरमणत्थं मुणिऊण जमालिस्स पुणो  
पुणो भणमाणस्सवि मोणमवलंबिऊण जाविउं पवत्तो, जमालीऽवि अप्पडिसिद्धमणुमयंति कलिऊण पंचहिं समण-

जमाले-  
दीक्षा.

॥ २६५ ॥

सएहिं सहिओ तवस्सिणीसहस्सपरिबुडाए पियदंसणाए समणुगओ अपुष्पापुव्वगामनगरागराइसु भमिउमारद्धो,  
 अन्नया य गामाणुगामेण विहरमाणो समागओ सावत्थिं नयरिं, ठिओ य कुट्टगाभिहाणम्मि उज्जाणे, तत्थ य  
 ठियस्स विरसेहिं लुक्खेहिं सीयलेहिं तुच्छेहिं असुंदरेहिं कालाइकंतेहिं पाणभोयणेहिं दुरहियासो पयंडो सरीरंमि  
 पित्तजरो पाउब्भूओ, तेण य अचंतं अभिहओ समाणो भणइ—अहो समणा ! मम निमित्तं संथारयं संथारेह, ते य  
 तघयणमायन्निऊण तक्खणमेव संथारयं संथारिउमारद्धा, जमालीवि अहिययरं वेयणाभिहओ निसन्नो ठाउमपा-  
 रयंतो पुणो पुणो पुच्छइ—भो समणा ! संथारगो संथरिओ न वा ? तेहिं भणियं—संथरिओ, एयं च सोच्चा उट्ठिओ  
 जमाली गओ तदंतियं, संथारयं च संथरिज्जंतं पेच्छिऊण उप्पन्नमिच्छतो जंपिडं पवत्तो—भो मुणिणो ! इयाणिं  
 मुणियं मए तत्तं, निप्फन्नमेव निप्फन्नं भन्नइ, न उण निप्फज्जमाणंपि, अओ संथरिज्जमाणेऽपि संथारगे संथरिओत्ति  
 तुब्भेहिं वुत्तं तमसच्चं, एवं च—

कडमाणं कडमुप्पज्जमाणमुप्पन्नमेवमाईवि । वागरइ जं जिणिंदो दिट्ठविरोहा न तं घडइ ॥ १ ॥  
 अवरावरसमयसमूहजोगनिप्फज्जमाणकज्जंमि । कह पारंभे चिय कडमिमंति वोचुं खमं होज्जा ? ॥ २ ॥  
 अत्थकिरियापसाहणखमं च वत्थुत्तणं समुव्वहइ । पढमसमप्पसूए य तयंपि नो विज्जइ पयत्थे ॥ ३ ॥  
 जइ पारंभे चिय तं कडंति एवं च सेससमएसु । करणे कडस्स आवडइ उब्भडा नूणमणवत्था ॥ ४ ॥

ता जुत्तिसंगयमिमं कडमेव कडं पवुच्चए पयडं । किरियानिद्धासमयाण होइ एवं च न विरोहो ॥ ५ ॥  
इय पडिवज्जह समणा ! पक्खमिमं सयलदोसपरिहीणं । वुत्तंति नेय गिज्झइ कुसलेहिं किंतु जुत्तंति ॥ ६ ॥  
नय सच्चनुत्ति पसिद्धिपत्तकित्ती जिणो वयइ मिच्छा । किं तु वए चिय कइयावि जेण गरुयावि मुज्झंति ॥ ७ ॥  
इय समयसत्थसवणुब्भवंपि तं नियविवेयमवहाय । पित्तजरविहुरिओ इव पलवइ असमंजसं बहुसो ॥ ८ ॥  
एवं च मुक्कमज्जायं अजुत्तजंपिरं च जमालिं वियाणिऊण थेरोहिं भणियं—भो जमालि ! किमेवं विवरीयं परूवेसि ?,  
न हु विजियरागदोसमोहा अन्नहा जंपंति तित्थयरा, न य तवयणं मणांमपि पच्चक्खविरुद्धाइदोसलेसमावहइ,  
तहाहि—जं तए भणियं—अणेगुत्तरोत्तरसमएहिं निप्फज्जमाणंमि कजे कहां पारंभसमएवि निप्फण्णंति वुच्चइ ?, तमजुत्तं,  
जओ—जइ पढमसमए निप्फण्णं न वुच्चइ ता समयाविसेसत्तणेण वीयाइसु समएसु अनिप्फत्ती चेव हवेज्जा, जं च  
अत्थकिरियाए साहगतं वत्थुलक्खणं भणियं तंपि इह अवभिचरियं जुज्झइ, अभिहाणनाणोवओगसंभवाओ, तहा-  
हि—तहाविहं वत्थुविसेसं पप्प पढमसमएवि लोगो किमेयं कुणसित्ति अन्नेण पुट्ठो वागरइ—वडं पडं वा करेमित्ति,  
जं च पढमसमयकडे उत्तरोत्तरसमएसु कडकरणलक्खणाणवत्थादूसणं तंपि अन्नन्नकजंतरपसाहणेण अलियमेव,  
किरियाकालनिद्धाकालभेयदूसणपक्खोऽवि विहलो, जं च कहियं—न वुत्तं गिज्झइ किं तु जुत्तं, तत्थवि छउम-  
त्थस्स तुम्हारिस्स कहां जुत्ताजुत्तविवेओ संभवेज्जा ?, भयवं चिय केवलालोयकलियलोयालोयभावो एत्थ पमाणं,

जं च भणियं गरुयावि कयावि मुञ्जंति तंपि उम्मत्तपलवियं व न कुसलाण चित्तं रंजितं पारइ, ता सुट्ठु भणियं  
भगवया—कडमाणं कडमुप्पज्जमाणमुप्पन्नमिचाइ, किंच—

जइ तिहुयणेक्कचूडामणी जिणो वागरेज्ज वित्तहमहो । ता तच्चयणेण तवोविहाणमेयं किमायरसि ? ॥ १ ॥

रज्जं रट्ठं च विवज्जिऊण आणाए तस्स निक्खमिउं । तच्चयणं दूसितो कह न तुमं लज्जसे इण्हि ? ॥ १ ॥

अहवाऽणाभोगसमुब्भवेण दोसेण दुट्ठु भणिएवि । जायइ पुणो विसुद्धी आलोयणनिंदणाईहिं ॥ ३ ॥

ता मोत्तुं कुवियप्पं वच्च समीवे जएक्कदीवस्स । पडिवज्जसु पच्छित्तं मा विफलं नेसु नियजम्मं ॥ ४ ॥

अक्खरमेत्तंपि न जो जिणिंदवयणस्स सहइ मणुस्सो । सो पावइ मिच्छत्तं तत्तो संसारपरिवुट्ठिं ॥ ५ ॥

तत्तो चिय किच्चिसत्तियसत्तिरियवसहीसु मणुयजोणीसु । दुव्विसहदुहपरंपरंमणंतमणिवारियं लहइ ॥ ६ ॥

गरुओऽवि पावरासी जिणिंदसमयत्थसहइणहणिओ । नावत्थाणं वंधइ घणोव खरपवणपडिहणिओ ॥ ७ ॥

इय सो थेरोहिं बहुप्पयारहेऊहिं अत्थसारेहिं । तह गाढं पन्नविओ जह सहसा मोणमल्लीणो ॥ ८ ॥

अह विवरीयपरूवणापाउब्भूयपावपायच्छित्तमपडिवज्जमाणं जमालिं परिहरिऊण केऽवि थेरा भगवओ समीव-  
मुवगया, अन्ने य तस्स चेव पासे ठिया, पियदंसणावि अज्जियासहस्सपरिवारा महिलाभावसुलभनिविवेययाए  
पुव्वपडिचंधाणुवित्तीए य जमालिस्स पक्खमणुवत्तिउमारद्धा ।

श्रीगुणचंद  
महावीरच०  
८ प्रस्तावः

॥ २६७ ॥

एगया य जायनीरोगसरीरो जमाली तेण असग्गहेण अप्पाणं च परं च पइदिणं वुग्गाहेमाणो वुप्पाएमाणो जिणनाहवयणं दूसेमाणो अहमेव उप्पन्ननाणदंसणधरो सव्वनुत्ति अहंकारमुव्वहंतो सव्वत्थ हिंङ्गिउं पवत्तो । अन्नया य चंपानयरीए पुण्णभद्दे चेइए समोसढस्स अणेगसिस्सगणपरिवुडस्स भयवओ महावीरस्स अदूरदेसंमि सो ठाऊण सगव्वमेवं भणिउमाढत्तो-भयवं ! जहा तुज्झ बहवे सिस्सा छउमत्था चेव भवित्ता मरणधम्मयं पत्ता तहा न खलु अहं, जओ मम दिव्वमक्खयं केवलनाणदंसणं उप्पन्नंति, तव्वसेण य सव्वं जहट्ठियं वत्थुतत्तं अवगच्छामि, अओ एत्थ धरामंडले अहमेव अरहा सव्वन्नू सव्वदरिसित्ति । इमं च निसामिऊण भणिओ गोअमसामिणा-भो जमाली ! जइ तुमं एवंविहो ता तुज्झ नाणं सेलेण वा थंभेण वा थूभेण वा न वारिज्जइ, अओ इमाइं दोन्नि पसिणाइं ममं वागरेहि, किं सासओ लोगो असासओ ?, किं सासओ जीवो असासओ वत्ति ?, एवं च पुच्छिओ जमाली संसय-मावण्णो जाव पच्चुत्तरं दाउमसमतथो विच्छायमुहंछाओ तुसिणीए संचिट्ठइ ताव भुवणेक्कभाणुणा महावीरेण वाग-रिओ-भो जमाली ! बहवे मम अंतेवासिणो जिणा इव समत्था इमं आयक्खिउं, किं तु तुमं व न एवं सगव्वसु-ल्लवंति, न य भद्द ! एत्थ किंपि दुन्नेयं, जओ सासओऽवि लोगो असासओऽवि लोगो, कहं ?, कालत्तएवि अवट्ठि-यसामन्नरूवत्तणेण सासओ, ओसप्पिणीपमुहपज्जायपरियत्तणेण य असासओ, एवं जीवोऽवि सव्वावत्थासु अणुगा-मित्तणेण सासओ, नरनेरइयतिरियाइपज्जायंतरसंभवा असासओत्ति । एवं च भगवओ आइक्खमाणस्स जमाली

स्थविरादी-  
नां जिनपा-  
र्थेगमनं प्र-  
श्नोत्तरे च.

॥ २६७ ॥

कुवियप्पाउलहिययत्तणेण असद्वहिऊण तेण पुव्ववुग्गाहिण्ण नियसमणसमणीसंघेण परिवुडो पुरनगराइसु नियदं-  
सणाभिप्पायं परूवयंतो विहरइ, विथरिया सबत्थ एसा संकहा जहा जमाली भगवओ मिच्छं पडिवन्नोत्ति ।

अन्नया य सो विहरमाणो पुणो गओ सावत्थिं नयरिं, ठिओ य एगत्थ उज्जाणे, पियदंसणावि अज्जियासहस्स-  
परियारा महिद्धियस्स ढंकाभिहाणस्स कुंभकारस्स आवणे आपुच्छित्ता ठिया, सो य ढंको जिणवयणभावियप्पा  
जाणइ जहा एयाणि मिच्छत्तमुवगयाणि, जिणवयणं न पत्तियंति, अओ जइ कहवि वोहिज्जंति तो सुद्ध लद्धं हव-  
इत्ति । अन्नया य भंडयाइं उवत्तंतेण पडिवोहणत्थं पियदंसणासाहुणीए वत्थंमि पक्खित्तो एगो जलणकणो, तेण  
य दज्झमाणं वत्थं पेच्छिऊण तीए भणियं-भो महाणुभाव ! किमेयं तए कयं?, पेच्छ मम पडगो दद्धो, तेण  
भणियं-अज्जिए ! मा सुसं वयाहि, सव्वंमि चेव वत्थे निह्हे एवं भणिउं जुज्जइ, एस किर तुम्ह संमयत्थो, अन्नहा  
दज्झमाणं दद्धंति जिणवरवीरवयणं चेव पडिवज्जिउं जुत्तं ।

एयं च तीए सोचा तक्कालुप्पन्नसुद्धवुद्धीए । भणियं-सम्मं सावय ! मूढाऽहं वोहिया तुमए ॥ १ ॥

तइलोयतिलयभूयस्स भगवओ वद्धमाणसामिस्स । वयणं पावाए मए पडिकूलियमेत्तियं कालं ॥ २ ॥

जस्स वयणेण विहिओ घरचाओ संजमो य पडिवन्नो । सोवि जिणो न गणिज्जइ, अहो महं मोहमाहप्पं ॥ ३ ॥

ढंकेण तओ भणियं-भयवइ ! मा वहसु चित्तसंतावं । समणीजणपरियरिया वचसु सव्वन्नुपासंमि ॥ ४ ॥

श्रीगुणचंद्र  
महावीरच०  
८ प्रस्तावः

॥ २६८ ॥

आणाए तस्स वट्टसु गरिहसु नियदुक्कडं समग्गंपि । उम्मग्गं पडिवन्नं लोयं परिहरसु वेरिं व ॥ ५ ॥  
इच्छामो अणुसट्ठित्ति जंपित्तं साहुणीसहस्सेण । परियरिया सा तत्तो तिहुयणपहुणो गया पासे ॥ ६ ॥  
मोत्तुं जमालिमेगं ठंकेणऽन्नेवि वोहिया समणा । तं मोत्तूणं सवे तेऽवि गया जिणवरसमीवं ॥ ७ ॥  
इयं ताव इहं भवे चिय जियवयणविकूलणाणुभावेण । सुक्को न केवलं सुणिवरेहिं सुगुणेहिंवि जमाली ॥ ८ ॥  
एवं च सो मिच्छत्ताभिणिवेसेणं अप्पाणं समीववत्तिजणं च वोप्पायएंतो बहुयाइं वासाइं सामन्नपरियागं पाउ-  
णित्ता अद्धमासियं च पज्जंते संलेहणं काऊण तस्स ठाणस्स अणालोइयपडिक्कंतो मओ समानो लंतए कप्पे तेरस-  
सागरोवमठिइएसु किब्बिसियसुरेसु देवत्ताए उववन्नो ।

इओ य भगवया गोयमेण जमालिं कालगयं जाणित्ता भयवंतं महावीरं परेणं विणएणं वंदित्ता भणियं—भंते !  
तुब्भं कुसीसो जमाली नामं अणगारो तहाविहं उग्गं तवविसेसं आसेविऊण कहिं उववन्नो?, तओ भगवया  
कहिओ सवो किब्बिसयदेवत्तलाभपज्जवसाणो से तवइयरो ।

अह भणइ इंदभूर्इ—भयवं तारिस तवंपि काऊणं । किं कारणमुववन्नो किब्बिसियसुरेसु स जमाली? ॥ १ ॥  
ताहे भणियं भुवणेकभाणुणा सुणियसयलभावेण । गोयम ! सुणेसु एत्थं कारणमेगग्गचित्तेण ॥ २ ॥  
धम्ममायाररयाणं आयरिआणं विसुद्धसीलाणं । सुत्तप्पवत्तयाणं उज्झायाणं गुणनिहीणं ॥ ३ ॥

प्रियदर्शना-  
बोधः जमा-  
लिमरणं.

॥ २६८ ॥

कुलगणसंघाणंपिय पडिणीया जे हवंति इह जीवा । विउलंपि तवं काउं ते किञ्चिसिएसु जायंति ॥ ४ ॥

पुनरपि गोयमसामी पुच्छइ भयवं । तओ सठाणाओ । चइउं कइहिं भवेहिं पाविस्सइ मोक्खपुरवासं ॥ ५ ॥

जिणनाहेणं भणियं सुरतिरियनरेसु पंच वेलाओ । भमिऊण पत्तवोही लहिही निवाणसोक्खाइं ॥ ६ ॥

ता भो देवाणुपिया ! जमालिमुणिणो निसामिउं चरियं । धम्मगुरुप्पमुहाणं विणयपरा होज्जह सयावि ॥ ७ ॥

इय सिक्खविउं मुणिणो समत्थजियलोयवच्छलो वीरो । विहरइ पडिवोहिंतो भव्वजणं परमकरुणाए ॥ ८ ॥

विहरंतस्स य पडुणो एत्तो ससिसूरवरविमाणाणं । अवयारणअच्छरियं जह जायं तह निसामेह ॥ ९ ॥

साएए नयरे सन्निहियपाडिहेरो सुरप्पिओ नाम जक्खो, सो य पइवरिसं चित्तिज्जइ महूसवो य से परमो कीरइ, सो य चित्तिओ समाणो चित्तगरं वावाएइ, जइ न चित्तिज्जइ ता नयरे जणमारिं विउवइ, तब्भएण य सा चित्तगरसेणी पलाइउमारद्धा, णरवइणा विचिंतियं—जइ इमे सव्वे पलाइस्संति ता अवस्समेस जक्खो अचित्तिज्जंतो अम्ह वहाए भविस्सइत्ति परिभाविऊण ते चित्तकरा संकलियावद्धा कया, सव्वेसिं नामाणि य पत्तए लिहिऊण घडए छूढाणि, तओ वरिसे वरिसे जस्स नामपत्तयं नीहरइ सो चित्तकम्मं जक्खस्स करेइ, एवं कालो वचइ । अन्नया य को-संजीनयरीए वत्थवो एगो चित्तयरदारगो चित्तविज्ञासिक्खणत्थं तत्थागओ ठिओ य चित्तगरथेरीए मंदिरे, जाया य तप्पुत्तेण सद्धिं तस्स मित्ती, एवं च तस्स अच्छंतस्स तंमि वरिसे समागओ थेरीसुयस्स वारगो, तओ थेरी बहुप्पयारं



श्रीगुणचंद  
महावीरच०  
८ प्रस्तावः

॥ २६९ ॥

उरसिराइं ताडेंती रोइउमारद्धा, पुच्छिया य तेण कोसंवीचित्तगरदारगेण—अम्मो ! कीस रोयसि ?, तीए भणियं—  
पुत्त ! एगो चिय एस मे सुओ, संपयं जक्खं चित्तिऊण जममुहं पाविउकामोविव लक्खिज्जइ, तेण जंपियं—अम्मो !  
मा रुयसु, अहं जक्खं चित्तिस्सामि, तीए भणियं—वच्छ ! तुमं मे पुत्तो किं न भवसि ?, तेण कहियं—तहावि चित्ति-  
स्सामि, अह जायंमि पत्थावे सो छट्ठभत्तं काऊण ण्हाओ चंदणरससमालभियदेहो नियंसियवत्थजुयलो अट्ठगुणपो-  
त्तीए मुहं संजमिऊण नवएहिं कुचगेहिं पसत्थेहिं वन्नगेहिं जक्खं चित्तिऊण परेण विणएणं पायवडिओ भणइ—

देव ! सुरप्पिय ! को तुज्झ चित्तकम्मं विणिम्मिउं तरइ ? । अचंतं निउणोऽविहु किं पुण अम्हारिसो सुद्धो ॥१॥

तहवि हु चवलत्तणओ न सुट्ठु जं वट्ठियं मए किंपि । तं खमियवं तुमए सामिय ! पणयंमि को कोवो ? ॥२॥

एवं थुणंतस्स तस्स परितुट्ठो जक्खो भणइ—अरे वरं वरेसु, तेण भणियं—देव ! एसो चेव वरो—मा एत्तो लोगं  
मारिस्ससि, जक्खेण भणियं—तुज्झ अविणासणाओ चेव सिद्धमेयं, अन्नं मग्गेसु, तेण जंपियं—जइ एवं ता जस्स  
दुपयस्स चउप्पयस्स अपयस्स वा एगदेसमवि पेच्छामि तस्साणुरूवं चित्तं निवत्तिज्जामि, जक्खेण भणियं—एवं  
होहिति, तओ सो उवलद्धवरो रत्ता नगरजणेण सकारिओ संतो गओ कोसंवीं नयरिं, तत्थ य पुव्वभणिओ सया-  
णिओ राया, सो अन्नया रज्जेणं रट्ठेणं चउरंगवलविच्छहेणं अन्नेण य विभूइविसेसेणं गव्वमुव्वहंतो अत्थाणीमंडवे  
निविट्ठो द्वयं पुच्छइ—अरे किं मम नत्थि ? जं अन्ननरिंदाणमत्थि, तेण जंपियं—देव ! तुम्ह चित्तसभा नत्थि, एवं च

चन्द्रसूर्या-  
गमनं वर-  
दत्तश्चित्र-  
कारः॥

॥ २६९ ॥

भणिण जाणत्ता राइणा सभामंडवचित्तणत्थं चित्तगरा, तेहिं च समा भूमी विमइऊण पारद्धा चित्तिउं, तस्स य  
वरदिन्नस्स जो अंतेउरकीलापचासन्नो पएसो सो समप्पिओ, तथा य तत्थ चित्तकम्मं कुणमाणेण एगया नरिंद-  
ग्गमहिंसीए मिगावईदेवीए जालकडगंतरेण मणिमयमुद्धियाकिरणविञ्चुरिओ चरणंगुट्ठओ दिट्ठो, उवमाणेण य  
नायमणेणं जहा मिगावई एसत्ति, तओ तेण अंगुट्ठगाणुसारेण जहावट्ठियं रुवमालिहियं, तंमि य च क्खुंमि उम्मी-  
लिज्जंते एगो मसिर्विंदू ऊरूअंते निवडिओ, तेणावणीओ, पुणोऽवि पडिओ, एवं तइयवेलाए तं निवडियं पेच्छि-  
ऊण नूणमणेण एत्थ होयवंति जायनिच्छएण नावणीओ, अह समत्तंमि चित्तकम्मे राया चित्तसभं पलोयंतो तं  
पएसं सपत्तो जत्थ तं मिगावईए रूवं, तं च अणिमेसच्छिणा पेच्छमाणेण दिट्ठो सो विंदू, तओ आवद्धभिउडी-  
भीमो रोसवसायंवरिच्छिविच्छोहो तं च दट्ठूण नरिंदो चित्तिउमेवं समाढत्तो—

एएण पायमइणा मम पत्ती धरिसियत्ति निब्भंतं । कहमन्नहा नियंसणमज्झगयंपिहु मुणेज्ज मसं ॥ १ ॥  
इयरंमिवि परदारे परिभोगपरं वयं निगिण्हामो । किं पुण सए कलत्ते एयं नायंपिहु खमामो ? ॥ २ ॥  
एयं परिभाविऊण सो वरदिन्नचित्तगरो समप्पिओ दंडवासियाणं, आणत्तो य वज्झो, एयं च वइयरं निसामि-  
ऊण उवट्ठिया चित्तगरसेणी, विन्नविओ राया, जहा-देव ! वरलद्धओ एसो, जस्स अवयवमेत्तंपि पासइ तस्स पडि-  
पुत्तं रुवमालिहइ, अओ कीस निक्कारणं कोवमुवहइ देवो ?, जइ एत्थ न पचओ ता विन्नासिज्जउ, एवं च भणिण

श्रीगुणचंद  
महावीरच०  
८ प्रस्तावः

॥ २७० ॥

राइणा दंसावियं खुज्जाए मुहमेत्तं, तेण य तदणुरूवं निवत्तियं चित्तं, तहावि रत्ना पुवामरिसवसेण तस्स संडासओ  
छिंदाविओ निविसओ य आणत्तो ।

तओ सो चित्तगरो पुणोऽवि गओ जक्खसमीवं, ठिओ उववासेण, भणिओ य जक्खेण—भह् ! मुंच विसायं,  
ममाणुभावेण पुवंपिव वामहत्येण चित्तिहिसि, एवं च लद्धे वरंमि एसो परिचित्तेइ—अहो महा पावकारिणा कंहं  
निश्वराहो चेव अहं एयमवत्थं पाविओ?, ता संपयं तस्स दुस्सिक्खियस्स दंसेमि दुन्नयफलंति परिभाविऊण  
चित्तवट्ठियाए मिगावईए सिंगारुब्भडं रूवमालिहिऊण इत्थीलालसं चंडपज्जोयं महानरिंदमुवट्ठिओ, दंसिया चित्त-  
वट्ठिगा, अवलोइया साहिलासं चंडपज्जोएण, अवलोयमाणस्स य तक्खणं चेव विसट्ठकंदोद्वदीहरा वियसिया से  
दिट्ठी, पम्हुट्ठो कुलाभिमाणो परिगलिओ नयमग्गो वियंभिआ अरई समुल्लसिओ रणरणओ पज्जलिओ सवंगिओ  
मयणानलो, सविसेसं पलोयमाणो य थंभिओव कीलिओव निचलनिरुद्धनयणो ठिओ मुहुत्तमेत्तं, पुच्छिओ य चित्तयरो

सुरसुंदरीए रूवं वम्महदइयाए नागकन्नाए? । दट्ठूण तए सुंदर! पडिर्विवमिमं इहालिहियं ॥ १ ॥

जइ सुरविलया एसा ता सच्चं भुवणविस्सुया तियसा । अहं वम्महस्स लीलाए जिणउ ता सो तिलोयंमि ॥ २ ॥

अहवा भुयगाण इमा ता सोहउ निचमेव पायालं । पडिहणियतिमिरपसरं एयाए मुहेंदुकिरणेहिं ॥ ३ ॥

दूसिज्जइ पेच्छ इमीए कायकंतीए कंचणच्छाया । विच्छाइज्जइ नयणेहिं नीलनवनलिणलच्छीवि ॥ ४ ॥

मृगावती  
चित्र.

॥ २७० ॥

अहरप्पहाएँ निहरइ विहुमकंकेलिपलवसिरीवि । रूवेऽणुरंजिएण व रंभाए वहइ समसीसिं ॥ ५ ॥

किं बहुणा?—एवंविहवरजुवईजणस्स विरहे विडंबणा कामा । मणुयत्तंपिहु विहलं दुहावहं भूवइत्तंपि ॥ ६ ॥

तं कहसु कस्स एसा सुयणू! को वा इमीए लाभंमि । कीरंतो य उवाओ अणुरंखो सिद्धिमावहइ? ॥ ७ ॥

एवं नराहिवेण भणिए चित्तगरेणं जंपियं—देव! न हवइ एसा सुराईण रंमणी, किंतु सयाणियरत्तो अग्गमहिंसी  
मिगावइनाम, मए सामन्नेण आलिहिया, विसेसओ जइ पुण परं पयावई से रूवमालिहउ, जइ एवं नाम महिला  
चेव सा अओ रे वज्जजंघ! वय सिग्घं, गंतूण भणसु मम वयणेण सयाणियनरवइं, जह सिग्घं पेसेसु मिगावइं, एवं-  
विह इत्थीरयणाण वरणे को तुज्झ अहिगारोत्ति?, ता सिग्घं पेसेसु, जुज्झसज्जो वा होज्जासित्ति वुत्ते जं देवो  
आणवेइत्ति भणिऊण गओ दूओ, निवेइयं सयाणियस्स नरिंदसासणं, तेण य तमायन्निऊण जायकोवेण भणियं-  
रे दूयाहम! जइ कहवि सो कुलकमविमुक्कमजायं उस्सिखलं पयंपइ तां तुज्झवि किं खमं वोत्तुं?, किं भिचो  
सोऽवि न जो ससामिणो उप्पहं पवत्तस्स नियवुद्धिवित्थरेणं अवजसपंसुं परिसमेइ?, एवंविहदुन्नयवियांरिणोऽवि  
जायइ कुले गुरुकलंको, किं पुण वहुजणपुरंओ पयडगिरा पभणिजंते?, अन्नेसुवि रज्जंतरेसु दिट्ठं सुयं व रे तुमे एवंविहं  
अकज्जं कीरंतं केणइ निवेणं, किंच—जत्थ सयं चिय राया दुन्नयमेवंविहं समायरइ ततो हया मूलाओ वराइणी

श्रीगुणचंद  
महावीरच०  
८ प्रस्तावः

॥ २७१ ॥

तत्थ नीईवि, किं बहुणा?, एवं जंपिरस्स तुह चेव इहयं जुज्झइ विणासो काउं, जंच न कीरइ तं न य तेउत्ति कलि-  
ऊण, इय निब्भत्थिऊण दूओ निद्धमणेण कंठे घेत्तूण निच्छूढो, गओ य सो चंडपज्जोयसमीवे, साहिओ य चउग्गुणो  
नियवइयरो, इमोवि तेण दूयवयणेण बाढं रुढो सव्वबलेण परियरिओ पयट्ठो कोसंबीए, अणवरयपयाणएहि य  
आगच्छंतं निसामिऊण सयाणिओ अप्पबलो तहाविहसंखोहसमुप्पन्नाइसारो मओ, तओ मिगावईए चित्तिं-  
राया ताव संखोभेण विणट्ठो, पुत्तोऽवि असंजायबलो एयस्साणणुसरणं मा विवज्जिही, एयाणुस्सरणंमि गरुओ कुल-  
कलंको, तम्हा इमं पत्तकालं-इहट्ठिया अचंतमणुलोमवयणवित्थरेण चेव कालहारिं करेमि पच्छा जमुचियं तमा-  
चरिस्सामित्ति चित्तिऊण भणाविओ दूयवयणेण चंडपज्जोयनरिंदो, जहा-राए सयाणिए परोक्खम्मि तं चेव मए  
सरणं, केवलं मम पुत्तो असंपत्तबलो मए विमुक्को समाणो पचंतनरिंदोहिं पेल्लेज्जिही, इमं च सोच्चा परमहरिसपगरि-  
समुवहंतणेण भणावियं रत्ता-पिए! मम पयंडभुयदंडपरिग्गहिए तुह सुए को चिरजीवियत्थी पयं काउं समीहिज्जा?,  
तीए भणियं-अत्थि महाराय!, केवलं उस्सीसए सप्पो जोयणसए वेज्जो, विणट्ठम्मि कजे किं तुमं काहिसि?,  
अओ जइ निप्पच्चवायं मए सह संगममभिलससि ता उज्जेणिपुरीसमुब्भवाहिं निदुराहिं इट्ठियाहिं इमीए नयरीए  
चउदिसिं कारवेसु समुत्तुंगपायारपरिक्खेवंति, इमं चायन्निऊण पडिबन्नं राइणा, तओ चउदसवि नियसयाणो  
सबला धरिया मग्गम्मि, पुरिसपरंपराए य आणियाओ इट्ठगाओ, निस्मविओ पायारो, तओ तीए भणइ-इयाणिं

शतानीक-  
मरणं  
मृगावती-  
प्रपंचः.

॥ २७१ ॥

नगरि वज्रस्त वत्पस्त इंधणस्त य भरेहि; आसाविण्डिण य भरिया; अणेण, जाहे नयरी रोहगसज्जा जाया ताहे  
 सा विप्पडिवज्जा, दुवाराइं बंधिऊण जुज्झिउं उवट्टिया, चंडपज्जोयरायावि विलक्खो नगरि वेडिऊण ठिओ, अन्न-  
 दियसे व वेरगमुवगयाए चित्तिं मिगावईए-धन्ना ते गामागरनगराइसन्निवेसा जंत्य भयवं महावीरसामी भव-  
 गिराए जणं पडिवोहंतो विहरइ, संपयं च जइ सो परमेसरो एतय एइ तो अहं पवयामि, इमं च तीसे संकप्पं  
 केवलालोण कलिऊण गोयमपमुहमुणिजणपरिवुडो नवकणयकमलनिम्मियचलणो अणंतरमेव समागओ भयवं,  
 कयं देवेहिं समोसरणं, उवविट्ठो सिंहासणे जयगुरु, तप्पभावेण य पसमियं वेरं, वद्धाविया मिगावई चारपुरि-  
 सेहिं, दिन्नमणाए चिन्ताइरित्तं तेसिं पारिओसियं, उग्घाडियाइं गोउरकवाडाइं, महया विभवेण निग्गया मिगा-  
 वई, जहाविहिणा वंदिओ भयवं, ठिया य समुच्चियठाणे, चंडपज्जोयरायावि समागओ, एतथंतरे भगवया  
 पारद्धा धम्मकहा ।

अह एगो पुरिसो करगहियकोदेडवाणो एस सवण्णुत्ति लोयप्पवायं निसामिऊण भयवओ अदूरदेसट्ठिओ नित्य-  
 संसपं मणसा पुच्छइ; ताहे सामिणा मणिओ-भो देवाणुपिया ! वायाए पुच्छ, वरमन्नेऽवि भवसत्ता पडिवुज्झंति;  
 एवमवि सामिणा मणिए लोयलज्जाए तेणं मण्णइ-भयवं ! जा सा सा सा ? तओ भगवया जंपियं-एवमेयंति,  
 अह पायपीढपासट्ठिण गोयमसामिणा सुयनाणमुणियपरमत्थेणवि भवजणपडिवोहणत्थं पुच्छियं-भयवं ! किं

श्रीगुणचंद  
महावीरच०  
८ प्रस्तावः

॥ २७२ ॥

एएण जा सा सा सेत्ति संलत्तं?, भगवया कहियं—महती कहा एसा, एगग्गचित्ता निसामेह—

अत्थि इहेव जंबुदीवे दीवे चंपानाम नयरी, तत्थेवेगो सुवण्णगारो इत्थीलोलो जं जं पवररुववइं कन्नगं पेच्छइ तं  
तं पंच सुवण्णसयाणि दाऊण परिणेइ, एवं च तेण परिणयंतेण कालकमेण पंच सयाणि महिलियाणं पिंडियाणि,  
एकेकाए य तिलगहारहहारनेउरपमुहाइं आभरणाइं दिन्नाइं, जह्विसं च जाए समं भोगे भुंजइ तह्विसं सा सवालं-  
कारपरिग्गहं ण्हाणविलेवणाइ सिंगारं च करेइ, सेसकालं पुण उवसंतवेसेण अच्छइ, अण्णहा सुवण्णगारो निब्भ-  
च्छइ, न य ईसालुगत्तणेण सो निमेसमेत्तंपि गेहदुवारं मुंचइ, संयणाणवि नावगासं देइ, एवं वचंति वासरा, अन्नया  
य सो अणिच्छंतो महया किलेसेण नीओ मित्तेण भोयणदाणत्थं नियमंदिरे, चिरलद्धावगासाहि य चिंतियं  
तस्स गेहिणीहिं—

किं अम्ह जीविणं? किं वा मणिकणगभूसणेहिंपि? । किं विभववित्तरेणवि बहुएण निरत्थएणिमिणा? ॥ १ ॥

जं न लभामो निचंपि विलसिउं नणु कयंततुलस्स । एयस्स पावपइणो दढमम्हे गोयरे पडिया ॥ २ ॥

बहुकालाओ गेहं जाव विमोत्तुं गओ स अन्नत्थ । मणवंलियसोक्खेणं ताव वसामो खणं एकं ॥ ३ ॥

इय चिंतिऊण ण्हाया सुरहिविलेवणविलित्तसवंगा । परिहियपवरदुगुला आलिद्धासेसआभरणा ॥ ४ ॥

भालतलरइयकुरुला [ तिलया ] सिंदूरारुणियपवरसीमंता । गंधुब्भडमियनाहीपंकलिहियगल्लपत्तलया ॥ ५ ॥

श्रीवीरस-  
मवसरणं  
या सा सा  
सोदाहरणं.

॥ २७२ ॥

तंवलपाडलुठ्ठीये जाव चिट्ठंति दप्पणं घेत्तुं । समुहं पलोयमाणा ताव लहुं आगओ भत्ता ॥ ६ ॥

दद्दण तांसि तारिस दुचिट्ठं तेण जायकोवेण । एगो महिला पहया तह जह सा पाविया मरणं ॥ ७ ॥

तयणंतरं च भयवसकंपिरदेहाहिं सेसमंहिलाहिं । चित्तियमिमं जहेसा तह अम्हेवि हु विवज्जामो ॥ ८ ॥

तम्हा आयंसेहिं पहणामो रक्खिएण किं इमिणा ? । इइ चित्तिऊणं समगं खित्ता तदभिमुहमायंसा ॥ ९ ॥

तओ एगूणपंचसयनारीसयपमुक्कदप्पणेहिं पहओ समाणो सो मओ तक्खणेण, पच्छा समुप्पण्णो तासिं पच्छा-  
यावो-अहो कां गई एत्तो पइमारियाणं भविस्सइ ? , उद्धलिस्सइ लोओ दंडिस्सइ नराहिवो अवमन्निस्सइ सयण-  
वग्गो गंजिस्सइ खल्यणो, तम्हा मरणमेव संपयं पत्तकालंति परिभांविऊण पिहियाइं सव्वदाराइं, पक्खित्तं गेहब्भं-  
तरे चहुं तणंकट्ठपलालं, पज्जालिओ सव्वओ जलणो, जालाउले य तंमि विमुक्को ताहिं अप्पा, अह पच्छायावेण  
साणुक्कोसयाए ताए अकामनिज्जराए सव्वाओ मरिऊण मणस्सेसु उववन्ना, कम्मधम्मसंजोगेण य एगत्थ मिलिया  
एगूणपंचवि सया ते चोरा जाया, एगंमि य विसमंमि पवए परिवसंति ।

सो य सुवण्णयारो मरिऊण तिरिच्छेसु उववन्तो, तत्थ जा सा अणेण पढमं चिय मारिया सा एगं भवं तिरिएसु  
उववज्जिऊण पच्छा वंभणकुले पुत्तो जाओ, कमेण य पत्तो पंचवारिसियत्तणं, सो य सुवण्णयारो तिरियभवओ  
उववज्जिऊण तंमि चेव वंभणकुले तंभइणित्तेण दारिया जाया, सो य पंचवारिसिओ समाणो तीसे वालग्गाहो



श्रीगुणचंद  
महावीरचं  
८ प्रस्तावः

॥ २७३ ॥

कओ, सा य अइदुट्टत्तणेण निच्चमेव रोयइ, अन्नया य तेण वालग्गाहेण उदरदेसपरिघट्टणं कुणमाणेण तह कहवि  
सा जोणिदारे छिका जह तक्खणं चेव नियट्ठा रोयणाओ, तओ तेण नायं-लद्धो मए उवाओत्ति, एवं सो तीसे  
रोयमाणीए निच्चकालं करेइ, अन्नया य तहा कुणमाणो नाओ सो मायापिऊहिं, ताहे हणिऊण निद्धाडिओ निय-  
गिहाओ, पलायमाणो अ गओ तं चेव चोरपल्लिं जत्थ ताणि एगूणगाणि पंच चोरसयाणि परिवसंति, सा य दारिया  
अप्पडुप्पन्नजोवणा विणट्ठसीला जाया, सच्छंदं परियडंती य एगं गामं गया, सो य गामो तेहिं चोरोहिं आगंतूण  
लुंठिओ, सा य तेहिं गहिया, तओ तेसिं सवेसिंपि भज्जा जाया । अन्नया य चोराणं चिंता समुप्पन्ना-अहो इमा  
वराई एत्तियाणं अम्हाणं पइदिणं सरीरचेट्ठं कुणमाणी खिज्जिस्सइ, ता जइ अन्ना विइज्जिया संपज्जइ तो से  
विस्सामो होज्जत्ति परिभाविऊण एगया तीसे विइज्जिया आणिया, जंचेव आणिया तंचेव चिरमहिला ईसासल्लनि-  
ब्भिज्जमाणमाणसा तीसे मारणत्थं छिदाइ मग्गइ, अन्नया य ते चोरा गामंतरमुसणत्थं पधायिया, तीए नायं-एस  
पत्थावो वट्ठइ, ता विणासेमि एयंति परिभाविऊण नीया सा कूवतडे, भणिया य-भदे! पेच्छ कूवमज्जे किंपि  
दीसइ, सावि अविगप्पभावेण दहुमारद्धा, तयणंतरं च ताए पक्खित्ता तत्थेव, चोरा य आगया पुच्छंति तीसे  
वुत्तंतं, ताए भण्णइ-अप्पणो महिलं कीस न सारेह?, किमहं जाणामि?, तेहिं मुणियं-जहा एयाए मारिया,  
तओ तस्स बंभणपुत्तस्स हियए ठियं, जहा-अवस्सं एसा सा मम पावकम्मा भगिणी एरिससीलेण संभाविज्जइ,

या सा सा  
सोदाहरणं.

॥ २७३ ॥

सुवह य समीववत्ती भगवं महावीरो सधणू सबदरिती, ता तं गंतूण पुच्छामिस्ति, इहागओ लज्जाए मणसा पुच्छि-  
उमारद्धो, तओ मए भणिंयं-देवाणुप्पिया। वयणेण पुच्छ, तओ अणेण जा सा सा सत्ति कहियं, मएवि सच्चव  
सा तव भणिणीत्ति सिद्धं ।

इय गोयम ! एवंविहविडंबणाजालमूलगिहभूया । विसया विसं व विसमं दित्ति विवागं मणुस्साणं ॥ १ ॥

खणदावियसोवखाणं भवोहसंयद्धियासुहनिहीणं । भोगाण कए सुद्धा जुत्ताजुत्तं न पेच्छंति ॥ २ ॥

ओज्जमिणं रागंधा पुरिसा अणवेक्खिऊण परमत्थं । जं अत्थि तं विमोत्तूण नत्थि जं तं विभावित्ति ॥ ३ ॥

तथाहि-मंसलवमेत्तनिवत्तियंपि अहरं पयालसंडं व । जलबुबुयसच्छहमवि नयणजुयं नीलनलिणं वा ॥ ४ ॥

चम्मावणद्धअट्ठियमयंपि वयणं मयंकविंबं व । मंसुच्चयमेत्तंपिवि थणजुयलं कणयकलसं व ॥ ५ ॥

बेलहलमुणालंपिव वाडुजुयं अट्ठिमंसमेत्तंपि । सोणियमुत्तविलीणं रमणंपिवि अमयकूवं व ॥ ६ ॥

मन्नंति विसयमूढां अवियारियपारमत्थियसरूवा । अच्चंतनिंदियाणिवि एवं अंगाणि जुवईणं ॥ ७ ॥

इय एयं करुणासायेरेण सिरिवद्धमाणनाहेण । कहिए वत्थुसरूवे समग्गभुवणप्पईवेण ॥

सो पुरिसो संवेगमावन्नो पवइओ । सा य ससुरासुरनरतिरियाउलावि परिसा पयणुरागसंजुत्ता जाया । एत्थंतरे  
सिगावई देवी हरिसपगरिसवियसियनयणकमला महावीरं वंदित्ता एवं वोत्तुं पवत्ता-भयवं । जाव चंडपज्जोयराय-

श्रीगुणचंद  
महावीरच०  
८ प्रस्तावः

॥ २७४ ॥

मापुच्छामि ताव तुम्हं सयासे पवयामिति भणिऊण चंडपज्जोयमुवट्टिया, एवं च कहिउमाढत्ता-महाराय! जइ तुमं अणुमन्नसि ता अहं पवयामि, रायावि तीसे महतीए परिसाए लज्जाए वारिउमपारयंतो तं विसज्जेइ, तओ मिगावई नियपुत्तं उदयणकुमारं चंडपज्जोयस्स निक्खेवगनिक्खित्तं काऊण पवइया, पज्जोयस्सऽवि अट्ठ अंगारवइप्प-मुहाओ देवीओ पवइयाओ, ताणिवि एगूणपंचचोरसयाणि पुवं पडिवन्नपवज्जेण चोरेण गंतूण पडिवोहियाणि पवज्जं च पडिवन्नाणि, अन्नो य बहुजणो संबुद्धो, पज्जोयनरवईवि जयगुरुप्पभावपडिस्संतवेराणुबंधो उदयणं कुमारं रज्जे सहत्थेण संठाविऊण गओ सनयरिं, मिगावईवि भगवया अणुसासिऊण समप्पिया चंदणवालाए पव-त्तिणीए, तीसे य समीवट्टिया जहट्टियं साहुणीजणसमुचियं किरियाकलावमब्भसइ ।

भयवंपि विहरमाणो वाणियगामप्पमोक्खनयरेसुं । आणंदकामदेवाइसावगे दस विवोहेइ ॥ १ ॥

जेसिं धम्ममहाभरधरणुद्धुरकंधराण तियसावि । चालिंसु खोभकरणुज्जुयावि न मणो मणागंपि ॥ २ ॥

जे इस्सरिएण लहुं करिंसु वेसमणजक्खरायमवि । पडिवालिसु य सम्मं निचंपि दुवालस वयाइं ॥ ३ ॥

गेहसमीवनिवेसियपोसहसालासु पोसहुज्जुत्ता । अट्ठमिचउहसीसुं समणा इव जे य निवसिंसु ॥ ४ ॥

जेसिं सरीरधाऊ सत्तवि सच्चवयणरसभिन्ना । कुप्पावयणियवयणाणि गोयरं नेव वच्चिंसु ॥ ५ ॥

इय तेसि गुणलवोविहु नो तीरइ मारिसेहिं परिकहिउं । विरइंसु नूण सयमेव गणहरा जेसि चरियाइं ॥ ६ ॥

विषय-  
विपाकः  
मृगावत्या  
वैराग्यं  
दीक्षा च.

॥ २७४ ॥

अन्नेऽविदु नरवइदंडनाहसामंतमंतिपमुहजणे । पडिबोहिऊण पुणरवि कोसंवि आगओ सामी ॥ ७ ॥  
 तहियं समोसढस्सा चरिमाए पोरिसीएँ जयगुरुणो । विम्हइयजीवलोयाइं फालिआइं विमाणाइं ॥ ८ ॥  
 साहावियाइं पचक्खदिस्समाणाणि आरुहेऊण । ओयरिया भत्तीएँ वंदणवडियाए ससिस्सुरा ॥ ९ ॥  
 तेसिं विमाणनिम्मलमऊहनिवहप्पयासिए गयणे । जायं निसिंपि लोगो अवियाणंतो सुणइ धम्मं ॥ १० ॥  
 नवरं नाउं समयं चंदणवाला पवत्तिणी नमिउं । सामिं समणीहिं समं निययावासं गया संहसा ॥ ११ ॥  
 सा पुण मिगावई जिणकहाए वक्खित्तमाणसा धणियं । एगागिणी चियं ठिया दिणंति काऊण ओसरणे ॥ १२ ॥  
 बोलीणे खणमेत्ते साइं विमाणाइं आरुहित्ताणं । ससिस्सुरेसु गएसु वियंभिए रयणितिमिरभरे ॥ १३ ॥  
 समणीओ समीवंमी अपेच्छमाणी य सा महासत्ता । पगया पडिस्सयंमी पवत्तिणीए य तो भणिया ॥ १४ ॥  
 तुम्हारिसीण सुकुलुग्गयाण जुज्झइ किमेवमायरिउं ? । एगागिणीवि य तुमं जंसि ठिया एत्तियं रयणिं ॥ १५ ॥  
 पडिवज्जिय तच्चयणं भुज्जो भुज्जो सदुच्चरीयाइं । निंदंतीए तीए उप्पन्नं केवलं नाणं ॥ १६ ॥  
 अह-पयलायंतीए पवत्तिणीएँ सप्पं पलोइयं इंतं । संथारगंमि हत्थो ठविओ तीए धराहिंतो ॥ १७ ॥  
 निदावगमे पुच्छा अहिकहणं नाणवुज्झणऽणुतावो । निहयघणघाइकम्मा पवत्तिणी केवलं पत्ता ॥ १८ ॥  
 इओ य-उप्पन्नसंसओ पढमगणहरो पणमिउं जिणं भणइ । किमवट्ठियावि भावा विवरीयत्तं पवज्जंति ? ॥ १९ ॥

श्रीगुणचंद  
महावीरच०  
८ प्रस्तावः  
॥ २७५ ॥

जं ओइन्नाइं नहाओ नाह ! मायंडससिविमाणाइं । गुरुणा भणियं—गोयम ! दस अच्छरियाइं एयाइं ॥ २० ॥  
उवसग्ग गब्भहरणं इत्थीतित्थं अभाविया परिसा । कण्हस्स अवरकंका ससिसूरविमाणओयरणं ॥ २१ ॥  
हरिवंसकुलुप्पत्ती चमरुप्पाओ य अट्ठसय सिद्धा । अस्संजयाण पूया जायंति अणंतकालाओ ॥ २२ ॥  
इय साहियमच्छरियं ससिसूरविमाणसंगयं एत्तो । गोसालयवुत्तंतं साहिज्जंतं निसामेह ॥ २३ ॥  
सो पुव्वभणिओ गोसालो तेउलेसामाहप्पपडिहयपडिवक्खो अट्ठंगनिमित्तलवपरिन्नाणमुणियजणमणोगयसंकप्पो  
अजिणोऽवि जिणसहमत्तणो पगासेमाणो सव्वत्थ अणिवारियप्पसरं परिब्भमंतो सावत्थिं नयरिमागओ, ठिओ य  
बहुधणधन्नपरिपुत्ताए हालाहलाभिहाणाए कुंभकारीए आवणंमि, तस्स य लोगो अमुणियपरमत्थो मणोगयसंकप्प-  
परिन्नाणमेत्तसमुप्पन्नकोऊहलो जिणोत्ति पसिद्धिं निसामिऊण अणवरयं पज्जुवासणं कुणइ, भयवंपि महावीरो सम-  
णसंघपरिवुडो जहन्नेणऽवि कोडिसंखेहिं देवेहिं अणुगम्ममाणो भुवणच्छेरयभूयं विभूइसमुदयमुव्वहंतो दिसिचक्कवाल-  
परिसरिएण पभामंडलेण समुग्गयाणेगमायंडपरंपरं व गयणमुवदंसयंतो पयपरिवाडिसुरविरइयकणयंवुरुहनिवहेण  
थलकमलसोहं व महियलस्स दावित्तो पइ सन्निवेसमसब्भूयभावणं जणाणं पणासयंतो पयंडपासंडदप्पखंडणं कुणमाणो  
निवाणनगरमग्गं पव्वत्तयंतो कोसंबीओ निक्खमित्ता तमेव सावत्थिं नगरिं संपाविओ, नाणाविहविहगविरायंततरुणत-  
रुरमणीयंमि य समोसढो कोट्टगचेइयंमि, मुणियजिणागमा य समागया परिसा, पज्जुवासिऊण य गया जहागयं, पत्ते य

मृगावत्याः  
केवलं  
श्रावस्त्यां  
गोशालकः

॥ २७५ ॥

मिक्षाकाले छट्टपारणयं काउकामो भयवओ अणुण्णाए पविट्ठो भिक्षुद्वं गोयमो पुरीए, तर्हि च तियच्चउक्कचचरेसु  
गोसालो जिणो सवन्नत्ति परोप्परं जंपंतं जणं निसामिऊण जायसंसओ भिक्षं घेत्तूण पडिनियत्तो, जहाविहिं भुंजिऊण  
जावंगि पत्थाये समागए पुरीलोए सामिं पुच्छिउं पवत्तो-भयवं! एत्थ जणो गोसालं जिणं सवन्नं च परिकित्तेइ तं किं  
पडइ मिच्छा वा?, भगवया भणियं-भो देवाणुप्पिया! गोसालो मंखलिपुत्तो अजिणो जिणप्पलावी मए चेव पवाविओ  
सिक्खं च गाहिओ ममं चेव मिच्छं पडिवन्नो, अओ न सवन्नं न य जिणो हवइत्ति, एवं सोचा पुरीजणो मुणियपरमत्थो  
पडिनियत्तिय नयरीए सिंघाडगतिगचउक्कचचरेसु अन्नमन्नस्स सविम्हयं परुविउमारद्धो-अहो भयवं! महावीरो  
समुप्पन्नदिषणाणदंसणो एवं भासइ-एसो गोसालो मंखलिपुत्तो अजिणो जिणप्पलावी, अहं जिणोत्ति मिच्छं संलव-  
इत्ति, इमं च कन्नपरंपराए सोचा गोसालगो अचंतकोववसफुरंतओद्धुडो आजीवियसंघपरिवुडो अमरिसमुवहंतो  
अच्छइ। इओ य-भगवओ महावीरस्स अंतेवासी आणंदो नाम थेरो अणिकिखत्तछट्टतवकम्मकरणपरो पारणगंमि  
पडिग्गहं गहाय निग्गओ गोयरचरियाए, उच्चावएसु य गिहेसु भिक्षं परिभंमंतो तीसे हालाहलाए कुंभकारीए  
कुंभकारावणस्स अदूरेण गंतुं पवत्तो, तं च दट्ठूण गोसालो भणइ-भो आणंद! इओ एहि, निसामेहि दिट्ठंतमेगंति,  
इमं च एवमायन्निऊण समागओ आणंदसाह, भणिओ य गोसालेण-भो आणंद! इओ चिरा समइकंताए अद्धाए  
केइ अत्थत्थिणो वाणियगा नाणाविहमंडविच्छइभरिएणं सगडीसगडेणं सुवहुं भत्तपाणपत्थयणं गहाय एगं महंतं

श्रीगुणचंद  
महावीरच०  
८ प्रस्तावः

॥ २७६ ॥

जणसंचाररहियं छेत्तभूमिं व करिसयविराइयं भारहकहं व भीमअज्जुणनउलसउणिसंकुलं दीहछिन्नावायं उब्भडवि-  
डविसंकडं महाडविमणुपविट्ठा, तीसे य कंचि देसमणुपत्ताणं तेसिं पुवग्गहियमुदयमणुदियहं पिज्जमाणं झीणं, तय-  
णंतरं ते वणिया झीणसलिला तण्हाए परब्भाहया समाणा एगत्थ मिलिऊण एवं भणिउमारद्धा—

भोयणविरहेवि जियं कइवि दिणे वसइ देहगेहंमि । सलिलाभावे पुण दीवओव पवणेण विज्झाइ ॥ १ ॥

ता जावज्जवि तण्हा कालरयणिव अवहरइ जीयं । ताव परकज्जजायं मोत्तुं सलिलं पलोएह ॥ २ ॥

एवं च ते पयट्ठा सवासु दिसासु पाणियनिमित्तं । कत्थइ अपेच्छमाणा एगं वणसंडमल्लीणा ॥ ३ ॥

विच्छायमुहा दीणा अपत्तकालावि संपइ मरामो । एवं पयंपमाणा तण्हावससुसियसवंगा ॥ ४ ॥

सिसिरतरुच्छायाए निमीलियच्छा य जाव चिट्ठंति । तावेगनरज्जुवाणो समागओ तेसि पासंमि ॥ ५ ॥

भणियं च तेण मुंचह विसायमहुणा मए जओ दिट्ठो । वणसंडमज्झयारे चउम्मुहो वस्मिओ गरुओ ॥ ६ ॥

ता एह तत्थ जामो पढममुहं भिंदिमो य तस्स लहुं । पच्छा अच्छं पत्थं जलरयणं आपिवा मोत्ति ॥ ७ ॥

एयं निसामिऊणं ते वणिया तक्खणेण गंतूण । भिंदंती पढममुहं तस्स तिसाविवससवंगा ॥ ८ ॥

फलिहुज्जलं च सलिलं सारयससिणो मऊहजालं व । हेलाए नीहरंतं पेच्छंति तओ पहिट्ठा ते ॥ ९ ॥

तयणंतरं च करचरणखालणं वयणसोहणं पियणं । वीसत्था वाणियगा निवत्तंती जहिच्छाए ॥ १० ॥

गोशालोक्तं  
वणिग्जातं.

॥ २७६ ॥

पच्छा भरेति करवत्तयाइं दिहणो य कलसए चेव । दुलहं लद्धं वत्थुं कह वा नो घेप्पइ जणेण ॥ ११ ॥  
 जाया पुणोवि चिंता तेसिं जह सलिलमित्थ लद्धमहो । तह वीयमुहे खणिए पाविज्जइ नूण तवणिज्जं ॥ १२ ॥  
 ता भिंदह पुणरवि वम्मियस्स वीयं मुहं लद्धं चेव । इय भणिए पुरिसेहिं तहत्ति सवं तओ विहियं ॥ १३ ॥  
 ताहे सुजच्चकंचणनिचयं तत्तो विणिग्गयं संतं । हरिसुल्लसियसरीरा गिण्हंति जहिच्छियं वणिया ॥ १४ ॥  
 हिट्ठा भणंति वम्मियनिभेण चिंतामणी पयावइणा । अम्हारिसपहियहियट्ठयाए मन्ने कओ एत्थ ॥ १५ ॥  
 ता अज्जवि तइयमुहं भेत्तवं होइ संपयमिमस्स । संभाविज्जंति इमंमि जेण रयणाणि मणिणो य ॥ १६ ॥  
 एत्थंतरंमि पुरिसेहिं भिंदियं तंपि लोभनडिएहिं । अह नीहरियाइं तओ रयणाइं अणेगभेयाइं ॥ १७ ॥  
 कणगं परिहरिऊणं महग्घरयणेहिं तेहिं सगडाइं । भरियाइं गाढपहरिससंभारं उव्वहंतेहिं ॥ १८ ॥  
 नवरं चउत्थयंमि य मुहंमि भेत्तुं पयट्ठिया वंछा । तेसिं तु उत्तरोत्तरविसिद्धवत्थूण लांभेण ॥ १९ ॥  
 अह जाय तं विहाडिंति नेव तावेगथेरपुरिसेण । तेसिं हियत्थिणा सुद्धबुद्धिणा जंपियं एयं ॥ २० ॥  
 भो भो देवाणुपिया । जलं च कणगं च रयणनिवहं च । लद्धूण मुयह वम्मियमहुणा वच्चह सगेहेसुं ॥ २१ ॥  
 मा पविहाडह एयं कज्जाण गईओ हुंति कुडिलाओ । सिट्ठो सिद्धंतेविडु लोभो मूलं विणासस्स ॥ २२ ॥  
 लोगेऽपि पसिद्धमिमं जं किर निवसंति गाढदाढिला । अचंततिवदप्पा सप्पा वम्मियनिवासेसु ॥ २३ ॥



श्रीगुणचंद  
महावीरच०  
८ प्रस्तावः

॥ २७७ ॥

जइ कहवि मणोवंचियजलाइलाभो इमंमि भे जाओ । तहवि न खणिउं जुजइ विले विले होइ किं गोहां ? ॥ २४ ॥  
जओ-अनओ जणियगुणोऽविहु पयावविहवं न देइ गरुयाणं । विहिवसविसंघडंतोऽवि गुणकरो नयसमारंभो ॥ २५ ॥  
अह तवयणं अवगणिऊण ते लोभतरलिया वणिया । वम्मियचउत्थमुहमवि जवेण खणिउं समाढत्ता ॥ २६ ॥  
खणमाणेहिं तेहिं पयंडजमबाहुदंडसारित्थो । तस्संतो निवसंतो मुहेण परिघट्ठिओ नागो ॥ २७ ॥  
ताहे सो रोसारुणनयणपहापाडलीकयदियंतो । विरइयअकालसंझोव निग्गओ वम्मियाहिंतो ॥ २८ ॥  
तहवि य फारफणफलगफुरियरणुच्छलंतरुइपडलो । पुच्छच्छडताडियभूमिवट्ट गुंजंतवणसंडो ॥ २९ ॥  
सिग्घं नीहरिऊणं वम्मियसिहरग्गभागमारुहइ । पेच्छइ य भाणुमंडलमह सवियासाहिं अच्छीहिं ॥ ३० ॥  
अह खणमेकं सूरं पलोइउं अणिमिसाए दिट्ठीए । ते वणिया आलोयइ सो उग्गविसो महासप्पो ॥ ३१ ॥  
तयणंतरं च ते तस्स चक्खुणा तिवजलणजडिलेण । निदुहा समगं चिय समग्गभंडोवगरणोहिं ॥ ३२ ॥  
नवरं सो एगो चिय थेरो नियभंडसगडियासहिओ । अणुकंपिगाए देवीए पाविओ वंचियं ठाणं ॥ ३३ ॥  
तो भो आणंदमुणिंद ! ते जहा वाणिया अइविमूढा । अइलोभेणभिभूया सप्पाओ विणासमावज्जा ॥ ३४ ॥  
तह तुज्झ धम्मसूरी समणो वरनायकुलसमुब्भूओ । लद्धपसिद्धी भुवणत्तएऽवि समणो महावीरो ॥ ३५ ॥  
असुरसुरनागकिन्नरनरनरवइपूयणिज्जपयकमलो । एत्तियमेत्ताएविहु सिरीए संतोसमलहंतो ॥ ३६ ॥

गोशालोक्त  
वलमीकमे-  
दकवणिग्घ-  
ष्टान्तः

॥ २७७ ॥

जइ एत्तो गह संमुहमभत्तिपर वयणलेसमवि वइही । तमहं तवतेएणं भासरासिं करिस्सामि ॥ ३७ ॥  
जह पुण सो घेरनरो ते वणिए सवहा निवारितो । न विणट्ठो तह आणंद ! तं पि नाहं विणासिस्सं ॥ ३८ ॥  
ता गच्छ तुमं नियधम्मसूरिणो कहसु सवमवि एयं । बलिणा समं विरोहो न कयाइ सुहावहो होइ ॥ ३९ ॥  
एयं निसामिऊण आणंदमहरिसी सच्छहिययत्तणेण समुप्पन्नभयसंकप्पो अपरिसमत्तभिक्षाकज्जोऽवि तओ  
ठाणाओ सिग्घाए गईए समागओ जिणंतियं, तिक्खुत्तो आयाहिणपयाहिणपुव्वं वंदिऊण गोसालगोवइहं वणि-  
यदिद्वं दिट्ठीविसभुयगदहणपज्जवसाणं सव्वं परिकहेइ, पुच्छइ य-भयवं ! किं गोसालो एवंविहस्सऽत्थस्स करणंमि  
समत्थो न वा ? भगवया भणियं-आणंद ! समत्थो चेव, केवलं अरहंताणं भगवंताणं असमत्थो, परितावमेत्तं पुण  
करेज्जा, ता गच्छ तुमं गोयमाईणं समणाणं एयमट्ठं कहेहि, जहा-मा तुभं कोइ गोसालं मंखलिपुत्तं ममंतियं  
पाउन्भूयं समाणं धम्मियाएवि पडिचोयणाए पडिचोएज्जा, जओ एस ममं मिच्छं पडिवन्नोत्ति, एवं च विणएण  
पडिसुणेत्ता गओ आणंदो गोयमाईण समीवं कहिउमारद्धो य तं वइयरं, एत्थंतरे गोसालो अत्तणो पराभवमस-  
हंतो संपत्तो जिणसमीवं, अदूरे य ठाऊण भगवओ अभिमुहं एवं भणिउं पवत्तो-भो कासव ! तुमं मम हुत्तं एवं  
वयसि-एस गोसालो मंखलिपुत्तो मम धम्मंतेवासी इच्चाइ, तन्नं मिच्छा, जो हि गोसालो तुमंतेवासी सो सुक्काभि-  
जाइओ भवित्ता कालमासे कालं काऊण अन्नयरेसु देवलोएसु देवत्ताए उववन्नो, अहं पुण उदाई नाम महामुणी

श्रीगुणचंद  
महावीरच०  
८ प्रस्तावः

॥ २७८ ॥

विचित्तवचरणासमत्थं नियदेहमुज्झिऊणं तस्स गोसालगस्स सरीरगं थिरं धुवं धारणिज्जं सीयसहं उण्हसहं खुहा-  
पिवासासहं विविहदंसमसगाइपरीसहोवसग्गसहं थिरसंघयणंतिकाऊण तमणुपविट्ठो, ता भो कासवा ! साहु तुमं  
अपरियाणिऊण मं गोसालं मंखलिपुत्तं वाहरसि, एवं च तेण भणिए भगवया महावीरेण जंपियं-भो गोसालग !  
जहा कोइ चोरपुरिसो विविहपहरणहत्येहिं खंडरक्खपामोक्खनरनियरेहिं पारब्भमाणो णो कत्थइ गड्डं वा दरिं वा  
दुग्गं वा वणगहणं वा अत्तणो गोवणत्थं अपावमाणो एगेण उन्नालोमेण वा सणलोमेण वा कप्पासपुंमेण वा तण-  
सूएण वा तदंतरे दिन्नेण व अत्ताणमणावरियंपि आवरियंपिव मण्णेमाणो निब्भओ निरुद्धिग्गो अच्छइ, एवमेव  
तुमंपि गोसाला ! अणण्णो संतो अण्णमप्पाणं वागरेसु, ता मा एवमलीयं वाहरसु, सुचेव तुह सरीरच्छाया, नो  
अन्नत्ति, एवं च भगवया वुत्तो समाणो पज्जलियपयंडकोवानलो उच्चावएहिं वयणेहिं जयगुरू अक्कोसिऊण भणइ-भो  
कासव ! नट्ठोसि अज्ज, भट्ठोसि अज्ज, अज्जेव न भवसि तुमंति, जो गिरिकंदरसुत्तं सीहं वोहेसि कीलाए, एत्थंतरे  
भयवओ महावीरस्स अंतेवासीसद्वाणुभूईनामो अणगारो धम्मायरियाणुरागेणं एयमट्ठं सोढुमपारयंतो समागंतूण एवं  
भणिउमारट्ठो-भो गोसालग ! तहारूवस्स समणस्स वा माहणस्स वा अंतिए जे एगमवि धम्मियं वयणं निसामिंति  
तेऽवि तं वंदंति नमंसंति गुरुवुद्धीए पज्जुवासंति, किं पुण तुमं जो मूलाओ चिय भयवया चेव पवाविओ सिक्खाविओ  
बहुस्सुतीकओ भगवओ चेव मिच्छं पडिवज्जंतो न लज्जसि ?, ता मा एवं कुणसु, अज्जावि सो चेव तुमं, सा चेव

गोशालक-  
स्यागमनं  
सत्यस्वरूप  
कथा.

॥ २७८ ॥

तुह देहच्छाया, कीस अप्पाणं अवलवेसित्ति वुत्ते सव्वाणुभूईं मुणिं गोसालो समुच्छलियकोवानलो तं दिव्वं पयडं  
अणहियासणिज्जं तेउलेसं पक्खिविऊण निहहइ तक्खणेण, सो य तेयनिहहो सुहज्झवसायाणुगओ मरिऊण सह-  
स्सारे कप्पे अट्टारससागराऊ देवो जाओत्ति, गोसालगोऽवि पुणो भयवतं अणेगप्पयारेहिं दुव्वयणेहिं पहणिउं  
पवत्तो, इओ य सुनक्खत्तनामो साहू तहा अवकोसिज्जमाणं भगवतं निसामिऊण तणं व नियजीवियमवि गणंतो  
सिग्घमागंतूण गोसालं जहा सव्वाणुभूईं तहेव अणुसासइ, नवरं गोसालगपक्खित्ततेउलेसापलीविओ समाणो भय-  
वतं तिकखुत्तो वंदिऊण सयमेव पंच महवयाइं उच्चारैइ, समणा य समणीओ खामेइ; आलोइयपडिक्कंतो य कालं  
कारुण अञ्चुए कप्पे वावीससागरोवमाउयदेवेषु देवत्तेणं उव्वज्जइ, एवं च तस्मि पंचत्तं गए संते गोसालो दुन्निग्ग-  
हिओ वेयालोव लद्धावयासो विसेसओ परुसक्खराहिं गिराहिं तज्जणं कुणंतो वागरिओ सकारणं जयगुरुणां-भो  
महाणुभाव। गोसालग सिट्ठपहसमइक्कंतं तुह चरियं, जं मए पद्दाविओ मए सिक्खाविओ मए बहुस्सुईकओ  
ममावि अवण्णवाई जाओ सि, एवं च जयगुरुणा सयमेव संलत्ते तेण अणाकलियकोवावेगेण सत्तट्ठ पयाइं पच्चोस-  
किऊण पमुका महया संरंभेण भगवओ अभिमुहा तेउलेसा ।

अह मंदरगिरिरायं व निट्ठुरं जिणसरीरमक्कमिउं । असमत्था मारुयमंडलिच्च सा निहयमाहप्पा ॥ १ ॥  
सयलदिसामुहपसरियपयंडतरतेयरइयपरिवेसा । आरत्तियदीवयमालियच्च सक्खा विरायंती ॥ २ ॥

श्रीगुणचंद  
महावीरच०  
८ प्रस्तावः

॥ २७९ ॥

जच्चतवणिज्जपुंजुज्जलंगपहपडलविजियसोहस्स । भीयव तक्खणं चिय सामिस्स पयाहिणं कुणइ ॥ ३ ॥  
तप्फरिसवसेण य भुवणबंधुणो अमयसीयतणुणोऽवि । जाओ मणागमेत्तं परितावो सब्बगत्तंमि ॥ ४ ॥  
सा य तेउलेसा अहो अहं इमिणा महापावेण एरिसमकज्जं कारावियत्ति जायतिवकोवव उहं उप्पइत्ता गोसा-  
लगस्स सरीरं उहमाणी अंतो लहुमणुपविट्ठा, तओ गोसालो काउरिसोव समत्थेण नियतेएण विणिहओऽवि  
धिट्ठिममवलंविऊण एवं पयंपेइ—अहो कासवा ! तुमं मम इमिणा तेएण अभिहओ संतो अंतो छण्हं मासाणं पित्त-  
जरपरिगयसरीरो दाहवेयणोवक्कमियाउओ छउमत्थो चेव कालं करिस्ससि, भगवया भणियं—भो मंखलिपुत्त ! नो  
खलु अहं तुह तेएण अहिहओ छण्हं मासाणं अंतो कालं करिस्सामि, किं तु अन्नाइं सोलस वासाइं पडिपुन्ननाण-  
दंसणधरो विहरिस्सामि, पच्छा खवियसयलकम्मंसो सिवपयं गमिस्सामि, तुमं पुण अप्पणो तेएण निद्वहसरीरो  
अंतो सत्तरत्तस्स पित्तमहाजरजलणपलित्तगतो छउमत्थो चेव कालं करिस्ससित्ति ।

अह सब्बत्थवि नयरे मुद्धजणो जंपिउं समाढत्तो । दोण्हं एत्थ जिणाणं परोप्परं वट्ठइ विवाओ ॥ १ ॥

तत्थेगो भणइ इमं पुविं कालं करिस्ससि तुमंति । इयरोविहु तदभिमुहं इममेव पयंपए वयणं ॥ २ ॥

न मुणिज्जइ परमत्थो को मिच्छा वयइ को य सच्चंति ? । कुसला भणंति वीरो सच्चं वागरइ नो इयरो ॥ ३ ॥

इओ य जयगुरु नियसमणगणमामंतिऊण भणइ—भो समणा ! जह तणरासी तुसरासी पत्तरासी बुसरासी

सर्वानुभूति  
सुनक्षत्रदा-  
हः गोशाले  
तेजोदाहः

॥ २७९ ॥

या जलणजालापलीविया समानी पणट्टतेया जायइ, एवं गोसालो मम बहाय तेयं निसिरित्ता विणट्टतेउलेसमा-  
हप्पो जाओ, तम्हा छंदेण निब्भया तुब्भे एयं धम्मियाए चोयणाए पडिचोएह, हेऊदाहरणकारणेहिं निष्पिट्ट-  
पत्तिणयागरणं करेहत्ति बुत्ते तहत्ति पडिसुणित्ता जयनाहं च सविणयं वंदिऊण समणा तं भणिउं पवत्ता ।

किं च-भो गोसालग ! किं तुज्झ दंसणे एस सत्थंपरमत्थो । जं लोगमग्गचुक्कं तमेरिसं कम्ममायरसि ? ॥ १ ॥

तहाहि-धम्मगुरुं जयमन्नसिं नियमाहप्पं पवित्थरसि बहुसो । जुत्तीहिवि जं न घडइ तं भाससि मुक्कमज्जाय ॥ २ ॥

वायाए जीवरक्खं पयडसि तं लोयमज्झयारंमि । सद्धम्मगुणपहाणे सयं तु निदहसि साहूवि ॥ ३ ॥

एवंविहं अकज्जं कुणंति न कयाइ किर चिलायावि । तुमए पुण अलियवियइमेव सच्चं समायरियं ॥ ४ ॥

न सरसि उययारं एत्तियंपि जं रक्खिओ सि जयगुरुणा । तह वेसियायणुम्ममुक्कतेयनिडुज्झमाणंगो ॥ ५ ॥

इइ भगवओ समणेहिं धम्मियाए चोयणाए चोइज्जमाणो गोसालो आसुरुत्तो कोवेण मिसिमिसेमाणो समाणो  
जाय साहूणं सरीरस्स रोममेत्तंपि निडुहिउं न तरइ ताव पडिहयसामत्थं तं नाऊण केऽवि आजीवियथेरा जयगुरुं  
गुरुत्तणेण पडिवन्ना, अन्ने पुण विवेगविरहिया तहेव ठिया, गोसालगोऽवि खणमेत्तं विगमिऊण रोसेण च माणेण य  
दीणुण्हं नीससंतो दाढियलोमाइं लुंचमाणो हत्थे पकंपयंतो चलणेहिं भूमिं कुट्टमाणो अंतो विसप्पंतदुस्सहतेउल्ले-  
सादाहवसेण य हा हओऽहमस्सीति पुणरुत्तं वाहरंतो अकयकज्जो चेव भगवओ समीवाओ नीहरिऊण गओ सट्ठाणं,

श्रीगुणचंद  
महावीरच०  
८ प्रस्तावः

॥ २८० ॥

जयगुरुणाऽवि जंपियं—भो समणा ! जं इमं गोसालेण मम वहट्ठा तेयं निसिद्धं तं खलु अंगवंगमगहमलयमालवअ-  
च्छवच्छकोच्छपाढलाढवज्जिमासिकासिकोसलअवाहसुभुत्तराभिहाणाणं सोलसण्हं जणवयाणं उच्छायणाए भासरा-  
सीकरणयाए समत्थंति वुत्ते विम्बियहियया मुणिणो जायत्ति ।

सो य गोसालो कोडरनिहित्तहुयवहो तरुव निडुज्झमाणो कहिंपि रइं अलहंतो तस्स दाहस्स पसमणत्थं कर-  
कलिएणं भायणेणं मज्जपाणगं पियमाणो तवससंभूयमएण य अभिक्खणं गायमाणो अभिक्खणं नचमाणो अभि-  
क्खणं हालाहलाए कुंभकारीए अंजलिपग्गहपुव्वयं पणामं कुणमाणो अभिक्खणं भंडगनिमित्तकुट्टियमट्टियंतो-  
निहित्तिसिसिरकलिलसलिलेण सरीरं उवसिंचमाणो अडुवियडाइं पइक्खणं जंपमाणो परमसोगमुव्वहंतेण सिस्सग-  
णेण सिसिरोवयारकारिणा परिवुडो दिणे गमेइ ।

तत्थ य सावत्थीए नयरीए अयंपुलो नाम आजीविओवासओ परिवसइ, सो य पुव्वरत्तावरत्तसमयंमि धम्मजाग-  
रियं जागरमाणो जायसंसओ विचिंतेइ—अहमेयं सम्मं न मुणामि—तणगोवालिया किं संठाणा हवइ ? ता गच्छामि  
धम्मायरियं धम्मोवएसगं समुप्पन्नदिवनाणदंसणं सवन्नं गोसालं हालाहलाए कुंभकारीए आवणंमि वट्टमाणमापु-  
च्छामित्ति संपेहित्ता समुग्गयंमि दिणयरे अप्पमहग्गवाभरणालंकियसरीरो साओ गिहाओ पडिनिक्खमित्ता पायवि-  
हारचारेणं कइवयपुरिसपरियरिओ गोसालयाभिमुहं गंतुं पयट्ठो, कमेण य कुंभारावणसमीवमणुपत्तो समाणो तं

साधुकृता  
नोदनाते-  
जोमहत्त्वं  
गोशालक  
चेष्टा.

॥ २८० ॥

गोसालं करकलियभायणमभिवक्खणं मइरापाणं कुणमाणं नच्चमाणं गायमाणं हालाहलाए कुंभकारीए अंजलिं  
 विरयंतं मट्टियासलिलेणं सरीरं परिसिंचमाणं असंवद्धाई वयणाई पयंपमाणं पेच्छिऊण लज्जावसविमिलायंतलोयणो  
 सहसयिय सणियं सणियं पचोसकंतो झडत्ति समीवट्टिएहिं दिट्ठो गोसालयसिस्सेहिं, तओ वाहरिऊण भणिओ-  
 तेहिं—भो अयंपुल ! तुमं पच्छिमरयणीए तणगोवालियासंठाणविसयं संसयं पकओसि, अयंपुलेण भणियं—भयवं !  
 एवमेयं, पुणोऽपि गोसालगदुच्चिलसियगोवणट्टया भणियं तेहिं—भो अयंपुल ! जं च तुह गुरु हत्थगयभायणे जाव  
 अंजलिं विरयंतो विहरइ तत्थपि एस भगवं इमाई निव्वाणगमणसूयगाई पज्जंतलिंगाई वागरेइ, तंजहा—

चरिमं गेयं चरिमं नट्टं चरिमं अंजलिकम्मं चरिमं पाणं अन्नं च मट्टियासीयलसलिलसरीराणुलिंपणपमुहं  
 वावारं, ता अयंपुल ! भगवओ चउवीसमतित्थगरस्सं गोसालगस्स पुवभणियलिंगेहिं सूइओ संपइ निव्वाणगमण-  
 पत्त्याओ वट्टइ, तम्हा गच्छ तुमं स एव तुह धम्मायरिओ इमं वागरणं वागरिही, एवं च सोचा सो दढहरिसुच्छ-  
 लंतपुलयजालो तदभिमुहं गंतुं पयट्ठो, ते आजीवियथेरा सिग्घयरं गंतूण गोसालगस्स अयंपुलागमणं निवेएत्ति,  
 तं च मज्जभायणाइ एगंतं परिचयावेंति, आसणंमि थ निवज्जावेंति, एत्थंतरे पत्तो अयंपुलो तिक्खुत्तो य पया-  
 हिणीकाऊण परेणं विणएणं वंदित्ता गोसालयं निसण्णो समुच्चियासणे, तओ गोसालएण भणियं—भो अयंपुल !  
 तुमं पच्छिमरयणीसमयंमि इमं संसयमुवहसि जहा तणगोवालिया किंसंठाणसंठियत्ति, नणु वंसीमूलसंठिया सा



श्रीगुणचंद  
महावीरच०  
८ प्रस्तावः

॥ २८१ ॥

पन्नत्तत्ति, इमं च निसामिऊण पहिदुहियओ पुणो तं वंदिऊण गओ सो सट्ठाणं । अन्नम्मि य वासरे ईसि समुवलद्ध-  
चेयणो गोसालो नियमरणसमयमाभोइऊण अप्पणो सिस्से सदावेइ, तेसिं पुरओ य इमं वागरेइ-भो देवाणुप्पिया !  
मं कालगयं जाणिऊण मम सरीरं सुरहिगंधोदएण पक्खालिऊण सरसेण चंदणेण चच्चिऊण य महरिहं हंसल-  
क्खणं पडयं नियंसावेज्जह, तयणंतरं सच्चालंकारविभूसियं सहस्सवाहिणीसिविगासमारोवियं काऊण नीहरावेज्जह,  
सावत्थीए पुरीए सिंघाडगतियच्चउक्कचचरेसु इमं उग्घोसिज्जह, जहा-इमीए ओसप्पिणीए चउवीसाए तित्थयराणं  
चरिमो एस गोसालगजिणो तित्थयरत्तं पालिऊण समुप्पन्नकेवलो संपयं सिद्धिं गओत्ति, इमं निसामिऊण ते सिस्सा  
विणएणं सव्वं पडिसुणंति, अह सत्तमदिणंमि परिणममाणंमि समुवलद्धसुद्धबुद्धिणा पुव्वदुच्चरियनिवहसुमरणुप्पन्ना-  
तुच्छपच्छायावेण चिंतियं गोसालेण—

अहह महापावोऽहं अजिणंपि जिणं भणामि अप्पाणं । सच्चं च मुसावयणंपि मुद्धलोयस्स साहेमि ॥ १ ॥

सिरिवद्धमाण तित्थंकरो गुरु धम्मदेसगो परमो । आसाइओ मए तह तेयनिसग्गेण दुग्गेण ॥ २ ॥

दुद्धरसंजमभरधरणपच्चले मुणिवरे दहंतेण । निदुद्ध चिय वोही मए हयासेण एमेव ॥ ३ ॥

सच्छंदं उम्मग्गं पयट्ठमाणेण तह महीवट्ठे । अप्पा न केवलो चिय लोगोऽवि भवन्नवे खित्तो ॥ ४ ॥

अहवा समग्गभुवणत्तएऽवि तं नत्थि पावठाणमहो । जं कइवयदिणकज्जे मए अणज्जेण नो विहियं ॥ ५ ॥

चरमगेया-  
दीनि गो-  
शालकस्य  
पश्चात्तापः

॥ २८१ ॥

तं चोजं जं इमिणावि दुहुदेहेण पविभरगुरुणा । जमवयणंपिव भीमं अज्जवि नासं न वच्चामि ॥ ६ ॥  
मुद्वेण मए चिरजीवियत्थिणा कवलियं हि तालउडं । आगामियमसुहमतक्किऊण जं एवमायरियं ॥ ७ ॥  
इय वेरगमुवगओ गोसालो तह न तेउलेसाए । संतप्पइ जह तेणं सपुवदुच्चरियवग्गेण ॥ ८ ॥

एवं च सुचिरं परिद्धुरिऊण सो नियसिस्सगणं उचाचयसवहसावियं काऊणं एवं भणिउं पवत्तो-भो महाणु-  
मावा । नो खलु अहं जिणो सबन्नू सबदरिसीवि, किंतु गोसालो मंखलिपुत्तो भगवओ वद्धमाणतित्थंकरस्स  
सिस्सोऽवि होऊण पच्चणीओ समणघायगो नियतेएण चेवाभिहओ छउमत्थो विणस्सिउकामो उंभमेत्तपयट्ठिय-  
पउट्टपरिहाराइदुन्नओ एत्तियकालमप्पाणं परं च बुग्गाहंतो विहरिओ, अओ एवंविहमहापावकारिणं कालगयं  
जाणित्ता तुग्गे वामचलणंमि रज्जूए वंधित्ता इमाए सावत्थीए पुरीए सबत्थ सिंघाडगाइसु आकट्ठिविकट्ठिं ऊणमाणा  
तिक्खुत्तो वयणंमि निट्ठीवणं पक्खिवंता एसो सो गोसालो मंखलिपुत्तो अजिणो गुरुपडिणीओ समणघायगो  
असेसदोसकारी, भयवं पुण महावीरो जिणो तित्थयरो उप्पन्नदिघनाणदंसणो सच्चवाई कारुणिओ धम्मदेसगोत्ति  
महया सद्देण उग्घोसमाणा य मम सरीरस्स नीहरणं करेज्जहत्ति भणिऊण दारुणवेयणाभिहयसरीरो मओ गोसा-  
लोत्ति । तं च कालगयं जाणित्ता ते आजीविथेरा नियगुरुपक्खवायमुवहंता कुंभकारावणस्स दुवारं पिहिऊण तस्स  
मज्झयारे सावत्थिं नयरिमालिहंति, तओ गोसालगस्स वामपायरज्जुबंधणपमुहं आघोसणापज्जवसाणं सवहपरिमो-

श्रीगुणचंद  
महावीरच०  
८ प्रस्तावः

॥ २८२ ॥

क्खणं करेति, तयणंतरं च तं सरीरगं सुरहिसलिलेहिं ण्हाविऊण तप्पक्खवायपडिवन्नजणथिरिकरणट्टया महया  
पूयासक्कारसमुदणं सिवियाए समारोविऊण नीहराविति, मयकिचाणि य कुणंति ।

इओ य भगवं महावीरो सावत्थीओ नयरीओ निक्खमिऊण विहारक्कमेण गओ मिंढियगामनयरे, समोसढो य  
मणिकोट्टयाभिहाणचेइयंमि, धम्मनिसामणत्थं च परिसा समागया, खणमेगं च पज्जुवासिऊण जहागयं पडि-  
गया, अह भगवओ महावीरस्स तेण तेउलेसापरिताववसेण समुप्पन्नो पित्तजरो, तवसेण य पाउब्भूओ रुहिराइ-  
सारो, रविकरपडिवोहियकणयकमलसच्छहंपि मिलायलायन्नं जायं वयणकमलं सरयदिणयरसमुज्जलावि विच्छाई-  
भूया देहच्छवी वियसियकुवलयदलदीहरंपि मउलावियं लोयणजुयलं महानगरगोउरपरिहाणुरूवंपि किसत्तणमुव-  
गयं बाहुदंडजुयलंति, एवंविहं च भगवओ सरीरलच्छिं पिच्छमाणो मुद्धजणो वाहरिउमारद्धो—अहो भगवं महा-  
वीरो गोसालगतवतेयजणियपित्तज्जरविहुरियसरीरो छण्हं मासाणमब्भंतरे परलोयं वच्चिस्सइत्ति, इमं च पवायं  
जणपरंपराओ निसामिऊण सीहो नाम भगवओ सिस्सो गुरुपेम्माणुरागेण एगंते गंतूण अहिययरमन्नुब्भर-  
रुद्धकंठविवरो कहकहविगम्भिणं रोविउं पयत्तो, इओ य केवलावलोएण अवलोइऊण भगवया वाहराविओ  
एसो, भणिओ य—

किं तं जणप्पवायं निसामिउं कुणसि चित्तसंतावं ? । नेवावयाए कइयवि विउक्कमंतीह तित्थयरा ॥ १ ॥

गोशालक-  
स्य मृत्युः  
सिंहसाधो  
रोदनं च.

॥ २८२ ॥

अन्नह संगमयविमुक्कचक्कडपूयणाइजणिएहिं । मरणं हविज्ज तइयावि मज्झं तिक्खेहि दुक्खेहिं ॥ २ ॥

जो पुण तणुतणुयत्तणरुहिरइसाराइओ विगारो मे । सो(निरु)वक्कमत्तणेणं सोऽवि न दोसं समावहइ ॥ ३ ॥

सीहेण तओ भणियं जइवि हु एवं तहावि जयनाह ! । तुम्हावयाए तप्पइ सयलं ससुरासुरं भुवणं ॥ ४ ॥

सिढिलियसज्झायज्झाणदाणपामोक्खधम्मवावारो । चाउघन्नो संघोऽवि लहई नो निब्बुइं कहवि ॥ ५ ॥

ता पसियसु जयवंधव ! अम्हारिसहिययदाहसमणत्थं । उवइससु भेसहं जेण होइ देहं निरोगं भे ॥ ६ ॥

एवं कहिए तयणुकंपाए भगवया भणियं—जइ एवं ता इहेव मिंढयग्गामे नयरे रेवइए गाहावइणीए समीवं  
वचाहि, ताए य ममनिमित्तं जं पुवं ओसहं उवक्खडियं तं परिहरिऊण इयरं अप्पणो निमित्तं निप्फाइयं आणेहित्ति,  
इमं निसामिऊण हरिसवसपयट्ठपुलयपडलाउरसरीरो सीहो अणगारो समुट्ठिऊण भयवंतं वंदइ नमंसइ, तयणंतरं  
पडिग्गहं गहाय रेवईए गाहावइणीए गिहमुवागच्छइ, साऽवि रेवई तं अणगारं ईरियासमिइप्पमुहचरणगुणसंपन्नं  
समणधम्मं व पचक्खं गिहंमि पविसमाणमवलोइऊण खिप्पामेव आसणाओ अब्भुट्ठेइ, सत्तट्ठ पयाइं सम्मुहमवसप्पइ,  
सविणयं वंदिऊण य एवं जंपइ—संदिसह भंते ! किमागमणकारणं ?, सीहेण भणियं—जं तुमए वद्धमाणसामीं पडुच  
कयं तं मोत्तूण जं अत्तट्ठा निप्फाइयं ओसहं तं पणामेहित्ति, तीए भणियं—भयवं ! को एवंविहदिच्चनाणी जो रहसि-  
कयंपि एवंविहं वइयरं परिजाणइ, मुणिणा कहियं—सयलभावाभावनिब्भासणसमत्थकेवलावलोयनिलयं भयवंतं वी-

श्रीगुणचंद  
महावीरचं  
८ प्रस्तावः

॥ २८३ ॥

रजिणं मोत्तूणं को अन्नो एवंविहं साहिउं पारइ?, एवं सोचा सा पहिठ्हियया सायरं तमोसहं सुणिणो पडिग्गहंमि पक्खिवइ, तओ सा तेण भावविसुद्धभेसहप्पयाणेण देवाउयं कम्मं निवंधइ, देवा य तीसे गिहंमि कणगरासिं नि-  
सिरंति, महादाणं महादाणंति घोसंति, सीहोवि साहू तं गहाय भयवओ समप्पेइ, तं च भयवं आहारेइ, आहा-  
रिए य तहिं ववगयपित्तज्जरसमुत्थविगारो अमयपुन्नसरीरोव समहिगसमुम्मिल्लियजच्चकंचणसच्छहच्छवी वीरो वि-  
राइउं पवत्तो । अह पडिहयरोगे वद्धमाणे जिणिंदे हरिसवियसियच्छो सवसंधोऽवि जाओ । असुरसुरसमूहा वद्धि-  
याणंदभरा सह नियरमणीहिं नच्चिउं संपयत्ता ।

गोयमसामीवि गणहरो महावीरं वंदिऊण पुच्छइ-भयवं ! तुभं कुसिस्सो गोसालो कालं काऊण कहिं उववन्नो ?,  
भयवया भणियं-अच्चुयंमि देवलोगे वावीससागरोवमाऊ देवो जाओत्ति, गोयमेण भणियं-भयवं ! कहं तहाविहमहा-  
पावकरणेऽवि एवंविहदिबदेविट्ठिलाभो समुप्पण्णोत्ति ?, तओ सिट्ठो सामिणा से सवोऽवि मरणसमयसमुप्पन्नातुच्छ-  
पच्छायावाई वुत्तंतो, पुणोऽवि गोयमेण भणियं-भयवं ! तओ ठाणाओ सो आउक्खएण कहिं उववज्जिही ?, कइया  
वा सिद्धिं पाविहित्ति ?, भगवया जंपियं-गोयम ! निसामेहि-इहेव जंजुहीवे दीवे भारहे वासे विंशगिरिपायमूले  
पुंडाभिहाणंमि जणवए सुमइस्स रन्नो भदाभिहाणाए देवीए गव्वे सो गोसालो तत्तो चवित्ता पुत्तत्ताए पाउव्ववि-  
स्सइ, तओ नवण्हं मासाणं समहिगाणं समइकंतानं पजाइही, तस्स य जम्मसमए तत्थ नयरे सव्वभंतरवाहिरे

श्रीवीरस्य  
रोगशान्तिः  
गोशालक-  
वृत्तं.

॥ २८३ ॥

भारगसो य कुंभगसो य परिमलायद्वियफुलंधुयधूसरा पउमबुद्धी रयणबुद्धी य भविस्सइ, चंदसूरदंसणप्पमुहजम्म-  
 णमहसवं काऊण य जम्मापियरो दुवालसमे दिवसे संपत्ते जम्मदिणाणुरूवं महापउमोत्ति से नामं करिस्संति, अह  
 समुचियकाले अहिगयकलाकलावं तं सोहणंमि तिहिनक्खत्तमुहुत्तंमि महया रायाभिसेएणं अभिसिंचिहिन्ति, तओ  
 सो अक्खलियपरफमो पयंडपयाचपडिहयपडिवक्खो अहमहमिगाए पणमंतनरिंदसंदोहमउलिमालालालियचलणो  
 महाराओ भविस्सइ, तस्स य महापउमस्स विजयजत्तमुवट्ठियस्स पुन्नभहमाणिभइनामाणो दो देवा महद्विया महापर-  
 णमा सेणाकम्मं करिस्संति, ते य राईसरसेणावइमंतिसामंतपमुहा पहाणजणा एवंविहं वइयरमुवलब्भ पहरिसुस्स-  
 सियरोमकूवा महापउमस्स रण्णो गुणनिप्फण्णं देवसेणोत्ति दुइज्जं नामधेयं निम्मविस्संति, अण्णया य तस्स रण्णो  
 सरयससहरधवलं चउइंतं सत्तंगपइट्ठियं लट्ठं हत्थिरयणमुप्पज्जिही, तम्मि य सो समारूढो एरावणपट्ठिओव  
 पुरंदरो उवसोभेमाणो इओ तओ परिभमिस्सइ, तयणंतरं पुणोऽवि ते राईसरादओ जणा नियपहुसिद्धिपलोयणु-  
 प्पन्नपमोयभरतरलिया तस्स राइणो विमलवाहणोत्ति तइयं नामधेयं पइट्ठिस्संति । अह अन्नया कयाई तस्स  
 रज्जभरमणुपालितस्स पुवभवब्भत्थतवस्सिजणचिणासहीलणप्पमुहाणत्थपच्चइयकम्मदोसेण समणसंधोवरि चाढं प-  
 ओसो समुप्पज्जिही,

तो सो सधम्मकम्मुज्जएऽवि एगे तवस्सिणो हणिही । अन्ने पुण वंधिस्सइ विविहपयारोहिं वंधेहिं ॥ १ ॥

श्रीगुणचंद  
महावीरच०  
८ प्रस्तावः

॥ २८४ ॥

अकोसेही एगे उवहसिही तदपरे महापावो । अन्नेसि निग्घिणमणो काराविस्सइ छविच्छेयं ॥ २ ॥  
एगोसिं हरिस्सइ वत्थपत्तकंवलपमोक्खमुवगरणं । अन्नेसिं समणाणं वारिस्सइ भत्तपाणंपि ॥ ३ ॥  
अन्ने निव्वासिस्सइ नियनयरपुरागरासयाहिंतो । अन्ने पुण मारिस्सइ सत्थेहिं लहू सहत्थेण ॥ ४ ॥  
इय एवंविहमसमंजसं तओ पेच्छिऊण पउरजणा । भत्तिविणउत्तिमंगा तं एवं विन्नविस्संति ॥ ५ ॥  
देव ! न जुत्तं सोउंपि एयमच्चंतमजससंजणगं । समणाण धम्मविग्घो जं एवं हवइ तुह रज्जे ॥ ६ ॥  
दुट्ठाण निग्गहो सिट्ठपालणं नियकुलक्कमायरणं । रायाण एत्तियं चिय सलहिज्जइ किं थ सेसेहिं ? ॥ ७ ॥  
एकमकित्ती सवत्थ तिहुयणे उन्नमइ महापावं । अन्नं चिय रज्जखओ हीलिज्जंतेसु समणेसु ॥ ८ ॥  
अन्नं च-जइ देव ! कहव कुप्पंति तुम्ह समणा इमे समियपावा । ता सयलंपिवि रट्ठं दहंति हुंकारमेत्तेण ॥ ९ ॥  
एएसिं पभावेणं धरंति धराणि सुहेण नरवइणो । एत्तो चिय मज्जायं जलनिहिणोऽवि हु न लंघंति ॥ १० ॥  
ता देव ! विरमसु धुवं तवस्सिजणपीडणाओ एयाओ । अकलंकचिय कित्ती जह वियरइ तिहुयणे तुम्ह ॥ ११ ॥  
इय पुरजणेहिं सुवहुप्पयारवयणेहिं वारिओ संतो । भावविरहेऽवि सो तं पडिसुणिही तयणुवित्तीए ॥ १२ ॥  
अन्नया य सो रहवरारूढो निग्गच्छिही, इओ य सुभूमिभागे उज्जाणे तिनाणोवगओ विउलतेउलेसामाहप्प-  
दुद्धरिसो विविहतवचरणनिरओ सुमंगलो नाम तवस्सी आयाविस्सइ, सो य राया तेणप्पएसेण वचमाणो

गोशालक-  
स्य विमल-  
वाहन-  
भवः,

॥ २८४ ॥

तं दद्वण निक्कारणुप्पन्नतिवकोवानलो सुमंगलं काउस्सग्गद्वियं रहग्गभागेणं पणोल्लावेही, सो य तेणं पणोल्लिओ  
समाणो घरणीयले निवडिओऽवि सणियं सणियं समुट्ठिऊण पुणो काउस्सग्गेण पलंविद्यभुओ ठाही, सो य राया  
तं उट्ठसंठाणसंठियं दद्वण पुणोऽवि रहग्गेण पणोल्लावेही, सो य मंदं मंदमुट्ठिऊण तहेव उस्सग्गेण ठाइस्सइ, नवरं  
ओही पंजिऊण तस्स पुव्वभवे आभोइस्सइ, तओ एवं भणिही-अरे नरिंदाहम ! न तुमं महापउमो न देवसेणो न य  
विमलवाहणो, किं तु मंखलिपुत्तो गोसालगो तुमं, जेण निह्हुा महातवस्सिणो अचासाइओ निययधम्मगुरु, ता  
जइ रे तया सघाणुभूइणा मुणिवरिट्ठेण पहुणावि होऊण पडिविधायमकुणमाणेण निरुवमं पसममवलंविऊण तुह  
दुघिलसियं सम्ममहियासियं, सुनक्खत्तमहारिसिणा वा तित्तिक्खियं, असेसतिहुयणरंगातुल्लमहामल्लेण महावीरेण  
या खमियं तं, नो खलु अहं सहिस्सं, किं तु जइ एत्तो पणोल्लावेहिसि ता भवंतं सरहं सतुरयं ससारहियं नियतवते-  
एणं छारुक्कुरुडं काहामि, सो य राया इमं निसामिऊण समुच्छलियपवलकोवानलो पुणोऽवि संदणग्गेण पणोल्ला-  
वेही, अह तइयवेलंपि पणोल्लिओ सुमंगलसाहू विमुमरियपसमसव्वस्सो पणट्ठगुरुवएसो सत्तट्ठ पयाइं पचोसक्किऊण  
तेउलेसं निसिरिही, ताए य सरहो ससारही सतुरंगमो सो निदज्झिही, सुमंगलसाहूवि तं निह्हिऊण पुणरवि  
पचागयसुहज्जवसाणो आलोइयनियदुच्चरिओ विचित्तेहिं तवोकम्मोहिं कम्मनिज्जरणं काऊण वहुयाइं वासाइं सा-  
मण्णं परिपालिऊण य मासियाए संलेहणाए संलिहियसरीरो मरिऊण सव्वट्ठसिद्धे विमाणे तेत्तीससागरोवमाऊ



श्रीगुणचंद  
महावीरच०  
८ प्रस्तावः

॥ २८५ ॥

देवो भविस्सइ । तओ चुओ समाणो महाविदेहे सिज्झिहत्ति । गोयमसामिणा भणियं-भयवं ! विमलवाहणो  
कहिं उप्पज्झिही ?, भयवया भणियं-गोयम ! विमलवाहणो तेण सुणिणा निद्वहो सत्तमाए निरयपुढवीए अप्पइ-  
ट्ठाणे नरयावासे तेत्तीससागरोवमाऊ नेरइओ भविस्सइत्ति । तयणंतरं च—

सवत्तो पसरियतिक्खवज्जसूलग्गवेहणसमत्थं । अणिसं सहिही विवसो तेत्तीसं सागराइं दुहं ॥ १ ॥

तत्तो उवट्ठित्ता मच्छभवं पाविऊणं तिवेणं । पुवभवसाहुमारणजणिणं पावदोसेणं ॥ २ ॥

सो सत्थहओ संतो दाहजरघोरवेयणाभिहओ । मरिउं होही पुणरवि नेरइओ सत्तममहीए ॥ ३ ॥

तत्तो मच्छो छट्ठीए नारगो इत्थिया य नेरइओ । छट्ठीए पुढवीए इत्थी नेरइओ पंचमीए ॥ ४ ॥

उरगो नेरइओ पंचमीए उरगो पुणो चउत्थीए । नेरइओ सीहो तह चउत्थपुढवीए नेरइओ ॥ ५ ॥

सीहो तच्चाए नारगो य पक्खी य तइय नेरइओ । विइज्जा पुढवीए नारगो भुयपरिस्सप्पो ॥ ६ ॥

बीयाए नेरइओ भुयपरिस्सप्पो य पढमपुढवीए । सण्णी तओ असण्णी नेरइओ पढमनरगंमि ॥ ७ ॥

तेण सुणिमारणजियपावेणं नरयवज्जठाणेसु । सत्थहओ दाहज्जरविहुरो होही य मरिही य ॥ ८ ॥

तत्तो पक्खिसिरीसिवउरपरिस्सप्पेसु णेगभेएसु । जलयरजोणिसु तहा उववज्जिय भूरिवाराओ ॥ ९ ॥

चउरिंदिएसु तेइंदिएसु बेइंदिएसु य भवित्ता । सवत्थ सत्थनिहओ विवज्झिही णेगवाराओ ॥ १० ॥

गोशाल-  
कस्य भा-  
विभवाः०

॥ २८५ ॥

वणसइपवणानलसलिलपुढविजाईसु विविहभेयासु । कालमसंखं वसिउं अकालमरणेण सो मरिही ॥ ११ ॥

इय उब्भडनियदुचरियजलणजालाकलावसंततो । तं किंपि नत्थि दुक्खं जं पाविस्सइ न स वरागो ॥ १२ ॥

एवं च अणेगभवुम्मज्जणनिमज्जणाईं काऊण कहकहवि समासाइयथेवकम्मविवरो सो गोसालगजीवो रायगिहे नयरे चाहिं वेसित्थित्ताए उववज्जिही, तत्थवि चिरभवसाहुवहसमुत्थनिकाइयकम्माणुवत्तणवसेण रयणीए पसुत्ता चेव एगेण विडपुरिसेण आभरणलिच्छुणा निसियखग्गधेणुनिद्वयनिदारियउदरा मरिऊण पुणोऽवि रायगिहस्संतो वेसित्थियत्ताए उववज्जिऊण विवज्जिही । तओ जंबुदीवे दीवे भारहे वासे विंझगिरिपायमूले विभेलए सन्निवेसे माहणकुले दारियत्ताए पच्चायाही, तं च कालक्कमेण उम्मुक्कवालभावं अम्मापियरो समुचियस्स एगस्स माहणपुत्तस्स य भारियत्ताए पणामइस्संति, अन्नया य सा गुविणी ससुरकुलाओ पियहरं निजमाणी अंतरा समुच्छलियपवलदावानलजालाकलावकवलिया कालं काऊण अग्गिकुमारेसु देवेसु देवत्ताए उववज्जिही, तत्तो य चविऊण माणुसत्तणेण समुप्पन्नो समाणो तहाविहसुगुरुदंसणसमुवलद्धसव्वन्नुधम्मवोहो भववेरग्गमुच्चहंतो पव्वज्जं पडिवज्जिही, कहिवि पमायवसेण विराहियसामण्णो य असुरकुमारेसु देवेसु उववज्जिही, एवं कइवयभवगहणाईं पुणो पुणो विराहियसामन्नो असइं भवणवासिदेवेसु जोइसिएसु य सुरसंपयं समणुभविऊण पुणो समुवलद्धमाणुसत्तो अइयारकलंकपरिहीणं पव्वज्जं समायरिऊण सोहम्मे देवलोए देवो होही, एवं सत्त भवे जाव निकलंकं सामण्णमणुपालिऊण

श्रीगुणचंद  
महावीरच०  
८ प्रस्तावः

॥ २८६ ॥

महाविदेहे वासे दढपइण्णाभिहाणो ईसरसुओ होऊण जायभववेरगो परिचत्तधणसयणो थेराण अंतिए सबविरइं  
गहाय छट्ठमाइतवोकम्मविसेसेहिं पुवभवपरंपरासमज्जियाइं पावकम्माइं खविऊण केवलनाणमुप्पाडेही, तओ सो  
दढपइण्णकेवली मुणियगुरुजणावमाणसमुत्थमहापाववियंभियभवाडवीनिवडणकडुविवागो नियसमणसंघं सदाविऊण  
एवं भणिही—

हंहो देवाणुपिया ! जंबुद्दीवंमि भारहे वासे । मंखलिपुत्तो गोसालनामओऽहं पुरा आसि ॥ १ ॥  
वहुकूडकवडनिरओ विवरीयपरूवगो समणघाई । धम्मगुरुपच्चणीओ समत्थदोसाण कुलभवणं ॥ २ ॥  
नियतेएणं चिय दज्झमाणदेहो दढं वहुदुहत्तो । कलुणं विलवंतोऽहं पंचत्तं पाविओ तइया ॥ ३ ॥  
तम्मूलं चउगइभुयगभीसणे दीहरे भवारण्णे । भमिओ सुचिरं कालं विसहंतो दारुणदुहाइं ॥ ४ ॥  
ता भो देवाणुपिया ! इय सोच्चा मा कयावि सुगुरूणं । संघस्स पवयणस्स य पडिणीयत्तं करेज्जाह ॥ ५ ॥  
वहुओऽवि पावनिवहो वच्चइ नासं मुहुत्तमेत्तेण । गुरुसाहुसंघसिद्धंतधम्मवच्छलभावेण ॥ ६ ॥  
एवमणुसासिऊणं नियसमणे सो तथा महासत्तो । पडिवोहिऊण भवे पाविस्सइ सासयं ठाणं ॥ ७ ॥  
इय तइलोयदिवायरसिरिवीरजिणेसरेण परिकहियं । गोसालयचरियमिमं गोयमसामिस्स नीसेसं ॥ ८ ॥  
एयं च तचरियं महादुहविवागमूलं निसामिऊण बहवे समणा य समणीओ य सावयाओ य सावियाओ य गुरु-

भाविभवाः  
गोसालक-  
कृतः श्रम-  
णोपदेशः॥

॥ २८६ ॥

प्पमुहाणं सविसेसं आसायणापरिहारपरायणा जायत्ति । अहं भयवं महावीरो मिंढियग्गामनयराओ निक्खमित्ता  
 समणसंघपरिबुडो गामाणुगामेण विहरमाणो संपत्तो रायगिहं नयरं, तस्स य अदूरविभागवत्तिमि गुणसिलयाभिहा-  
 णचेइए विरइयं देवेहिं समोसरणं, पुव्वकमेण निसन्नो सिंघासणे जयगुरु साहिउं पवत्तो दयामूलं खमामहाखंधं  
 मूलगुणसाहासमाउलं उत्तरगुणपत्तनिगरसंचन्नं अइसयकुसुमविराइयं जससोरभभरियभुवणंतरं विसमसरतरणिताव-  
 पणासगं सग्गापवग्गमुहफलदाणदुल्ललियं पवरजणसउणणिसेवणिज्जं धम्ममहाकप्पतरुवरं । एत्थावसरंमि सेणियनरा-  
 हियो भययंतं समवसरणट्ठियं सोऊण पट्ठिओ अभयकुमारमेहकुमारनंदिसेणपुत्तपरियरिओ वंदणवडियाए जयगुरुणो ।  
 कहं चिय ?—

डिंडीरपिंडपुंडरियहरियखरकिरणविंवकरपसरो । सहरिसहरिणच्छिकरयलुल्लसियचामरुग्घाओ ॥ १ ॥  
 गजंतगत्तकुंजरमयजलपडिहणियरेणुपब्भारो । तरलतरतुरयपहकरसंखोहियमहियलाभोगो ॥ २ ॥  
 रणज्झणिरकणयकिंकिणिमालाउलरहसमूहपरियरिओ । दप्पुब्भडमुहडसहस्सरुद्धनीसेसदिसिनिवहो ॥ ३ ॥  
 इय सेणिओ नरिंदो हरिसुक्करिसं परं पवहमाणो । करिणीखंधारूढो नीहरिओ नियपुराहितो ॥ ४ ॥  
 तयणंतरं च पत्तो समोसरणं । जहाविहिणा य पविट्ठो तयब्भंतरे, तिपयाहिणीकाऊण वंदिउं जयगुरु निविट्ठो  
 समुचिए भूमिभागे, भगवयाऽवि पारद्धा तदुचिया धम्मकहा । कहं ?—

श्रीगुणचंद  
महावीरच०  
८ प्रस्तावः

॥ २८७ ॥

भो भो महाणुभावा निम्मलबुद्धीए चिंतह सयणहा । संसारं घोरमिमं महामसाणस्स सारिच्छं ॥ १ ॥  
तथाहि—उब्भडवियंभियमुही विसयपिवासा महासिवा एत्थ । दढमणिवारियपसरा सवत्तो चिय परिब्भमइ ॥ २ ॥  
ओहामियसुरनरखयरविक्रमा तंतमंतदुग्गेज्झा । अनिवारियं पयट्टइ भीमा जरडाइणी निच्चं ॥ ३ ॥  
पयडियपयंडपक्खा निरवेक्खकंतजीयमाहप्पा । सवत्तो पासठिया कसायगिद्धा विसप्पंति ॥ ४ ॥  
दावियविविहवियारा जीवियहरणेऽवि पत्तसामत्था । दढममुणियप्पयारा रोगभुयंगा वियंभंति ॥ ५ ॥  
लद्धुं छिहं थेवंपि तक्खणुप्पन्नहरिसपब्भारो । भुवणत्तयसंचरणो मरणपिसाओ समुत्थरइ ॥ ६ ॥  
इट्ठविओगाणिट्ठप्पओगपामोक्खदुक्खतरुनिवहो । सवत्तो विणिवारइ विवेयदिणनाहकरपसरं ॥ ७ ॥  
इय भो देवाणुपिया ! मसाणतुल्ले भवंमि भीमंमि । खणमवि न खमं वसिउं तुम्हाणं सोक्खकंखीणं ॥ ८ ॥  
एवं भगवया वागरिए संसारसरूवे पडिबुद्धा बहवे पाणिणो, भावसारं च अणेगेहिं अंगीकया देसविरइसववि-  
रइपडिवत्ती, हरिसूसियसरीरो य सपरियणो राया गओ जहागयं, नवरं मेहकुमाररायपुत्तो अंतो वियंभंतहरिसपसरो  
संसारविरागं परममुव्वहंतो सेणियनराहिवं जणणिं च पणमिऊण भणिउं पवत्तो—अंवताय ! अहमेत्तो वंछामि  
तुब्भेहिं अणुण्णाओ भगवओ समीवे पवज्जं पवज्जिउं, तेहिं भणियं—पुत्त ! विसमो जोवणारंभो दुरक्खणिज्जो मयर-  
द्वयसरपहारो दुद्धरा विसयाभिसुहीभवन्ता इंदियतुरंगमा सम्मोहदायगा लडहमहिलाजणविसाला वाढं दुरज्झवसा

राजगृहे  
श्रेणिका-  
देर्धर्मोप-  
देशः

॥ २८७ ॥

पद्मजा, अशंतं दुरहियासा परीसहा, ता पुत्त ! पडिवालेहि कइयवि वासराइं, मेहकुमारेण भणियं—अम्मताय ! तडि-  
तरलमाऊअविलसियं सरयगिरिसरियावारिवेगचडुलं जोघणं मत्तकामिणीकडक्खभंगुरा रायलच्छी, जत्रारंभा इव  
दीसंतवहुविप्पओगा इट्ठजणसंजोगा, ता पज्जत्तमेत्तो गेहनिवासेण, सब्बहा मा कुणह धम्मविग्घंति भणिए अणु-  
ण्णाओ कहकहवि जणणिजणगेहिं, तओ महाविभूइसमुदएणं गहिया अणेण भगवओ समीवे पद्मजा, अत्तेऽवि तं  
पद्मजं अणुगिण्हंतं पासिऊण बहवे नरिंदसेट्ठिसेणावइसुया जायभवविरागा पद्मइया ।

अह दुस्सहत्ताए परीसहाणं चलत्तणओ चित्तवित्तीए तस्स मेहकुमारसाहुस्स अणुक्कमेण पढमरयणीए चेव  
पसुत्तस्स पविसंतनीहरंतमुणिचरणघट्टणुप्पन्ननिहाविगमस्स पद्मजापरिचायाभिमुहमाणसस्स कहकहवि अट्ठदुह-  
ट्ठियस्स दुक्खेण बोलीणा रयणी, समुग्गयंमि रविमंडले पमिलाणवयणकमलो समुट्ठिऊण तओ ठाणाओ पद्मजं  
परिमोत्तुकामो गओ भगवओ समीवे ॥

अह केवलावलोएण जिणवरो जाणिऊण भग्गमणं । मेहकुमारं साहुं मधुरगिराए इमं भणइ ॥ १ ॥

किं भो देवाणुपिया ! संजमजोगंमि भंगमुबहसि । पुवभववइयरं नेव सरसि सयमवि समणुभवियं ॥ २ ॥

एत्तो तइयभवंमि रण्णे किर वारणो तुहं हुंतो । तत्थ य वणग्गिणा पसरिएण संतत्तसवंगो ॥ ३ ॥

वाढं पिवासिओ सरवरंमि पाउं जलं समोगाढो । तडपंकंमि य खुत्तो तत्तो नीहरिउमचयंतो ॥ ४ ॥

श्रीगुणचंद  
महावीरच०  
८ प्रस्तावः  
॥ २८८ ॥

पडिकरिणो दढदसणग्गताडणुण्णत्तिव्वेयणओ । मरिउं विंझंमि तुमं पुणरवि जाओ गयाहिवई ॥ ५ ॥  
वणदवपलोयणेण य जाइं सरिऊण भयवसट्टेण । रुक्खे उक्खणिऊणं अवणित्ता तणपलालाइं ॥ ६ ॥  
करयलसमाइं तिन्नि उ महापमाणाइं थंडिलाइं तए । सरियातीरे पकयाइं निययगयजूहरक्खट्ठा ॥ ७ ॥ जुम्मं ।  
अह अन्नया कयाई तरुवरसंघरिससंभवो जलणो । दहिउं वणं पयट्ठो पलयानलविब्भमो भीमो ॥ ८ ॥  
तं पेच्छिऊण भीओ तुमं पलाणो सथंडिलाभिमुहं । हरिहरिणससगसूयरपडिहत्थे थंडिले दुन्नि ॥ ९ ॥  
लंघित्ता तइयंमि संपत्तो अच्छिउं समाढत्तो । चरणो य समुक्खित्तो कंडुयणकए तए तणुणो ॥ १० ॥  
एत्थंतरंमि अन्नन्नसत्तसंपेल्लिओ ससो एगो । उक्खित्तचरणहेट्ठा ठिओ सजीयस्स रक्खट्ठा ॥ ११ ॥  
तं दट्ठूणं तुमए पयहेट्ठुठियं पराए करुणाए । आकुंचिऊण धरिओ नियचलणो गयणदेसंमि ॥ १२ ॥  
अह वणदवोऽवि दहिउं सयलं अडविं महाविडविपुन्नं । उवसंतो ते य गया जहागयं ससगपमुहजिया ॥ १३ ॥  
ताहे छुहापिवासासंतत्तो तंपि सिग्घवेगेण । अमुणियकुटियसचलणो पधाविओ पाणियाभिमुहं ॥ १४ ॥  
अह एगचलणवियलत्तणेण पडिओ तुमं गिरिवरोव्व । तण्हाल्लुहाकिलंतो कालगओ बहुकिलेसेण ॥ १५ ॥  
तेण य ससगणुकंपणसमुवज्जियपुन्नपगरिसवसेण । लहुईकयसंसारो संपइ जाओसि रायसुओ ॥ १६ ॥  
इय भो देवाणुप्पिय ! तइया पसुणावि जइ तहा तुमए । ससगजियरक्खणेणं वाढं दुक्खाइं सहियाइं ॥ १७ ॥

मेवस्थ  
दीक्षा पूर्व-  
भवश्रा-  
वणं च.

॥ २८८ ॥

तां कीस वंभयारीण धम्मनिरयाण पवरसाहूणं । चळणाइघट्टणेणवि संपइ संतावमुवंहंसि ॥ १८ ॥  
 सरयनिसायरधवले कुलंमि पडिवन्नमुज्झमाणस्स । किं सुंदर ! न कलंको होही आचंदकालंमि ॥ १९ ॥  
 कइवयदिणसुहकज्जेण अज्जिऊणं पयंडपावमरं । किं कोइ भण सयन्नो अप्पाणं पाडइ भवोहे ॥ २० ॥  
 इय एवंविहवयणेहिं भुवणदीवेण वीरनाहेण । पडिवोहिओ महप्पा मेहकुमारो मुणिवरिट्ठो ॥ २१ ॥  
 जाओ सुनिचलमणो तहकहवि जिणिंदभणियमग्गंमि । जह दुकरतवनिरयाण साहूण णिदंसणं पत्तो ॥ २२ ॥  
 तस्सणुसट्ठिं सोचा संवेगकरिं परेऽवि मुणिवसहा । सविसेसमप्पमत्ता पडिवन्ना संजमुज्जोगं ॥ २३ ॥  
 अह अण्णंमि दिणंमी सोचा धम्मं जिणिंदमूलंमि । भववेरग्गमुवगओ रायसुओ नंदिसेणोऽवि ॥ २४ ॥  
 पवज्जापडिवत्तिं काउमणो सो य सेणियनरिंदं । जणणिं च बहुविहेहिं वयणेहिं पन्नवेऊण ॥ २५ ॥  
 जाव भुवणेक्कंपडुणो पासे चलिओ पवज्जिउं दिक्खं । ताव य सो भणिओ देवयाए गयणट्ठियाए इमं ॥ २६ ॥  
 भो भो कुमार ! विरमसु पवज्जागहणओ जओ अत्थि । अज्जवि तुहं भोगफलं चारित्तावारगं कम्मं ॥ २७ ॥  
 येवं कालं निवससु सगिहे ता कीस ऊसुगो होसि ? । सलहिज्जंति न कज्जाइं पुत्त ! अइरहसविहियाइं ॥ २८ ॥  
 काले चिय कीरंतो ववसाओ कज्जसाहगो होइ । समयाभावे संस्सं न फलइ अचंतसित्तंमि ॥ २९ ॥  
 तत्तो कुमरेण भणियं देवि ! कीस तुमभियं पयंपेसि ? । सयमेवप्पडिवन्नं कहमिव उज्झामि विरइमइं ॥ ३० ॥



श्रीगुणचंद  
महावीरच०  
८ प्रस्तावः

॥ २८९ ॥

किं वा काही तंपिवि चारित्तावारणं ममं कम्मं । कु(दु)स्सीलसंगरहियस्स गाढतवसोसियंगस्स ॥ ३१ ॥  
इय तवयणं अवमणिऊण सिग्घं गओ समोसरणं । नवरं जयगुरुणाविहु पडिसिद्धो सो तहचेव ॥ ३२ ॥  
तहविहु अइरभसवसा अभाविउं भाविरं विरइभंगं । भुवणगुरुणो समीवे निरवज्जं लेइ पवज्जं ॥ ३३ ॥  
तो छट्ठमपमुहं कुणमाणो दुकरं तवचरणं । जयगुरुणा सह विहरइ वहिया गामागराईसु ॥ ३४ ॥  
पढइ विचि(वि)त्तं सुत्तं परिभावइ निच्चमेव य तदत्थं । गुरुणो मूले निवसइ परीसहे सहइ थिरचित्तो ॥ ३५ ॥  
संजमनिसेवणपरो विसयविरागं परं परिवहंतो । आयावइ अणवरयं सुसाणसुन्नासमाईसु ॥ ३६ ॥  
अह अन्नया कयाई एगल्लविहारपडिमपरिकम्मं । काउमणो स महप्पा जाए छट्ठस्स पारणगे ॥ ३७ ॥  
भिक्षवट्ठाए पविट्ठो एगोऽणाभोगदोसओ सहसा । वेसाए मंदिरंमी पयंपए धम्मलाभोत्ति ॥ ३८ ॥  
तो वेसाए सहासं सवियारं जंपियं अहो समण ! । मोत्तूण दम्मलाभं न धम्मलाभेण मे कज्जं ॥ ३९ ॥  
अहह कहं हसइ ममंपि वालिसा संपयंपि(ति) चिंतित्ता । तेण तवलद्धिणा नेवतणयमायहिऊण लहुं ॥ ४० ॥  
अइपवररयणरासी निवाडिया एस दम्मलाभोत्ति । भणिऊण य नीहरिओ तीए भणिओ य साणंदं ॥ ४१ ॥  
भयवं ! उज्झसु दुकरतवचरणं कुणसु मज्झ सामित्तं । इहरा चएमि जीयं पुणरुत्तं तीए इय वुत्तं ॥ ४२ ॥  
भावियमईवि तवसोसिओऽवि विन्नायविसयदोसोऽवि । कम्मवसा भग्गमणो पडिवज्जइ तीए सो वयणं ॥ ४३ ॥

मैवस्य  
वैराग्यं  
नंदिषेण-  
दीक्षा.

॥ २८९ ॥

नवरं दस अहिंणे वा जइ नो बोहेमि अणुदिणं भवे । तो परिचएमि विसए विसंब इइ गिण्हइ पइअं ॥ ४४ ॥  
अह उज्झियमुणिवेसो चिंतिंतो देवयाए तं वयणं । जयगुरुणोऽवि निवसइ वेसाए गिहंमि स महप्पां ॥ ४५ ॥

भुंजेइ विसयसोक्खं धम्मकहाए य बोहिउं भवे । पवज्जागहणत्थं पेसइ पासे जिणिंदस्स ॥ ४६ ॥  
अह अन्नया कयाई खीणे भोगप्फलंमि कम्मम्मि । वेरग्गावडियमई चित्तेउम्मिमं समाढत्तो ॥ ४७ ॥

तुच्छं सोक्खं तडितरलमाउयं भंगुरं च तारुत्तं । रोगविहुरं सरीरं दुलंभा धम्मसामग्गी ॥ ४८ ॥  
खंडियसीलाण निरंतरं च निवडंति दुस्सहदुहाइं । एवं ठिए न जुज्जइ संपइ मह निवसिउं एत्थ ॥ ४९ ॥

तो गंतुं जयगुरुणो पुणो समीवम्मि लेइ पवज्जं । आलोइयदुचरिओ विहरइ य समं जिणिंदेण ॥ ५० ॥  
चिरपवज्जापज्जायपालणं भावसारमह काउं । सो नंदिसेणसाह गरिउं देवत्तणं पत्तो ॥ ५१ ॥

इओ य सो सुदाढनागकुमारदेवो नावारूढस्स भगवओ पुवं उवसग्गं काऊण आउयखयंचुओ समानो समु-  
प्पन्नो एगंमि रोरकुले पुत्तत्तणेण, बुद्धिं गओ य संतो करिसगवित्तीए जीवइ, तंमि य पत्थावे सो जाव नियच्छेत्तं  
लंगलेण करिसिउमारद्धो ताव पत्तो तं गामं भुवणेक्कवंधवो जिणो, तओ भगवया तस्स अणुकंपाए पडिवोहणत्थं  
पेसिओ गोयमसामी, गंओ य तदंतियं, भणिओ य गोयमेण एसो—भइ! किमेयं कीरइ?, करिसगेण भणियं—जं  
कारवेइ एस हयविही, को वा अन्नो अम्हारिसाण कलाकोसल्लवज्जियाण जीवणोवाओ?, गोयमसामिणा जंपियं—

श्रीगुणचंद  
महावीरच०  
८ प्रस्तावः

॥ २९० ॥

एवंविहगाढकिलेससंविठत्ताए भोयणविहीए । दिणगमणियं कुणंतस्स मुद्ध ! का चंगिमा तुज्झ ? ॥ १ ॥  
किं वा सरीरसोक्खं संपज्जइ को य विसयवामोहो । किं वा सुचरियनिष्कायणं च संभवइ एवं च ? ॥ २ ॥  
नो एयपरिचागो सुदुक्करो दिवसोक्खकंखीणं । तुम्हारिसाण जायइ जेणऽज्जवि किर महासत्ता ॥ ३ ॥  
पउरमणिकणगरयणुक्कराई तरुणीओ सुंदरे गेहे । मोत्तूण पन्नगंपिव धन्ना लग्गंति धम्मंमि ॥ ४ ॥  
अन्ने पुण आकालियदुरंतदारिद्विहुयावि दढं । पावारंभपयट्ठा जम्मं सयलंपि वोलंति ॥ ५ ॥  
ते अण्णत्थवि जम्मे तहेव पुणरुत्तदुक्खसंतत्ता । तल्लोविल्लिं पकुणंति थोवसलिलंमि मच्छोव ॥ ६ ॥  
जइ पुण ते घरवावारलक्खभागे व धम्मकज्जंमि । अब्भुज्जमंति रुंधंति नित्तुलं ता दुहदुवारं ॥ ७ ॥  
किंच—एगत्तो संपज्जइ जहिच्छभोगोवभोगदुल्ललियं । धणमन्नत्तो सज्जणपसंसणिज्जा हि पवज्जा ॥ ८ ॥  
एगत्तो छक्खंडाहिवस्स सेवा महानरिंदस्स । कीरइ अन्नत्तो पुण सुणिणो सद्धम्मनिरयस्स ॥ ९ ॥  
सुंदर ! इमाओ दोन्नि उ गईउ लोयंमि सुप्पसिद्धाओ । एयाणं अन्नयरिं जे कुसला ते पवज्जंति ॥ १० ॥  
ता वज्जसु कम्ममिमं धम्मं चिय सरसु तं महासत्त ! । दीणाण दुत्थियाण य एसो एको परं सरणं ॥ ११ ॥  
इय गोयमेण भणिए सबइल्लं लंगलं च मोत्तूण । नमिउं चलणे सो भत्तिनिब्भरो भणिउमाढत्तो ॥ १२ ॥  
भयवं ! विन्नाणविवज्जियस्स जइ जोग्गयत्थि मे काऽवि । ता देहि निययदिक्खं भववासाओ विरत्तस्स ॥ १३ ॥

कर्पक-  
दीक्षा.

॥ २९० ॥

इय वुत्ते से परियट्टिणोवि सिरिगोयमेण पवज्जा । तक्खणमेव विदिन्ना वोहिन्वीयंतिकाऊण ॥ १४ ॥

एवं तेण गहियदिकखेण समं पयट्ठो गोयमसामी भगवओ अभिमुहं, अह जयगुरुणो चक्खुगोयरमुवांगयस्स तस्स करिसगस्स तेण सीहभवावज्जियगाढेवरवेसण पम्हुट्ठा पवज्जापडिवत्ती जायपयंडकोवो य भणिउं पवत्तो-भयवं ! को एसो?, गोयमेण भणियं-अह धम्मगुरु, तेण भणियं-जइ तुह एस धम्मगुरु ता मम तुमएवि न कज्जं, अलं पवज्जाएत्ति भणिऊण परिचत्तरयहरणो धाविऊण गओ खेत्तंमि, गहिया वलीवद्दा, उब्भीकयं लंगलं, पलग्गो पुवपवाहेण खेडेउंति । गोयमसामीवि विस्सियमणो भयवंतं पणमिऊण भणिउं पवत्तो—

भुवणब्भुयभूयमहप्पभावपडिहणियपाणिगणपीड ! । जयनाह ! मए असरिसमिममज्ज पलोइयं चोज्जं ॥ १ ॥

जं सोक्खकरेवि हु तुज्झ दंसणे दूरओऽवि सो हलिओ । सूरस्स कोसिओ इव सोढुं तेयं अचाइंतो ॥ २ ॥

सयमेव य पडिवन्नं पवज्जं उज्झिऊण संभंतो । अइसिग्घमवकंतो सखेत्तहुत्तं परोट्टमणो ॥ ३ ॥

किर तुम्ह संकहावि हु जणइ अपुवं जणाण परितोसं । किं पुण चीतरुपमुहट्ठपाडिहेरुभवं रूवं ? ॥ ४ ॥

अह जयगुरुणा भणियं गोयम ! सो एस केसरिस्स जिओ । जो किर तिविट्ठुकाले मए दुहा फालिओ होंतो ॥ ५ ॥

तुमए मह सारहिणा निज्जविओ कोवफुरुफुरंततणू । सीहे सीहेण हए इचाईमदुरवयणेण ॥ ६ ॥

तप्पचइएणं मइ दोसेणज्जवि स वेरमुवहइ । तेणं चिय तप्पडिवोहणट्ठया पेसिओ तंसि ॥ ७ ॥

श्रीगुणचंद  
महावीरच०  
८ प्रस्तावः

॥ २९० ॥

एवंविहगाढकिलेससंविठत्ताए भोयणविहीए । दिणगमणियं कुणंतस्स मुद्ध ! का चंगिमा तुज्झ ? ॥ १ ॥  
किं वा सरीरसोक्खं संपज्झइ को य विसयवामोहो । किं वा सुचरियनिष्फायणं च संभवइ एवं च ? ॥ २ ॥  
नो एयपरिचागो सुदुक्करो दिवसोक्खकंखीणं । तुम्हारिसाण जायइ जेणऽज्जवि किर महासत्ता ॥ ३ ॥  
पउरमणिकणगरयणुकराइं तरुणीओ सुंदरे गेहे । मोत्तूण पन्नगंपिव धन्ना लग्गंति धम्ममंमि ॥ ४ ॥  
अन्ने पुण आकालियदुरंतदारिद्रविहुयावि दढं । पावारंभपयट्ठा जम्मं सयलंपि वोळिंति ॥ ५ ॥  
ते अण्णत्थवि जम्मे तहेव पुणरुत्तदुक्खसंतत्ता । तल्लोविल्लिं पकुणंति थोवसलिलंमि मच्छोव ॥ ६ ॥  
जइ पुण ते घरवावारलक्खभागे व धम्मकज्जंमि । अब्भुज्जमंति रुंधंति नित्तुलं ता दुहदुवारं ॥ ७ ॥  
किंच—एगत्तो संपज्झइ जहिच्छभोगोवभोगदुल्ललियं । धणमन्नत्तो सज्जणपसंसणिज्जा हि पवज्जा ॥ ८ ॥  
एगत्तो छक्खंडाहिवस्स सेवा महानरिंदस्स । कीरइ अन्नत्तो पुण सुणिणो सद्धम्मनिरयस्स ॥ ९ ॥  
सुंदर ! इमाओ दोन्नि उ गईउ लोयंमि सुप्पसिद्धाओ । एयाणं अन्नयरिं जे कुसला ते पवज्जंति ॥ १० ॥  
ता वज्जसु कम्ममिमं धम्मं चिय सरसु तं महासत्त ! । दीणाण दुत्थियाण य एसो एक्को परं सरणं ॥ ११ ॥  
इय गोयमेण भणिए सवइल्लं लंगलं च मोत्तूण । नमिउं चलणे सो भत्तिनिम्भरो भणिउमाढत्तो ॥ १२ ॥  
अण्णत्तं ! तिन्यामनिज्जिराएण जइ जोग्गयत्थि मे काऽवि । ता देहि निययदिक्खं भववासाओ विरत्तस्स ॥ १३ ॥

कर्पक-  
दीक्षा.

॥ २९० ॥

तिपदादिगिऊण परेण भत्तिभारेण वंदिउं नाहं । सद्वाणेसु निसीयंति ते य सद्धम्मसवणत्थं ॥ १० ॥  
 उप्पायपठगसत्तासमलंकियसयलवत्थुपरमत्थं । भवाणं भवभयहरं तत्तो वागरइ भुवणगुरु ॥ ११ ॥  
 वागरनाणस्त य भुवणवंधुणो मुणियसयलभावोऽवि । भवजणवोहणत्थं गोयमसामी इमं भणइ ॥ १२ ॥  
 भयं । भयस्स पुणरुत्तजम्मजरामरणसोगपउरस्स । किं मूलकारणं जमिह नेव जीवा विरजंति ? ॥ १३ ॥  
 न य उज्जमंति तुह पायपउमपूयणपमोक्खवावारे । नो देससव्वविरइओ भावसारं च गिण्हंति ॥ १४ ॥  
 मणियं जिणेण गोयम । मिच्छत्तं अविरइ य मूलमिह । तदणुगया नो जीवा भवभमणाओ विरजंति ॥ १५ ॥  
 नो षडु मत्तंति जिणाहिवं पि गिण्हंति नेव विरइं पि । मिच्छत्तमज्जमत्ता किं वा कुवंति नोऽकजं ? ॥ १६ ॥  
 अइ तेपि कम्मगंठिं सुनिद्धरं भिंदिऊण सम्मत्तं । पावंति कहवि ता भवसंवासाओ विरजंति ॥ १७ ॥  
 जन्मुत्तमंति जिणसादुपूयणाइस्मि धम्मकज्जंमि । नवरं तेऽवि न विरइं घेत्तुं पारंति कम्मवसा ॥ १८ ॥  
 जं देसओयि सविसेसकम्मक्खयउवसमेण सा होइ । किं पुण पहाणमुणिजणकरणुचिया सव्वओ चेव ॥ १९ ॥  
 ता गोयमेण भणियं भयवं । सम्मत्तरयणलाभाओ । अब्भहियं गुणठाणं एवं सइ विरइभावोऽयं ॥ २० ॥  
 ता साहेसु जयगुरु ! पउरगेहवावारवावडमणाणं । संभवइ देसओविडु विरइं कहमिव गिहत्थाण ? ॥ २१ ॥  
 तो जयगुरुणा कहियं पंचण्हं तिण्ह वा चउण्हं वा । गहणे वयाण एगस्स वावि सा होइ निदोसा ॥ २२ ॥

श्रीगुणचंद  
महावीरच०  
८ प्रस्तावः  
॥ २९२ ॥

गोयमसुणिणा भणियं जइ एवं ता जिणिंद ! सवाइं । सोदाहरणाइं कहेह ताइं भेएहिं जुत्ताइं ॥ २३ ॥  
न तुमाहिंतो अन्नो भयवं एयं निदंसिउं सको । जं सवं सूरुओचिय पयासिउं पभवए गयणं ॥ २४ ॥  
इय वुत्ते सिरिवीरेण धम्मपासायमूलखंभेण । भणियं गोयम ! निसुणसु सवमिमं परिकहिज्जंतं ॥ २५ ॥  
पंच उ अणुवयाइं गुणवयाइं च होंति तिन्नेव । सिक्खावयाइं चउरो विरईए गिहत्थलोयस्स ॥ २६ ॥  
तत्थ य अणुवयाइं पढमं पाणाइवायवेरमणं । वयमवरवयणहाणं पाणाइवाओ य सो दुविहो ॥ २७ ॥  
विन्नेओ बुद्धिमया सुहुमो थूलो य तत्थ पुण सुहुमो । एगिंदियजियविसओ थूलो वेइंदियाइगओ ॥ २८ ॥  
संकप्पारंभेहिं दुविहो थूलो य तत्थ संकप्पो । होइ हु उवेचकरणं आरंभो पयणकिसिपमुहे ॥ २९ ॥  
संकप्पोऽवि य दुविहो अवराहकरंमि निरवराहे य । जो हरइ देव(ह)दवं स सावराहोऽन्नहा इयरो ॥ ३० ॥  
एवं नाऊण इमं थूले अवराहविरहिए जीवे । संकप्पओ न घाएज्ज दुविहतिविहाइभेएण ॥ ३१ ॥  
इय गहियजीववहविरइसुंदरो सावगोऽणुकंपपरो । अचंतं कोवेऽवि हु गोमणुयाईण न करेज्जा ॥ ३२ ॥  
बंधवहं छविछेयं अइभारं भत्तपाणवोच्छेयं । एए पंचऽइयारा जम्हा दूसंति वहविरइं ॥ ३३ ॥  
एयाए दूसियाए विहलो सबोऽवि धम्मवावारो । कट्ठाणुट्ठाणंपिवि निरत्थयं रत्तरुत्तं ॥ ३४ ॥  
जं पाणिवहासत्तो सत्तो तं किंपि पावमायरइ । जेण निमेसंपि सुहं न लहइ नरयाइसु गइसु ॥ ३५ ॥

अणुव्रत-  
स्वरूपं,

॥ २९२ ॥

सद्यत्थयि सोयकममइल्लुयं आउयं समज्जिणइ । पियपुत्तविओगं वा पावइ हरिवम्मराउव ॥ ३६ ॥  
 गोयमसामिणा भणियं-भयवं । को एस हरिवम्मरायाहिवो ? भगवया जंपियं-गोयम ! निसामेसु, अत्थि इहेव  
 भारहे वासे कुरुजणवए गयउरं नाम नयरं, तत्थ असंखदविणसंगओ दत्तो नाम माहणो परिवसइ, खंजोवणा-  
 इगुणसंगया य सिरी नाम भारिया, सद्यकज्जेसु पुच्छणिज्जो पाणाइरगेवल्लहो सद्यपसमसुंस्सीलयाइगुणसंगओ नंदो  
 नाम से वालमित्तो, सो य अचंतं कलयंठकोगलकंठो तहाविहवावारपरिसमत्तीए निग्गच्छिऊण निविजणंमि पएसे  
 ठाऊण गंधघविणोयमायरइ, एवं च वचंति वासरा । अन्नया य दत्तस्स दियवरस्स वाढं पाउब्भूया सिरोवेयणा,  
 तघसेण य पणट्ठा रई वियंभिओ परितावो जायाणि नीसहाणि अंगाणि खलमहिलव चक्खुगोयरमइकंता निहा  
 निच्छिण्णा भोयणवंछा तुट्ठा जीवियासा, एवंविहं च विसमदसावडणं पेच्छिऊण तेणाहूओ नंदो, भणिओ य-  
 अहो मित्त ! कुणसु किंपि उवायं, सद्यहा वलवंई सिरोवेयणा खुडइव लोयणजुयलं, मणागंपि न पारेमि सुहसेज्जाग-  
 ओयि चिट्ठिउं, जइ पुण कहवि मम निहामेत्तंपि होज्जा तो पच्चुज्जीवियं व अप्पाणं मन्नेज्जा, इय दीणं से वयणं  
 निसामिऊण नंदेण भणियं-पियमित्त ! धीरो भव, परिचय कायरत्तणं, तहा करेमि जहा अकालक्खेवेण पगुणसरीरो  
 भवसित्ति संठविऊण रयणिसमयंमि समारद्धं कागलीगेयं, जओ—

जह जह गेयनिनाओ पविसइ दत्तस्स सवणविवरंमि । तह तह निहावि विलज्जियव आगच्छए सणियं ॥ १ ॥



श्रीगुणचंद  
महावीरच०  
८ प्रस्तावः

॥ २९३ ॥

एवं च आगयाए निहाए पसुत्तो सो निब्भरं, सा चेव भज्जा नंदस्स तेण सुइसुहकारिणा गेयरवेण अवहरि-  
यहियया तम्मणा जायत्ति, दत्तस्सवि परिगलंतीए रयणीए पणट्ठा सिरोवेयणा, संपत्ता सरीरनिबुई, अन्नया रहंमि  
सिरीए सपणयं भणिओ नंदो—

सुहय ! जहा नियमित्तस्स देहपीडा तए समवहरिया । मज्झंमि तहा संपइ अवहरसु सरीरसंतावं ॥ १ ॥  
उज्जुयभावत्तणओ अवियाणिय से मणोगयं भावं । नंदेण जंपियमिमं—कत्तो ते सुयणु ! संतावो ? ॥ २ ॥  
तीए भणियं—सुंदर ! सयमवि काउं तुमं न याणासि ? । किं सच्चं पयडिज्जउ ? , सो भणइ—कहसु, को दोसो ? ॥ ३ ॥  
ताहे तीए सिद्धो कलगेयायन्नणाओ आरब्भ । सवो नियवुत्तंतो निब्भरअणुरागसंवद्धो ॥ ४ ॥  
आयन्निऊण एयं सुणिऊण य से असुंदरं भावं । नंदेणं सा भणिया कहंमि एयं सुयणु ! वयसि ? ॥ ५ ॥  
दूसिज्जइ निययकुलं अजसो य दिसासु जेण वित्थरइ । मरणेऽवि हु तं धीरा कहमवि नो संपवज्जंति ॥ ६ ॥  
सुवंति य नरएसुं परदारपसत्तयाण सत्ताणं । विविहाओ वेयणाओ मयच्छि ! ता उज्झसु कुवंछं ॥ ७ ॥  
इय पन्नविऊण बहुप्पयारवयणेहिं तं महाभागो । नंदो ठाणाओ तओ नीहरिओ सिग्घवेगेण ॥ ८ ॥

एसो य सयलवइयरो कडगंतरिएण निसामिओ दत्तेण, तओ चिंतियमणेण—अहो विणट्ठं कज्जं, जं मम महिला  
नंदेण सार्द्धं एवमुल्लवइ, मन्ने नंदो मं उवलक्खिऊण चित्तरक्खट्ठा सुद्धसमायारं अप्पाणमुवदांसितो एवमुल्लविऊण

प्रथमेऽणु-  
व्रते हरिव-  
र्मदृष्टान्तः।

॥ २९३ ॥

एतो ठाणाओ सिग्घमवकंतो, ता न जुत्ता उवेहा, जओ महिला पुरिसंतरखित्तचित्ता कयाइ अत्तणो मणोरहविग्घं  
 संमाविज्जण पइणो विसदाणाइणा विणासं करेज्जा, सयमसमत्था वा विडजणं विणासाय वावारेज्जा, अओ जाव-  
 ज्जवि न जायइ कोऽवि विणासो ताव वावाएमि एयं नंदं, न सबहा सुंदरो एस, कहमन्नहा एयाए सह रहसि  
 ठाएज्जा?, किं न याणइ एसो सप्पुरिसाण चक्खुक्खेवोऽवि न जुज्जइ काउं परकलत्ते?, किं पुण निम्भरपेमगम्भो  
 परोप्परमेगंतसंलाओ?, एवं निच्छिज्जण तस्स वावायणत्थं उवाए चिंतिउमारद्धो, सावि से भज्जा दुन्निग्गहयाए  
 मयणवियारस्स अवजसनिरवेक्खत्तणओ इत्थीसहावस्स गाढाणुरागसम्भावाओ दुल्लहजणंमि जत्थ जत्थ नंदं पासति  
 तत्थ तत्थ लिहियच्च थंभियच्च विचेयणच्च निचला एतमेव अणिमिसाहिं दिट्ठीहिं पेच्छमाणा अच्छइ, तीसे य तहा-  
 चिहावलोयणेण दत्तो बहुप्पयारं संतावमुवहइ, नंदोवि सुद्धसीलयाए पुवप्पवाहेण सुक्कसंको तस्स सगासंमि पइ-  
 दिणमुवेइ, अन्नया य अवगणिज्जण पुवोवयारं, परिचइज्जण चिरकालसंभवं सिणेहं, अविमंसिज्जण जुत्ताजुत्तं, अणवे-  
 क्खिज्जण परलोयभयं तेण दत्तमाहणेण वीसत्थहिययस्स नंदस्स तालउडविससणाहो पणामिओ तंवलवीडओ,  
 अविगप्पभावेण य गहिओ नंदेण, परिभोत्तुमारद्धो य ।

अह तंमि मुज्जमाणे अशुक्कडयाए विसविगारस्स । निन्नट्टचेयणो इत्ति निवडिओ सो महीवट्ठे ॥ १ ॥  
 दत्तेणवि मायासीलयाए पणयं पयासमाणेण । पम्मुक्कदीहपोकं हाहारवगम्भिणं रुत्तं ॥ २ ॥

श्रीगुणचंद  
महावीरच०  
८ प्रस्तावः

॥ २९४ ॥

मिलिओ य नयरलोगो कहिओ तेणावि तस्स वुत्तत्तो । जह सहसच्चिय जीयं नीहरियमिमस्स अनिमित्तं ॥ ३ ॥  
नयरजणेणं भणियं अलाहि सोगेण कुणसु कायवं । सच्छंदविलसिएसुं किं वन्निज्जइ कयंतस्स ? ॥ ४ ॥  
एमाइ जंपिऊणं नयरजणो पडिगओ सगेहेसु । दत्तेणवि से विहिओ सरीरसकारपमुहविही ॥ ५ ॥  
एवं च वावाइयंमि तंमि पणट्टकुविगप्पो भज्जाए समं निप्पचवायं विसयसुहमणुहवमाणो कालं वोलेइ, अन्नया  
य तीए समं वरिसयालंमि ओलोयणगओ जाव निवडंतजलधाराधोरणीमणहरं गयणयलमवलोएइ ताव सहसच्चिय  
तडयरारावभीसणा निवडिया तस्स सीसंमि कुलिंगमालापलीवियदिसामंडला विज्जू, तीए य तणपूलगो इव नि-  
हड्डो दत्तो, मरिऊण य तइयनरयपुढवीए सत्तसागरोवमाऊ नेरइओ उववन्नो, तहिं च अणवरयदहणकुंभीपागसाम-  
लिसाहारोहणकरवत्तफालणवेयरणिनइप्पवाहणमोग्गरसंचुण्णणपमुहाइं तिकखदुक्खलक्खाइं निरंतरमणुभविऊण  
आउयक्खंयमि तत्तो उव्वट्टिऊण मच्छकच्छपक्खिसरीसिवपमोक्खासु तिरिक्खजोणीसु उववन्नो, तासुवि बहुकालं  
चरिऊण पुणो पुणो नरगाईसु य उववज्जिऊण कहवि कम्मलाघवेण एगंमि पंचंतकुले जाओ पुत्तत्तणेणं, कयं च से  
मंगलउत्ति नामं, तत्थ य जह्विसाओ आरब्भ सो पसूओ तह्विसाओ चिय तंमि कुले पाउब्भूया विविहा  
रोगायंका, समुपन्ना विविहाणट्ठा, तओ तेहिं जणणिजणगेहिं चिंतियं-अहो दुट्ठलक्खणाणुगओ एस अह्म पुत्तो ता  
जाव न देइ अकाले चिय मरणं ताव पच्छन्नो चिय अडवीए नेऊण छडिज्जइ, जीवमाणानमन्ने पुत्ता भविस्संति,

प्रथमेऽणु-  
व्रते हरिव-  
र्मदृष्टान्तः।

॥ २९४ ॥

किमणेण विसहरसंवहुणेणंति परिभाविऊण वरिसमेत्तवओ मुको एसो अडवीए, अह तेणप्पएसेण समागओ सिवो  
नाम सत्थनाययो, दिट्ठो य तेण एसो, गहिओ अणुकंपाए, नीओ य बुद्धिं । अन्नया य तस्स कम्माणुभावेण सो  
सत्थवाहो सधणो ससयणोऽवि अकालखेवेण खंयं गओ, सो य भिक्खावित्तीए अप्पाणं पोसंतो कमेण जोवण-  
मणुप्पत्तो, अन्नया य वसंतमासंमि पवरनेवत्थमणहरं नयरजणं विलसंतं अवलोइऊण चिंतियमणेण-अहो नूणं महा-  
पावकारी अहं, कहमन्नहा समाणेवि मणुयत्ते इमे कयपुत्ता नायरया एवं विलसंति, अहं पुण पइदिणं लुक्खभि-  
क्खाकवलकवलणेण निययउयरंवि(न) भरामि?, ता पज्जतं गिहवासेण, करेमि धम्मज्जणंति संचिंतियऊण गओ जल-  
णप्पभाभिहाणस्स तावसस्स समीवे, गहिया दिक्खा, काउमारद्धो य विविहं तवचरणं । एवं च अन्नाणतवेण  
उवज्जिया भोगा, अन्नदिवसे य पउरकंदमूलफलभक्खणेण समुप्पन्नं से पोहूसुलं, तेण य अभिहओ मरिऊण  
वसंतपुरे नयेर हरिचंदस्स रण्णो अणंगसेणाभिहाणाए अगमहिसीए कुञ्ठिसि पाउम्भूओ पुत्तत्तगेगं, पसूओ  
नियसमयंमि, कयं वद्धावणयं. पइट्ठियं च हरिवम्मोत्ति नामं, उम्मुक्कवालभावो य गाहिओ कलाकोसलं परिणाविओ  
य अट्ठ रायकन्नगाओ, अन्नया य जोगोत्ति कलिऊण हरिचंदराइणा महाविभूर्इए मंतिसामंतपउरजणसमक्खं उव-  
वेसिओ नियपए, जाओ सो महानरिंदो । हरिचंदरायाऽवि निविण्णकामभोगो गओ वणवासं, गहिया दिसापो-  
क्खगतावसाणं दिक्खा, परिवालेइ जहाभिहियं तेसिं धम्मंति । हरिवम्मरायावि जहाविहिपरिपालियपयइवगो

श्रीगुणचंद  
महावीरच०  
८ प्रस्तावः

॥ २९५ ॥

कालाणुरूपयद्वियनयमग्गो रज्जभरं समुवहइ, तस्स य विसयसुहमणुहवंतस्स समुप्पन्नो पुत्तो, कयं च से हरि-  
दत्तोत्ति नामं, तस्स य राइणो सयलरज्जवावारनिरुवणनिउणो असेसनीइसत्थवियक्खणो वेसमणो नाम अमच्चो,  
सो य लद्धपसरत्तणेण एवं परिभावेइ-जइ किंपि अंतरं पावेमि ता इमं रायं वावाइऊण सयमंगीकरेमि रज्जं,  
किमणेण साहीणेऽवि सामंते दासत्तकरणेणं?, तहावि केणवि उवाएणं एयस्स राइणो पढमं ताव पुत्तं विणासेमि  
पच्छा एस सुहविणासो चेव होहिति परिभावेतो अवरंमि वासरे कइवयपहाणपुरिसपरियरिओ गओ उज्जाणं, उव-  
विट्ठो तरुवरच्छायाए, अह खणंतरं अच्छिऊण कवडेण सहसत्ति उट्ठिओ तट्ठाणाओ भासमाणं च परियणं निवारि-  
ऊण उट्ठसुहो निन्निमेसेण य चक्खुणा गयणमवलोइऊण परमविम्हयमुवहंतो नियपरियणं भणिउं पवत्तो—भो! भो!  
किं निसामियं किंपि तुब्भेहिं एत्थ?, तेहिं भणियं-सामि! किमिव?, अमच्चेण भणियं—आगासे वचंतीहिं देवीहिं  
इमं जंपियं—जहा एस राया नियपुत्तदोसेण मरिहिति, एयं च निसामिऊण अणुकूलभासित्तणं सेवगस्स धम्मोत्ति-  
कलिऊण तयणुवित्तीए भणियं परियणेण—सामि! वाढं निसामियं, केवलममंगलंति काऊण पढमं चेव न कहियं,  
जइ रे जणगणिविसेसस्स सामिसालस्सवि एवं होही ता पज्जत्तं मे जीविणंति वागरिऊण अमच्चेण आयट्ठिया  
कज्जलपुंजसामलुम्मिलंतकंतिपडला खग्गधेणू, समाढत्तं कवडेण नियपोट्ठवियारणं, तओ कहकहवि बला मोडिऊण  
वाहुं परियणेण उद्दालिया खग्गधेणू, नीओ मंदिरं, उब्भडकवडसीलयाए य परिचत्तपाणभोयणसरीरसकारो जरसि-

प्रथमेऽणु-  
व्रते हरि-  
वर्मकथा.

॥ २९५ ॥

कदमंचणं निवडिऊण ठिओ एसो असंसेपि दिवसं, वासरंते य अत्थाणीगएण राइणा अमच्चं अपेच्छंतेण पुच्छिंओ पडिहारो-अरे ! किं निमित्तं न आगओ अज्ज अमच्चो ?, तेण कहियं-देव ! न सुणेमि सम्मं, राइणा भणियं-सयंपि गेहं गंतूण अमच्चं पुच्छसु अणागमणकारणं, तओ जं देवो आणवेइत्ति भणिकुण गओ पडिहारो, दिट्ठो जरसि-फज्जविडिओ सामययणो अमच्चो, पुच्छिओ य अणेण-अमच्च ! किमकांडे चिय एवंविहमवत्थंतरमुवागओ सि ?, साहेसु कारणं, तुइ अणागमणेण परितम्मइ नराहिवोत्ति वुत्ते दीहं नीससिऊण भणियममच्चेण-भो पडिहार ! किं निरत्थएण पुपवुत्तंतविकत्यणेण ?, एत्तियमेत्तमेव संपइ जंपियवं

जस्स पसाएण समग्गलोगपुज्जत्तणं समणुपत्तं । लच्छी चिरमुवभुत्ता तस्सवि हरिवम्मदेवस्स ॥ १ ॥

सुणिकुण असवणिज्जं विणाससंख्यगं तहावयणं । किं अज्जवि निलज्जं जीवियमहमुघ्हिस्सामि ? ॥ २ ॥

इमं च गाहाजुयलमुल्लविकुण पडेण वयणं समोच्छाइऊण ठिओ मोणेणं अमच्चो, अह परमत्थं अवियाणमाणेण पडिहारेण पुट्ठो परियणो-अहो किमेवममच्चो वाहरइ ?, तेहिं भणियं-पडिहार ! अज्ज उज्जाणगएहिं अम्हेहिं अ-मच्चेण य गयणवाणी निसुणिया जहा देवो पुत्तदोसेण मरिहित्ति, तदायन्नणाणंतरमेव अमच्चो अय्यणो विणासं कुण-माणो महया किलेसेण निसिद्धो मरणभुवगमेण य अज्जवि भोयणं न कुणइत्ति, इमं च सोच्चा पडिहारेण भणियं-अहो ! अकित्तिमा पडुभत्ती, अहो ! असरिसं कयञ्चुत्तणं, अहो ! ससरीरनिरवेक्खयत्ति, धुवं धन्नो एस हरिवम्मराया

श्रीगुणचंद  
महावीरचं  
८ प्रस्तावः

॥ २९६ ॥

जस्स एवंविहो अमच्चोत्ति वणिज्जण सो गओ नरिंदसमीवं, कहिओ य एगंते सवो तवुत्तंतो, इमं च आयन्निज्जण  
अचंतवल्लहयाए नियजीवियस्स उदयाओ पुच्चकयदुच्चरियाणं संखुद्धो नराहिवो, वाहराविओ अमच्चो, पुच्छिओ सव्वं  
जहावट्टियवइयरं, कहिओ य अणेण, तओ राइणा भणियं—अमच्च ! किमियाणिं कालोचियं?, अमच्चेण कहियं-  
देव ! तुम्हे चिय जाणह जमेत्थ उचियं, अहं पुण सयमेव सुणिज्जण देवस्स भाविणिं विसमावत्थं न सव्वहा  
जीवियमुच्चहिस्सामि, जओ तुम्ह पायाण विरेहे का अम्ह सोहा ? का वा पहुभत्ती ? किं वा सकज्जसाहणं ? ता  
अणुमन्नउ देवो, न एत्थ अन्नं वोत्तुं जुज्जइ अम्हाणंति, राइणा भणियं—अलं मरणेण, समायरसु जमिह जुत्तं, अमच्चेण  
कहियं—देव ! संकडमिमं, के तुम्हे ? को वा तुम्ह पुत्तो ?, अओ न किंपि काउं पारियइ, राइणा भणियं—जो देवीहिं  
विणासकारित्ति सिद्धो सो पुत्तोऽवि परमत्थओ सत्तू चेव, ता ममाएसेण तयणुरूवं करेज्जासु, अमच्चेण भणियं—  
देव ! एवंविहदुट्ठाण सासणे दंडवासियाण चेव अहिगारो, ता पसीग्रउ देवो तेसिमेव आएसदाणेणं, तओ निरुविओ  
राइणा कुमारविणासणत्थं दंडवासिओ, विणासिओ तेण, पहिद्धो अमच्चो, कया भोयणाइया सरीरचेट्ठा, चिंतियं  
च तेण—निहओ एस एगो कंटयो, इयाणिं राया विणासणिज्जोत्ति ।

अह तंमि सुए वहिए नायरलोएण जंपियं एवं । हा हा अहो अकज्जं नरवइणा नूणमायरियं ॥ १ ॥

जं रज्जभरसमत्थो पुत्तो अविभाविज्जण परमत्थं । कुस्सुयनिसामणुग्गंयभयवसओ मारिओ सहसा ॥ २ ॥

प्रथमेऽणु-  
त्रते हरि-  
वर्मकथा.

॥ २९६ ॥

अच्छद परेण कहिए तहाविहे दुन्निमित्तपमुहत्थे । सयमवि दिट्ठे कुसला जुत्ताजुत्तं वियारिंति ॥ ३ ॥ अन्नं च-  
गहपीडामारीदुन्निमित्तदुस्सुमिणपमुहदोसगणा । देवाण पूयणाईहिं नूण सिग्घं उवसमंति ॥ ४ ॥  
ता दढमणुचियमेयं कयं नरिंदेण धम्मपहवज्जं । गरुयाणं गरुउचिय उप्पज्जइ अहव सम्मोहो ॥ ५ ॥

इमं च सुयं कन्नपरंपराए राइणा, तओ पाउब्भूया अरई, उप्पन्नो पच्छायावो, पवट्ठिओ महासोगो, चत्ता रज्ज-  
चिंता, इमं च परिभाविउं पयत्तो-अहो महापावोऽहं जेण सए एवंविहमकज्जमायरंतेण न गणिओ धम्मो, नावे-  
क्खिओ अजसो, न अंगीकयं पोरुसं, नावलंविद्या खंती, ता किमियाणिं परिचयामि रज्जं?, पविसामि जलणं? पव-  
ज्जामि वा वणवासं?, केण वा कएण इमाओ पावाओ भोक्खो होहिति चिंतमाणस्स राइणो पडिहारेण गंतूण  
विन्नत्तं-देव! दुवारे नंदणुज्जाणपालणा समागया, ते य देवदंसणमभिलसंति, राइणा भणियं-लहु पवेसेह, एवं च  
भणिए पवेसिया तेण, ते य निवडिया चलणेसु, विन्नविउमारद्धा-देव! तुम्ह उज्जाणे भयवं अरिट्ठनेमी समोसढो,  
ता वद्धाविज्जह तुम्हे तयागमणेणंति, इमं च सोचा चिंतियं राइणा-होउ ताव सोगेणं, तं च भयवंतं केवलालो-  
यमुणियतिलोयवावारं जहावित्तं पुत्तविणासहेउं दुन्निमित्तमापुच्छिऊण उचियं करिस्सामिति विभाविऊण पयट्ठो  
जिणाभिमुहं । इओ य सो अमचो मुणियसवन्नुसमागमो पयडोभविस्सइ संपयं मज्झ कवडविलसियंति नियदुच-  
रियसंकाए जच्चतुरंगममारुहिऊण जीवियमएण पलाणो वेगेण । रायावि गओ भयवओ समीयं, तओ चित्तंभंतरुद्ध-



भीगुणचंद  
महावीरच०  
८ प्रस्तावः

॥ २९७ ॥

संतहरिसपसरो बहलरोमंचंचियसरीरो भयवंतं तिपयाहिणापुव्वगं पणमिऊण थुणिउमारद्धो । कहंचिय?—

जय नवतमालदलसामदेह, तुहु निम्मलगुणरयणोहगेह ।

अइदुजयनिज्जियकुसुमवाण !, जिण भवियहं दंसियसिद्धिट्ठाण ॥ १ ॥

उत्तुंगपओहरहरिणनयणनवजोषणपव्वणचंदवयण ।

पइ उग्गसेणसुय जेण चत्ता, तसु एकह तुह पर जयइ वत्त ॥ २ ॥

ओहामियसिंधुसमत्थरयणि, अवयरिए नाह ! जायवह भवणि ।

चिंतामणिंमि पइं समुहविजओ, सचं चिय जाओ समुहविजओ ॥ ३ ॥

आपूरियनिब्भरसंखघोस—संखोहियजयजण गयदोस ।

भुयपरिहंदोलियलच्छिरमण !, सघायरेण सुरपणयचलण ! ॥ ४ ॥

तइलोकभवणनिम्मलपईव !, परमायररक्खियसयलजीव ! ।

भवि भवि जिणिंद ! तुहुं रिद्धिनेमि !, अम्हारिस लीयह होज्ज सामि ॥ ५ ॥

एय एवं थोऊणं पराए भत्तीए जयगुरुं नेमिं । हरिसियमणो नरिंदो तयणु निविट्ठो महीवट्ठे ॥ ६ ॥

भयवयावि पयट्ठिया धम्मकहा, पडिबुद्धा बहवे पाणिणो, गहियनियनियसामत्थाणुरूवाभिग्गहविसेसा गया य

प्रथमेऽणु-  
व्रते हरि-  
वर्मकथा-

॥ २९७ ॥

जहागयं । अंह अवसरं मुणिऊण पुच्छियं राइणा-भयवं ! पुरा अमच्चेण जं अम्ह कहियं तं सच्चमलियं वा ? भयवया भणियं-अलियं, राइणा भणियं-भयवं ! किमेवंविहं तेणाकज्जमायरियं ?, भयवया जंपियं-भो महाराय ! भोगत्थिणो रत्थत्थिणो परिवारत्थिणो पाणिणो किं किं पावं न करेंति ? किं वा मायामोसं न पयडेंति ? अहवा को तस्स दोसो ?, पुषकयकम्माण चेव विलसियमिमं, सो पुण निमित्तमेत्तं चेव वरागो, राइणा जंपियं-भयवं ! किं मए पुषभवे एयंविहं पावमायरियं जस्स अणुभावेण अच्चंतवल्लहस्स सुयस्स सहसच्चिय विणासं पडिवन्नो ?,

ताहे जह पुषभवे महिलादोसेण दोसपरिहीणं । मित्तं विणासिऊणं समज्जियं पावमइगरुयं ॥ १ ॥

जह नारयत्तिरियभवेसु भूरिसो पाविऊण जरमरणे । कह कहवि माणुसत्ते लद्धे विहिण्ण य वालतवे ॥ २ ॥

इह संपत्ते रज्जे जह मित्तविणासकम्मदोसेणं । जाओ पुत्तविणासो तह सव्वं भयवया कहियं ॥ ३ ॥

इमं च सोच्चा जायगाढभवभओ हरिवम्मराया भणिउं पवत्तो-भयवं जइ पाणाइवायस्स एवंविहो असुहो सहावो ता पज्जत्तं मम रज्जेण, गिण्हामि तुह समीवे पव्वज्जं जाव अभिसिंचेमि कमवि अत्तणो पयंमिस्सि वागरिऊण गओ नयरिं, निवेसिओ निययरज्जंमि भाइणेजो, सो य अमच्चो नाओ जहा पलाणोत्ति । तओ मोत्तूण य रायसिरिं हरिवम्मनराहिवो अणगारियं पडिवन्नोत्ति ॥

इय भो गोयम ! एसो पाणिवहाविरइमंतजंतूणं । पाउवभवइ महंतो अणत्थसत्थो जओ तम्हा ॥ १ ॥

सवयवत्तेणं चिय संकप्पियपाणिचायवेरमणं । सग्गापवग्गसोकखाइं कंखमाणेहिं कायवं ॥ २ ॥ इइ पढममणुवयं ।  
 जह अलियवयणविरईसरुवमेयं अणुवयं वीयं । भणिमो तं पुण अलियं दुविहं थूलं च सुहुमं च ॥ १ ॥  
 थूलं पंचवियपं कन्नागोभूमिनासहरणेसु । कूडगसक्खेज्जंमि य एसो इह नियमविसओत्ति ॥ २ ॥  
 कन्नागहणं दुपयाण सूयगं चउपयाण गोगहणं । अपयाणं दवाणं सवेसिं भूमिवयणं तु ॥ ३ ॥  
 इयरदुयग्गहणं पुण पाहन्ननिदंसणट्टया भणियं । सुहुमं तु अलियवयणं परिहासाईसु नेयवं ॥ ४ ॥  
 थूलमुसावेरमणे एयंमि अणुवए पवत्तंमि । अइयारा पंच इमे परिहरणिज्जा सुसहेणं ॥ ५ ॥  
 सहसा अब्भक्खाणं रहसा य सदारमंतभेओ य । मोसोवएसणं कूडलेहकरणं च निचंपि ॥ ६ ॥  
 एयस्स पालणाऽपालणासु पयडा गुणा य दोसा य । दीसंति समक्खं चिय दिहुंतो भायरो दोन्नि ॥ ७ ॥  
 ते य भायरो गोयम ! निसामेसु, एत्थेव भारहे वासे वडवदनयरे पभाकरो नाम राया, सवत्थ विकखायजसो  
 दुवालसविहसावयधम्मपरिपालणपरायणो जइजणपज्जुवासणवद्धलक्खो परोवयारकरणाइगुणसहस्ससमलंकिओ  
 सचो नाम सेट्ठी, तस्स य इहलोयमित्तपडिवद्धो धम्माणुट्ठाणविरहिओ कणिट्ठो वलदेवो नाम भाया, सो य जाण-  
 वत्तेण परविसएसु गच्छइ, अन्नया य बहुलाभो हवइत्ति निसामिऊण गओ चोडविसए, चोडरायावि सचसेट्ठिणो  
 गुणनिवहं जणेण वन्निज्जमाणं सुणिऊणं तइंसणाणुरागरत्तो तब्भाउयं वलदेवं भणइ-सवहा मम दंसणत्थं सचसेट्ठिं

आणेज्जासित्ति, एवं च नरिंदायरं पेच्छिऊण पडिमुयमगेण, कालक्रमेण नियमंदिरमुवागओ सच्चस्स परिकहेइ, अ-  
 न्नया य चवलत्तणओ लच्छीए उदयत्तणओ अंतराइयकम्मस्स अप्पदविणो जाओ सच्चसेट्ठी, तओ तेण चोडविसयग-  
 मणाय पुट्ठो पभाकरनरिंदो, अणुत्ताओ य तेण, तयणंतरं च उचियाइं महत्थाइं महग्घाइं विविहभंडाइं गहिऊण  
 भाउणा समं गओ चोडविसयं सच्चसेट्ठी, तदागमणं च निसामिऊण तुट्ठो चोडराया, दवावियं निवासमंदिरं, पूइओ  
 उचियपडिचत्तीए अत्तणो य समीवंमि धरिओ कइवयवासराइं, अह विणिवट्ठिए भंडे गहिए सदेसपाउग्गे पडिभंडे  
 चोडविसयाहिवहमणुजाणाविऊण समारूढो नावाए सच्चसेट्ठी,

अणुकूलपवणपेल्लियमहल्लधयवडविवट्ठियावेगा । गंतुं जवा पयट्ठा नियपुरहुत्तं तओ नावा ॥ १ ॥  
 तहियं आरूढा ते जाव पलोयंति कोउहल्लेण । अनिलुल्लंतकल्लोलभीसणं जलहिपेरंतं ॥ २ ॥  
 ताव नियतुंगिमाविहियविंझगिरिविब्भमो लहुं दिट्ठो । सलिलोवरिं वहंतो अतुच्छदेहो महामच्छो ॥ ३ ॥  
 तं दट्ठुं बलदेवेण जंपियं एस पवओ एत्थ । इंताणं नासि जओ ता तुब्भे मग्गपब्भट्ठा ॥ ४ ॥  
 निज्जामगेहिं भणियं न पवओ एस किंतु मच्छोत्ति । सो चेव अयं मग्गो वामोहं कुणह मा सामि ! ॥ ५ ॥  
 बलदेवेण भणियं-अहं पुण इहं चेव विविहभंडपडिहत्यं जाणवत्तं हारेमि जइ मच्छो होज्जा, एवं च उभय-  
 पक्खेहिवि सच्चसेट्ठिं सक्खिं कारुण विहिया होइा, ते य निज्जामणा पडिवेडएण गंतुण मच्छयपिट्ठिमि परिकखं-

श्रीगुणचंद  
महावीरच०  
८ प्रस्तावः

॥ २९९ ॥

णत्थं तणपूलयपडलं पज्जालिउमारद्धा, सो य मच्छो तेण परितत्तसरीरो झडत्ति निबुद्धो अच्छाहे जले, एवं हारियं जाणवत्तं वलदेवेण, परितुट्ठा निज्जामगा, पत्ता य कमेण नियनगरं, तओ तेहिं पडिरुद्धं जाणवत्तं, समुत्तारिऊण तीरे मुक्को वलदेवो, पारद्धो अणेण झगडओ निज्जामगेहिं समं, जहा असच्चा इमे मच्छहारिणो चिलाया मए विजियत्ति काऊण आडंवरमुवदंसंतित्ति भणिऊण वला चेव भंडमुत्तारिउमारद्धो, निज्जामगेहिं वाहिया नरवइणो आणा, न ठाइ वलदेवो, तओ रायाणं उवट्टिया दोवि पक्खा, तेसिं च परोप्परं विवदंताणं परमत्थमवियाणिऊण भणियं रत्ना-अरे ! एत्थ ववहारे को सक्खी?, निज्जामगेहिं भणियं-देव ! अत्थि चेव सक्खी, परं नियसहोयरमुवेक्खिऊण किं अम्हाणं सक्खित्तणं करिस्सइ?, राइणा भणियं-को पुण सो?, तेहिं भणियं-सच्चसेट्ठी, एवं वुत्ते एगंते ठाऊण पुच्छिओ सो रत्ना कज्जपरमत्थं,

ताहे स सच्चसेट्ठी परिभावइ किं करेमि एव ठिए? । जइ अवितहं न जंपेमि होइ ता मे वयकलंको ॥ १ ॥

जइ पुण जहेव वित्तं तहेव साहेमि ता लहू भाया । पावइ अणत्थमत्थो जाई हीरइ पसिद्धीवि ॥ २ ॥

ता दोन्निवि गरुयाइं आवडियाइं इमाइं कज्जाइं । एकंपि परिच्चइउं न तरामि करेमि किं इण्हिं? ॥ ३ ॥

अहवा इहलोयकए कहं च चिरकालपालियं नियमं । गुरुमूले पडिवन्नं जाणंतोऽहं विराहेमि? ॥ ४ ॥

किं एत्तो अइपावं जं जाणंतावि भवअसारत्तं । पडिसिद्धेसुवि अत्थेसु मोहओ संपयट्ठंति ॥ ५ ॥

द्वितीयेऽणु-  
व्रते सत्य-  
श्रेष्ठिकथा.

॥ २९९ ॥

किं बहुणा ?-जइ पडइ सिरे वज्जं सयणोऽवि परंमुहो हवइ लच्छी । वच्चइ तहावि अलियं कहमवि नाहं वइस्सामि ॥ ६ ॥

इति निच्छयं काऊण भणिओ सो सेट्ठिणा नराहिवो-जं इमे वरागा निज्जामगा जंपंति तं सच्चं, मम भाया पुण अलियवाइत्ति, इमं च सोचा तुट्ठो राया चित्तिउं पयट्ठो-अहो अज्जवि एरिसा सच्चवाइणो दीसंति जे नियसहोयर-सिरीचिणासेवि नियमज्जायं न चयंति, ता मंडिज्जइ एवंविहेहिं कलिकालेऽवि भूमिमंडलंति परिभाविऊण आहूया निज्जामगा, सरोसं तज्जिया य, जहाने दुरायारा ! जइ कहवि अमुणियपरमत्थेणं मम वणिएण तहाविहं जंपियं ता किं वयणछलमेत्तेणवि अणेगभंडभरियवोहित्थं घेतुं उवट्ठिया ?, एवमाईहिं वयणेहिं निब्भच्छिऊण किंचि दाऊण निद्धाडिया, दघसारंपि समप्पियं सच्चसेट्ठिस्स, बलदेवोऽवि भणिओ-मा पुण एवं करेज्जासु,

इय अलियवयणपरिहारकारिणो इह भवेऽवि जणपुज्जा । हुंति नरा परलोए लीलाए जंति निघाणं ॥ १ ॥ इइ वीयमणुवयं २

भणियं वीयमणुवयमेत्तो तइयं अदत्तदाणवयं । साहिज्जइ सयलाणत्थसत्थनित्थारणसमत्थं ॥ २ ॥

तं पुण दुविहमदत्तं थूलं सुहुमं च तत्थ सुहुमभिणं । तरुलायाठाणाई अणणुज्जायं भयंतस्स ॥ ३ ॥

अइसंकिलेसपभवं जं निवदंडारिहं च तं थूलं । सचित्ताइतिभेयं थूले गिहिणो हवइ नियमो ॥ ४ ॥

एत्थ उ अप्पडिवत्ते जे दोसा ते जणेऽवि सुपसिद्धा । वहवंधतरुल्लंवणसिरच्छेयाई चोराणं ॥ ५ ॥

पडिवत्तेऽविहु एत्थं भवभयभीरुत्तणं परिवहंतो । सुस्सहो अइयारे पंच इमे वज्जइ सयावि ॥ ६ ॥

श्रीगुणचंद  
महावीरच०  
८ प्रस्तावः

॥ ३०० ॥

चोरोवणीयगहणं तकरजोगं विरुद्धरज्जगमं । कूडतुलकूडमाणं तप्पडिरुवं च ववहारं ॥ ७ ॥  
चोरिकाउ विरत्ता कहंपि चोरोहिं संपउत्तावि । वसुदत्तोव न पावंति आवइं सुइसमायारा ॥ ८ ॥  
गोयमसामिणा भणियं—भयवं ! को एस वसुदत्तो ? , जयगुरुणा कहियं—अवक्खित्तचित्तो निसामेसु, वसंतपुरे  
नयरे वसुदेवो नाम इब्भो, तस्स य वसुमिक्खिता नाम भारिया, तीसे य अवच्चं न होइ, तओ सा चित्तेइ-जइ अवच्चस्स  
कारणे एस मम भक्ता अन्नं परिणिस्सइ ता अहं गेहस्स असामिणी, अह अच्चंतनिब्भराणुरागरंजियमणो अन्नं न  
परिणेइ, तत्थ य मरणपज्जवसाणयाए एयस्स नरवरदाइदाइहिं हीरंते गेहसारे सविसेसं असामिणी चेव, अओ जइ  
कहवि मम पुत्तो हवइ ता सोहणं संपज्जइ, इमेण य अभिप्पाएणं सा अणवरयं देवयाणं उववाइयसयाणि पयच्छइ  
मंतंतवाइजणं चापुच्छइ । इओ य सोहम्मे कप्पे अरुणाभविमाणे महिद्धिओ विज्जुप्पभो नाम देवो, सो य पचा-  
सन्नचवणसमयत्तणेण अत्तणो पयइविवज्जासं पेच्छिऊण वक्खित्तचित्तो भयसंभंतो परिचित्तेइ—

कह रयणनियरउग्गाढपीढियादढनिवद्धमूलोऽवि । निच्चावट्टियरुवोवि कप्परुक्खलो पकंपेइ ? ॥ १ ॥

सुंदरमंदारतरुप्पसूयमालाऽमिलाणपुवावि । कारणविरहेऽवि कहं पमिलायइ संपयं सहसा ? ॥ २ ॥

कह जच्चकंचणुडामरोऽवि देहस्स कंतिपब्भारो । ताविच्छगुच्छसंछाइयव मालिन्नमुवहइ ॥ ३ ॥

कह वा भुयंगनिम्मोयनिम्मलाइंपि देवदुसाइं । कज्जलजलघोयाणिव अइकसिगाइं विभाविति ? ॥ ४ ॥

तृतीयेऽणु  
व्रते वसु-  
दत्तकथा.

॥ ३०० ॥

कह वा मम नयणजुयं सभावओ चिय निमेसपरिहीणं । देवत्तचिरुद्धेवि हु निमीलणुम्मीलणे कुणइ ? ॥ ५ ॥

कह अंतरंतरा पेच्छणाइवक्खित्तचित्तगवि पावा । लद्धावसरच्चिय वेरिणिच्च विहवइ मं निहं ? ॥ ६ ॥

अचंतपेमपरवसचित्तोऽवि हु परियणो कहमियाणिं । कइवयदिणदिट्ठो इव न वयणमभिनंदए मज्झ ? ॥ ७ ॥

ता सवहा न कुसलं तकेमि अहं सजीवियवस्स । कल्लाणकारिणो जेण होंति न कयाइ उप्पाया ॥ ८ ॥

इय एवंविहचिंतासंताणुप्पन्नतिच्चपरितावो । कप्पहुमोच्च वणदवपलीविओ भाइ सो तियसो ॥ ९ ॥

एवं जाय सोगपमिलाणणो सिंघासणगओ अच्छइ ताव तस्स चेव पियमित्तो कणगप्पभो नाम देवो समागओ तं पएसं, तं च तहट्ठियं दट्ठूण चित्तियमणेण—कहं अज्ज पियमित्तो सुण्णचित्तलक्खोच्च लक्खीयइ ?, जओ अन्नवेलासु दूराओ चिय मं आगच्छमाणं पलोइऊण सायरं सप्पणयं पढमालावासणप्पणामाइणा अभिणंदन्तो, संपयं पुण समीयमुवगयंपि न पच्चभिजाणइ, ता नूणं कारणेण होयवन्ति विभाविऊण भणिओ अणेण—भो विज्जुप्पभ ! किं चित्तिज्जइ ?, उट्ठमवल्लोइऊण जंपियं विज्जुप्पभेण—भो वरमित्त ! कणगप्पभ इओ एहि, इमं च आसणमलंकारेहित्ति वुत्ते उवविट्ठो एसो, पुच्छिओ य अणेण वेमणस्सयाकारणं, कहिओ य विज्जुप्पभेण स निययवुत्तंतो, तओ कणगप्पभेण भणियं—पियमित्त ! सवहा न सुंदरमेयं, ता एहि तित्थगरस्स पुच्छामो, कहिं एत्तो तुह चुयस्स उप्पत्ती भविस्सइत्ति, विज्जुप्पभेण भणियं—एवं होउ, तओ गया विदेहखेत्ते, वंदिओ तित्थगरो, सचिणयं पुच्छिओ य, जहा—भयवं !



श्रीगुणचंद  
महावीरचं  
८ प्रस्तावः

॥ ३०१ ॥

कथं अहं उववजिस्सामि?, भयवया भणियं—वसंतपुरे नयरे वसुदेवस्स वणिणो वसुमिच्चाए भारियाए गम्भंमि पुत्तो तुमे पाउब्भविस्ससि, एवं च निसामिऊण जहागयं पडिनियत्तो विज्जुप्पभो, अन्नंमि य दिवसे सिद्धपुत्तरूवं विउ-  
विऊण अवयरिओ वसुदेवगिहे, साइसओत्ति कलिऊण अब्भुट्ठिओ वसुमिच्चाए, पुट्ठो य-भो महाभाग ! जाणासि तुमं मम पुत्तो भविस्सइ न वत्ति?, देवेण भणियं—जइ तं पव्वयंतं न वारेसि अहं तहा करेमि जहा ते पुत्तो होइत्ति, पडिस्सुयमणाए, अह कवडेण मंडलग्गपूयापुरस्सरं महया वित्थरेण देवयापूयं काऊण देवो भणइ—भद्दे ! अमुगंमि दियहे विसिट्ठसुमिणसूइओ पुत्तो ते गम्भे आयाही, तीए भणियं—तुम्ह पसाएण एवं होउ, देवो अहंसणमुवगओ, अवरंमि य वासरे सो चविऊण उप्पण्णो तीसे गम्भे, जाओ कालक्कमेण, कयं वद्धावणयं, पइट्ठियं से वसुदत्तोत्ति नामं, उच्चियसमए य गाहिओ कलाकोसल्लं, नीओ य एगया साहूण समीवे, कहिओ य तेहिं दुवालसवयसणाहो सावगधम्मो, पुव्वभवजिणवयणाणुरागरत्तत्तणेण य परिणओ एयस्स, तओ पडिवण्णो भावसारं तेण, गहियाणि य दुवालसवि वयाइं, परिपालेइ य निरइयाराइं, अन्नया य सविसेसजायधम्मवासणाविसेसेण तेण पुच्छिया साहुणो मुणिधम्मं, कहिओ य तेहिं । कहां चिय ?—

पंच उ महवयाइं गुत्तीओ तिन्नि पंच समिईओ । सीलंगसहस्साइं अट्टारस निरइयाराइं ॥ १ ॥

लुहतण्हापमुह परीसहा य बावीस बाढदुविसहा । विणओ य चउब्भेओ अणिययवासो य मुत्ती य ॥ २ ॥

तृतीयेऽणु-  
व्रते वसु-  
दत्तकथा.

॥ ३०१ ॥

पिंडविमुद्धी मुत्तत्पचित्तां गुरुकुले सया वासो । अणवरयं तवचरणंमि उज्जमो कोहचाओ य ॥ ३ ॥  
 गानकुत्ताइमु पडिचंधवज्जणं उत्तरोत्तरगुणेषु । अञ्जुजमो य निचं वाढं संसारनिवेओ ॥ ४ ॥  
 जहठियजिणमग्गपरुवणा य सत्तेसु करुणभावो य । करणाण निग्गहो तह सतत्तपरिभावणं निचं ॥ ५ ॥  
 इय आजम्मं मुंदर ! मुणिउं धम्मस्स (मुणिधम्मसम्मग्ग)साहणविहाणं । अचंतमपमत्तेहिं कीरमाणं सिवं देइ ॥ ६ ॥  
 एयं मुणीहिं कहिए संवहियगाढधम्मपरिणामो । वसुदत्तो भणइ लहुं भयवं ! मह देह पवज्जं ॥ ७ ॥  
 ताहे मुणीहिं भणियं जणणीजणगाणणुण्णवणपुवं । पवजापडिवत्ती जुज्जइ नेवऽण्णहा काउं ॥ ८ ॥  
 ता सकुडुवं गोयाविज्जण दिक्खं पवज्जसु जवेण । सण्णाणफलमिमं चिय जं चाओ सव्वसंगस्स ॥ ९ ॥  
 एयं मुणीहिं वागरिए गओ सो अम्मापिज्जण सगासे, कहिओ नियचित्तपरिणामो, तेहिं भणियं-पुत्त ! मुत्तभोगो  
 पवज्जं गिण्हेज्जासि, अणुययाइणा सावगधम्मेण ताव अत्ताणं परिकम्मेसु, तओ सो तेसिं अप्पत्तियपरिहरणद्वया  
 साहण समीवे पढंतो गिहत्थवित्तीए चेव अञ्छइ, पवजागहणनिञ्छएण जोवणत्थोऽवि नेच्छइ परिणेउं, तं च  
 तहाविहं पेच्छिऊण जणणीए भणिओ वसुदेवो-एस पुत्तो तवस्सिजणसंसग्गीए वासियहियओ नावेक्खइ विसयपडि-  
 पत्तिं न मत्तइ दारपरिग्गहं नायरइ सरीरालंकरणं, ता पज्जत्तं धम्मियसेवाए, सव्वहा खिचसु एयं दुल्ललियगोद्धीए,  
 जइ गुण तहाविहसंसग्गीए भावपरावत्ती जायइत्ति, पडिस्सुयमेयं सेट्ठिणा, तओ जे वाणियगा पुत्ता समाणजाइ-

श्रीगुणचंद  
महावीरच०  
८ प्रस्तावः

॥ ३०२ ॥

वयविभवा ताण मज्झे मेलिओ एसो, ते य अच्चंतविसयगिद्धा दविणक्खयं कुणंता पियरोहिं सिक्खविजंतावि दुहं-  
तिंदियत्तणेण न तरंति नियत्तिउं, सगेहेसु य धणमलभमाणा चोरियं करेंति । अन्नया य मुसणनिमित्तेण पलोइयं  
तेहिं बहुधणधणसमिद्धं समिद्धजन्नजत्तागयतन्निवासिजणसमूहं विमुक्केकथेरीरक्खणं महेसरदत्तस्स मंदिरं, तओ  
विजणंति काऊण पयट्ठा रयणीए तं मुसिउं, सो य वसुदत्तो पुक्खरपत्तंपिव पंकत्तकलंकेण सुसाहुव कुसीलसंसग्गेण  
न मणागंपि छिन्नो तेसिं कुसमायारेण, केवलं जणणिजणयाणुवित्तिमवलंबंतो रज्जुबद्धोव वसहो अमुणियपरमत्थो  
चेव पट्ठिओ तेसिमणुमग्गेणं, ते य सणियं सणियं तस्स महेसरदत्तस्स गिहे पविसमाणा वसुदत्तेण पुच्छिया-भो  
किमेत्थ तुम्हे पविसह?, तेहिं भणियं-भह! चोरियाए एत्थ पविसिस्सामो, सुसमाहियचरणवयणवावारो तुमं  
एज्जाहि, तेण भणियं-नाहमिहमागमिस्सामि कुणह जं भे रोयइ, इइ भणिकुण ठिओ सो बाहिं चेव, ते पविट्ठा  
भवणब्भंतरे, मुणिया य थेरीए, तओ सा पायवडणच्छलेण ते मुसंते मा पुत्ता! एवं करेहिन्ति भणंती मोरपि-  
च्छतेण चलणेसु लंछेइ ।

वसुदत्तो पुण चिंतइ पेच्छह अम्मापिकुण मूढत्तं । जं एवंविहदुस्सीलमज्झयारे खिवंतेहिं ॥ १ ॥

नो तेहिं चिंतियमिमं जह पावजणस्स संगइवसेण । जायइ गुणपरिहाणी पडंति विविहावयाओवि ॥ २ ॥

सयमवि पावपओयणपसाहणब्भुज्जओ इमो जीवो । किं पुण कुमित्तसंजोगसंभवंतासुहसहावो ॥ ३ ॥

तृतीयेऽणु-  
व्रते वसु-  
दत्तकथा.

॥ ३०२ ॥

ता परिचयमि एए वचामि समंदिरंमि एत्ताहे । दुन्नयपरनरजोगे मरणंपि दु आवडइ जेणं ॥ ४ ॥

अहवा गुरुवयणं लंघिऊण गेहंमि वचमाणंस्स । संपज्जइ दुव्विणओ तस्सा जं होइ तं होउ ॥ ५ ॥

इति परिभाषितस्स ते सयलं गेहसारं सुसिऊण नीहरिया मंदिराओ, गया उज्जाणे, विविहप्पयाणेहिं कीलि-  
उमारद्धा, वसुदत्तोऽपि गुरुवयणरज्जुसंदाणिओ अचंतविरागमुच्चहंतो तेसिमेव समीवे चिट्ठइ, एत्थंतरे संसुग्गयं मायं-  
डमंडलं, विहडियं तमकंडं, सा य थेरी पाहुडं गहाय गयां नरवइसमीवे, कहिओ सयलो जहावित्तो रयणिवइयरो,  
राइणा भणियं—अचंतगंभीरयाए नयरस्स को वा कहिं वा नज्जिही?, तीए भणियं—देव! ते मए सवेऽपि मऊर-  
पिच्छेण पाएसु अंकिया अच्छंतित्ति वुत्ते राइणा आणत्ता सवत्थ पुरिसा, सुनिऊणं गवेसंतेहि य तेहिं उज्जाणसं-  
ठिया दिट्ठा ते सवेऽपि, उवलक्खिया इंगियागारेहिं, उवणीया य नराहिवस्स, तेणावि वाहराविया थेरी, तीएवि वसु-  
दत्तं विमोत्तूण अत्रे परिकहिया चोरत्तणेणंति, रत्ता भणियं—कहमेसो चोरमंडलीमज्झगओऽपि न चोरो, थेरी भणइ—  
न चलणेसु लंछिओत्ति, राइणा भणियं—जइ अदुट्ठो ता मुयह एयं, वसुदत्तो भणइ—देव! कहमहं दुट्ठसंसग्गीएवि  
न दुट्ठो जं ममावि न कुणह निग्गहं, रत्ता कहियं—भइ! जइ एयंपि जाणसि ता कीस दुट्ठसंसग्गि मूलाओ चिय  
न उज्जेसि?, तेण भणियं—देव! दिव्वं पुच्छह, एत्थंतरे मुणियजहावट्ठियतवइयरेण भणियमेगेण पुरिसेण—देव!  
एस पवज्जं पडिवज्जिउकामो भावपरावत्तिनिमित्तं अम्मापियरेहिं सिणेहाणुबंधकायरेहिं संपयं चेव दुल्ललियगोट्ठीए

श्रीगुणचंद  
महावीरच०  
८ प्रस्तावः

॥ ३०३ ॥

पक्खित्तो, ता तदणुरोहो चेव एयस्स अवरज्झइ, एवं निसामिऊण नराहिवेण तंवोलाइदाणेण सम्माणिऊण पेसिओ सगिहं, इयरे पुण दुक्खमारेण मारियत्ति ।

इओ य मुणिसमुचियविहारेण भवियपडिवोहमायरंता अप्पडिवद्धावि जिणाणाए पडिवद्धा दुरणुचरतवचरण-पज्जालियकम्मवणावि सव्वसत्तसुहकारया समोसठा विजयसिंहाभिहाणा सूरिणो, जाया य तियचउक्कचचरेसु हरि-सभरनिब्भरस्स जणस्स अवरोप्परमुल्लावा अहो ! अहो ! अगाहभवोहनिवडंतजन्तुगणजाणवत्ता सिवसुहपसाहणासत्ता भयवंतो सुग्गहियनामधेज्जा सूरिणो इह समोसरिया, तहाविहाणं नामसवणमेत्तंपि पावपञ्चारपणासणसमत्थं, किं पुण वंदणनमंसणं?, अओ गच्छामो देवाणुप्पिया ! तेसिं वंदणत्थं, एवं च सोच्चा गंतुं पयत्ता सूरिसमीवे नायरया । सो य वसुदत्तो राइणा पेसिओ समाणो गओ निययगेहे, कहिओ जणणिजणगाण पुव्वइयरो जहा तुम्ह कूडवच्छलेण अहं अज्ज अकयधम्मो चेव विणासिओ होंतो, ता कीस सिणेहवच्छलेण अणत्थपत्थारीए संखिवह जं न सुयह धम्मकरणायत्ति वुत्ते अणुन्नाओ सो जणणिजणगेहिं, गओ सूरिणो पासे, गहिया पवज्जा, तओ एगं-तधम्मकम्मुज्जओ जाओत्ति ।

इय इंदभूइ गोयम ! विमुक्कचोरिकपावठाणाणं । मणुयाण उभयलोगेऽवि जीवियं जायए सफलं ॥ १ ॥ इइ तइयमणुवयं । कहियं तइयमणुवयमेत्तो मेहुणनिवित्तिनिष्फण्णं । भण्णइ चउत्थमणुवयमवहियचित्तो निसामेसु ॥ १ ॥

वृत्तीयेऽणु-  
व्रते वसु-  
दत्तकथा.

॥ ३०३ ॥

तं मेदुन्नं दुविहं सुदुमं धूलं च तत्थ सुदुममिमं । कामोदएण ईसिं जर्मिदियाणं विगारोत्ति ॥ २ ॥  
 धूलं पुण संभोगो मणाइचेट्ठा व भोगकामस्स । तं पुण दुविहं नेयं ओरालविउवभेएणं ॥ ३ ॥  
 ओरालियं तु दुविहं माणुसतेरिच्छमेयओ होइ । वेउवं पुण दिवं माणुसयंपि य वयं तिविहं ॥ ४ ॥  
 परदारवज्जणं या सदारतोसो य वंभचेरं वा । तत्थ य दिव्वतिरिक्खं मेदुन्नं पारदारं च ॥ ५ ॥  
 जो परिहरइ सुसट्ठो निगलचित्तो सुधम्मपडिवट्ठो । सो तविरओ एसो निरईयारट्ठया सम्मं ॥ ६ ॥  
 वज्जेइ इत्तरियपरिग्गहियागमणं अणंगकीडं च । परवीवाहकरणं कामे तिवाभिलासं च ॥ ७ ॥  
 किंच-अमुइभूएसुं निंदिएसु पज्जंतदुहविवागेसु । कामेसु केऽवि धन्ना निसग्गओ धिय विरज्जंति ॥ ८ ॥  
 जत्ते पुण उग्गमयणवाणनिब्भिज्जमाणसवंगा । अगणियजुत्ताजुत्ता अविभावियनियतणुविणासा ॥ ९ ॥  
 पररमणीसु परिभोगलालसा सुफलज्जमज्जाया । तज्जम्मे धिय पावंति आवयं किं पुणऽन्नभवे ? ॥ १० ॥ जुम्मं ।  
 जपरे य तहाविहगुरूवएसओ जायनिम्मलविवेया । परजुवईणं संगं विवज्जमाणा पयत्तेण ॥ ११ ॥  
 तविरइमेत्तउधिय वहुंतविसुद्धधम्मपडिवंधा । होंति सिवनयरनिलया सुरिंददत्तोच्च नरवसहा ॥ १२ ॥ जुम्मं ।  
 गोयमेण जंपियं-तइलोकदिवायर । को एस सुरिंददत्तो ? कहं वा एयस्स गुरूवएसओ विवेयलाभो ? कहं च पर-  
 दारविरइमेत्तेणवि से निघाणसंपत्तित्ति ? जयगुरुणा वागरियं-निसामेसु । इहेव भारहे वासे नीसेसवसुधराभोगभूसणं

श्रीगुणचंद  
महावीरच०  
८ प्रस्तावः

॥ ३०४ ॥

रणंतमणिकिंकिणीमणहरवेजयंतीविराइयसुरमंदिरसमुत्तुंगसिंगं सिंगारुम्भडरुवरामागणोवसोहियं विजयपुरं नाम  
नयरं, तहिं च समग्गनरिंदवग्गपणयसासणो सिवभदो नाम नराहिवो, सयलंतेउरप्पवरा रायसिरी नाम से भारिया,  
तेसिं च देवकुमारोवमरुवो धणुवेयपमुहकलाकोसल्लपडिहत्थो सुरिंददत्तो नाम पुत्तो, सो य पुवभववालगिलाण-  
गुरुथेरतवसुसियमुणिजणवेयावचावज्जियपुत्तपम्भारवसविठत्तगाढसोहग्गोदएण पढमुम्मिलंतजोवणगुणत्तणेण य अचं-  
ताभिरामसरीरो जत्थ जत्थ परिब्भमइ तत्थ तत्थ परिचत्तवावारंतराहिं अवगणियगुरुजणलज्जाहिं अणवेक्खियकु-  
लाभिमाणाहिं नयरनारीहिं अणमिसच्छीहिं पिच्छिज्जइ, वाढमम्भत्थिज्जमाणो य सेट्ठिसत्थवाहप्पहाणजणजुवईहिं  
सद्धिं सद्धम्मपरम्मुहो अभिरमइ य, लोगोवि एयमत्थं जाणमाणोऽवि जे चेव रक्खगा तेऽवि लुंपगत्ति चिं-  
तंतो न किंपि जंपइ ।

अन्नया य नयरंमि जाओ अचंतचोरोवद्दवो, तओ पउरजणेण साहियं नरिंदस्स, तेणावि तज्जिओ आरक्खिगो,  
कया य सवप्पएसेसु जामरक्खगपरिखेवा, रयणीए सुत्तपमत्तारक्खिगनिरिक्खणत्थं कयवेसपरावत्तो पाणिपरिग्ग-  
हियखग्गो एगागी सयमेव निग्गओ गेहाओ तियचउक्कचचराइसु परिब्भमिउमारद्धो य, तहा भमंतस्स य रण्णो  
विजणंति पढियमेगेण थेरपुरिसेणं—

चोरोहिं गेहसारो, हीरइ कुमरेण नयरतरुणिजणो । एवंविहरक्खाए नरिंद सिवभद ! भदं ते ॥ १ ॥

चतुर्थाणु-  
व्रते सुरेन्द्र-  
दत्तकथा.

॥ ३०४ ॥

पट्टिष्ठिओ य राया सोचेमं से गओ समीवंमि । अच्चंतविम्हियमणो सणियं भणितं पवत्तो य ॥ २ ॥

भो कहसु पढियगाहापरमत्थं तेण जंपियं सुहय ! । रायविरुद्धकहाए तीए किं मज्झ कहियाए ? ॥ ३ ॥

रत्ना बुत्तं सच्चं एवमिमं किं तु एत्थ एगंते । साहिज्जंतीएवि हु न कोऽवि दोसो अओ कहसु ॥ ४ ॥

तो तेण समग्गो नयरतरुणिविसओ कुमारबुत्तंतो । चोरोवद्वसहिओ कहिओ सिवभद्दनरवइणो ॥ ५ ॥

अह तं निसामिऊणं पलयानलभीमकोवरत्तच्छो । आवद्धुब्भडमिउडी राया एवं विचित्तेइ ॥ ६ ॥

अहह ! महंतमकज्जं पावेण सुएण मज्झ आयरियं । हरिणंकनिम्मलंपि हु कुलमेवं मइलियं जेण ॥ ७ ॥

ता किं अहुणच्चिय कंधराए धरिऊण तं महापावं । निद्धाडेमि पुराओ ? किं दुच्चयणेहिं तज्जेमि ? ॥ ८ ॥

अहवा मंतीहिं समं सम्मं वीमंसिऊण तस्सुच्चियं । पकरेमि जेण सहसा कयाइं दूमेंति कजाइं ॥ ९ ॥

इय चित्तिऊण राया गओ निघयभवणं, पसुत्तो सुहसेज्जाए, जाए य पभायसमए वाहराविया मंतिणो, सिद्धो य तेसिं रयणिवुत्तंतो, मंतीहिं भणियं-देव ! अम्हेहिं पुवंपि कुसमायारवत्ता निसामिया आसि, परं न कोऽवि सो अवसरो जाओ जत्थ तुम्ह कहिज्जइ, रत्ना जंपियं-होउ ताव समइकंतत्थविकत्थणेण, संपयं साहेह, किमेयस्स दंडं निवत्तेमो ? , मंतीहिं वागरियं-देव ! अलं दंडेण, एत्तियमेत्तमेव जुत्तं तुम्ह काउं जमेसो निज्जइ सुसाहुसमीवे, सुणाविज्जइ धम्मसत्थाइं, पढाविज्जइ रायनीई, उव्वेसाविज्जए विसिद्धगोटीसु, एवमवि होही एयस्स कुसमायार-



श्रीगुणचंद  
महावीरच०  
८ प्रस्तावः

॥ ३०५ ॥

परिचायपरिणामो, पडिवन्नं रत्ना, वाहराविओ कुमारो, तेण य समेओ गओ धम्मसेणसूरिणो समीवे, तं च  
वंदिऊण निसन्नो उचियट्ठाणंभि, सूरिणाऽवि पारद्धा धम्मकहा ॥ कहं?—

भो भो देवाणुपिया! जइ वंछह सिवसुहाइं उवलद्धुं । ता मोत्तूण पमायं जिणिंदधम्मंमि उज्जमह ॥ १ ॥

तं नो कुणंति अहिमरविसहरहरिणारिवेरिवायाला । अच्चंतं कुवियाविहु जमिह पमाओ महापावो ॥ २ ॥

सो पुण पंचवियप्पो नेयवो निवुईपरिहरूवो । मइरा-कसाय-निहा-विगहा-विसयाण गहणेण ॥ ३ ॥

मइरापाणपरवसमणपसरो जुत्तमियरममुणंतो । तं नत्थि नूण पावं जं जीवो नो समायरइ ॥ ४ ॥

एत्तो चिय सुरकयकणयपवरपागारगोउरावि पुरी । बारवई जायवसंकुलावि मच्चुंमुहं पत्ता ॥ ५ ॥

पज्जंतकयविसाया महापिसाया व दिन्नअववाया । जणियदुरज्जवसाया न होंति सुहया कसायावि ॥ ६ ॥

एएहिं निहयमइणो जं जीवा चरियदुकरतवावि । करडुकुरुडुव सत्तमनरयपुढवीए निवडंति ॥ ७ ॥

निहापमत्तचित्तावि पाणिणो पाउणंति न कयावि । सुयनाणधणं पत्तंपि कहिंवि हारिंति धीरहिया ॥ ८ ॥

तेणं चिय चउदसपुविणोऽवि निन्नट्ठपवरसुयरयणा । मरिउं कालमणंतं अणंतकाएसुवि वसंति ॥ ९ ॥

मोत्तूण निययकिच्चं भोयणदेसित्थिरायसंवद्धा । कीरंति जेहिं विकहा कह नो ते दुक्खिया होंति? ॥ १० ॥

कहवा न वालिसेणवि अच्चग्गलजंपिरत्ति गहिलत्ति । कित्तिजंती? मणुयत्तणेऽवि को वा गुणो तेसिं? ॥ ११ ॥

चतुर्थाणु-  
व्रते सुरेन्द्र-  
दत्तकथा.

॥ ३०५ ॥

सेविज्जंता जमणिट्टकारिणो ते धुवं किमञ्छरियं । सुमरणमेत्तेणंपिवि दित्ति दुरंतं भवं विसया ॥ १२ ॥  
 विसयाण कए पुरिसा सुदुक्करंपिवि कुणंति ववसायं । आरोवेति य संसयतुलाए नियजीवियघंपि ॥ १३ ॥  
 चिरकालपालियंपि दु कुलमजायं चयंति तवसगा । सवत्थ वित्थरंतं अवजसपंसुंपि न गणंति ॥ १४ ॥  
 वंचंति सयणवग्गं तणं व मन्नंति निययजणगंपि । धम्मोवएसदायगमवहीरंती गुरुजणंपि ॥ १५ ॥  
 पहसंति विरागिजणं विसिद्धगोष्ठिं चयंति दूरेण । वंचंति नेव सोउं सणंकुमाराइचरियाइं ॥ १६ ॥  
 इय ते विसयमहाविसवामूढमणा मणागमेत्तंपि । नेघुइमपावमाणा पावेसु वहुं पसज्जंति ॥ १७ ॥  
 माहिरवित्तीए तहाविहेसु धम्मेसु संपवत्तावि । पंचग्गिपमुहदुक्करतवसंतावियसरीरावि ॥ १८ ॥  
 कम्मवसेणं अप्पुण्णविसयवंछा विणस्सिउं पावा । निवडंति दुग्गईए भागवयसुहंकरमुणिघ ॥ १९ ॥  
 इय पंचविहपमायं एवंविहदोसदूसियं नाउं । नरनाह ! तदेगमणो जिणिंदधम्मंमि उज्जमसु ॥ २० ॥  
 एवं सूरिणा उवइट्ठे पमायप्पवंचे सुरिंददत्तकुमारो जायनिम्मलचित्तपरिणामो भणिउं पवत्तो-भयवं ! को एसो  
 पुवकहियमुहंकरमुणी ? कहं वा अपुण्णविसयवंछो सो मरिउं दुग्गई गओत्ति साहेह ममं, सूरिणा भणियं-साहेमि ॥  
 मालयविसए विक्खायजसा चकपुरी नाम नयरी, तर्हि च अणेगवणियजणचक्खुभूंओ पभूयदवसंभारो सोम-  
 दत्तो नाम सेट्ठी, तस्स सत्तण्हं पुत्ताणं कणिट्ठिया अणेगोवजाइयसयसंपसूया देवसिरी नाम धूया, सा य अच्चंत-

श्रीगुणचंद  
महावीरच०  
८ प्रस्तावः

॥ ३०६ ॥

रूपा संपत्तजोवणावि तहाविहवराभावेण कालं वोलेइ, इओ य तीए नयरीए अदूरे उच्छलंतमहलंकलोलविदलिय-  
कूलाए अणेगविहगकुलकलयलाउलदियंतराए जमुणामहानईए उत्तरपुरत्थिमदिसिविभागे वेयपुराणभारहरामा-  
यणवक्खाणनाणविन्नाणनिउणो नियदरिसणत्थवित्थारणपवणो सवत्थ विक्खायजसो नीसेसभागवयमुणिपहाणो  
सुहं करो नाम लोइयतवस्सी परिवसइ, सो य तवेण य वयणसोहग्गेण भविस्सजाणणेण य जणसम्मयत्तेण य सयलस्सवि  
नयरजणस्स वाढं पूयणिज्जो, अन्नया य तेण सोमदत्तसेट्ठिणा गुणगणावज्जियहियएण निमंतिओ सो भोयणक-  
रणत्थं नियमंदिरे, गाढतवयणाणुरोहेण य कइवयसिस्सपरियरिओ संपत्तो भोयणसमयंमि, सपरियणेण परमभत्तीए  
नमंसिओ सोमदत्तेण, सम्मज्जिओवलित्तंमि भवणभागंमि दवावियं से आसणं, तहिं च निसन्नो एसो, सेट्ठिसुएहिं  
कयं परमायरेण चलणपक्खालणं, अणेगकलहोयमयकचोलसिप्पिसंकुलं च पइट्ठियं पुरओ परिमलं, सेट्ठी य सयमेव  
निब्भरभत्तिभरतरलियचित्तो नाणाविहवंजणसणाहं पउरखंडखज्जयाइमणहरं रसवइं परिवेसिउं पवत्तो, सावि सेट्ठि-  
धूया देवसिरी रणंतमणिनेउरारावमुहलियदिसावगासा हारद्धहारकुंडलकडयअंगयरसणापमुहाभरणभूसियसरीरा नि-  
यंसियपवरपट्टणुग्गयदिवचीणंसुया कणयदंडतालविंटमादाय तस्स भोयणं कुणंतस्स वीजणत्थमुवट्ठिया, एत्थंतरे  
साहिलासं तं पलोइऊण सुहंकरतवस्सी तक्कालवियंभमाणमयणहुयवहपलित्तहियओ विभाविउमारद्धो । कहं ?—

सुसहा पन्नगपम्मुक्कफारफोकारजलणजालोली । उब्भडकोदंडविक्खित्ततिक्खनारायराईवि ॥ १ ॥

तुर्येऽणुव्रते  
सुरेन्द्रद-  
त्ताख्यानं  
शुभंकरवृत्तं.

॥ ३०६ ॥

न उण इमीए एए कुवलंयदलदीहरन्चिचिञ्जोहा । सोढुं संका निक्खिमयरद्धंभावसंवलिआ ॥ २ ॥

रइरंभाहरिदइयातिलोत्तमापमुहदिघनारीओ । मत्ते इमीए रूवेण लज्जियाओ न दीसंति ॥ ३ ॥

चिन्नाणं ज्ञाणं सत्थकोसलं देवयाणं पूया य । विहलं सबंधि इमं जइ एयमहं न पावेमि ॥ ४ ॥

केवलमुवायओ संगमेऽवि एयाए कहवि दिघवसा । सवत्थं वित्थरंतो अन्नवाओ दुसंरोहो ॥ ५ ॥

अहवा किमणेण ?-हरिहरहिरण्णगन्धा वसिट्ठजमदग्गिवा(चा)सदुवासा ।

हरिणच्छिवयणनिहेसकारिणो जइ पुरा जाया ॥ ६ ॥

ता किं अम्हारिसमुणिजणस्स सुट्ठवि विसिट्ठधम्मस्स । लज्जा वयणिज्जं वा ? ता पज्जतं विगप्पेहिं ॥ ७ ॥ जुम्मं ।

तह कहवि करेमि जहा इमीए सद्धिं समागमो होइ । इय निच्छिऊण गंभीरभावमब्भुवगंओ एसो ॥ ८ ॥

आगारसंवरं च काऊण जहापउत्तनाएण भोत्तुं पवत्तो, अह तकालवियंभियंमयणंगुरूवएसवसओ इय जाया से  
बुद्धी, जहा विप्पयारेमि एयं सेट्ठिं, जेण वयणिज्जविरहिओ एयाए लांभो हवइत्ति, एवं संपेहिऊण सेट्ठिणो पलोय-  
माणस्स दुस्सहदुक्खावेगसंसूयगो विमुक्को अणेण सिक्कारो, संसंभमेण निरूविओ सेट्ठिणा, खणंतरंमि य गए पुणोऽपि  
पुचक्कमेण पयडियलोमुद्धोसनिम्भरे सवयणभंगभासुरे दोचं तचं च विमुक्कंमि सिक्कारे अहो किंपि अचंतमणिट्ठमावडि-  
हिति विभाषितो जाव सेट्ठी अच्छइ ताव सो मुहसुद्धिं काऊण समुट्ठिओ भोयणमंडवाओ, उवविट्ठो अन्नत्थं, सेट्ठीवि-

श्रीगुणचंद  
महावीरच०  
८ प्रस्तावः

॥ ३०६ ॥

रुवा संपत्तजोवणावि तहाविहवराभावेण कालं वोलेइ, इओ य तीए नयरीए अदूरे उच्छलंतमहल्लकल्लोलविदलिय-  
कूलाए अणेगविहगकुलकलयलाउलदियंतराए जमुणामहानईए उत्तरपुरत्थिमदिसिविभागे वेयपुराणभारहरामा-  
यणवक्खाणनाणविन्नाणनिउणो नियदरिसणत्थवित्थारणपवणो सवत्थ विक्खायजसो नीसेसभागवयमुणिपहाणो  
सुहंकरो नाम लोइयतवस्सी परिवसइ, सो य तवेण य वयणसोहग्गेण भविस्सजाणणेण य जणसम्मयत्तेण य सयलस्सवि  
नयरजणस्स वाढं पूयणिज्जो, अन्नया य तेण सोमदत्तसेट्ठिणा गुणगणावज्जियहियएण निमंतिओ सो भोयणक-  
रणत्थं नियमंदिरे, गाढतवयणाणुरोहेण य कइवयसिस्सपरियरिओ संपत्तो भोयणसमयंमि, सपरियणेण परमभत्तीए  
नमंसिओ सोमदत्तेण, सम्मज्जिओवलित्तंमि भवणभागंमि दवावियं से आसणं, तहिं च निसन्नो एसो, सेट्ठिसुएहिं  
कयं परमायरेण चलणपक्खालणं, अणेगकलहोयमयकच्चोलसिप्पिसंकुलं च पइट्ठियं पुरओ परिमलं, सेट्ठी य सयमेव  
निब्भरभत्तिभरतरलियचित्तो नाणाविहवंजणसणाहं पउरखंडखज्जयाइमणहरं रसवइं परिवेसिउं पवत्तो, सावि सेट्ठि-  
धूया देवसिरी रणंतमणिनेउरारावमुहलियदिसावगासा हारद्धहारकुंडलकडयअंगयरसणापमुहाभरणभूसियसरीरा नि-  
यंसियपवरपट्टणुगयदिव्वचीणंसुया कणयदंडतालविंटमादाय तस्स भोयणं कुणंतस्स वीजणत्थमुवट्ठिया, एत्थंतरे  
साहिलासं तं पलोइऊण सुहंकरतवस्सी तक्कालवियंभमाणमयणहुयवहपलित्तहियओ विभाविउमारद्धो । कइं ?—  
सुसहा पन्नगपम्मुक्कफारफोंकारजलणजालोली । उब्भडकोदंडविविखत्ततिक्खनारायराईवि ॥ १ ॥

तुर्येऽणुव्रते  
सुरेन्द्रद-  
त्ताख्याने  
शुभंकरवृत्तं.

॥ ३०६ ॥

पडिओ से पाएसु, पणयगन्भपत्थणाहिं बहुप्पयारं तहा तहा भणिओ जहा जाओ सो अणुकूलचित्तो, तओ भणिय-  
मणेण-अहो सोमदत्त ! वाढमकहणिज्जमेयं, केवलं तुह असरिसपक्खवाएण विहुरियं मे हिययं, न एत्तो गोविउं पारेइ,  
अओ आयत्तेहि-भो महायस ! जा एसा तुह दुहिया सा थेवदिणमज्झंमि कुडुंक्खयमाणिस्सइत्ति लक्खणेहिं  
नाऊण मए भोयणे पारद्धे अकंडविणिवायतरलियचित्तेण तहाविहमणिद्वं गोविउमसहंतेण पुणो पुणो सिक्कारो  
कओ, ता भो महाणुभाव ! एयं तं कारणं, इमं च सेट्ठी निसुणिऊण वज्जासणिताडिओव मुच्छानिमीलियच्छो  
इव खणं ठाऊण कहवि समवलंवियधीरभावो भणिउमाढत्तो—

भयवं ! एत्तियमेत्तं जह तुमए जाणियं सुबुद्धीए । तह उत्तरंपि किंची जाणिहिसि अओ तयं कहसु ॥ १ ॥  
जं पयडमिमं लोगे जो विज्जो मुणइ रोगिणो रोगं । सो तदुचियमोसहमवि ता भंते ! कुणसु कारुण्यं ॥ २ ॥  
तुम्हाणणुग्गहेणं जइ देवगुरुण पूयणं कुणिमो । अम्हे अहीणमणा ता किमजुत्तं हवेज्ज इह ? ॥ ३ ॥  
निरुयमधम्माधाराण तुम्ह नोवेक्खणं खमं जेण । परहियकरणेक्कपरा चयंति नियजीवियद्वंपि ॥ ४ ॥  
तम्हा उज्झसु संखोभमणुचियं कहह जमिह कायद्वं । पुवमुणिणोऽवि जेणं परोवयारं करिंसु सया ॥ ५ ॥  
एयं सेट्ठिणा कहिए ईसिमउलियनयणेणं जंपियं तेण-भो सोमदत्त ! सुनिचलं जंतिउम्हि तुह दक्खिण-  
रज्जए, एत्तोचिय महाणुभावा गिहिसंगं मोत्तूण विजणवणविहारमब्भुवगया पुवमुणिणो, सेट्ठिणा भणियं-अच्छउ

श्रीगुणचंद  
महावीरच०  
८ प्रस्तावः

॥ ३०८ ॥

ताव तेसिं संकहा, संपइ कालोचियं कहसु, तओ सुचिरं कइयवेण सिरं धुणिऊण भणियं तेण-सेट्टि! जइ अव-  
स्समेयस्स दोसस्स पडिविहाणं काउमिच्छसि ता निघिवरविसिद्धसुसिलिद्धकट्टवडणाए मंजूसाए अविभतरंमि एयं  
नियधूयं पक्खिविऊण सयलभूसणसणाहं सुमुहुत्तंमि दिसिदेवयापूयापुरस्सरं जमुणानईजलंमि पवाहिज्जासि, जेण  
सेसगेहजणस्स जियरक्खा भवइत्ति, तओ गुरुवयणं न अन्नहा जायइत्ति कलिऊण भयभीएण अविमंसिऊण  
तदभिप्पायं कालक्खेवपरिहीणं जहुत्तसमग्गसामग्गिपुरस्सरं नियधूयमब्भंतरे पक्खिवित्ता सुहंकरमुणिणो समक्खं  
दुस्सहवच्चविओगसोगसंभाररुद्धकंठेण अणवरयगलंतनयणवाहप्पवाहपक्खालियगंडयलेण पवाहिया सेट्टिणा जमु-  
णाजले मंजूसा, सा य तरमाणा अणुसोएण गंतुमारद्धा, तेणावि सुहंकरेण आणंदसंदोहसुवहंतेण निययासमंमि  
गंतूण भणिया नियसिस्सा-अरे तुम्हे सिग्घवेगेण गंतूण कोसमेत्तंमि नइहेट्टभागंमि ठायह, तरमाणिं च मंजूसं  
इंतिं जया पासह तया तं गिण्हिऊण अणुग्घाडियदुवारं मम पणामेज्जहत्ति सोचा गया ते, ठिया य जहुत्तठाणंमि,  
सा य मंजूसा कलोलपणोल्लिज्जमाणी जाव गया अद्धकोसमेगं ताव नइजले मज्जणलीलं कुणमाणेण एगेण रायपुत्तेण  
दूराओ चिय पलोइया, भणिया य नियपुरिसा-अरे धावह सिग्घवेगेण, गिण्हह एयं वारिपूरेण हीरमाणं पयत्थंति,  
पविट्ठा य वेगेण पुरिसा, गहिया अणेहिं मंजूसा, समप्पिया य रायपुत्तस्स, तेणावि उग्घाडिया सकोउहलेण, पाया-  
लकन्नगव सवालंकारमणहरसरीरा नीहरिया तत्तो सा जुवई, गहिया य सहरिसेण रायपुत्तेण, चित्तियं चाणेण-अहो!

तुर्याणुवते  
सुरेन्द्रदत्त-  
कथायां  
शुभंकरा-  
ख्यानं.

॥ ३०८ ॥

अणुकूला मंह कम्मपरिणई, केवलं एवंविहं रमणिरयं एवं उज्झमाणे केणविं नूणमपणो असि वयसमणं संभा-  
वियं भविस्सइ, ता न जुत्ता रिता चेव मंजूसा पवाहिउंति परिभाविऊणं सन्निहियवणदुद्धमकडं तदभंतरे निक्खि-  
विऊण निविडं दुवारं च से वंधिऊण भगवइ जमुणे मा मे कुप्पेज्जसित्ति भणिऊण पुवनाएण पवाहिया एसा,  
पायियसुरलोयसिरिसमुदयं व अप्पाणं मन्नंतो तं कुवलयदलंदीहरच्छिं घेत्तूण गओ जहागयं, सावि मंजूसा जलेण  
वुज्झमाणी गया कोसमेत्तं, दिट्ठा य सुहंकरसीसेहिं, तओ नियगुरुणो विन्नाणाइसयं वन्नमाणेहिं नईमज्झे पवि-  
सिऊण आयट्ठिया मंजूसा, उवणीया य गुरुणो; तेणावि असंभावणिज्जमाणंदसंदोहमुवहंतेण संगोविधा गेहमज्झे,  
भणिया य नियसिस्सा—अरे अज्ज अहं देवयापूयं महया वित्थरेण भवणभंतरे ठिओ सवरयणिं करिस्सामि, ता  
तुम्मेहिं वाढं निविजणं कायवं, पडिवन्नं तेहिं, अह समागयंमि रयणिसमए मयरद्धयनिद्वयसरसहस्सपहारजंजरिय-  
सरीरो पवरविलेवणकुसुमतं वोलप्पमुहोवगरणपरियरिओ विहिऊण सवलगेहदुवाराइं तं मंजूसमुग्घाडित्ता एवं जं-  
पिउं पवत्तो—

हे हरिणच्छि ! कियोअरि ! पीणत्थणि ! कमलवयणि ! वरतरुणिं ! । पम्मुकभयासंकं संपथ मं भयसु दइयं वं ॥ १ ॥  
वचउ विगासमहुणा लोयणकमलं मणोरहेहिं समं । सुयणुं ! तुह संगमेणं मयणोऽवि मणागमुवसमउ ॥ २ ॥  
एत्थंतरंमि गाढावरोहसंजायतिववरकोवा । तण्हालुहाकिलंता अच्चंतं चावलोवेया ॥ ३ ॥



श्रीगुणचंद  
महावीरच०  
८ प्रस्तावः  
॥ ३०९ ॥

वणदुद्धमकडी तडतंडत्ति पुच्छच्छडाहिं ताडंती । तत्तो विडंविद्यमुही नीहरिया घुरुदुरंती सा ॥ ४ ॥ जुम्मं ।  
आ कीस चंदवयणे ! करेसि रोसंति वाहरंतो सो । चुंवणवंडाए मुहं तदभिमुहं जाव संठवइ ॥ ५ ॥  
पढमं चिय ताव तडत्ति तोडिओ तिक्खदसणकोडीहिं । तीए नासावंसो मूलाओ चिय समग्गो सो ॥ ६ ॥  
तयणंतरं च अइतिक्खनक्खनिवहेण दारियं अंगं । आमूलाओ उम्मूलियावि सवणावि से ताए ॥ ७ ॥  
अणिवारियपसराए एवं तीए हणिज्जमाणेण । तेण भयकंपिरेणं वाहरियं गुरुसरेणेवं ॥ ८ ॥  
रे रे धावह सिस्सा ! उग्घाडह मंदिरस्स दाराइं । एस पिसाईए अहं निज्जामि जमस्स गेहम्मि ॥ ९ ॥  
इय एवं वाहरंतो भयवससंखुद्धमाणसो धणियं । तायारमलभमाणो नहदंसणुलिहियसवंगो ॥ १० ॥  
रोसुकडाए वणमकडीए पुणरुत्तघुरुदुरंतीए । तह विणिहओ वरागो जह सो पंचत्तमणुपत्तो ॥ ११ ॥  
अह उग्गयंमि दिणयरे समागया तस्स सीसा, कया तेहिं सद्दा, न देइ सो य पडिवयणं, तओ विहाडियाइं  
कवाडाइं, दिट्ठो विणट्ठजीओ सुहंकरो, सावि वणमकडी उग्घाडिएसु कवाडेसु पलाइऊण गया जहागयं, सीसेहि-  
वि असुणियपरमत्थेहिं कओ सुहंकरस्स सरीरसकारो ।

इय भो कुमार ! विसयाउराण अप्पुन्नवंछियट्ठाणं । निवडंति आवयाओ पयडंचिय जेण भणियमिमं ॥ १ ॥  
सल्लं कामा विसं कामा, कामा आसीविसोवमा । कामे पत्थेमाणा, अकामा जंति दुग्गइं ॥ २ ॥

तुर्याणुव्रते  
सुरेन्द्रदत्त-  
कथायां  
शुभंकरा-  
ख्यानं.

॥ ३०९ ॥

एतो चिय जुवईणं सवियारपलोयणंपि वज्जेति । मुणिणो महाणुभावा निवसंति य सुन्नरत्नेसु ॥ ३ ॥

एवं सोच्चा सुरिंददत्तकुमारो जायगाढविसयविरागो भावसारं सूरिणो निवडिऊण चलणेसुं भणिउं पवत्तो-भयवं !  
विरत्तगियारिं विसयपडिवंधाओ मह मणं, ता देह सवविरइं उत्तारेह भवन्नवाओ मोयावेह पुवदुच्चरियसत्तुनि-  
यहाओत्ति, सूरिणा जंपियं-भो महायस ! अज्जवि भोगफलकम्मसवभावओ नत्थि तुह पवज्जाजोग्गया, ता गिह-  
त्पधम्मेणापि केत्तियंपि कालमत्तणो तुलणं कुणसु, नरिंदेण भणियं-वच्छ ! समए चिय किरंतं सवं सुहावहं होइ,  
न य गिहवासेवि दंतिंदियाणं पयणुकामकोहलोहाणं सवन्नसाहुपूयापरायणाण विसिद्धणयपरिपालणपराण पुरिसाण  
न धम्मो होइ, ता पुत्त ! पत्तथेरत्तो पवज्जं गिण्हज्जासि, संपयं तु कयसदारपरितोसो परिचत्तकुमित्तसंगो अणवर-  
यधम्मसत्तयसवणतल्लिच्छो अणवच्छिन्नसप्पुरिसाचरियनयाणुसरणपरिणामो गिहे चिय निवससुत्ति, दक्खिन्नसील-  
याए पडियन्नं कुमारेण, नियदारपरिभोगं च मोत्तुण गहियं परित्थीपच्चक्खाणं, अन्ने य जिणवंदणपूयणगिलाण-  
पडिजागरणोसहदाणपमुहा वहवे अभिग्गहविसेसा, पडिपुन्नमणोरहो य राया कुमारेण सहिओ वंदिऊण सूरिं गओ  
जहागयं, अवरवासरे य एगेण केलीकीलेण भणिओ कुमारो-भो मित्त ! सुंदरं कयं तुमए जं सयं चिय मुक्को पर-  
दारपरिभोगो, अन्नहा दुच्चरियनिसामणुप्पन्नकोवेण राइणा एत्तियदिणाणि दूरदेसंतरातिही तुमं कओ हुंतो,  
कुमारेण कहियं-अरे किं सचमेयं, परिहासो वा ?, तेण भणियं-सच्चं, कुमारेण जंपियं-जइ एवं ता जहट्टियं

श्रीगुणचंद  
महावीरच०  
८ प्रस्तावः

॥ ३१० ॥

मूलाओ साहेसु, तओ तेण सिद्धो नरिंदमंतिजणणुणुणुल्लाववुत्तंतो, तं च सोचा समुप्पन्नलज्जो कुमारो परिचिंतिउं पवत्तो-अहो अचंतमजुत्तमायरियं मए, जं तहाविहं कुलकमविरुद्धं कुणंतेण न गणिओ लोयप्पवाओ न वीमंसिओ धम्मविरोहो न य परिभावियं तायस्स लहुयत्तणं, एवं च ठिए कंहं विसिद्धपुरिसाण निययवयणं दंसितो न लज्जामि, तम्हा न जुज्जइ इह निवसिउंति चिंतिऊण मज्झरत्तसमयंमि निम्भरपसुत्ते परियणे तोणीरं धणुदंडं च घेत्तूण पुव-देसाभिमुहं गंतुं पयट्ठो ।

इओ य-गयणवल्लहनयरे विज्जाहररत्ता महावेगनामेण पुट्ठो नाणसाराभिहाणो नेमिस्सिओ, जहा एयाए मह धूयाए वसंतसेणाए को पई होहिट्ति?, तेण? कहियं-जो सावत्थीनयरीनाहं कुसुमसेहरनरिंदं निय-भुयवलेण एगागी हयपरक्कमं काहिट्ति, एवं सोचा विज्जाहरेण भणिया खेमंकराइणो विज्जाहरा-अरे गच्छह तुब्भे सावत्थि नयरिं, तहिं च ठिया जया एवंविहपरक्कमं पुरिसं पेच्छह तया तं झत्ति घेत्तूण मम समप्पेह, जं देवो आणवेइत्ति सिरसा पडिच्छिऊण से सासणं गया ते तं पुरिं, सुरिंददत्तकुमारोऽवि एगागी नाणाविहदेसेसु परिभ-मंतो पत्तो तामेव नयरिं, ठिओ य नयरीसमीववत्तिणो उज्जाणस्स एगंमि लयाहरे, तहिं च जाव पसुत्तो अच्छइ ताव कयवयचेडीपरिवुडा कुसुमसेहरायसु या इओ तओ कीलंती कहवि कम्मविचित्तयाए एगागिणी पविट्ठा तमेव लयाहरं, दिट्ठो अप्पडिमरूवो पसुत्तो कुमारो, सा य तीए समुप्पन्नतिवाणुरागाए पडिवोहिऊण पारद्धो अणु-

तुर्याणुव्रते  
सुरेन्द्र-  
दत्तकथा.

॥ ३१० ॥

कूलवयणेहिं उवसगिउं, नियमविग्घकारिणिंति कलिऊणं निम्भत्थिया सा कुमारेण, कहं ?—

पाविट्ठि दुट्ठसीले ! निक्कारणधम्मवेरिणि ! तुमं मे । अवंसरं चक्खुपहाओ पज्जतं दंसणेण तुहं ॥ १ ॥

तुम्हारिसीण संभासणेऽवि असणिघं दारुणा पडइ । इहपरभवपडिकूला अचत्थमेणत्थपत्थारी ॥ २ ॥

इय एवमाइवयणेहिं तज्जिया सा न जाव नीहरइ । ताव करे घेत्तुणं कुमारेण दढेण निच्छूढा ॥ ३ ॥

आ पाव ! पावसि तुमं एत्तो पंचत्तमिति य जंपित्ता । कवडेण सयंचियं नहंसिहाहिं उल्लिहियकायलया ॥ ४ ॥

सा दूरे ठाऊणं हलवोलं काउमेवमारद्धा । रे रे लयाहरणं गेण्हह पुरिसाहमं एयं ॥ ५ ॥

कुलजुवइदूसिया जेण मज्झ एवंविहा कयावत्था । तमुवेहंता संपइ दंसिस्सह कहं मुहं रत्तो ? ॥ ६ ॥

एयं सोचा नरवइसुयाय वयणं परूढकोवेहिं । आरक्खियमुहडेहिं लयाहरं वेढियं झत्ति ॥ ७ ॥

कुमरोऽवि तीए हियं व निदुरं पाणिणो धणुं घेत्तुं । तत्तो विणिक्खमित्ता तेसिं ठिओ चक्खुपसरंमि ॥ ८ ॥

ताहे तेहिं समगं पम्मुक्का चक्खेससरनियरा । छेयत्तणेण वंचाविया य सयला कुमारेण ॥ ९ ॥

तप्पहरणेहिं य लहुं निहया गोमाउयव ते तेण । अहं निसुणियवुत्तंतो रायावि समागओ तत्थ ॥ १० ॥

अचंतजायकोवो जुज्झेणोवट्ठिओ सयं चेव । करितुरयरहारूढा वियंभिया मुहडसत्थावि ॥ ११ ॥

तो चउदिसि पसरियउ सत्तुसिन्नु, पेक्खेविं अखुद्धुं जिवं कुंभयन्नु ।

श्रीगुणचंद  
महावीरच०  
८ प्रस्तावः

॥ ३११ ॥

आपीडियपरियरु सो कुमारु, जुज्झणहं लग्गु सो दढप्पहारु ॥ १२ ॥  
सरकप्पियपक्खरतुरयघट्टु, मुसुमूरियवेरियरुडमरट्टु ।  
जमु संमुट्टु किर जो खिवइ चक्खु, सो तक्खणि जायइ जमह भक्खु ॥ १३ ॥  
एगोऽविट्ठु भयवसकंपिराण, सो णेगरूव हूओ वेरियाण ।  
लक्खिज्जइ वाणमुयं तु केम्ब, जलधार मुयंतउ मेट्टु जेंव ॥ १४ ॥  
उच्चद्वज्जुडभडभिउडिभीस, तिक्खंडिय सत्तहुं सरहिं सीस ।  
तमुदारुणरणकम्मेण तुट्ठ, ओइन्ननहंगणि तियसवंठ ॥ १५ ॥  
अवरोप्परुपेड्डिरि मुहडसत्थि, नासणह पयट्टइ अइव हत्थ ।  
विवरंसुहि सावत्थीए नाहि, पवहंतइ नररुहिरप्पवाहि ॥ १६ ॥  
समरंगणि जोअइ जा कुमारु, संचिट्ठइ रिउ अकयप्पहारु ।  
ता पुव्व भणियविज्जाहरोहिं, अवहरिवि हरिसभरनिब्भरेहिं ॥ १७ ॥  
उवणीओ खयरनरनायगस्स, हरिसूससंतमुहपंकयस्स ।  
अह आगयंमि सुदिणंमि तेण, परिणाविओ कुमारु वसंतसेण ॥ १८ ॥

तुर्याणुवत्ते  
सुरेन्द्र-  
दत्तकथा०

॥ ३११ ॥

सो तीए सहिउ पंचप्पयार, उवमुंजइ विसय अणत्तसार ।

अइनिअलु पालइ जिणह धम्म, दूरेण विवज्जइ पावकम्म ॥ १९ ॥

कालफमेण विसहय विरत्तु, पवज्ज लेइ सुपसंतचित्तु ।

तवचरणेहिं शोसिउ पावकम्म, पचक्खु विरायइ नायधम्म ॥ २० ॥

अह ससहरनिम्मलु पाविवि केवलु, पडिओहिवि चिरु भवजणु ।

सिवमइह नंदणु भवभयमहणु, वचइ निवइ धरभवणु ॥ २१ ॥

इय परदारनिवित्तीमित्तं पि अणुवयं पवन्नमिमं । एवंविहोत्तरोत्तरकल्लाणनिबंधणं होइ ॥ २२ ॥

भणियं चउत्थणुवयमेत्तो पंचगगमाणुपुवीए । सयलपरिग्गहपरिमाणकरणविसयं पयंपेमि ॥ १ ॥

दुविहो परिग्गहो सो धूलो सुडुमो उ तत्थ सुडुमो य । परकीएसुवि वत्थुसु ईसिं सुच्छाइपरिणामो ॥ २ ॥

धूलो पुण नवमेओ धणे य धन्ने य खेत्तवत्थूसु । रुप्पसुवन्नचउप्पय दुप्पयकुविएसु सुणिअवो ॥ ३ ॥

इय नवमेयपरिग्गहपरिमाणं भावसारमादाय । पंचइयारविवज्जणपरायणो सावगो मइमं ॥ ४ ॥

खेत्ताइहिरनाईधणाइदुपयाइकुप्पमाणकमे । जोयणपयाणबंधणकारणभावोहिं नो कुणइ ॥ ५ ॥

जो पुण अइलोभवसा भणिज्जमाणोवि गुरुजणेण वहुं । थेवंपि नो परिग्गहपरिमाणवयं पवज्जेइ ॥ ६ ॥

श्रीगुणचंद  
महावीरच०  
८ प्रस्तावः

॥ ३१२ ॥

सो दविणाइनिमित्तं वचंतो दूरदेसनयरेसु । पविसंतोऽवि समुदे कुणमाणो विविहववसायं ॥ ७ ॥  
लाभेऽविहु पइदिणवहुमाणधणवद्धणाभिलासो य । अचंतमहादुक्खं वासवदत्तोव पावेइ ॥ ८ ॥ विसेसयं तीहिं ।  
अह गोयमेण भणियं वासवदत्तो जिणिंद ! को एस ? । जयगुरुणा संलत्तं सीसय ! सम्मं निसामेसु ॥ ९ ॥  
कणयखलंमि महानयरे सुवलयचंदो नाम सेट्ठी, तस्स धणा नाम गिहिणी, तेसिं अचंतवल्लभो सब्बकलाकलाव-  
निउणो वासवदत्तो नाम पुत्तो, सो य महारंभो महापरिग्गहो गरुयलाभसंभवेऽवि महालोभसंगओ, अहो निसं दव्वो-  
वज्जणोवाए पयट्ठंतो कालं वोलेइ, तस्स य अम्मापिउणो अचंतसावगधम्मकरणसीलाणि जिणवयणायन्नणेण सुणि-  
यअविरइकडुविवागाणि तं नियपुत्तं अणवरयाणेगपावट्ठाणपसत्तं पलोइऊणं भणंति-वच्छ ! सुमिणोवमं जीवियं  
असारा विसया सकज्जाणुवत्तणमेत्ता सयणसंजोगा खणविपरिणामधम्मा रिद्धिसमुदया, अओ किंनिमित्तं न कुणसि  
धणधन्नखित्तवत्थुहिरन्नसुवन्नदुपयचउप्पयाइसु इच्छापरिमाणं, न वा परलोयसुहावहं समज्जिणेसि धम्मं, तहा  
वच्छ ! पिउपियामहपुरिसपरंपरागयं न माइ दव्वं, अओ निरत्थओ तदज्जणगाढपरिस्समो, अह अपुवं लच्छि उवव-  
ज्जिउमिच्छसि तहावि जहासत्तीए इच्छापरिणाममेव कल्लाणकारगमिच्चाइ बहुप्पयारवयणेहिं पन्नविज्जमाणोऽवि न  
पडिवज्जइ कम्मभारियत्तणेण एसो मणागंपि तवयणं, सच्छंदचारित्ति उवेहिओ अम्मापिऊहिं । अन्नया य देसंत-  
रागयवणिया पुच्छिया वासवदत्तेण-अहो किं तुम्ह देसे भंडमग्घइ ? , तेहिं कहियं-अमुगंति, तओ तवयणनिसाम-

पञ्चमेऽणु-  
त्रते वासव-  
दत्तकथा.

॥ ३१२ ॥

णचउग्गुणीभूयलोभाभिभूओ तद्देसोचियभंडनिवहभरियं सगडिसागडं गहिऊण पयट्ठो देसंतरं, निसिद्धो य वाढं  
 जणणिजणगेहिं, तहावि न ठिओ, एवं च सो अणुदिणं वचंतो गओ तामलित्तिं नयरिं, विणिवट्ठियं भंडं, समा-  
 साइओ दसगुणो लाभो, वियंभिओ य अचंतलोभसागरो, जाया बहुययरा तदज्जणवंछा, अन्नदिवसे य दुवारगएण  
 तेण दिट्ठाइं दूरदेसागयाइं विविहसारवत्थुभरियाइं जाणवत्ताइं, ताणि य पेच्छिऊण पुच्छिओ तद्वाणियगो अणेणं-  
 भो महायस ! कत्तो आगयाइं एयाइंति ? तेण जंपियं-कलहदीवाओ, वासवदत्तेण कहियं-भइ ! इहचभंडेण तत्थ  
 गएण केत्तिओ संपज्जइ लाभो ? तेण भणियं-वीसगुणो, वासवदत्तेण जंपियं-किं सच्चमेयं ? तेण कहियं-अज्ज !  
 किमसच्चभासणे फलं ? एवं च निसामिऊण वासवदत्तेण भाडियाइं जाणवत्ताइं भरियाइं विविहकंसदोसभंडस्स,  
 पट्ठिओ कलहदीवाभिमुहं,

अह परियणेण भणियं-चिरं विमुक्काण जणणिजणगाणं । होही दढमणुतावो सामिय ! तुम्हं विओगंमि ॥ १ ॥  
 ता सारिज्जउ गेहं सम्माणिज्जंतु सयणवग्गावि । पुणरवि अत्थोवज्जणकरणे को वारिही तुम्हं ? ॥ २ ॥  
 इय भणिए सो रुद्धो निट्ठुरवयणेहिं भणिउमाढत्तो । रे तुम्ह कोऽहिगारो एवंविह भाणियवंमि ? ॥ ३ ॥  
 न तुमाहितोवि अहं जुत्ताजुत्तं मुणेमि किं पावा ! । लद्धावयासया अहव किं न भिच्चा पयंपंति ? ॥ ४ ॥  
 एवं खरफरुसगिराहिं तज्जिया तेण तह अदोसावि । लज्जामिलंतनयणा जह ते मोणं समल्लीणा ॥ ५ ॥



श्रीगुणचंद  
महावीरच०  
८ प्रस्तावः

॥ ३१३ ॥

तेणावि सायरे पवाहियाइं जाणवत्ताइं, सिग्घवेगेण गंतुं पयत्ताणि, कमेण पत्ताइं कलहदीवं, उत्तारियं तेहिंतो  
भंडं, विक्किणियं च, जाओ बहुओ लाभो, ठिओ य कइवयवासराइं, गहिया मणिमोत्तियसंखपट्टसुत्तपमुहपहाणकया-  
णगाइं, तओ पयट्ठो तामलित्तिसंमुहं, इंतस्स य जलहिमज्झे दंसिओ निज्जामगेहिं तस्स रयणदीवो, कोउहल्लेण पुच्छिया  
अणेण—अरे किमिह उप्पज्जइ?, निज्जामगेहिं भणियं—कक्केयणपउमरागवज्जिंदनीलाइणो महारयणविसेसा ते इह  
उप्पज्जंति, तेसिं समीवधरणमेत्तेण विद्वइ रुंददारिद्रोवद्वो, न पासंमि परिसप्पइ दप्पुब्भडो सप्पो, न नियडम-  
कमइ चंडावि डाइणी, खिल्लियमुहोव न कडुयमुल्लवइ खलयणोवि, तओ अपरिकलियविणासेणं जायतग्गहणगाढा-  
भिलासेण भणियं वासवदत्तेण—अहो निज्जामगा! जइ तत्तो हुत्तं नेह मह नावं तो चउग्गुणं देमि भे वित्तिं, तेहिं  
भणियं—निज्जइ, केवलं उवलपडलाउला भूमी, जइ कहवि नावा भंगं पाविज्जा ता सव्वनासो जाएज्जा, तओ ईसि  
विहसिऊण वासवदत्तेण भणियं—

जइ गयणं निवडेज्जा पल्हत्थेज्जा रसायले पुढवी । कुलगिरिणो य सपक्खा होउं व महीए वज्जेज्जा ॥ १ ॥  
जलनिहिणो वा वेलाए महियलं सव्वओवि वोलिज्जा । जणणी वा नियपुत्तं हणेज्ज पढमप्पसूयंपि ॥ २ ॥  
ता रत्नंपिव सुन्नं होज्ज जयं किं तु हवइ नो एयं । नय सव्वहावि अघडंतमेरिसं चिंतिउं जुत्तं ॥ ३ ॥  
जो पुण इय चिंताए पयट्ठए सो धुवं महासुद्धो । करकमलगोयरगयं लच्छिं हारेज्ज किं चोज्जं ? ॥ ४ ॥

इच्छाऽपरि-  
माणे  
वासवदत्त-  
दृष्टान्तः.

॥ ३१३ ॥

ता मेउह कुविगप्पं नावं पेलेह दीवयाभिमुहीं । उच्छिदह दारिदं आचंदं रयणगहणेण ॥ ५ ॥

एवं च तेण कहिए पणद्विणिवायभएहिं निज्जामगेहिं पवाहिया तदभिमुही नावा, जाव य. केत्तियंपि विभागं गया ताव समुट्ठिओ महामगरो, तेण य मंदरमंथेणेव महियं जलहिजलं, उच्छालिया पयंडकछोला, तदभिघाएण भिन्ना सयसिकरा नावा, निबुडो अत्थसारो, खरपवणपहओ पलालपूलउव दिसो दिसि पलीणो परियणो, वासव-दत्तोऽवि कहकहवि समासाइयफलहखंडो वेलाजलेण बुज्झमाणो पाविओ सायरस्स पारं, कंठग्गयजीविओ य दिट्ठो एगेण तावसेणं, तेणावि करुणाए नीओ निययासमे, काराविओ कंदमूलाइणा पाणवित्तिं, वीसंतो कहवय-वासराइं, समुवलद्धसरीरावट्ठंभो य पट्ठिओ नियनयराभिमुहं

इओ य तस्स अम्मापिउणो परलोयं गयाइं, जाया य नयरंमि वत्ता, जहा-वासवदत्तोवि समुदे वोहित्थभंगेण विणासं पाविओ, ओच्छिन्नसामियंतिकाऊण गहियं धणकणसमिद्धंपि तम्मंदिरं नरिंदेण, वासवदत्तोऽवि संवलरहि-यत्तणेणं धणविणाससमुत्थसोगेण य किलंतदेहो महाकट्टकप्पणाए संवच्छरमेत्तकालेण संपत्तो कणगखलनयरं, पवि-सिउमारदो य नियमंदिरं, एत्थंतरे उग्गीरियदंडा पधाविया नरवडंनिरूविया घरारक्खगपुरिसा, भणिउं पवत्ता-अरे कप्पडियं ! घरसामियव निच्चओ कीस इह पविससि?, किं न याणसि इमं रण्णो गिहं?, तेण भणियं-कि-मेयं कुवल्लयचंदसेट्ठिणो न भवइ?, तेहिं कहियं-हंत हुंतं पुवकाले, संपयं पुण असाभियंति रत्तो जायं, तेण भणियं-

श्रीगुणचंद  
महावीरच०  
८ प्रस्तावः

॥ ३१४ ॥

अरे ! कहं मइ जीवन्ते असामियन्ति वुच्चइ ? , किमहं कुवलयचंदसेट्टिणो पुत्तो वासवदत्तो तुम्हेहिं नो सुणिओ न वा  
दिट्ठोत्ति वुत्ते किं रे ! मिच्छा पलवसित्ति निब्भच्छिऊण कंधराधरणपुव्वयं निद्धाडिओ सो तेहिं मंदिराओ,  
गओ य एसो सयणाणं समीवे, तेहिवि मा पुव्वदेयं दव्वं मग्गिस्सइत्ति कुविगप्पेण पच्चभिजाणंतेहिवि न नयणमेत्ते,  
णावि संभाविओ, गहिलोत्ति कलिऊण रत्तावि उवेहिओ ।

अहं गेहसयणधणनासपमुहदुहजलणजालपज्जलिओ । सो चिंतिउं पवत्तो विवन्नलायन्नदीणमुहो ॥ १ ॥

कहं अकलियपरिसंखं पुरिसपरंपरसमागयं दव्वं ? । कहं वा सभुयवलेण य विट्ठत्तयं तं च अइवहुयं ॥ २ ॥

एकपयं चियं सव्वं निन्नट्ठं मज्झं मंदभग्गस्स ? । हा ! किं करेमि संपइ ? पुव्वं व हवेज्ज कहं व धणं ? ॥ ३ ॥

एमाइविचित्तविकप्पकप्पणुप्पन्नचित्तवामोहो । उम्मत्तयं उवगओ हिंडंतो नयरत्थासु ॥ ४ ॥

चिरकालमाउयं पालिऊण बहुरोगसोगसंतत्तो । अट्टज्झाणोवगओ मरिउं तिरियत्तणं पत्तो ॥ ५ ॥

इयं गोअम ! जीवाणं परिग्गहारंभविरइरहियाणं । निवडंति आवयाओ जं तेणेमं गुणकरंति ॥ ६ ॥

पंचवि अणुवयाइं सोदाहरणाइं ताव कहियाइं । एत्तो गुणवयाइं तिन्निवि लेसेण साहेमि ॥ १ ॥

उट्ठाहोतिरियदिसिं चाउम्मासाइकालमाणेणं । गमणपरिमाणकरणं गुणवयं होइ पढममिह ॥ २ ॥

वज्जइ उट्ठाइकममाणयणप्पेसणोभयविसुद्धं । तह चेव खेत्तवुद्धिं कहिवि सइअंतरद्धं च ॥ ३ ॥

इच्छापरि-  
माणे  
वासवदत्त-  
दृष्टान्तः०

॥ ३१४ ॥

एयंमि निरक्ष्यारे दिसिच्चए भावओ पवत्तंमि । होइ सिरी मोक्खोविय जिणपालियसावगस्सेव ॥ ४ ॥

गोयमसामिणा भणियं-जयनाह ! को एस जिणपालिओ ? , सामिणा कहियं-भो ! निसुणेषु पुंडवड्डणनयरे विक्रमसेणो राया, मयणमंजूसा से पट्टमहादेवी, सुबुद्धी अमच्चो, तत्थ य नयरे जिणभावियमणो जिणदत्तसेट्ठिस्स सुलसाए भारियाए पुत्तो जिणपालिओ नाम सावगो परिवसइ, तेण य गुरुसमीवे दिसागमणपरिमाणवयं गिण्हंतेण पन्नासं पन्नासं जोंअणाइं चउसुवि दिसासु मुक्काइं, एवं सो उत्तरोत्तरगुणन्भासं कुणमाणो अच्छइ । इओ य विक्रमसेणनराहिवस्स पचंतदेसवत्ती सीहसेणो नाम भिल्लाहिवई देसं विहविउमाढत्तो, तस्स य उवरि महया संरंभेण हरिकरिरहजोहवूहपरिगओऽविकखेवेण चलिओ विक्रमसेणो, भणिओ य सुबुद्धिणा अमच्चेण-देव ! किं तस्स गोमाउयस्स उवरिं तुम्हे विजयजत्तं करेह ? , तुम्ह पयपयावपडिहयपरकमस्स का तस्स सत्ती ? , ता नियत्तह नयरी-हुत्तं देह ममाएसं जेण तहा करेमि जहा पडिच्छइ सिरेण सो देवस्स सासणंति बुत्ते चउरंगिणीसेणासंणाहो पेसिओ अमच्चो, सीहसेणोऽवि तं सबलवाहणं इंतं चारपुरिसेहिंतो नाऊण विसमगिरिकडगं घेत्तूण ठिओ, अमच्चोऽवि तहाठियं पेच्छिऊण जुज्झिउमपारयंतो तमेव गिरिकडगं परिवेढिऊणं तत्थेव आवासिओ, दुग्गमग्गत्तणओ य घन्नघयाइं महग्घीह्वयं सिविरे, जणपरंपराए य निसुणियमेयं जिणपालिएण, तओ भूरिघयभरियदोट्टियगाणं करभेसु समारोविय वणियजणसमेओ चलिओ सो सिविराभिमुहं, सो य सीहसेणो दुग्गे निरुद्धंजवसाइपयारो

श्रीगुणचंद  
महावीरच०  
८ प्रस्तावः

॥ ३१५ ॥

अच्छिउमचायंतो सारधणं करितुरयसाहणं च समादाय पलाणो रयणीए, मुणियवित्तंतो य अमच्चो लग्गो तस्स  
अणुमग्गेण, नासंतो य दस जोअणे गंतूण वेढिओ सवत्तो अमच्चसेन्नेण, तओ सो सीहसेणो बहलतरुवरगहणंमि गिरि-  
निकुंजं निस्साए काऊण ठिओ, इओ य जिणपालिओ पुद्वावासियसिविरसंनिवेसं पत्तो समाणो दिसिपरिमाणं चिंति-  
ऊण भणइ-अहो किमहमिणिंह करेमि ?, पन्नासं जोयणाइं मे परिमाणं, तं च इत्तियमेत्तेणं चिय पडिपुन्नप्पायं, सेन्नं  
च दसहिं जोयणेहिं दूरीभूयमियाणिं, ता वलिस्सामि पच्छाहुत्तं, न कोसमेत्तंपि एत्तो वच्चिस्सामि, सहाइणा वलिय-  
लोगेण भणियं-अहो ! मा मुहा अत्थहाणिं करेहि, तत्थ गयस्स तुह पभूयदविणलाभो जायइ, तेण भणियं-अलाहि  
तेण दवेणं जं नियमखंडणाए संपज्जइ,

अह तस्स नियमनिच्चलचित्तपरिक्खट्टया सुरो एगो । कयउब्भडसिंगारो सवत्तो पुरिसपरिअरिओ ॥ १ ॥

सत्थाहिवरूवधरो सुरलोआओ समोअरेऊणं । पच्चासन्नो ठाउं पयंपिउं एवमाढत्तो ॥ २ ॥

हंहो सावय ! नो कीस एसि तं सप्पिविक्रयनिमित्तं ? । जिणपालिएण भणियं वयभंगो हवइ जइ एमि ॥ ३ ॥

देवेण जंपियं सुट्ठु वच्चिओ तंसि धुत्तलोएण । जो कुग्गहेण हारसि करट्टियंपि हु महालाभं ॥ ४ ॥

अहवा वयस्स भंगे पावं होइत्ति तुज्झ संकप्पो । ता तल्लाभेणं चिय पायच्छित्तं चरेज्जासु ॥ ५ ॥

जिणपालिएण वुत्तं अहो किमेवं अणग्गलं वयसि ? । वञ्चंति धम्मगुरुणो कयाइं किं भवसत्तजणं ? ॥ ६ ॥

दिक्परि-  
माणे जिन-  
पालितज्ञातं

॥ ३१५ ॥

हंत । जइ तेऽवि वंचंतिं कहवि तो किं न चंदविंवाओ । अमयमंयाओ निवडइ पंलिच्छगयणानलकणोली ? ॥ ७ ॥  
किं या न सूरविंवे विप्फुरमाणेऽवि तिमिरसंभारो । भरियभुवणंतरालो वियरइ रयणिं अंकांलेऽवि ? ॥ ८ ॥  
ता भइ । नेव जुज्जइ गुरुदुत्तं तुज्ज जंपिउं एवं । अचंतपावजणगत्तणेण मंज्झं पि नो सोउं ॥ ९ ॥  
जं च तए भणियमिमं वयलोवसमुत्थपावसमणत्थं । पायच्छित्तं पच्छा सेविज्जाहित्ति तमजुत्तं ॥ १० ॥  
जं पढमं पि न जुज्जइ तं काउं जत्थ होइ वयलोवो । लुत्ते य तत्थ विहलो पायच्छित्ताइवावारो ॥ ११ ॥  
सहसकाराणाभोगओव वयमयलणं मि पच्छित्तं । पढमं चिय जाणंतो जो लोवइ तस्स तं विहलं ॥ १२ ॥  
इय भणिए सो देवो रंजियचित्तो विसिद्धरूवधरो । चलियमणिकुंडलामलमऊहविच्छुरियंगंडयलो ॥ १३ ॥  
ससिणेहं जोडियपाणिसंपुडो भणिउमेवमाढत्तो । धत्तो सि तुमं सावय । वयं मि जो निचलो एवं ॥ १४ ॥  
देवोऽहं तुह सत्तं परिकिखउं संपयं समणुपत्तो । परितुट्ठो य इयाणिं ता भण किं ते पयच्छामि ? ॥ १५ ॥  
जिणपालिण्ण भणियं जिणमुणिपयपूयणाणुभावेण । सवंचिय परिपुत्तं न मग्गियवं किमवि अत्थि ? ॥ १६ ॥  
ताहे मुरेण कहियं जस्सेरिस निचलत्तणं धम्मे । सो तं कयकिचो नणु तहावि ममणुग्गहट्ठाए ॥ १७ ॥  
विसदोसहरणदक्खं रयणमिमं गिण्ह तं महासत्त ! । एवं तमप्पिऊणं देवो अहंसणं पत्तो ॥ १८ ॥  
जिणपालिओऽवि गहिऊण तं गहिऊण घयाइभंडं च । इयरवणियाण दाऊण गओ सनयरं, तत्थ य जाव

श्रीगुणचंद  
महावीरच०  
८ प्रस्तावः

॥ ३१६ ॥

कइवि दिवसाणि अच्छइ ताव अन्नदिवस सा नरिंदभज्जा मयणमंजूसा वासभवणंमि सुहपसुत्ता खइया विसहरेण,  
तक्खणेण य निच्चिद्धा जाया, समाऊलीहूओ विक्रमसेणो राया, वाहराविद्या गारुडिया, पउत्ता तेहिं मंतंततोवयारा,  
न य जाओ कोऽवि विसेसो, तओ पच्चक्खाया तेहिं, नरिंदेणवि गाढनेहमोहिण्ण नीणाविओ पडहगो, उग्घोसावियं  
च, जहा-जो देविं उट्ठोवेइ तस्स अद्धं गामनगरसमिद्धस्स रज्जस्स देमिस्ति, इमं च पडहगताडणपुच्चयं उग्घोसिज्ज-  
माणं सुणियं जिणपालिण्ण, तओ निवारिओ-अणेण पडहगो, देवसमप्पियरयणं गहाय गओ नरिंदमंदिरं, रयणा-  
भिसेगसलिलपाणविहिणा विगयविसविगारा कया देवी, सुत्तपबुद्धव समुट्ठिया सयणीयाओ, तुट्ठो राया, दाउमारद्धो  
य रज्जद्धं, जिणपालिण्ण जहोचियं घेत्तूण सेसं पडिसिद्धं, रायावि से निलोभयं दट्ठूण पडिबुद्धो देवीए समं सावगो  
जाओ, जिणपालिओऽवि संपुन्नधणवित्थारो चेइयसाहुपूयारओ सम्ममुभयलोगसफलं जीवियं काऊण मओ समाणो  
परंपराए मोक्खसोक्खभागी जाओत्ति ॥

इय गोयम ! दिसिवयपालणाए अइयारपंकमुक्काए । हुंति विसिद्धसुहकरा गुणनिवहा इहपरभवेसु ॥ १ ॥

भोगपरिभोगपरिमाणकरणमेत्तो गुणवयं वीयं । तं भोयणओ तह कम्मओ य दुविहं सुणेअवं ॥ १ ॥

भोयणओ पडिवत्ते इमंमि वज्जेज्जणंतकायाई । पंचुवरि महमेरयं च रयणीयभत्तं च ॥ २ ॥

सच्चित्तं पडिवद्धं अपउलहुण्णउल तुच्छभक्खणयं । भोअणओ अइयारा वज्जेयवा इमे पंच ॥ ३ ॥

दिक्परि-  
माणे जिन-  
पालितज्ञातं

॥ ३१६ ॥

कम्मयओ पुण एत्थं पडिवत्ते सयमेव खरकम्मं । वज्जेअवं निच्चं किं पुण इंगालकम्माइं ? ॥ ४ ॥

इंगाली यणसाडी भाडी फोडी सुवज्जए कम्मं । वाणिज्जं चेव य दंतलक्खरसकेसविसविसयं ॥ ५ ॥

एयं तु जंतपीलणकम्मं निलंछणं च दयदाणं । सरदहतलायसोसं असईपोसं च वज्जेज्जा ॥ ६ ॥

दुविहपयारं च इमं जहमणियविहिए पालमाणानं । धन्नाण भवभयं नेव होइ रविपालयाणं व ॥ ७ ॥

इंदभूइणा वागरियं-भयवं ! के इमे रविपालया ?, जयगुरुणा भणियं-कहेमि, एत्थेव जंबूदीवे दीवे भारहे खेत्ते कोसलविसयप्पहाणे दसपुरंमि नगरे नरिंदसम्मया माहणकूलसंभूया चउहसविज्जाठाणपारगा दोन्नि भायरो रवी पालगो य परिवसंति, अन्नया य गामाणुगामं विहरमाणा बहुसिस्सगणपरिवुडा विजयसेणाभिहाणा सूरिणो समागया, ते य तेसिं जाणसालाए अणुजाणाविऊण ठिया वासारत्ते, ते य दोवि भायरो सूरिसमीवे धम्मवीमंसाए समागंतूण भणंति-भयवं ! भणह नियधम्मं, सूरिणा भणियं-आयन्नह—

जीवदयापरिणामो सघन्ननिवेइयइत्थपडिवत्ती । परिग्गहपरिमाणं चिय एसो धम्मो समासेण ॥ १ ॥

तेहिं कहियं-भयवं ! जीवदयापरिणामोत्ति जं तुम्हेहिं वुत्तं तं न घडेइ, जओ जन्नकज्जे पसुविणासोऽवि धम्म-त्तणेण निदिट्ठो, तहा सघन्ननिवेइयत्थपडिवत्ती एयंपि न सुंदरं, सघन्नूणं वेदे अकहणाओ, जं च परिग्गहपरि-माणंति वुत्तं तंपि निरत्ययं, जेसिं वराडियामेत्तंपि नत्थि तेसिं विफलमेव परिग्गहपरिमाणकरणं, विज्जमाणपयत्थे



श्रीगुणचंद  
महावीरच०  
८ प्रस्तावः

॥ ३१७ ॥

चेव तस्स गुणकारित्तणओ, गामसञ्भावे चिय सीमासफलत्तणओत्ति, तम्हा अन्नं किंपि धम्मं परिकहेसु, सूरिणा भणियं—आउसंतो ! न जुज्झइ तुम्ह एवं वोत्तं, जओ इहलोयपडिवद्धपुरिसवयणमेयं जन्नकजे पसुविणासो धम्मोत्ति, कहमेयंति ?, वुच्चइ—‘आत्मवत् सर्वभूतानि, यः पश्यति स पश्यती’ति पारमार्थिकमुनिवचनात्, जइ पुण जीवविणासे धम्मो ता मच्छबंधलुद्धयाइणो सग्गंमि वच्चेज्जा । जं च सब्बन्नुणो वेदेसु न कहियत्ति वुत्तं तंपि वेयरहस्सानिसामणाओ, यतस्तत्रैव शान्त्युद्घोषणाप्रस्तावे उक्तं—ॐ लोकप्रतिष्ठितान् चतुर्विंशतिं तीर्थकरान् ऋषभाद्यान् वर्धमानान्तान् सिद्धान् शरणं प्रपद्यामहे । ॐ पवित्रमग्निं उपस्पृशामहे, येषां जातं सुजातं येषां वीरं सुवीरं येषां नग्नं सुनग्नं ब्रह्म सत्रह्यचारिणो उचितेन मनसा अनुदितेन मनसा देवस्य महर्षिभिर्महर्षयो जुहोति, याजकस्य जनस्य च एषा रक्षा भवतु शान्तिर्भवतु वृद्धिर्भवतु तुष्टिर्भवतु स्वाहा ” एवं च पसिद्धेसु सब्बत्थपइट्ठिएसु सब्बन्नुसु अभावकप्पणं महासंमोहो । जं च कहियं विज्जमाणपयत्थे चेव परिमाणं जुज्झइ एयंपि अणुचियं, असंतेवि अत्थे आसवनिरोहभावाओ पच्चक्खाणं गुणकरं चेव, ता भो महाणुभावा ! असेसदोसग्गिसमणघणसरिसं सब्बन्नुमयं अमयं व पियह अजरामरत्तकरं, सुंचह मिच्छत्तमोहसंपसूयं कदासयविसेसं, मज्झत्थत्तणमवलंविऊण चित्तेह परमत्थं, जच्चकणगं व कसल्लेयतावपमोक्खवहुपरिक्खाहिं सुपरिक्खिऊण धम्मं सम्मकरं सम्ममायरह । एवं च सूरिणा पन्नत्ते लहुकम्मयाए पडिवुद्धा ते महाणुभावा, पडिवन्नो भावसारं जिणधम्मो, गहियाइं अणुवयाइं, अंगीकयाइं

भोगोपभोगमाने रविपालककथा

॥ ३१७ ॥

तिन्निवि गुणवयाइं, पालिति य सवजत्तेण । अन्नया य रविमाहणस्स भोयणं कुणमाणस्स उवरिद्वियघरकोइलगेण कओ  
उणारो, वक्खित्तचित्तत्तणओ न मुणिओ अणेण, तम्मिसभोयणकरणे य पवद्वियं से उयरं, खीणाइं मंससोणियाइं,  
तणुईहयाओ वाहाओ, सुक्काओ जंघाओ, सुसियं वयणं, वद्विया तण्हा, जाओ सावसेसाउओ, दंसिओ य पालएण  
विज्जाणं, तेहिवि असज्झोत्तिकाऊण पच्चक्खाओ एसो, एवं च विसमदसावडियं तं पलोइऊण झूरइ परियणो,  
रोवइ भारिया, बहुप्पयाइं विलवइ पालगो, सो य अदीणमाणसो सम्ममहियासेइ, अन्नवासरे य समागओ एगो  
देसंतरविज्जो, तस्स सयणवग्गेण दंसिओ रवी, तेणावि संमं पलोइऊण भणियं—अहो कुडुघिरोलियापुरीससंभवो  
एस दोसो, ता पंचुवरिफलाइं समभागाइं चित्तगरोज्झमंससंभीसियाइं सुराए वट्टिऊण देह जेण सिग्घं पसमइ  
महोदरवाही, रविणा भणियं—भो भो वेज्जा ! भोयणओ वीयगुणवयपरिमाणं कुणंतेण पच्चक्खायं मए एयं, वेज्जो  
सयणवग्गो य भणइ—पगुणीभूयसरीरो सोहिं करेज्जासु, तेण कहियं—जराघुणजजरियविसरारुसरीरपंजरासारयं  
जाणंतो नाहं मरणेवि एयमायरामि, एवं च उज्झिओ वेज्जेण । अन्नंमि य वासरे जाव सो निसन्नो एगंतदेसे अच्छइ  
ताव पेच्छइ वसहमुत्तमज्झे निवडियं घरकोइलगं, तक्खणं चिय विणस्संतं च पेच्छिऊण चिंतियमणेण—अहो जहा  
एयं कोइलगविणाससमत्थं तहा तं दुट्ठं विसविगारमवि हणिउमलं, तम्हा जुज्जइ मज्झ एयं पाउंति परिभाविऊण  
सुमुहुत्ते णमोकारसुमरणपुरस्सरं वसहमुत्तं पीयमणेण, अह धम्मपभावेणं वेयणियखओवसमजोगा ओसह-

श्रीगुणचंद  
महावीरच०  
८ प्रस्तावः

॥ ३१८ ॥

माहंपेण य जलोयरं से पसंतंति, जाओ पुणन्नवंगो, जयइ जिणिंदस्स धम्मसामत्थं, इय सव्वत्थ पवाओ वित्था-  
रिओ नयरलोएण

सो य पालगो तन्नयरसामिणा भणिओ जहा समामच्चत्तणं पडिवज्जसु, पालगेण भणियं—देव! मए खरकम्माणं  
बलाहियत्तारक्खिगत्तपमुहाणं नियमो कओ, राइणा भणियं—किं कारणं?, तेण कहियं—देव! न जुत्तमेयं सावगाणं,  
जओ तत्थ निउत्तेहिं जणो पीडियवो, परच्छिद्वनिहालणं कायव्वं, नरिंदचित्तावज्जणपरेहिं सव्वप्पयारेण दव्वमुप्पाय-  
णिज्जं, तं च न जुत्तं पडिवन्नवयाणंति, रत्ता भणियं—दुट्ठाण सिक्खणे साहूण पालणे किमजुत्तं?, पालयेण जंपियं—  
देव! को एवं मुणइ—एस दुट्ठो एसो साहुत्ति, जओ अवराहस्स कारीवि अत्तणो साहुत्तणमेव पगासेइ, न य अपडिवन्न-  
दोसो विणासिउं पारियइ, कयाइ पिसुणोवणीओ साहूवि परिहम्मइ, तम्हा अइसयनाणसज्झं दुट्ठनिग्गहसिद्धपालणं,  
अणइसइणा कीरंतं विवज्जासंपि जाएज्जा, एवं च भणिए पयंडसासणत्तणओ रुट्ठो राया भणिउमाढत्तो य—अरे  
वंभणाहम! वेयपुराणपइट्ठियं वंभणत्तं परिहरिय धम्मंतरं कुणमाणो मूलाओ चिय निग्गहट्ठाणं तुमं विसेसओ  
इयाणिं ममाऽऽणालोवपयट्ठो, ता न भवसि संपयंति भणिऊण आणत्तो वज्झो, नीओ मसाणभूमीए, समारोविउ-  
मारद्धो मूलाए, एत्थंतरे तप्पएसोवगएण दिट्ठो वाणमंतरेण, दढधम्मोत्ति जायाणुकंपेणं तेण मूलाठाणे कयं कण-  
यसिंहासणं, तेहि य रायपुरिसेहिं पहओ खग्गपहारेहिं, देवप्पभावेण य पहारट्ठाणेषु समुट्ठियाणि गेवेयपमुहाणि

भोगोपभो-  
गमाने रवि-  
पालककथा

॥ ३१८ ॥

आभरणाणि, निवेद्यं च रत्नो, अह भयसंभंतमणो राया सयमेव परियणसमेओ तस्स सगासोवगओ कयंजली  
भणिउमाढत्तो-भो भो सद्धम्मपरेकचित्तं! जं निन्निमित्तमवि मोहा एवंविहं अवत्थं उवणीओ तं खमसु मज्झ,  
एवं च सुचिरं पसाइऊण करेणुगाखंधे समारोहिऊण य महाविभूईए पवेसिओ नगरे पालओ, जहोचियं तंवो-  
लाइणा संमाणिऊण पेसिओ सगिहं, परितुट्ठो जेट्टभाया, कयं वद्धावणयं । अवरवासरे य पालगेण भणियं-हे भाय !  
सघनुधम्ममाहणमेयं जं वसहमुत्तमेत्तेणवि तुह पसंतो जलोयरवाही, ममावि निक्कारणमेव कणयसिंहासणत्तेण  
परिणया सूलिगा, पहारावि जाया आभरणत्तणेणं, ता मुचउ गेहवासवासंगो, अंगीकीरउ एत्तो सबविरई, को हि  
नाम मुणियामयपाणगुणो विससलिलं पाउमुच्छहेज्जा?, रविणा भणियं-एवं होउ, तओ ते दोवि थेराणं अंतिए  
पघजं गहाय .समाराहियसंपुन्नसमणधम्मा सुरसिवसुहभायणं जायत्ति ॥

इय इंदभूइमुणिवर ! वीयगुणवयमिमं विनिदिट्ठं । एत्तो तइयं वोचइ अणत्थदंडस्स विरइत्ति ॥ १ ॥

सो पुण अणत्थदंडो नेअवो चउविहो अवज्झाणो । पमयायरिए हिंसप्पयाण पावोवएसो य ॥ २ ॥

कंदप्पे कुफुइए मोहरियं संजुयाहिकरणं च । उवभोगपरीभोगाइरेगयं चेत्य वज्जेइ ॥ ३ ॥

जेऽणत्थदंडविरया न हुंति तेऽणत्थगाइं जंपंता । पावंति धुवं मरणं लोइयकोरिट्ठियमुणिव ॥ ४ ॥

जो पुण एसो कोरिट्ठो मुणी जह व मरणमणुपत्तो । तह संपय सीसंतं सवं गोयम ! निसामेसु ॥ ५ ॥

श्रीगुणचंद  
महावीरच०  
८ प्रस्तावः

॥ ३१९ ॥

सालिसीसयंमि गामे भदिलो नाम माहणो, सोमदिना य से भारिया, तेसिं च कोरिंटगो नाम पुत्तो अचंतवि-  
रुवो, कहं?—

मुहवाहिविणिग्गयदीहविरलदंतग्गभग्गउट्टुउडो । करहसिसुपुच्छसत्थहविप्फुट्टमुहरोमदोप्पेच्छो ॥ १ ॥

मज्जारककडच्छो अइटप्परकन्नघोरजुयलिव्वखो । अचंतकविलदेहो पायडदीसंतनसजालो ॥ २ ॥

संपज्जंततहाविहभोयणजायंतउदरपूरोऽवि । कयमासुववासो इव अचंतं किसियसवंगो ॥ ३ ॥

इय सो पुव्वकियकम्मदोसओ गाममज्झयारम्मि । दुइंसणत्तणेणं हीलाठाणं परं जाओ ॥ ४ ॥

एयारिसे य तम्मि जोव्वणपत्ते जणणिजणगेहिं चिंतियं—कहं एस कलत्तभोगी भविस्सइ?, जओ सवायरम-  
ग्गियावि न सग्गामवासिणो दिंति एयस्स कन्नयंति । अन्नया दूरयरगामवासिणो वंभणस्स वड्डुकुमारी बहुदविण-  
दाणपुव्वयं वरिया अणेहिं से निमित्तं, जाए य लग्गसमए कोरिंटगं कयसिंगारचारुवेसं समादाय गयाइं तत्थ, तत्थ  
पारद्धो विवाहोवक्कमो, रइया वेइगा, पज्जालिओ घयमहुसणाहो हुयासणो, पइविट्ठो वेइगामंडवंमि कोरिंटगो,  
तक्खणं चिय दिट्ठो तीए वड्डुकुमारीए, तं च पलोइऊण सचमकारं भणियमणाए—

अहह किंमेस पिसाओ इहागओ? अहव रक्खसो वावि? । किं वा कयंतपुरिसो? नहु नहु तत्तोऽवि भीमयरो ॥ १ ॥

सहि! पेच्छ पेच्छ कीलेव्व विलइओ दिव्वभूसणसमूहो । एयंमि पावरूवे कहमवि नेवावहइ सोहं ॥ २ ॥

अनर्थदंडे  
कोरण्टक-  
कथा.

॥ ३१९ ॥

पारद्वंमि विवाहे लक्खिज्जइ एस धूमकेउव । ता भायइ मज्झ मणो सहसा एयंमि दिट्ठंमि ॥ ३ ॥

सहिण भणियं-सुयणु ! मा एवंमुल्लवसु, एसो तुज्झ पाणनाहो भविस्सइ, तीए भणियं-सहि ! सच्चमेयं ?, एस मे पाणनाहो भविस्सइ ?, तीए भणियं-सहि ! सच्चमेयं होही ?, सहिण भणियं-को इत्थ विव्वमो ?, वड्डकुमारीवि जइ परं पराभवित्ति भणिऊण विसायवसविसप्पमाणत्तिवसंतावा सणियं सणियमवक्कमिऊण जणमज्झयाओ पुरोहडा-वडंमि निवड्डिया वेगेण, तओ जाव इओ तओ समीवट्ठियजणविमुक्कहाहारवनिसामणेण धाविओ उत्तारणत्थं जणो ताव अइयउरसलिलत्तणेण कूवस्स अवस्संभवियच्चयाए विणासस्स मया एसा, विगयजीविया य वाहिं पक्खित्ता कूवयाओ, कओ से सरीरस्स सक्कारो, ताणि य कोरिंटिगजणणिजणगाईणि जणेण हीलिज्जमाणाणि गयाणि सग्गामं, भणिओ य तेहिं एसो-वच्छ ! कोरिंटिग तुह परिणयणनिमित्तं न सो कोऽवि उवाओ जो न कओ, केवलं तुह कम्मपरिणइवसेण सच्चो विहलत्तणं पत्तो, ता मा मुणिहिसि जहा अम्मापियरो ममं उवेहगाणित्ति, तेण भणियं-पुव्वकयकम्ममेव एत्थ अवरज्झइ, का तुम्ह उवेहा ?, जइ खुज्जओ दूरमूसवियवाह्वि फलं न पावइ ता किं कप्पतरुवरस्स वयणिज्जंति ?, एवं च तेसिं परोप्परोल्लावेण जाया रयणी, अह तेसु निव्वरपसुत्तेसु परमं चित्तपरितावमुव्वहंतो कोरिंटिगो नीहरिओ गेहाओ, पयट्ठो तित्थदंसणत्थं, कमेण य दट्ठूण सयललोइयतित्थाइं गहिया अणेण कावालियतवस्सिदिक्खा, मुणिओ तहरिसणाभिप्पाओ, सिक्खियाइं भूमिलक्खणपमुहाइं विन्नाणाइं ।

श्रीगुणचंद  
महावीरच०  
८ प्रस्तावः

॥ ३२० ॥

इओ य कुसग्गपुरे नयरे अरिमहणो नाम राया, तस्स य पर्यईए चिय दयादाखिन्नविवेयसच्चविसिट्ठुद्धिसंगओ  
सुमई नाम अमच्चो, तेण य राइणा कारावियं महंतं सरोवरं, आरोविओ पालीसु विचित्ततरुसमूहो, चउसुवि पासेसु  
कयाओ अणाहसालाओ, निरुवियाइं अवारियसत्ताइं, तस्स य सरोवरस्स अचंतभरिअस्सवि विवरदोसेण कइवयदि-  
णमेत्तेणवि सुसंतं सलिलमवलोइऊण विसन्नेण जंपियं रत्ता-अहो निरत्थओ दव्वक्खओ जाओत्ति, परियणेण भणियं-  
देव ! मा संतप्पह, पूरिज्जउ एस सिलाईहिं विवरो, जइ पुण एवं कए न विप्पणस्सइ सलिलं, रायणा भणियं-  
एवं कीरउ, तओ तक्खणं चेव कट्टसिलाइट्टगाहिं पूरिओ सो विवरो, जाए य वरिसयाले निवडंतुद्दामसलिलधा-  
राहिं भरियं सरोवरं, तं कहियं च नरेहिं नरवइणो ।

ताहे तुट्ठो राया पलोयणट्ठा गओ सयं तत्थ । जावऽच्छइ खणमेगं उब्भिन्नो ताव सो विवरो ॥ १ ॥

पुणरवि पुव्वपवाहेण पाणियं तेण विवरमग्गेण । अणिवारियप्पयारं पायाले गंतुमारद्धं ॥ २ ॥

तं दट्ठूण नरिंदो सोगमहासल्लपीडिओ झत्ति । मंताइसत्थकुसलं पुरलोयं वाहरावेइ ॥ ३ ॥

भणइ य तुम्हे सत्थत्थपारया ता कहेह सलिलमिमं । पायाले वचंतं ठाइस्सइ केणुवाएणं ? ॥ ४ ॥

परिचित्तिऊण सम्मं पयंपियं तेहिं देव ! विन्नाणं । नेवऽत्थि एत्थ वत्थुंमि अम्ह किं साहिमो तेण ? ॥ ५ ॥

अह नरवइणा भणियं तहावि साहह किमेत्थ कायवं ? । मा विफलं चिय वच्चउ सुचिरेमं वेव्वियं दवं ॥ ६ ॥

अनर्थदंडे  
कोरण्टक-  
कथा.

॥ ३२० ॥

तेहिं भणियं-देव । जइ एवं ता नगरस्स चाहिं विदेसियसालासु य पवामंडवेसु य देवमंदिरेसु य पहियंसमू-  
हमीलगेसु य तयस्सिजणासमेसु य निरुवेह पुरिसे, पुच्छावेसु य तन्निवासिलोयं विवरपूरणोवायं, जइ पुण तेहिंतो  
कोइ कं पि उवायं कहेज्जा, राइणा भणियं-साहु जंपियं, बडुरयणा वसुंधरा, किमिह न संभविज्जत्ति अणुमन्निऊण  
तघयणं जहाभणियं सबट्ठाणेषु विसज्जिया पुरिसा, ते य जहाभणियविहीए समारद्धा पुच्छिउं ।

इओ य सो कोरिंदगकावालिओ इओ तओ देसंतरेसु परिभमंतो मंततंतोसहीसंगहं कुणंतो धाउवायखन्नवायप-  
मुहदघोवज्जणोवायं परिचितंतो समागओ तमेव पुरं, ठिओ देसियसालाए, सबप्पयारेहिं अपुबुत्तिकाऊण सविणयं  
पुच्छिओ सरोवरविवरपूरणोवायं रायपुरिसेहिं,

एत्यंतरंमि तेणं नियविन्नाणावलेवनडिएण । भणियं साहंकारं कित्तियमेत्तं इमं मज्झ ? ॥ १ ॥

रायपुरिसेहिं कहियं-जइ एवं एहि ता नरिंदपुरो । पयडसु नियविन्नाणं लहसु पसिद्धिं धरावलए ॥ २ ॥

एवं च सो वुत्तो समाणो अप्पणो विन्नाणेण तिहुयणंपि तणं व मन्नंतो पट्ठिओ तेहिं समं रायउलं, कमेण य पत्तो  
अत्थाणमंडवं, मुणित्तिकाऊण पणमिओ राइणा, दवावियं आसणं, निसन्नो एसो, पत्थावे य पुरिसेहिं निवेइओ  
रत्तो तदम्भुवगमो, तओ हरिसवियसियच्छेण भणिओ रत्ता एसो-भो रिसिवर ! करेसु पसायं, पणासेसु सरोवरस्स  
विवरं जेण तण्हापरिसुसियसरीरो चउविहोवि भूयग्गामो सुहेण सबकालं जहिच्छाए जलपाणं कुणइत्ति, कोरिं-



श्रीगुणचंद  
महावीरच०  
८ प्रस्तावः

॥ ३२१ ॥

टगेण भणियं—महाराय ! केत्तियमेत्तं एयं ? दंसेह तं विवरं जेण तदुचियमुवायं साहेमि, एवं वुत्ते दंसिओ सो पएसो, तेणवि तं समंतओ पलोइऊण भणियं—महाराय ! जइ एत्थ विवरे कसिणचउइसीए टप्परकन्नं मंकडवन्नं वोक्कडकुच्चं तालसरूवं कक्कडयच्छं अइवीभच्छं वंभणगोत्तं संजमवंतं पुरिसं खिवेह दिसिदेवयाण वलिदाणपुव्वगं नूणं ता मिलइ एस विवरो, न नीरमुवरमइ थेवंपि, एवं तेण कहिए राइणा सव्वत्थ गामागराइसु पेसिया पुरिसा, निभालिउमारद्धा य जहोवइट्टुगुणविसिद्धं वंभणं, कत्थवि अपेच्छमाणेहि य तेहिं पडिनियत्तिऊण निवेइयं नरिंदस्स, तओ संभंतचित्तेण भणियं राइणा—भो सुमइअमच्च ! किमेवं अस्ह धम्मकज्जे निरुज्जमो तुमं ? न संपाडेसि जहोवइट्टु वंभणंति, इमं च निसामिऊण चिंतियं मंतिणा—अहो धम्मच्छलेण पावज्जणं मुद्धलोयस्स, अहो अणत्थदंडपंडियत्तणं पासंडियाहमस्स, जं एवंविहं पावट्टाणमुवइसंतेण न गणिओ पांचिंदियविणासो न परिचिंतिओ वंभणहचाकलंको न परिकलिओ नियतवलोवो, अहवा किमणेणं ? तहा करेमि जहा पावोवएससमुल्लाववंचा इयरलोयस्सवि न जायइत्ति परिभाविऊण भणियमणेण—देव ! जारिसो अणेण पुरिसो कावालियमुणिणा समाइट्टो तारिसो एसो चेव जइ परं हवइ, ता देव ! धम्मट्टाणे एत्थ जइ एसो चिय खिप्पिही ता किमजुत्तं जाएज्जा ? ‘इष्टं धर्मे नियोजये’दिति लोकेऽपि कथ्यते, राइणा भणियं—एवं होउ। अह समागए चउइसीवासरे सो चिय कोरिंटगो जहोवइट्टुविहिणा “हितं न वाच्यं अहितं न वाच्यं, हिताहितं नैव च भाषणीयम्। कोरिंटकः स्थाह महाव्रती यत्, स्ववाक्यदोषाद्विवरं विशामी ॥१॥” ति

अनर्थदंडे  
कोरणटक-  
कथा.

॥ ३२१ ॥

पुणरुत्तं विरसमारसंतो ब्रलां चैवं पक्खित्तो विवरम्मि पाविओं थं विणांसंति ।

जह सवत्थवि नयरे वित्थरियं जहा कंवालियंतवस्सी । नियजीहादोसेणं पंचत्तं पाविओ विवसो ॥ १ ॥  
ताहे सबोऽवि जणो भासागुणदोसचिंतणुज्जुत्तो । सुमुणिव संपयत्तो किमसकं गरणभीयाण ॥ २ ॥  
इय तुज्झ मए कहिओ गोअम ! उच्छिखलुलवणरुवो । जमंदंडोव पयंडो अणत्थदंडो दुहोहकरो ॥ ३ ॥  
तिन्निवि (एयाइं मए) भणियाइं गुणवयाइं एत्ताहे । चत्तारिवि सीसंती (सिक्खाइं) निसुणसु तं गोअमसगोत्त । ॥ १ ॥  
सापज्जेवरजोगाण वज्जणासेवणोभयसरुवं । सामाइयंति तेसिं पढमं सिक्खावयं होइ ॥ २ ॥  
मणवयणकायदुप्पणिहाणं इह जं न उ विवजेइ । सयकरणयं अणवट्ठियस्स तह करणयं च गिही ॥ ३ ॥  
सामाइए उज्जुत्ता अविचलचित्ता सुरोवसग्गेऽवि । होंति भवपारगामी सत्ता नणु कामदेवोव ॥ ४ ॥  
जह कामदेवसहो संमत्तं पाविओ ममाहिंतो । सामाइए निक्कंपो सुरोवसग्गेऽवि तह सुणसु ॥ ५ ॥  
चंपानयरीए विजियमंडलो जियसत्तू नाम राया, कामदेवो सेट्ठी, नियनियकम्मसंपउत्ता कालं वोळित्ति, अन्नया  
य गामाणुगामं विहरंतो अहं तत्थ समोसढो, तओ उज्जाणपालगेहिं विन्नत्तो राया, जहा-देव ! भवियकमलवो-  
हणदियायरो चरिमत्तिथयरो सहसंववणुज्जाणे समोसढोत्ति, एवं सोचा रत्ता दिन्नं तेसिं महंतं पारिओसियं,  
दवाविओ नयरीए पडहगो-जहा नायकुलकेउणो महावीरस्स भगवओ वंदणत्थं पत्थिवो निग्गच्छइ, ता भो

श्रीगुणचंद  
महावीरच०  
८ अस्तावः

॥ ३२२ ॥

लोणा ! आगच्छेह भगवंतं वंदितं भणिए तक्कालमिलियपुरजणसमेओ समागओ राया ममंतियं । इओ य सो  
कामदेवो पासायतलासीणो एगाभिमुहं जणनिवहमवलोइय परियणमापुच्छेइ—किं नं देवाणुप्पिया ! एस पुरज-  
णसमुदओ एगदिसाए नीहरइ ?, एयमट्टसुवलभिय साहेह, तेहिं निच्छिऊण निवेइयं, जहा—तिहुयणेकनाहो जिणो  
समोसढो तवंदणवडियाए पुरलोगो वचइ, तओ सो समुप्पन्नसद्धाइसओ णहाओ चंदणोवलित्तगतो चाउग्घं-  
टरहारूढो अप्पमहग्घाभरणभूसिओ सियकुसुमदामोवसोहिओ निग्गओ नयराओ, समोसरणासन्ने य ओइन्नो  
रहवराओ पमुक्ककुसुमदामो परिहरियतंबोलो कयमुहसुद्धी एगसाडीएणं उत्तरासंगेणं चक्खुफासे अंजलि-  
पग्गहेणं मणसो एगत्तीभावेण य पविट्ठो समोसरणे, तिव्खुत्तो आयाहिणपयाहिणं काऊण वंदिओ अहं, उवविट्ठो  
सट्ठाणे, निसामिए धम्मे संजायधम्मपरिणामो संमत्तमूलाइं पंचाणुवयाइं तिन्नि गुणवयाइं चत्तारि सिक्खावयाइं  
भावसारं पडिवज्जिय गिहमुवगओ, पालेइ निरइयारं सावगधम्मं । अन्नया य कुडुंबचिंताए जेट्टपुत्तं ठवित्ता पोसह-  
सालाए पडिमापरिकम्मकरणट्ठा सामाइयं पडिवज्जिय ठिओ रयणीए काउसग्गेणं, एत्थंतरंमि तवभावनिचलत्तं  
परिक्खिउं एगो तस्स समीवे ठाउं सुरो सरोसं इमं भणइ—

रे रे वणियाहम ! धम्मकम्ममेवं समुज्झसु जवेणं । पाविट्ठ कोऽहिगारो तुह एरिससाधुचेट्ठासु ? ॥ १ ॥  
मा पविसअकाले चियं कयंतमुहकुहरमुग्गदाढिलं । मम वयणं अवगन्निय पुत्तकलत्ताइपरियरिओ ॥ २ ॥

सामायिके  
कामदेव-  
कथा.

॥ ३२२ ॥

एवं बुत्तोवि न जाव कं पिओ सो तथा महासत्तो । ताव परुट्ठो देवो गइंदरूवं विउवेइ ॥ ३ ॥  
 तयणंतरमुलालियपयंडमुंडो घणोव गजंतो । वेगेण धाविऊणं गेणहइ तं सावयं झत्ति ॥ ४ ॥  
 सघत्तो गत्तं विह्वेइ चलणेहिं पक्खिवइ गयणे । तत्तो निवडंतं पुण पडियच्छइ दंतकोडीहिं ॥ ५ ॥  
 एवं बहुप्पयारं तं पीडिय कुणइ भुयगरूवं सो । पच्छा तिक्खाहिं दढं दाढाहिं तणुं विदारेइ ॥ ६ ॥  
 तहविहु अखुब्भमाणे गिहिप्पहाणंमि कामदेवंमि । रक्खसरूवं काउं उवसग्गं काउमारद्धो ॥ ७ ॥  
 अह खणमेगं घोरट्ठहासकरतालतालणं काउं । परिसंतो सो तियसो भत्तीए तयं इमं भणइ ॥ ८ ॥  
 भो कामदेव ! सावय तियसोऽहं तुज्झ सत्तनाणट्ठा । एत्थागओ महायस ! ता पसिय वरेसु वरमेत्तो ॥ ९ ॥  
 थेवोऽविहु उवयारो विहिओ तुम्हारिसे गुणनिहिंमि । अस्संखसोक्खखंधस्स कारणं होइ निब्भंतं ॥ १० ॥  
 एवं भणिओऽवि सुरेण सायरं वरमुणिच्च थेवंपि । जाव न स कामदेवो कहमवि पच्चुत्तरं देइ ॥ ११ ॥  
 ताव नमंसिय चरणे उक्कित्तिय गुणगणं च से तियसो । परमच्छरियमुवगओ जहागयं पडिनियत्तो य ॥ १२ ॥  
 इयरोऽवि धम्ममाराहिऊण तइए भवंमि निवाणं । सायत्ताणंदसुहं पाविस्सइ निहयकम्मंसो ॥ १३ ॥  
 इय जइ गिहिणोऽवि समुज्जमंति धम्मंमि निचला घणियं । ता उज्झियगिहवासा तवस्सिणो किं पमायंति ? ॥ १४ ॥  
 एवं धीरेण जिणेसरेण जइणो पडुच्च वागरिए । सविसेससंजमुज्जयचित्तो जाओ समणसंघो ॥ १५ ॥

श्रीगुणचंद  
महावीरच०  
८ प्रस्तावः

॥ ३२२ ॥

लोका ! आगच्छेह भगवंतं वंदितं भणिण तक्कालमिलियपुरजणसमेओ समागओ राया समंतियं । इओ य सो कामदेवो पासायतलासीणो एगाभिमुहं जणनिवहमवलोइय परियणमापुच्छेइ-किं नं देवाणुप्पिया ! एस पुरजणसमुदओ एगदिसाए नीहरइ ?, एयमट्टमुवलभिय साहेह, तेहिं निच्छिऊण निवेइयं, जहा-तिहुयणेकनाहो जिणो समोसढो तव्वंदणवडियाए पुरलोगो वचइ, तओ सो समुप्पन्नसद्धाइसओ ण्हाओ चंदणोवलित्तगतो चाउग्घंटरहारूढो अप्पमहग्घाभरणभूसिओ सियकुसुमदामोवसोहिओ निग्गओ नयराओ, समोसरणासन्ने य ओइन्नो रहवराओ पमुक्कुसुमदामो परिहरियतंवोलो कयमुहसुद्धी एगसाडीएणं उत्तरासंगेणं चक्खुप्पासे अंजलिपग्गहेणं मणसो एगत्तीभावेण य पविट्ठो समोसरणे, तिव्खुत्तो आयाहिणपयाहिणं काऊण वंदिओ अहं, उवविट्ठो सट्ठाणे, निसामिए धम्मे संजायधम्मपरिणामो संमत्तमूलाइं पंचाणुवयाइं तिन्नि गुणवयाइं चत्तारि सिक्खावयाइं भावसारं पडिवज्जिय गिहमुवगओ, पालेइ निरइयारं सावगधम्मं । अन्नया य कुडुंवर्चिताए जेट्ठपुत्तं ठवित्ता पोसहसालाए पडिमापरिकम्मकरणट्ठा सामाइयं पडिवज्जिय ठिओ रयणीए काउसग्गेणं, एत्थंतरंमि तन्भावनिचलत्तं परिक्खित्तं एगो तस्स समीवे ठाउं सुरो सरोसं इमं भणइ-

रे रे वणियाहम ! धम्मकम्ममेवं समुज्झसु जवेणं । पाविट्ठ कोऽहिगारो तुह एरिससाधुचेट्ठासु ? ॥ १ ॥  
मा पविसअकाले चियं कयंतमुहकुहरमुग्गदाढिल्लं । मम वयणं अवगन्निय पुत्तकलत्ताइपरियरिओ ॥ २ ॥

सामायिके  
कामदेव-  
कथा.

॥ ३२२ ॥

एवं वुत्तोवि न जाव कं पिओ सो तयां महासत्तो । ताव परुट्ठो देवो गइंदरूवं विउवेइ ॥ ३ ॥  
तयणंतरमुल्लालियपयंडसुंडो घणोव गज्जंतो । वेगेण धाविऊणं गेणहइ तं सावयं झत्ति ॥ ४ ॥  
सघत्तो गत्तं विह्वेइ चलणेहिं पक्खिवइ गयणे । तत्तो निवडंतं पुण पडियच्छइ दंतकोडीहिं ॥ ५ ॥  
एवं बहुप्पयारं तं पीडिय कुणइ भुयगरूवं सो । पच्छा तिक्खाहिं दढं दाढाहिं तणुं विदारेइ ॥ ६ ॥  
तहविहु अखुब्भमाणे गिहिप्पहाणंमि कामदेवंमि । रक्खसरूवं काउं उवसग्गं काउमारद्धो ॥ ७ ॥  
अह खणमेगं घोरट्टहासकरतालतालणं काउं । परिसंतो सो तियसो भत्तीए तयं इमं भणइ ॥ ८ ॥  
भो कामदेव ! सावय तियसोऽहं तुज्झ सत्तनाणट्ठा । एत्थागओ महायस ! ता पसिय वरेसु वरमेत्तो ॥ ९ ॥  
थेवोऽविहु उवयारो विहिओ तुम्हारिसे गुणनिहिंमि । अस्संखसोक्खखंधस्स कारणं होइ निब्भंतं ॥ १० ॥  
एवं भणिओऽवि सुरेण सायरं वरमुणिव थेवंपि । जाव न स कामदेवो कहमवि पच्चुत्तरं देइ ॥ ११ ॥  
ताव नमंसिय चरणे उक्कित्तिय गुणगणं च से तियसो । परमच्छरियमुवगओ जहागयं पडिनियत्तो य ॥ १२ ॥  
इयरोऽवि धम्ममाराहिऊण तइए भवंमि निवाणं । सायत्ताणंदसुहं पाविस्सइ निहयकस्मंसो ॥ १३ ॥  
इय जइ गिहिणोऽवि समुज्जमंति धम्मंमि निचला धणियं । ता उज्झियगिहवासा तवस्सिणो किं पमायंति ? ॥ १४ ॥  
एवं वीरेण जिणेसरेण जइणो पडुच वागरिए । सविसेससंजमुज्जयचित्तो जाओ समणसंघो ॥ १५ ॥

श्रीगुणचंद  
महावीरच०  
८ प्रस्तावः

॥ ३२३ ॥

इय जहं सामाइयनिचलत्तणं कामदेवसद्धेणं । भवभयभीएण कयं अन्नेणवि तह विहेयवं ॥ १६ ॥  
दिसिवयगहियस्स दिसापरिमाणस्सेह पइदिणं जं तु । गमणपरिमाणकरणं वीयं सिक्खावयं एयं ॥ १ ॥  
वज्जइ इह आणयणप्पओगपेसप्पओगयं चेव । सद्धानुरूववायं तह वहिया पोग्गलक्खेवं ॥ २ ॥  
इहलोयंमिवि पइदिण दिसपरिमाणंमि कीरमाणंमि । उभएवि नो अणत्था सागरदत्तस्स व हवंति ॥ ३ ॥  
गोयमसामिणां भणियं—जयगुरु ! को एस सागरदत्तो ? कहं वा तस्स दिसिवयपरिमाणसेवणे इहपारभविया-  
ऽणत्थप्पणासो जाओत्ति साहेसु, महंतमिह कोऊइलं, भगवया जंपियं—परिकहेमि, पाडलिसंडे नयरे धणसारस्स  
इब्भस्स सुओ सागरदत्तो नाम, सो य असेसवसणसयसंपरिग्गहिओ दुल्ललियगोटीए परिगओ, तेहिं तेहिं पयोरेहिं  
दवविणासमायरइ, अन्नया य विणट्ठंमि दवसारे गओ सो देसंतरेसु, पारद्धा य वहवे दविणोवज्जाणोवाया, समासा-  
इयाइं कइयवि दीणारसयाइं, तेहिंवि गहिऊण किंपि भंडं गओ सिंधुदेसं, विणिवट्ठियं तं च, उट्ठिओ बहुलाभो,  
जाओ से परितोसो, चिंतिउमारद्धो य—अहो किं इमिणा अत्थेण ? जो नियसुहियसयणवग्गस्स न जाइ विणि-  
ओगं ?, ता गच्छामि निययनयरं, पेच्छामि जणगं, समप्पेमि तस्स अत्थसंचयं, दुप्पडियारो खु सो महाणुभावो,  
विविहाणत्थसत्थेहिं मए संताविओ य इति परिभाविऊण गहियपवरजचतुरंगमो पयट्ठो पाडलिसंडपुराभिमुहं,  
अविच्छिन्नपयाणएहिं इंतस्स अद्धपहेच्चिय जाओ वासारत्तो, अणिवारियपसरा निवडिया सलिलवुट्ठी, पवूढा गिरि-

देशावका-  
शिके साग-  
रदत्तकथा.

॥ ३२३ ॥

नईओ, नवहरियसइलं जायं धरणिमंडलं, नियनियगेदाइसु अलीणो पहियसत्थो, पहलचिफ्फालोलत्तणेणं दुरंगगी-  
ह्या भूमिमग्गा, तओ सो गंतुमसमत्थो तत्थेव य छाइऊण ठिओ, अन्नदिवसे य चरमाणाणं दुरंगमाणां अणुगंग-  
लग्गो जाव कित्तिंयं पि भूभागं वच्चइ ताव गिरिगुहागओ एगचलणोवरिनिदियसधंगभारो धम्मनिजजोव गुप्तिमंतो  
उयसंतपरोप्परवेरेहिं हरिहरिणसइलसूयरपमुहतिरिपहिं परिचत्तचरणपाणिपहिं उयासिजमाणो चउमासतयोपिरोरां  
पडिबन्नो दिट्ठो अणेण अज्जसमिओ नाम चारणो मुणिवरो, तं च दट्ठूण परगविम्भयमुपट्ठेण धित्तिं सांगरदत्तेण-  
अहो अच्छरियमच्छरियं जमच्चंतदुट्ठसत्तावि एवमेयं महामुणिं पज्जुवासंति, न सपहा एवंप एस सागन्नविक्कमो, ता  
दंसणमवि एयस्स पवित्तयाकारणं, किं पुण विसेसवंदणंति समुच्छलियनिग्गरभत्तिपग्गारनिस्सरंतरोगंचो रागीये  
गंतूण पंचंगपणिवायपुरस्सरं निवडिओ से चलणेसु, मुणिणावि उस्सग्गं पाराविऊण भणोत्तिक्काऊण धम्मलागेण  
पडिलाभिओ एसो, तओ हरिसवियसियच्छिणा भणियं सांगरदत्तेण—भयवं ! किमेवं अइदुफारं सगायरह तुप्पे तपं ? किं  
वा निवसह एवंचिहे एगंतवासे ?, को वा फलविसेसो एयस्स दुरणुचराणुट्ठाणंस्स ?, मुणिणा भणियं—भो महाणुभाय !  
एयस्स अवस्सविणस्सरस्स सरीरस्स एस चेव लाभो जमणुट्ठिज्जइ संजमो, एसो य मणसो एगत्तीकरणमंतरेण न सम्मं  
तीरइ काउं, अओ एगंतवासो सुतंवस्सीहिं सेविज्जइ, जं च तए भणियं—किमेअस्स फलं ?, तत्थ सुंदर ! निगामेसु ।  
नरतिरियाइदुग्गइनिवायसंभवसुत्तिक्खदुक्खाइं । दोगच्चवांहिवेयणजरगरणपमोअस्सवसणाइं ॥ १ ॥



श्रीगुणचंद  
महावीरच०  
८ प्रस्तावः

॥ ३२४ ॥

लीलाए चिय उम्मूलिऊण सचरियसंजमा पुरिसा । वच्चंति सिवपयं जेण तेण (महयं) फलं तस्स ॥ २ ॥  
एत्तो चिय सप्पुरिसा रज्जं लच्छि च भोगविच्छडं । एकपए चिय मोत्तुं संजमजोगं पवज्जंति ॥ ३ ॥  
ते धन्ना कयपुन्ना ते चिय कल्लाणकोसभूया य । जे परलोयसुहावहमेगं धम्मं उवचिणंति ॥ ४ ॥  
तत्तो सागरदत्तेण जंपियं जायपरमसद्धेण । भयवं ! भुवणच्छरियं एकं चरियं परं तुज्झ ॥ ५ ॥  
पढमवए चिय जेणं विणिज्जिओ दुज्जओ विसमवाणो । उम्मूलिओ य मोहो निग्गहिओ कोहजोहोऽवि ॥ ६ ॥  
विद्धंसिओ य लोभो पणासिओ सव्वहाऽभिमाणोऽवि । नियडिक्कुडंगीगहणं निदहं झाणजलणेण ॥ ७ ॥  
एवंविहेण तुमए पवित्तियं तिहुअणंपि नीसेसं । भवकूत्रे निवडंतो जाओ लोगोऽवि सालंबो ॥ ८ ॥  
एको अहं अधन्नो जो तुच्छेहियसुहस्स कजेणं । अज्जवि तुम्ह समीवे पवज्जं नो पवज्जामि ॥ ९ ॥  
चिंतामणिलाभंमिवि अहवा जो जेत्तियस्स किर जोगो । सो लहइ तत्तियं चिय ता मम उचियं कहह धम्मं ॥ १० ॥  
एवं तेण भावसारं निवेइए निययाभिप्पाए पयडिओ साहुणा सम्मत्तमूलो दुवालसवयसणाहो सावगधम्मो,  
गहिओ अणेण, तओ कइवयवासराइं परिचत्तवावारंतरो तमेव सावगधम्मं सप्पभेयं मुणिणो समीवे सम्मं चियाणिऊण  
समागए सरयसमए उवसंतासु गिरिसरियासु वहंतेसु पहिएसु ते जच्चतुरए गहाय गओ नियनयरं, दिट्ठो जणगो,  
समप्पियं च से दविणजायं, जाओ य इमस्स परितोसो, सो य सामाइयाइधम्मनिरओ कालं बोलेइ । अवरंमि य वासरे

देशावका-  
शिके साग-  
रदत्तकथा.

॥ ३२४ ॥

कओ सागरदत्तेण दिसिगमणसंखेवो, जहा अज्ज अहोरत्तंपि न गेहाओ वाहिं नीहरिस्सामित्ति, एत्थ य पत्थावे  
चरणद्वया गया ते जच्चतुरंगा, हरिया दोहिं चोरोहिं, तदवहरणं च निवेइयं रक्खगेहिं सागरदत्तस्स, तेणावि नियध-  
म्माणुद्वाणनिच्चलचित्तत्तणेण निसामिऊणवि न दिन्नं पञ्चुत्तरं, सयणवग्गोवि लग्गो जंपिउं-अहो सागरदत्त ! किमेवं  
कट्टसमो मोणमवलंबिय चिट्ठसि ? न धावसि चोराणुमग्गओ, जओ गोसामिए उदासीणे तयणुचरा कह पयट्ठंति ?,  
सागरदत्तेण भणियं-होउ किंपि, न विराहेमि मणागंपि नियवयं, तओ निच्छयमुवलम्भ रोसेण जहागयं पडिनियत्तो  
सयणवग्गो, इओ य-ते दोऽवि तकरा पिट्ठओ कुडियमित्तमपेच्छमाणा निम्भया निरुविग्गा गंतुं पयत्ता, गच्छंताण  
य नीसेसतुरगगंहणलोभदोसेण समुप्पन्नो दोण्हंपि परोप्परं वहपरिणामो, तओ भोयणसमए पविट्ठा एगंमि गामे,  
कारावियं रंधणीगिहेसु पुढो पुढो थालीसु भोयणं, पक्खित्तं च अणलक्खिज्जमाणेहिं तत्थ दोहिवि महाविसं, सिद्धे  
य भोयणे कयतकालोचियकायवा अमुणिंयावरोप्पराभिप्पाया उवविट्ठा भोयणं काउं, अह पढमकवल-  
कवलणेऽवि अभिभूया ते विसविगारेण, निवडिया महीयले, कओ महाणसिणीए कलयलो, मिलिओ गामलोगो, क-  
हिओ अणाए वुत्तंतो, ते य विसाभिभूया गया तक्खणमेव पंचत्तं, तुरंगमावि निस्सामियत्तिकाऊण रक्खिया  
गामजणेण, इओ य-सागरदत्तो पडिपुत्तंमि देसावगासियनियसे जिणविंवपूयापडिवत्तिं काऊण कइययपुरिस-  
पक्खित्तो चलिओ तुरयाणुमग्गेण, अच्चंतविसिट्ठसउणोवलंभे य जायलाभनिच्छओ समुप्पन्नचित्तुच्छाहो अविलंबि-

श्रीगुणचंद  
महावीरच०  
८ प्रस्तावः

॥ ३२५ ॥

यगईए संमुहमागच्छन्तं पहियलोयं तुरयपउत्तिमापुच्छंतो कम्मधम्मसंजोएण पत्तो तं चेव गामं, पुट्ठो य तन्निवासि-  
जणो, तेणावि समप्पिया तुरगा, कहिओ य चोरवुत्तंतो, सागरदत्तेणऽवि साहिओ गामलोगस्स नियभवइयरो, अओ  
जिणिंदधम्मपसंसा ॥

अह सागरदत्तेणं चिंतियमुप्पन्नभवविरागेण । जह जिणधम्मपभावो पच्चक्खं चिय मए दिट्ठो ॥ १ ॥  
ता किं अज्जवि वामूढमाणसो तिक्खदुक्खदायारं । घरवासं पासंपिव सयखंडं नेव तोडेमि ? ॥ २ ॥  
इय चिंतिऊण चत्ताइं तेण सत्ताणि पावठाणाणि । गहिया जिणिंददिकखा सिवसुहभागी य जाओ य ॥ ३ ॥  
इय इंदभूइ ! सिक्खावयस्स बीयस्स पालणे भणियं । फलमेत्तो तइयं पुण भणिमो सिक्खावयं ताव ॥ ४ ॥ १० ॥  
आहारदेहसक्कारवंभवाचारचागनिप्फण्णं । इह पोसहंति वुच्चइ तइयं सिक्खावयं पवरं ॥ १ ॥  
दुविहं च इमं नेयं देसे सवे य तत्थ सव्वंमि । सामाइयं पवज्जइ नियमा साहुव उवउत्तो ॥ २ ॥  
अप्पडिदुप्पडिलेहियऽपमज्जसेज्जाइ वज्जई एत्थ । सम्मं च अणणुपालणमाहारार्इसु सवेसु ॥ ३ ॥  
पोसेइ कुसलधम्मे जं ताहाराइचागणुट्ठाणं । इह पोसहोत्ति भण्णइ विहिणा जिणभासिएणेव ॥ ४ ॥  
पाणंतिगोवसग्गेऽवि पोसहं घेत्तु जे न खंडंति । जिणदासो इव ते सुरसुहाइं मोक्खं च पावंति ॥ ५ ॥  
गोयमसामिणा भणियं-भुवणेक्कदिवायर ! को एस जिणदासो ?, भयवया वागरियं-साहेमि, वसंतपुरे नयरे

देशावका-  
शिके साग-  
रदत्तकथा.

॥ ३२५ ॥

અચંતમવિરત્તચિત્તો સઘ્નુવદ્વપરમત્વભાવિયમર્દ જિણદાસો નામ સાવગો, નાવઘ પડિકૂલચારિणी મંગલમુત્તિવ  
તિપરાગાણુગયા મંગલા નામ સે भारिया, સો ય વહુસો સામાઈયપોસહતવોવિસેસનિસેવણાભિરઓ પવજ્જં પડિ-  
વજ્જિઉકામો વલતુલણં કરેઈ । સા ય સે भारिया અચંતસંકિલિટ્ટયાઈ ઉકઢવેયત્તણેણ સમણં વ તં વિજિયમયણ-  
વિયારમવલોઈઁણ કરુસગિરાઈ નિબ્ભચ્છંતી ભણઈ—

હે મુદ્ધ ! ધુત્તલોણ વંચિઓ તંસિ વિજ્ઞમાણેવિ । જો ભોગે વજ્જિત્તા અવિજ્ઞમાણં મહસિ મોક્કલં ॥ ૧ ॥  
નિલક્ષણ ! દુરણુચરં તવોવિસેસં નિસેવિઙ્ગં કીસ । સોસેસિ નિયસરીરં ? કિં અપ્પા વેરિઓ તુજ્ઞ ? ॥ ૨ ॥  
જહ તં વિસયવિરત્તો પદમં ચિય તા ન કીસ પવઈઓ । જાઓ ? જમિણિહ મં પરિણિઁણ એવં વિઙ્ગવેસિ ॥ ૩ ॥  
જહ તં મમનિરવેક્ખી જહાભિરુદ્ધં કરેસિ એવં ચ । અહમવિ તુહ નિરવેક્ખા જં ભાવઈ તં કરિસ્સામિ ॥ ૪ ॥  
એવં તીઈ મજ્ઞાયવજ્જિઈ જંપિયંમિ જિણદાસો । ઉવસમભાવિયચિત્તો મહુરગિરાઈ ઇમં ભણઈ ॥ ૫ ॥  
મહે ! સદ્ધમ્મપરમ્મુદ્ધાસિ નિમ્મેરમુલ્લવસિ તેણ । તુચ્છેઽવિ વિસયસોક્કલે કહઽન્નહા હોજ્જ પડિવંધો ! ॥ ૬ ॥  
ધોયં જીયં જરમરણરોગસોગાઽણિવારિયપ્પસરા । એવં ઠિઈવિ કહ સુયણુ ! કુણસિ તં વિસયવામોહં ? ॥ ૭ ॥  
તીઈ(તા) મણિયં હોઝ અલં તુજ્ઞ સદ્ધમ્મદેસણાઈ મમં । સયમવિ નટ્ટો દુચ્છેદ્ધ ! ધિટ્ઠ અન્નંપિ નાસેસિ ॥ ૮ ॥  
ઈય તીઈ દુટ્ઠનિદ્ધુરમુદ્ધીઈ દુવિણયમૂલભૂમીઈ । નિબ્ભચ્છિઓ સમાણો જિણદાસો મોળમલીણો ॥ ૯ ॥

अन्नया य चउहसिदिणंमि पडिवन्नो अणेण उववासो गहिउं चउविहंपि पोसहं, ठिओ य गिहेगंतभूयाए जाण-  
सालाए निसिंमि काउस्सग्गेण, मंगलावि मयरद्धएण वाहिज्जमाणी उज्झियकुलाभिमाणा अगणियाववाया नीय-  
गामिणीउ कामिणीउत्ति य पवायं सच्चविन्तिव घडिया सह विडेण, गेहजणलज्जाए पयडं चिय अकज्जमायरिउ-  
मपारयंती पुवदिन्नसिंगारेण विडेण सद्धिं रयणीए समागया तं चेव जाणसालं, अच्चंधयारत्तणेण काउस्सग्गद्वियं  
जिणदासमपेच्छमाणीए तंमि चेव पएसे पक्खित्तो लोहकीलगतिकखपइट्ठाणो पलंको अणाए, तक्कीलगेण य समी-  
ववत्तिणो जिणदासस्स विद्धो सहावकोमलो चलणो, सा य विडेण सद्धिमकज्जमायरिउमारद्धा ।

जिणदासो पुण अइतिकखलोहकीलगविभिन्नचलणतलो । उप्पन्नगाढवियणो चिंतिउमेवं समाढत्तो ॥ १ ॥

मा ! जीव काहिसि तुमं मणागमेत्तंपि चित्तसंतावं । सयमवि दिट्ठे विलिए भज्जाएँ अकज्जसत्ताए ॥ २ ॥

जं परमत्थेण न एत्थ कोऽवि भज्जा व सयणवग्गो वा । किंतु सकज्जविणासे सवंपि परंमुहं ठाइ ॥ ३ ॥

अविय-तावच्चिय दंसइ पणइभावमायरइ ताव अणुकूलं । निययत्यविसंवायं जाव न पेच्छइ पणइलोगो ॥ ४ ॥

ता एयाए धम्मत्यसुन्नचिंताए एत्थ को दोसो ? । इत्थी सभावओ चिय दुग्गेज्झा वुचई जेण ॥ ५ ॥

अइरक्खियावि अइपालियावि अइगाढरूढपण्यावि । वाढं उवयरियाविहु देइ दुरंतं भयं महिला ॥ ६ ॥

एत्तो चिय सुणिवसभा सुवुद्धिमाहप्पमुणियपरमत्था । पच्चक्खरक्खसीहि व महिलाहिं समं न जंपंति ॥ ७ ॥

ता ते चिय इह धन्ना सुलद्धनियजम्मजीवियफला य । जे उज्झिऊण महिला संजमसेलं समभिरूढा ॥ ८ ॥  
 धन्नो सणकुमारो जो पुरमंतेउरं सिरिं रज्जं । उज्झित्ता निक्खंतो परमप्पा मोक्खसोक्खकए ॥ ९ ॥  
 एको अहं अधन्नो जो कुलडाए अणत्थमूलाए । दुट्ठमहिलाए कजे एवं वुत्थोऽग्निं घरवासे ॥ १० ॥  
 अहवा समइकंतत्थसोयणेणं इमेण किं बहुणा ? । एत्तोविं सच्चविरइं भावेणाहं पवज्जामि ॥ ११ ॥  
 इय चित्तिऊण तेणं तिविहंतिविहेण वोसिरिय संगं । पंचपरमेट्ठिमंतो पारद्धो सरिउमणवरयं ॥ १२ ॥  
 अह पवलचलणपीडोवकमियाऊ चइत्तु नियदेहं । भासुरसरीरधारी देवो वेमाणिओ जाओ ॥ १३ ॥  
 आउक्खयंमि तत्तो सो चविऊणं विदेहवासंमि । निट्ठवियकम्मगंठी पाविस्सइ सासयं ठाणं ॥ १४ ॥  
 इय गोयम ! निचलमाणसस्स जिणंभणियधम्मकज्जंमि । जायइ जीवस्स धुवं अकालखेवेण सिवलामो ॥ १५ ॥ ११ ॥  
 भणियं तइयं सिक्खावयं इमं संपयं पुण चउत्थं । एदंपज्जसमेयं जह होइ तहा निसामेह ॥ १ ॥  
 अन्नार्हणं सुद्धाण कप्पणिज्जाण देसकालजुयं । दाणं जईणमुचियं चउत्थ सिक्खावयं एयं ॥ २ ॥  
 सच्चित्तनिक्खिणयं वज्जइ सच्चित्तपिहणयं चेव । कालाइकम परववएस मच्छरिय पंचेव ॥ ३ ॥  
 अन्नार्हण पयाणं निचंपिय होइ गिहिजणस्सुचियं । जइणो पडुच किं पुण पोसहउववासपारणए ? ॥ ४ ॥  
 अतिहीण संविभागं नूणमकाउं न जे पजीमंति । ते साहुरक्खिओ इव देवाणवि होंति महणिज्जा ॥ ५ ॥

श्रीगुणचंद  
महावीरच०  
८ प्रस्तावः

॥ ३२७ ॥

गोयमेण जंपियं—भुवणत्तयसामिसाल ! साहेसु को एस साहुरक्खिओ?, कहां देवमहणिज्जोत्ति, भगवया वागरियं—  
आयन्नसु—अत्थि सयलदिसावलयविक्खाया वाणारसी नाम नयरी, तहिं वसू नाम राया, सवन्तेउरपहाणा वसुमई  
देवी, वणियलोयसम्मओ जिणपालिओ सेट्ठी, जिणमई से भारिया, एयाणि चत्तारिवि परमसावगाणि परोप्परं  
परूढगाढपेम्माणि य एकचित्तत्तणेणं जिणधम्मं पालिंति, अन्नया सेट्ठिणी नरिंदपत्ती य पंचवन्नसुरहिकुसुमदहि-  
यक्खसुगंधिगंधधूववासपडिपुन्नपडलकरपरियरियाओ गयाओ जिणालयं, विरइया अणेगविच्छित्तिमणहरा सव-  
न्नुविंवाण पूया, तओ विचित्तथुइथुत्तदंडएहिं सुचिरं जिणं थुणिऊण पयाहिणं दाउं वाहिं नीहरिया, ताहिं एगत्य  
पएसे अचंतदुइंसणो मच्छियाजालाभिणिभिणारावभीसणो वणमुहनिस्सरंतकिमिसंवलियपूयप्पवाहो सडियंगुलि-  
नासोट्टो कुट्टवाहिविणट्टदेहो दिट्टो एगो पुरिसो, तं च दइण देवीए भणियं—भो महाणुभाव ! कीस सबन्नूणमासा-  
यणं इहट्ठिओ करेसि?, तेण भणियं—नाहमेत्थ निवासत्थी समागओ, किंतु चेइयवंदणत्थं, सेट्ठिणीए भणियं—देवि !  
जइ इत्तियमेत्तमेव पओयणं पडुच्च अच्छइ ता अच्छउ, को दोसो?, जओ सुस्समणावि जाव चेइयाइं वंदंति  
वक्खाणं वा करिंति सिणाणं वा पेच्छंति ( सिस्साणं वायणं वा पयच्छंति पु. ) ताव जिणभवणे निवसंति, देवीए  
भणियं—तहावि विणट्टसारीरत्तेण न जुज्जइ एयस्स अच्छउं, अहवा निट्ठीवणाइं अकरिंतो सम्मसुवउत्तो निमेसमित्तं  
जिणविंवावलोयणेण अप्पणो समाहिमुप्पाएउ, किमजुत्तं?, सेट्ठिणीए भणियं—एवमेयं, को महाणुभावस्स एयस्स

अतिथि-  
संविभागे  
साधुरक्षित-  
कथा.

॥ ३२७ ॥

अवराहो?, दुप्पडियाराणि पावकम्माणि एवंविहाहिं विडंबणाहिं कयत्थिंति निस्सरणं पाणिगणं, देवीए भणियं—  
 अलमुच्चावयभणियघेणं, भो महाणुभाव ! सांहम्मिओत्तिकाऊण पूयणिज्जोसि तुमंति ता साहेसु—किं ते पियं की-  
 रउ?, तेण जंपियं—किमेत्थ कायघं अत्थि?, पुधिं दुच्चिन्नाणं कम्माणं फलविवागमणुहवंतस्स समाहिमरणं चिय मे  
 पत्थियघं, तंपि भागवियज्जएण दुल्लंभं व लक्खिज्जइ, ताहिं भणियं—कहमेवं जाणिज्जइ?, कुट्टिणा भणियं—अहं  
 मंदभग्गो, अइसइणा भणियं—जहा तुमं मरणकाले सम्मत्तं वमिहिसि तेणेमं जाणामि, चित्तसंतावं च उव्वहामि,  
 ताहिं जंपियं—भइ ! तुह जइ एवं ता विसममावडियंति, एवं च खणमित्तं विगमिऊण विम्हियमणाओ गयाओ  
 ताओ सगिहं । अन्नंमि य वासरे चउनाणोवगओ सूरतेओ नाम सूरी समोसरिओ, तओ सेट्ठिणी देवी य गया  
 तघंदणत्थं, सुया धम्मकहा, पत्थावे य पुच्छियं ताहिं—भयवं ! पुधं चेइए गयाहिं अम्हेहिं जो कुट्टी दिट्ठो सो कीस  
 संमत्तं मरणसमए वमिही?, सूरिणा भणियं—सो पज्जंतसमए माणुस्सेसु आउवंधं काऊण उप्पज्जिही, न य गहिय-  
 सम्मत्तो अणंतरभवे मणुअत्तं तिरियत्तं वा पावइ, जेण भणियं—

सम्महिट्ठी जीवो विमाणवज्जं न वंधए आउं । जइ उ न संमत्तजढो अहव न वद्धाउओ पुधिं ॥ १ ॥

रायपत्तीए भणियं—कहिं पुण सो उव्वज्जिही?, सूरिणा जंपियं—एयाए सेट्ठिणीए पुत्तत्ताएत्ति, एवं सोचा वि-  
 म्हियाओ वंदिय सूरिं नियत्ताओ ताओ सगिहं, निरुवाविओ भाविपुत्तसिणेहेण सो कोट्टी सेट्ठिणीए, न य कहंचि



दिट्ठो, अइकंतेसु य कइवयवासरेसु सो मरिऊण पाउब्भूओ तीए सेट्ठिणीए गब्भे, जाओ य पडिपुत्रदियहेहिं, कयं वद्धावणयं, समागओ राया सह वसुमईए देवीए, कयमुचियकायवं सेट्ठिणा, तं च देवकुमारोवमं दारयं पेच्छिऊण भणियं देवीए-भो जिणमइ ! पेच्छ अच्छरियरूवं कम्मपरिणइं,

नीणंतपूयपवहो भीसणवणनिस्सरंतकिमिजालो । मच्छीहिं भिणिभिणंतो सडियंगुलि गलियनासोट्ठो ॥ १ ॥

एवंविहो वराओ तुज्झ गिहे पवरविहवकलियम्मि । उववन्नो कयपुन्नो सो कोट्ठी कह विसिट्ठंगो ? ॥ २ ॥

सेट्ठिणीए भणियं-देवि ! एवंविहे संसारविलसिए परमत्थेण न किंपि अच्छरियमत्थि, जओ-कम्मवसवत्तिणो पाणिणो केण केण पयारेण न परिणमंति?, देवीए जंपियं-एवमेयं, अह अइकंते वारसाहे कयं से नामं साहुरक्खियत्ति, कालेण य पत्तो कुमारभावं, गाहिओ कलाओ, संपत्तजोवणो सोहणंमि तिहिमुहुत्तंमि परिणाविओ इब्भकन्नगं, विवाहपज्जंते य समाहूओ सेट्ठिणा देवीए समेओ राया, पूइओ पहाणरयणाभरणवत्थसमप्पणेण, पाडिओ ताण चलणेसु नववहसणाहो साहुरक्खिगो, सो य देवीए सहासं भणिओ-वच्छ ! पेच्छ तं तारिसं इमं च एरिसं, साहुरक्खिएण भणियं-अंव ! न याणामि इमस्स अत्थं, एवं च तेण कहिए हसियं सहत्थतालं परोप्परं देविसेट्ठिणीहिं, तओ रत्ता जंपियं-सेट्ठि ! किमेयाओ हसंति?, सेट्ठिणा भणियं-देव ! अहंपि सम्मं न याणामि, अओ ममावि कोउगं, पुच्छउ देवो, तओ पुच्छियं रत्ता-देवि ! किमेवं तए वागरियं?, सव्वा साहेहत्ति वुत्ते तीए

सिद्धो पुष्टो कुट्टिबुत्तंतो, तं च सोद्या सुमरियपुवभवो सादुरक्खिओ परं निवेयमावन्नो संसारवासस्स । अन्नया य  
तप्पुन्नपन्मारसमागरिसिओव समागओ विजयघोसो नाम सूरी, पउरलोगेण समं सो गओ तव्वंदणत्थं, सविणयं  
पणमिऊण निसन्नो गुरुचलणंतिण, सुया धम्मदेसणा, तद्दाविहकम्मक्खओवसमेण जाओ से देसविरइपरिणामो,  
पडिवन्नो य सूरिसमीवे दुवालसरूवो सावगधम्मो, अन्नया य अट्ठमीए कओ अणेण पोसहोववासो, इओ य  
कप्पसमत्तीए विहरिया सूरिणो, सो य पारणगदिवसे पोसहं पाराविऊण उचियसमए अतिहिसंविभागं काउमणो  
पडिओ य सादुसमीवे, गेहाओ नीहरंतो य भणिओ जणणीए—वच्छ ! कहिं वचसि?, भुंजेसु ताव सिद्धं वट्ठइ, सादुर-  
क्खिएण भणियं—अम्मो ! अतिहिसंविभागवयं पडिवज्जिय कहं गुरुणो असंविभाइयं सयं भुंजामि ?, ता वाहरामि  
ताव सादुणो, तीए भणियं—पुत्त ! विहरिया अन्नत्थं भयवंतो किं न याणसि तुमं ?, एवं तीए कहिए गहिओ सो  
रणरणेण समाहओ सोगेणं पारद्धो अरईए, नियत्तिऊण य पडिओ मंचिए, चिंतिउमाढत्तो य—

कह पोसहोववासो कओ मए ? कह व विहरिया गुरुणो ? । अन्नं चिंतियमन्नं च निवडियं मंदभग्गस्स ॥ १ ॥

अहवा मरुत्थलीए किं कप्पतरू कयावि उग्गमई । मायंगमंदिरे वा लज्जइ अइरावणो हत्थी ? ॥ २ ॥

आजम्मरोरगेहे विसट्ठकंदोट्टदलविसालच्छी । लच्छी कयावि पविसइ करयलरेहंतसरसिरुहा ? ॥ ३ ॥

श्रीगुणचंद  
महावीरच०  
८ प्रस्तावः

॥ ३२९ ॥

अम्हारिसस्स किं वा पुत्रविहीणस्स एत्थ पत्थावे । अधरियचिंतामणिणो मुणिणो भिक्खट्टया इति ? ॥ ४ ॥  
सग्गापवग्गसंसग्गमूलहेऊवि मज्झ पावस्स । एवं च निरणुबंधो मन्ने सम्मत्तलाभोऽवि ॥ ५ ॥  
इय सो जाव अट्टदुहट्ठो सोगसमुदयरुद्धकंठो अच्छइ ताव जणणीए पुणो भणिओ-अहो पुत्त ! मा चिरावेहि,  
करेसु भोयणंति, साहुरक्खिएण भणियं-अम्मो ! अलाहि भोयणेण, जइ समणे एत्थ पत्थावे सहत्थेण न पडि-  
लाभेमि ता निब्भंतं न भुंजामि, एत्थंतरे तद्देसमागएण दिट्ठो सो देवेण, तओ चिंतियमणेण-अहो महाभागस्स  
परिणई अहो निययसरीरनिरेक्खया, ता तहा करेमि जहा पारेइत्तिविगप्पिऊण अणेण विउविओ साहुसंघाडगो,  
पविट्ठो तस्स गेहे, तं च पेच्छिऊण ससंभमं भणियं जणणीए-पुत्त ! तुह पुन्नोदएण आगया कत्तोऽवि साहुणो,  
ता एहि सहत्थेण पडिलाभेसु संपयं, एवं सोच्चा अणणसरिसं हरिसुल्लासं वहंतो झत्ति परिचत्तसयणिज्जो वंदिऊण  
तवस्सिणो परमभत्तीए पडिलाभिऊण य कयकिच्चमप्पाणं मन्नंतो केत्तियंपि भूभागमणुगमिय नियत्तिओ सगिहं,  
गिलाणाइचितं च काऊण जिमिओत्ति । एवं सो उभयलोगसाहगो जाओ ।

इय गोयम ! संखेवेण तुज्झ कहियाइं बारस वयाइं । एत्तियमेत्तो य इमो सावधम्मस्स परमत्थो ॥ १ ॥

एयस्स सेवणेणं गंतूण भवन्नवस्स पज्जंतं । पत्ता अणंतजीवा सासयसोक्खंमि मोक्खंमि ॥ २ ॥

ते धन्ना सप्पुरिसा तेहिं सुलद्धं च माणुसं जम्मं । जे भावसारमतुलं एयं धम्मं पवज्जंति ॥ ३ ॥

अतिथि-  
संविभागे  
साधुरक्षित-  
कथा.

॥ ३२९ ॥

ता गोअम ! जं तुमए पुवं पुट्टोहि कह भवम्मि जिया । पुणरुत्तमणंतदुहोहपीडिया परिभमंतित्ति १, ॥ ४ ॥  
 तत्पेमं चिय नणु मूलकारणं जन्न सहसिसं विरइं । सम्मत्तगुणसणाहं भणियविहाणेण गिण्हंति ॥ ५ ॥  
 एयं कहिए तित्थंकरेण गिहिधम्मवित्थरे तुट्टो । पयवीढलीढसीसो पढमो सीसो जिणं थुणइ ॥ ६ ॥  
 जय तियलोयपियामह ! वम्महमाहप्पनिदलणधीर ! । ललणासिंगारुम्भडकडक्खखेवेऽवि अक्खुम्भ ! ॥ १ ॥  
 भवगत्तपडंतजणोहसरण रणरहिय महिय तियसेहिं । नायकुलंवरपुत्तिममयंक ! जय जय निरायंक ! ॥ २ ॥  
 एणेणवि जह तुमए पयत्थसत्था जए पवित्थरिया । तह अन्नतित्थिएहिं न समत्थेहिवि मणागंपि ॥ ३ ॥  
 तुह अत्थसारलेसं मन्ने रोरव तित्थिया घेत्तुं । जाया अनन्नमाहप्पगघिया नाणविभवेण ॥ ४ ॥  
 जं न हणिज्जइ दिणयरकरपसरपईवजोइरयणेहिं । चित्तन्मंतरलीणं तंपि तमं पडु ! हयं तुमए ॥ ५ ॥  
 असरिसं जयगुरुगुरुभत्तिपभावनिस्सरंतरोमंचो । इय थोऊण निविट्टो सट्ठाणे गणहरवरिट्टो ॥ ६ ॥  
 एत्थंतरे दुवालसवयदेसणानिसामणसमुप्पन्नभववेरगोहिं केहिवि पडिवन्ना देसविरई, अन्नेहिं उज्झियाइं मिञ्चत्त-  
 कायघाइं, केहिवि गहिया सवविरई । इओ य सेणियनरिंदो थोवमेत्तंपि विरइं काउमसमत्थो तित्थाहिवं पणमिऊण  
 मणिउमाढत्तो-भयवं ! जो अचंतमहारंभो महापरिग्गहो सवहा विरइरहिओ सो कहं भवन्नवं नित्थरिस्सइ १,  
 जयगुरुणा भणियं-भो नरिंद ! सेणिय ! देसविरइं वा सवविरइं वा काउमपारयंतो सम्मत्ते निच्चलो होजा, एवं

श्रीगुणचंद  
महावीरच०  
८ प्रस्तावः

॥ ३३० ॥

जयगुरुणा उवइष्टे तहत्ति पडिवज्जिऊण जहागयं पडिगओ राया नमंतमउलिमंडलो, देवलोगं पट्टिया आखंडला,  
विइकंता पढमा पोरसी । अह चारणगणेहिं थुवंतो जयगुरु सिंघासणाओ समुट्टिऊण पुवं चिय सुरविरइयंमि  
देवच्छंदयंमि सुहसेज्जाए निसन्नो । गोयमसामीऽवि कप्पोत्तिकाऊण भगवओ मणिपायपीढासीणो धम्मदेसणं  
काउमारद्धो । सो य केत्तियं पुवभवाइं साहइ ? केरिसो वा लक्खिज्जइ ?, तत्थ भन्नइ—

संखाईए उ भवे साहइ जं वा परो उ पुच्छेज्जा । न य णं अणाइसेसी वियाणई एस छउमत्थो ॥ १ ॥

असुरसुरखयरकिन्नरनरतिरिया मुक्कसेसवावारा । सवणंजलीहिं तद्देसणामयं परिपियंति दढं ॥ २ ॥

आइक्खइ गणनाहो धम्मं ता जाव पोरिसी बीया । पच्छा पइदिणक्किच्चं सामायारिं समायरइ ॥ ३ ॥

एवं च समइकंतेसु कइसुवि वासरेसु एयंमि वासरे सिंहासणे निसन्नस्स वद्धमाणस्स नियनियट्ठाणनिविट्ठे चउ-  
विहेवि देवनिकाए पंजलिउडं पज्जुवासमाणे य सेणियमहानरिंदे एगो सुरो मायासीलयाए कुट्टिरूवं विउवि-  
ऊण सरसगोसीसचंदणरसच्छडाहिं सरीरविणिस्सरंतपूयसंकाकारिणीहिं भयवओ समीवमल्लीणो चलणकमलवि-  
लेवणं काउमारद्धो, तं च तहाविहं दुगुंछणिज्जरूवं पेच्छिऊण चिंतियं सेणिएण—अहो को एस दुरायारो गलंत-  
गाढकोढसुढियसरीरदुग्गंधगंधवाहेण दूमितो सयलंपि परिसं भुवणेक्कगुरुणो समीवट्ठिओ एवं अच्चासायणं  
कुणइ ?, अहवा कुणउ किंपि ताव उट्टियाए पुण परिसाए अवस्सं मए निग्गहियवोत्ति विकप्पंतेण छीयमाणेण

गणधरदे-  
शना दडु-  
रांक देवा-  
गमः

॥ ३३० ॥

अह कोढियसुरेण भणियं-जीवसुत्ति, मुहुत्तंतरे य वोलीणे छिक्कियमभयंकुमारेण, पुणो तेण भणियं-जीवाहि वा मराहि वा, कालसूयरिण छीए भणियं-मा जीव मा मर, समइकंते य खणंतरे भुवणेक्कगुरुणा छीयं, भणियं-मर-सुत्ति, तं च सोचा अच्चंतजिणनाहपक्खवाएण वियंभियपवलकोवानलेण राइणा भणिया समीववत्तिणो पुरिसा-अरे एयं दुरायारं गुरुपच्चणीयमुट्ठियाए परिसाए हत्थे घेत्तूण मे समप्पेज्जह जेण दंसेमि दुव्विणयफलं, तेहिं भणियं-जं देवो आणवेइत्ति, अह जायंमि पहरपज्जवसाणे सट्ठाणं पट्ठिएसु तियसेसुं सो कुट्ठिमुरो जयगुरुं परमायरेण पणमिज्जणं गंतुमारद्धो, ते य पुरिसा नरिंदाएसमणुवत्तंता तं घेत्तुमुवट्ठिया, तयणंतरं च एस गओ एस गओ सो कुट्ठी एवमु-ल्लयंतान रायपुरिसाण पुरओ देवो अइसणं पत्तो, [इय वाहरंतेहिं] तेहिं विलक्खीभूयमाणसेहिं निवेइयमेयं राइणो, अह बीयदिवसे परमकोज्जहलमुव्वहंतेण रत्ता पत्थावे पुच्छिओ जयगुरु-भयवं! अइकंतवासरे तुम्हं समीववत्ती कुट्ठ-विलीणकाओ अविभावणिज्जसरूवो को पुरिसो आसि?, भयवया जंपियं-महाराय! देवो, सो संपयं दहुरंक्खिमाणे समुप्पन्नो, रत्ता भणियं-कहं चिय?, भगवया वागरियं-निसामेसु,

अत्थि वच्छाविसए कोसंबी नाम नयरी, तहिं च सयाणिओ नाम नरवई, साडुयगो नाम माहणो, सो य ज-म्माणंतरमेव रुंददारिद्रोवह्वपीडिओ कहकहवि कणवित्तीए कालं गमेइ, अन्नया य आवन्नसत्ताए खरमुहीनामाए भज्जाए भणिओ एसो-भो वंभण! आसन्नो पसवसमओ, न य घरे घयतंदुलाइं अत्थि, ता कीस निचिंतो चिट्ठसि?

श्रीगुणचंद  
महावीरच०  
८ प्रस्तावः

॥ ३३१ ॥

तेण भणियं-भहे ! पइदिणभिक्षाभमणेण नट्टा मे बुद्धी, ता तुमं चेव साहेसु को एत्थ पत्थावे दवज्जणोयाउत्ति ?,  
तीए भणियं-गच्छ, पत्थिवं ओलग्गेसु सवायरेण, न तं विणा अवणिज्जइ दालिहंति बुत्ते सो पइदिणं कुसुमहत्यो  
पत्थिवं ओलग्गिउमाढत्तो, अन्नया य अणुकूल्याए विहिणो से विणयमवलोकण तुट्ठो राया, भणियं च तेण-भो  
बंभण ! मग्गसु जहिच्छियंति, तेण भणियं-देव ! बंभणिं आपुच्छिऊण मग्गामि, अणुमन्निओ रत्ता गओ गेहंमि,  
भणिया बंभणी-भहे ! तुट्ठो राया, ता साहेसु किमहं पत्थेमि ?, तीए भणियं-पइदिवसमग्गासणे भोयणं दीणारं  
दक्खिणाए दिणमज्जे एगवारं ओसारयं च पत्थेहि, एत्थियमेत्तेण चेव तुज्झ पओयणं, किमन्नेण किलेसायासनि-  
बंधणेण अहिगाराइणत्ति ?, पडिस्सुयमणेणं, निवेइयं च एयं रत्तो, पडिवन्नं च तेण, एवं च राइणो पुरो पइदिणं  
भुंजमाणो जाओ सो महाधणो, रायाणुवित्तीए य पइदिणमामंतिज्जइ भोयणकरणे य मंतिसामंतेहिं, दक्खिणालोभेण  
य सो गले अंगुलीपक्खेवपुव्वयं पुव्वभुत्तभोयणं वमिऊण पुणो पुणो अवरावरगिहेसु भुंजमाणो गहिओ कुट्टवाहिणा,  
संभिन्ना सव्वेवि तस्स सरीरावयवा, दुहंसणोत्ति पडिसिद्धो राइणा, तट्टाणे से पइट्ठिओ जेट्ठपुत्तो, सो य रायउलंमि  
भोयणं लहइ, इयरो य वेलाए भोयणमेत्तमवि अपावमाणो पुत्तेहिं एगंतपरिचत्तो परिभूयमप्पाणं कलिऊण हिययंतो  
अमरिसमुव्वहंतो चित्तेइ-अहो अकयन्नुओ खलसहावो य पुत्ताइपरियणो जेण मं एवं परिभवइ, ता तहा करेमि जहा  
एयस्सवि एसा अवत्था हवइत्ति चित्तिऊण वाहराविओ तेण जेट्ठपुत्तो, भणिओ य-वच्छ ! बहुरोगभरविहुरियस्स

संज्ञक-  
द्विजकथ

॥ ३३१ ॥

तुम्हारिसमुहकमलपलोयनेऽपि असंमत्तंस्स मे न जुज्झस्स खणपि जीविउं, केवलं वञ्छ । अहं कुले एसं समायारो-  
मंतेहि पमुं विरमभिमंतिऊणं कुडुवस्स भक्खणत्थं पणामिज्झइ, पञ्छा अप्पां उवसंहरिज्झइ, एवं कएं पुत्ताइसंतं-  
णस्स कत्ताणं हवइ, तां संपाडिज्जउ मे एको पसू जेणऽहं तहा करेमिं, परितुट्ठेण समप्पिओ पुत्तेण, तेणावि घया-  
इणा अप्पाणं अम्मंगिऊण उवलणियाओ पइदियहं भुंजावंतेण कुट्टवाही संचारिओ तस्स, वाहिसंभिन्नगत्तं च तं  
मुणिऊण आहओ तेण जेट्टपुत्तो, भणिओ य-पुत्त ! एस पसू मए अभिमंतिओ वट्टइ, ता तुमं सपरियणो एयमंस-  
मुवमुंजसु जेण कत्ताणभागी भवसिं, अहंपिं सरीरचायं करेमिं, तहा कयं पुत्तेण, संकंतो यं तम्मंसभोयणेणं संपरि-  
यणस्स तस्स कुट्टवाही, तओ पइट्टहियओ सो निग्गओ नयराओ, पइदिणं गच्छमाणो पत्तो महाडविं च, तत्थं य-  
गिम्भुम्भकिलंतो तण्हासुसियकंठो संलिलत्तेसणत्थं इओ तओ परिब्भमंतो गओ एगं गिरिनिगुंजं, दिट्ठं च तत्थं विचि-  
त्तकसायतरुपत्तपुष्पफलरसपागंकलिलं संलिलं, तं च आकंठं पीयमणेणं, तं वसेण य जाओ से विरेगो, निवडियाइं किं-  
मिजालाइं मुज्झिउमारदं सरीरं, एवं च अणुदिणं तप्पाणेण पणट्टकुट्टवाही जायपुणन्नवसरीरो नियत्तिऊण गओ  
सगिहं, तहिं च गलंतकुट्टविणट्टदेहं पुत्ताइपरियणं दट्ठूण सामरिसं जंपियं तेण-अरे पेच्छइ नियदुविलसियाणं  
कडुवियाणं, तेहिं भणियं-कहं चियं?, एवं पुच्छिणं तेण सिट्ठो पुव्वुत्तंतो । ताणि य एवमायत्तिऊण रुट्ठाइं अको-  
सिउमारदाइ । कहं चियं ?—



श्रीगुणचंद  
महावीरच०  
८ प्रस्तावः  
॥३३२॥

रे पावकम्म ! निग्घिण ! चिलायसमसील ! एरिसं काउं । अज्जवि अम्हाण पुरो कह नियवयणं पयासेसि ? ॥ १ ॥  
मायंगाणवि अणुचियमेवविहकम्ममायरंतेण । नरयंमि पाडियाओ कुलकोडीओ असंखाओ ॥ २ ॥  
दुज्जम्मजाय ! तुमए लोयपवाओऽवि एस किन्न सुओ । जं सकरवट्ठिओ विसतरुत्ति नो छिंदिउं जुत्तो ? ॥ ३ ॥  
इय गेहजणेण बहुप्पयारदुव्वयणदूमियसरीरो । तत्तो विणिकखमित्ता संपत्तो एत्थ नयरम्मि ॥ ४ ॥  
लुहाभिहओ य अल्लीणो नयरदुवारपालस्स, तेणावि किंपि भोयणविसेसं दाऊण भणिओ-अरे इह दुवारदे-  
वयाए समीवट्ठिओ चिट्ठेज्जासु जाव अहं भयवंतं महावीरं वंदिऊण आगच्छामित्ति, पडिवन्नं च तेण, इयरोऽवि  
आगओ मम वंदणत्थं, तत्थ य पत्थावे ऊसवविसेसवसओ पुरनारीजणो बलिपूयलियाईहिं तीसे दुवारदेवयाए पूयं  
करेइ, सो य माहणो रोरव अच्छिन्नवंछो तं बलिं भक्खिऊण पकामाहारेण रयणीए समुप्पन्नतण्हो अइभरियपो-  
ट्ठत्तणेण अंतो अमायंते सलिलंमि अट्ठज्झाणोवगओ मरिऊण इहेव नयरादूरवत्तिणीए पउरजलभरियाए बावीए  
दहुरो जाओ, तत्थ य जाव पज्जत्तीभावमुवागओ ताव निसामेइ जलवाहिविलयाणं परोप्परोल्लावं, जहा-हले ! हले  
सिग्घं पयच्छसु मे मग्गं जेण कयकायवा झत्ति भयवंतं महावीरं वंदामित्ति, एयं च सुणंतस्स कत्थवि मए एस  
सद्दो सुयपुव्वोत्ति ईहापोहमग्गणं कुणंतस्स समुप्पन्नं से जाईसरणं, सुणिओ पुव्वजम्मो, तओ अहंपि तं भयवंतं  
वंदामित्ति चिंतिऊण भत्तीए नीहरिओ बावीओ, पयट्ठो आगंतुं रायमग्गेण, तक्खणं च तुह तरलतुरयखरखुरप्प-

सेडुक-  
द्विजकथा.

॥ ३३२ ॥

हारजजरियसरीरो सुहज्जवसायवसेण मओ समाणो दहरंके विमाणे देवत्तणेणमुप्पत्तो, अवहिमुणियपुव्ववइयरो य मम वंदणत्थं आगओ । ता देवाणुप्पिया ! न एस कुट्ठी, किंतु-सुरोत्ति ॥

सेणिएण भणियं-भयवं ! कीस् पुण इमेण मया छीए भणियं-जीव, अभयकुमारेण छीए-जीव वा मर वत्ति, कालसूयरिएण छिक्किए-मा जीव मा मर, तुम्हेहिं छीए भणियं-मरसुत्ति, जयगुरुणा जंपियं-सुणासु एत्थ कारणं-तुमं हि जीवमाणो रज्जसुहसुवभुंजसि, मरणे य नरयं गमिस्ससि, अओ अणेण महाणुभावेण भणियं-जीवसुत्ति । अभयकुमारोऽवि धम्मनिरतत्तणेण सावज्जवज्जणरई ता तस्स जीवमाणस्स रायलच्छिभोगो मयस्सवि सुरसोक्खलाभो, अओ जंपियं जीव वा मर वत्ति, कालसूयरिओऽवि जीवमाणो अणेगनिरवराहपाणिगणघायेणण बहुं पावमज्जिणइ, मओ पुण नियमा नरयगामी, तेण भणियं-मा जीव मा मरत्ति, अवि य—

अइदुट्ठकम्मवसओ अवस्स गंतव नरयठाणेण । नरनाहाईण परं जीवियमेकं हवइ सेयं ॥ १ ॥

तवनियमसुट्ठियाणं कल्लाणं जीवियंपि मरणंपि । जीयंतऽज्जंति गुणा मयावि पुण सोग्गइं जंति ॥ २ ॥

अहियं मरणं अहियं च जीवियं पावकम्मकारीणं । तमसंमि पडंति मया वेरं वट्ठंति जीवंता ॥ ३ ॥

जं च मए छीयंमि मरसुत्ति भणियं तत्थवि इमं निमित्तं-तुमं किमिह मचलोए विचिहावयानिवासभूए वससि?, जं न माणुस्सं विग्गहमुज्झिऊण एगंतसुहं सियं गच्छसित्ति ।

श्रीगुणचंद  
महावीरच०  
८ प्रस्तावः

॥ ३३३ ॥

अह सेणियनरिंदो पुवुत्तनरयनिवडणायन्नणं जायगाढसोगावेगो भणिउं पवत्तो-भयवं ! समग्गभुवणत्तरक्खाव-  
बद्धलक्खे तुमंमि सामिसाले किं मए नरए गंतवं ? जेण—

तुह नाममेत्तसंकित्तणंपि नासइ दिणुब्भवं पावं । कमकमलपलोयणमवि विणिवारइ दुरियरासिंपि ॥ १ ॥

एकेणऽवि तुह चलणोवरिंमि खित्तेण नाह ! कुसुमेण । चोज्जभिणं रुंदाणिवि नरयदुवाराइं रुज्झंति ॥ २ ॥

एकोऽवि नमोकारो कीरंतो तुज्झ सामि ! भत्तीए । जायइ हेऊ सग्गापवग्गसंवाससोक्खाणं ॥ ३ ॥

ता वाहिरोगसोगुब्भवाइं दुक्खाइं नाह ! विलसंति । जाव न सव्वणपुडेहिं पविसइ वयणामयं तुज्झ ॥ ४ ॥

ता कह णु नाह ! तुह नाममंतसारक्खरोहिं चिंतंतो । सेलुवुक्किन्नेहिवि होज्जा मे नरयदुहलाभो ? ॥ ५ ॥

दुग्गइगत्तभंतरपडंततेलोकएकसाहारे । नाहे तुमएवि ममं एवंविहवसणमावडियं ॥ ६ ॥

धी धी निरत्थयं मज्झ जीवियं मंदभग्गसिरमणिणो । जं एरिससामग्गीयवि जस्स इमा दुग्गई जाया ॥ ७ ॥

इय एवंविहअइगाढसोगविगलंतनयणसलिलेण । नरवइणा जयगुरुणो विन्नत्तं नरयभीएण ॥ ८ ॥

एवं च ससोगजंपिरं पुहईवइं अवलोइऊण करुणाभरमंथरनयणेण भणियं जिणेण—भो देवाणुप्पिय ! कीस संता-  
वमुवहसि ? जइविय सम्मत्तलाभाओ पुवमेव निवद्धाऊत्ति नरए निवडिस्ससि तहावि लद्धं तुमए लहिअवं, जओ

श्रेणिकस्य  
पश्चात्तापः  
भाविजिन-  
तोक्तिश्च.

॥ ३३३ ॥

खाइगसम्मदिट्ठी तुमं, आंगमिस्साए य उस्सप्पिणीए तत्तो उवट्ठित्तो पडमनाभनोमो पढमतित्थयरो भविस्ससि ।  
एवं निसामिऊण पहिट्ठो राया भणिउमाढत्तो—

जइ तित्थयरो होहामि नाह ! तुह पायपूयणपसाया । ता थेवकालिया नरयवेयणा मज्झ किं काही ? ॥ १ ॥

किं चोजं जयबंधव ! जं तुह संरणेवि मारिसेहिं लहुं । भुवणंमुंयभूयाइं सामिय ! सोक्खाइं लब्भंति ? ॥ २ ॥

अहंवा किं सोऽवि पढं सविज्जइ जोग्गयंपि दट्ठणं । जो अत्तणो न तुलं देइ पयं सेवगजणेस्स ॥ ३ ॥

एवंविहवरकल्लाणदायगं जाणिउंपि जो न तुमं । सेवेइ जो न मणुओ सो नूणं अत्तणो सत्तू ॥ ४ ॥

पयं सुचिरं जयगुरुं अभिनंदिऊण नवरं पविट्ठेण सेणिएण वाहरिओ मंतिसामंतअंतेउरपमुहो जणो, भणिओ  
य-जो जयगुरुणो समीवे पवज्जं पडिवज्जइ तमहं न वारेमि, एवं सोचां वहवे कुमारं मंतिणो सामंता अंतेउरीजणो  
नायरलोगो य निक्खंतो भयवओ समीवे, कइवयदिणावसाणे य अणेगाहिं देवकोडीहिं अणुगम्ममाणो भगवं वद्ध-  
माणो बहियां विहरिउमारद्धो ।

एंगया तदिणदिविखयाणंपि थेवपवज्जापज्जायाणं मुणीणं केवलनाणमुपज्जमाणमवलोइऊण जायंसंसओ जयगु-  
रुमापुञ्छइ-भयवं ! किमहं केवलंलोयभागी भविस्सामि न वा ?; सामिणा जंपियं-भो देवाणुप्पिय ! मा संतप्पसु,  
अंते तुलां भविस्सामोत्ति, इमं सोचां तुट्ठो गोयंमो-। अहं भयवं तेसु तेसु पुराणराइसु अइमुत्तयलोहज्झयअभय-

श्रीगुणचंद  
महावीरच०  
८ प्रस्तावः

॥ ३३४ ॥

कुमारधन्नयसालिभद्वखंदयसिवपमुहं भवजणं पद्माविऊण चंपापुरिं वच्चंतो विन्नविओ सालमहासालरायरिसीहिं-  
सामि ! तुम्हाणुण्णाए अम्हे पिट्टिचंपाए जामो, जइ पुण तर्हि गयाण सयणवग्गस्स सम्मत्ताइलाभो जायइत्ति वुत्ते  
गोअमसामीं नायगं तेसिं दाऊण भुवणिकवंधवो गओ चंपापुरिं, तर्हि च पुव्वक्कमेण विरइयंमि समोसरणे निसन्नो  
जयगुरू, आगओ चउव्विहो देवनिकाओ नयरजणो य, पत्थुया तित्थाहिवइणा धम्मदेसणा, तत्थ केणइ पत्थावेण  
सामिणा इमं वागरियं-जो नियसत्तीए अट्ठावयं विलग्गइ सो तेणेव भवेण सिज्झइ, इमं च सोचा विम्हियमणा देवा  
अन्नमन्नस्स कहिउं पवत्ता । इओ य गोअमसामी पिट्टिचंपाए नयरीए सालमहासालाणं भगिणीसुयं गागलिनरिंदं जण-  
णीजणगसमेयं पद्माविऊण इयरजणं च धम्मे ठाविऊण चंपानयरीहुत्तं गंतुं पयट्ठो, तेसिं च सालमहासालाणं अम्मापि-  
उसमेयस्स गागलिसुणिणो य सुहज्झाणवसाओ समुप्पन्नं केवलं नाणं, एवं ताणि उप्पन्ननाणाणि अलक्खियसरूवाणि  
मग्गंमि इत्ति । अह गोअमसामी तं जयगुरूवइट्ठं अट्ठावयारोहसिद्धिलाभरूवं देवपवायं सुणेइ, तेण य विम्हियहियओ  
पत्तो जिणंतियं, तओ तिपयाहिणापुव्वगं पणमिऊण जयगुरूं जाव मग्गओ पलोयइ ताव सालमहासालाइणो सामीं  
पयक्खिणेउं 'नमो तित्थस्स'त्ति भणित्ता केवलपरिसाभिमुहं पट्टिए दट्ठूण भणइ-भो भो कर्हि वच्चह ?, एत्तो एह,  
सामीं वंदहत्ति, सामिणा भणियं-गोअम ! मा केवली आसाएहि, ताहे सो खामेइ, संवेगमुवगओ चित्तेइ य-अहो  
इमेहिं महाणुभावेहिं थेवपवज्जापज्जाएणवि पावियं पावणिज्जं, अहं पुण सुचिराणुचरियसामन्नोऽवि न केवलालो-

गागल्यादि  
शालादि-  
केवलं.

॥ ३३४ ॥

यमुवलभामि, तां किमिह कीरइ?, अहवा किमणेण चिंतिएण?, वच्चामि अट्ठावयं, जेण देवेहिं इममाइदं—जो किर  
ससत्तीए अट्ठावयमारोहइ सो तेणेव भवेण सिज्झइत्ति, एवं च चिंतयतस्सं तस्स अभिप्पायं अट्ठावयकडगवासि-  
तावसोवयारं च सुणिऊण भणियं जिणेण—भो गोयम! चेइयवंदणट्ठमट्ठावयसेलं वच्चसुत्ति, तओ भयवं गोअमो पहि-  
द्वहियओ पट्ठिओ अट्ठावयं, तहिं च अट्ठावए तमेव सुरप्पवायं निसामिऊण पत्तेयं पत्तेयं पंचपंचतावससयपरि-  
यारा कुंडिन्नदिन्नसेवालयनामाणो तिन्नि कुलवइणो जहकमचउत्थल्लट्ठमपारणगदिणेसु सचित्तकंदमूलाइपरिसडि-  
यपंडुपत्तसुक्कसेवालभोइणो पढमवीयतइयमेहलासु समारूढा समाणा तक्खणं चिय तरुणतरणिभासुरोदारसरीरं  
गोयमसामीं तं पएसमणुपत्तं दट्ठूण जंपंति—अहो किमेस पीवरसरीरो समणो आरुहिही जं अम्हे महातवस्सिणो  
तवकिसियसरीरा न तरामो आरुहिउं?, एवं च तेसिं जंपंताणं भयवं गोअमो जंवाचारणलद्धीए लूयातंतुरविकर-  
मेत्तंपि निस्साए काऊण अविलंविगईए समारूढो अट्ठावयं, अह तंमि चक्खुगोयरमइकंतंमि ते तिन्निवि कुल-  
वइणो विम्बिहयमाणसा चिंतंति—जइ एस महप्पा इमिणा पहेण ओयरइ ता वयमेयस्स सिस्सा भवामोत्ति, गोअ-  
मसामीवि उसभाइजिणिंदे वंदिऊण ईसाणदिसिविभागे असोगतरुतले मणिसिलापट्टए तं रयणीवासमुवगओ ।  
एत्थ य पत्थावे वेसमणो नाम सक्कदिसापालो चेइयपूयाए पज्जंते गोअमसामीं वंदित्ता समीचे निसीयइ, भयवंपि  
समणगुणे सवित्थरं कहइ, जहा—भयवंतो साहवो अंताहारा पंताहारा विचित्ततवकिसियदेहा हवंति इच्चाइ, वेस-

श्रीगुणचंद  
महावीरचं०  
८ प्रस्तावः

॥ ३३५ ॥

मणो वितेइ-एस भयवं एरिसे साहुगुणे कहेइ, अप्पणा उ तं सरीरसिरिमुवहइ जा तियसाणवि नत्थि, इमं च तदभिप्पायं मुणिऊण गोयमसामी पुंडरीयज्झयणं परूवेइ । जहा—

पुंडरिगिणीपुरीए राया नामेण आसि पुंडरिओ । कंडरिओ से भाया पवज्जं सो पवन्नो य ॥ १ ॥

अइदुकरयाए संजमस्स सो अन्नया पराभग्गो । पवज्जं मोत्तुमणो विसयपिवासाए पारद्धो ॥ २ ॥

गुरुकुलवासं चेच्चा समागओ भाउणो समीवंमि । तेणाविह सो नातो जहेस रज्जं समीहेइ ॥ ३ ॥

ताहे पुंडरिएणं निययं रज्जं समप्पियं तस्स । तवेसो पुण गहिओ चलिओ य गुरुस्स पासंमि ॥ ४ ॥

गच्छंतो स महप्पा अणुचियआहारदोसओ मरिउं । सुद्धज्झवसाणाओ उवचियदेहोऽवि उववन्नो ॥ ५ ॥

संवट्टविमाणंमि इयरो पुण गाढकिसियगतोऽवि । रुद्धज्झवसाणाओ सत्तममहिनारगो जाओ ॥ ६ ॥ जुम्मं ।

ता ओ देवाणुप्पिय ! किसत्तमियरं च एत्थ नो हेऊ । किं तु सुहज्झवसाणं तं पुण जह होइ तह किच्चं ॥ ७ ॥

इय गोयमेण भणिए सो देवो मुणियमाणसविगप्पो । वंदित्ता भत्तीए जहागयं पडिनियत्तोत्ति ॥ ८ ॥

गोयमसामीऽवि निसावसाणे जिणविंवाइ नमंसिऊण नगवराओ ओयरंतो हरिसुन्नामियकंधरेहिं सविणयं विन्नत्तो तावसेहिं-भयवं ! अम्हे तुम्ह सिस्सा तुम्हे अम्ह धम्मगुरुणो, ता पसीयह दिक्खादानेणं, गणहारिणा जंपियं-ओ महाभावा ! तुम्हं अम्हाण य तिलोयनाहो गुरु, तेहिं भणियं-तुम्हवि अन्नो गुरु?, तओ गोयसो जयगुरुणो

वैश्रवणस्या-  
ग्रतः गौत-  
मोक्तं पुंड-  
रीकज्ञातं.

॥ ३३५ ॥

गुणसंपन्नं काउमारद्वो, ते य सुहृदं वद्विपरिणामा उवद्विथा पवइउं, पवाविथा य गणहारिणा, समप्पियाणि  
 तेहिं देवयाए रयहरणाइं, अह तेहिं पन्नरसतावससएहिं परियरिओ गंतुं पयत्तो, जाए य भोयणसमए गोय-  
 मसामिणा भणिया ते, जहा-भो देवाणुप्पिया ! किं तुम्ह पियं-भोयणं पणामिज्जउ?, तेहिं भणियं-पायसोत्ति,  
 तजो सबलद्विसंपन्नो भयवं चयमहुसणाहस्स पायसस्स पडिग्गहं भरित्ता आगओ, अक्खीणमहाणसिलद्धिसामत्थेण  
 य सवे जहिच्छाए पजेमिया, तदुव्वरियसेसं च अप्पणा भुंजति, एवंविहं च अइसयं भगवओ पेच्छिऊण ते सुहृदं  
 आणंदिया, नवरं सुकसवोलभक्खीणं पंचण्हवि तावससयाणं सुहज्जवसाणाओ केवलनाणमुप्पन्नं, कमेण य तत्तो  
 पगंता पत्ता चंपापुरिं, तहिं च दिन्नस्स सपरिवारस्सवि भगवओ छत्ताइछत्तं पेच्छंतस्स, कौडिन्नस्सवि सामिणो  
 रुयदंसणेण केवलमुप्पन्नं, एवं जायकेवलेहिं तेहिं पन्नरसद्विवि सएहिं समेओ गोयसो भयवंतं पयाहिणीकरेइ, ते य  
 पयाहिणावसाणे तित्थपणामं काऊण केवलिपरिसं पडुव्व गच्छंते पेच्छिऊण भणइ-भो किमेवं वचह?, एह सामि-  
 वंदह, जयगुरुणा कहियं-मा केवलिणो आसाएहि, तओ सो मिच्छादुक्कडंति काऊण अप्पणो नाणाणुप्पाएणं अद्धिइं  
 कुणंतो वुत्तो सामिणा-भो देवाणुप्पिय ! किं देवाणं वयणं गेज्जं? उयाहु जिणाणं?, गोअसो भणइ-जिणाणं,  
 जयगुरुणा जंपियं-जइ एव तां किं अद्धिइं पकरेसि?, जेण सए तं पुव्वचिय भणिओ, जहा-अंतं तुल्ला भविस्सामोत्ति,  
 जं पुण संपयं चिय तुह नाणं न उप्पज्जे तत्थ इमं कारणं—



श्रीगुणचंद  
महावीरच०  
८ प्रस्तावः

॥ ३३६ ॥

चिरभवपरंपरापरिचिओ सि चिररूढगाढनेहोसि । तं मे गोयम ! जेणं तेण न ते जायई नाणं ॥ १ ॥  
अइथेवसंथवुत्तोऽवि नेहभावो दुमिलओ होइ । किं पुण बहुकालन्नोन्नतुल्लसंवाससंजणिओ ? ॥ २ ॥  
एत्तो चिय विणिहयनायगव सेणाहयंमि मोहम्मि । कम्मावली दलिज्जइ लीलायच्चिय समग्गावि ॥ ३ ॥  
ता नेहपसरमुच्छिदिऊण मज्झत्थयं समायरसु । मोक्खभवाइसु किर परमसाहुणो निष्पिहा होंति ॥ ४ ॥  
इय भणिए जयगुरुणा सविणयपणओ तहत्ति भणिऊण । पडिवज्जइ तं वयणं गोयमसामी मुणिवरिंदो ॥ ५ ॥  
एवं गोयमसामीं संवोहिऊण विहरिओ तत्तो जयगुरु । अह परिभमंतो गामागरनगरसुंदरं वसुंधराभोगं कमेण  
पत्तो मिहिलापुरिं, समोसढो य माणिभद्दाभिहाणंमि चेइए, समागया ससुरासुरावि परिसा, सिट्ठो य भगवया  
अभयप्पहाणमूलो अलियवयणविरइप्पहाणो परधणपरिवज्जणमणहरो सुरनरतिरियरमणीरमणपरंमुहो आकिंचणगु-  
णग्घविओ समणधम्मो, तहा पंचाणुवयपरियरिओ गुणवयतियालंकिओ चउसिक्खावयसमेओ सावयधम्मो य ।  
तं च सोऊण बुद्धा वहवे जंतुणो, केऽवि गहियसामन्ना अन्ने पडिवन्नदंसणा जायत्ति । एत्थंतरे गोयमसामी परेणं  
विणएणं पणमिऊण जयगुरुं भणइ-भयवं ! महंतं मे कोऊहलं दूसमाए सरूवसवणविसए, कुणह अणुग्गहं, साहह  
जहाभाविरंति, भणियं जिणेण-गोयम ! भाविरमवि दूसमाए वुत्तंतं साहिजंतं एग्गमणो निसामेसु—

गौतमस्या-  
श्वासनं  
भगवतो  
मिथिला-  
गमनं.

॥ ३३६ ॥

मइ निव्वणमुवगए पंचमअरओं उ दूसमा होही । तीएँ वसां भवोऽविं हु न जणो धम्मज्जमं काही ॥ १ ॥  
मुणिणोऽवि परोप्परकलहकारिणो बहुपरिग्गहासत्ता । वट्टिस्संति न सम्मं वाहुल्लेणं सधम्मंमि ॥ २ ॥  
पासंडिणोऽवि नियनियगंथत्थपरंमुहा मयणमूढा । पम्मुकुधम्मकम्मा ओलग्गिस्संति राईणं ॥ ३ ॥  
पागयलोगो मोत्तुं कुलमेरं तेसु तेसु कज्जेसु । अचंतगरहिणसुवि वट्टिस्सइ जीविगाहेउं ॥ ४ ॥  
अत्थप्पिया य अइदप्पिया य परलिहपेच्छणपरा य । पीडिस्संति जणोहं पयंडदंडेहिं नरवइणो ॥ ५ ॥  
एकजणणीपसूयावि भाइणो जणगदवलोभेण । अन्नोन्नजीवघायं काउं दढमभिलसिस्संति ॥ ६ ॥  
धम्मच्छलेण पावं विमूढमइणो समायरिस्संति । पसुमेहकूवखणणाइएसु कम्मेसु वट्टंता ॥ ७ ॥  
भूयभविस्सत्थेसु य विन्नाणं देवयावयारो वा । विज्जा सिद्धी य वरा वाहुल्लेणं न होहिंति ॥ ८ ॥  
उम्मग्गदेसणामग्गनासणावंचणाभिरयचित्ता । गुरुणोऽवि जहिच्छाए धम्मायारं चरिस्संति ॥ ९ ॥  
तविहिंति खरं रविणो नो वरिसिस्संति समुचियं मेहा । रोगायंका मारी य विहविस्संति जणनिवहं ॥ १० ॥  
उंस्सिखलखलजणहीलणाहिं अणिमित्तऽणत्थघडणाहिं । पाविस्सइ खणमेत्तंपि नेवं सोक्खं विसिट्ठजणो ॥ ११ ॥  
चासंसहस्सा इह एकवीसइं जाव दोसपरिहीणं । दुप्पसहंतं चरणं पवित्तिही भरंहखेत्तंमि ॥ १२ ॥  
इय एसो संखेवेण तुज्झ गोयम ! मए समणुसिट्ठो । दूसमकालंसमुत्थो वुत्तंतो भवभयजणगो ॥ १३ ॥

श्रीगुणचंद  
महावीरच०  
८ प्रस्तावः

॥ ३३७ ॥

एयं सोच्चा मुणिणो संजमकज्जंमिं तह पयट्ठेह । तत्कालसमुत्थविडंबणाउ पावह जहा नेव ॥ १४ ॥  
एवं जिणेण सिट्ठे सविसेसं संजमुज्जुया जाया । समणजणा अह भयवं मिहिलानयरीउ निक्खंतो ॥ १५ ॥  
पत्तो पोयणपुरं, तहिं च संखवीरसिवभदपमुहा नरिंदा दिक्खा गाहिया, एवं च जएकनाहो महावीरो गोयम-  
सामिप्पमुहाणं चउद्दसण्हं समणसहस्साणं अज्जचंदणाईणं लत्तीसाइ अज्जियासहस्साणं आणंदसंखपमुहएगूणस-  
ट्ठिसहस्ससमहियस्स सावयलक्खस्स सुलसारेवईपमुहाणं तिण्हं सावियलक्खाणं अट्टारससहस्सहिगाणं तिण्हं चउ-  
द्दसपुविसयाणं अट्टण्हं अणुत्तरोववाइयसयाणं मग्गदेसगत्तं गुरुत्तं सामित्तं उवहंतो नाणकिरणोहिं तमनियरमवहरंतो  
चिरं विहरिओ वसुंधराए । अह अग्गिभूइवाउभूईवियत्तमंडियमोरियपुत्ताकंपियायलभाइमेयजपहासनामेसु नवसु  
गणहरेसु सिद्धिं गएसु केत्तियंपि कालं भवसत्तपडिवोहणं काऊण अप्पणो मोक्खगमणकालं पचासन्नमुवलक्खिऊण  
भयवं वद्धमाणो गओ असेसदेसलद्धपसिद्धीए पावापुरीए, तहिं च नियभुयनिहलियपडिवक्खो हत्थिपालो नाम नरिंदो,  
तस्स अणेगखंभसयसमहिट्ठियाए विसिट्ठविचित्तचित्तकम्ममणहराए पवरसालभंजियाभिरामदुवारतोरणाए सवसत्तो-  
वरोहरहियाए महइमहालियाए सुंकसालाए नरिंदाणुत्तापुरस्सरं ठिओ चरिमवासारत्तंमि जयगुरू । कमेण पत्तंमि जय-  
गुरू कत्तियस्स अमावसादिणे अप्पणो उवरि केवलालोयविग्घकारयं सिणेहं कुणंतं गोयमं भणइ-भो देवाणुप्पिय !  
एत्थ पचासन्नगामे गंतूण देवसम्माभिहाणं माहणं पडिवोहेसुत्ति, जं सामी आदिसइत्ति जंपिऊण गओ गोयमो,

दृश्यमाख-  
रूपं वीर-  
वर्पत्संख्या.

॥ ३३७ ॥

कयं जहाइदं, वुत्थो य तत्थ । अह तस्स चेव दिणस्स पच्छिमनिसाए साइरिक्खंमि वट्टमाणंमि तीसइवरिससंखं  
 केवलपज्जायं परिपालिऊण कयछट्ठतवोकम्मो पलियंकासणसंठिओ भयवं महावीरो सबसंवररूवं सेलेसिं जावज्जवि  
 न एवज्ज ता असंभमुब्भंतनयणनलिणीवणेण तकाळुग्गमंतभासरासिक्खरग्गहविभावियजिणसासणोवपीडेण सबहु-  
 माणं विज्जसो सकेण—

भयवं । कुणह पसायं विगमह एवंपि ताव सणमेकं । जावेस भासरासिस्स नूणमुदओ अवफमइ ॥ १ ॥  
 जं एगस्सुदएण तुम्हं तित्थं फुत्तित्थिएहिं दढं । पीडिस्सइ सकारं न तदा पाविस्सइ जणाउ ॥ २ ॥  
 न य तुमहे असमत्था एवंविहकज्जसादणे जेण । जो तोलइ तदलोकां वलेण का तस्स इह गणणा ? ॥ ३ ॥  
 तगा—कहउणंतसत्तिजुत्ता जिणा इवंतित्ति वयणमवि अम्हे । पत्तिज्जिस्सामोपहु ! जइ न तुमं ठारि सणमेकं ॥ ४ ॥  
 अह जयगुरुणा भणियं सुरिंद ! तीयाइतिविहकालेऽपि । नो भूयं न भविस्सइ न हवइ नूणं इमं कज्जं ॥ ५ ॥  
 जं आउकम्मयिगमेऽपि कोपि अब्बेज्ज समयमेत्तमवि । अशंतानंतयिसिद्धसत्तिपग्गभारजुत्तोऽपि ॥ ६ ॥  
 अवि जोडिज्जइ सयखंडियंपि पयरागरुग्गभयं रयणं । परिसडियमाउदलियं न उ तीरइ कहवि संपडिउं ॥ ७ ॥  
 ता जइ अशंतमभूयमत्थमम्हे न साहिमो एगं । किं एत्तिएण नाणंतसत्तिणो ? गुणयु ता मोद्धं ॥ ८ ॥  
 इय बोहिऊण सकं सेलेसिं जयगुरु समारुहिउं । समगं भिय पेगणिगाउनामगोसाइं सपिऊण ॥ ९ ॥

श्रीगुणचंद  
महावीरच०  
८ प्रस्तावः  
॥३३८॥

जस्सट्ठाए कीरइ पुरमंदिररज्जलच्छिसंचागो । मुच्चइ सिणेहवंधुरवंधवज्जणगाढपडिवंधो ॥ १० ॥  
आयाविज्जइऽसइ गिम्हुम्हवण्हिसंतत्तसकरुकेरे । भूमीयलंमि हिमकणदुविसहे सीयकालेऽवि ॥ ११ ॥  
भुंजिज्जइऽसइ सुदुंछतुच्छमरसं च भोयणं पाणं । निवसिज्जइ भीमसुसाणसुन्नगिहरन्नमाईसु ॥ १२ ॥  
सेविज्जंति पइदियहमेव वीरासणाइठाणाइं । छट्ठमाइदुकरतवचणाइं पि कीरंति ॥ १३ ॥  
अहियासिज्जइ नरतिरियदेवविहिओवसग्गवग्गोऽवि । न गणिज्जइ दुविसहो परीसहाणं पवंधोऽपि ॥ १४ ॥  
तिहुयणपणमियचलणो भवभयमहणो जिणो महावीरो ।

उभउच्चिय एगागी तं मोक्खपयं समणुपत्तो ॥ १५ ॥ सत्तहिं कुलयं ।

अह सवेऽवि सुरिंदा चउविहदेवेहिं परिवुडा झत्ति । चलियासणा वियाणियजिणनिवाणा समोइत्ता ॥ १६ ॥  
विगयाणंदा बाहप्पवाहवाउलियनयणपम्हंता । जगनाहस्स सरीरं नमिउमदूरे निसीयंति ॥ १७ ॥  
अह सोहम्माहिवई गोसीसागरूपमोक्खदारूहिं । नंदणवणाणिएहिं चियमेगंते रया चित्ता ॥ १८ ॥  
अह सुरहिखीरसायरजलेण ण्हविज्जण जिणवरसरीरं । हरिचंदणोवलित्तं नियंसियामलदुगूलं च ॥ १९ ॥  
सट्ठाणपिणद्धविचित्तरयणकिरणुब्भडाभरणरुइरं । सिवियाए संठवित्ता नेइ चियाए समीवंमि ॥ २० ॥  
अह देविंदेसु जयजयारवं निब्भरं कुणंतेसु । कुसुमुकरं मुयंतेसु सवओ खयरनियरेसु ॥ २१ ॥

इन्द्रप्रार्थना  
निर्वाणं च०

॥ ३३८ ॥

नचंतीसु सुरसुंदरीषु तूरेषु वज्रमाणेषु । अबंतसोगविहारे संधंभि य संधुणंतंभि ॥ २२ ॥  
अग्निकुमाराण जलणजालजालापलीचियाए लहुं । आरोर्विति चियाए जिणवुंदिं असुरसुरवइणो ॥ २३ ॥  
वाउकुमारा वायं कुणंति अघरे सुरा पुण खिवंति । गंधहधूवमुट्ठिं घयमहुकुंभे य पुणरुत्तं ॥ २४ ॥  
मंसाइएसु दंडेसु तो चियं निव्वित्ति थणियसुरा । खीरोयवारिधारार्हिं सिसिरगंधाभिरामार्हिं ॥ २५ ॥  
अह पडुणो उवरिल्लं मंगलकएण दाहिणं सकहं । गिणहइ सको हेट्ठिल्लयं च चमरो असुरराया ॥ २६ ॥  
ईसाणिंदो वामं उवरिल्लं तस्स हिट्ठिमं च वली । इयरे सुरासुरिंदा जहारिहं अंगुवंगाइं ॥ २७ ॥  
तत्तो चियाय ठाणे विचित्तरयणेहिं विरइयं थूमं । निव्वाणगमणमहिमं जत्तेण कुणंति जयगुरुणो ॥ २८ ॥  
अह निव्वत्तियतकालजोग्गनीसेसनिययकायवा । सोगभरमंथरगिरं एवं भणिउं समाढत्ता ॥ २९ ॥  
अज्जं चिय अत्थमिओ दिवायरो अज्ज भारहं खेत्तं । अवहरियसाररयणं जायं नाहे सिवं पत्ते ॥ ३० ॥  
एत्तो पयंडभववेरिपीडियाणं पणट्ठुवुद्धीण । अम्हारिसाण सरणं को होही नाह ! तुह विरहे ? ॥ ३१ ॥  
ससुरासुरं पि भुवणं मत्ते निप्पुन्नयं समग्गं पि । अन्नह कुलसेलाऊ हुंतोसि तुमं जिणवरिंदा ! ॥ ३२ ॥  
अहवाऽवस्संभाविषु वत्थुसु संतावकप्पणा विहला । एकमियाणिं विजयउ सइ तित्थं तुज्झ जयनाह ! ॥ ३३ ॥  
इय जंपिऊण दुस्सहजयगुरुविरहग्गिदूमिया सका । नंदीसरंमि गंतुं काउं अट्ठाहियामहिमं ॥ ३४ ॥

श्रीगुणचंद  
महावीरच०  
८ प्रस्तावः

॥ ३३९ ॥

वचंति देवलोगं वहरामयवट्टवरसमुग्गेसु । जिणसंकहाओ ताओ खिवंति जत्तेण पूइत्ता ॥ ३५ ॥  
अहं सा जिणस्स निवाणजामिणीसुरतनूकउज्जोया । दीवूसवोत्ति अज्जवि पइवरिसं कीरइ जणेण ॥ ३६ ॥  
गोअमसामीवि नहोयरंतसुरवरविमाणपेच्छणओ । नाउं जिणनिवाणं चिंतेउमिमं समाढत्तो ॥ ३७ ॥  
एकदिणमेत्तकज्जेण कीस नाहेण पेसिओऽहमिहं ? । चिरसंथुएसु किं वा जुज्जइ एवंविहं काउं ? ॥ ३८ ॥  
हा हा अहं अहन्नो जो सुचिरं सेविऊण कमकमलं । पज्जंते जयगुरुणो संपइ विच्छोहिओ एवं ॥ ३९ ॥  
अहवा जिणंमि वोच्छिन्नपेमदोसंमि कीस हे हियय ! । पढमं चिय पडिवंधं कुणसि ? जमेत्तो वहसि सोगं ॥ ४० ॥  
संसारवल्लिजलसारणीसमो दुग्गदुग्गइदुयारं । सिवसोक्खकंखिराण मूलमणत्थाण पडिवंधो ॥ ४१ ॥  
ते धन्ना सप्पुरिसा लीलाए चिय निसुंभिओ जेहिं । सुहहरिणक्खयकारी मोहमहाकेसरिकिसोरो ॥ ४२ ॥  
इय सुक्कज्झाणानलनिदह्वणघाइकम्मदारुस्स । गोअमपहुस्स सहसा उप्पन्नं केवलं नाणं ॥ ४३ ॥  
वारस वासाइं विवोहिऊण भवे सिवं गए तंमि । भयवं सुहम्मसामी निवाणपहं पयासेइ ॥ ४४ ॥  
तंमिवि चिरकालं विहरिऊण सिरिजंबुसामिणो दाउं । गच्छगणाणमणुन्नं संपत्ते सिद्धिवासंमि ॥ ४५ ॥  
एवं विज्जाहरनरसुरिंदसंदोहवंदणिज्जेसु । समइकंतेसु महापहसु सैज्जंभवाईसु ॥ ४६ ॥  
अइसयगुणरयणनिही मिच्छत्ततमंधलोयदिणनाहो । दूरुच्छारियवइरो वइरसामी समुप्पन्नो ॥ ४७ ॥

इन्द्रादिभि-  
रंगादि-  
नयनं  
निर्वाण-  
महश्च.

॥ ३३९ ॥

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिब ॥ ४८ ॥  
 बहलकलिकालतमपसरपूरियासेसविसमसमभागो । दीवेणं व मुणीणं पयासिओ जेण मुत्तिपहो ॥ ४९ ॥  
 मुणिवइणो तस्स हरअट्टहाससियजसपसाहियासस्स । आसि दुवे वर सीसा जयपयडा सूरससिणोव ॥ ५० ॥  
 भवजलहिवीइसंभंतभवियसंताणतारणसमत्थो । वोहित्थोव महत्थो सिरिसूरिजिणेसरो पढमो ॥ ५१ ॥  
 गुरुसाराओ धवलाउ सुविहिया (निम्मला पु.) साहुसंतई जाया । हिमवंताओ गंगव निग्गया सयलजणपुज्जा ॥ ५२ ॥  
 अन्नो य पुत्तिमायंदसुंदरो बुद्धिसागरो सूरि । निम्मवियपवरवागरणलंदसत्थो पसत्थमई ॥ ५३ ॥  
 एगंतवायविलसिरपरवाइकुरंगभंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥  
 संवेगरंगसाला न केवलं कवविरयणा जेण । भवजणविम्हयकरी विहिया संजमपवित्तीवि ॥ ५५ ॥  
 ससमयपरसमयधू विसुद्धसिद्धंतदेसणाकुसलो । सयलमहिवलयवित्तो अन्नो ऽभयदेवसूरित्ति ॥ ५६ ॥  
 जेणालंकारधरा सलक्खणा वरपया पसन्ना य । नवंग (सिद्धंत पु.) वित्तिरयणेण भारई कामिणिघ कया ॥ ५७ ॥  
 तेसिं अत्थि विणेओ समत्थसत्थत्थवोहकुसलमई । सूरि पसन्नचंदो चंदो इव जणमणाणंदो ॥ ५८ ॥  
 तवयणेणं सिरिसुमइवायगाणं विणयेलेसेण । गणिणा गुणचंदेणं रइयं सिरिवीरचरियमिमं ॥ ५९ ॥  
 एयस्स विरयणंमी निव्वंधो जेसि गाढमुप्पन्नो । ते पुण मूलाओ चिय साहिज्जंते निसामेह ॥ ६० ॥



श्रीगुणचंद  
महावीरच०  
८ प्रस्तावः

॥ ३४० ॥

सियजसजोणहाधवलियनायकुलनहयले मयंकुव । पुवमहेसि नहेसीपणओ सिरिजीवदेवपहू ॥ ६१ ॥  
तस्स सुसिस्सो सिद्धंतसिद्धसुविसिद्धसंजमाभिरओ । गुणरयणरोहणगिरी पयडो जिगद्धत्तसूरित्ति ॥ ६२ ॥  
गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुल्लो जए जाओ ॥ ६३ ॥  
तेहिंतो पडिबुद्धो वायडकुलभवणजयपडायनिभो । कण्णडवाणिज्जपुरे सेट्ठी गोवद्धणो आसि ॥ ६४ ॥  
नंदीसरावलोयणमणाण भव्वाण दंसणत्थं च । कारावियं सुतुंगं वावन्नजिणालयं जेण ॥ ६५ ॥  
धम्मधरणीए गिहिणीए तस्स सोढित्ति नामधेयाए । अगणियगुणगणनिलया पुत्ता चत्तारि उप्पन्ना ॥ ६६ ॥  
पढमो अम्मयनामो वीओ सिद्धोत्ति जज्जणागो य । तइओ चउत्तयओ पुण विक्खाओ नन्नओ नाम ॥ ६७ ॥  
नयविणयसच्चधम्मत्थसीलकलिणहिं जेहिं दिट्ठेहिं । नूणं जुहिट्ठिलार्इवि सइहिज्जंति सण्णुरिसा ॥ ६८ ॥  
अह संथारयदिकखं पवज्जिउं भावसारमंतंभि । गोवद्धणंभि सग्गं गयंभि तह पढमपुत्तदुगे ॥ ६९ ॥  
सो सेट्ठी जज्जणागो उत्तावल्लीए वासमकरिंसु । सबकणिट्ठो नन्नयसेट्ठी पुण मूलठाणेवि ॥ ७० ॥  
तेसिं च भइणिपुत्तो नियपुत्ताओवि गाढपडिवंधो । आसि जसणागनामो सेट्ठी सुविसिद्धगुणनिलओ ॥ ७१ ॥  
अह नन्नयस्स पुत्ता पयडा सावित्तिकुच्छिसंभूया । दोन्नि चिय उप्पन्ना गोवाइचो कवड्डी य ॥ ७२ ॥  
सत्तुंजयपमुहसमत्थतित्थजत्ता पयट्ठिया जेण । पढमं चिय तस्स कवड्ढिसेट्ठिणो को समो होज्ज ॥ ७३ ॥

ग्रन्थ-  
कुत्प्रशस्तिः

॥ ३४० ॥

पुरिसत्थकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तमिह सुंदरी नाम ॥ ७४ ॥  
 जाओ तीसे सुंदरविचित्तलक्खणविराइयसरीरो । जेट्ठो सिट्ठो पुत्तो वीओ पुण वीरनामोत्ति ॥ ७५ ॥  
 को तेसि दाणविन्नाणवुद्धिसुविसुद्धधम्मगेहाण । निउणोऽवि गुणलवंपिहुं होज्ज समत्थो य वित्थरिउं ? ॥ ७६ ॥  
 नागो इव पिंडिज्जइ वंभंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥  
 जिणविंशसुपसत्थतित्थजत्ताइधम्मकरणेण । धम्मियजणाण मज्झे जेहि य पत्ता पढमरेहा ॥ ७८ ॥  
 अन्नाणतण्हसमणी सुयनाणपवा पयट्ठिया जेहिं । सयलागमपोत्थयलेहणेण निचंपि भवाण ॥ ७९ ॥  
 तेहिं तित्थाहियपरमभत्तिसवस्समुवहंतेहिं । वीरजिणचरियमेयं कारवियं मुद्धवोहकरं ॥ ८० ॥  
 जमजुत्तमेत्थ भणियं नियमइदुब्बलओ मए किंपि । तं साहंतु गुणट्ठा ओच्छाइयमच्छरा विउसा ॥ ८१ ॥  
 छत्तावल्लिपुरीए सुणिअंवेसरगिहंमि रइयमिमं । लिहियं च लेहणं माहवनामेण गुणनिहिणा ॥ ८२ ॥  
 नंदसिहिरुइसंखे(११३९)वोक्कंते विक्रमाओ कालंमि । जेट्ठस्स सुद्धतइयातिहिंमि सोमे समत्तमिमं ॥ ८३ ॥

निहयसयलविग्घोऽणप्पमाहप्पजुत्तो जयइ जयपसिद्धो वद्धमाणो जिणिंदो ।

तयणु जयइ तस्सासंखसोक्खेक्कमूलं, गरुयभवभयाणं नासणं सासणं च ॥ ८४ ॥

श्रीगुणचंद  
महावीरच०  
८ प्रस्तावः

॥ ३४१ ॥

असिवसमणदक्खो पाणिणं कप्परुक्खो, जयइ जयपयासो पासनाहो जिणेसो ।  
तयणु जयइ वाणी दिवपंकेरुहत्था, सुयरयणधरिती पंकयालीणहत्था ॥ ८५ ॥  
इय जिणवरवीरस्सऽट्ठमो ताव वुत्तो, परमपयपयाणो नाम पत्थाव एसो ।  
चरियमवि समत्तं एयसंकित्ताओ, हवउ सुहकरं वो नूणमाचंदसूरं ॥ ८६ ॥  
एयं वीरजिणेसरस्स चरियं जे भावसारं जणा, वक्खाणंति पढंति निच्चलमणा निच्चं निसामिंति य ।  
तेसिं इट्ठविओगऽणिट्ठपडणादोगचरोगावया-पामोक्खं खयमेइ दुक्खमखिलं सोक्खाणि वट्ठंति य ॥ ८७ ॥


॥ ग्रंथाग्रं. १२०२५ ॥ शुभं भवतु श्रीसंघस्य ॥

यावल्लवणसमुद्रौ यावन्नक्षत्रमंडितो मेरुः ।  
यावच्चन्द्रादित्यौ तावदिदं पुस्तकं जयतु ॥

इति श्रेष्ठि-देवचन्द्र लालभाई-जैनपुस्तकोद्धारे ग्रंथाङ्कः ७५ ॥

ग्रन्थ  
कृतप्रशस्तिः

॥ ३४१ ॥



इइ सिरिचन्दकुलीणऽभयदेवसूरिपट्टपहुसिरिपसण्णचंदसूरिवयणेण सिरिसुमइ-  
वायगविणेयगणिसिरिगुणचन्दनिम्मियं कप्पडवाणिज्जभिजण-  
गोवद्धणसुतजज्जणागपुत्तसिट्ठवीरग्गहकारियं  
**सिरिवीरजिणचरियं सम्मत्तं.**

इति श्रेष्ठि-देवचन्द लालभाई-जैनपुस्तकोद्घारे ग्रंथांकः ७५ ॥

भागमोदय समितिना ग्रंथो

श्रीमज्जैनसिद्धान्तवाचनाप्रकाशनकारिका

शेठ दे० ला० जै० पु० फंडना ग्रंथो.

नंदीमूत्र	२-४-०
अनुयोगद्वार...	२-८-०
स्थानांग उत्तरार्ध...	४-०-०
भगवतीमूत्र तृतीयभाग....	३-४-०
विचारसार प्रकरण...	०-८-०
निरयावली मूत्र...०	०-१२-०
विशेषादयक गाथा	०-५-०
विषयाकारादि क्रम	
गच्छाधार पयसो...	०-६-०
धर्मविंदु प्रकरण...	०-१२-०
विशेषादयक भाष्य मूल	२-०-०
स्था टिकानुं गुजराती	
भाषान्तर भा. १ लो.	
रायपसेणो....	१-८-०
जैन फीलीसोफी...	१-०-०
योग	०-१४-०
कर्म	०-१२-०

# श्रीमती आगमोदयसमिति:

स्थापना:-श्रीमल्लीतीर्थे वीर सं० २४४१ माघशुक्लदशम्याम्।

००००  
मिति



सं० १९८२

प्राप्तिस्थान:-

मास्तर विजयचंद मोहनलाल

ठे० दे० ला० धर्मशाळा, गोपीपुरा-सुरत.

आनंद काव्य म० मौ०	४ शुं०-१२-०
"	५ शुं०-१०-०
"	६ शुं०-१२-०
श्राद्ध प्रतिक्रमण मूत्र	२-०-०
सेन प्रश्न (प्रश्नोत्तर रत्नाकर)	१-०-०
आवश्यक टीप्पण	१-१२-०
जंबुद्वीप प्रज्ञप्ति सटीक उत्तरार्ध	२-०-०
श्रीपालचरित्र संस्कृत	०-१४-०
मुक्त मुक्तावली	२-०-०
प्रवचन सारोद्धार सटीक पूर्वार्ध	३-०-०
तंदुल वैयालीय पयसो सटीक	१-८-०
विंशति स्थानक पद्यकण्ठ	१-०-०
कल्पमूत्र सुबोधिका	२-०-०
सुबोध सभाचारो	०-८-०
श्रीपाल चरित्रप्राकृत सावचुर्णिक	१-४-०